


Ɛlinjil ɛn Ƴaysa Ɛlməsix Itawann-as deƳ Arkawal
wa Aynayan



Tamajaq, Tawallammat: Ɛlinjil ɛn Ƴaysa Ɛlməsix Itawann-as
deƳ Arkawal wa Aynayan New Testament

**Ēlinjil ən Ȳaysa Ēlməsix Itawann-as dex
Arkawal wa Aynayan
Tamajaq, Tawallammat: Ēlinjil ən Ȳaysa Ēlməsix
Itawann-as dex Arkawal wa Aynayan New Testament
Le Nouveau Testament en tamajaq tawallammat,
écriture latine**

copyright © 2015 Wycliffe Bible Translators, Inc.

Language: Tamajaq, Tawallammat

Contributor: SIM International

All rights reserved.

2020-12-01

PDF generated using Haiola and XeLaTeX on 22 Feb 2024 from source files dated 29 Jan 2022

3aaeb7b2-4a3b-51fe-8c2d-ed8c05d4be0f

Contents

Matta	1
Markus	69
Luqa	111
Yaxya	180
Igitan ən Nəmmuzal	228
Kəl-Ərrum	294
1 Kəl-Korent	325
2 Kəl-Korent	355
Kəl-Galatəya	375
Kəl-Efez	386
Kəl-Filib	397
Kəl-Kolosəya	404
1 Kəl-Tesalonik	411
2 Kəl-Tesalonik	418
1 Timotay	422
2 Timotay	431
Titəs	437
Filemona	441
Kəl-Ÿibri	443
Yaqub	464
1 Butros	472
2 Butros	481
1 Yaxya	486
2 Yaxya	493
3 Yaxya	494
Yuday	496
Əlkəttab wa n Ənəfilal	499

Elinjil wa n Matta

Təhəwt ən Ƴaysa d ətəwəsəmutəg-net y əššəyəl wa z'agu

Aljadan ən Ƴaysa əd təhəwt-net

Aljadan ən Ƴaysa Elməsix

¹ Əntanay da esmawan n aljadan ən Ƴaysa Elməsix, ahaya n ənnəbi Dawəd, d ənnəbi Ibrahim:

² Ibrahim eraw Isəhaq.

Isəhaq eraw Yaqub.

Yaqub eraw Yahuda əd mədrayan-net.

³ Yahuda eraw Farəs əd Zarax,

anna-nasan esəm-net Tamar.

Farəs eraw Xasrun.

Xasrun eraw Ram.

⁴ Ram eraw Ƴaminadab.

Ƴaminadab eraw Naşon.

Naşon eraw Salmuna.

⁵ Salmuna eraw Boxaz was anna-net Rahab.

Boxaz eraw Ƴubayd was anna-net Rut.

Ƴubayd eraw Yasay.

⁶ Yasay eraw Dawəd wa n əmənokəl.

Dawəd eraw Suliman was anna-net tantut n Urəyya.

⁷ Suliman eraw Roxoboham.

Roxoboham eraw Abəya.

Abəya eraw Aza.

⁸ Aza eraw Yahuşafat.

Yahuşafat eraw Yuram.

Yuram eraw Ƴuzəyas.

⁹ Ƴuzəyas eraw Yutam.

Yutam eraw Axaz.

Axaz eraw Xizqəyyas.

¹⁰ Xizqəyyas eraw Manaşša.

Manaşša eraw Amun.

Amun eraw Yuşəya.

¹¹ Yuşəya eraw Yakunəya əd mədrayan-net.

Azzaman win den əntanay

a daɣ tawayan Kəl-Israyil

əmmewayan s akal ən Babəylon

əqqalan daɣ-as ikefəlan.

¹² Dəffər adi, eraw Yakunəya Şalatəyel.

Şalatəyel eraw Zərubabil.

¹³ Zərubabil eraw Abihud.

Abihud eraw Alyaqim.

Alyaqim eraw Yazur.

¹⁴ Yazur eraw Saduq.

Saduq eraw Xakim.

Xakim eraw Eløyud.

¹⁵ Eløyud eraw Elyazar.

Elyazar eraw Mattan.

Mattan eraw Yaqub.

¹⁶ Yaqub ænta a erawan Yusəf

wa izlafan Maryama ta terawat Yaysa

was itawannu Əlməsix.

¹⁷ Dağ adi maraw meddan d ækkoz a əllanen gər Dawəd d əmaraw-net Ibrahim. Əllân-tu maraw d ækkoz gər Dawəd d azzaman win ətəwəkfal ən Kəl-Israyil əs Babəylon, əllân-tu değ maraw d ækkoz gər ətəwəkfal ən Kəl-Israyil əs Babəylon əd təhəwt ən Yaysa.

Təhəwt ən Yaysa wa n Əlməsix

¹⁸ Ənta da əmmək was d-iggaz Yaysa Əlməsix əddənet: Maryama ta n anna ən Yaysa, imirakan dər-əs Yusəf azalaf. Mişan harwa da wər təzlay əs Yusəf, as təga tadist, əs tarna n Infas wa Zəddigan. ¹⁹ Yusəf, imosan aləs oğadan, wər ira əsəkkərukəd ən Maryama dağ aytedan. Awen dağ a fəl isammarkas dağ man-net as a dər-əs iyrəd da wər t-illa i əhan salan-nasan. ²⁰ Isamadran dağ awen da as t-in-ibaz etəs inafalal-as-du angalos n Əməli dağ targət, inn-as: «Yusəf, ahaya ən Dawəd, a kay-wər-təggəz tasa n azalaf ən Maryama, fəlas barar wa ihan tadist-net, Infas wa Zəddigan a d-ifal. ²¹ Ad təgrəw barar amaran kay ag-as esəm Yaysa fəlas ənta a z'assafsin tamattay-net dağ bakkadan.» ²² Arat wa kul iga fəl ad andu awal wa d-imal Məşşina əs tarrayt n ənnəbi Isayas as inna: ²³ «*Ad tagu təmawat tadist da wər təzday meddan, təgrəw barar. Barar wədi a das-itəwəggu esəm Emanəwel, almayna: Məşşina illâ yur-na.*»

²⁴ As d-inkar Yusəf dağ etəs, immozal s arat was t-omar angalos n Əməli, izlaf Maryama. ²⁵ Mişan wər kala a dər-əs inamansa har ihəw barar. As ihəw, ig-as Yusəf esəm Yaysa.

2

Tagadəzt ən musanan win dännəg Əlməsix

¹ Azzaman n Əmənokal Herod a dağ ihəw Yaysa, dağ əğrəm ən Betalxam, dağ amaçal ən Yahudəyya. Əglan-du musanan ən manayan a d-əfalnen dännəg har d-osan Yerusalam. ² Ənnan: «Ma iga əmənokal ən Kəl-Əlyəhud wa ihəwan da səket? Atri-net a nənay dağ dännəg, amaran nəkk-ay-du y a das-nəssəjəd.» ³ Arat wa as t-islə əmənokal Herod, iga aşşawaşa zəwwəran, ənta harkid Kəl-Yerusalam

kul. ⁴ Iššedaw-du imuzaran ən limaman, əd musanan n Əttawret, issəstən-tan d adag wa daɣ z'ihəw Əlməsix. ⁵ Ənnan-as: «Aɣrəm ən Betalxam a daɣ z'ihəw daɣ amaɖal ən Yahudəyya, fəlas ənnəbi Mika iktâb âs: ⁶ *"Kam amaran Betalxam, ta n amaɖal ən Yahudəyya, təheɣ iɣərman win aɣaf daɣ akal ən Yahudəyya, fəlas kam a du-z-igməd əmuzar wa z'agin i tamattay-nin Israyil tizart ta itaggu amadan y aharay-net."*»

⁷ Təzzar isassaɣra-du əmənokal Herod imusanan win manayan en, imos awen arat igân daɣ əssir, issəstan-tan əd tamert tas igmad aššak as ənta daɣ d-inafalal ətri wa əmalan den. ⁸ Dəffər awen issok-en Betalxam inn-asan: «Aɣliwat, taknim asawad i dad illa barar wa ihəwan da, as tu-təgrawam, təmməram-i-du təməlam-i dad illa, fəl ad t-akka əssəjədaɣ-as nak da.» ⁹ As dasan-iɣrad əmənokal awal, əglan. Təzzar oggan atri wa dasan-inafalalan daɣ jənnawan dat awen daɣ dənnəg. Wər imməzzay ətri en ad illa dat-san, azzar-asan, as imal dənnəg adag wa iha barar, izzəkkat. ¹⁰ As ənayan atri as izzəkkat, əknan təfalawist, ¹¹ əggazan-in ehan, ənayan barar d anna-net Maryama, əgaraffen əssəjadan i barar. Dəffər adi, oran ilalan-nasan, əkkasan-as-du daɣ-san šibəddar əganen daɣ urəɣ, d əššin səqqidan əzodnen, əmosnen əzzənəf ən təxəlbast. ¹² Dəffər awen isannafalal-asan-du Məššina daɣ targət as ad wər əqqəlan Herod. Awen da a fəl obazan tarrayt iyyat əqqalan akal-nasan.

Ədərrəg əs Masar əd tawaylay ən Nazaret

¹³ Dəffər as əglân, inafalal-du angalos n Əməli i Yusəf daɣ targət, inn-as: «Ənkər, tidaway əd barar d anna-net, takka tarmad akal ən Masar taqqama daɣ-as har dak-əmələɣ assaɣa wa du-za-təqqəla, fəlas barar di ad igməy Herod əd tanaxay-net.» ¹⁴ Inkar Yusəf, iddew əd barar d anna-net, eway ehad, obaz tarrayt ikka Masar. ¹⁵ Əqqiman daɣ Masar den da har aba Herod. Arat wa iga fəl ad andu awal wa d-iga Əməli əs tarrayt n ənnəbi Osay a daɣ inna: «*Əɣre-du barar-in əssərdaxaq-q-idu Masar.*»

¹⁶ As issan Herod as imusanan win manayan əmmizrayan batu-net əɣlayan-tu, iɣašašat, omar s ad təwənɣin bararan ən yayyan kul win əhəwnen daɣ aɣrəm ən Betalxam, əd ɣələyɣələyan-net, a d-obazan ɣur əššin elan har azzaman win den, imos as tamert ten da as das-ənnan musanan win ənta daɣ d-inafalal ətri. ¹⁷ Den daɣ ad inda awal wa d-iga Əməli əs tarrayt n ənnəbi Irməya a daɣ innâ: ¹⁸ «*Təga-du təkurayt daɣ əɣrəm ən Rama, imos awen tala n aytədan fəl təga təfəyyawt. Awen Raxil ta n təmarawt ən Kəl-Israyil*

təhallit fəl bararan-net. Wər təra i das-igan əlmayiza, fəlas bararan əjwaran aba-tan.»

¹⁹ Dəffər təmattant ən Herod, inafalal angalos n Əməli i Yusəf dağ targət, dağ akal ən Masar. ²⁰ Inn-as angalos: «Ənkər, tidawağ əd barar di d anna-net, təqqəlağ akal n İsrayil, fəlas aytedan win əranen tenağay-net, aba-tan.»

²¹ Inkar Yusəf, iddew əd barar d anna-net, iqqal akal n İsrayil. ²² Mišan igraw isalan as Arkalawəs, a imosan əmənokal n akal ən Yahudəyya, dağ adag n abba-net Herod. Təzzar təggaz tasa Yusəf, ab-as ihal iki ən Yahudəyya, ikka akal ən Galilaya id Məşşina a das-d-isannafalalan awen dağ targət. ²³ Iгла ixsar dağ əxrəm as itawannu Nazaret. Emmək en dağ as əgan aratan win, fəl ad andu awal wa d-iga Əməli əs tarrayt n ənnəbitan as ənnan: «*Itawagg-as esəm aw Nazaret.*»

3

Əsəmmutəg n əşşəğəl wa z'agu Əlməsix

Yaxya wa isalmağan dağ aman

¹ Elan dəffər awen, issənta Yaxya wa isalmağan dağ aman igi ən təlxutbat dağ taneray ən Yahudəyya. ² Igannu: «Utabat! Illikan as, Tağmar ta n jənnawan təhöz!» ³ Yaxya en dağ a fəl imməgrad ənnəbi İsayas assağa wad inna: «*Aləs iyyan idkâl əməsli-net dağ əsuf igannu: "Səmmutəgat abaraqqa y Əməli! Təsəssiğədam tarrayen dat-əs!"*»

⁴ Yaxya ilsa tabdoq təgât dağ anzadan n əmnəs, otâb s əsatəb n ağaşək. İddâr s əjwalan əd turawat. ⁵ A t-in-tasin aytedan, əgmâdan-du Yerusalam, d akal ketnet wa n Yahudəyya, d amađal kul wa n çələyçələyan n agarew wa n Yordan, ⁶ tutaban dağ bakkadan-nasan dat tamattay, isalmaq-çan Yaxya dağ aman dağ agarew wen. ⁷ Osan-du Farisaytan aggotnen, əd Sadusaytan, y a tan-issəlməğ Yaxya dağ aman. As inay Yaxya arat wen inn-asan: «Xa taşşolen şin! Ma kawan-issosanan ədərrəg y attadib wa d-izayan ən Məşşina? ⁸ Dağ adi taggiwat imazalan olaynen təsəttəddim sər-san tətubt-nawan! ⁹ Wər igda ad təgannim dağ man-nawan: "Nakkanay əzzurrəyya n ənnəbi İbrahim a nəmos," fəlas silakanax-awan as Məşşina ifrâg ad isəmməttəy şihun şin təhannayam da, ixlək-du dağ-asnat əzzurrəyya y İbrahim! ¹⁰ Agat ənnəyat! Tazəft harwa əmərədda da təmmotag y a du-təsəddəngər y eşkan. Dağ adi aşək kul wa wər nətirəw aratan olaynen, ad itəwəxtəs, itəwəgər-in dağ təmsay! ¹¹ Nak, aman a dağ qawan-salmağa, fəl ad sənnəfilələğ s awen tətubt-nawan. Mišan wa du-z-asin dəffər-i, awa di-iga dağ şigrat, wər

eweda wala arra ən suyan ən ɣateman-net. Ænta Infas Wa Zæddigan æd tæmsay a daɣ qawan-z-issælməɣ. ¹² Iha ælmital n awedan ittâfan tesayt y ad izzəzər alkama-net. Işadaw alkama daɣ tadangawt-net, šiɣal amaran ag-enat daɣ tæmsay tæbilaglat faw.»

Alamay ən ɣaysa

¹³ Adan en da daɣ d-osa ɣaysa, igmâd-du akal ən Galilaya, ikka-du agarew wa n Yordan, y ad t-issælməɣ Yaxya daɣ aman. ¹⁴ Mişan igmay Yaxya d a daɣ-as ikkəs awen. Inn-as Yaxya: «Nak a iddəraran s a di-tæssælməɣa daɣ aman, amaran kay iman-nak a di-d-ikkan?» ¹⁵ Ijjəwwab-as ɣaysa inn-as: «Æmərædda ardu s arat wædi da, fəlas ilzam-anay ad nassandu arat kul wa ira Məşşina.» Təzzar irda Yaxya s æsælməɣ ən ɣaysa. ¹⁶ Itawasalmaɣ ɣaysa ɣas, igmad-du aman, ænnolaman jənnawan daɣ amazay wen da, ogga Infas ən Məşşina as d-igmad ijənnawan, iha şaşşelan ən tədabert, iwar-tu. ¹⁷ Igmad-du æməsli ijənnawan inna: «Ænta æddi Barar-in ækne tara, amaran ænta a d-issəndan agna-nin.»

4

Ætəwəjərrab ən ɣaysa

¹ Təzzar issoka Infas wa Zæddigan ɣaysa taneray y a daɣ-as t-ajjarrab Iblis. ² As iga ɣaysa ækkozat tæmərwen n əzəl d ækkozat tæmərwen n ahad izûm, iggaz-tu gəlæk. ³ Ihoz-t-idu Iblis a n ənəjjerrəb inn-as: «Kud kay Barar ən Məşşina, taməra šihun a s ad əqqəlnat amensay.» ⁴ Mişan inn-as ɣaysa: «Wərgəɣ ənnan Ælkəttaban: *"Aggadəm wərgəɣ imensewan ɣas as itaddar, kalar isuddur-tu ad ilkâm y awal ketnet wa d-ifalan Məşşina."*»

⁵ Ikka dər-əs Iblis aɣrəm wa zæddigan ən Yerusalam, issəbdad-tu fəl afalla n Ahan wa Zəwwəran n Ælɣibada, ⁶ inn-as: «Kud kay Barar ən Məşşina, tətərægge, fəlas ənnan Ælkəttaban: *"Ad amər Məşşina angalosan daɣ talɣanak, ækbəlan-kay daɣ fassan-nasan, fəl a dak-wər-tənkəf təhunt."*»

⁷ Inn-as ɣaysa: «Wərgəɣ za Ælkəttaban di ənnân: *"Ad wər tətajjarraba Æməli-nak Məşşina."*»

⁸ Dəffər awen ikka dər-əs Iblis afalla n ədɣaɣ iknan təzzəgrət, issəswad-tu daɣ taɣmaren kul n əddənet əd təhussay-nasnət, ⁹ inn-as: «Awa togge den kul ækfəɣ-akku as di-tæssəjada təɣbadaɣ-i.» ¹⁰ Inn-as ɣaysa: «Ugag-i, Aşşaytan! Wərgəɣ ənnan Ælkəttaban: *"Æməli-nak Məşşina as za tæssəjada, ænta ɣas a za təɣbada."*»

¹¹ Amaran oyy-ay Iblis. Əhinan-in angalosan əkkân-du Ƴaysa əssanan daɣ-as.

Ənətti n əşşəɣəl daɣ Galilaya

Ƴaysa issənta əşşəɣəl-net daɣ Galilaya

¹² As isla Ƴaysa ətərməs ən Yaxya, iqqal akal ən Galilaya. ¹³ Mişan wər iqqim daɣ əxrəm ən Nazaret. Kalar igla ixsar daɣ təxrəmt təgât Kafarnahum, təwârat təgadamayt n agaraw wa n Galilaya daɣ amaɣal ən Zəbulun əd wa n Naftali. ¹⁴ Emmək en daɣ as inda awal wa d-iga Əməli əs tarrayt n ənnəbi Isayas a daɣ innâ: ¹⁵ «*Akal ən Zəbulun əd wa n Naftali, əhanen əsəlim n agaraw wa n Galilaya, fəl təgadamayt ta n ataram ən Yordan, almaɣna Galilaya, ənta a daɣ əxsaran aytedan win Kəl-Əlyəhud əd win tan-wər-nəmos!* ¹⁶ *Tamattay ta təhat šiyyay, tənay ənnur zəwwəran as imalawlaw, aytedan deɣ win əhanen akal wa təlsa telay ən təmattant, əntanay da ibalazlaz fall-asan ənnur.*»

¹⁷ Azzaman en da a daɣ iggaz Ƴaysa šin igi ən təlxutbat igannu: «Utabat, fəlas Taymar ta n jənnawan təhöz!»

Ətəwəyra n əkkoz nalkiman win azzarnen

¹⁸ Əzəl iyyan ijiwankat Ƴaysa fəl təgadamayt n agaraw wa n Galilaya as inay əşšin mədrayan, s iyyan esəm-net Simɣon was itawannu Butros, d amadray-net Andrawəs. Meddan win inabazan ən kifitan a əmosan. As tan-inay fattawan daɣ agaraw sangaytan-nasan win abbaz ən kifitan. ¹⁹ Inn-asan Ƴaysa: «*Əlkəmat-i, a kawan-aga meddan sər-i du-za-tawaynen aytedan y a tan-assafsa daɣ bakkadan-nasan.*» ²⁰ Oyyan sangaytan-nasan daɣ tamazayt ten da, əlkaman-as. ²¹ As iga Ƴaysa arat ən teklay dəffər awen, inay əşšin mədrayan wiyyad, əmosnen Yaqub d amadray-net Yaxya win maddanəs ən Zabaday. As tan-inay nimahan aɣlal n aman d abba-nasan Zabaday, kannin sangaytan-nasan win as tabazan kifitan. Ixr-en Ƴaysa. ²² Amazay wen daɣ ad oyyan aɣlal-nasan, əfalan abba-nasan, əlkaman i Ƴaysa.

Isalan tiwəziwizan

²³ Issəwal Ƴaysa akal ən Galilaya ketnet, isasaɣru daɣ nan n əlxibada ən Kəl-Əlyəhud. Immâl Əlinjil, imosan isalan ən Taymar ta n jənnawan, izuzəy aytedan daɣ əkkulluk ən təwərna, d əkkulluk n əlxib. ²⁴ Emmək en daɣ as itawasla Ƴaysa daɣ amaɣal ən Surəya kul. A das-du-tamawayan aytedan kul win ərinnen, əd win t-əllanen d əlxiban a əqqalan, əd win əssəranan kələsuf, əd win

əlanen ikərəkkitan əd nəbdan, izuzəy-tan. ²⁵ Əlkâmnat-as təmattiwen aggotnen a d-əfalnen Galilaya, d akal was itawannu «Wa-n-Maraw-ÿərman», əd Yerusalam, d akal ən Yahudəyya, d amadal wa ihan dännəg ən Yordan.

İşşəyəl wa iga Ƴaysa dat aytedan kul daƷ Galilaya əd Ʒələyyələyan-net

5

İsəssəyri wa azzaran: Təlɣutbat ta təgat fəl ədƷaƷ

Taymar ta n Məşşina

¹ As inay Ƴaysa şimattiwen şin t-id-osanen den, iwar adƷaƷ. İqqim den da, əhozan-tu nəttulab-net. ² İssənta əsəssəyri n aytedan win əllanen den. Inn-asan:

³ «Əbbilalan aytedan win əlləqqawnen daƷ man-nasan, əqbâlan as əddiraran əs Məşşina

fəlas Taymar ta n jənnawan şin-nasan.

⁴ Əbbilalan win hallinen,

fəlas a tan-isəddəwət Məşşina.

⁵ Əbbilalan win əssərəsnen iman-nasan,

fəlas ad əgrəwan akal wa dasan-issənsa Məşşina.

⁶ Əbbilalan win əknanen deran n awa oƷadan,

fəlas ad t-əgrəwan.

⁷ Əbbilalan win hanattatnen i naragan-nasan,

fəlas əntanay da a dasan-ihənəttət Məşşina.

⁸ Əbbilalan win as zaddogan wallan-nasan,

fəlas ad ənəyan Məşşina.

⁹ Əbbilalan win tagginen alxer,

fəlas a dasan-əgu Məşşina esəm bararan-net.

¹⁰ Əbbilalan win tawadgaznen fəl igi n awa oƷadan,

fəlas Taymar ta n jənnawan şin-nasan.

¹¹ Təbbilalam kawanay a rabbadan aytedan, ədgâzan-kawan, wər t-illa əzzənəf n əzɡən a kawan-wər-əssəwaran, fəl əddəlil-in. ¹² Awalla, dawatat, təfəliwəsam, fəlas təlâm arozan aggotnen daƷ jənnawan. Ənnəbitan win dat-wan, da əmmək wədi daƷ as tawadgazan.»

Tesəmt d ənnur

¹³ Inn-asan Ƴaysa: «Kawanay tesəmt a təmosam y əddənət. Amaran as imos as tesəmt ta, ab-as təla tembay, məni əmmək was tat-du-za-tətəwəsuxəl tembay-net? Tesəmt ta, ab-as tənfa wala: wər təhor ar d a din-tətəwəgər sədi, a tat-dayyazan aytedan. ¹⁴ Ənnur n əddənət a təmosam. Ayrəm ikrâsan fəl afalla n ədƷaƷ, wər t-illa awedan a tu-wər-za-nənəy. ¹⁵ Əmmək en daƷ a təga fətəla: As tərƷa, wər za tətəwəggu daw əƷəzu! Kalar ətəwəgga

a za tagu day adag iknan ahaku fæl ad tæsəmmələwləw aytedan kul win əhanen ehan. ¹⁶ Emmək di day as imələwləwet ənnur-nawan, dat aytedan kul, fæl ad ənəyan aratan olaɣnen win tətəggim, awəy-du sər-san awen ad əmmālan tanaya n Abba-nawan di ihan ijənnawan.»

Yaysa d Arkawal wa Irəwan

¹⁷ Inn-asan Yaysa: «Ad wər təyilam assa a d-əge y a din-əkkəsəy awa iktaban day Əttawret, madey Əlkəttaban n Ənnəbitan. Wərgəy adi a d-əkke, kalar assa a d-əgey y a tan-assanda. ¹⁸ Əggiyyey əsilakanax-awan as: Iket əllan-tu jənnawan d amaɗal, Əttawret wər t-in-za-təgməd wala tətəbəqəqet, amaran wala ɣas əsakkal wər t-in-z-igməd iket wər inda arat kul wa day-as iktaban. ¹⁹ Awen day a fəlas awedan wa imməzrayan wala ɣas alwajib wa ogaran təmmədrəyt, omar aytedan s ad agin awen da, awedan wədi ənta a z'agəran eres day Taymar ta n jənnawan. Mišan as imos as ibbirdag awedan y alwajiban win, isasayr-en y aytedan, wədi ad igrəw adkul day Taymar ta n jənnawan. ²⁰ Awalla, əmələy-awan əs as wər təgem i Məššina əbərdəg ogaran wa das-əgan musanan n Əttawret, əd Farisaytan, wədi wər za təggəzam Taymar ta n jənnawan.

Əmazal n awa itawannan: Əlmital day batu n alham

²¹ Təslām as itiwanna y aljadan-nana day Əttawret: "ad wər tagay iman."

As iga awedan iman, ad t-ibəz əššəriɣa awwaddab. ²² Nak za ənnəy-awan, awedan kul wa iggaz alham n iyyan, wədi ad t-ibəz əššəriɣa awwaddab. Awedan dey kul wa innan y iyyan: "Anafnoz!" Wədi ad itəwəsəbdəd dat Asaggawar wa Zəwwəran as itawannu Sanhedrin fæl ad itəwəšrəy, amaran awedan wa innan y iyyan: "Kay amaros!" Wədi əššəriɣa-net Jahannama. ²³ Day adi as du-təktey as iššək-kay awedan day amazay wa day du-tewayaya təkutay-nak s adag wa n əsəqqəd ən təkutawen, ²⁴ tayya takutay-nak əddi da, tagla har tənəməsürəfa d awedan wədi, dəffər adi amaran təqqəla taga takutay-nak. ²⁵ As kay-issəwar awedan lahan, takna dər-əs tarmad iket di ad təhām tarrayt. As wər iga adi, awedan wədi, ad išəššiwəd batu tədi əlqali. Təzzar inkər əlqali ag-ik day fassan ən soji a kay-z-agin day kasaw. ²⁶ As iga adi amaran əggəyyey əsilakanax-ak as wər du-za-təgmədəy iket wər təxreda arazam n arat kul was kay-əwaran ərruzmatan-net. Wala tamma iyyadda wər din-za-təqqam.

Əmazal n awa itawannan: Əlmital day batu n əzzəna

²⁷ Təslām as itiwanna: "ad wər tagay əzzəna."

²⁸ Nak za ənnəx-awan awedan kul wa igan daɣ təntut asawad daɣ isidaran ənəmənsa-net, wədi igâ dər-əs əzzəna daɣ əwəl-net. ²⁹ Kud šat-nak ta n əxil a təbukat a dak-təqqəl əssəbab n igi n abakkad, təkəkkəreq-qat-du təgəraq-qat-in, id of-ak təgmad-kay təslət-nak iyyadda, y ad tətəwəgər təxəssa-nak kul daɣ Jahannama. ³⁰ Amaran kud əfus-nak wa n əxil a ibukan a dak-iqqəl əssəbab n igi abakkad, təfrəsaq-qin təgəraq-q-in, id of-ak təgmad-kay təslət-nak iyyadda, y ad təggəz təxəssa-nak ketnet Jahannama.»

Əmazal n awa itawannan: Əlmital daɣ batu n əməzzəy

³¹ Iгла Ҷайса ишсевал, инн-асан: «Итиванна дег: "I izammazzayan tantut-net, akfet-tat širawt n əməzzəy."

³² Nak za silakanax-awan as i izammazzayan tantut-net fəl a wər nəmos igi ən meddan, wədi əsəssugi a tat-iga əzzəna, amaran as izlaf aləs iyyan tantut ta təmməzzayat da, wədi əzzəna a iga ənta da.

Əmazal n awa itawannan: Əlmital daɣ batu ən təhuday

³³ Təslâm dæg as itawanna y aljadan-nana: "Ad wər təhhadam fəl arət, taqqamim wər tu-təmmozalam. Kalar sabdadat arkawalan win fəl təhadam s esəm n Əməli."

³⁴ Nak za ənnəx-awan, ad wər təhhadam fəl arət waliyyan fadda: Gər za əs jənnawan, fəlas edag n əlxəkum ən Məššina a mosan, ³⁵ wala dæg təhədam s amaɖal, fəlas ənta a illan daw daran-net, wala dæg təhədam əs Yerusalam, fəlas ənta a təmosat aɣrəm n Əmənokal wa Zəwwəran, a t-imosan Məššina. ³⁶ Ad wər təhhadaɣ ənta da s aɣaf-nak, fəlas wər təfregay əsəmləl n anzad-net waliyyan da, wala dæg əsəkəwəl-net. ³⁷ Ganniwat ɣas: "Ayew" y awa imosan tidət, madeɣ "kala" y awa imosan bahu. Batu a du-təššotam fəl adi kul Aššaytan as du-təha.

Əmazal n awa itawannan: Əlmital daɣ batu n əzəzəl

³⁸ Təslâm as itiwanna: "I d-ikkasan šat n iyyan a du-tətəwəkkəs šat-net ənta da, i d-irzan ešen n iyyan a d-itəwərzə ašen-net."

³⁹ Nak za ənnəx-awan ad wər tətəgəzam iman-nawan daɣ amaksan. Kalar as dak-iqqas fəl əmdəd-nak wa n əxil, takfaq-qu əmdəd-nak wa hadan. ⁴⁰ As ira awedan a kay-ibəz s əššəriɣa fəl ad igrəw aɣaššaba-nak, takfaq-qu əbərnuz-nak da. ⁴¹ As kay-išahhaššal awedan aggay ən lalan-net har əgim ən takkolt, tawəyaɣ-as-tan har əššin gim ən takkolt. ⁴² I kay-onsayan takfaq-qu, i daɣ-ak igmayan əmarwas, a das-tu-wər-təgdəla.

Æmazal n awa itawannan: Ælmital daɣ batu ən tara n əzəŋga-nana

⁴³ Təslâm as itiwanna: "Iru anammaraɣ-nak, təgɣərəɣ azangaw-nak." ⁴⁴ Nak za ənneɣ-awan: Iriwat izəŋganawan, ad tətəggim šiwatriwen olaɣnen y aytedan win kawan-əsasnen, ⁴⁵ fəl ad təqqəlām əs tidət da bararan n Abba-nawan wa ihan ijənnawan. Ænta a d-isagmadan təfuk-net fəl aytedan win maksanan əd win olaɣnen, isawat akonak-net fəl win oɣadnen əd win nəmməzraɣ. ⁴⁶ Kud wər tarem ār aytedan win kawan-əranen, awak ma imos aroz wa za təgrəwam daɣ awen? Wərgəɣ aytedan win zarzammen takəsen a əmosnen imaksanan da awen daɣ a əgan? ⁴⁷ As imos as imədrayan-nak ɣas a tareɣ təsaslamaq-qan, awak ma imos arat immittayan wa təgəɣ? Wərgəɣ aytedan win wər nəssen Məššina da adi daɣ a taggin? ⁴⁸ Daɣ adi kawanay, əqqəlāt aytedan əkmâlnen šilat n Abba-nawan wa ihan ijənnawan.»

6

Æsəssəɣri igân fəl təlmənufəqa daɣ əddin

¹ Iгла Ҷайса ишшəwal, inn-asan: «Ænkədat d igi n əlɣibada imosan sokni. As wər iga adi wər za təgrəwam arozan ɣur Abba-nawan wa ihan ijənnawan.»

² «As tətəgga takutay y amaddarar, ad wər iqqəl adi arat təsinafalala, zun awa taggin əlmunafiqan daɣ nan n əlɣibada ən Kəl-Ælyəhud, əd tarrayen, fəl tara n ad əgrəwan adkul ɣur aytedan. Æggəyyeɣ əsilakanax-awan as əlmunafiqan win di arozan-nasan əgrāwan-tan. ³ Kay amaran, as tətəgga takutay, ad wər issən əfus-nak wa n zalgat awa itaggu wa n əɣil, ⁴ fəl ad təqqəl təkutay-nak əssir. Abba-nak s ənta a ihannayan əssiran, a dak-z-irzəman.»

⁵ «As tətattaram, ad wər tətəggim awa taggin əlmunafiqan ərānen ad tattaran əbdadan daɣ nan n əlɣibada, əd sammanayan, əgmāyan s awen a tan-ənəyan aytedan. Æggəyyeɣ əsilakanax-awan as arozan-nasan əgrāwan-tan. ⁶ Kay amaran as tətəgga šiwatriwen, təggəzax daɣ ahan-nak edag wa ogaran ənəməggag d aytedan, təxfəlaq-q-in fəl man-nak, tətərə daɣ əssir s Abba-nak id illa əddi. Abba-nak s ənta a ihannayan əssiran, a kay-z-akfin arozan. ⁷ As tətattaram, ad wər tətəggam awal aggen təgannam arat iyyanda zun awa taggin aytedan win wər nəssen Məššina, əɣilnen wər dasan-z-aslu Məššina ar s ad taggin awal aggen. ⁸ A tan-wər-tattalam, fəlas Abba-nawan, issân awas təddəraram

da harwa wər daɣ-as tu-təgmayam. ⁹ Təwatray da tas ihor a tat-tətaggim kawanay:

"Abba-nana wa ihan ijənnawan,
Itəwəsəxməret esəm-nak di zəddigan,
¹⁰ taset-du Taɣmar-nak.

Tətəwəməizəlet tara-nak fəl amaɖal
s əmmək was tətəwamazal daɣ jənnawan.

¹¹ Akf-anax isudar-nana win azalada;

¹² təssurəfaɣ-ana tādłəmt ta nəga
zund əmmək as nakkanay da
nəssoraf i win danaɣ-ədlamnen.

¹³ A dana-wər-taga daɣ aɣarar ən jarrabatan,
kalar aɣəz-ana daɣ Iblis,

[fəlas taɣmar, əd tarna, əd tanaya ši-nak har faw.
Amin."»]

¹⁴ «As təsurufam y aytedan arak mazalan win dawan-əgan, kawanay da a dawan-issurəf Abba-nawan wa ihan ijənnawan. ¹⁵ Mišan as wər təsurufam y aytedan, wədi Abba-nawan wa ihan ijənnawan wər dawan-z-issurəf arak mazalan win təgam.»

¹⁶ «As təzumam ad wər təsənnəfilələm təkənzert zun awa taggin əlmunafiqan, əntanay a samattaynen udmawan-nasan fəl ad əssusənan aytedan kul as əzuman. Əggəyyeɣ əsilakanax-awan as aytedan win di, arozan-nasan əgrāwan-tan harwa əmərədda. ¹⁷ Kay amaran, as təzumax, təšširədaɣ udəm-nak, taga alwardi, ¹⁸ fəl ad wər əssənan aytedan as təzumax. Abba-nak ɣas a z'issənan daɣ adi, fəlas illa əddi daɣ əssir, ihannay awa itaggin, amaran ənta a dak-z-irzəman.»

Addararat ta nəga əs Məššina

¹⁹ «Ad wər təšadawam təgərgist daɣ əddənet, a daq-ɣat za təhlək tamaday əd tənək, razzan deɣ baydagan inan takaran. ²⁰ Kalar šidəwat i man-nawan təgərgist daɣ jənnawan, a daq-ɣat wər za təhlək tamaday za wala tənək, wala deɣ assin-tat-in baydagan win razzinen inan takaran. ²¹ Fəlas edag wa təha təgərgist-nak, ənta a z'iggəz əwəl-nak.»

²² «Šittawen šilat ən fətəla a əmosnat i təɣəssa-nak. As imos as šittawen-nak əhannaynat s əlluɣ, wədi təɣəssa-nak ketnet təha ənnur. ²³ Mišan as imos as šittawen-nak wər əhənnəynat s əlluɣ, wədi təɣəssa-nak ketnet təha šiyay. Daɣ adi as imos as wala ənnur wa ihan təɣəssa-nak da imos šiyay, wədi ad təggəza šiyay wər nəmməkkan! ²⁴ Wər t-illa i ifrāgan əššəɣəl y əššin muzaran. Wa ɣas ikyad iyyan daɣ-san, iru wa hadan, madəɣ abbardag y iyyan, alku

wa hadan. Wær tæfregay ad tæxbæda Mæššina, tagla dey tozâla dæffær æddænet.»

²⁵ «Dağ adi ænney-awan a kawan wær tæššewæš tæmæddurt, gær awa za tatsim, wala awa za tašwim, wala awa za talsim. Iman-nawan wærgex ogaran imensewan, tağessa-nawan dey togar isælsa? ²⁶ Æswædat dağ gædad a taggadnen dağ alhawa, wærmad nabbalan za wær tiløyan, wær šidiwan wala dağ tædangawen, mišan issodar-tan Abba-nawan wa ihan ijønnawan. Kawanay wærgex togaram-tan almaqam sen çur Mæššina? ²⁷ Mæni dağ-wan wa ifragan s aššawaša-net æšitøy æn tæçræst-net æs wala ellaf æn šat? ²⁸ Mafel as kawan-tæššewæš talya æn sælsa? Ænzærat-in dağ æmmæk was du-daggalnat tæjigawen dağ æsuf. Wærmad šaqqalnat wala zattinat isælsa, ²⁹ mišan ænney-awan, wala Æmænokal Suliman harkid tægærgist-net kul, wær kala ad ewad wala iyyadda dağ-asnat dağ tæhussay æn talassay. ³⁰ Dad isalsu Mæššina yel æs tæmæwit tædi, s azalada ibdâd, tufat ad itewæsærçu dağ tæjængærert; manæmmæk as kawan-wær-z-assalsu, kæl æzægzan ændærran!»

³¹ «Dağ adi ad wær tæššewæšam tægannim: "Ma za natšu?" Madex: "Ma za našew?" Madex: "Ma za nalsu?" ³² Aratan win kul aytedan win wær næssen Mæššina a ozalnen dağ agamay-nasan, amaran kawanay Abba-nawan wa ihan ijønnawan, issân as tæddiraram sær-san. ³³ Ægmøyat tæzzar Taymar ta n Mæššina d aqqad dat-æs, as iga adi aratan win di kul a kawan-tawækfin æntanay da. ³⁴ Dağ adi a kay-wær-iššewæš arat wa d-izayan tufat, fælas tufat ad tæššewæš æd tæmæçutar-net. Æzæl kul ila šimæçutar-net a dasægdânen.»

7

Alxal wa iwaran ænalkim æn Çaysa, gar-es æd Mæššina d aytedan

¹ Iгла Çaysa iššewal-asan, inna: «Ad wær tannim ark arat s awedan fæl a sær-wan wær itewænnu kawanay da. ² Fælas æmmæk was tæxkamam, ænta as za tætewæxkæmam kawanay da, amaran tæsækæt tas tækkatam y aytedan, ænta as dawan-z-ikæt Mæššina. ³ Mafel tahannaya tezawt ta tæhat šat n amadray-nak, kay amaran wær din-tægrex šilælt ta tæhat šat ta-nak. ⁴ Manæmmæk as za tanna y amadray-nak, "ayy-i a dak-ækkæsa tezawt ta dağ šat-nak", kay amaran šilælt a tæhat šat ta-nak? ⁵ Ælmunafiq, ækkæs tæzzar šilælt ta tæhat šat-nak, æddi ad za tannaflaya dağ tazawt ta tæhat šat n amadray-nak tækkæsay-as-tat!

⁶ A din-wər-təggaray arat zəddigan madey arat ilân almaqam i maksanan fəlas wər əzlayan əd dan a kawan-du-milallaynen y a kawan-ədədan, madey iladayan hallaknen aratan win əlanen almaqam.

⁷ Ansəyat Məşşina, a kawan-akfu; əgməyat, ad təgrəwam; ayriwat-tu a dawan-akkawan; ⁸ fəlas i onsayan, ad itəwəkfu, i igmayan ad igrəw, i iyrən dəy Məşşina a das-akkawan. ⁹ Məni dəy-wan wa dəy z'igməy barar-net tagəlla akf-ay təhunt? ¹⁰ Wala igməy dəy-as isan akf-ay taşşolt? ¹¹ Dad zamməs wala kawanay an nəllubəs da təssānam tehakkay n awa olağan i bararan-nawan, manəmmək as kawan-wər-z-akfu Abba-nawan wa ihan ijənnawan awa tu-tonsayam?

¹² Taggiwat y aytedan arat kul was təram a dawan-t-agin. Ənta da da arat wa ihan əşşərixa wa n Əttawret, d Əlkəttaban n Ənnəbitan.

Igi daw ayaf

¹³ Əggəzat s əmi wa kəruzan s ənta a itawayan əs təymar ta n Məşşina! İket ilwi ig-ay əmi wa itawayan s əhluk, iket əsənnəfləy təg-ay tarrayt ta tətawayat s əhluk, amaran əggətan aytedan win as ənta as taggazan. ¹⁴ Mişan iket takrazt ig-et əmi wa itawayan əs təməddurt, iket dəy əsəməyitər təg-ay tarrayt ta tətawayat əs təməddurt, amaran wər əggətan aytedan win tan-garrawnen.

¹⁵ Ənkədat y ənnəbitan win bahu. As kawan-du-tasin əmosan zun ayfəd, mişan əs tidət iridalan a əmosan əknanen aşşar. ¹⁶ Arat wa du-saxsalan as tan-za-təzdəyam. Awak alyanab itəwankad-du dəy tazzayt? Wala itəwankad-du fig dəy təgaroft? ¹⁷ Əmmək en dəy as aşək isxân a d-itarawan âratän olağan, amaran aşək wər nəsxə itaraw-du win wər noley. ¹⁸ Aşək isxân wər ifreg ara n âratän wər noley wala dəy ifrag aşək wər nəsxə ara n âratän olağan. ¹⁹ Aşək kul wa wər nətirəw âratän olağan, wədi ətəwəxtas a itawaggu, itəwəgər dəy təmsay. ²⁰ Dəy adi illikan as ənnəbitan win bahu awa du-saxsalan as tan-za-təzdəyam.»

²¹ «Wər igda i di-igannin: "Əməli, Əməli!" Wər izzogaz awen awedan Təymar ta n jənnawan, kalar kundaba i itamazal əs tara n Abba-nin ihân ijənnawan. ²² Əzəl wa ilkaman aytedan aggotnen a di-annin: "Əməli, Əməli! Awak wərgex esəm-nak as nəmal y aytedan isalan win fall-ana du-təzəzabbe? Awak wərgex ənta əs nəstəy kələsuf? Nəga sər-əs təlməxjujaten aggotnen?" ²³ Əddi a dasan-anna: "Wər kala a kawan-əzdayax. Ugagət-i inəmməzray ən Məşşina!"»

²⁴ «Daγ adi awedan kul wa issəsaman y awal-in wa, immozal-tu, wədi iha əlmital n aləs n əməli ən tayttay ikrasan ehan-net fəl təsəlit. ²⁵ Iwat akonak, əgan əngəytan əssohatnen, əgarnat-du təkəkwen, əstaban y ahan en, mišan wər uda fəlas təsəlit a fəl ibna. ²⁶ Amaran awedan kul wa issəsaman y awal wa əge da, iqqim wər t-immozal, wədi iha əlmital n aləs wər nəla tayttay, ikrasan ehan-net fəl əzazəl. ²⁷ Iwat akonak, əgan əngəytan əssohatnen, əgarnat-du təkəkwen, istab awen y ahan wa nad, ibarajjat, ilyam-in ketnet.»

Tanaya ən Ƴaysa

²⁸ As iğrad Ƴaysa alfaydaten šin, təqqim tamattay isimak-lal sər-əs əmmək was itaggu əsəssəğri-net. ²⁹ Fəlas ig-asan əsəssəğri n awedan ilân tanaya wər əlen musanan-nasan win Əttawret.

8

Təlməğjupaten əd tanaya ən Ƴaysa

Əzuzəy n awedan iğrâw kətru

¹ As d-izzəbbat Ƴaysa adğax wen, təlkâm-as tamattay tagget. ² Ihin-in Ihoz-t-idu awedan təğrâw təwərna ən kətru, issəjad dat-əs, inna: «Əməli, as tarex adi təfrâgax a di-təzzuzəyax, izdaga.» ³ Izzal-in Ƴaysa əfus-net, idas-tu inna: «Arex adi əzzəy tizdaga!» Amazay wen da dağ izzay aləs wen dağ kətru, zəddig. ⁴ Inn-as Ƴaysa: «Ənəy za, ad wər təməla y awedan waliyyan arat wa iğan da, amaran aglu tassaknağ iman-nak y əlimam, taga takutay ta kay-issəwar əşşəriğa n ənnəbi Musa, ad iqqəl adi y aytedan təğəyya ən təməzzəyt-nak.»

Əzuzəy n amaşşaxal ən kabtan ən Kəl-Ərrum

⁵ Amazay wa da dağ in-itaggaz Ƴaysa tağrəmt ən Kafar-nahum, ənta dağ t-in-ikka kabtan iyyan ən sojitan n Ərrum, onsay-tu, ⁶ inn-as: «Əməli, amaşşaxal-in a din-oyye isrâd dağ ağaywan, ibdân, idgâz wəllen.» ⁷ Inn-as Ƴaysa: «Nak iman-in a tu-z-akkin əzzuzəyaq-qu.» ⁸ Inn-as kabtan en: «Əməli, nak wər əwedağ ad təggəzax ehan-in. Annu arat xas ad izzəy amaşşaxal-in. ⁹ Əssâna dağ adi fəlas awedan a əmosax a dağ əttafan wiyyad tanat, əttâfaq-qat nak iman-in dağ sojitan win daw-i əllanen. As ənnəx y iyyan: "Aglu", ad aglu, as ənnəx y iyyan: "Iyyaw", a di-d-asu. As ənnəx y əkli-nin: "agu awa", ad t-agu.» ¹⁰ As isla Ƴaysa y awa inna kabtan en, isammaklal sər-əs, inna y aytedan win das-əlkammen: «Əğgəyyəğ əsilakanağ-awan as: wər ənayax

awedan waliyyan daɣ Kəl-Israyil igân əzəgzan ewâdan wa iga aləs a.»

¹¹ «Əsilakanax-awan as aytedan aggotnen a d-əfəlan dännəg d ataram, nəximin d Ibrahim, d Isəhaq, əd Yaqub, ədrəwan dər-san iməgura daɣ Taɣmar ta n jənnawan. ¹² Mišan Kəl-Əlyəhud aggotnen s əntanay as tətawasamatag Taɣmar ta, win di a din-təwəbdəxan sədi daɣ šiyyay, ad hallin əddadan idədwan-nasan fəl təmagraz.»

¹³ Amaran inna Ƴaysa i kabtan wa nad: «Əqqəl aɣaywan-nak, aget-ak Məşşina arat wa daɣ-as təgmaya fəl əzəgzan-nak.» Təzzar izzay amaşşaxal ən kabtan wen daɣ amazay wen da.

Tədaggalt ən Butros

¹⁴ Dəffər adi ikka Ƴaysa ehan ən Butros. Inay tədaggalt ən Butros tərâd, tənnid, ¹⁵ idas əfus-net, təwat fall-as tanaday, tənkar-du a tu-təsiməgurit.

Əzuzəy ən Ƴaysa aytedan aggotnen

¹⁶ As tuda təfuk, əmmewayan-as-du aytedan aggotnen əssiranan kələsuf. Igrad Ƴaysa asatax ən kələsuf winad əs təfert iyyadda. Izzozay dəx imiranan kul win əllan den. ¹⁷ Emmək wen daɣ as inda awal wa d-iga Əməli əs tarrayt n ənnəbi Isayas a daɣ innâ: «Ənta a idkalan əlxiban-nana, idkal fəl iri-net šiwərnawen-nana.»

Ləkkum i Ƴaysa

¹⁸ As inay Ƴaysa tamattay təxilayxalay-tu, omar inəttulab-net s a dər-əs idawan əxrəsan əs tagadamayt ta hadat n agaraw. ¹⁹ Ikk-ay-du əmusan n Əttawret iyyan inn-as: «Əşşex, a dak-əlkəməx s adag kul wa təkkeɣ.» ²⁰ Inn-as Ƴaysa: «Izagazan əlân enwan, igədəd dəx əlân şisəllula, mišan nak Ag Aggadəm wər ələx wala edag a daɣ əssənsax eɣaf-in.» ²¹ Inn-as ənalkim-net iyyan: «Əməli, akf-i turagat n ad agla har din-ənbəlay abba-nin təzzar.» ²² Mišan inn-as Ƴaysa: «Əlkəm-i tayyax inəmməttan ad ənbəlan inəmməttan-nasan.»

Əzərəz ən Ƴaysa tazafa

²³ Dəffər adi iggaz Ƴaysa aɣlal n aman, ənta əd nəttulab-net, əqlan. ²⁴ Wala a ihogan təgar-du tazafa labasat fəl agaraw, ad əggatnat tənazzamaren aɣlal. As itaggu awen Ƴaysa ənta insâ. ²⁵ Əhozan-t-in nəttulab-net, a tu-sankaran daɣ etəs gannin-as: «Əməli, agəz-ana! Nakkanay nəjwâr nəhlâk!» ²⁶ Inn-asan: «Mafel təh-iwan tasa togdat d awa, kəl əzəgzan irkaman?» Inkar-du Ƴaysa, isannarɣam y aɣu d agaraw, əxradan adrur d əsəssəmmi. ²⁷ Arat wa iqqan

iḡafawan-nasan, ad gannin: «Ma imos wa daḡ awedan, as wala aḡu d agaraw da ittâf daḡ-san tanat.»

Ʒuzəy ən Ʒaysa əššin aytedan əgrâwan kələsuf

²⁸ As iwar Ʒaysa aganna wa hadan n agaraw, daḡ akal ən Gadaratan, əssəlkadan-as-du əššin aytedan əssiranan kələsuf, əgmadan-du sər-əs izəkwan. Aytedan win awa əgan daḡ tallabəst, wər t-illa i ihalan a d-akəy daḡ adag wen. ²⁹ Saḡaren-as-du gannin: «Ma daḡ-na tare, Barar ən Məššina? Awak assa du-təge y a dana-təsəkkərure da wər du-tewed təmastant?» ³⁰ Ʒnta illât-tu əsəgən aggen ən ladayan ədânnen daḡ igəg-nasan dên, ³¹ onsayan kələsuf win Ʒaysa ənnan-as: «As dana-təstaḡa, təssukaḡ-anəḡ əsəgən en ən ladayan en.» ³² Inn-asan: «Aglat!» Təzzar əgmadan kələsuf meddan win əššin en, əkkan iladayan əggazan-tan. Amazay wen da daḡ d-əwafan ladayan win den kul fəl azadaga ən təkəšwart, ḡartattawan ad tifataqqen daḡ agaraw, əlammazan-tan aman. ³³ Təzzar ozalan madanan ən ladayan winad s əḡrəm, əssoḡalan arat kul wa igan den y aytedan, d awa igan fəl meddan win əssəranan kələsuf en. ³⁴ Den daḡ a d-əḡradan kəl əḡrəm wen agamad, əssəlkadan-du i Ʒaysa, onsayan-tu ad igməd akal-nasan.

9

Ʒuzəy ən Ʒaysa anabdon

¹ Təzzar iggaz Ʒaysa aḡlal n aman, iḡras agaraw, ikka taḡrəmt-net Kafarnahum. ² Ewayan-as-du aytedan anabdon ihân təssut-net. As inay Ʒaysa əzəgzan-nasan, inna y anabdon: «A kay wər iššəwəš wala barar-in! Ibakkadan-nak tiwasarafan-ak!» ³ Təzzar ənnan arat daḡ musanan n Ʒttawret wiyyad daḡ man-nasan: «Aləs wa əmadraw a itaggu!» ⁴ Inn-asan Ʒaysa issânan daḡ awa samadranan: «Mafel tətəggim arak medranan win daḡ wallan-nawan?» ⁵ Awak ma ogaran tərḡəsəy gər i innan: "Ibakkadan-nak tiwasarafan-ak", meḡ ak i innan: "Ʒbdəd jəwənkət?" ⁶ Amaran areḡ ad təssənam as nak Ag Aggadəm, əleḡ daḡ əddənet tanaya a di-təšišawadat ad əssurəfa y awedan ibakkadan-net.» Təzzar inna Ʒaysa y anabdon: «Ʒbdəd, tədkəla təssut-nak takkaḡ aḡaywan-nak.» ⁷ Ibdad aləs wen ikka aḡaywan-net. ⁸ As ənayat tamattiwen arat wen, təḡrad-tanat tasa iguz, ad tagginat təmmalen i Məššina a ikfan tarna togdat d awen y aggadəm.

Ʒaysa əd Matta əd nasbakkadan

⁹ Ifal Ƴaysa edag wen, illam-du dagma n aləs iyyan igân esəm Matta, iqqiman day adag wa n əzərzəm n əzrəf wa n takəs, inn-as: «Əlkəm-i!» Təzzar ibdad Matta ilkam-as. ¹⁰ Əzəl iyyan, iha Ƴaysa aƣaywan ən Matta, ənta d aytedan aggotnen ən nəzzərzəm ən takəsen əd nasbakkadan, idrâw dər-san imensewan ənta əd nəttulab-net. ¹¹ Ənayan Farisaytan arat wa, ənnan i nəttulab-net: «Mafel idrâw əşşex-nawan əd nəzzərzəm ən takəsen əd nasbakkadan?» ¹² Isl-asan Ƴaysa, inna: «Aytedan win wər nəla əxəli, wər əddəraran s anasmagal, imiranan a sər-əs əddərarnen. ¹³ Agliwat təssənam almaƣna ən batu ta iga Məşşina as inna: "Təhanint a are, wərgəx şikutawen." Wər d-osex fəl a d-aƣraƣ aytedan win ƣur iga as oƣâdan, kalar inasbakkadan as d-əmmozala y a tan-d-aƣra əqqəlan inalkiman-in.»

Amagrad wa iga Ƴaysa day batu n əzum

¹⁴ Təzzar əkkan-in nəttulab ən Yaxya Ƴaysa ənnan-as: «Mafel nakkanay əd Farisaytan nətuzam faw, amaran kay inəttulab-nak wər tuzaman?» ¹⁵ Ijjəwwab-asan Ƴaysa inn-asan: «Ak ilagatan a ƣur illa amazlay zakanzaran? Mişan əlkâman adan a ƣur-san z'ammadkal əmazlay: əddi amaran ad z'uzaman. ¹⁶ Wər t-illa i z'iwətan şikəst taynayət day tabdoq waşşarat, fəlas əddi şikəst ta din-təttəwatat, a du-təzəkkəwənzəz tabdoq ta waşşarat, təzzar təşşit-as azarru wəllen. ¹⁷ Wər t-illa dəx i z'agin esmad n alƣanab aynayan day gədad, fəlas as iga adi, ad abbaqçen gədad win, təzzar affatu day esmad əd gədad. Kalar arat wa ihoran, ad itəwəggu esmad wa aynayan day bəyaƣ aynaynen, əmmək wədi day as z'ixləs esmad harkid bəyaƣ.»

Əssənkər ən Ƴaysa təbarart day təmattant d əzzuzəy-net tantut

¹⁸ İşşewal-asan Ƴaysa den day as d-osa iyyan day muzaran ən Kəl-Əlyəhud, issəjad dat-əs, inn-as: «Təbarart-in a aba əmərədda, mişan ya, əssanəx âs as du-tose təssəwəraq-qat əfus-nak, a du-tənkər.» ¹⁹ Təzzar inkar-du Ƴaysa, ilkam-as, əddewan dər-əs nəttulab-net.

²⁰ Təllat-tu təntut təgat maraw elan d əşşin igammad-tat əzni, təhoz-du Ƴaysa sa sər təxərden, tədas təbənək ən təkadkat-net, ²¹ fəlas tənna a təga day man-net: «İgda ƣas ad ədəsa təkadkat-net, ad əzzəya.» ²² İmalallay-in Ƴaysa inay-tat, inn-as: «Ad wər təxşəda təbarart-in! Əzəgzan-nam sər-i a kam-izzozayan.» Amazay wen da day təzzay təntut ten.

²³ Dəffər awen ikka Ƴaysa ehan n əmuzar ən Kəl-Əlyəhud wanad. As din-ewad Ƴaysa, inay imawatan ən təsənsəx şin

təfəyyawt, d aytedan nijarwaynen, əgân tərmuq. ²⁴ Inna: «Awedan kul irdəxet! Təbarart di wər tat-aba, etəs xas a təga!» Təzzar əgan-tu ajjab. ²⁵ As tətawasardağ tamattay ten, iggaz Yaysa ehan wa təha təbarart ta aba, obaz əfus-net, issənkər-tat-du. ²⁶ Wazawazan salan n awa igan den, dağ akal ketnet.

Əzuzəy ən Yaysa əşšin məddəryal

²⁷ As ifal Yaysa edag wen, əlkâman-as əşšin məddəryal, sayaren gannin: «Ya Ag ənnəbi Dawəd! Hənəttət-ana!» ²⁸ As din-ewad aɣaywan, iggaz ehan, əhozan-t-in məddəryal win den, inn-asan: «Təzzigzanam as əfragay igi n arat wa təram əddi?» Ənnan-as: «Awalla, Əməli.» ²⁹ Təzzar idas şittawen-nasan, igannu: «Itəwəggiwet-awan arat wa inamannakan d əzəgzan-nawan.» ³⁰ Den dağ ad əgrawan asawad-nasan. Ig-asan Yaysa tarxəmt təsohet, inn-asan: «Ənkədat y ad issən a imosan awedan dağ awa dawan-əge da.» ³¹ Mişan as əqlan, əzəwwazawazan isalan-net dağ akal ketnet.

Əzuzəy ən Yaysa awedan əgrâwan kələsuf, immidad əmi-net

³² Əfalan Yaysa xas immeway-du sər-əs awedan as immidad əmi-net, id aggəsuf a t-izdayan. ³³ İkkas Yaysa aggəsuf wen xas, iggaz awedan was immədəd əmi-net den şin awal. İsimaklal awen əs tamattay, ad təgannu: «Arat wa wər kala tətawanay tulat-net dağ İsrayil!» ³⁴ Fərisaytan amaran əntanay gannin: «Əmənokal ən kələsuf a t-ikfan fərregat n ikus ən kələsuf dağ aytedan.»

Təwatray ta n əzəmmizəl ən məşşaxalan

³⁵ İllil Yaysa iɣərman əd təɣarmaten kul, isaxru day nan n əlyibada ən Kəl-Əlyəhud, itaggu isalan n Əlinjil imosan isalan ən Taymar ta n Məşşina, izuzəy deɣ aytedan dağ əzzənəfan kul ən təwərnawen d əlyiban. ³⁶ As inay tamattay, təggaz-tu təhanint-net, fəlas arkanay a ənnayan, tiwayyan əd man-nasan, əmosan zun ayfəd wər nəla amadan. ³⁷ Təzzar inna i nəttulab-net: «Xarat təggət, mişan wər əggətan məşşaxalan win tat-z-aləynen. ³⁸ Dağ adi əttərat s esəm ən məşşis ən xarat ta, a d-assaglu imaşşaxalan a tat-olaynen.»

10

Əzəmmizəl ən nəttulab win maraw d əşšin

¹ İyra-du Yaysa əs man-net inəttulab-net win maraw d əşšin, ikf-en tarna n ikus ən kələsuf dağ aytedan, d əzuzəy n a təqqal təwərna, d a iqqal əlyib. ² Əntanay da esmawan

ən nəmmuzal win maraw d əššin: Wa azzaran esəm-net Simyon, itawann-as Butros, d Andrawəs wa n amadray-net, əd Yaqub wa n ag Zabaday, əd Yaxya wa n amadray-net, ³ əd Filibus, əd Bartulamawəs, əd Tuma, əd Matta wa izarzaman takəsen, əd Yaqub wa n ag Alfay, əd Tadday, ⁴ əd Simyon was itawannu wa Isaggatakken, əd Yahuza was itawannu Isxarəyuti s ənta a z'agin Ƴaysa daƳ fassan.

Ƴəsəsxri wa n əššin: Ƴəšəxəl ən nalkiman d aƳazab-nasan

Ammaran win iga Ƴaysa inalkiman-net

⁵ Ƴntanay da da maraw nəttulab d əššin win izammazal Ƴaysa dəffər as tan-omâr inn-asan: «Ad wər tətakkim aytedan win wər nəmos Kəl-Ƴlyəhud, wala deƳ təggəzam aƳrəm waliyyan ən Kəl-Samarəya. ⁶ Kalar akkiwat Kəl-Israyil, win əmosnen zun ayfəd əssiggalnen. ⁷ Agliwat a dasan-tətaggim isalan n âs TaƳmar ta n jənnawan təhōz-du. ⁸ Zuzəyat imiranən, a du-təsankaram inəmməttan, təzzuzəyam aytedan win igraw kətru, təzzəzdəgam-tan, ad tətâkkasam kələsuf daƳ aytedan. Bannan as tətawakfam, daƳ adi kawanay da hakkiwat bannan. ⁹ Ad wər tətawayam urəx, wala azrəf, wala deƳ a təqqəl tafelt daƳ nəfdan-nawan, ¹⁰ wala deƳ aƳrəg daƳ əšikəl-nawan, wala təkadkat ta n sanatat, wala təsəsəlt ta n sanatat, wala tallaq. Ƴəsənət as edag tosam ad tətəwəsəməgurem fəlas imaššəxalan-in a təmosam, amaran amaššəxəl kul ila alxaq n ad igrəw a itša. ¹¹ As du-təggəzam aƳrəm, madeƳ taƳrəmt, təgməyam awedan wa inahaggan d a Ƴur-əs təssəgənam, taqqamim Ƴur awedan wədi da har assəya a daƳ təgmadam aƳrəm wədi. ¹² As du-təggəzam ehan tannim: "Alxer fall-awan!" ¹³ Kud aytedan n ahan wədi nihaggan d a Ƴur-san təssəgənam, wədi təwatray n alxer ta dasan-təgam a fall-asan təqbəl, mišan as wər nahaggan d a Ƴur-san təssəgənam, wədi təwatray ten wər za təqbel fall-asan. ¹⁴ As wər tətawaqbalam, wər itawasasam deƳ i batu-nawan daƳ aƳrəm wədi, made daƳ aƳaywan wədi, təgmadam-tu, tabbəkəkam-in əgodrar-net wa iwaran idaran-nawan. ¹⁵ ƳəgəyyeƳ əsilakanəx-awan as, əzəl wa n tabadday, aytedan n aƳrəm wədi, ad agin aƳazab ogaran wa z'agin win amaɖal ən Sədom əd Gamora.»

Amagrad ən Ƴaysa s awa z'igrəwan inalkiman-net

¹⁶ «Ƴəsənət as zimazalaq-qawan təmosam zun ayfəd əhānen ammas ən ridalan, daƳ adi iliwat tayttay tagim ənnəyat zun awa tagginat taššolen, talim əd tədəbren a wər

iwer a imosan lahan. ¹⁷ Ænkædat y aytedan, fêlas a kawan-æssæbdædan dat saggawaran n æššæriḡa, a kawan-æggatan æs lækkad daḡ nan n ælḡibada æn Kæl-Ælyæhud. ¹⁸ Ad têtawæsæbdædam dat naxkiman æd mænokalan fêlas kawan-iwar esæm-in, tæqqêlam šiggæyyawen-in y-asan æntanay d aytedan win wær næmos Kæl-Ælyæhud. ¹⁹ Mišan assaḡa wad za têtawæggim daḡ fassan, a kawan-wær-iššewæš æmmæk was za tæššiwêlam, wala deḡ awa za tannim, fêlas arat wa za tannim a fall-awan d-azzabbat daḡ amazay wa da daḡ tæram tænna-net, ²⁰ id wærgæ kawanay a z'iššewêlnen, kalar Infas wa Zæddigan n Abba-nawan, a daḡ-wan išawalan. ²¹ Ad sættærmæsan aytedan imædrayan-nasan sæssugin iman-nasan, sættærmæsan abbatan bararan-nasan sæssugin iman-nasan, affallagan bararan fêl marwan-nasan sæssugin iman-nasan. ²² Awedan kul a kawan-igzær fêlas kawan-iwar esæm-in, mišan wa daḡ-wan izmaran har tæzæræst, wædi ad iḡlæs. ²³ As têtawasasam daḡ æḡræm taddarragam s iyyan. Æggæyyeḡ æsilakanæḡ-awan as wær du-za-tæḡrædam iḡerman n Israyil harwa da as du-z-æqqêla nak Ag Ag-gadæm.»

²⁴ «Attalami wær oger æššæx-net, wala deḡ ogar ækli mæššis. ²⁵ Igda y attalami ad agdu d æššæx-net, akli deḡ igd-as ad agdu æd mæššis. Dad zamas æmuzar n aḡaywan ægan-as esæm Aššaytan æn Baḡalzabul, manæmmæk as wær z'agin arak batuten i kæl aḡaywan-net?»

A kawan-wær-tæggæz tasa

²⁶ «Daḡ adi a tan-wær-tiksadam. Arat kul wa iḡbaran ad itewæsænêflêl, amaran æssir kul ad affaggu. ²⁷ Arat wa dawan-ænne daḡ šiyay, anniwat-tu ezal a mallan. Amaran arat kul wa dawan-itawasataktakan anniwat-tu s afalla. ²⁸ Ad wær tiksadam win naqqinen taḡæssa n awedan ḡas, amaran wær æfregan aḡšud æn wala i man-net. Kalar iksadat Mæššina a ifragan ahluk æn taḡæssa harkid man, aggadl-en daḡ Jahannama. ²⁹ Awak wærgæḡ æššin gæḡad tefelt iyyadda a nazzan? Dær iga awen da za, wær tan-iha i z'ægmædan man ar æs turagat n Abba-nawan Mæššina. ³⁰ Kawanay amaran wala anzadan æn ḡafawan-nawan da kul æḡḡunan. ³¹ Daḡ adi ad wær tiksadam wala, fêlas ḡur Mæššina togaram igæḡad ælqimat!»

Ḡaysa ilas awal daḡ batu n awa z'agin fêl nalkiman-net

³² «Awedan kul wa iggæyyen dat aytedan as nak a t-ilan, wædi nak da a fall-as aggayyæḡ dat Abba-nin ihan ijønnawan. ³³ Mišan wa di-inkuran dat aytedan, wædi nak da ad t-unkaræḡ dat Abba-nin ihan ijønnawan.»

³⁴ «Ad wər təxilam assa a d-əgəy ewâya-du alxer s əddənet: kala kala wər d-ewayay alxer, əməgər a d-ewayay. ³⁵ Ose-du y ad zənnəməzrəyay aləs d abba-net, zənnəməzrəya təbarart d anna-net, zənnəməzrəya dəy tədaggalt əd təntut ən barar-net, ³⁶ əqqələn kəl aɣaywan n awedan izənga-net. ³⁷ I igan y abba-net madəy anna-net tara togarat ta di-iga, wədi wər ihor əd tišit n ənalkim-in. I igan i barar-net madəy təbarart-net tara togarat ta di-iga, wədi wər ihor əd tišit n ənalkim-in. ³⁸ I wər nədkel təgəttawt-net, agu imateran-net, ilkəm-i, wədi wər ihor əd tišit n ənalkim-in. ³⁹ Awedan wa wər nəkəttəw ar iman-net dəy əddənet ta, wədi ad affatu dəy alaxirat. Amaran wa iqbala ad isaffatu iman-net dəy əddənet ta fəl əddəlil-in, wədi a tan-igrəw.»

⁴⁰ «I dawan-igan isəxlak, wədi nak as tan-iga, amaran i di-tan-igan, wədi wa di-d-izammazalan as tan-iga. ⁴¹ I igan isəxlak y ənnəbi ən Məššina fəl tišit-net ənnəbi, wədi ad igrəw arozan win igarraw ənnəbi. Amaran i igan isəxlak y alɣadil ən Məššina, fəl əddəlil ən təlɣudəla-net, wədi ad igrəw arozan win igarraw alɣadil. ⁴² Əggəyyey əsilakanay-awan as, i iššəşwan wala ablu n aman sammodnen y iyyan dəy nalkiman-in win ogarnen təmmədrəyt, fəlas imos ənalkim-in, wədi illikan as ad igrəw arozan-net.»

11

Awa d-izdaran

¹ As iɣrad Ƴaysa ammar ən nəttulab-net win maraw d əššin, ifal edag wen, ad isasayru itaggu təlɣutbat dəy xərman win əhanen akal wen.

Idufan aggotnen win tawagganen dəy əsəssəyri ən Ƴaysa

Ƴaysa əd Yaxya wa isalmaɣan aytedan dəy aman

² Yaxya wa isalmaɣan aytedan dəy aman, iha kasaw as isla awa itaggu Əlməsix, izammazal-du sər-əs arat dəy attalamitan-net, ³ y ad t-əssəstənan annin-as: «Ak kay a imosan was nəqqəl y a d-asu, meɣ ak ad nəqqəl y iyyan?» ⁴ Ijjəwwab-asan Ƴaysa inn-asan: «Əqqələt Yaxya təssuɣəlam-as awas təsallim, d awa təhannayam, tannim-as: ⁵ Iməddəɣal əhannayan, inəbdan jawanken, aytedan win igraw kətru əzzayan zaddogan, imzagan əgrawan tesalay, inəmməttan nakkarand-u dəy təməttant, šiləqqawen dəy sallanat y Əlinjil. ⁶ İbbilal awedan wa wər igmed əzəgzan-net fəlas wər iga aššak dəy awa əmosa.»

⁷ As əqlan attalamitan ən Yaxya, issənta Ƴaysa amagrad i tamattay dəy batu ən Yaxya, inn-asan: «Ma imos arat

was tækkam əsuf y a tu-tənəyam? Awak telant isiwəliwil aɖu? Kala! ⁸ Daɣ adi ma imos wa tækkam y a t-id-tənəyam? Awak aləs ilsân tabdoq təknaŋ šihussay? Kala! Ənəyat za, aytedan win əqqannen šibəddaɣ šin hossaynen, win di inan ən mənokalan a əhan. ⁹ Adi za ma tækkam y a t-id-tənəyam? Awak ənnəbi? Wəllen z'əs ənnəbi. Amaran Yaxya ogar tišit n ənnəbi fadda. ¹⁰ Fəlas Yaxya ənta a fəl ənnan Əlkəttaban: "Ənəy za nak a dat-ək assaɣlay anammazul-in a z'aknin tarrayt-nak."

¹¹ Əggəyyeɣ əsilakanax-awan as wər kala a d-ihəw awedan ogaran Yaxya wa isalmaɣan daɣ aman. Dər iga awen da wala ɣas wa ogaran təmmədrəyt daɣ Taɣmar ta n jənnawan, da ogar Yaxya. ¹² A d-obazan ɣur adan win daɣ itaggu Yaxya wa isalmaɣan daɣ aman təlxutbat, har harwa da, Taɣmar ta n jənnawan təmiqqas əd tallabəst təsohet, gammayan kəl əššur d abbaz-net. ¹³ Amaran Əlkəttaban n Ənnəbitan kul d Əttawret, əmālan Taɣmar ta n Məššina, har azzaman ən Yaxya. ¹⁴ Kud təqbālam awa dawan-ənnəɣ əddi, wədi əssənat as Yaxya, ənta a imosan Ilyas was ittəmal assa-net. ¹⁵ Wa isallin, issəsəmet!»

¹⁶ «Mas z'ammattalax aytedan n azzaman win nəha da? Olān əd bararan əqqimnen daɣ əssuk, saɣaren i midawan-nasan, ¹⁷ gannin-asan: Nəwat-awan tendə, mišan wər təwəɣam! Nəg-awan isakkan ən təfəyyawt, mišan wər təlem! ¹⁸ Ənnəɣ-awan adi fəlas Yaxya osa-du, wərmad itattu za wər isəssu, təzzar ənnan aytedan: Aljayn a t-izdayan. ¹⁹ Amaran, nak Ag Aggadəm, ose-du ətatta əsassa, mišan ənnan aytedan: "Ənawat aləs wen n amawwalay en, isassin esmad s igət, imos əmidi ən nabazan ən takəsen d ark aytedan!" Masnat ta du-təfalat Məššina amaran, imazalan n aytedan win əhanen tarrayt ta n Məššina a sataddinen aqqad-net.»

Ərruxmatan win iga ɣaysa i ɣərman win ənkurnen ammaran-net

²⁰ Təzzar issoɣal ɣaysa təgna labasat i ɣərman win daɣ əganat taššam ən təlməxjujaten, id tətubt a wər əgen. ²¹ Inna: «Iket aɣazab iqqāl-awan kəl-əɣrəm ən Koradzin! Iket aɣazab iqqāl-awan kəl-əɣrəm ən Betsayda! Fəlas təlməxjujaten šin ɣur-wan əganen ənnar əgānat daɣ əɣrəm ən Tir əd wa n Sidon, wədi irəw as əqqanan isəlsa ən bəhu əqqiman daɣ eɣəd, imos awen əsənnəfiləl n as əhdän. ²² Awen daɣ a fəlas ənnəɣ-awan: Alɣazab wa za tagim əzəl wa n tabadday ad aɣər wa z'agin aytedan n əɣrəm ən Tir əd wa n Sidon. ²³ Kawanay aytedan n əɣrəm wa n Kafarnahum, adis ad tammadkalam s aljannat? Kalar

Jahannama a day za tətəwəgaram, fəlas təlməxjujaten šin xur-wan əganen âs ənnar əgânat day əxrəm ən Sədom, wədi har azalada ill-ay. ²⁴ Awen day a fəlas ənnex-awan: Alxazab wa za tagim əzəl wa n tabadday ad agər wa z'agin aytedan n akal ən Sədom.»

Emmək was za nakkawan i Yaysa

²⁵ Iqla Yaysa iššêwal inna: «Əgeç-ak təmmalen ya Abba, Əməli ən jənnawan d amaçal fəl aḡabar wa təgeç aratan win i musanan, əd malan ən tayttay, təsannafalalaq-qan y aytedan win wər nəzlay əd bararan; ²⁶ id adi da a imosan agna-nak ya Abba!»

²⁷ «Arat kul ig-ay Abba-nin day əfus-in, wər t-illa i issanan awa əmosa ar Abba, wər t-illa dey i issanan awa imos Abba ar nak an Barar-net d awedan was areç a das-tu-sənnəfiləla. ²⁸ Akkiwat-i-du ketnawan win əddaznen, ewayan əzuk, a kawan-akfa təsanfawt. ²⁹ Bardagat-i təlkamam i tara-nin, tabəzam fall-i masnat, id nak məşşis ən talmat a mosa, əwəl-in dey wər t-iha zazwar ən man. Əddi ad za təgrəwam təsanfawt i man-nawan, ³⁰ fəlas ləkkum i tara-nin isinaflay, əgəggi-nin dey i fəsusan.»

12

Tamazaq day batu n əzəl wa n təsanfawt ən Kəl-Əlyəhud

¹ Azzaman en da, əzəl iyyan ən təsanfawt ən Kəl-Əlyəhud, issiwal Yaysa šiwəgas n alkama ənta əd nəttulab-net. Iggaz gələk inəttulab-net, a du-rassaban šiḡaxanən, tattintanat. ² As ənayan Fərisaytan awen, ənnan i Yaysa: «Ənəy! Inəttulab-nak taggin arat xarâman day əzəl wa n təsanfawt.» ³ Inn-asan Yaysa: «Ak təxaray a wər təgem awa iga ənnəbi Dawəd assaxa wad t-iggaz gələk, ənta əd midawan-net? ⁴ Awak wərgəç iguz a əgan ehan ən Məşşina, ətšan šiğəlwen šin əmosnen takutay təkâtat i Məşşina, imos awen arat fall-asan xaraman? Şiğəlwen šin den ilimaman ɣas as təxalal tattay-nasnat. Awak təxaray a wər təgem adi? ⁵ Məç ak təxaray a wər təgem day Əttawret as əzəl wa n təsanfawt, ilimaman wər əssəfraran əşşərədan n əzəl wa n təsanfawt id əzəl wədi şaqqalan day Ahan wa Zəwwəran n Əlyibada, mišan wər fall-asan imos awen lahan? ⁶ Əggəyex-awan as wa illan da, oğar Ehan wa Zəwwəran n Əlyibada. ⁷ Ənnar təgrâm almaɣna ən batu ta tənnat: "Nak təhanint a areç, wərgə takutay." Wədi wər za təbəzam s əşşərixa aytedan wər iwer lahan. ⁸ Ənnex-awan adi fəlas nak Ag Aggadəm a ixkaman fəl əzəl wa n təsanfawt.»

⁹ Ifal Ƴaysa edag wen, ikka ehan n əlyibada ən Kəl-Əlyəhud n əxrəm wen da. ¹⁰ Ehan wen ih-ay aləs as immût əfus-net. Ənnan Farisaytan i Ƴaysa: «Ak xalal əzuzəy n awedan daɣ əzəl wa n təsanfawt?» Arat wen imos tənagmayt a das-əgân fəl ad t-əbəzan s əššəriɣa. ¹¹ Inn-asan Ƴaysa: «Məni daɣ-wan wa z'ilân tilay iyyadda, amaran təqqəl anu daɣ əzəl wa n təsanfawt, aqqam wər daɣ-as tat-d-ikkəs? ¹² Awedan za, ogar tilay almaqam wəllen! Daɣ adi xalal igi ən tənfa y awedan daɣ əzəl wa n təsanfawt.» ¹³ Təzzar inna Ƴaysa y aləs wa: «Əzzəl əfus-nak.» Izzal-tu, izzay, ola əd wa hadan. ¹⁴ Əglan Farisaytan, ad timəšəwwiran fəl təməwit tas z'agin iman ən Ƴaysa.

Ƴaysa, ənta a imosan Ənaxbid wa imal ənnəbi

¹⁵ As isla Ƴaysa awen, igmad edag wen. Təlkam-as tamattay təgget. Izzozay imiranan kul. ¹⁶ Mišan irɣam-asan fəl amel y awedan waliyyan awa imos. ¹⁷ Arat wen iga fəl ad andu awal wa iga ənnəbi Isayas as inna: ¹⁸ *Ənta da ənaxbid-in wa sannafrana, s ənta a əknəy tara, isifalawas iman-in. A fall-as du-zəzzəbbe Infas-in di Zəddigan, ad immal i təmattiwen n əddənət kul əššəriɣa wa-nin.* ¹⁹ *Wər z'ammastan d awedan waliyyan, za wər fall-as z'isəɣərət, wala aslin-as aytedan isawal daɣ tarrayen.* ²⁰ *Wər z'arzu alawag ən telant illigwen, za wər z'anɣu fətəla təbukət i təmattant; almaɣna as wər z'agu təkma waliyyat i nərkam. Awen daɣ a z'itaggu iket wər issəbdad əššəriɣa;* ²¹ *aginət daɣ-as tamattiwen n əddənət kul attama-nasnat.*

Əməqqəs ən Ƴaysa əd Farisaytan

²² Təzzar immeway-du aləs iyyan əs Ƴaysa, as immidad əmi-net, imos deɣ əmədderɣəl, fəlas aggəsuf a t-izdaɣan. Izzozay Ƴaysa aləs wen, iššewal iswad deɣ. ²³ Isimaklal awen wəllen əs tamattay ketnet, ad təgannu: «Ma iqqal ak Ag ənnəbi Dawəd wa əttəmalan awa?»

²⁴ Mišan as əslan Farisaytan y awen, ənnan: «Aləs en Aššaytan Baɣalzabul wa n əmənokəl ən kələsuf a t-ikfan fərregat n ikus ən kələsuf daɣ aytedan.» ²⁵ Mišan ya issan Ƴaysa daɣ awa samadranan, inn-asan: «Taɣmar kul tas əmməgaran məssawəs gar-essan, tədi əbərəjji a za tagu. Wər t-illa əxrəm, wala deɣ aɣaywan, as z'ammazrayan məssawəs, aqqam wər ibarajjat. ²⁶ As imos as Aššaytan isattay iman-net, wədi iman-net a dər imməgar. Daɣ adi manəmmək as za tihag taɣmar-net? ²⁷ Amaran kud nak tarna ən Baɣalzabul as takkasay kələsuf daɣ aytedan, inalkiman-nawan za, ma ilan tarna tas tan-takkasan? Adi da fəlas əntanay iman-nasan as kawan-z-əbəzan s əššəriɣa.

²⁸ Mišan as imos as Infas ən Məššina as takkasay kələsuf daḡ aytedan, wədi Taymar ta n Məššina tos-iwan-du. ²⁹ Wər t-illa i ifrâgan iguz n ahan n aləs n əməqqerəd, iyrəd aqqa ən təla-net, ar s ad t-ikrâd təzzar. Dəffər as t-ikrâd amaran ad z'ifrəg aqqa ən təla-net. ³⁰ Wa dər-i wər nəddew, wədi azangaw-nin a imos, wa di-wər-nəllil deḡ s əšidəw, wədi əzəwwəziwəz a itaggu.»

³¹ «Awen da fəl dawan-ənnəy: A iqqal abakkad, wala alfawaxiš, kul ad təwəsürəfan y awedan, mišan ikus ən tarna y Infas wa Zəddigan, ənta wər z'itəwəsürəf y awedan.

³² As di-ibyak awedan nak Ag Aggadəm, ifrâg ad igrəw təsureft, mišan as ibəyak awedan Infas wa Zəddigan, wərmad z'igrəw təsureft daḡ əddənət, za wər tat-z-igrəw daḡ alaxirat.»

³³ «As təlam ašək isxân, a daḡ-as təgrəwam âratän olaynen, as təlam ašək wər nəsxə, a daḡ-as təgrəwam âratän əbrarnen; fəlas âratän win itaraw ašək, əntanay as itawazday. ³⁴ Xa taššolen šin da! Manəmmək as za tannim a olayən, ənta kawanay təkñâm tallabast? Wərgəy awa idkaran əwəl n awedan, ənta a d-igammadan imi-net?

³⁵ Awedan wa olayən, əlluḡ wa ihan əwəl-net a daḡ d-itakkas awa olayən, mišan anallabus ənta, talbast ta təhat əwəl-net a daḡ d-itakkas awa labasan. ³⁶ Amaran nak ənnəy-awan əzəl wa n tabadday awedan kul kundaba ibdad fəl batuten ən bannan šin iga. ³⁷ Fəlas awalən-nak a kay-tagaznen daḡ əššəriḡa, amaran əntanatay harwa da a kay-tabaznen s əššəriḡa.»

³⁸ Ənnan arat daḡ musanan n Əttawret əd Fərisaytan: «Əššəx, nəra daḡ-ak a dana-tassakna təlməxjujat təmosat aḡalamat.» ³⁹ Inn-asan Ƴaysa: «Aytedan n azzaman win, inəllubas, wər nəksud Məššina, amaran gammayan təlməxjujat! Kala! Təlməxjujat ta dasan-tətawaggat iyyadda ḡas, a tat-imosan ta n ənnəbi Yunəs. ⁴⁰ Ənta əmmək wa daḡ as iga Yunəs karad jilan, əd karad hadan daḡ tədist ən kifi wa zəwwəran, əmmək wen daḡ as nak da Ag Aggadəm ad aga karad adan gər mawetan n amaḡal.

⁴¹ Əzəl wa n tabadday, ad d-ənkəran aytedan n əḡrəm ən Ninif, əzzəbəzan aytedan n azzaman win y əššəriḡa fəlas əntanay əhəddi a əgan əzəl wa dasan-iga Yunəs təlxutbat, imal-asan awal ən Məššina. Əssənət za as, wa illan da əmərədda, oḡar Yunəs mišan tugayam əs tətubt. ⁴² Əzəl wa n tabadday, a du-tənkər təmənokalt tas kala təxkam fall akal n agala igân esəm Šəba, taggayyat fəl aytedan n azzaman win, təzzəbəz-tan y əššəriḡa fəlas d ad iraz amaḡal a du-təḡmad fəl ad təssəsəm y awal ən təla n əḡərri

wa itaggu əmənokal Suliman. Əssənət za as, wa illan da əmərədda, ogar ənnəbi Suliman mišan tugayam s a das-təssəməm.»

⁴³ «As igmad aggəsuf awedan, iras aggəsuf wen idaggan əqqurnen igammay id imal, iqqim wər t-igrew, ⁴⁴ ad annu dağ man-net: "Nak a za, ad əqqələy ehan-in wa d-əgmada." As t-id-iqqal a t-id-asu wər itawaggaz, ifrâd, iğrad amaknaw. ⁴⁵ Təzzar aglu idaw-du d əssa kələsuf wiyyad a t-ogarnen tallabəst, əggəzan awedan wanâd, əzdəyan-tu. Tagu tağara n awedan wen ağşud ogaran was kala tu-təga. Awen da a z'igrəwan inəllubas n azzaman win.»

Anna əd mədrayan ən Ƴaysa win tidət

⁴⁶ A išşewal Ƴaysa i tamattay den da, təlla anna-net den əd mədrayan-net. Əbdâdan sədi dat ahan, ərân a das-annin arat. ⁴⁷ Inna awedan iyyan i Ƴaysa: «Ənəy, anna-nak əd mədrayan-nak, əbdâdan-ak dat ahan ərân a dak-annin arat.» ⁴⁸ Inn-as Ƴaysa: «Ma imosan anna-nin? Ma imosan imədrayan-in?» ⁴⁹ Təzzar izzal Ƴaysa ifassan dənnəg nəttulab-net, inna: «Ənəyat, anna-nin əd mədrayan-in əntanay da, ⁵⁰ id awedan kul wa itamazalan tara n Abba-nin ihan ijənnawan, ənta a imosan amadray-nin, madeğ təmadrayt-in, madeğ anna-nin.»

13

Əsəssəğri wa n karad: Əlmitalan dağ batu ən Tağmar ta n Məşşina

Əlmital wa n ənanbal n amasa

¹ Əzəl wen, igmad Ƴaysa ehan, igla, iqqim dağ təgadamayt n agaraw. ² Təddew-du fall-as tamattay tagget, har as iggaz aɣlal n aman iqqim dağ-as, təbdad tamattay ketnet dağ təgadamayt n agaraw. ³ Imməgrad-asan dağ aratan aggotnen s əlmitalan. Inn-asan: «Kala ad ikka əmagyak iyyan tawagost-net, y a tat-inbəl. ⁴ Dağ anabal wa itaggu den imosan anabas n amasa, ərtaknat təblalen şiyyad fəl tama ən tarrayt, osan-du gəqad, ətşan-tanat. ⁵ Şiyyad ərtaknat dağ adag əhanat təhun, amaran wər t-ihə amaɣal igdân. Idwal-du amasa wen tarmad, fəlas wər daw-əs illa amaɣal aggen. ⁶ As təggəzzay təfuk, təssəqqad awa d-idwalan dağ amasa wen. Iqqur fəlas ikewan-net a wər nəggug dağ amaɣal. ⁷ Şiblalen şiyyad ərtaknat dağ təfəssağ. Ədwalnat təfəssağ şin, əlmaznat amasa wa d-idwalan den. ⁸ Mišan ya arat dağ təblalen en irtak dağ amaɣal olağan. Igmad-du, idwal, iga şixaxanen. Şiblalen şin den akkiyyat teraw temeday ən tablalt, şiyyad

sədisat təmərwen, šiyjad karadat təmərwen. ⁹ Wa isallin, isəsəmet!»

Əddəlil wa fəl itaggu Ƴaysa əlmitalan

¹⁰ Dəffər awen əhozan-t-in nəttulab-net ənnan-as: «Mafəl tətamagrada y aytedan win s əlmitalan?»

¹¹ İjjawwab-asan Ƴaysa inn-asan: «TaggaƳ-asan əlmitalan win, id kawanay təgrâwam masnat daƳ əssiran ən Taymar ta n jənnawan, əntanay amaran wər tat-əgrewan. ¹² Fəlas wa ilan, a das-itəwəšitu awa ila, annaflay. Wa wər nəla amaran, arat n awa ila da a daƳ-as attarmas. ¹³ Awen da a fəl dasan-tamagrada s əlmitalan, id əswâdan mišan wər hənnəyan, əssisaman mišan wər sallin, za wər gərrin. ¹⁴ Əntanay a fəl tənda batu ta iga ənnəbi Isayas assaƳa wad inna: "Ad taknim əsəsəm, mišan wər za tagrim wala. Taknim asawad mišan wər za tənəyam wala. ¹⁵ Fəlas iwallan ən tamattay ta ab'as əlan tafraýt, əngəm agrin. Egan iman-nasan imzagan, šittawen-nasan deƳ əymasan-tanat, fəl ad ib'as hannayan əs šittawen-nasan, ib-as sallin əs təməzzugen-nasan, ib'as gərrin əs wallan-nasan. Ugayan əs tətubt, əngəm əzzuzəyaq-qan."»

¹⁶ «Kawanay amaran təbbilalam id šittawen-nawan əhannaynat, təbbilalam id šiməzzugen-nawan sallinat. ¹⁷ ƏggəyyeƳ əsilakanəƳ-awan as sidaranan ənnəbitan aggotnen d aytedan win oƳadnen aggotnen anay n awa təhannayam, mišan wər t-ənayan, sidaranan deƳ tesalay y awas təsallim, mišan wər das-əslen.»

Əsəssəgri ən Ƴaysa əlmital wa n ənanbal n amasa

¹⁸ «DaƳ adi kawanay səsəmat y almaƳna n əlmital wa n ənabal n amasa. ¹⁹ Amasa wa irtakan fəl tama ən tarrayt, əlmital a imos n awedan wa islan i salan ən Taymar ta n Məššina wər tan-igra, asa-du İblis ikkəs awa itawanbalan daƳ əwəl-net. ²⁰ Amasa wa irtakan daƳ amađal əhânat təhun, əlmital a imos n awedan wa islan y awal ən Məššina, iqbal-tu əddi da əs man filawasnen, ²¹ mišan wər ila awen ekay. Awedan wa wər imos ar məššis ən təmazayen. Igda Ƴas a tu-təməl təssust, madeƳ təddəguzt təgât fəl əddəlil n Awal ən Məššina, ad ayyu əzəgzan əddi da. ²² Amasa wa irtakan daƳ təfəssaƳ, əlmital a imos n awedan wa islan y Awal ən Məššina, mišan aššawašatan n əddənet, d adakal wa təga təgərgist n əddənet tayttay-net, əssəfalan-du dənnəg Awal wen, igdal-as awen a d-awəy tənfa. ²³ Amasa amaran wa irtakan daƳ amađal olaƳan, əlmital a imos n awedan wa islan y Awal ən Məššina, igr-ay. Awedan wədi a d-awəy tənfa təmosat temeday n ənətfus,

iiyyat tēqqəl sēdisat tēmərwen, iyyat amaran tēqqəl karadat tēmərwen.»

Əlmital wa n alkama d arak yel wa daɣ-as d-idwalan

²⁴ Iga Ƴaysa i tamattay əlmital iyyan. Inna: «Taɣmar ta n jənnawan təha əlmital n aləs inbalan amasa olaɣan daɣ tawagost-net. ²⁵ As ənsan aytedan osa-du azangaw-net, inbas ark amasa daɣ təwagost ten, ijawankat. ²⁶ As tədwal tawagost, təga šiɣaɣanen, inafalal-du ənta da ark amasa wanad. ²⁷ Osan-du eklan n aləs wa ilan tawagost ten, ənnan-as: "Məššikkana, wərgex amasa wa olaɣan a tənbala daɣ tawagost-nak? Ənnəs za taɣara n arak yel wa daɣ-as d-idwalan den?" ²⁸ Inn-asan aləs wen: "Adi azangaw-nin iyyan a t-igan." Ənnan-as eklan: "Meqqal tareɣ ad naglu nəxrəd-du alabay ən yel wa wər noləɣ en?" ²⁹ Inn-asan: "Kala! Fəlas təksəda a əgeɣ a tu-tənakkadam har ammarsal alkama iman-net. ³⁰ Ayyiwat-tan ad ədwəlan kul har du-tawəd ɣarat. As inta əmiləy ən təwəgas, ad annaɣ i maššaxalan win talaynen, ad izaran s arak yel wa, har t-əxrədan tewaxnay iqqəl šibolasen, itəwəsəqqəd, alkama amaran agin-tu daɣ tədangawt-in."»

Əlmital wa n təblalt n amasa ən mutard

³¹ Ig-asan Ƴaysa əlmital iyyan, inn-asan: «Taɣmar ta n jənnawan tola d amasa n annabat igân esəm mutard inbal awedan daɣ tawagost-net. ³² Amasa wa n mutard ənta a ogaran imasan kul təmmədrəyt. Mišan as idwal, ad agər annabatan kul win fərgan, iqqəl ašək, har as a d-asin gəɣad ad taggin šisəllula daɣ zəlan-net.»

Əlmital wa n xamira

³³ Ig-asan əlmital iyyan, inn-asan: «Taɣmar ta n jənnawan tola əd xamira tərway təntut daɣ karadat anafaxaten n agel n alkama har ikuf agel ketnet.»

Əddəlil wa fəl itaggu Ƴaysa əlmitalan

³⁴ Aratan win den kul igann-en Ƴaysa i tamattay s əlmitalan. Wər dasan-inna arat waliyyan wər nəmos əlmital, ³⁵ fəl ad andu awal ən Məššina wa imal ənnəbi assaxa wad inna: «Ad arax imi-nin, əššiwəla s əlmitalan, əməlaɣ aratan win əɣbarnen harwa ɣur ənətti n əddənet.»

Əsəssəgri n əlmital wa n alkama d arak yel wa daɣ-as d-idwalan

³⁶ Dəffər awen ifal Ƴaysa tamattay, igla ikka ehan. Əhozan-t-in nəttulab-net ənnan-as: «Sassagr-anax əlmital wa n arak yel wa d-idwalan daɣ tawagost.» ³⁷ Inn-asan: «Wa inbalan amasa wa olaɣan, adi Ag Aggadəm. ³⁸ Tawagost, adi əddənet, amasa wa olaɣan amaran immittal aytedan

win əbbərdagnen i Taɣmar ta n Məššina, arak yel immittal aytedan win əlkammen i tarrayt ta n Iblis. ³⁹ Azangaw wa inbalan ark amasa, adi Iblis, ɣarat amaran adi əzəl wa n tabadday. Aytedan win talaynen, adi angalosan. ⁴⁰ Ənta əmmək wa daɣ as d-itawankad arak yel daɣ tawagost, itəwəsəqqəd, əmmək wədi daɣ a z'itəwəggin əzəl wa tabadday y aytedan. ⁴¹ A d-assagla nak Ag Aggadəm angalosan-in a z'əkkəsnen daɣ Taɣmar-in aratan kul win takkasnen əzəgzan daɣ aytedan, d aytedan win nəmməzray ən Məššina. ⁴² Təzzar əgəran-tan daɣ amahander ən təmsay, ad hallin əddadan idədwan-nasan fəl təmagraz. ⁴³ Əddi daɣ ad z'agin aytedan win oɣadnen əmələwləw wa n təfuk, daɣ Taɣmar ta n Məššina di n Abba-nasan. I isallin aslet!»

Elmital wa n ərrəzəɣ iɣbâran

⁴⁴ «Taɣmar ta n jənnawan tola harwa da d ərrəzəɣ iɣbâran daɣ tawagost, isaffagg-ay d awedan iyyan, ilas-tu aɣabar. Awa iga daɣ təfalawist, igla izzənz-in awa ila kul, izzənza tawagost ten.»

Elmital wa n əljuhər wa n ələsəl

⁴⁵ «Taɣmar ta n jənnawan tola harwa da d amassatag igammayan əljuhər wa ihossayan. ⁴⁶ As igraw əljuhər iyyan ihossayan, wa n ələsəl, igla izzənz-in awa ila kul izzənz-ay.»

Elmital wa n sangay wa n abbaz ən kifitan d almaɣna-net

⁴⁷ «Taɣmar ta n jənnawan tola harwa da əd sangay zəwwəran n abbaz ən kifitan itiwagaran daɣ agaraw, obaz-du kifitan əmosnen əzzənəfan. ⁴⁸ As idnay, ərkaban-t-idu nabazan ən kifitan əs təgadamayt, əqqiman, ədkalan-du izmaman a daɣ-san taggin kifitan win olaxnen, əggaran-in win wər nənfa wala. ⁴⁹ Awen daɣ a z'agin əzəl wa n tabadday. A d-asin angalosan, əskətan-in inəmməzray ən Məššina, zəmməzəyan-tan d aytedan win oɣadnen, ⁵⁰ əgəran-tan daɣ amahander ən təmsay, ad hallin əddadan idədwan-nasan fəl təmagraz.»

Elmital wa n məššis n aɣaywan

⁵¹ Igla ɣaysa iššəwal inn-asan: «Ak təgrâm awa ənne da kul?» Ənnan-as: «Awalla.» ⁵² Təzzar inn-asan: «Daɣ adi, əmusan n Əttawret kul wa itawasasaɣran y ad iqqəl ənalkim ən Taɣmar ta n jənnawan, ola əd məššis n aɣaywan, a d-itakkasan daɣ təla-net aratan win aynaynen əd win waššarnen isataymal-tan.»

Awa d-izdaran

⁵³ As iħrad Ƴaysa əsəssəħri wa igan s əlmitalan en, igmad akal wa ihozan agaraw, igla.

Ƴəssəħri ən Ƴaysa, itittəy ətəwəššak-net

Iba n əzəgzan daƳ Nazaret

⁵⁴ As d-osa aħrəm wa daƳ idwal ad isasaħru aytedan daƳ ahan-nasan wa n əlyibada. Awa sər-san iga awen daƳ əsəmməkləl, har əqqiman gannin: «Mənis t-idu-təggaz masnat togdat d awa, əd təlməħjujaten šin itaggu da?» ⁵⁵ «Ak awa wərgəħ ag aləs wa ikarrasan inan? Wərgəħ anna-net esəm-net Maryama, imədrayan-net iyyan YaƳub, iyyan Yusəf, iyyan Simħon, iyyan Yahuza? ⁵⁶ Wərgəħ šimədrayen-net kul əllanat ħur-na? DaƳ adi məni iguz wa das-d-əgan aratan win da kul?» ⁵⁷ Awen daƳ a dasan-igdalan əzəgzan sər-əs. Mišan inn-asan Ƴaysa: «Ənnəbi wər itəwəlku ar daƳ aħrəm wa daƳ idwal d aħaywan-nasan.» ⁵⁸ Amaran iqqim da wər iga təlməħjujaten aggot-nen daƳ adag wen, fəlas əzəgzan a sər-əs wər əgen aytedan win den.

14

Ətəwəħay ən Yaxya wa isalmaħan aytedan daƳ aman

¹ Azzaman en da a daƳ isla Herod Antifas wa n əmuzar n akal ən Galilaya, isalan ən Ƴaysa. ² Təzzar inna Herod y aytedan-net: «A igan da Yaxya wa isalmaħan aytedan daƳ aman, a d-inkaran den daƳ təmattant! Awen da fəl ila tarna n igi ən təlməħjujaten.» ³ Arat wen inn-ay Herod fəlas azzaman dat awen omâr s ətərməs ən Yaxya, itawakrad itawagga daƳ kasaw, fəl əddəlil ən Herodəyas təmosat taħur Filibus imosan amadray ən Herod a da, ⁴ fəlas Yaxya a igannin i Herod: «Xaram fall-ak azalaf ən təntut di.» ⁵ Eway-du awen əs Herod as ira ikus ən man ən Yaxya, mišan iksud tamattay təgât i Yaxya iduf n as ənnəbi a imos. ⁶ As d-iħlay əzəl wa n təhəwt ən Herod, isassaga saksas, təga elles ən Herodəyas eweħ iknan šihussay dat naftaħan. Təzzar oggām-tat Herod ⁷ har as ihad-as âs, a das-agu arat kul wa daƳ-as təgmay. ⁸ As təššəwwar anna-net tənn-as ad tannu i Herod eħaf ən Yaxya a təra. Tənkar təbarart tənn-i Herod: «Akf-i attabla da da iha aħaf ən Yaxya wa isalmaħan aytedan daƳ aman.» ⁹ Arat wa təgmay təbarart ten eway-du s əmənokal Herod as əħšadan man-net. Mišan omar s a das-itəwəggu arat wa təgmay den, fəl əddəlil ən təhuday ta das-iga d əddəlil ən naftaħan-net. ¹⁰ Issəgla awedan y a d-ifrəs eħaf ən Yaxya daƳ kasaw. ¹¹ Immeway-du aħaf n ənnəbi en daƳ attabla, itawakfa i təbarart, təzzar təkf-ay y

anna-net. ¹² Osan-du nalkiman ən Yaxya ədkalan tağəssa-net, ənbalan-tat-in. Əqlan əmalan i Ƴaysa.

Əšətši wa iga Ƴaysa səmmos gim n aləs

¹³ As isla Ƴaysa isalan win, igmad edag wen, iha aylal n aman. Iгла Ƴas-net ikka edag issufan a din-ikitayyen. Təsla tamattay ta təhat šiğarmaten šin Ƴələyyələyan awen, təlkam-as idaran-net. ¹⁴ As d-izzəbbat aylal inay tamattay tagget, təggaz-tu təhanint-net, ad izuzəy imiranan-nasan. ¹⁵ As təga takəst, əhozan-t-idu nəttulab-net ənnan-as: «Edag issufan awa, amaran əzəl igla, dağ adi suxəl tamattay a, ad təgməy id təzzənza a tətša dağ təğarmaten.» ¹⁶ Innasan Ƴaysa: «Wər təga addararat s ad aqlin, šatšat-tan kawanay iman-nawan da!» ¹⁷ Ənnan-as: «Nakkanay ya wər nəla da ar səmmosat təgəlwen d əššin kifitan.» ¹⁸ Innasan Ƴaysa: «Awəyat-i-tan-du.» ¹⁹ Omar tamattay s ad taqqam dağ yel illan den, təzzar idkal səmmosat təgəlwen šin den d əššin kifitan win, iggəzzay ijənnawan, iga igodan i Məššina. Ikaramkaram šigəlwen šin den, ikf-enat i nəttulab, a tanat-tuzanan i tamattay. ²⁰ Ətšan aytedan en ketnasan har əyyəwanan. Əššədawan-du nəttulab ikarammutan win du-tawaglaznen, ədnayan maraw əzmaman d əššin. ²¹ Aytedan win ətšanen den əmosan edag ən səmmos gim n aləs, əllanat dey tədoden den əd bararan.

Əjəwəнки ən Ƴaysa fəl aman

²² Wala a ihogan omar Ƴaysa inəttulab-net s ad əggəzan aylal n aman izaran-as-in əs təgadamayt ta hadat n agaraw iket di ad itasallam tamattay. ²³ As əğradan aytedan teklay, iggəzzay Ƴaysa adyağ y ad agu šiwatriwen dağ adag ikitayyan. İlla den da Ƴas-net har iga ahad. ²⁴ As itaggu awen da aylal iggug-in dağ agaraw, əbbatnat-tu tənazzamaren sa əd sa fəlas adu issohen a dər imməqqas. ²⁵ As təga tilkamat n ahad, ikka-du Ƴaysa inəttulab-net ijiwankat fəl aman. ²⁶ As t-oggan ijiwankat-du fəl aman, ərmağan. Ənnan: «Awen aggəsuf!» Sakkarayan fəl awa əgan dağ tərəmməq. ²⁷ Mišan tamazayt ten da a dasan-iššewal Ƴaysa inn-asən: «Ad wər təğšədəm, nak awa! Təgmədət-kawan tasa!» ²⁸ Den dağ a das-inna Butros: «Kud kay adi Əməli, tamərağ-i s a din-jəwənkeğ fəl aman əssəlkadağ-ak-in.» ²⁹ «İyyaw!» Inn-as Ƴaysa. İzzəbbat Butros aylal, ijawankat fəl aman innəmad Ƴaysa. ³⁰ Mišan as din-igra assahat n adu wa igaran den, təggaz-tu tasa, əggəzan-tu aman šin alamaz. İsağğarat inna: «Əməli agəz-i!» ³¹ Tarmad as das-in-izzal Ƴaysa əfus-net, ibaz-t-idu. Innas Ƴaysa: «Əzəgəzan-nak irkam wəllen, ma dağ-ak igan

aššak?» ³² Egğazan aɣlal ɣas, idrar aɗu. ³³ Ɛssəjadanas aytedan win əhanen aɣlal en, gannin: «Illikan as kay a imosan Barar ən Məššina.»

Ɛzuzəy ən miranan

³⁴ As əɣrasan agaraw, ewadan akal ən Ganazaret. ³⁵ As əssanan kəl akal en as Ƴaysa awen, əmalan y aytedan ən kallan win ɣələyɣələyan n edag wen, a sər-əs dutamawayan miranan kul. ³⁶ Ad itawansay ad ayyu aytedan ədəsan kuddeɣ təbənək ən təkadkat-net, amaran i tatidasan ad izzəy.

15

Ɛssuɣəl ən Ƴaysa təgna i Farisaytan

¹ Dəffər awen əfalan-du Farisaytan əd musanan n Ɛttawret Yerusalām, əkkan Ƴaysa, ənnan-as: ² «Mafəl wər əlkeman nəttulab-nak y aɣadaten šin dana-d-oyyan marawan-nana, wər əširidan ifassan-nasan dat tattay?»

³ Inn-asan Ƴaysa: «Kawanay za, mafəl tətamazrayam alwajiban ən Məššina, fəl ləkkum y aɣadaten-nawan?»

⁴ Wərgə Məššina a inna: "Səxmər abba-nak d anna-nak"? Inna deɣ: "Awedan wa išaffaraššen abba-net, madeɣ anna-net, wədi a daɣ-as təwəkkəsan man"?

⁵ Mišan kawanay təgannim y aytedan, as inna awedan y abba-net madeɣ anna-net: "Arat wa kay-z-akfaɣ imos tadhəlt-nak, əssinsaqqu y ad t-aga takutay," ⁶ əddi ab-as ihhəššal y awedan wədi saɣmar n abba-net wala anna-net. Ɛmmək di da as təgam aɣadat-nawan daɣ adag n Awal ən Məššina.

⁷ Ɛlmunafiqan! Tidət a imos awal wa iga Məššina daɣ batu-nawan əs tarrayt n ənnəbi Isayas as inna: ⁸ "Tamattay ta, iləs ɣas as di-təssəɣmar, mišan iwallan-nasan əggugan-i wəllen. ⁹ Ɛlɣibada wa di-taggin, ibbinnan, fəlas wər səsəxrin ar alwajiban a d-ənzaman aytedan daɣ ɣafawan-nasan."»

¹⁰ Iɣra Ƴaysa tamattay inn-as: «Səsəmat-i, tagrim awa dawan-z-anna da: ¹¹ Wərgəɣ awa itaggazan s əmi n aggadəm a t-isamadasan, kalar awa d-igammadan imi-net.»

Ɛsəssəgri ən Ƴaysa awal wa iga fəl Farisaytan

¹² Dəffər awen əhozan-t-in nəttulab-net, ənnan-as: «Ak təgreɣ-in as batuten-nak, əššakan-tanat Farisaytan wəllen.»

¹³ Inn-asan Ƴaysa: «Annabat kul wa wər inbel Abba-nin ihân ijənnawan, wədi a d-itəwəlbəy. ¹⁴ Ayyattan ɣas! Awen iməddərɣal əlwaynen wiyyad. Ɛməddəɣəl ilwāyan iyyan amaran, aɣadal a taggin ketnasan daɣ anu.»

¹⁵ Iššəwal Butros inn-as: «Sassagr-anax əlmital wədi.»

¹⁶ Inna Ƴaysa: «Awak kawanay da harwa da wər tɔlem əgərri? ¹⁷ Awak wər tɔgrem as arat kul wa iggazan s əmi n aggadəm, akkay a z'agu əs təd̄ist, dəffər adi inxəl-in daɣ əsuf? ¹⁸ Mišan wa d-igammadan imi, wədi əwəl a d-ifal, amaran ənta a isamadasan aggadəm. ¹⁹ Əssən̄at as əwəl ənta a du-gammadnat arak ənnəyatən, d igi ən man, d igi n əzzəna, d igi ən tədoden madeɣ igi ən meddan, əd šikra, əd tɔgəyya ən bahu, əd šizmit. ²⁰ Aratan win di əntanay a samadasnen aggadəm. Mišan tettay əs fassan wər nərrud, wər təsammadas aggadəm.»

Əzəgzan ən təntut ta n wələt Kanan

²¹ As ifal Ƴaysa edag wen, ikka amaɗal ən Tir əd Sidon. ²² Təhin-in təntut n iyyat daɣ Kananitatan tɔzdaɣat akal en da, təkka-du Ƴaysa təsikaray tɔgann-as: «Ya Əməli, Ag əmənokal Dawəd, hənəttət-i! Təbarart-in a izdaɣ aggəsuf a tat-izayazzaban wəllen.» ²³ Mišan wər inna Ƴaysa i təntut en wala. Idgaz awen inəttulab əhozan-t-in onsayan-tu ənnan-as: «Suɣəl tantut ta dana-təlkamat da təsikaray.» ²⁴ Inna Ƴaysa: «Nak wər du-tawazammazalay ar əs Kəl-Israyil, əmosnen zun ayfəd əssiggalnən.» ²⁵ Dər iga awen da ya təkka-ay-du təntut en, təssəjad-as tənn-as: «Əməli, əssən daɣ-i!» ²⁶ Inna Ƴaysa: «Wər oley i idkalan amensay ən bararan, igər-t-in i dan!» ²⁷ Tənn-as təntut en: «Tidət-nak Əməli, dər iga awen da ya iɗan əkəm̄mi a taggin awa d-irattakan daɣ adag wa daɣ tattin məssawsan, tattin-tu.» ²⁸ Inn-as Ƴaysa: «Ya tantut! Əzəgzan-nam i zəwwəran! Itəwəgget-am awa tareɣ!» Amazay en da a daɣ təzzay elles ən təntut en.

Əzuzəy ən Ƴaysa aytedan daɣ təwərnawen aggotnen

²⁹ Dəffər awen igmad Ƴaysa edag wen, ikka tɔgadamayt n agaraw wa n Galilaya, təzzar iwar adɣaɣ, iqqim. ³⁰ Təkka-ay-du tamattay tagget, a sər-əs du-tewayat iməggudal, əd məddərɣal, əd nəbdan, d aytedan as əmmidadan mawan-nasan, əd miranan wiyyad aggotnen. Aytedan win, tawasansin dat Ƴaysa, izuzəy-tan. ³¹ Isammaklal əs tamattay anay wa tɔga aytedan as əmmidadan mawan-nasan əššewalan, tənay inəbdan əgrāwan šixurad-nasan, tənay iməggudal jiwanken s əlluɣ, tənay iməddərɣal hannayan. Ad taggin aytedan təmmalen y Əməli n Israyil.

Əšətši ən Ƴaysa əkkoz gim n aləs

³² Iɣra-du Ƴaysa inəttulab-net inn-asan: «Təh-i təhanint ən tamattay a. Karad adan a ɣur-i əgan, amaran ab'as t-illa a ətšan. Wər areɣ a tan-ayya aglin wər əreman arat, fəlas əddi mijas a tan-aggadlu gələk daɣ tarrayt.»

³³ Ænnan-as nöttulab-net: «Mæni du-za-nəgrəw za day əsuf a šigəlwen siyyawannen tamattay togdât d awa?»
³⁴ Inn-asan Ƴaysa: «Mænəket təgəlwen təlam?» Ænnan-as: «Ëssayat təgəlwen a nəla d arat ən kifitan win madrornen.»
³⁵ Omar tamattay s ad təxrəd təximit. ³⁶ Idkal-du əssayat təgəlwen en əd kifitan win den, iga igodan i Məššina, amaran ikaramkaram-tan ikf-en i nöttulab, əzunan-tan i tamattay. ³⁷ Aytedan en ketnasan əyyəwanan əglazan-du, har as əssa əzmaman win zawwarnen a du-tawatkarnen day karammutan win d-əglazan. ³⁸ Aytedan win ətšanen den, əmosan əkkoz gim n aləs as wər əhenat tədoden əd bararan. ³⁹ Dəffər awen issəllam Ƴaysa tamattay, iggaz aylal n aman, ikka akal ən Magadan.

16

*Agamay ən Farisaytan əd Sadusaytan day Ƴaysa a dasan-
 agu təlməxjujat*

¹ Ækkan-du Farisaytan, əd Sadusaytan Ƴaysa ərân ad t-ajjarraban, gammayan daḡ-as a dasan-agu təlməxjujat təmosat alḡalamat a du-təfâlat Məššina. ² Inn-asan: «As iga əlməz, tənayam ijənnawan zaggaxan ad tannim: "Tufat za ad agu əzəl ihossayan." ³ As affaw amaran, tənayam ijənnawan zaggaxan əhânat-tan šiyyay ad tannim: "Azalada ad agu əzəl ibrâran." As təswadam daḡ jənnawan, ad təssənam awa dər z'alu alhawa dəffər awen, mišan awa itaggin daḡ azzaman win wər təssenam almaḡna-net! ⁴ Aytedan n azzaman win, inəllubas, wər nəksud Məššina, amaran gammayan təlməxjujat! Kala! Təlməxjujat ta dasan-tətawaggat iyyadda ḡas, a tat-imosan ta n ənnəbi Yunəs.» Den da a tan-ifal Ƴaysa, igla.

Ësəmmutəg ən Ƴaysa inalkiman-net

Emel ən Ƴaysa i nalkiman-net əddəlil n assa-net əddənet

Xamira wa n Farisaytan əd Sadusaytan

⁵ Ækkan nöttulab tagadamayt ta hadat n agaraw. As ewadan, əgran-in âs əttəwan-in igi n allaw ən təgəlla. ⁶ Inn-asan Ƴaysa: «Ënkədat wəllen i xamira ən Farisaytan, əd wa n Sadusaytan.» ⁷ Təzzar ad gannin nöttulab garəssan: «Awa wər t-inna ar fəlas wər neway tagəlla.» ⁸ Issan Ƴaysa daḡ awen inn-asan: «Mafəl təššewalam garəwwan fəlas wər təlem tagəlla, kəl əzəgzan əndarran? ⁹ Awak əgərri a wər təgem harwa da? Wər təkəttəwam səmmosat təgəlwen šin ətšan səmmos gim n aləs, d əket n əzmaman win du-tədnayam daḡ gəlzan-nasan? ¹⁰ Məḡ ak tətəwam-in əssayat təgəlwen šin əššətšanen əkkoz

gim n aləs! Mənəket əzmaman win zawwarnen a dutədnayam əzəl wen? ¹¹ Nak a dawan-ənnex: "Ənkədat i xamira ən Farisaytan, əd wa n Sadusaytan". Manəmmək as wər təgrem as wərgex tagəlla as dawan-əhex batu-net?» ¹² Den dağ ad əgran as wərgex xamira ən Farisaytan, əd wa n Sadusaytan a fəl dasan-imməgrad den, kalar əsəssəğri-nasan as dasan-inna a das-ənkədan.

Emel ən Butros awa imos Ƴaysa

¹³ İkkâ Ƴaysa amađal ən Qaysarəya wa n əmuzar Filibus as issəstan Ƴaysa i nəttulab-net, inn-asan: «Ak dağ iduf n aytedan, ma əmosa nak Ag Aggadəm?»

¹⁴ Ənnan-as: «Wiyyad za gannin kay Yaxya wa isalmağan aytedan dağ aman. Wiyyad gannin kay ənnəbi İlyas. Wiyyad amaran a gannin kay ənnəbi İrməya a təmosa, madeğ iyyan dağ ənnəbitan win hadatnen.» ¹⁵ Inn-asan Ƴaysa: «Kawanay za, ma tənnam ma mosa?» ¹⁶ Inn-as Simğon Butros: «Əlməsix a təmosa, barar ən Məşşina di n Amağlol.» ¹⁷ Inna Ƴaysa i Simğon Butros: «Təbbilala ya Simğon, ag Yunəs, fəlas arat wədi wərgex kay a dağ-as issosanan iman-nak, kalar Abba-nin di ihan ijənnawan a dak-isannafalalan. ¹⁸ Nak amaran ənnex-ak: Kay Butros təhunt a təmosa, amaran təhunt ta, ənta a fəl z'əkrəsəğ Əlkənisat-in. Əlkənisat ta, tarna ən təməttant da wər təfreg a das-təğşəd wala. ¹⁹ A kay-akfa təsassarut ən Taymar ta n jənnawan. Arat kul wa təssəxrama dağ əddənet dada, ijənnawan da a dağ-san ixram, arat değ wa təssəxlala dağ əddənet dada, ijənnawan da a dağ-san ixlal.» ²⁰ Təzzar iga i nəttulab-net ammar a dağ idğəz, s ad wər əmelan y awedan waliyyan as ənta a imosan Əlməsix.

Emel wa azzaran iga Ƴaysa y alyazab-net əd təməttant-net

²¹ A obazan ħur əzəl wen, ənta ad iggaz Ƴaysa šin əsəssəğri ən nəttulab-net as iwâr-tu iki ən Yerusalam, y ad agu alyazab aggen, a das-z-agin muzaran ən Kəl-Əlyəhud, əd muzaran ən limaman, əd musanan n Əttawret, təwəggin man-net, inkər-du değ dağ təməttant əzəl wa n karad. ²² Təzzar iwat-tu Butros s ahal, išşewal fall-as, inn-as: «Əməli, ihənəttətət-ak Məşşina dağ arat wa təmaləğ əddi! Kala wər kay-z-igrəw adi!» ²³ Mišan imalallay-in Ƴaysa Butros, inn-as: «Əfəl dəffər-i Aşşaytan! Təqqalağ-i təsənkəft dağ əşşəğəl wa di-d-ewayan s əddənet, fəlas imeđranan-nak, wərgex Məşşina a d-əfalan, kalar imeđranan n aggadəm ħas a əmosan.»

Tarrayt ən wa ilkaman i Ƴaysa

²⁴ Dæffær awen inna Ƴaysa i nöttulab-net: «Wa iran a di-ilkəm, wædi igmædet tara ən man-net, agu imateran-net, idkæl tægöttawt-net, ilkəm-i. ²⁵ Æssənat as awedan wa wær nægəmməy ar aggaz ən man-net, wædi ad t-əgmədan, mišan wa iqbalan ad t-əgmədan fəl əddəlil-in, wædi a tan-igrəw. ²⁶ Ma z'aknu y awedan ad igrəw əddənet ketnet, ənta amaran temsay a ikka? Awak mas ifrag awedan tehakkay-net y a sər-əs agəz iman-net dəy təmsay? ²⁷ Æssənat as nak Ag Aggadəm a d-asa ələy tanaya n Abba-nin, əddewa d angalosan-net, əddi amaran, awedan kul ad t-akfu maruzat n awa ewadan mazalan-net. ²⁸ Əggəyyey əsilakanax-awan as wiyyad dəy aytedan win əbdadnen da wær tan-z-iba iket wær ənayan assa-nin nak Ag Aggadəm əmosax əmənokal.»

17

Ətəwənay ən tanaya ən Ƴaysa

¹ As əgan sədis adan dæffær awen, iddew Ƴaysa əd Butros, əd Yaqub, əd Yaxya imosan amadray ən Yaqub en da, ikka dər-san adxax zagren xas-nasan. ² Den da ad imməttay azzahir-net dat-san, imalawlaw udəm-net s ənnur olan əd wa n təfuk, əgan səlsa-net təməllay təsiraqqet wəllen, təkna əsəməxməx. ³ Əhinan-in oggân ənnəbi Musa, d ənnəbi Ilyas as du-nafalalan, mişawalan əd Ƴaysa. ⁴ Iggad-du Butros inna i Ƴaysa: «Əməli, olax as nəlla da! Kud tarex adi, ad əkrəsa karad həktan dəy adag wa. Iyyan i-nak, iyyan in Musa, iyyan in Ilyas.» ⁵ Harwada işşewal Butros as tan-təlsa təgarak təmilawlawat, təqqal-asan zun telay. Igməd əməsli tagarak ten, inna: «Awa Barar-in wa əknəy tara; ənta a d-issəndan agna-nin. Səsəmat-as!» ⁶ As əslan nöttulab i batu ten, ərməyan wəllen, fataqqen əssəjadan. ⁷ Ihoz-tan-in Ƴaysa, idas-tan, inn-asan: «Ənkərat, təgmədet-kawan tasa!» ⁸ Ədkalan-du nöttulab isawadan-nasan wær hənneyan ar Ƴaysa.

⁹ Tazabben-du adxax en da, as tan-omar Ƴaysa, inn-asan: «Ad wær təməlam y awedan waliyyan awa tənayam da, iket wær d-ənkera nak Ag Aggadəm dəy təmattant.» ¹⁰ Æssəstanan nöttulab Ƴaysa, ənnan-as: «Mafel za gannin musanan n Əttawret: "Kundaba osa-du Ilyas təzzar as du-z-asu Əlməsix?"» ¹¹ Ijjəwwab-asan Ƴaysa inn-asan: «Awalla za ar a d-asu Ilyas, annazzam aratan kul. ¹² Amaran əssosanaq-qawan as Ilyas, osâ-du, mišan wær t-əqbelan aytedan, kalar əgan-as awas əran. Əmmək en dəy as illikan as a di-zəxğəzzəban nak Ag Aggadəm.» ¹³ Əgran nöttulab as Yaxya wa isalməyan aytedan dəy aman, as iha Ƴaysa batu-net den.

Barar wa tægraw tazakarkarat əd tarnə ta ila əzəgzan

¹⁴ As d-izzabbat Ƴaysa əd nəttulab-net win karad en adɣaɣ, əhozan-du tamattay, ikk-ay-du aləs iyyan igaraffat dat-əs, ¹⁵ inn-as: «Əməli, hənəttət i barar-in, tazakarkarat a tu-təgrawat, amaran iɣɣizzab wəllen fəlas faw da itudu daɣ təmsay, madeɣ aman. ¹⁶ Ewayaq-qu əs nəttulab-nak y ad t-əzzuzəyan, mišan indar-asan.» ¹⁷ Inna Ƴaysa: «Xa! İket iba n əzəgzan, iket əşşur daɣ aytedan n azzaman a! Awak har əmmay əddewa dər-wan, əzizaydara dər-wan? Awəyat-i-du barar sa da!» ¹⁸ Iharaşşat Ƴaysa aggəsuf wa ihan barar en, təzzar igmad-tu. İzzay barar daɣ amazay wen da. ¹⁹ Əhozan-in nəttulab Ƴaysa ənnan-as: «Mafel nakkanay indâr-anay ikus n aggəsuf wen?» ²⁰ Inn-asan: «Adi za aşşaddat ən rəkkəm n əzəgzan-nawan! Əggəyyey əsilakanay-awan as ənnar təlâm daɣ əzəgzan a ogdân əd wala imi ən təzuyay n əşənnan, har tənnam y adɣaɣ en: "Əgməd edag di takka wen", ad ammazal s adi. Əddi wər t-illa arat as dawan-z-indər igi-net. ²¹ [Amaran əzzənəf n aggəsuf wen, wər igəmməd awedan ar əs təwatriwen, d əzum.»]

Emel wa n əşşin iga Ƴaysa y alyazab-net əd təmattant-net

²² Əzəl iyyan əddewan nəttulab ən Ƴaysa daɣ akal ən Galilaya as dasan-inna: «Nak Ag Aggadəm əjwâra ad əggâzay ifassan n aytedan, ²³ agin iman-nin, təzzar ənkəra-du daɣ təmattant əzəl wa n karad.» Təxşad batu ten iman-nasan wəllen.

Amana wa itawarzaman y Ahan wa Zəwwəran n Əlyibada

²⁴ İgla Ƴaysa əd nəttulab-net har ewadan Kafarnahum. Ənkaran aytedan win zarzamnen amana y Ahan wa Zəwwəran n Əlyibada, əhozan-in Butros, əssəstanan-tu ənnan-as: «Awak əşşex-nawan arazam a wər itəggu amana y Ahan wa Zəwwəran n Əlyibada?» ²⁵ Inn-asan Butros: «Awalla za ar irazzam-tu.» İggaz Butros ehan, azzar-as Ƴaysa awal issəstan-tu inn-as: «Ma tənne kay Simyon, ma irazzaman takəsen d amana i mənokalan n əddənət? Awak maddanəsan a dasan-tan-razzamnen, meɣ aytedan sa hadan?» ²⁶ Inn-as Simyon: «Aytedan sa hadan a dasan-tan-razzamnen.» Inn-as Ƴaysa amaran: «Daɣ adi maddanəs ən mənokalan wər tan-iwer arazam ən wala. ²⁷ Mišan ya fəl ad wər nəqqəl təsənkəft y əzəgzan n aytedan win zarzamnen, aglu akku agaraw, təgəra daɣ-as azabzab wa n abbaz ən kifitan. Kifi wa tobazay əstizarat, aru imi-net, a daɣ-as in-tagəza tefelt n əzrəf wa mallan. Tefelt ten

əkkəs-tat-du, tagla takfaɣ-asan-tat, ad təqqal ərruzmatan n amana wa-nin, əd wa-nak.»

18

Əsəssəyri wa n əkkoz: Təməddurt ta tənammannakat əd Taymar ta n Məşşina

Eres d ədkul

¹ Amazay wen daɣ a daɣ din-əhozan nəttulab Ƴaysa, ənnan-as: «Ma imos za wa ogaran daɣ Taymar ta n jənnawan?» ² Təzzar iɣra-du Ƴaysa arat ən barar, issəbdad-tu gar-essan, ³ inna: «Əggəyyeɣ əsilakanax-awan əs as wər təsammattayam alxal, təqqəlam zun bararan, wədi wər ilkem a təggəzəm Taymar ta n jənnawan. ⁴ Awen daɣ a fəlas awedan kul wa issərasan iman-net, zun arat ən barar wa, wədi illikan as ənta ogaran daɣ Taymar ta n jənnawan.»

Əsənkəd y igi ən bakkadan

⁵ «Amaran i iqbala barar şilan wa fəl əddəlil-in, wədi nak iman-nin as di-iqbal. ⁶ Mişan i iqqalan əssəbab n abakkad y iyyan daɣ aytedan win sər-i əzzəgzannen, əmosnen zun bararan madrornen, wədi of-as ad itəwəqqən əzəzəd zəwwəran ən təhunt daɣ iri-net, itəwəgər daɣ ammas n agaraw əmazal wa iga əddi. ⁷ Iket alɣazab ill-ay y aytedan n əddənət! Əddəlilan aggotnen a t-əllanen tan-sisuginen ibakkadan! Illikan as ad t-əməlan əddəlilan win den har faw, mişan iket alɣazab ill-ay y awedan wa dasan-d-iqqalan əssəbab! ⁸ Kud əfus-nak madeɣ adar-nak a kay-sisuginen ibakkadan, wədi əfrəs-tan-in, təgəraq-qan-in sədi. Id of-ak təggəza aljannat təgeɣ əfus, madeɣ təgeɣ adar y ad tələɣ əşşin fassan, d əşşin daran, tətəwəgəra dər-san daɣ Jahannama. ⁹ Amaran kud şat-nak a təbukət a dak-təqqəl əssəbab n igi n abakkad, wədi kəkkərət-tat-du, təgəraq-qat-in sədi, id of-ak ad təgeɣ şat daɣ aljannat, y ad tələɣ sanatət şittawen tətəwəgəra dər-əsnat daɣ təmsay an Jahannama.»

Əlmital wa n tilay ta təssəggalat

¹⁰ «Ənkədat! Ad wər talkim iyyan daɣ aytedan win madrornen di, fəlas silakanax-awan as angalosan-nasan əhən ijənnawan, faw əllan ɣur Abba-nin. ¹¹ [Nak Ag Aggadəm oseɣ-du gammayaɣ aytedan win əxraknen y a tan-əxləsa.»]

¹² «Ma tənnam kawanay y awen? Awak amadan ilən temeday ən tilay, har daɣ-asnat təssəggal iyyadda, wərgəɣ ad ayyu tazayat təmərwən əd tazayat şin hadatnen

ədânnat, tæzzar azəl iswəd i ta tæssaggalat? ¹³ Eggəyyey əsilakanax-awan âs as d-igraw tilay ta n iyyadda en, ogar tədəwit ta z'agu fəl əddəlil-net, i ta z'agu fəl əddəlil ən tazayat təmərwen əd tazayat šin wər næssəgəl. ¹⁴ Emmək en dağ as abba-nawan ihân ijənnawan, wər ira ad ihlək waliyyan dağ aytedan win madrornen di.»

Awas danax-iwar igi-net y amadrax-nanax igân abakkad

¹⁵ Iгла Ҷайса ишсəвал инна: «As kay-idlam amadrax-nak, takkaq-qu dağ adag a dağ təmosam җas-nawan, təsassagraq-qin lahan-net. Kud za issəsam-ak itub, wədi zun as amadrax-nak a du-təgraway a kay-igmādan. ¹⁶ Mišan as ugay s a dak-issəsam, tiddawa d awedan iyyanda, madex əššin, təqqəlaq-qu. Emmək en dağ as "batu kul ad taknu əqqimnat-as sanatat təgəyyawen madex karadat." ¹⁷ Amaran as ugay s ad ilkəm y awal wa dasəgan aytedan win di, təməlağ almasalat tədi y Əlkənisat. As ugay s ad ilkəm y awa das-tənnə Əlkənisat, wədi ag-as iduf wa təgeğ y aytedan win wər nəssen Məššina, madex tagax-as iduf wa təgeğ y aytedan win zarzammen takəsen. ¹⁸ Eggəyyey əsilakanax-awan as arat kul wa təssəxramam dağ əddənet ta, wədi ijənnawan da a dağ-san ixram. Amaran wa təssəxlalam dağ əddənet ta, wədi ijənnawan da a dağ-san ixlal. ¹⁹ Əsilakanax-awan değ âs as namardan əššin dağ-wan dağ əddənet da da əttaran s esəm n Abba-nin ihân ijənnawan, wədi arat kul wa dağ-as əgməyan, a dasan-t-akfu. ²⁰ Fəlas edag wa dağ əmmənəyan əššin, madex karad dağ-wan s esəm-in, wədi əssənət as əlle gar-essan əddi da.»

Dağ batu ən təsureft: Əlmital wa n əkli wa wər təha təhanint

²¹ Təzzar ihoz-in Butros Ҷайса issəstan-tu inn-as: «Əməli, har mənəket təklaten as di-iwar ad əssurəfa y amadrax-nin a di-idlāman? Awak har əssəyat təklaten?» ²² Inn-as Ҷайса: «Wər dak-ənnə har əssəyat təklaten, kalar a dak-ənnə surəf-as əssəyat təmərwen ən təklat har əssa.

²³ Emmək en dağ as Tağmar ta n jənnawan, təha əlmital n əmənokal ad iğrân eklan-net, irâ ad issəğrəd ərrəzəğan-net. ²⁴ As issənta, itawayra-du iyyan dağ eklan en, a җur ila igiman ən gimən ən tafelt. ²⁵ Mišan akli wen wər ifreg ərruzmatan n əzrəf en. Awen dağ a fəl omar məššis s a din-itəwəzənzə ənta əd tağurəs əd maddanəs d awa ila kul, əqqəlan ərruzmatan n ərrəzəğan win җur-əs ila. ²⁶ Təzzar ifataqqad əkli en issəjad dat məššis, inn-as: "Ag-i təzaydart, məšši, a dak-ərzəməğ awa җur-i təley

kul." ²⁷ Arat wen eway-du əs məššis as tu-təggaz təhanint-net. Təzzar issoraf-as awa ħur-əs ila, oyy-ay. ²⁸ Azzama a din-igmâd əkli wen, ifâl-in məššis, immənay d iyyan daġ midawan-net daġ əššəġəl wər irwes ar temeday ən tafelt n əzrəf. Təzzar obaz-as tarzam, inn-as: "Ərzəm-i əzrəf wa daġ-ak ələġ!" ²⁹ Təzzar ifataqqad əmidi-net wen, onsay-tu inn-as: "Ag-i təzaydart, a dak-ərzəma." ³⁰ Mišan uġay əkli wen, isassaga fadda əmidi-net en daġ kasaw y ad t-izzərzəm əmarwas wa t-iga. ³¹ As ənayan midawan-net daġ əššəġəl awa igan den, əġšadan man-nasan wəllen, əġlan əgan isalan win kul i məššis. ³² Təzzar isassaġr-ay-du məššis inn-as: "İllikan as kay amaksan! Nak əssorafəġ-ak awa ħur-ək ələ kul fəlas di-tonsayəġ awen. ³³ Kay da, iwâr-kay a kay-təggəz təhanint n əmidi-nak, tagaġ-as əhənəttə zun wa dak-əġeġ nak." ³⁴ Təzzar iggaz alham məššis, isassaga akli en daġ kasaw. Itawattaf har iġrad arazam n awa ħur-əs ila ketnet.» ³⁵ Inn-asan Ƴaysa: «Əmmək en daġ as Abba-nin ihân ijənnawan wər dawan-z-issurəf as imos âs akkiyyan daġ-wan wər isurif s əwəl iyyanda i mədrayan-net daġ əzəġzan.»

Awa iga Ƴaysa daġ Yahudəyya

19

Ƴaysa iha tarrayt ən Yerusalam

İsənti

¹ Dəffər as iġrâd Ƴaysa alfaydaten šin, ifal akal ən Galilaya, ikka akal ən Yahudəyya ihân aganna wa hadan n agarew wa n Yordan. ² Əlkamnat-as tamattiwen aggotnen, a tanat-izuzəy den da.

Azalaf d əməzzəy

³ Əhozan-t-in Fərisaytan əgan-as əsəstan imosan tənagmayt, ənnan-as: «Awak xalal y aləs əzəməzzəy ən təntut-net fəl a iqqal əddəlil?» ⁴ Inn-asan Ƴaysa: «Wərgəġ təġrâm as əstizarat as d-ixlak Əmaxlak əddənət, "ixlak-du aytedan,

ixlak-kan-du əmosan yay əd təntay."»

⁵ «Inna: "Adi daġ a fəl iffal aləs

abba-net, d anna-net,

irtəy əd təntut-net,

əqqəlan arat iyyanda."»

⁶ «Əmmək en daġ as ad ib-as əmosan əššin, kalar ad əqqəlan təġəssa iyyadda. Daġ adi, awa issərtay Məššina a tu-wər-izəmməzzəy awedan.» ⁷ Ənnan-as: «Daġ adi, mafel as omar ənnəbi Musa ad tətəwəkfu širawt n

əməzzəy i təntut, tətəwəzəməzzəy?» ⁸ Inn-asan: «Aššaddat ən təggərməmt a fəl kawan-ikfa Musa turagat n ad təzamazzayam šidoden-nawan. Mišan arat wədi wərgəy ənta a igan əstizarat. ⁹ Amaran nak əsilakanax-awan as i izammazzayan tantut-net, a das-wər-nətəggu meddan, izlaf iyyat, wədi əzzəna a igā əddi.»

¹⁰ Ennan-as nəttulab-net: «Adi za, kud awen dəy a illan gər aləs əd təntut, wədi ofa i wər nəzlef fadda.» ¹¹ Inn-asan: «Awal wa, wərgəy aytedan kul əqbâlan-tu, kalar wər t-iqbel ar win ikfa Məššina fərregat n əlqəbulat-net. ¹² Fəlas əllan-tu əddəlilan gaddalnen azalaf əmosnen as: meddan wiyyad as d-əhəwan da wər əfregan azalaf, wiyyad dəffər a igan ad tawazaman, əllân-tu dəy win as iman-nasan as sannafranana iba n azalaf fəl ad wər əlen dəy əššəxəl ar wa n Taymar ta n jənnawan. Wa ifragan əlqəbulat n adi, əqbəlet-tu.»

Igi ən Yaysa šiwatriwen i bararan

¹³ Təzzar a du-tawayan aytedan bararan, fəl a tan-issəwər Yaysa ifassan-net, ittər-asan. Əššewalan nəttulab fəl aytedan win den. ¹⁴ Mišan inn-asan Yaysa: «Ayyiwat bararan a di-d-akkin, a tan-in-wər-təwəxam fall-i; fəlas Taymar ta n jənnawan šin aytedan win šilaten-nasan.» ¹⁵ Issəwar-tan ifassan-net, ittar-asan, dəffər awen obaz tarrayt-net, igla.

Əməšiwəl ən Yaysa d aləs iyyan aynayan n əməgğergəs

¹⁶ Təzzar ihoz-in aləs iyyan aynayan Yaysa, inn-as: «Əššex, ma imos arat olâxan was as t-əgəx ad əgrəwax təməddurt ta təxlalat?» ¹⁷ Inn-as Yaysa: «Mafel as di-təsastana dəy batu n awa olaxan? Məššina xas a olaxan. Amaran as tarex ad təgrəwa təməddurt ta təxlalat, təlkəma y əlwajiban-net.» ¹⁸ Inn-as aləs wen: «Ma mosan za əlwajiban win den?» Inn-as Yaysa: «Adi za, ad wər tagəy iman; ad wər tagəy əzzəna; ad wər takəra; ad wər taga təgəyya ən bahu fəl awedan waliyyan; ¹⁹ səxmər abba-nak d anna-nak; agu y əšəqqax-nak tara ta təgəy i man-nak.»

²⁰ Inn-as aləs wen: «Aratan win di kul əssibdadaq-qan. Ma di-in-iqqiman harwa?» ²¹ Inn-as Yaysa: «As tarex ad təqqələx awedan ikmâlan, tagla tazzanzax-in təla-nak, takfay inazzan-net i tələqqawen, əddi ad təgrəwax ərrəzəy a dak-z-ansin dəy əlaxirat. Dəffər adi amaran tagla-du təlkəməx-i.» ²² As isla aləs wen i batu ten, inkar, igla əxšâdan man-net, fəlas ərrəzəy aggen a ila.

Efsan d arozan

²³ Den day ad inna ʒaysa i nöttulab-net: «Eggöyyey silakanax-awan as izzawat fäl ämöggergæs iguz ən Taɣmar ta n jännawan. ²⁴ Awalla, silakanax-awan as ogar tärɣəsay ta iga fäl aɫam aradaɣ day təbuday n ənazmay, i ta iga fäl ämöggergæs iguz ən Taɣmar ta n Məššina.» ²⁵ As əslan nöttulab y awen, isammaklal sər-san wəllen, ənnan: «Day adi, ma ifragan ad iɣləs day təmsay?» ²⁶ Iswad day-san ʒaysa, inn-asan: «Arat wədi muxal a imos ɣur aytedan, mišan ɣur Məššina arat kul ifrâg igi.»

²⁷ Den day ad iššewal Butros inna: «Nakkanay za? Awak wərgex noyya arat kul, nəlcam-ak? Day adi ma day-na z'agin?» ²⁸ Inn-asan ʒaysa: «Eggöyyey əsilakanax-awan as: As tawašašanayan aratan kul, əqqima nak Ag Aggadəm day adag-in, a t-imosan təxawit ən taɣmar-in di təlat tanaya, əddi kawanay a di-əlkammen ad taqqamim fäl marawat təxiwa ən taɣmar əd sanatat, təsrəɣam i tawšeten ən Kəl-Israyil an marawat əd sanatat. ²⁹ Awedan kul wa ifalan aɣaywan-nasan, əd mədrayan-net, əd təmədrayen-net, d abba-net, d anna-net əd bararan-net, madeɣ amaɫal-net fäl əddəlil-in, wədi ad igrəw temeday n ənətfus n aratan win den, igrəw deɣ təməddurt ta təɣlalət. ³⁰ A aggen day win əhanen eɣaf əmərədda, ilkâm ad əggəzan ələqqam; amaran a aggen day win əhanen ələqqam əmərədda, ilkâm ad əggəzan eɣaf.»

20

Elmital wa n maššaxalan win afarag n alyanab

¹ Iɣla ʒaysa iššewal inna: «Ənta da a wa dər tola Taɣmar ta n jännawan: A d-inkər awedan ilân afarag n alyanab əzəl iyyan aɣôra, ira ad idkəl imaššaxalan y afarag-net. ² Inamarda əd maššaxalan win âs, əzəl kul a tan-akfu tefelt n əzrəf, təzzar issok-en afarag. ³ As təga ədəgəlšet ilas-du agamad, inay imaššaxalan wiyyad wər nəgrew əššəɣəl harwa əqqiman day asammanay n əɣrəm. ⁴ Inn-asan: "Kawanay da agliwat təšxəlam day afarag-in, a dawan-agay ərruzmatan olâɣnen." ⁵ Əɣlan maššaxalan, əkkan afarag-net. Dəffər awen ilas igmad-du ɣur ammasnazal, igmad-du deɣ əs tazzar. Amaran i d-igmad ad agu zun awen da. ⁶ As təga takəst zagret ilas-du agamad, inay imaššaxalan wiyyad əqqimnen, inn-asan: "Mafel təklâm ad təqqimam əddi, wər tahem wala?" ⁷ Ənnan-as: "Agaraw a wər nəga i danax-iššəšxalan." Inn-asan: "Agliwat kawanay da təšxəlam day afarag-in n alyanab."»

⁸ «As tuda təfuk, inna məššis n afarag wen y əmuzar ən maššaxalan-net: "Aɣra-du imaššaxalan kul tərzəma y

akkiyyan alxaq-net. Izar əs win ədkala daɣ tilkamat, təssəlkəməɣ əs win ədkalaɣ əstizarat." ⁹ Osan-du win əssəntanen əşşəɣəl takəst zagret, akkiyyan daɣ-san igraw tefelt n əzrəf. ¹⁰ Dəffər awen təssəɣlay-du əs win əşɣalnen əstizarat, əgân iduf n as ad əgrəwan a ogaran awa əgrawan meddan win. Mişan əntanay da akkiyyan daɣ-san igraw tefelt. ¹¹ As əgrawan ərruzmatan-nasan, əssoɣalan təgna məşşis n afarag wen. ¹² Ənnan: "Aytedan win tətkaɣ əs tilkamat, alwaq iyyanda ɣas a əşɣalan, amaran təşəşşagdaq-qan dər-na nakkanay a əklanen nəşɣâl, təkaggay-ana təfuk." ¹³ Təzzar işşewal məşşis n afarag y iyyan daɣ-san, inn-as: "Əmidi-nin, nak wər dak-əgəɣ arat waliyyan wər noxed. Wərgə kay iman-nak a dər namarda fəl tafelt iyyadda n əzrəf daɣ əzəl?" ¹⁴ Daɣ adi abəz azrəf wa imosan alxaq-nak, tagla. Kud nak a iran ad şəşşagdaɣ alxaq-nak əd wa n meddan win ətkalaɣ daɣ tilkamat, tədi nak a təqqal. ¹⁵ Awak nak wər z'agay awa areɣ s ərrəzəɣan-in? Məɣ ak manjaɣ a təgəɣ as əmosaɣ aləs olâɣan?" ¹⁶ Inna ɣaysa: «Əmmək en daɣ as win əhanen eɣaf əmərədda, ilkâm ad əggəzan ələqqam; amaran win əhanen ələqqam əmərədda, ilkâm ad əggəzan eɣaf.»

Emel wa n karad iga ɣaysa y alɣazab-net əd təmattant-net

¹⁷ Iggəzzay ɣaysa, ikka Yerusalem ənta əd nəttulab win maraw d əşşin. Iwar dər-san tama, da jiwanken fəl tarrayt, inn-asan: ¹⁸ «Səsəmat: Nakkanay da əggəzzaynen əs Yerusalem da. Den daɣ ad z'ətəwəgga nak Ag Ag-gadəm daɣ fassan ən muzaran ən limaman, əd musanan n Əttawret. Aytedan win a di-əxkəman təmattant. ¹⁹ A di-agin daɣ fassan n aytedan wər nəmos Kəl-Əlyəhud, a daɣ-i tajaban, ayyawan-i şiwwit. Dəffər awen attaytayan-i fəl təgəttawt, ib-i, ənkəra-du daɣ təmattant əzəl wa n karad.»

Alɣazab d əşşəɣəl

²⁰ Təhoz-in taɣur Zabaday ɣaysa, təddew əd maddanəs. Təgaraffat y a tu-tansəy. ²¹ Inn-as: «Arat iyyan a tareɣ?» Tənn-as: «Bararan-in a n əşşin a as daɣ-ak are a di-tagay arkawal n as ad əggəzan idaggan ətkâlnen: iyyan daɣ əɣil-nak, wa hadan daɣ zalgat-nak, daɣ Taɣmar-nak.» ²² Inna ɣaysa: «Wər təssenam almaɣna n arat wa təgmayam əddi. Awak təfrâgam a dər-i tədrəwam alɣazab wa z'aga daɣ alwaq wər nəggug?» Ənnan-as: «Awalla, nəfrâg a dər-ək tu-nədrəw.» ²³ Inn-asan ɣaysa: «Awalla, illikan as təfrâgam a dər-i tədrəwam alɣazab wa. Mişan daɣ batu ən wa z'aqqamin daɣ əɣil-in wala zalgat-in, wərgəɣ nak

a t-ihakkin, kalar idaggan win di in win as tan-isammatag Abba-nin.»

²⁴ Æslan maraw nöttulab win hadatnen y awen, əşşakan əşşin mədrayan win den. ²⁵ Təzzar iyr-en-du Ƴaysa, əhozan-t-in, inn-asan: «Təssânam as imuzaran ən təmattiwen saknin tarna y aytedan win as azzaran, amaran aytedan win dağ-san attafnen əlxəkum saknin aytedan win as azzaran tağmar. ²⁶ Mişan kawanay ad wər tagim adi gar-ewwan. Kalar as ira iyyan dağ-wan ad ilu almaqam, iqqəlet zun amaşşaxal-nawan. ²⁷ Amaran wa dağ-wan iran tizart, iqqəlet akli-nawan. ²⁸ Emmək en dağ as nak Ag Aggadəm wər d-osex əddənet y a di-əşşəlan aytedan. Kalar assa a d-əge y ad əşşəla y aytedan, akfa iman-nin fəl ad səddərfəy əs təmattant-in aytedan aggotnen dağ bakkadan-nasan.»

Æzuzəy ən Ƴaysa əşşin məddərxal

²⁹ Igmad Ƴaysa əd nöttulab-net ayrəm wa n Yerikaw, təlkâm-asan tamattay tagget. ³⁰ Əllân məddərxal den əşşin, əqqiman fəl afay ən tarrayt. Æslan âs Ƴaysa a itakayan den, ədkalan əməsli-nasan ad gannin: «Hənəttət-anağ, Əməli, Ag ənnəbi Dawəd!» ³¹ Təsannaryaman-asan tamattay fəl ad affastin, mişan əşşotan adakal ən maslan-nasan gannin: «Hənəttət-anağ, Əməli, Ag Dawəd!» ³² Izzəkkat Ƴaysa, iyr-en, inn-asan: «Mas taram a dawan-t-aga?» ³³ Ənnan-as: «Əməli, asawad-nanağ as nara agaraw-net.» ³⁴ Təggaz təhanint-nasan Ƴaysa, idas şittawen-nasan. Amazay wen dağ a tan-d-iqqal asawad-nasan, təzzar əlkaman-as.

21

Adan win əlkamnen ən Ƴaysa dağ Yerusalam

Iguz ən Ƴaysa Yerusalam imos əmənokal

¹ As din-ihoz Ƴaysa əd nöttulab-net Yerusalam, dağ ənəmihaz ən tağrəmt ta n Betfajay, dagma n ədyağ was itawannu wa n "Eşkan ən Zaytun", izammazal Ƴaysa əşşin nöttulab, ² inn-asan: «Akkiwat tağrəmt ten dat-wan den. Tosâm-tat-in Ƴas, tənâyam tajat təqqanat təlât əhulel. Ariwat-tan-du təlwəyam-i-tan-du. ³ As dawan-inna awedan arat, tannim-as: "Əməli a sər-san iddəraran." Eddi a kawan-ayyu taglim dər-san amazay wen da.» ⁴ Arat wa iga fəl ad andu awal wa d-imal Məşşina əs tarrayt n ənnəbi as inna: ⁵ «Anniwat y əyrəm wa n Səyon: Ənəy! Əmənokal-nak izây-kay-du. Ikna əsərəs ən man-net. Iwân tâtjat, əhulel fadda, imosan ara n əmudar a fəl itamaway əzuk.»

⁶ Əglan nöttulab əmmožalan awa as tan-omar Ƴaysa.

⁷ Əlwayan tajat d əhulel-net i Ƴaysa. Ədfaran fall-asan

isælsa-nasan, iwan ʃaysa əhulel. ⁸ Təgla-du tamattay tægget wællen ad tətissəw i ʃaysa isælsa-net fəl tarrayt, wiyyad farrasan-du ilədlad tissəwan-as-tan fəl tarrayt. ⁹ Tamattay ta təkamat i ʃaysa, əd ta das-tazzarat, tətəkāl əməsli-net tēgannu:

«Ozana!

Təmmal y ahaya n əmənokal Dawəd!

Iga Məššina albaraka daɣ

wa d-osan s esəm n ʃməli!

Ozana! Təmmal i Məššina

daɣ jənnawan win ədkalnen!»

¹⁰ As d-iggaz ʃaysa Yerusalām, aytedan n əɣrəm ketnasan nijarwayan gannin: «Ma imos aləs en?» ¹¹ Ad tēgannu tamattay: «Adi za ənnəbi ʃaysa imosan ag əɣrəm ən Nazaret ta n akal ən Galilaya.»

Assa ən ʃaysa Ehan wa Zəwwəran n ʃlyibada

¹² Iggaz ʃaysa aɣalla wa iɣlayan Ehan wa Zəwwəran n ʃlyibada. Iɣrad daɣ-as asataɣ n aytedan kul win massa-tagan, harkid win mazanzan. Isabbanbay tebəren šin fəl sansin kəl sanji izərfan-nasan, isabbanbay deɣ šisəqqima ən massatagan ən tədəbren. ¹³ Təzzar inn-asan: «Iktâb as: "Ehan-in a das-itəwəggu esəm ehan n əlyibada." Kawanay amaran təgâm-tu "əsəlyəs ən baydagan".» ¹⁴ ʃhozan-in məddəryal, əd məggudal ʃaysa daɣ Ahan wa Zəwwəran n ʃlyibada en da, izzozay-tan. ¹⁵ Mišan ənkaran muzaran ən limaman əd musanan n ʃttawrət əššakan wəllen aratan simaklalten win iga ʃaysa den. Əššakan deɣ šixaraten šin taggin bararan daɣ Ehan wa Zəwwəran n ʃlyibada gannin: «Ozana! Təmmal y ahaya n əmənokal Dawəd!» ¹⁶ Awen a fəl ənnan i ʃaysa: «Təsâlla y awa gannin da?» Amaran inn-asan ʃaysa: «Awalla. Awak tɣaray a wər tēgem daɣ ʃlkəttaban batu ta tənnat: "Kay a d-ewayan əs bararan, əd janɣayan a dak-agin təmmalen!"» ¹⁷ Dəffər awen ifal-tan ʃaysa, igmad Yerusalām, edwa taɣrəmt ta n Betanəy insa daɣ-as.

Alayan ən ʃaysa ašək wa n fig

¹⁸ As affaw iqqal-du Yerusalām harwa aɣôra, ifray i gələk daɣ tarrayt. ¹⁹ Inay ašək ən fig immar-t-in mišan wər daɣ-as in-ogez ar ifərkak ɣas. Təzzar inna y ašək wen: "Tammazaxət d igi n aratan har faw daɣ əddənət!" Amazay wen daɣ ad iqqur ašək en. ²⁰ As ənayan nəttulab-net awen, isammaklāl sər-san, ad gannin: «Manəmmək as iqqur ašək ən fig wen imi iyyanda?» ²¹ Inn-asan ʃaysa: «Əggəyyeɣ əsilakanax-awan âs as təzzəgzanam, wər tēgem a imosan ašək, wərgəɣ awa əgeɣ y ašək a

γας as za tēfrēgam igi-net. Kalar ad tēfrēgam ad tannim y adγay wa: "Ēgməd adag di tēfētēqqe daγ agarew", agu deγ awen da. ²² Arat kul wa tonsayam Məššina s əzəgzan, a tu-tēgrəwam.»

Ēsəstan igân daγ batu ən tarnə ən γaysa

²³ Ikka γaysa Ehan wa Zəwwəran n Ēlyibada, a daγ-as isasayru. Ēhozan-t-in muzaran ən limaman, əd muzaran ən Kəl-Ēlyəhud ənnan-as: «Awak ma təmos tarnə tas tətəggay aratan win? Ma kay-ikfan tarnə ta?» ²⁴ Inn-asan γaysa: «Nak da a dawan-agay əsəstan iyyanda. As tējəwwabam y əsəstan-in, a dawan-əməla da d-əgrəwəγ tarnə n igi n aratan win tagga da. ²⁵ Ēnta da əsəstan-in: "Awak əsəlməγ wa igə Yaxya aytedan daγ aman Məššina a γur d-ifal awen meγ aggadəm?"» Təzzar ad tinəmännin gar-essan: «As nənna: "Məššina a γur d-igraw turagat n awen", a danay-annu: "Mafel za wər sər-əs təzzəgzanam?" ²⁶ As das-nənna amaran: "Aggadəm a γur d-igraw Yaxya tarnə ten", wədi a dana-təššək tamattay, fəlas ketnet təkəkəs aššək as Yaxya ənnəbi a imos.» ²⁷ Təzzar ənnan i γaysa: «Wər nəssen.» Inn-asan γaysa: «Nak da za wər dawan-z-əməla wa di-ikfan tarnə n igi n aratan win.»

Ēlmital wa n bararan win əššin

²⁸ Iglə γaysa iššewal inn-asan: «Ma tənnam s əlqissat ta? Aləs iyyan a ilan əššin bararan. Ihoz-in barar-net wa azzaran, inn-as: "Aglu barar-in təšxəla daγ afarag-nana wa n alxanab azala." ²⁹ Inn-as barar-net wen: "Wər di-ihə adi." Mišan ya dəffər awen, imməgraz barar en tugəyt ta igə y abba-net, təzzar iglə ikka afarag-nasan. ³⁰ Ihoz-in aləs wen barar-net wa n əššin igmay daγ-as arat wa igmay daγ wa azzaran. Ig-as barar-net wen aljawab igân əs saymar, inn-as: "Awalla Abba-nin, ad akkaγ afarag-nana!" Mišan iqqim da wər t-ikka. ³¹ Awak ma imos daγ bararan en wa immozalan tara n abba-nasan?» Ēnnan-as: «Adi za barar wa azzaran!» Ēddi a dasan-inna γaysa: «Ēggəyyey əsilakanay-awan za as, inabazan ən takəsen əd təkərwaten, da a dawan-izaran ətəwəqbal daγ Taymar ta n Məššina. ³² Ēnney-awan adi fəlas Yaxya, os-iwan-du, issəkn-iwan awa kawan-iwaran əmərədda gar-ewwan əd Məššina, mišan wər sər-əs təzzəgzanam. Amaran inabazan ən takəsen, əd təkərwaten, əzzigzanan sər-əs. Kawanay iman-nawan tənāyam awen, mišan wər sər-wan d-eway təmagrist waliyyat n arak mazalan-nawan əngəm za təzzəgzanam sər-əs.»

Ēlmital wa n magyakan n alxanab

³³ Sæsəmat y əlqissat iyyat təmosat əlmital: «Məşşis n aɣaywan iyyan a inbalan aɣanab daɣ amaɗal-net, issəɣlay-tu afarag, izzəɣaz daɣ-as tagdayt ta daɣ itawazmu aɣanab. Issəkras ogga ihhoken as z'iggâr awedan wa ogazan afarag en. Təzzar issəɣfar afarag-net en i magyakan wiyyad, išşokal. ³⁴ As du-tahoz tamert ta n əmiləy n aɣanab, izammazal eklan-net əs magyakan win əɣfarnen afarag-net, y a das-d-awəyan adagar-net daɣ aɣanab. ³⁵ Mişan obazan magyakan win eklan win, əgan y iyyan daɣ-san šiwwit, əgan iman ən wa hadan, ad əggaran wa n karad əs təhun har t-aba. ³⁶ Ilas məşşis n afarag izammazal sər-san eklan wiyyad ogarnen win den igət, mişan əgan-asan meddan win əɣfarnen afarag en awa daɣ əgan i win din-izammazal dat awen. ³⁷ Təzərəst n awen, as sər-san izammazal barar-net, fəlas inna daɣ man-net: "Dad zamas barar-in awa immikkan as ad t-əssəxməran!" ³⁸ Mişan as ənayan magyakan win barar-net namannan gar-essan: "Ənta əddi amakkasu n afarag. Əndawat a tu-nanɣu kərəz, ad nəkkusət afarag." ³⁹ Təzzar obazan-tu, əkkasan-tu daɣ afarag, ənɣan-tu kərəz.»

⁴⁰ Inn-asan Ƴaysa: «Awak as d-osa məşşis n afarag n aɣanab wen, ma z'agu i magyakan n aɣanab win den?» ⁴¹ Jajjayen aytedan ənnan-as: «As d-osa za, ad iɣrəd tenaxay ən maksanan win di, issəɣfar afarag-net i magyakan wiyyad a das-du-za-tawaynen tənfa daɣ tamert-net.»

⁴² Inn-asan Ƴaysa: «Awak teɣaray a wər təgem daɣ Əlkəttaban as: *"Təhunt ta din-əgaran makrasan, ənta a təqqalat təhunt ta təkbalat ehan, arat wen Əməli a d-ifal, amaran isimaklal sər-na"?*»

⁴³ «Awen daɣ a fəlas əməlaɣ-awan as Taymar ta n Məşşina a daɣ-wan tattarmas, tətəwəkfu i tamattay ta daɣ-as du-za-tawəyat tənfa. ⁴⁴ Awedan wa udan fəl təhunt ten, ad addagdag, wa fəl tuda deɣ a tu-təlkəş.»

⁴⁵ As əslan muzaran ən limaman əd Fərisaytan y əlmitalan win iga Ƴaysa den, əgran as əntanay a fəl imməgrad. ⁴⁶ Ad gammayan əmmək was tu-za-səttərməsan, mişan əksudan tamattay, fəlas təga i Ƴaysa iduf n as ənnəbi a imos.

22

Əlmital wa n təkrəst

¹ Ilas Ƴaysa ig-asan əlqissat iyyat təmosat əlmital, inn-asan: ² «Taymar ta n jənnawan, təha əlmital n əmənokəl iyyan isassagan saksas daɣ təkrəst ən barar-net. ³ Izammazal eklan-net y ad əməlan y aytedan win as ira

a d-æggəzan saksas wen, mišan ugayan s a d-asin. ⁴ Ilas əzəmmizəl n eklan-net wiyyad y ad annin y aytedan win den: "Nak sammatagaḡ iməgura-nin, əgzamaḡ izəgran-in, əd haran-in win əddəratnen, arat kul immotag əmərədda, agliwat-du amaran ad nassantu saksas." ⁵ Mišan əgmadan batu-net, wiyyad əkkan šiwəgas-nasan, wiyyad əkkan idaggan win daḡ satagan, ⁶ təzzar obazan win hadatnen inammazalan win den, əgan-asan taršəxšad, ənḡan-tan kərəz. ⁷ Iggaz alham labasan əmənokəl, issəgla sojitan-net, əḡradan tenaḡay ən maggan ən man win den, əḡradan əsəqqəd n əḡrəm-nasan ketnet.»

⁸ «Təzzar inna y eklan-net: "Imutag za win saksas əgân, mišan meddan win den, wər əhoran əd məgura win. ⁹ Daḡ adi, agliwat takkim idaggan win daḡ əmmənaynat tarrayen, taḡrim-du aytedan kul win tənayam, a d-akkin saksas." ¹⁰ Təzzar əgla eklan win den, əḡran-du aytedan kul win ənayan, gər za win olaḡnen, wala win əmosnen imaksanan, har iḡrad adag wa n saksas en adanay n aytedan. ¹¹ Iglə-du əmənokəl y ad inəy əljəməḡat ta du-təddewat den i təkrest. Inay daḡ meddan win əllanen den iyyan wər nəlsa tabdoḡ tas ihor a du-tətəwəqqən əs təkrest. ¹² Inn-as əmənokəl: "Obaz, kay ak mas du-təggazaḡ edag a wər təqqena tabdoḡ tas ihor a du-tətəwəqqən əs təkrest?" Wər du-təgmed tefert waliyyat imi n aləs wen. ¹³ Den daḡ ad inna əmənokəl i maššəḡalan-net: "Abəzat-tu, təḡrədam kerrad ən daran-net əd fassan-net, təgəram-t-in sədi daḡ šiyyay, daḡ adag wa daḡ hallin aytedan, əddâdan idədwən-nasan fəl təmagraz."» ¹⁴ Inna ḡaysa: «Aytedan aggotnen a du-tawaḡranen, mišan wər daḡ-san əggətan win tawasanafrannen.»

Arazam n amana i Qaysara

¹⁵ Dəffər awen mašawwaran Farisaytan, ad gammayan əmmək as əgan i ḡaysa taftaw, ərân a tu-səssugin batu a tu-za-tagit daḡ ḡunan. ¹⁶ Zammazalan-du arat daḡ nalkiman-nasan, d aytedan wiyyad əwarnen aganna n əmənokəl Herod y ad annin i ḡaysa: «Əššəx, nəssân as əməggi ən tidət a təmosa, amaran təsasayra əs tidət awas dana-iwar igi-net daḡ tarrayt ta n Məššina. Wər t-illa i təksuda daḡ awa təganna, fəlas wər təzləya daḡ almaḡam n aytedan. ¹⁷ Daḡ adi, nəra daḡ-ak a dana-təməla: Awak xalal arazam n amana y əmənokəl wa zəwwəran Qaysara, me wər xalal?» ¹⁸ Mišan igra ḡaysa əššur-nasan, inn-asan: «Mafel tətajjarrabam-i, əlmunafiḡan win? ¹⁹ Sakniwat-i tefelt n əzrəf tas itawarzam amana.» Təzzar təmməway-as-du tafelt. ²⁰ Inn-asan ḡaysa: «Ma ilan eḡaf d esəm

win əwarnen tefelt ta?»²¹ Ənnan-as: «In Qaysara.»
Təzzar inn-asan Үaysa: «Ənəyat za, agiwat i Qaysara
awa kawan-issəwar, tagim i Məşşina awa kawan-issəwar.»
²² Isammaklal sər-san aljawab wen, oyyan Үaysa əqlan.

Əsəstan day batu n azalaf day alaxirat

²³ Əzəl wen day a d-osan Sadusaytan, əmosnen aytedan
əganen iduf n as wər tu-təlla tanakra dəffər təmattant.
Əhozan-in Үaysa, əssəstanan-tu,²⁴ ənnan-as: «Əşşex,
ənnəbi Musa inna: "As aba awedan wər igrew barar, wədi
amadray-net a iwar ad izləf tantut ta d-oyya den, fəl ad agu
əzzurrəyya y əmidi-net wa aba den.»

²⁵ «Ənta nakkanay, əhân-anax əssa mədrayan. Izlaf wa
dasan-waşşaran ketnasan, aba-tu da wər ila barar, oyya-du
tantut-net y amadray-net.²⁶ Iga awen da fəl amadray-net
wen, igraw wa n karad, xasil a tat-zallafan itiba-tan da wər
dər-əs əlen bararan, har əğradan fəl əssa-essan.²⁷ Dəffər
as tan-aba ketnasan, aba tantut ten.²⁸ Day adi əzəl wa n
tabadday, ma imos day əssa mədrayan win den was za
təqqəl təntut ten təğurəs, dad zamas ketnasan əzlâfan-tat.»

²⁹ Inn-asan Үaysa: «Iket n alxata təttaşam-tu, fəlas
wərmad təssanam awa ənnan Əlkəttaban, wala dəx
təssanam awa dər togda tarna ən Məşşina.³⁰ Əssənat
âs əzəl wa n tabadday, wər t-illa azalaf i meddan
wala şidoden. Kalar təməddurt a z'əgin şilat ən ta
əgan angalosan day jənnawan.³¹ Day batu amaran ta
təqqalat tanakra ən nəmməttan, awak edes a kawan-wər-
iga as təğrâm awa a dawən-inna Məşşina day Əlkəttaban?
Wərgəx a inna:³² "Nak a imosan Əməli n İbrahim, Əməli
n İshəaq, Əməli ən Yaqub?" Məşşina wər imos Əməli ən
təməxsə, kalar Əməli ən win əddarnen a imos.»³³ Tamattay
ta təslat y aljababan win den, isimaklal sər-əs wəllen
əsəssəğri wa iga Үaysa den.

Alwajiban win ogarnen

³⁴ As əslan Farisaytan as Үaysa iga aljawab isifastan
Sadusaytan, əmmənayan.³⁵ Inkar iyyan day-san imosan
əmusan n əşşərixa, ira ad agu tənəgməyt i Үaysa. İssəstan
Үaysa inn-as:³⁶ «Əşşex, ma imos alwajib wa ogaran day
Əttawret?»³⁷ Inn-as Үaysa: «Ənta da alwajib wa ogaran:
"Iru Əməli-nak Məşşina s əwəl iyyanda, əd man ərdânen,
tireq-qu dəx əs tayttay-nak kul." ³⁸ Ənta da da alwajib wa
ogaran alwajiban kul, imos dəx wa azzaran.³⁹ Amaran
alwajib da wa ilkaman i wen, a dər-əs olân: "Agu y əşəqqax-
nak tara ta təğəx i man-nak." ⁴⁰ Alwajiban win əşşin a,
əntanay a day iqqan arat kul wa ihan Əlkəttaban.»

Ēlməsix əd Dawəd

⁴¹ Ēgłan Farisaytan win den əllân den da, əmminayan. İssəstan-tan Ƴaysa amaran, ⁴² inn-asan: «Ma imos iduf-nawan daƷ Ēlməsix? Ma tənnam ma imos abba-net?» Ēnnan-as: «Adi za Ag əmənokal ənnəbi Dawəd!» ⁴³ Inn-asan Ƴaysa: «DaƷ adi, manəmmək as t-iƷra ənnəbi Dawəd əs tilalt n İnfas wa n Məşşina s esəm wa n: "Ēməli"? Fəlas a inna: ⁴⁴ "Inna Ēməli y Ēməli-nin: 'iyyaw qamu daƷ əƷil-in, har əƷrədaƷ əsərəs ən zəngə-nak, agaq-qan daw daran-nak.'" ⁴⁵ Dad zamas iƷr-ay Dawəd s esəm wa n Ēməli, daƷ adi manəmmək as z'iqqəl barar-net?»

⁴⁶ Wər t-illa awedan waliyyan ilfâdan i Ƴaysa wala təfert iyyadda n aljawab y əsəstan wa iga den. Amaran a obazan Ʒur əzəl wen, ab'as t-illa awedan ihalan a das-agu əsəstan waliyyan.

23*Ƴaysa iggâz šin məssəsəƷra n Ēttawret əd Farisaytan*

¹ Den daƷ ad işşewal Ƴaysa i tamattay, əd nəttulab-net, inn-asan: ² «İmusanan n Ēttawret, əd Farisaytan, əntanay a sasaxrinen aytedan əşşəriƷa wa d-oyya ənnəbi Musa. ³ DaƷ adi mazalat aratan kul win kawan-sasaxrin, tabbardagam y awa dawan-gannin. Mişan ad wər tətəggim imazalan win taggin, fəlas awa gannin, wər idrew arat d awa tamazalan. ⁴ Ēzuk zəwwəran as izzəwat agƷay-net a sawaran aytedan, əntanay amaran wər tu-z-ədəsan əs wala idədwan-nasan. ⁵ İmazalan-nasan kul wər əmosan ar soknit. Awen daƷ a fəlas šira šin təkannaren-nasan, əgantənat ši zawwarnen wəllen, əzzəzwaran dəƷ šin taqqanan daƷ təgəltam-nasan, fəl ad ilenat anay wəllen. Šibənək ən təkadkaden-nasan dəƷ əbâlan-asnat başakşakan za-grotnen, əlânen anay wəllen. ⁶ Ērân təƷimit daƷ daggan n aytedan win tawasaxmarnen daƷ əməgura əd daggan win əlanen almaqam daƷ nan n əƷibada ən Kəl-Ēlyəhud. ⁷ Ērân a dasan-taggin aytedan assalam ən saƷmar daƷ sammanayan, ərân dəƷ a tan-Ʒarrin aytedan s esəm wa n "Ēşşex-in".»

⁸ «Mişân kawanay, ad wər tagim i man-nawan esəm wa n Ēşşex, fəlas kawanay Ēşşex iyyanda a təlam, amaran ketnawan imədrayan a təmosam. ⁹ Ad wər təƷarrim dəƷ iyyan daƷ-wan s esəm wa n abba daƷ əddənet, fəlas Abba iyyanda a təlam, a t-imosan: Abba wa ihan ijənnawan. ¹⁰ Ad wər təraddim dəƷ itawann-awan "Ēşşex", fəlas Ēşşex iyyanda a təlam, a t-imosan Ēlməsix. ¹¹ Wa daƷ-wan imosan əmuzar, wədi ad iqqəl zun aməşşaxal-nawan. ¹² I idkalan

iman-net, ad t-issæræs Məššina, i əssərasan iman-net deɣ ad t-idkəl Məššina.»

¹³ «Iket aɣazab iqqâl-awan, ya imusanan n Əttawret, əd Farisaytan win əlmunafıqan! Kawanay a əmosnen y aytedan zun təsəhərt təɣfâlat gar-essan əd Taɣmar ta n jənnawan. Fəlas kawanay iman-nawan da wər təggezam Taɣmar ta n jənnawan, təgdalam deɣ iguz-net i win t-əranen.»

¹⁴ [«Iket aɣazab iqqâl-awan, ya imusanan n Əttawret, əd Farisaytan win əlmunafıqan! Təttatim eharay ən tədoden šin as aba meddan-nasnat, amaran tətəggim imaddan zagrotnen wər nəmos ar sokni. Awen daɣ a fəlas attadib wa-nawan, ad aɣər attadiban kul tallabəst.»]

¹⁵ «Iket aɣazab iqqâl-awan, ya imusanan n Əttawret, əd Farisaytan win əlmunafıqan! Təşakalam, təssiwalam idaggan kul, fəl amaɣal əd gərwan, təgâmmayam kuddeɣ awedan iyyanda təssərdam s ad ilkəm y əsəssəɣri wa n Əttawret. Amaran as sər-əs təssərdam awedan, a tu-tagim aw Jahannama, har as aɣazab wa z'agu, a d-agu əššin nədfisan fəl wa-nawan.»

¹⁶ «Iket aɣazab iqqâl-awan, ya imuzaran əddirɣalnen! Kawanay a ganninen: As ihad awedan s Ahan wa Zəwwəran n Əlɣibada, wədi wər imos wala, mišan as ihad s urəɣ wa ihan Ehan wa Zəwwəran n Əlɣibada, wədi tahuday-net təglâ. ¹⁷ Iməskilan ən məddəɣal! Awak urəɣ a oɣaran almaqam, meɣ ak edag wa zəddigan s ənta a izzazdagan urəɣ? ¹⁸ Madəɣ tannim: "As ihad awedan əs majmar wa zəwwəran n əsəqqəd ən təkutawen, wədi tahuday-net wər təmos wala, mišan as ihad əs təkutay ta təwarat majmar, wədi tahuday-net təglâ." ¹⁹ Iməddəɣal win! Awak takutay a toɣarat almaqam, meɣ majmar wa tat-izazdagan? ²⁰ Əssənət as awedan wa ihadan əs majmar wa zəwwəran n əsəqqəd ən təkutawen, wədi awa iwaran majmar da ihâd sər-əs. ²¹ Awedan wa ihadan s adag wa zəddigan n Ahan wa Zəwwəran n Əlɣibada, wədi edag wa zəddigan as ihâd əd Wa t-ihan. ²² Amaran awedan wa ihadan əs jənnawan, wədi təxawit ta n taɣmar ən Məššina as ihâd, əd wa fall-as iqqiman.»

²³ «Iket aɣazab iqqâl-awan ya imusanan n Əttawret əd Farisaytan win əlmunafıqan! Tətâkkasam təməssədək daɣ ənniɣnaɣ, əd ɣanit d alkemun, amaran toyyam aratan win oɣarnen assahat daɣ əlqanun, a tan imosan: əššəriɣa, təhanint d əzəgzan. Aratan win di əntanay a azzarnen, iwâr-kawan a tan-tammazalam, da wər din-təglemam win hadatnen. ²⁴ Imuzaran əddirɣalnen! Təzazdaram aman y a

day-san təkkasam šizəbbawen, amaran təlâmmazam aļəm iyrâdan!»

²⁵ «Iket aļyazab iqqâl-awan ya imusanan n Ettawret əd Farisaytan! Elmunafiqan! Təzazdagam afalla n əsəlkəw d əxəzu, mišan ammas-nasan ijirgan fəlas idnay tarkəbt d arak deranan. ²⁶ Farisay iddirǵalan! Zəzdəg təzzar ammas n əsəlkəw d əxəzu, əddi ad z'izdag afalla-net ənta da.»

²⁷ «Iket aļyazab iqqâl-awan ya imusanan n Ettawret əd Farisaytan win əlmunafiqan! Tolâm əd zəkwan a fəl tiwasalsanen arat mallan, hossayan day azzahir, amaran ammas-nasan ədnayan-tu ǵasan ən nəmməttan, d əzzənəfan kul ən tajjarganen əmmidasnen. ²⁸ Emmək en day a təgam kawanay da. Day azzahir za, toǵadam, mišan iwallan-nawan, wər ədkeran ar təlmənufəqa əd talbast.»

²⁹ «Iket aļyazab iqqâl-awan ya imusanan n Ettawret əd Farisaytan win əlmunafiqan! Təkârrasam izəkwan y ənnəbitan, tədâllagam izəkwan n aytedan win oǵadnen, ³⁰ amaran təgannim: "Ənnar du-nəggəz azzaman win d-əggazan marawan-nana, wər dər-san za nənəmənnək day tanayla ta əgan azni n ənnəbitan." ³¹ Emmək en day as təsattaddam tišit-nawan ihayawan n aytedan win ənǵanen ənnəbitan. ³² Day adi səkkəsəwat awa din-əglaman marawan-nawan. ³³ Iket ən taššolen! Əzzənəf ən taššolen šin iha assam wa labasan! Manəmmək as za taddarragam y attadib an Jahannama? ³⁴ Awen day a fəl kawan-d-əssokay ənnəbitan, əd malan-ən-tayttay, əd musanan n Ettawret. Ad tagim iman ən wiyyad tattaytayam-tan fəl təgəttawen, tagim šiwwit n ələkkud i wiyyad day nan-nawan win əļyibada, təlləmam gər ǵərman tədgəzəm-tan, ³⁵ fəl a kawan-iwər alxaq kul n əzni wa təwanǵalan day tədləmt, a d-obazan ǵur Habila wa n aļǵadil, har əlimam Zakarayya wa n ag Barakəya wa tənǵam gər edag wa zəddigan əd majmar wa zəwwəran n əsəqqəd ən təkutawen day Ahan wa Zəwwəran n Əļyibada. ³⁶ Əggəyyeǵ əsilakanay-awan as aratan win əmalay əddi, kul ad agin fəl aytedan n azzaman win!»

Təkurat fəl Yerusalam

³⁷ «Xa aytedan ən Yerusalam, iket təgam iman n ənnəbitan, tənǵam deǵ əs təgur ən təhun win sər-wan d-izammazal Məššina! Awak har mənəket taklaten, gammaya d a kawan-d-əššidəwa s əmmək as du-təšadaw təkəjit ikərətan-net daw əfrutan-net, mišan tugayam s awen! ³⁸ Ənəyat za, ehan-nawan ad itəwəyyu issūf. ³⁹ Fəlas əsilakanay-awan as wər di-za-tələsam anay a obazan ǵur

əmərədda har əzəl wad za tannim: "Wa d-osan s esəm n Əməli, igrâw arraxmat!"»

24

Əsəssəyri wa n səmmos: Ahluk ən Yerusalam d əyru d n əddənət

Əsənti

¹ As iyrad Ƴaysa batuten šin den, igmad Ehan wa Zəwwəran n Əlyibada, igla. Əhozan-t-in nəttulab-net y a t-in-sassagrin təməkrust n Ahan wa Zəwwəran n Əlyibada wen. ² Mišan inn-asan Ƴaysa: «Təhannayam əkərrus wa? Əggəyyeş əsilakanax-awan as awa təhannayam da, ketnet wər daş-as du-z-aqqam təhunt təwârat təmidit-net, ketnet ad itəwəjbərrəjjət.» ³ Dəffər awen igla, iqqim fəl ədşax wa n Eşkan ən Zaytun. Əhozan-t-in nəttulab-net şas-nasan, ənnan-as: «Əməl-anax əmmay ad z'agu arat wədi, təmələş-anax alşalamat ta za tassaknit assa-nak, d əyru d n əddənət.»

Alşalamaten n əyru d n əddənət

⁴ Inn-asan Ƴaysa: «Ənkədat. A kawan-wər-issəxrək awedan waliyyan. ⁵ Fəlas aytedan aggotnen a du-z-asinen əttâfan esəm-in, akkiyyan daş-san igannu imos Əlməsix. Amaran ad əssəxrəkan s awen aytedan aggotnen. ⁶ Ad taslim i tərnuq ən məgiran, əd salan ən məgiran. Mišan ənkədat y a kawan-issərməş awen, fəlas aratan adi as kundaba əgan. Mišan wərgəş əntanay a mosnen təzərəst n əddənət. ⁷ Ad əknəsnat addawlaten gar-essanat, əknəsnat taymaren gar-essanat. Iməl-tu laz labâsan, əd nəgəynəgəyan n amaşal daş daggan aggotnen. ⁸ Mišan aratan win kul, wər əmosan ar ənətti ən təlawayt təhât əlmital ən ta du-tətizarat əs təntut tətəggazat amzur.

⁹ Əddi ad za tətəwəggim daş təssust labasat, ad tətəwanyim, tətəwagzaram daş təmattiwen n əddənət kul, fəlas kawan-iwar esəm-in. ¹⁰ Arat wen a d-awəy s aytedan aggotnen a tan-igməd əzəgzan-nasan, ad tinəməkəddilan, nəməgzəran. ¹¹ Ad t-əməlan ənnəbitan ən bahu aggotnen, a z'əssəxrəknen aytedan aggotnen. ¹² Ad tətittəy talbast har as taşşam n aytedan a daş-san təfnəz tara wəllen. ¹³ Mišan wa daş-wan izmaran har təzərəst, wədi ad işləs. ¹⁴ Isalan n Əlinjil, imosan isalan ən Taymar ta n Məşşina win da, ad təwəməlan daş əddənət ketnet, fəl ad aslinat təmattiwen kul n əddənət təgəyya ta. Əddi amaran a du-za-tawəd təzərəst.»

¹⁵ Igla Ƴaysa işşewal inn-asan: «As tənayam "taxxaramt ta səksədat" ta imal ənnəbi Danəyel, təha edag wa

zæddigan, – wædi wa iyarrin, agret! – ¹⁶ Eddi aytedan win akal ən Yahudæyya, addaggaganet s ædɣaɣan; ¹⁷ Awedan wa iqqiman daɣ adag wa n afalla n ahan-net, a du-wær-azzabbat y a din-idkæl ar-es ihân ehan-net. ¹⁸ Awedan wa ihan tawagost-net, a du-wær-iqqəl aɣaywan-net igmây isælsa-net! ¹⁹ Iket alɣazab ad t-aginat tædoden šin əganen šidusen æd šin sankasnen daɣ adan win den! ²⁰ Egməyat daɣ Məššina a fəl du-wær-imazayyat ædæggæg-nawan æd tamert n asamed irtayan d akonak, madex əzəl wa n təsanfawt. ²¹ Fəlas adan win den, a tu-təməl təssust labasat as, a du-tənta æddənet wær tətawanay ši wær toger; amaran wær ilkem dex ad tətowanay tulat-net dəffər awen. ²² Kundaba as adan win den ikf-en Emləli tæzəræst, wædi wær t-illa i daɣ-san du-z-irəgan. Kalar ad tæwəzzəgzələn fəl æddəlil n aytedan win tawasanafrannen. ²³ Eddi amaran, as dawan-inna awedan: "Eñəyat! Elməsix illa da", madex: "Illa den", a das-wær-təzzəgzənam! ²⁴ Fəlas ad t-əmələn əlməsixan ən bahu, əməlan-tu dex ənnəbitan ən bahu. Ad taggin alɣalamaten simaklalnən, æd təlməxjujaten əmmittaynən, har as ənnar əfragen awen, əssəxrəkan aytedan harkid win isannafran Məššina. ²⁵ Daɣ adi ənkədat æd man-nawan! Aratan win, əgeɣ-awan-tan daw aɣaf!

²⁶ Amaran as dawan-itawanna: "Eñəyat, Elməsix den iha teneray", a tu-wær-takkim. Madex itawann-awan: "Eñəyat, iha daɣ ahan edag wa ogaran ilxi", kaššeday, ad wær təzzəgzənam wala daɣ batuten šin di. ²⁷ Ešsənat as, assanin nak Ag Aggadəm ola d essam a du-z-assantin əbələzləz da d-inta dənnəg, har da d-iraz ataram. ²⁸ Edag təggaz təmaxsəyt, a daɣ-as iddawan jadaran.»

Təwaxlay n Ag Aggadəm

²⁹ Iгла ɣaysa iššewal, inn-asan: «Tarmâd dəffər adan ən təssust ta labasat en, ad alsinat šiyyay təfuk, tallit dex igməd-tat ənnur-net, ərtekan-du etran, nəgəynəgəynat təxəllak šin əlanen tarna daɣ jənnawan. ³⁰ Eddi a du-za-tənəfiləl alɣalamat-in nak Ag Aggadəm daɣ jənnawan. Šimattiwen kul n əddənet ad səkkirəynat, təzzar ənəynat-i nak Ag Aggadəm as du-z-asa əheɣ šignawen, əknex təla ən tarna æd tanaya. ³¹ Təzzar insəx in asak, zəmmizəla nak Ag Aggadəm angalosan-in, əššidəwan-du aytedan win əsannafrana daɣ təxəmmar an əkkozat n əddənet.»

Təssunt ta n ašək ən fig

³² Inn-asan: «Abəzat alɣaydat s əlmital wa n ašək ən fig. Igda ad hussəyan lədlad-net, iggaz-du šin tanazra, ad təssənam as tamert ta n akasa təhöz. ³³ Zund əmmək en

dağ âs as tənayam aratan kul win dawan-əmalax əddi, təssənam as ayrud n əddənet ihoz, wər illa gar-ewwan dər-əs arat. ³⁴ Əggəyyeş əsilakanax-awan as tamattay ta da n azzaman win nəha da, ad tənəy ənətti n aratan kul win dawan-əməla da. ³⁵ İjənnawan d amađal ilkam ad ib'as t-əllan, mişan batuten-in əllanat-tu har faw.»

Əzəl wala alwaq wa n tanakra n alaxirat, wər tawassanan

³⁶ İgla Ƴaysa işşewal inn-asan: «Əzəl amaran wala alwaq wa dağ z'agu awa dawan-əməla da, wər t-illa i dağ-san issânan, gər za angalosan a əhanen ijənnawan, wala Barar iman-net. Wər t-illa i dağ-san issânan ar Abba Ƴas. ³⁷ Awa igan dağ azzaman n ənnəbi Nux, a z'agin dağ adan win dağ du-z-asa nak Ag Aggadəm. ³⁸ Təssânam as adan dat alwabil, aytedan tâtin, sassin, zâllafan, zâzlafan har əzəl wa dağ iggaz Nux aylal n aman. ³⁹ Wər əgen aşşak dağ arat waliyyan, har d-ewad alwabil, iyrad-tan ebət ketnasan. Zun awen dağ a z'agin Ƴur assa-nin nak Ag Aggadəm. ⁴⁰ Əddi əşşin magyakan nimaşƳalnen dağ tawagost iyyadda, ad ammadkal iyyan, itəwəyyad-du wa hadan. ⁴¹ Sanatat tədoden taddanen dağ adag iyyanda, ad tammadkal iyyat, tətəwəyyad-du ta hadat.»

Əlmital wa n məşşis n aƳaywan d abaydag

⁴² Inn-asan: «Dağ adi ənəkədat, fəlas wər təssenam əzəl wa dağ du-z-asu Əməli-nawan. ⁴³ Təssânam wəllən âs ənnar issân məşşis n aƳaywan amazay wa dağ du-z-idəl abaydag, ahad wədi ad akəy isəmmutəg y a das-igdəl terazay n ahan-net. ⁴⁴ Awen dağ a fəlas kawanay da, səmmutəgat, fəlas nak Ag Aggadəm, a d-asa dağ assaƳat ta wər tordem.»

Əlmital wa n əkli wa olaƳan əd wa wər noləy

⁴⁵ İgla Ƴaysa işşewal inn-asan: «Dağ adi əkli ixdâlan, ilân əgərri, ənta a isannafran məşşis izzuzər-tu y eklan-net win hadatnen y a tan-ihakku imensewan dağ alwaq was ihor. ⁴⁶ İbbilal əkli wen, as d-iqqal məşşis, ogaz-t-id iha əşşəƳəl wa dağ q-id-oyya den. ⁴⁷ Əggəyyeş əsilakanax-awan as əkli wen, ad t-izzuzər məşşis i təla-net kul. ⁴⁸ Mişan ənnar imos ark əkli, inna dağ man-net: "Məşşi illolat-in," ⁴⁹ təzzar ad iggat imidawan-net, idarraw d aytedan win tamaswadnen, itinəməşəw dər-san esmad, ⁵⁰ wədi ilkâm a t-id-iydər məşşis dağ əzəl d amazay wər orda. ⁵¹ Təzzar ad t-iggat məşşis har t-iksən, ag-ay dad tawaggin əlmunafiqan. Den da ad əllan aytedan win hallinen əddadan idədwan-nasan fəl təmagraz.»

25

Elmital wa n marawat tēmawaden wēr nēzday meddan

¹ Iгла Ҷайса ишсевал и нәттүләб-нет, инн-асан: «Эзәл вәди асса ән Тәҗмар та н јәннәван, ад иггәз әлмита ән марават тәмәвәден вәр нәзday меддан, әдкәлнән ибелән-насна әзәл ән тәкрәст, әссәлкәднат y amazlay. ² Сәммосат даҗаснат за вәр әленат тәйттай, сәммосат амарән әләнат-тат. ³ Шин вәр нәла тәйттай за, ас әдкәлнат ибелән-насна, вәр еwayнат widи wa н әсәргәи-насан. ⁴ Шин әланән тәйттай амарән, ас әдкәлнат ибелән-насна, еwayнат шитәкән иһа widи wa н әсәргәи-насан. ⁵ Илләт-ин amazlay, һар ас обаз-танат етәс кетнасна. ⁶ Ас ига адәвәннәй, тәга-ду тәҗәрит, итавәнна: "Амазлай әдди, әрдәҗат-ду сәлкәдат-ас!" ⁷ Тәззар әнкәрат-ду тәмәвәден шин марават ән кетнасна, сәмматәгнат ибелән-насна. ⁸ Әннәнат шин вәр нәла тәйттай и шин һадатнән: "Ибелән-нана әггәзан шин тәмәттәнт, әкфимат-ана-ду даҗ widи." ⁹ Әннәнат-аснат шин әланән тәйттай: "Кәла, widи-нана вәр данәҗ-әвәд дәр-әкмәт. Аглимәт әккимәт имәссәтаган ән widи тәззәнзимәт-ду widи и белән-накмәт." ¹⁰ Ас әгләнат y а д-әззәнзинәт widи, оса-ду әмазлай, әггәзнәт fall-ас сәммосат тәмәвәден шин сәмматәгнән едаг wa даҗ итаггу сәксәс, тәтавахар-ду тәсәһәрт н аһән. ¹¹ Дәффәр әвән, евәднат-ду тәмәвәден шин һадатнән, ад сәҗәратнат y amazlay, гәннинәт-ас: "Мәндәм! Мәндәм! Аләм-ана!" ¹² Тәззар инн-аснат amazlay: "Әггәйгәй әсиләкәнәҗ ас вәр камәт-әзdayәҗ."» ¹³ Iгла Ҷайса ишсевал инн-асан: «Даҗ әди әнкәдат, фәлас вәрмәд тәссәнәм әзәл, за вәла әссаҗат та ду-з-аса.»

Elmital wa n tēsәgras n urәҗ

¹⁴ «Бәту та тәqqәлат Тәҗмар та н јәннәван, тәһә әлмита н әләс ишәкәлән. Иҗра-ду еклән-нет, а тан-исәҗләф әррәзәҗән-нет. ¹⁵ Икфа ийән даҗ-сан сәммосат тәсәгрәс ән динәрән н urәҗ, икфа wa һадән санатат, икфа ийәддә y әкли wa н карәд, а даҗ евал әвән әс да ду-тәqqәл фәррегат-насан, амарән ишәкәл. ¹⁶ Тәрмәд ас игла wa иссәҗләф сәммосат тәсәгрәс, ишсәшҗәл urәҗ вән, играв-ду fall-ас сәммосат тәсәгрәс шийәд ән динәрән. ¹⁷ Ва иссәҗләф санатат дәҗ игла, ишҗәл, играв-ду fall-аснат санатат шийәд. ¹⁸ Ва вәр нәгрәв әр тәсәгрәст ийәддә, игла ига әну даҗ әмәдәл инбал даҗ-ас тәсәгрәст та иҗләф дән.

¹⁹ Ас тәга тәрүт дәффәр әвән, оса-ду мәшсисән, ад исәҗрад әррәзәҗән вин тан-иссәҗләф. ²⁰ Ибдәд-ду wa иссәҗләф сәммосат тәсәгрәс, еway-ду сәммосат шин fall-аснат д ишсәтә. Инн-ас: "Мәшси, сәммосат тәсәгрәс а ди-тәссәҗләфа,

amaran əgrawa-du fall-asnat səmmosat şiiyyad. Əntanatay da." ²¹ Inn-as məşşis: "Alafəyet! Illikan as akli olâxan a təmosa, təmosax dəx awedan ən təfləst. Təssiknax adi dəx arat wər nəggət. Dəffər awa a kay-əssəxləfəx a aggen. Iyyaw taga təfalawist ta əgeç nak an məşşik!"»

²² «Wa issəxlaf sanatat təsəgras dəx ibdad-du, inna: "Məşşi, sanatat təsəgras a di-təssəxlafa, amaran əgrawa-du fall-asnat sanatat şiiyyad. Əntanatay da." ²³ Inn-as məşşis: "Alafəyet! Illikan as akli olâxan a təmosa, təmosax dəx awedan ən təfləst. Təssiknax adi dəx arat wər nəggət. Dəffər awa a kay-əssəxləfəx a aggen. Iyyaw taga təfalawist ta əgeç nak an məşşik!"»

²⁴ «Dəffər awen amaran, ibdad-du wa issəxlaf təsəgrəst iyyadda, inna: "Məşşi, əssânax as aləs labasan a təmosa, tətälaya-du xarat dəx adag a dəx wər tənbelə, tətälaya-du dəx tənfa dəx adag a dəx wər tənbesax amasa waliyyan. ²⁵ Adi da fəl di-təggaz tasa-nak, əgleç ənbala təsəgrəst ta di-təssəxlafa. Əmərədda ənta da." ²⁶ Inn-as məşşis: "Kay arak əkli a təmosa, təmosa dəx anaffaraşşay! Dad zamas təssânax as ətälaya-du xarat dəx adag a dəx wər ənbela, ətalaya-du dəx tənfa dəx adag a dəx wər ənbesax amasa waliyyan, ²⁷ wədi, ənnâr di təssinsax azrəf-in dəx bank, as du-z-əqqələx əgrâwa-du fall-as tətəyt, ətkəlaq-q-idu." ²⁸ Inna məşşis: "Dəx adi abəzat-du dəx-as təsəgrəst tədi, takfim-tat i wa ilan marawat. ²⁹ Fəlas awedan kul wa ilan, wədi a das-itəwəşitu awa ila, annaflay, amaran wa wər nəla, arat n arat wa ila da, a dəx-as attarmas. ³⁰ Akli amaran wa wər nənfa wala, əgərat-t-in dəffər ahan dəx şiiyyay. Den da ad əllan aytedan win hallinen əddadan idədwən-nasan fəl təmagraz."»

Əşşərixa wa n əzəl wa n tabadday

³¹ Iqla Ƴaysa işşewal inn-asan: «As d-əqqala nak Ag Aggadəm əhex tanaya-nin, əddewa-du d angalosan kul, ad əqqama fəl təxawit-in ta n tanaya. ³² Şimattiwen n əddənət kul a d-idawnat, əbdədnat dat-i. A tanat-zamazaya s əmmək as isakkat amadan ayfad-net dəx wəlli, ³³ agax ayfad dəx əxil-in, aga wəlli dəx zalgat-in. ³⁴ Den dəx ad z'anna nak an əmənokal i win əhanen axil-in: "Ayewat kawanay win as iga Abba-nin arraxmat, ad təgrəwam təxmar ta dawan-tətawasamatagat harwa xur ənətti n əddənət. ³⁵ Fəlas iggâz-i gələk, təşşətşam-i; iggâz-i fad, təşşəşwam-i; əqqalax ənaftax, təsammagarem-i. ³⁶ Əzlama, təssəlsam-i; ərina, təssanam dəx-i; əggazax kasaw, təssəslamam-i-in." ³⁷ Den dəx a di-z-annin aytedan win oxadnen: "Əməli, əmmay a kay-nənay ih-ik gələk

nəššətš-ik, wala ih-ik fad, nəššəšəw-ik? ³⁸ Emmay kay-nənay təmosax ənaftax nəsammarat-kay, wala təzlāma nəssəls-ik? ³⁹ Emmay kay-nənay tərīna, wala taheḡ kasaw, əngəm nəssən daḡ-ak, wala nəssəsləm-kay-in?" ⁴⁰ Den daḡ a dasan-z-anna nak an əmənokal: "Əggəyyeḡ əsilakanax-awan as dad zamas təgām aratan win di y iyyanda daḡ mədrayan-in win əknanen təmmədrəyt di, wədi nak as tan-təgam."»

⁴¹ «Dəffər awen amaran annax i win əhanen zalgat-in: "Ugagat-i imawaran ən tulyant. Agliwat əggəzat Jahannama, tətīwasamatagat y Iblis, d angalosan win das-əlkamnen. ⁴² Fəlas iggāz-i gələk, mišan wər di-təššətšam; iggāz-i fad, mišan wər di-təššəšwam. ⁴³ Əqqālay ənaftax, mišan wər di-təsammaragem; əzlama, mišan wər di-təssəlsam. Ərina, əggaza kasaw, mišan wər daḡ-i təssenam za wər di-in-təssəslamam." ⁴⁴ Təzzar annin-i: "Əməli, əmmay a kay-nənay ih-ik gələk, wala ih-ik fad, wala təmosax ənaftax, wala təzlama, wala tərīna, wala tahe kasaw, nəqqim wər daḡ-ak nəssen?" ⁴⁵ Əddi a dasan-z-anna: "Əggəyyeḡ əsilakanax-awan as, dad zamas wər təgem aratan win di y iyyanda daḡ win əknanen təmmədrəyt di, wədi nak iman-in as tu-wər-təgem." ⁴⁶ Den da ad z'akkin aytedan win edag n attadib ixlālan, win oḡadnen amaran əgrəwan təməddurt ta təḡlalət.»

26

Emel wa n əkkoz iga ḡaysa i təmattant-net d igi wa fall-as z'agin aytedan eḡaf

¹ As iḡrad ḡaysa alfaydaten šin kul, inna i nəttulab-net: ² «Təssānam as amud wa n Akkay, ab-as-in əššin adan, amaran əddi daḡ ad za təwəsətərməsa nak Ag Aggadəm, y ad təwətəytəya fəl təgəttawt.» ³ As itaggu awen imuzaran ən limaman, əd muzaran ən Kəl-Əlyəhud əddewan daḡ aḡarḡar n aḡaywan ən Kayif s ənta a imosan Əlimam wa Zəwwəran, ⁴ ənamardan fəl təmərkəst tas z'abəzan ḡaysa, agin iman-net. ⁵ Dər iga awen da ya gannin: Ad wər nagu adi daḡ adan n əmud, fəl ad wər ijənnəjərwəy awen tamattay.

Iba ən ḡaysa əd tanakra-net daḡ təmattant

Ətərməs ən ḡaysa d ətəwətəytay-net d iba-net

Ətəwənyal n alwardi fəl ḡaysa daḡ Betanəy

⁶ Iha ḡaysa təḡrəmt ən Betanəy iqqim daḡ ahan ən Simḡon was kala a t-igraw kətru, ⁷ as du-tosa təntut iyyat

təhoz-t-in daɣ amazay a daɣ isiɣamar itattu. Tantut ten teway butalay igân daɣ təhunt təknât ši Hussay, iha alwardi iyyan ilân almaqam wəllen. Təzzar ad tənəqqal alwardi wen fəl aɣaf ən Ƴaysa, imos awen alɣalamat ən saɣmar. ⁸ As ənayan nəttulab arat wen, əššakan-tu wəllen, ənnan: «Ma infa əhluk n alwardi a? ⁹ Alwardi wa ilan almaqam a, ənnâr inazzan a din-itawagga azrəf aggen, təwəkfin nazzan-net i tələqqawen.» ¹⁰ Igr-in Ƴaysa awen, inn-asan: «Mafəl təɣaššadam iman i təntut ta? Əmazal olâɣan a di-təga da; ¹¹ fəlas šiləqqawen faw da əllânat ɣur-wan, nak amaran wərge faw əlley ɣur-wan. ¹² Alwardi wa, tanayla a tu-təga fəl təɣəssa-nin fəl a di-təsəmmutəg y əzəkka-nin. ¹³ Əggəyyey əsilakanax-awan as edag a daɣ ittəmal Əlinjil daɣ əddənet ketnet, a daɣ-as attamal awa təga təntut a, tətəwəkta-du.»

Iguz ən Yahuza šimərkas šin as z'attarmas Ƴaysa

¹⁴ Əzəl wen da ad inkar iyyan daɣ nəttulab win maraw d əššin igân esəm Yahuza was itawannu Isxarəyuti, ikka imuzaran ən limaman, ¹⁵ inn-asan: «Ma di-za-takfim a dawan-t-aga daɣ fassan nak iman-in?» Təzzar inamarda dər-san, əkfan-tu karadat təmərwen ən tafelt n əzrəf. ¹⁶ A obazan ɣur amazay wen da, ad iggaz šin agamay ən tamazayyat ta daɣ z'agu Ƴaysa daɣ fassan.

Imutag n amensay n əmud wa n Akkay

¹⁷ As d-ewad əzəl wa azzaran n əmud wa daɣ tamatšinat təgəlwen šin wər iha xamira, əhozan-in nəttulab Ƴaysa, ənnan-as: «Mənid tareɣ a dak-nəsəmmutəg imensewan n əmud wa n Akkay?» ¹⁸ Inn-asan: «Əggəzat aɣrəm, takkim awedan iyyan illan den, tannim-as: "Inn-ak Əššex, alwaq ən təmattant-in ihôz. Kay a ɣur za nammansaw daɣ əmud wa n Akkay nak əd nəttulab-in."» ¹⁹ Əmmozalan nəttulab awas tan-omar Ƴaysa, sammatagan imensewan win Akkay. ²⁰ As tuda təfuk, inaxama Ƴaysa əd nəttulab-net an maraw d əššin. ²¹ Tattin den daɣ as inna: «Əggəyyey əsilakanax-awan as, iyyan daɣ-wan a di-z-agin daɣ fassan.» ²² Batu ten, teway-du sər-san as əɣšadan man-nasan wəllen, a das-igannu akkiyyan daɣ-san: «Əməli, əngəm wərgeɣ nak a kay-z-agin daɣ fassan?» ²³ Itajawwab-asan, igann-asan: «Wa di-z-agin daɣ fassan, ədrawa dər-əs da da daɣ əɣəzu iyyanda. ²⁴ Tidət as nak Ag Aggadəm a di-iba s əmmək wa əmalan Əlkəttaban daɣ batu-nin. Mišan ya, iket alɣazab ad t-agu wa di-igan nak Ag Aggadəm daɣ fassan! Awedan wədi, a das-afu fadda a du-wər-iggez əddənet.» ²⁵ Təzzar iššewal Yahuza s ənta a tu-z-agin daɣ fassan, inn-as: «Əngəm

wərgex nak as tēgannaḡ əddi, Ʒššex?» Inn-as Ʒaysa: «Kay iman-nak as tənneḡ adi.»

Tadrəwt ta təlkatat iga Ʒaysa əd nəttulab-net

²⁶ Amazay wen daḡ a daḡ tattin den, a daḡ d-idkal Ʒaysa tagəlla, iga igodan i Məššina, irza tagəlla ten, izun-tat i nəttulab-net, inn-asan: «Atšiwat da. Taḡəssa-nin adi.» ²⁷ Dəffər awen, idkal-du təkabart, iga igodan i Məššina, ikf-asan-tat, inn-asan: «Ašwat daḡ-as ketnawan, ²⁸ fəlas azni-nin adi, isitaddan azni wa n arkawal ən tassaḡ gər Məššina əd tamattay-net. Azni wa ad inḡəl fəl ad əgrəwan aytedan aggotnen təsureft ən bakkadan-nasan. ²⁹ Ʒsilakanax-awan as a obazan ḡur əmərədda wər z'ələsa tessay n esmad n alḡanab wa, iket wər d-ewed əzəl wa daḡ z'ašwa wa aynayan nak dər-wan daḡ Taḡmar ta n Abba-nin.» ³⁰ Təzzar əssəggadan daḡ təmmalen a d-əgmadnen Azzabur, as tanat-əḡradan, əkkan adḡax wa n Eškan ən Zaytun.

Emel ən Ʒaysa ətəwəyya-net d ətəwənkəkar-net

³¹ Ʒhān tarrayt den da as dasan-inna Ʒaysa: «Ahad ada, ketnawan as dawan-z-əqqələḡ əssəbab n ad iwəliwəl əzəḡzan-nawan, fəlas ənnan Ʒlkəttaban: "Ad əwətaḡ amadan, iba-tu, təzzar wəziwəznat ayfad-net." ³² Mišan dəffər ətəwəsənkəkar-in daḡ təmattant, a dawan-in-izarax s akal wa n Galilaya, əqqələḡ-awan daḡ-as.» ³³ Iššewal Butros, inn-as: «Kud iwəlawəl əzəḡzan-nasan ketnasan daḡ batu-nak, da wa-nin wər ilkem ad iwəlawəl.» ³⁴ Inn-as Ʒaysa: «Əḡḡəyyəḡ silakanax-ak as ahad ada, as z'aḡru əkəji aḡora, təḡḡādaḡ-i har karadat təklaten.» ³⁵ Inn-as Butros: «Kud iqqal as ətəwəḡa kərəz a za nagu nak dər-ək, da wər kay-z-əḡḡəda.» Ənnan nəttulab ketnasan awen da.

Təwatray ən Ʒaysa daḡ Gatsemanay

³⁶ Ewad dər-san Ʒaysa afarag n eškan ən zaytun as itawannu Gatsemanay, inn-asan: «Qamiwat əddi da, ad akkax edag en, ad aga šiwatriwen.» ³⁷ Izzənkəz fall-asan Ʒaysa, iddew əd Butros, d əššin meddan ən maddanəs ən Zabadaḡ, təzzar əssəntan man-net aḡšud, iššəwaš. ³⁸ Den daḡ a dasan-inna: «Awa əgan man-in daḡ aḡšud, əbukax a di-aba. Ad wər təfəlam da, ad nakəy nak dər-wan.» ³⁹ Təzzar iga fall-asan arat n əzənkəz, issəjad, ittər, inna: «Abba-nin, kud immikkan adi təssəḡəḡax-i təkabart ta n alḡazab di! Dər iga awen da ya, wərgex awa areḡ nak a itaggin, kalar awa tareḡ kay a z'agin.» ⁴⁰ Dəffər awen iqqal-du Ʒaysa inəttulab-net win karad en, os-en-du ənsān. Inna i Butros: «Daḡ adi indar-awan ad tagim alwaḡ iyyanda tokāyam nak dər-wan! ⁴¹ Akəyat, tansəyam Məššina a

kawan-oggazan day jarrabatan n Iblis. Tidət as ənnəyat n aggadəm təsidaran igi n awa olayan, mišan igdal-as rəkkəm ən təxəssa-net awen.» ⁴² İlas əzənkəz fall-asan, ad itaggu šiwatriwen, inna: «Ya Abba-nin, kud wər t-illa əmmək as di-təxlay təkabart ta n alyazab di, kud ilzâm-i a tat-aşwa, wədi tagiwet tara-nak!» ⁴³ İlas iqqal-in inəttulab-net win karad, ogaz-tan-in əqqâlan etəs, fəlas awa dasan-iga etəs day iguz ab-as əfragan arra ən şittawen-nasan. ⁴⁴ İlas ifal-tan, ikka den, iga təwatray-net ta n karadat, a day inna arat wa inna dat awen. ⁴⁵ Dəffər awen iqqal-du inəttulab-net, inn-asan: «Kawanay harwa da tənsâm, təsanfim! Ənəyat! Alwaq ihoz-du wa day za təwəgga day fassan ən nasbakkadan nak Ag Aggadəm. ⁴⁶ Ənkərat-in əndawat! Ənəyat! Wa di-z-agin day fassan, ewad-du.»

Ətərməs ən Yaysa

⁴⁷ İşşəwal harwa da, as d-ewad Yahuza, imosan iyyan day nəttulab-net win maraw d əşşin, iddew əd təmmattay tagget a d-əssiglan muzaran ən limaman əd muzaran ən Kəl-Əlyəhud. Tamattay ten tewây şikabiwen əd təburəgen. ⁴⁸ Wa tu-z-agin day fassan, imâl-asan alyalamat tas z'itəwəssən, inn-asan: «Wa zalamme day meddan en, əssənət as ənta, tabəzam-tu.» ⁴⁹ Osa-du Yahuza ɣas, ihoz-in Yaysa, inn-as: «Ma təxlakax Əşşex?» Təzzar izalammat-tu. ⁵⁰ Inn-as Yaysa: «Əmidi-nin, arat wa kay d-ewayan, ag-ay.» Təzzar ewadan-du, obazan Yaysa. ⁵¹ Amazay wen da a day d-ilbay iyyan day nəttulab ən Yaysa takobanet, iwat sər-əs akli n Əlimam wa Zəwwəran, ifras-du təməzzuk-net. ⁵² Təzzar inn-as Yaysa: «Suxəl takobanəktətərut, fəlas aytedan kul win şaqqalnen əs takoba, takoba as z'ammatin. ⁵³ Wər tordey as əfrâgax ad əgməya tilalt day abba-nin assagl-i-du əmərədda a ogaran maraw gənan n angalosan d əşşin? ⁵⁴ Mišan as iga adi, mas z'andu awa ənnan Əlkəttaban, a əmalnen as awa kul ilzâm ad andu s əmmək wa da?» ⁵⁵ Təzzar inna Yaysa i tamattay: «Mafel tosam-i-du tewâyam şikabiwen, əd təburəgen y a di-tabəzam, zun as təgmâyam əjajəb iyyan n abaydag? Nak wərgəx əzəl kul niɣama dər-wan day Ahan wa Zəwwəran n Əlyibada, sasaxra day-as, amaran wər di-tobezam. ⁵⁶ Mišan əssənət as awa igan da ketnet iga fəl ad andu awa ənnan Əlkəttaban.» Den day a t-əfalan nəttulab-net ketnasan, əddəggagan.

Təbadday ən Yaysa dat Asəggawar wa Zəwwəran

⁵⁷ Aytedan win obaznen Yaysa, ewayan-tu əs Kayif s ənta a imosan Əlimam wa Zəwwəran. Ənta a ɣur əmmənyan

musanan n Ettawret, əd muzaran ən Kəl-Əlyəhud. ⁵⁸ Iga Butros i Ҳaysa ləkkum zagren, har ewad aҗalla n aҗaywan n Əlimam wa Zəwwəran, iggaz-tu, inaxama əd maşşaxalan, iswad y ad inəy awa z'agin. ⁵⁹ Ənkaran muzaran ən limaman, d Asaggawar wa Zəwwəran ketnet, ad gammayan awedan iqqalan təgəyya ən bahu fəl Ҳaysa, fəl ad əgrəwan tarrayt n igi ən man-net. ⁶⁰ Mişan şigəyyawen aggotnen ən bahu şin fall-as taggin da, ab-asan-du daҗ-asnat əddəlil issohen a fəl itawanya. Xasil osanat-du təgəyyawen şiyyad sanatat, ⁶¹ ənnanat: «Awedan wa a inna: "Əfrəgəy əjəbbərəjji n Ahan wa Zəwwəran n Əlyibada ən Məşşina, ələsaq-qu akarəs daҗ karad adan."» ⁶² Təzzar ibdad Əlimam wa Zəwwəran, inna i Ҳaysa: «Kay wər təganna wala daҗ təxəttas şin dak-tawagginen da?» ⁶³ Mişan igla Ҳaysa iffista. Ilas Əlimam wa Zəwwəran inn-as: «Əgmāya daҗ-ak dat Məşşina di Iddaran, a danax-təməla kud kay a imosan Əlməsix, Barar ən Məşşina wala.» ⁶⁴ Inn-as Ҳaysa: «Awalla kay iman-nak a innan adi. Amaran əmələx-awan as, a obazan җur əmərədda, a di-tənəyam nak Ag Aggadəm, əqqima daҗ əxil n Əməli ən Tarna, tənəyam-i deҗ əzaya-du, əwāra şigaraken a n jənnawan.» ⁶⁵ Təzzar izazzarrat Əlimam wa Zəwwəran takatkat-net fəl awa əgan man-net daҗ aҗşud, inna: «Aləs wa amadraw a iga i Məşşina. Awak ma nəkka i təgəyyawen şiyyad? Wər təsəllim y əmadraw wa iga da? ⁶⁶ Ma tənnam?» Ənnan-as ketnasan: «Aləs wa, əşşərixa-net təmattant.» ⁶⁷ Təzzar ad sutufan fəl udəm-net, əggātan-tu, taqqasan-as, ⁶⁸ gannin-as: «Əlməsix, dad zamas kay ənnəbi, əməl-ana wa kay-iggatan!»

Şigget ən Butros Ҳaysa

⁶⁹ As itaggu awen, Butros iqqim dat ahan, daҗ aҗalla n aҗaywan wen. Təhoz-t-in təmaşşaxalt iyyat n aҗaywan en da, tənn-as: «Kay da, tətidadax əd Ҳaysa wa n akal ən Galilaya.» ⁷⁰ Mişan iggad Butros awen dat aytedan kul, inna: «Wər əssenax almayna ən batu-nam.» ⁷¹ Təzzar idag Butros sa sər əmi n aҗaywan, tənay-tu təmaşşaxalt iyyat, tənna y aytedan win əllanen den: «Aləs wen, itidaw əd Ҳaysa wa n aҗrəm ən Nazaret.» ⁷² Ilas iggad-tu ihad inna: «Wər əzdayax aləs wen.» ⁷³ As iga arət n amazay dəffər awen, əhazan-du meddan wiyyad əbdādnen den, ənnan i Butros: «İllikan as kay da iyyan daҗ aytedan win daҗ den a təmosa, fəlas awal-nak da immûn.» ⁷⁴ Təzzar ad ihad Butros igannu: «Məşşina ya təlxānax-i kud bahu a əgeҗ as wər əzdayax aləs wen.» Amazay wen daҗ ad iҗra əkəji aҗora. ⁷⁵ Ikta-du Butros tənna ta das-iga Ҳaysa: «Dat

tayaray n əkəji aƣora, a di-tunkara har karadat taklaten.» Təzzar igmad sədi, ad ihallu fəl awa iga daƣ təməgraz.

27

İsuki wa iga Asaggawar wa Zəwwəran Ƴaysa Bilatəs

¹ As affaw aƣōra, immənay asaggawar ən muzaran ən limaman, əd muzaran ən Kəl-Əlyəhud ketnasan, ad taggin šinaden daƣ batu ən Ƴaysa y a das-tətəwəxkəm təmattant.

² Əkradan-tu, ewayan-tu s ənaxkim Bilatəs.

Iba ən Yahuza

³ Yahuza wa igan Ƴaysa daƣ fassan, as inay as Ƴaysa itawaxkam-as attadib ən təmattant, udanat daƣ-as təməgraz, eway-du karadat təmərwen ən tafelt n əzrəf šin igraw y tanat-issuxal i muzaran ən limaman, əd muzaran ən Kəl-Əlyəhud. ⁴ Inn-asan: «Nak əgeƣ abakkad. Awedan wər nəƣşed wala, a əge daƣ fassan, y ad itəwənyu!» Mišan ənnan-as: «Nakkanay wər nəzlay daƣ tədi! Batu tədi kay a təqqal!» ⁵ Igar Yahuza azrəf wen daƣ Ahan wa Zəwwəran n Əlyibada, igla, išşolay iman-net aşək. ⁶ Əkkəmnen-du muzaran ən limaman azrəf wen, ənnan: «Əşşərixa-nana issixəram fall-ana igi n əzrəf wa daƣ əssənduq wa iha ərrəzəƣ n Ahan wa Zəwwəran n Əlyibada, fəlas azrəf wa azni a d-igmad.» ⁷ Əgan šinaden, əzzənzən daƣ əzrəf wen tawagost as itawannu: «Tawagost n akanaw», y a tat-agin edag ən zəkwan n aytedan win wər ila akal. ⁸ Awen daƣ a fəlas tawagost ten, har azalada itawann-as: «Tawagost ta n əzni.» ⁹ Əmmək en daƣ as inda awal wa iga ənnəbi İrməya, as inna: «*Ədkalan-du karadat təmərwen ən tafelt, əmosnen əlqimat tas t-ədkadan maddanəs n İsrayil.* ¹⁰ *Əzzənzən sər-əsnat tawagost ta n akanaw, s əmmək was di-omar İməli.*»

Təbadday ən Ƴaysa dat Bilatəs

¹¹ Itawasabdad Ƴaysa dat ənaxkim Bilatəs. İssəstan-tu ənaxkim, inn-as: «Awak kay daƣ a imosan əmənokal ən Kəl-Əlyəhud?» Inn-as Ƴaysa: «Kay iman-nak as tənneƣ adi.» ¹² Mišan wər inna Ƴaysa wala daƣ batu ən lahanan win t-əssəwəran muzaran ən limaman əd muzaran ən Kəl-Əlyəhud. ¹³ Təzzar inn-as Bilatəs: «Wər təsəlla i lahanan aggotnen win kay-əssəwəran aytedan win?» ¹⁴ Mišan wər das-inna Ƴaysa wala təfert iyyadda daƣ batuten šin. Arat wen isammakdal wəllen s ənaxkim.

¹⁵ İmos alƣadat n ənaxkim as id d-iƣlay əmud wa n Akkay ad ikkəs amaskasaw was tara tamattay agamad. ¹⁶ Azzaman en, ill-ay amaskasaw a fəl təga masnat, igân esəm Ƴaysa Baryabbas. ¹⁷ Təzzar inna Bilatəs y aytedan win əddewnen

den: «Ma imos daḡ meddan win was taram a dawant-ækkæsa? Awak Baryabbas, me Ḡaysa was itawannu Elmæsix?»¹⁸ Bilatæs issân as aššaddat ən manzaḡ a fəl əgan muzaran ən limaman Ḡaysa daḡ fassan. ¹⁹ Amazay wa daḡ iqqim Bilatæs daḡ adag wa n əššəriḡa den, ənta as sər-əs du-təzammazal taḡurəs tənn-as: «Aləs di oḡād, ad wər təggəza batu-net, fəlas əndod, ənâya daḡ targət alḡazab aggen fəl əddəlil-net.»

²⁰ Ənkaran muzaran ən limaman, əd muzaran ən Kəl-Əlyəhud, əssərđan tamattay s ad təgməy ad itəwəkkəs Baryabbas, təwəkkəsan man daḡ Ḡaysa. ²¹ İššewal ənaxkim, inn-asan: «Ma imos daḡ əššin meddan win di was taram ad t-ækkæsa?» Ənnan-as: «Baryabbas.» ²² Inn-asan Bilatæs: «Ma z'aga za i Ḡaysa, was itawannu Elmæsix?» Ənnan-as ketnasan: «Itəwətəytəyet fəl təgəttawt!» ²³ Mišan ya inn-asan ənaxkim: «Mafel za? Ma iḡsad?» İqqal-asan awen as sahhaken imaslan-nasan wəllen, ənnan: «Itəwətəytəyet!» ²⁴ Inay Bilatæs as wər d-ixəssəl wala daḡ awen, amaran tənajarwayat tətittəy, idkal-du aman, iššorad sər-san ifassan-net dat tamattay, inna: «Nak ərruda daḡ əzni n aləs di. Batu tədi kawanay a təqqal!» ²⁵ Təjajjayat tamattay kul tənna: «İwəret-ana alxaq n əzni-net nakkanay əd bararan-nana!» ²⁶ Təzzar ikkas-asan-du Bilatæs Baryabbas, Ḡaysa amaran isassag-as tenaḡay labasat s ələkkud, ikf-ay i sojitan y ad t-attaytayan.

Təmakkakkayt ən sojitan daḡ Ḡaysa

²⁷ Təzzar ewayan sojitan n ənaxkim Bilatæs Ḡaysa, əkkan dər-əs ammas n aḡarḡar n aḡalla n ahan wa n əššəriḡa. Əššədawan-du sojitan kul win əllanen den, əḡalayḡalayan-tu. ²⁸ Əkkasan daḡ-as tabdoq-net, əssəlsan-tu əbərnuz igan təzuḡay təsimaymayat zun wa lasan mənokalan, imos awen təhələlet daḡ-as. ²⁹ Əzdän təkəbbut zun ta n mənokalan təgat daḡ šənnanan, əssəwaran-tat y aḡaf-net, əgan agabal ən telant daḡ əfus-net wa n əḡil. Təzzar a dat-əs tiḡərəffen, taggan daḡ-as təmakkakkayt, gannin-as: «Oyy-ik, əmənokal ən Kəl-Əlyəhud!» ³⁰ A fall-as sutufan, tabazan-du agabal ən telant wen, əggatan sər-əs eḡaf-net. ³¹ Dəffər as daḡ-as əyyəwanan igi ən təmakkakkayt, əkkasan daḡ-as əbərnuz wa t-əssəlsan den, əssoḡalan-tu isəlsa-net, ewayan-tu y ad itəwətəytəy.

İtəwətəytay ən Ḡaysa əd təmakkakkayt ta daḡ-as tətawagat

³² Əhân tarrayt as əmmənayan əd Simḡon, imosan aləs n aḡrəm ən Qərwan, šahhaššalan-tu agḡay ən təgəttawt ta fəl

z'itawətəytəy ʒaysa. ³³ Ewadan edag as itawannu Golgota, almaɣna n awen «Edag wa n Təkəyya». ³⁴ ʒkfan-t-in esmad n alɣanab irtāyan d eɣay. Iram-tan ʒaysa, uɣay əs tassay-nasan. ³⁵ Dəffər as t-əttəytayan fəl təgəttawt, ad tuzanan šibədday-net əs təšəyeren.

³⁶ Təzzar əqqiman ewalan-tu. ³⁷ ʒššolayan dännəg aɣaf-net əsəllum, a fəl iktāb as: «Awa ʒaysa wa n ʒmənokal ən Kəl-ʒlyəhud», imos awen arat isidaganan əddəlil wa fəl immut. ³⁸ Tawataytayan dagma-net əššin meddan ən jujab ən baydagan. Iha iyyan aɣil-net, wa hadan zalgat-net. ³⁹ A daɣ-as tajaban aytedan win tallamen den, taggin-as arak batuten, ⁴⁰ gannin: «Dew! Kay wərgex tənneɣ təfragay əjəbbərəjji n Ahan wa Zəwwəran n ʒlyibada, təlasaɣ-qu akaras daɣ karad adan? Kud kay Barar ən Məššina tassafsay iman-nak, tazabbə-du təgəttawt di!» ⁴¹ ʒmmək en da as daɣ-as taggan muzaran ən limaman, əd musanan n ʒttawret əd muzaran ən Kəl-ʒlyəhud tamakkakkayt əntanay da, gannin: ⁴² «Aləs wa isafsin aytedan, wər ifreg əsəfsi ən man-net! Kud ənta a imosan əmənokal n Israyil, azzabbatet-du təgəttawt ten! ʒddi a sər-əs nəzzəgzən. ⁴³ Iga attama-net daɣ Məššina. Agəzet-tu Məššina əmərədda, kud ir-ay. Fəlas a inna: "Nak Barar ən Məššina a mosa."» ⁴⁴ Ijujab ən baydagan win dagman-əs əttəytaynen, da əhân šin-net s əmmək en da.

Iba ən ʒaysa

⁴⁵ ʒlsanat šiyay akal ketnet, a obazan ɣur ammas-nazal, har dəffər tazzar. ⁴⁶ ɣur attayan ən tazzar, idkal ʒaysa əməsli-net wəllen, inna: «Eli, Eli, lama sabaxtani?» Almaɣna n awen: «ʒməli-nin, ʒməli-nin, mafel toyey-xi əd man-in?» ⁴⁷ ʒslan-as arat daɣ aytedan win əbdadnen den, ənnan: «Awen ənnəbi Ilyas a iɣarru.» ⁴⁸ Tarmad as ozal iyyan daɣ-san, idkal-du təduft, issəlmaq-qat daɣ esmad n alɣanab ikkizbaran wəllen, ittal-tat d əmi n alawag ən telant, izzal-t-in i ʒaysa y ad ašəw. ⁴⁹ Mišan ənkaran win hadatnen ad gannin: Ayy-ay, ad nəssən a d-asu Ilyas assafs-ay. ⁵⁰ Amazay wen da, a daɣ ilas ʒaysa ikus n əməsli issohen, əgmadan-tu man. ⁵¹ Assaxat ten da a daɣ izzərrat əfər wa zəwwəran imosan anaxer gər adag wa zəddigan əd wa ogaran tazdak daɣ Ahan wa Zəwwəran n ʒlyibada, issərrat-du anaxer wen ɣur afalla har eres. Inagaynagay amaɗal, ad tasarratnat təsäläten. ⁵² ʒnnolaman zəkwan, ənkaran-du nəməttan aggotnen əmosnen inaxəbidan ən Məššina, ⁵³ əgmadan-du izəkwan. Dəffər tanakra ən ʒaysa, əggazan axrəm wa zəddigan ən Kəl-ʒlyəhud a t-imosan Yerusalem. Inəmməttan win den nifalalan y

aytedan aggotnen. ⁵⁴ As inay kabtan əd sojitan win ogazen Ƴaysa ənəgəynəgəy wa iga amaɗal, d aratan win əganen den, təggaz-tan tasa zəwwərat, ənnan: «Illikan as Barar ən Məššina awen!» ⁵⁵ Əllanat tədoden aggotnen den, əbdadnen sədi, əswādnat. Šidoden šin den harwa daɣ akal ən Galilaya ad əddewnat əd Ƴaysa əssānnat daɣ-as. ⁵⁶ Təhenat Maryama Madəl, əd Maryama ta n anna ən Yaqub əd Yusəf, d anna ən maddanəs ən Zabaday.

Ətəwəgga ən Ƴaysa daɣ əzəkka

⁵⁷ Ill-ay aləs n əməgğergəs igân esəm Yusəf, n əɣrəm n Arimatay, imosan iyyan daɣ məzzəgzan əs Ƴaysa. Osa-du ɣur agadal ən təfuk, ⁵⁸ ikka Bilatəs, igmay daɣ-as taɣəssa ən Ƴaysa. Təzzar omar Bilatəs s ad itəwəyyu Yusəf awəy taɣəssa ən Ƴaysa. ⁵⁹ Idkal Yusəf taɣəssa ten, ig-et daɣ šifit təhossayat. ⁶⁰ Eway-tat, issəns-et daɣ əzəkka aynayan imosan akazam isisaga i man-net. Təzzar isayɣararad-du təhunt zəwwərat, ihar sər-əs imi n əzəkka, igla. ⁶¹ Təlla Maryama Madəl den, əd Maryama ta hadat, əqqimnat daɣ tənəmiwəla n əzəkka wen.

Ətəwigaz n əzəkka

⁶² As iga əzəl wa dəffər awen, imosan əzəl wa dəffər əsəmmutəg n əzəl wa n təsanfawt ən Kəl-Əlyəhud, əgla n muzaran ən limaman, əd Farisaytan, əkkan Bilatəs, ⁶³ ənnan-as: «Ya əmuzar, nəkittəw as anasbahu en harwa da iddar ad inna y aytedan: "Dəffər karad adan a du-təwəsankara daɣ təməttant." ⁶⁴ Daɣ adi amər s ad itəwigəz əzəkka wen har əzəl wa n karad, fəl a du-wər-asin nalkiman-net akəran taɣəssa-net, ad gannin y aytedan: "Itawasankar-du daɣ təməttant." Bahu wa, as iga, ad agər wa azzaran.» ⁶⁵ Inn-asan Bilatəs: «Ənta əddi da! Idawat əd təsəgərt ən sojitan, təzəzzigəzam-tan əzəkka əs təməwit tas təräm.» ⁶⁶ Təzzar əkkan əzəkka, əɣfalan-tu əɣradan əzəzzəwi wəllen i təhunt ta tu-təharat, zazzagazan-tu i sojitan wen den.

28

Tanakra ən Ƴaysa daɣ təməttant

Əzəkka wər tu-təha taɣəssa ən Ƴaysa

¹ Dəffər as okay əzəl wa n təsanfawt ən Kəl-Əlyəhud, affaw aɣora n alxad, təgla Maryama Madəl, əd Maryama ta hadat, y a d-ənəynat əzəkka. ² Ihin-in amaɗal iga ənəgəynəgəy issohen fəlas iyyan daɣ angalosan n Əməli a d-izzabbe daɣ jənnawan, ihoz-in əzəkka, isayɣararad təhunt zəwwərat ta tu-təharat, iqqim fall-as. ³ İla azzahir a n

essam, tēga tabdoq-net tēməllay təsiraqqet. ⁴ Tēga taysəst daḡ sojitan win ogaznen əzəkka, fəl awa dasan-tēga tasa daḡ iguz, zun tan-əgmādan man. ⁵ İššewal angalos, inna i tədoden šin din-osanen əzəkka wen: «Kamatay a kamat-wər-təggəz tasa, fəlas əssanay as Ƴaysa as təsaggadmat wa itawataytayan fəl təgəttawt. ⁶ Wər illa da, fəlas itawasankar-du daḡ tēmattant s əmmək was imal awen. Aglimat-du ad tənəymat edag was kala a daḡ-as tənsa təxəssa-net, ⁷ taglimat tarmad təməlmat i nəttulab-net as itawasankar-du daḡ tēmattant. Azzar-asan-in əs Galilaya. Den da a tu-za-tənəyam. Adi da as are a dakmat-t-anna.»

Əmənəy ən tədoden əd Ƴaysa dəffər tanakra-net

⁸ Əfalnat əzəkka tarmad, təh-enat tasa, mišan ya əfilawasnat wəllen, ozalnat əganat isalan i nəttulab-net. ⁹ Əglānat den da, as əmmənəynat əd Ƴaysa, inn-asnat: «Ma təxlakmat.» Əhoznat-t-in, gabarratnat idaran-net, əssəjadnat-as. ¹⁰ Təzzar inn-asnat Ƴaysa: «A kamat-wər-təggəz tasa! Aglimat tannimat i mədrayan-in, ad akkin Galilaya. Den daḡ a di-z-ənəyan.»

Arat was ənnan sojitan ənāyan-tu əd tanat ta əgan muzaran ən Kəl-Əlyəhud

¹¹ Harwada əhānat tarrayt, as d-ewadan arat daḡ sojitan win ogaznen əzəkka aḡrəm, əssoḡalan i muzaran ən limaman awa igan ketnet. ¹² Təzzar əmmənəyan muzaran ən limaman, əd muzaran ən Kəl-Əlyəhud, əgan šinaden, əkfan sojitan win azrəf aggen. ¹³ Ənnan-asan: «Anniwat: "İnəttulab-net a d-osanen ehad, nənsa, okaran təxəssa-net." ¹⁴ As isla ənaxkim Bilatəs arat wa, a tənəsassagru awa imos, taqqamim da wər kawan-igrew wala.» ¹⁵ Ədkalan sojitan azrəf, əmmożalan s arat wa dasan-itawannan den. Əlqissat ta tawazawaz daḡ Kəl-Əlyəhud, amaran har azalada suḡulan-tat.

Əlməsix əd nəttulab-net dəffər tanakra-net daḡ tēmattant

Ənəməğraw ən Ƴaysa əd nəttulab-net win maraw d iyyan daḡ Galilaya

¹⁶ Əglan nəttulab win maraw d iyyan, əkkan Galilaya, əggəzzayan adḡay wa dər tan-isannamawal Ƴaysa. ¹⁷ As ənəyan Ƴaysa, əssəjadan-as. Mišan wiyyad daḡ-san əgan daḡ-as aššak.

Awa issəwar Ƴaysa inəttulab-net

¹⁸ Təzzar ihoz-tan-in Ƴaysa, iššewal-asan, inna: «Ti-wakfa taḡmar kul daḡ jənnawan, tiwakfaq-qat deḡ fəl

amaḍal: ¹⁹ Daḡ adi agliwat, takkim šimattiwen kul n əddənet tagim-tanat inalkiman-in. Salmayət-tan daḡ aman s esəm n Abba, əd Bara; d Infas wa Zəddigan.

²⁰ Sassaxriwat-tan ləkkum y aratan kul win as kawan-omara. Nak amaran əssənət as əlle xur-wan faw, har əxrud n əddənet.»

Ēlinjil wa n Markus Ēsəmmutəg y əššəxəl ən Ƴaysa

Isalan win iga ənnəbi Ƴaxya

¹ Ēnta da tēsəntit n Ēlinjil ən Ƴaysa Ēlməsix, Barar ən Məššina. ² Ēnta en da a fəl inna ənnəbi Isayas dağ əlkəttab-net: «*Ēnəy za a dat-ək assaglağ anammazul-in a z'aknin tarrayt-nak.* ³ *Idkâl əməsli-net dağ əsuf igannu: "Səmmutəgat abaraqqa y Ēməli! Təsəssiğədam tarrayen dat-əs!"*»

⁴ Adi da a fəl d-osa Ƴaxya, iggaz əsuf ad itaggu y aytedan təlxtutbat, igann-asan ad təwəsəlməğan dağ aman imos awen arat issiknan tətubt-nasan, fəl ad əgrəwan təsurreft ən bakkadan-nasan. ⁵ A t-in-tasin aytedan aggotnen a dinguammadnen akal ketnet wa n Ƴahudəyya d aytedan kul n əğrəm wa n Yerusalām. Ētutaban dağ bakkadan-nasan dat tamattay, isalmağ-qan dağ aman dağ agarew was itawannu Ƴordan.

⁶ As itaggu awen izlâg Ƴaxya asalsaw igân s anzadan n əmnəs, otâb s əsatəb n agašek. Iddâr s əjwalan əd turawat.

⁷ Itaggu təlxtutbat, igannu i tamattay:

"A dəffər-i d-asu ələs
s awa di-iga dağ šigrat,
wər eweda wala enez
y ad ara i suğan ən Ƴateman-net.

⁸ Nak, aman a dağ-qawan salmağa,
mišan ənta Infas Wa Zəddigan
a dağ-qawan z'issəlməğ."

Ētəwəsəlməğ ən Ƴaysa dağ aman d ətəwəjərrab-net

⁹ Adan en da a dağ d-osa Ƴaysa, igmâd-du Nazaret təmosat tağrəmt tēhât akal ən Galilaya. Ikka edag wa dağ isalmağ Ƴaxya aytedan dağ agarew wa n Ƴordan, issəlməğ-qu Ƴaxya. ¹⁰ Igmâd-du Ƴaysa aman Ƴas ogga ijənnawan as ənnolaman, izzəbbat-du fall-as Infas wa Zəddigan, iha šaššelan ən tədabert. ¹¹ Igmâd-du əməsli ijənnawan, inna: «*Kay a imosan Barar-in əkney tara, təssinda-du agna-nin.*»

¹² Tamazayt tenda a dağ issoka Infas wa Zəddigan Ƴaysa taneray. ¹³ Iga dağ-as əkkozat təmərwen n əzəl, itajarrab-tu Iblis. Itinəmərzig əd wəxsan, əssânan dağ-as angalosan.

Ēššəxəl ən Ƴaysa dağ akal ən Galilaya əd Ƴələyğələyan-net

Iguz ən Ƴaysa akal ən Galilaya

¹⁴ Dæffær ətərməs ən Yaxya wa isalmağan aytedan daγ aman, ad ikka Ƴaysa akal ən Galilaya, a daγ-as im-mal əmazal wa d-ifalan Məššina. ¹⁵ Igannu i tamattay: "Təmastant tənda, Taγmar ta n Məššina təhōz. Utabat, təzzəgzənam s Əlinjil."

Inəttulab win azzarnen ən Ƴaysa

¹⁶ Əzəl iyyan illil Ƴaysa tagadamayt n agaraw wa n Galilaya as ogga Simxon d amadray-net Andrawəs, fattawan daγ agaraw sangaytan-nasan win as tabazan kifitan, fəlas inabazan ən kifitan a əmosan. ¹⁷ Inn-asan Ƴaysa: "Əlkəmat-i, a kawan-aga meddan sər-i du-za-tawaynen aytedan y a tan-assafsa daγ bakkadan-nasan." ¹⁸ Oyyan sangaytan-nasan daγ tamazayt ten da, əlkaman-as. ¹⁹ Iga Ƴaysa y adag en arat n akkay, inay Yaqub d amadray-net Yaxya win maddanəs ən Zabaday, əntanay da əhân aɣlal n aman; kannin sangaytan-nasan win as tabazan kifitan. ²⁰ Iyr-əndu daγ amazay wen da. Oyyan abba-nasan Zabaday əd mašşayalan-net daγ əɣlal, əlkaman i Ƴaysa.

Əsəssəxri ən Ƴaysa daγ Kafarnahum

²¹ Ikka Ƴaysa əd nəttulab-net taγrəmt təgât Kafarnahum. Ewad-du əzəl wa n təsanfawt ɣas, iggaz Ƴaysa ehan n əlɣibada ən Kəl-Əlyəhud, a daγ-as isasaɣru. ²² Isammaklal əs tamattay əmmək was itaggu əsəssəxri-net, fəlas ig-asan əsəssəxri n awedan ilân tanaya wər əlen musanan n Əttawret. ²³ Wala a ihogan idkal aləs iyyan iha aggəsuf əməsli-net daγ ahan n əlɣibada ad igannu: ²⁴ "Ma daγ-na tareɣ, Ƴaysa wa n Nazaret? Əngəm assa a du-təgeɣ y a danaɣ-təhləka? Əssânay awa təmosa: Kay a imosan Əmizdag wa d-izammazal Məššina". ²⁵ Iharašsat-tu Ƴaysa, inn-as: "Fastu, təgmədaɣ aləs di!" ²⁶ Təzzar izazzakarkar aggəsuf aləs en, izyak, igmad-tu. ²⁷ Əhagan aytedan ketnasan ad tinəmənnin gər-essan: "Ma imos awa? Ma təmos masnat ta wər nəzday a, təddewat əd tanaya! Awedan wa, wala kələsuf əttâfan tənna-net". ²⁸ Tarmad as təwazawaz sallat ən Ƴaysa daγ Galilaya ketnet.

Əzuzəy ən Ƴaysa aytedan aggotnen

²⁹ Igmad-du Ƴaysa ehan n əlɣibada ən Kəl-Əlyəhud ɣas, ikka ehan ən Simxon d Andrawəs iddew əd Yaqub əd Yaxya. ³⁰ As itaggu awen tədaggalt ən Simxon təzizalallattat tanaday. Os-in Ƴaysa ɣas təttəmal-as. ³¹ Təzzar os-et-in, ibaz əfus-net, issəbdad-tat, təwat fall-as tanaday, a tan-təsiməgurit.

³² As tuda təfuk, a sər-əs du-tamawayan aytedan kul win ərinnen əd win əhan kələsuf. ³³ Iddew-du əyrəm ketnet

dat əmi n ahan wen. ³⁴ Izzozay Ƴaysa aytedan aggotnen əgrawnat təwərnawen wər nola, ikkas deɣ daɣ wiyyad kələsuf aggotnen. Amaran igaddal i kələsuf en emel n awa imos, id masnat a əgan as ənta a imosan Əlməsix.

Emel ən Ƴaysa Əlinjil daɣ Galilaya

³⁵ Əzəl wa hadan, inkar-du Ƴaysa datazal, igmad, ikka edag issufan ad itattar. ³⁶ Dəffər awen, igla Simɣon d aytedan win ɣur-əs əllanen, a das-saggadan. ³⁷ As t-in-osan, ənnan-as: «Aytedan kul saggadan-ak.» ³⁸ Təzzar inn-asan Ƴaysa: "Akkiwat-ana šiɣarmaten šin dana-ɣalayɣalaynen, a daɣ-asnat aga təlxutbat əntanatay da, fəlas adi da a fəl d-əmmozala." ³⁹ Illil Ƴaysa akal ən Galilaya ketnet, itaggu təlxutbat daɣ nan n əlɣibada ən Kəl-Əlyəhud, itakkas deɣ kələsuf daɣ aytedan.

Əzuzəy ən Ƴaysa aləs igrâw kətru

⁴⁰ Osa-du awedan iyyan təgraw təwərna ən kətru, igarafat dat Ƴaysa, onsay-tu, inn-as: «As tareɣ adi, təfrâgəɣ a di-təzzuzəyəɣ, izdaga.» ⁴¹ Ihanattat-as Ƴaysa. Izzal-in əfus-net, idas-tu, inn-as: "Areɣ adi, əzzəy tizdaga." ⁴² Izzay awedan wen daɣ tamazayt ten da, zəddig. ⁴³⁻⁴⁴ Issəllam-tu alwaq wen da, dəffər as das-iryâm wəllen inn-as: «Ənəy za, ad wər təməla y awedan waliyyan arat wa igan da, amaran aglu tassaknaɣ iman-nak y əlimam, taga takutay ən tazdak ta kay-issəwar əššəriɣa n ənnəbi Musa, ad iqqəl adi y aytedan təgəyya ən təməzzəyt-nak.» ⁴⁵ Mišan igla aləs en ɣas, iggaz šin əzəwwəziwəz ən salan n awa igan, har ab'as ifrag Ƴaysa iguz n əɣrəm hannayan-tu aytedan. Awen daɣ a fəl iggaz əsuf a daɣ-as t-in-tasin aytedan, a sər-əs du-gammadnen šisədag kul.

2

Əməstan ən Ƴaysa əd musanan n Əttawret

Əməstan daɣ batu ən təsureft ən bakkadan

¹ Adan dəffər awen, iqqal Ƴaysa aɣrəm ən Kafarnahum. Əslan aytedan as iha ehan wa daɣ isaggan ɣas, ² əkkant-idu s igət, har as ab'as t-iha adag, wala ɣas dat əmi n ahan. A dasan-itaggu təlxutbat. ³ Itaggu təlxutbat da da, as das-d-immeway anabdon misawayan meddan əkkoz. ⁴ Mišan orn-asan a t-in-awədan fəl igət n aytedan. Əwaran afalla ən taɣazamt, əftayan əsəfəl daɣ tənəmiwəla n adag wa iha Ƴaysa. Təzzar əssərasan-du anabdon wa daɣ təxərəbbet ta

əgan den, izilallat day tössut-net. ⁵ As inay Ƴaysa əzəgzan-nasan, inna y anabdon wen: "Barar-in, ibakkadan-nak tiwasarafan-ak."

⁶ Awen as itag əqqiman arat day musanan n Əttawret. Əslan y awa inna Ƴaysa da ƣas ad tihənzəmən day man-nasan gannin: ⁷ «Wa aləs ma t-issəhalan igi n awal wa? Arat wa, əmadraw. Ma ifragan əsurəf ən bakkadan ar Məşşina ƣas?» ⁸ Issan Ƴaysa day tamazayt tenda awa samadranan, təzzar inn-asan: «Mafəl tətihənzəmmem adi day wallan-nawan? ⁹ Ma ogaran tərƣəsəy gər ad tanna y anabdon: "Tiwasarafan-ak bakkadan-nak", meƣ ak a das-tanna: "Əbdəd, tədkəla tössut-nak, təjəwenke"? ¹⁰ Amaran, areƣ ad tössənam as nak Ag Aggadəm ələƣ day əddənət tanaya a di-təşişawadat ad əssurəfa y awedan ibakkadan-net.» Təzzar inna Ƴaysa y anabdon: ¹¹ «Əbdəd, tədkəla tössut-nak, takkaƣ aƣaywan-nak.» ¹² İbdad aləs wen tamazayt ten da, idkal tössut-net. İgmad əswâdan day-as aytedan kul, isimaklal sər-san awen, əmmâlan Məşşina gannan: «Wər kala ad nənay arat şilat ən wa.»

Əməstan day batu ən tədrəwt əd nasbakkadan

¹³ İgmad Ƴaysa aƣrəm, ilas tewaƣlay ən tagadamayt n agaraw wa n Galilaya. A t-in-tasin aytedan s igət, isasəyr-en. ¹⁴ İjiwankat as inay aləs iyyan igân esəm Lebi ag Alfay iqqim day adag n əşşəƣəl-net imosan əzərzəm n əzrəf ən takəsen, inn-as Ƴaysa: "Əlkəm-i." İbdad Lebi ilkam-as. ¹⁵ Innəftəƣ Ƴaysa i Lebi. İdraw Ƴaysa ənta əd nəttulab-net d aytedan aggotnen ən nəzzərzəm ən takəsen əd nasbakkadan. Aytedan şilat ən win, əggətan win lakkamnen i Ƴaysa.

¹⁶ As ənayan musanan n Əttawret ən taggayt ta n Farisaytan Ƴaysa idrâw əd nasbakkadan əd nəzzərzəm ən takəsen, ənnan i nəttulab-net: "Mafəl idarraw əlfəqqi-nawan əd nəzzərzəm ən takəsen əd nasbakkadan?" ¹⁷ İsl-asan Ƴaysa, inn-asan: «Aytedan win wər nəla əƣəli, wər əddəraran s anasmagal, imiranan a sər-əs əddərarnen. Nak wər d-əmmozaala s aytedan win ƣur iga as oƣâdan, kalar inasbakkadan as d-əmmozaala y a tan-d-aƣra əqqəlan inalkiman-in.»

Əməstan day batu n əzum

¹⁸ Əzəl iyyan ad əzuman nəttulab ən Yaxya əd win Farisaytan, osan-du aytedan wiyyad Ƴaysa, ənnan-as: «Mafəl tuzaman nəttulab ən Yaxya əd win Farisaytan, amaran win-nak wər tuzaman?» ¹⁹ Inn-asan Ƴaysa: «Mənəmmək as z'aklin lagatan a ƣur illa əmazlay əs mawan-nasan? Kalar iket illa ƣur-san wər z'aklin əs

mawan-nasan. ²⁰ Mišan ilkâm ezəl a ħur-san z'ammadkal əmazlay, ezəl wədi amaran ad uzaman.

²¹ Wər t-illa i z'iwətan daɣ tabdoq waššarat šikəst taynayət. As iga adi, ad təkəwənzəz šikəst tədi, təššit-tu tabdoq ten azarru wəllen. ²² Wər t-illa deɣ i z'agin esmad n əzzəbib aynayan daɣ gədad. Fəlas as iga adi, ad ukafan abbaqqen, affatu daɣ esmad wədi, igədad deɣ əxšədan. Kalar esmad n əzzəbib wa aynayan ibəyaɣ aynaynen a daɣ itawaggu.»

Əməstan daɣ batu n ezəl wa n Əssəbət imosan ezəl ən təsanfawt

²³ Əzəl iyyan ən təsanfawt ən Kəl-Əlyəhud, ijiwankat Ƴaysa ənta əd nəttulab-net daɣ təwəgas n alkama. Ji-wanken nəttulab-net rassaban-du šiɣaɣanen, tattin-tanat. ²⁴ Təzzar sassagran-in Fərisaytan Ƴaysa awen, ənnan-as: "Ənak awa taggin nəttulab-nak! Mafəl taggin arət xarâman daɣ ezəl wa n təsanfawt?" ²⁵ Inn-asan: «Ak teɣaray a wər təgəm awa iga ənnəbi Dawəd assaɣa wad imayatar, təzzar iggaz-tu gələk ənta əd midawan-net? ²⁶ Awak wərgex iguz a iga ehan ən Məššina daɣ azzaman win daɣ imos Abiyatar Əlimam wa Zəwwəran, təzzar itša daɣ təgəlwen šin əmosnen takutay təkâtat i Məššina, əs limaman ɣas as təxalal tattay-nasnat? Fadda ikfa daɣ-asnat imidawan-net.» ²⁷ Inn-asan deɣ: «Aggadəm wərgex ənta a d-itawaxlakan fəl əddəlil n əssəbət, kalar əssəbət a du-tətawaxlakat fəl tənfa n aggadəm. ²⁸ Daɣ adi nak Ag Aggadəm a ixkaman fəl ezəl wa n təsanfawt.»

3

Əməstan daɣ batu n əzuzəy iga Ƴaysa daɣ ezəl ən təsanfawt

¹ İlas Ƴaysa iguz n ahan n əlɣibada ən Kəl-Əlyəhud wa n Kafarnahum. İlla aləs den as immût əfus-net. ² Təzzar əgəran daɣ-as Fərisaytan šittawen y ad əssənan kud ad izzuzəy awədan daɣ ezəl wa n təsanfawt fəl ad t-əxtəsan s awen. ³ İnna Ƴaysa y aləs was immût əfus-net da: «Ənkər, əbdəd daɣ ammas n əljəməɣat.» ⁴ Amaran inna y əljəməɣat: «Awak daɣ awa inna Əttawret ezəl wa n təsanfawt igi n arət olâɣan a daɣ-as xalalan, meɣ ak igi ən wa wər noləɣ? Awak ereg n awədan daɣ təməttant, meɣ ak šiyyit-net ihlək?» Wər tan-iha i das-innân arət. ⁵ İssəlal-tan Ƴaysa asawad-net ih-ay alham, təɣšâd taɣart ta əgan wallan-nasan iman-net wəllen. Təzzar inna y aləs wen: «Əzzəl əfus-nak.» İzzal-tu, izzay iqqal əmmək-net. ⁶ Əgmadan Fərisaytan ɣas, əkkan arət daɣ aytedan

ən Herod, wa n ən əmənokal ən Galilaya, a dər-san tinəməšəwwiran fəl təməwit tas z'agin iman ən Ƴaysa.

Tosa-du tamattay tagget Ƴaysa

⁷ Iddew Ƴaysa əd nəttulab-net, ikka təgadamayt n agaraw wa n Galilaya. Təddew dər-əs tamattay tagget, s iyyat akal ən Galilaya a du-təgmad, iyyat akal wa n Yahudəyya, ⁸ iyyat aɣrəm ən Yerusalām, iyyat akal n Adumay əd mədlan win əwarnen aganna wen sen n agarew wa n Yordan, iyyat imədlan win əhoznen aɣrəm ən Tir əd wa n Sidon a du-təgmad. Aytedan win kul, tesalay n aratan win itaggu Ƴaysa a tan-du-tewayat. ⁹ Awa təga tamattay daɣ igət, inna Ƴaysa i nəttulab-net a das-səmmutəgan aɣlal n aman y a t-iggəz as tu-təsas tamattay. ¹⁰ Fəlas izzozay daɣ-san aytedan aggotnen, eway-du awen as fall-as tanabdaɣan aytedan kul win ərinnen, gammayan d ades-net. ¹¹ Amaran aytedan win əhan kələsuf, əntanay id ənayan Ƴaysa a das-əssəjədan, zayyakan gannin: «Kay a imosan Barar ən Məššina,» ¹² mišan iraqam-asan Ƴaysa wəllen fəl amel n awa imos.

Əsənnəfrən ən Ƴaysa maraw d əššin daɣ nəttulab-net

¹³ Ikka Ƴaysa afalla n adɣaɣ iyyan, iɣr-in meddan win əhanen agna-net, osan-t-in. ¹⁴ Isannafran daɣ-san maraw d əššin win dər z'itidaw, ig-asan esəm inəmmuzal. Isinafran-tan deɣ y ad əmmālan Isalan n Əlinjil; ¹⁵ ikf-en deɣ tarna n ikus ən kələsuf daɣ aytedan. ¹⁶ Əntanay əddi ismawan ən maraw meddan d əššin win isannafran: Simɣon was iga esəm Butros, ¹⁷ əd Yaqub d amadrəy-net Yaxya win maddanəs ən Zabaday, win as iga esəm Bohanargas, almayna n adi: Maddanəs ən teqqaq; ¹⁸ d Andrawəs əd Filibus əd Bartulamawəs əd Matta əd Tuma əd Yaqub wa n ag Alfay, əd Tadday əd Simɣon was itawannu wa Isaggatakken, ¹⁹ əd Yahuza Isxarəyuti was ənta a z'isəttərməsən Ƴaysa.

Iduf wa əgan aytedan wəyyad daɣ Ƴaysa

²⁰ Dəffər awen, iqqal-du Ƴaysa ehan wa daɣ issəgan daɣ Kafarnahum. Təlas fall-as tamattay tiddawt s awa təga daɣ igət, ab'as wala alwaq a daɣ igraw əs tattay ənta əd nəttulab-net. ²¹ Əslan marwan-net awen, əkkan-t-idu y ad t-əbəzan, aglin dər-əs fəlas gannin: «Awa arat a t-immaran.»

²² Əggadan-du musanan n Əttawret wiyyad a d-əgmadnen Yerusalām, ad gannin: «Awa Aššaytan Baɣalzabul, wa n əmənokal ən kələsuf a t-ihan, ənta a t-ikfan fərregat n ikus ən kələsuf daɣ aytedan.» ²³ Təzzar iɣr-en-du Ƴaysa, ig-asan tangalt a daɣ dasan-innā: «Manəmmək as z'ikkəs Aššaytan daɣ aytedan

kæləsuf-net s ənta as əlkaman? ²⁴ Taymar tas əmməgaran mæssawəs gar-essan, tədi əbərəjji a za tagu. ²⁵ Aḡaywan iyyanda deḡ as əmməzrayan mæssawəs, wədi əbərəjji a z'agu. ²⁶ Zun d əmmək di daḡ as, kud Aššaytan iman-net a dər imməgar, wədi taymar-net wər za tihag. Əbərəjji a za tagu, təḡrəd. ²⁷ Awalla wər t-illa i ifrəgan iguz n ahan n aləs n əməqqerəd, iḡrəd aqqa ən təla-net, ar s ad t-ikrād təzzar. Dəffər as t-ikrād amaran ad z'ifrəg ad iḡrəd aqqa ən təla-net. ²⁸ Əggəyyeḡ əsilakanax-awan as, wər t-illa abakkad d alfawaxiš as wər ifreg Məššina a t-issurəf y awedan ²⁹ ar alfawaxiš imosan ikus ən tarna y Infas wa Zəddigan, fəlas abakkad adi iḡallalan fəl awedan.» ³⁰ Batu ta ig-asan-tat Ḡaysa fəlas tənna a taggin: «Ih-ay aggəsuf.»

Anna əd mədrayan ən Ḡaysa win tidət

³¹ Tosa-du anna ən Ḡaysa əd mədrayan-net, əbdadan dat əmi n ahan, zammazalan sər-əs awedan y a dasan-t-id-aḡru. ³² Təqqim tamattay tagget ḡur Ḡaysa, təḡilayḡalay-tu as das-itawanna: «Təbdād-ak anna-nak əd mədrayan-nak dat ahan, sastanan dər-ək.» ³³ Inna Ḡaysa: «Ma imosan za anna-nin, ma imosan imədrayan-in?» ³⁴ Təzzar issəlal asawad-net tamattay ta ḡur-əs təqqimat da təḡilayḡalay-tu, inna: «Əntanay da da anna-nin əd mədrayan-in, ³⁵ fəlas awedan kul wa itamazalan tara ən Məššina, ənta a imosan amadray-nin, madəḡ təmadrayt-in, madəḡ anna-nin.»

4

Igi ən Ḡaysa əlmitalan aggotnen əmmigradnen əs Taymar ta n Məššina

Əlmital wa n əmagyak

¹ Ilas Ḡaysa tewaxlay ən təgadamayt n agaraw wa n Galilaya, ad isasaxru aytedan. Təddew-du fall-as tamattay tagget, har as iggaz axlal n aman a d-ihân imi n agaraw da da, iqqim daḡ-as. Tamattay amaran ketnet təqqim-du təbdād daḡ əsəlim n agaraw. ² A tat-isasaxru aratan aggotnen s əlmitalan. Inn-asan daḡ əsəssəḡri-net: ³ «Səsəmat! Əmagyak iyyan a iglan y ad inbəl tawagost-net. ⁴ Daḡ anabal wa itaggu den imosan anabas n amasa, ərtaknat təblalen šiyvad fəl tama ən tarrayt, osan-du gədad ətšan-tanat. ⁵ Ərtaknat šiyvad daḡ amaḡal əhanat təhun. Idwal-du amasa wen tarmad fəlas wər illa daw-əs amaḡal aggen daḡ əqlan kewan, ⁶ mišan as təggəzzay təfuk, illəsway, iqqur fəlas wər iha amaḡal a daḡ in z'ugagan kewan-net. ⁷ Šiyvad ərtaknat daḡ təfəssəḡ. Ədwalnat təfəssəḡ šin, əlmaznat amasa wa d-idwalan den, igdal-asnat awen

ara. ⁸ Mišan ya arat daɣ təblalen en irtak daɣ amaɗal olaɣan. Igmad-du, idwal, iga šiɣaɣanen. Šiɣaɣanen-net šiyyad akkiyyat əhanat-tat karadat təmərwen ən təblalt. Šiyyad sədisat təmərwen, šiyyad temeday.» ⁹ Dəffər awen inn-asan Ƴaysa: «Wa isallin, issəsəmet.»

Əssiran win əqqalnen Taɣmar ta n Məššina

¹⁰ As təfal tamattay Ƴaysa, ənkaran-du nəttulab-net win maraw d əššin d aytedan wiyyad a dər-əs tidawnen, əssəstanan-tu d almaɣna n əlmitalan win itaggu. ¹¹ Inn-asan: «Kawanay təgrāwam masnat daɣ əssiran ən Taɣmar ta n Məššina, mišan aytedan win hadatnen arat kul tangalen as dasan-itatamal. ¹² *Adi a d-ewayan as əswādan, mišan wər hənnəyan, əssisaman, mišan wər gərrin. Id ənnar wər iga adi, utaban, təwəsürəfan-asan bakkadan-nasan.*»

Almaɣna n əlmital wa n əmagyak

¹³ Inn-asan dey: «Awak əgərri a wər təgem wa daɣ əlmital? Daɣ adi manəmmək as za tagrim əlmitalan win hadatnen? ¹⁴ Əmagyak wa n ihogan, əlmital a imos n awedan immalan awal ən Məššina y aytedan. ¹⁵ Amasa wa irtakan fəl tama ən tarrayt, əlmital a imos n aytedan win əslanen y awal ən Məššina mišan a d-asu Aššaytan den da ikkəs-tu daɣ wallan-nasan. ¹⁶ Amasa wa irtakan daɣ amaɗal əhanat təhun, əlmital a imos n aytedan win as, as əslan y awal ən Məššina ad t-əqbalan əddi da əs man filawasnen, ¹⁷ mišan wər ila awen ekay. Aytedan win wər əmosan ar məssawəsan ən təmazayen. Igda ɣas a tu-təməl təssust, madex təddəguzt təgât fəl əddəlil n Awal ən Məššina, ad ayyin əzəgzan əddi da. ¹⁸ Amasa wa irtakan daɣ təfəssaɣ, əlmital a imos n aytedan win əslanen y Awal ən Məššina, ¹⁹ mišan aššawašatan n əddənət, d adakal wa təga təgərgist n əddənət taytwen-nasan, d ark deranan wiyyad aggotnen, əssəfalan-du dənnəg Awal wen, igdal-as awen a d-awəy tənfa. ²⁰ Amasa wa irtakan amaran daɣ amaɗal olaɣan, əlmital a imos n aytedan win as, as əslan y Awal ən Məššina, a sər-əs əzzəgzənan, iqqəl-asan tənfa, təmosat karadat təmərwen n ənətfus, iyyat təqqəl sədisat təmərwen, iyyat amaran təqqəl temeday.»

Səsəmat s əlluy

²¹ Inn-asan Ƴaysa dey: «Awak fətəla tərɣât idakkaltat awedan ag-et daw əɣəzu madex daw tessat? Wərgex ətəwəsəwar a tətawaggu edag ihhoken? ²² Wər t-illa a iɣbâran, wər za nənəfiləl; wala iyyan imosan əssir, wər za naffaggu. ²³ Wa isallin, aslet!» ²⁴ Inn-asan dey: «Taggat

əsəsəm olâḡan y əmazal wa d-ifalan Məššina! Təsəkət tas təkkatam y aytedan ənta as dawan-z-ikət Məššina, iššit-awan deḡ fall-as. ²⁵ Fəlas wa ilan, a das-itəwəšitu awa ila; wa wər nəla amaran, arat n awa ila da a daḡ-as attarmas.»

Elmital wa n tadwala n amasa

²⁶ Inn-asan deḡ: «Taḡmar ta n Məššina təha əlmital n awedan inbâlan amasa daḡ tawagost-net. ²⁷ Gər z'insâ wala okây, gər z'ehad wala ezal; amasa wədi a d-igməd, ad idaggal. Wər issen məššis əmmək was d-igməd wala was idaggal, ²⁸ fəlas amaḡal, gar-es əd man-net as d-itakkas tənfa. Yel a d-itizaran agamad, dəffər awen agu šixaxanen, amaran ədwəlnat-du daḡ-asnat təblalen. ²⁹ Təḡḡâ təbzəst ḡas, idkâl-du məššis əlmoši, assantu daḡ allay-net; fəlas tamert n allay a təḡat.»

Elmital wa n amasa nannabat igân esəm mutard

³⁰ Dəffər awen inn-asan Ḡaysa: «Mas za nammattal Taḡmar ta n Məššina? Ma imos əlmital wa tat-isassagran? ³¹ Taḡmar za ta n Məššina təha əlmital n amasa n annabat igân esəm mutard ogaran imasan kul təmmədrəyt. ³² Mišan dər iga awen da, as itawanbal, ad idwəl, agər annabatan kul win nebəlan təzzəgrət. Agu izəlan əḡânen təzzəgrət ta n as a daḡ-san agin ḡəḡad šisəllula.»

³³ Elmitalan aggotnen šilat ən win di as dasan-immal Ḡaysa awal wa d-ifalan Məššina, a daḡ ewâl awen s awas əfragan əḡərri-net. ³⁴ Wər t-illa a inna i tamattay əs wərgəḡ əlmitalan a daḡ-qu inna, mišan as iqqal ḡas-net ənta əd nəttulab-net a dasan-iməl almaḡna n əlmitalan win di ketnasan.

Igi ən Ḡaysa təlməḡjujaten

Ḡaysa ila tarnə fəl tazafa

³⁵ Əzəl wenda, as d-ihoz ahad, inna Ḡaysa i nəttulab-net: «Nəḡrəset əs tagadamayt ta hadat n agaraw.» ³⁶ Əfalan tamattay, matakwayan nəttulab-net, ewayan-tu daḡ əḡlâl n aman wa da daḡ iqqim da. Eddewan dər-əs əḡlâlan n aman wiyyad. ³⁷ Əḡlân as d-igar aḡu issohen fəl agaraw. Ad sattabnat tənazzamaren y əḡlâl, taggazan-t-id aman har ibuk y ad idnəy. ³⁸ As itaggu awen, Ḡaysa ənta issomat adafor insâ daḡ ələqqam n əḡlâl. Təzzar əssənkaran-tu nəttulab-net daḡ etəs, ənnan-as: «Əlfəḡḡi! Awak zələy a wər təge daḡ a danaḡ-atšin aman?» ³⁹ Inkar-du Ḡaysa, isannarḡam y aḡu, inna y agaraw: «Ədrər, taffasta!» Təzzar izzəkkat aḡu, iḡrad arat kul adrur. ⁴⁰ Təzzar inn-asan: «Ma kawan-issərməḡan? Awak əzəḡzan a wər təgem harwa da?» ⁴¹ Təḡḡaz tasa zəwwərat inəttulab, ad tinəmənnin:

«Kawanay ak, ma imos wa daɣ awedan, s aɗu d agaraw da ittâf daɣ-san tanat?»

5

Ƴaysa ila tarnâ fêl kâlêsof

¹ Ewad-in Ƴaysa êd nêttulab-net êsêlim n agaraw wen sen, daɣ akal ên Garassenatan. ² Izzêbbat-du Ƴaysa aɣlal n aman ɣas, igmad-du sêr-ês êmeskel iyyan izêkwan. ³ Izêkwan en da a daɣ ixsar, amaran indâr y aytedan kerrad-net, ês wala isassaran. ⁴ Ƴyêwanan kerrad ên fassan-net ês sassaran, asêɣan idaran-net ês têzabagawen, mišan ad ixtês awen kul. ⁵ Iha izêkwan en da d êdɣaɣan ehad-ezal, izayyak, italay iman-net ês têhun.

⁶ Mišan, as ogga Ƴaysa daɣ igêg, ozal-du sêr-ês, issêjad-as. ⁷ Idkal aggêsuf wa ihan alês wa êmêsli-net wêllen inna: «Ma daɣ-i tareɣ Ƴaysa, Barar ên Mêššina di n Amadkol? Ƴgmaya daɣ-ak fêl Mêššina, a di-wêr-têzêɣɣêzzêba.»

⁸ Innâ awen, fêlas das-inna Ƴaysa: «Aljayn wa labasan, êgmêd d alês di!» ⁹ Têzzar issêstan-tu Ƴaysa, inn-as: «Ma esêm-nak?» Inn-as aggêsuf: «Esêm-in Egan, fêlas igêt a nêga.» ¹⁰ Ad itansay aggêsuf wen Ƴaysa fêl a tu-wêr-ikkes daɣ akal en.

¹¹ As itaggu awen, idân êsêgên aggen ên ladayan fêl tasaga ên têkašwart têhozat den. ¹² Ad tansayan kâlêsof en Ƴaysa gannin-as: «Sukanay iladayan en, a tan-nêggêz.» ¹³ Ird-asan Ƴaysa s awen. Ƴgmadan kâlêsof alês wen, êggazan iladayan. Êddêggagan-du ladayan en fêl azadaga ên têkašwart, ad titêrêggen daɣ agaraw. Êtšan-tan aman, êmosan edag n êššin gim.

¹⁴ Têzzar ozalan madanan ên ladayan win, êgan isalan y êɣrêm wen êd ɣêlêyɣêlayan-net. Ƴglatan-du aytedan y ad ênêyan awa igan den. ¹⁵ Osan-du Ƴaysa, ênayan alês was kala ad t-êhan kâlêsof; iqqim, ilsâ, têqqâl-t-idu tayttay-net, têzzar têggaz-tan tasa. ¹⁶ Egan daɣ-san aytedan win êggêyyatnen y awen, isalan kul n awa itawaggan y alês en, d awa igrawan iladayan, ¹⁷ têzzar ad tansayan Ƴaysa a dasan-igmêd akal-nasan.

¹⁸ Itaggaz Ƴaysa aɣlal n aman as d-inkar alês wa êgmadan kâlêsof, a t-itansay ad t-ayyu a dêr-ês idaw. ¹⁹ Wêr das-irda Ƴaysa s awen, eges ya inn-as: «Aglu êqqêl ehanawan d aytedan-nak, têmêlaɣ-asan arat kul wa dak-iga Êmêli s êhênêtta-net.» ²⁰ Têzzar igla alês en, ikka akal igân esêm «Wa-n-Maraw-Ƴêrman» ad immal arat kul wa das-iga Ƴaysa. Aytedan kul win das-êslanen isannahal sêr-san awen êsêmmêklêl.

Yaysa ila tarna fəl təwərna əd təmattant

²¹ Iqqal Yaysa, iyras agaraw s əsəlim-net wa hadan. Təlas fall-as tamattay tagget tiddawt. ²² Təzzar osa-du aləs igân esəm Jayxus, imosan iyyan daɣ muzaran n ahan n əlxibada ən Kəl-Əlyəhud. Inay Yaysa ɣas, issəjad dat-əs. ²³ Onsay Yaysa, inn-as: «Tabarart-in a ɣur təlla təmattant, areɣ daɣ-ak a sər-əs nidaw təssəwəraq-ɣat ifassan-nak ad təzzəy.» ²⁴ Iгла Yaysa, iddew dər-əs. Təlkâm-as tamattay tagget, tətənadəɣ fall-as.

²⁵ Tamattay en, tah-et təntut təgât maraw elan d əššin igammad-tat əzni. ²⁶ Tənây alɣazab aggen daɣ fassan ən nasmagalan aggotnen. Awa təla kul as daɣ-san tu-tənɣa. Mišan edag n ad təggudəy, tətəyt fadda a fall-as təga təwərna-net. ²⁷ Təntut ten kala da təslâ y awa gənnin aytedan əs Yaysa. Təggaz-in tamattay ta təhat šixərden ən Yaysa, tədas takadkat-net, ²⁸ fəlas tənna daɣ man-net: «As ədasa kuddeɣ isəlsa-net, ad əzzəya.» ²⁹ Da da ad tədas təkadkat-net ənta daɣ-as izzəkkat əzni wa daɣ-as inaqqalan, təfray i təxəssa-net as təzzay daɣ təwərna ten. ³⁰ Tamazayt ten da a daɣ ifray Yaysa i tarna iyyat as t-in-təgmad. Imalallay-du tamattay, inna: «Ma idasan isəlsanin.» ³¹ Ənnan-as nəttulab-net: «Tahannaya tamattay ta fall-ak tətənadəɣat, eges təganna "Ma di-idasan?"» ³² Dər iga awen da ya issələl Yaysa tamattay asawad-net y ad inəy wa t-idasan. ³³ Təzzar tərmaɣ təntut, təndaw-tat taysəst, fəlas təssân daɣ təməzzəyt ta təga den. Təkka-du Yaysa, təssəjad dat-əs, təmal-as tidət ketnet. ³⁴ Inn-as: «Tabarart-in əzəgzan-nam sər-i a kam-izzozayan. Aglu daɣ alxer, təzzaya daɣ təwərna-nam.»

³⁵ Harwada iššewal Yaysa as d-osan aytedan a d-əfalnen aɣaywan ən Jayxus wa n əmuzar n ahan wa n əlxibada ən Kəl-Əlyəhud, ənnan-as: «Tabarart-nak wər tədder, igd-ak tədgâzax Əššex.» ³⁶ Mišan wər-in-iger Yaysa tenbay daɣ awa itawannan den, inna y əmuzar n ahan wa n əlxibada ən Kəl-Əlyəhud: «Ad wər tərmaɣa, əttəf ɣas əzəgzan-nak.» ³⁷ Igdal Yaysa i tamattay a dər-əs tidaw. Iгла, wər iddew ar əd Butros əd Yaɣub əd Yaxya wa n amadray ən Yaɣub. ³⁸ Əddewan əd Jayxus wa n abba ən tabarart s aɣaywan-net. As din-osan inay Yaysa tanajarwayat n aytedan hallinen, sikalalan. ³⁹ Iggaz-in fall-asan, inn-asan: «Mafel tənjarwayam təhallim? Təbarart-nawan wər tat-aba, etəs ɣas a təga.» ⁴⁰ Təzzar əgan-tu aɣɣab. Issərdaq-qan ketnasan, wər d-iqqim ar imarwan ən tabarart əd nəttulab-net win dər d-iddew, təzzar iggaz dər-san edag wa daɣ tənsa təxəssa ən tabarart. ⁴¹ Ibaz əfus-net, inn-as: «Talita

qum!» Almayna n awen: «Tabarart ənnəx-am, ənkər-du!» ⁴² Tənkər-du tabarart daχ tamazayt tenda, təjawankat. Tabarart ten, maraw elan-net d əşšin. Awa sər-san iga awen daχ əsəmməkləl, əhagan. ⁴³ Irxam-asan Ƴaysa wəllen fəl amel n awen y awedan waliyyan, dəffər adi inn-asan a tat-akfin a tətša.

6

Tunkart n aytedan ən Nazaret Ƴaysa

¹ Igməd Ƴaysa edag wen, iddew əd nəttulab-net, ikka aχrəm wa daχ idwal. ² As əzəl wa n təsanfawt, iggaz Ƴaysa ehan n əlxibada ən Kəl-Əlyəhud a daχ-as isasaχru. Isammakləl awen s aytedan aggotnen win das-əssəsammen, har əqqiman gannin: «Mənid d-issan wa daχ awedan aratan win? Ma təmos masnat ta tu-tətawakfat da, as itaggu təlməxujaten? ³ Awak awa wərgəχ əmakras ən nan wa n ag Maryama, əməqqar ən Yaqub əd Yosas əd Yahuda əd Simxon? Wərgəχ šimədrayen-net da da əxsarnen gər-ena da!» Awen daχ a dasan-igdalan a sər-əs əzzəgzənan. ⁴ Inn-asan Ƴaysa: «Ənnəbi wər itəwəlku ar daχ aχrəm wa daχ idwal, əd šəqqaqan-net d aχaywan-nasan.» ⁵ Igdal-as awen a χur-san agu təlməxujaten. Imiranan wər nəggət χas a issəwar ifassan-net, izzozay-tan. ^{6a} Isimakləl sər-əs iba n əzəgzan-nasan.

Əzəmmizəl wa iga Ƴaysa inəttulab win maraw d əşšin

^{6b} Illil Ƴaysa šixarmaten šin əhoznen Nazaret, isasaχru aytedan. ⁷ Əzəl iyyan iχra-du Ƴaysa inəttulab-net win maraw d əşšin, ikf-en tarna fəl kələsuf, a tan-izamazal s əşšin əşšin. ⁸ Omar-tan, inn-asan: «Ad wər tawəyam arət waliyyan daχ əşikəl-nawan, ar tallaq. Ad wər tawəyam allaw, wala aχrəg, wala tefelt daχ nəfdan-nawan. ⁹ Əsəlat iχateman-nawan, amaran ad wər tawəyam sanatat təkadkaden. ¹⁰ Ehan was tənnəftaxam, a tu-wər-təgmədam s iyyan iket təhəm aχrəm wədi. ¹¹ As wər tətawaqbalam, wər itawasasam deχ i batu-nawan daχ adag wədi, as tu-təgammadam təbbikbakam-in əgodrar-net wa iwaran idaran-nawan, ilkəm ad aggayyat awen fall-asan.» ¹² Əqlan nəttulab ad taggin təlxutbat y aytedan fəl ad utaban. ¹³ Takkasan deχ kələsuf aggotnen daχ aytedan, ill-ay widi zaggayan i miranan aggotnen, zuzəyan-tan.

Ƴaysa əd Yaxya wa isalməxan daχ aman

Iduf wa əgan aytedan daχ Ƴaysa

¹⁴ Isla əmənokəl Herod isalan ən Ƴaysa, fəlas sallat-net a tewadat edag kul, amaran gannin sər-əs aytedan: «Awen

Yaxya wa isalmağan dağ aman a d-inkaran dağ tēmattant! Adi a fəl ila tarna n igi ən təlməxjujaten.» ¹⁵ Gannin wiyyad: «Awen ənnəbi İlyas.» Wiyyad deş gannin: «Awen iyyan dağ ənnəbitan win ərəwnen.» ¹⁶ As isla Herod y aratan win tawanninen den əs Ƴaysa inna: «Yaxya wa isalmağan dağ aman was d-əssəfrasax eƳaf-net, ənta a d-inkaran dağ tēmattant.»

Isalan ən tēmattant ən Yaxya wa isalmağan dağ aman

¹⁷ Herod iman-net a omaran s ad attarmas Yaxya, issəkrad-tu, isassag-ay dağ kasaw. Igâ Herod awen fəl əddəlil n azalaf-net Herodəyas təmosat taşur Filibus, amaran Filibus amadray ən Herod en dağ a imos. ¹⁸ Ənta Yaxya iyyəwan tənna i Herod: «Xaram fall-ak ad tərəkəba dağ amadray-nak taşurəs.» ¹⁹ Təzzar təgzar Herodəyas Yaxya fəl awen da, ad təgammay d a dağ-as təkəkəs iman, mişan wər təgrew təməwit n awen, ²⁰ fəlas Herod a iksudan Yaxya. Issân as aləs n alxadil a imos n əmizdag, adi a fəl t-ogaz. Ira ad isasam i batuten-net, mişan ya, i dasnat-isla, ad t-işşəwəş wəllen awa igannu Yaxya.

²¹ Awen dağ a igan, har sər-əs təgraw Herodəyas tarrayt şur aşalay n əzəl wa dağ ihəw Herod. Əzəl wen isassaga dağ-as Herod saksas zəwwəran, migaren-as-du muzaran n əlxəkum-net, əd muzaran ən sojitan-net, d aytedan win əlanen tenbay dağ akal wa n Galilaya. ²² Təggaz-du elles ən Herodəyas ad təggaş. Oggäm Herod əd naftağan-net eweş-net, təzzar inn-as: «Əgməy dağ-i awa tareş kul, a dam-t-akfa.» ²³ Igla har das-ihad, inn-as: «Arat kul wa dağ-i təgmaya, a dam-t-akfa kuddeş iqqal a dər-əm uzana akal-in dağ ammas.» ²⁴ Təgmad, tənna y anna-net «Ma dağ-as z'əgməya?» Tənn-as anna-net: «Əgməy dağ-as eƳaf ən Yaxya wa isalmağan aytedan dağ aman.» ²⁵ Tarmad as du-təqqal təmawat ten əmənokal Herod, tənn-as: «EƳaf ən Yaxya wa isalmağan aytedan dağ aman as əreş a di-tu-takfa əmərədda insâ dağ attabla.» ²⁶ Arat wen işşad iman n əmənokal wəllen, mişan wər ira a das-ugəy fəl əddəlil ən təhuday ta das-iga d əddəlil ən naftağan-net. ²⁷ Issəgla dağ tamazayt ten da iyyan dağ sojitan-net win tu-tagaznen, inn-as a das-d-awəy eƳaf ən Yaxya wa isalmağan dağ aman. Igla soji, ifras-du eƳaf ən Yaxya dağ kasaw. ²⁸ Eway-t-id dağ attabla, ikf-ay i təmawat ten. Tabarart deş təkf-ay y anna-net. ²⁹ As əslan nalkiman ən Yaxya awen, əgla, ədkalan taşəssa-net, ənbalan-t-in.

İsəssəşri d əşşətşi win iga Ƴaysa i tamattay

Ƴaysa əd nəttulab-net

³⁰ Ǝqqalan-du nəmmuzal winad izammazal Ƴaysa da, əssoƳalan-as isalan n arat kul wa əgan, d awa sassaxran aytedan. ³¹ Inna Ƴaysa i nəttulab-net: «Ayewat, akkiwat-anax edag issufan fəl ad tassanfim a əndərran.» Arat wen inn-asan-tu fəlas aytedan win tan-du-tasinen əd win gallinen, a əganen igət, was arat n amazay daƳ ətšan nəttulab-net, da wər t-əgrewan. ³² Təzzar əggazan aƳlal n aman, əgfan, əkkan edag issufan a din-ikitayyen.

³³ Oggan-tan aytedan aggotnen as əgfan, əzdayan-tan. Iga-du uzzal n aytedan daƳ xərman kul win əhoznen den, azzaran-in i Ƴaysa əd nəttulab-net s adag wa əkkan. ³⁴ As d-izzəbbat Ƴaysa aƳlal n aman, inay tamattay tagget, təggaz-tu təhanint-nasan, fəlas əmosan zun ayfəd wər nəla amadan. Təzzar a tan-isasaxru aratan aggotnen.

Ǝššətši ən Ƴaysa səmmos gim n aləs

³⁵ As gəzzul əzəl, əhozan-t-idu nəttulab-net, ənnan-as: «Edag issufan awa, amaran əzəl igla; ³⁶ suxəl tamattay a, ad təgməy id təzzənza a tətša daƳ Ƴawnatan əd taƳarmaten win əhoznen.» ³⁷ Inn-asan Ƴaysa: «Šatšat-tan kawanay iman-nawan da!» Ǝnnan-as: «Awak a tarex ad nədkəl sanatat təmad n ərrəyal n əzrəf wa mallan nazzanzadu šigəlwen ətšan aytedan win?» ³⁸ Inn-asan: «Əssənədu mənəkət təgəlwen təlam.» As d-əssanan awa t-illan əqqalan-t-id ənnan-as: «Səmmosat təgəlwen d əššin kifitan.»

³⁹ Təzzar omar-tan s ad agin aytedan təzunen, səxƳimintan den da daƳ yel. ⁴⁰ Ǝqqiman aytedan əmosan təzunen. Təzunen en šiyyad əmosnat temeday temeday n awedan, šiyyad əmosnat səmmosat səmmosat təmərwen. ⁴¹ Amaran idkal Ƴaysa səmmosat təgəlwen šin den d əššin kifitan win, iggəzzay ijənnawan, iga igodan i Məššina, ikaramkaram šigəlwen šin den, ikf-enat i nəttulab-net y a tanat-uzanan i tamattay. Ǝzunan-asan deƳ kifitan winad n əššin a. ⁴² Ǝtšan aytedan en ketnasan har əyyəwanan. ⁴³ Ǝššədawan-du nəttulab ən Ƴaysa awa d-iqqiman daƳ təgəlwen əd kifitan, ədkaran daƳ-as maraw əzmaman d əššin. ⁴⁴ Ǝddukad ən səmmos gim n aləs a əhanen tamattay ta tətšat den.

Teklay ən Ƴaysa fəl aman

⁴⁵ Wala a ihogan omar Ƴaysa inəttulab-net s ad əggəzan aƳlal n aman, izaran-as-in əs təgadamayt ta hadat n agaraw əs təxrəmt ta n Betsayda, iket di ad itasallam tamattay. ⁴⁶ Issəgla tamattay Ƴas, ikka adƳax iyyan y a fall-as agu šiwatriwen. ⁴⁷ As iga ahad, aƳlal n aman wa əhan nəttulab

ən Ƴaysa isigaraygaray daɣ agaraw, Ƴaysa amaran ənta iwâr adɣaɣ ɣas-net itattar. ⁴⁸ Ogg-en əbbillanan d əsəgli n əɣlal fəl aman, fəlas aɗu a dər d-əmməqqasan. As təga tilkamat n ahad ikk-en-du Ƴaysa ijiwankat fəl aman. As zama tan-okây, ⁴⁹ oggan-tu ijiwankat fəl aman, əɣilan aggəsuf, sakkarayan. ⁵⁰ Ketnasan issirmaq-qan anay wa t-əgan. Mišan tamazayt ten da a dasan-iššewal Ƴaysa innasan: «Ad wər təɣšədam, nak awa! Təgmədet-kawan tasa!» ⁵¹ Iggaz-du fall-asan aɣlal ɣas, idrar aɗu. Iga sər-san awen əsəmməkləl labasan, ⁵² fəlas wər əgren almayna ən təməɣjujat ta iga Ƴaysa əs təgəlwen id iwallan-nasan a garmomnen.

Ʒuzəy ən Ƴaysa imiranan daɣ akal ən Ganazaret

⁵³ As əɣrasan agaraw, ewadan akal ən Ganazaret, əndayan aɣlal n aman daɣ təšəšwit. ⁵⁴ Ʒgmadan aɣlal n aman ɣas, əssanan aytedan as Ƴaysa awen. ⁵⁵ Təzzar ozalan daɣ akal ketnet, edag as əslan as ih-ay a sər-əs du-tawəyan imiranan daɣ təssəwen. ⁵⁶ Edag osa Ƴaysa, gər za aɣrəm wala taɣrəmt wala iɣawnatan n əsuf, a d-awəyan aytedan imiranan s adag wa imosan asammanay, ansəyan Ƴaysa ad ayyu aytedan ədəsan kuddeɣ təbənək ən təkadkat-net. I tat-idasan deɣ ad izzəy.

7

Tazdak d ammadas

Alwajiban ən Məššina d ammadas

¹ Ʒddewan Farisaytan ɣur Ƴaysa əntanay d arat daɣ musanan n Ʒttawret a d-əgmadnen Yerusalem. ² Ʒnayan arat daɣ nəttulab ən Ƴaysa tattin əs fassan əmmidasnen, almayna wər nərrud.

³ Ʒnta Farisaytan əd Kəl-Ʒlyəhud kul wər tətinn iket wər əššoradan ifassan-nasan har təɣəmmar, imos awen alɣadat ən marawan-nasan. ⁴ Wər tətinn deɣ as d-əgmadan assamanay n aytedan, iket wər əzzəzdagan. Ʒttâfan deɣ šiyyad alɣadaten aggotnen, əmosnen əzəzdəg ən kassan, əd təkən, əd təɣeren əd təssuwen šin daɣ tattin. ⁵ Adi a fəl əssəstanan Farisaytan əd musanan n Ʒttawret Ƴaysa, ənnan-as: «Mafəl wər əlkeman nəttulab-nak y alɣadaten ən marawan-nana, tattan əs fassan əmmidasnen?» ⁶ Innasan Ƴaysa: «Elmunafiqan! Tidət a imos awa sər-wan inna ənnəbi Isayas s əmmək was itiwaktab as: "Tamattay ta, iləs ɣas as di-təssəɣmar, mišan iwallan-nasan əggugan-i wəllen. ⁷ Ʒlyibada wa di-taggin, ibbinnan, fəlas wər səsəɣrin ar alwajiban a d-ənzaman aytedan daɣ ɣafawan-nasan."

⁸ Emmək en da a tögam kawanay da, toyyam alwajiban ən Məşşina, təlcamam y alğadaten n aytedan.» ⁹ Inn-asan Ҷaysa deх: «Şiyyit tolâхat a tögam y alwajiban ən Məşşina, fəl ləkkum y alğadaten-nawan! ¹⁰ Wəргех ənnəbi Musa a inna: "Səymər abba-nak d anna-nak" inna deх: "Awedan wa işaffaraşşen abba-net, madeх anna-net, wədi a daх-as təwəkkəsan man."» ¹¹⁻¹² Mişan kawanay tögannim: «Ifrâğ awedan ad annu y abba-net madeх anna-net: "Tadhəlt tas daх-i tögam ənnəyat-net, əssəwaraq-qat aganna təmos ađdawal." Daх adi awedan wədi wər tu-toyyem s amaknaw n arat y abba-net wala anna-net. ¹³ Təməwit tədi da as tögam alğadat-nawan daх adag n Awal ən Məşşina, təsasaxrim-tat i bararan-nawan. Tətaggim deх wiyyad aratan aggotnen şilat n adi.»

Ammadas wa n tidət

¹⁴ As iga Ҷaysa batu ten i Farisaytan əd musanan n Əttawret, iyra tamattay, inn-as: «Səsəmat-i ketnawan, tagrim awa dawan-z-anna da. ¹⁵ Wər t-illa arat itaggazan taхəssa n aggadəm, ifrâğan əsəmmədəs-net. Kalar awa t-id-igammadan a tat-isamadasan. ¹⁶ Wa isallan, aslet!»

¹⁷ As imməzzay Ҷaysa əd tamattay, iggaz ehan, əssəstanan-tu nəttulab-net d almaхna n iggi wa iga den. ¹⁸ Inn-asan: «Awa zaхnin kawanay da, wər təlem əgərri? Wər təgrem as, wər t-illa arat itaggazan taхəssa n aggadəm ifrâğan əsəmmədəs-net, ¹⁹ fəlas wəргех əwəl-net a itaggaz. Kalar tadist-net a itaggaz, dəffər adi inхəl-in daх əsuf.» Emmək wa da as issəxlal Ҷaysa imensewan kul. ²⁰ Inn-asan deх: «Awa d-igammadan əwəl n aggadəm, ənta a t-isamadasan, ²¹ fəlas əwəl n aggadəm a du-gammadnat arak ənnəyaten a tu-tawaynen s igi ən tədoden madeх igi ən meddan əd şikra, d igi ən man, ²² d igi n əzzəna, əd tara n əddənet, əd tişit n amaksan, əd təkaddilt, d igi n aratan win ogarnen taxxaramt, əd manjaх, əd şizmit, d ədkul ən man, əd təmətəkwəyen kul şin iba ən təla n almaхna. ²³ Aratan win di labasnen kul əwəl n aggadəm a du-gammadan, amaran əntanay a tu-samadasnen.»

Ҷaysa əd təntut iyyat wər nəmos təlyəhut

²⁴ Ifal Ҷaysa edag wen ikka amađal ən Tir. Os-in Ҷas iggaz ehan iyyan, fəlas wər ira a fall-as tagu masnat; mişan indar-as ad aqqam wər fall-as təga masnat. ²⁵ Kalar iraz-in Ҷas təsl-ay təntut iyyat təlât tabarart iha aggəsuf, təkka-ay-du, təssəjad-as. ²⁶ Təntut ten wər təmos iyyat daх Kəl-Əlyəhud, ələsəl-net Kəl Fenisəya əd Kəl Surəya. Tənsay

Ȳaysa a das-ikkəs aggəsuf daȲ tabarart-net. ²⁷ Təzzar inn-as Ȳaysa: «Ayyu bararan ad ayyawanan təzzar, fəlas wər oley i daw-san idkalan amensay-nasan igər-t-in i ɗan.»
²⁸ Tənn-as təntut: «Tidət-nak Əməli, mišan ya, ɗan da əkəmmi a taggin awa d-irattakan daȲ bararan, tattin-tu.»
²⁹ Inn-as Ȳaysa: «Aglu, təqqəlaȲ aȲaywan-nam; tabarart-nam igmad-tat aggəsuf fəl əddəlil ən batu ta di-təge da.»
³⁰ Təqqal aȲaywan-net, tos-in tabarart-net təzzilallat daȲ tessat, igmâd-tat aggəsuf, təzzây.

Əzuzəy wa iga Ȳaysa aləs immizagan, indây deȲ iləs-net

³¹ Dəffər adi igmad Ȳaysa akal ən Tir, irzag Sidon os-in akal wa n Galilaya iga sər-əs tarrayt ta təmmarat akal Wa-n-Maraw-Ȳərman. ³² Den daȲ a sər-əs d ewayan aytedan aləs immizagan, as indây iləs-net. A tu-tansayan y ad t-issəwar ifassan-net, izzuzəy-tu. ³³ Iddew dər-əs Ȳaysa, igmad dər-əs aytedan, təzzar iga idədwan-net daȲ təməzzugen n əmzag en, dəffər adi issəwar-tan imətman-net, idas sər-san iləs n əmzag en. ³⁴ Amaran iggəzzay Ȳaysa ijənnawan, ihanaffat, inn-as: «Effata!» Almayna: Nuləm. ³⁵ Tamazayt tenda a daȲ ənnolamnət təməzzugen n əmzag en, itawayya-du iləs-net, iššewal s iləs isrâdan. ³⁶ Dəffər awen omar Ȳaysa aytedan s ad wər əmelan awa igan den y awedan waliyyan, mišan iket itamar-tan s awen sanahalan-tu emel. ³⁷ Iga sər-san awen əsəmməkləl labasan, gannin: «Awa itaggu kul iknâ əlluȲ. Wala imzagan issəsl-en, iššašawal deȲ win as əndayan ilsawan-nasan.»

8

Əšətši wa iga Ȳaysa əkköz gim n aləs

¹ Adan en da a daȲ təlas tamattay tagget tiddawt fəl Ȳaysa. Tamattay en wər təla a tətša. Iyra Ȳaysa inəttulab-net, inn-asan: ² «Aytedan a təh-i təhanint-nasan. Karad adan a Ȳur-i əgan, amaran ab'as t-illa a ətšan. ³ As tan-əssoka iȲawnatan-nasan wər əreman arət, a tan-aggadlu gələk daȲ tarrayt, id wiyyad daȲ-san igəg a d-əgmadan.»
⁴ Ənnan-as nəttulab-net: «Məni du-z-igrəw awedan daȲ əsuf a šigəlwen siyyawannen tamattay togdât d awa?»
⁵ Issəstan-tan Ȳaysa, inn-asan: «Mənəkət təgəlwen təlam?»
 Ənnan-as: «Əssayat.» ⁶ Omar Ȳaysa tamattay s ad təxrəd təximit. Idkal-du əssayat təgəlwen šin, iga igodan i Məššina, i karamkaram-tanat, ikf-enat i nəttulab-net y a tanat-uzanan i tamattay en. Əzunan-asan-tanat. ⁷ Əlân deȲ arət ən kifitan win madrornen. Iga Ȳaysa igodan i Məššina inna i nəttulab-net, a tan-uzanan əntanay da y aytedan.

⁸ Aytedan en əyyəwanan əglazan-du, har as əssa əzmaman win zawwarnen a du-tawadkarnen daɣ karammutan win d-əglazan. ⁹ Əddukad n əkkoz gim n aləs a ətšanen den. As tətša tamattay, issəllam-tat Ƴaysa. ¹⁰ Tamazayt ten da a daɣ iggaz aɣlal n aman ənta əd nəttulab-net, ikka akal ən Dalmanuta.

Agamay ən Farisaytan daɣ Ƴaysa a dasan-agu təlməxjujat

¹¹ Osan-du arat daɣ Farisaytan, maşawalan dər-əs, gammayan daɣ-as təlməxjujat təmosat alɣalamat a du-təfâlat Məşşina, imosan awen jarraba-net. ¹² Iga Ƴaysa təhənəffet zagret, inna: «Mafəl gammayan aytedan n azzaman win təlməxjujat a du-təfâlat Məşşina? Əggəyyeɣ əsilakanax-awan as, wər ilkem a dawan-tətiwagga təlməxjujat waliyyat.» ¹³ Təzzar ifal-tan, ilas iguz n əɣlal n aman, ikka əsəlim wa hadan n agarew.

Əsəmmətər ən Ƴaysa inəttulab-net

¹⁴ Əttəwan-in nəttulab a d-awəyan allaw ən təgəlla. Tagəlla iyyadda ɣas a təhat aɣlal-nasan. ¹⁵ Isəmmatar-tan Ƴaysa, inn-asan: «Ənkədat wəllen i xamira ən Farisaytan əd wa n əmənokəl Herod!» ¹⁶ Ad tinəmənənin nəttulab-net gar-essan: «Awa wər t-inna ar fəlas wər nəla tagəlla.» ¹⁷ Issan Ƴaysa daɣ awen, inn-asan: «Mafəl təşşewalam daɣ iban təla-nawan tagəlla? Awak əgərri a wər təgem harwa da? Awak iwallan-nawan a əganen taɣart tas ab'as təgərrim? ¹⁸ Awak şittawen a wər təlem əs tənayam, wala deɣ şiməzzugen əs təslam? Awak tatawt a din-təgam ¹⁹ iket n əzmaman a du-tədnayam daɣ karammutan win du-təglaz tamattay assaxa wad əzunax səmmosat təgəlwen i səmmos gim n aləs?» Ənnan-as: «Nəkittəw as maraw əzmaman d əşşin a du-nədnay. ²⁰ Şigəlwen şin əssayat za, şin əzuna y əkkoz gim n aləs, mənəket əzmaman a du-tədnayam daɣ karammutan win du-tawaglaznen?» Ənnan-as: «Əssa.» ²¹ Amaran inn-asan: «Eges harwa da wər təgrem wala?»

Əzuzəy ən Ƴaysa əmədderɣəl iyyan

²² Os-in Ƴaysa ənta əd nəttulab-net taɣrəmt ən Betsayda. Əlwayan-du sər-əs aytedan aləs n əmədderɣəl, onsayan-tu ad t-idəs izzuzəy-tu. ²³ İbaz Ƴaysa əfus n əmədderɣəl en, ilway-tu har dər-əs igmad taɣrəmt. İssəwar imətman-net şittawen-net, issəwar-tu ifassan-net, inn-as: «Awak təhannayax arat meɣ?» ²⁴ İdkal əmədderɣəl eɣaf-net, inna: «Hannayax aytedan, mişan olân-i d eşkan jiwankatnen.» ²⁵ İlas Ƴaysa əsəwər ən fassan-net şittawen n əmədderɣəl en. İqqal-t-id asawad-net ketnet, izzay, innəflay daɣ arat

kul. ²⁶ Issəlləm-tu Ƴaysa inn-as: «Ad wər təqqəla taɣrəmt ten, aglu akku aɣaywan-nak.»

Ƴaysa itawassan as Ǝlməsix a imos

²⁷ Dəffər awen iddew Ƴaysa əd nəttulab-net əkkan šixarmaten əhanen amaɖal as itawannu Qaysarəya wa n əmuzar Filibus. Ǝɣlən as tan-issəstan Ƴaysa, inn-asan: «Ak daɣ iduf n aytedan, ma əmosa?» ²⁸ Ǝnnan-as: «Wiyyad a gannin Ƴaxya wa isalmaɣan aytedan daɣ aman a təmosa, wiyyad a gannin ənnəbi Ilyas, wiyyad deɣ a gannin iyyan daɣ ənnəbitan.» ²⁹ «Kawanay za, ma tənnam ma əmosa?» Inn-as Butros: «Kay a imosan Ǝlməsix.» ³⁰ Issənkad-tan Ƴaysa inn-asan: «Tidət a imos adi mišan a tu-wər-təməlam y awedan waliyyan.»

Iki ən Ƴaysa Yerusalam

Ǝtəməl wa azzaran n aɣazab wa z'inəy Ǝlməsix ən Məššina

³¹ Den da ad issənta Ƴaysa əsəssəɣri ən nəttulab-net, inn-asan: «Nak Ag Aggadəm, kundaba ənaya aɣazab aggen, unkaran-i muzaran ən Kəl-Ǝlyəhud əd muzaran ən limaman əd musanan n Ǝttawret, təwəggin man-nin, ənkara-du deɣ daɣ təmattant əzəl wa n karad.» ³² Ig-asan i batu en igi isisagran wəllen. Təzzar iwət-tu Butros s ahal, iššewal fall-as fəl awa inna den. ³³ Mišan imalallay fall-as Ƴaysa, iswad daɣ nəttulab-net win hadatnen, iharaššat Butros, inn-as: «Ǝfəl dəffər-i, Aššaytan, fəlas imedranan-nak, wərgəɣ Məššina a d-əfalan, kalar imedranan n aggadəm ɣas a əmosan.»

Ləkkum i Ƴaysa Ǝlməsix

³⁴ Dəffər awen iɣra-du Ƴaysa tamattay əd nəttulab-net, inn-asan: «Wa iran a di-ilkəm, wədi igmədet tara ən man-net, agu imateran-net, idkəl təgəttawt-net, ilkəm-i. ³⁵ Ǝssənət as awedan wa wər nəgəmməy ar aggaz ən man-net, wədi ad t-əgmədan, mišan wa iqbalan ad t-əgmədan fəl əddəlil-in d əddəlil n Ǝlinjil, wədi ad iɣləs. ³⁶ Ma z'aknu y awedan ad igrəw əddənət ketnet, ənta amaran temsay a ikka? ³⁷ Awak mas ifrag awedan tehakkay-net y a sər-əs agəz iman-net daɣ təmsay? ³⁸ Awedan kul wa isakkarakad ləkkum y-i, madəɣ isikarakad-tu əsuxəl n awal-in daɣ azzaman win, daɣ iggət iba ən təksəda ən Məššina, wədi nak da, Ag Aggadəm, a di-təsəkkərukəd əlqəbulat-net əzəl wa du-z-əqqəla ələɣ tanaya n Abba-nin, əddewa d angalosan a zaddoggen.»

9

1 Ilas ʒaysa inn-asan: «Əggəyyeḡ silakanax-awan as, wiyyad daḡ-wan əbdâdnen da, wər tan-z-iba wər ənayan assa ən Taḡmar ta n Məşşina igân əs tarnâ.»

Ənəfilal ən tanaya ən ʒaysa Əlməsix

Tanaya ən ʒaysa Əlməsix

2 Sədis adan dəffər awen, iḡra-du ʒaysa Butros əd Yaḡub əd Yaxya, iddew dər-san əntanay ḡas s ədḡax iyyan zagren. Əllân den da, as imməttay azzahir ən ʒaysa dat-san. 3 Malawlawan səlsa-net. Əgan təməllay təsiraqqet wəllen əs kala wər tətawanay şilat-net daḡ əddənet. 4 Təzzar oggan ənnəbi Ilyas d ənnəbi Musa, mişawalan əd ʒaysa. 5 İggad-du Butros inna i ʒaysa: «Əşşex, olâḡ as nəlla da! Ad nəkrəs karad həktan. İyyan i-nak, iyyan in Musa, iyyan in Ilyas.» 6 Wər din-igra Butros axaras wa iga den fəl awa iga daḡ tərəmmeḡ ənta əd nəttulab win hadatnen. 7 Tamazayt ten da a dənnəḡ-san du-tənafalal təḡarak, təls-en telay-net; təzzar iga-du awal daḡ tagarak en da, inna: «Awa Barar-in wa əkney tara, səsəmat-as.» 8 Wala a ihogan, waraxwaraxan nəttulab, wər hənnəyan awedan waliyyan a ḡur-san illân ar ʒaysa.

Assa n Ilyas

9 Tazabben-du adḡax en da as dasan-inna ʒaysa: «Ad wər təməlam awa tənayam da y awedan waliyyan iket wər d-ənkera nak Ag Aggadəm daḡ təmattant.» 10 Əttafan tarḡəmt ta dasan-iga den, mişan tinəməsəstinan ḡər-essan d awa issoka ʒaysa əs «tanakra daḡ təmattant» ta imal den. 11 Əssəstanan-tu, ənnan-as: «Mafəl gannin musanan n Əttawret: "Kundaba osa-du Ilyas təzzar as du-z-asu Əlməsix?"» 12 Inn-asan: «Tidət-nasan as kundaba osa-du ənnəbi Ilyas təzzar, annazzam aratan kul; mişan ya, mafel iktâb as Ag Aggadəm kundaba inay alyazab aggen, itəwəsəknu məkka? 13 A kawan-əssusənaḡ âs ənnəbi Ilyas osâ-du, amaran əḡân-as aytedan arat kul wa əran, imos as awen da a iktaban daḡ batu-net.»

Əzuzəy ən ʒaysa barar iha agḡəsuf

14 As d-iqqal ʒaysa əd nəttulab-net win karad ogga inəttulab-net win hadatnen təḡilayḡalay-tan tamattay tagget, tənḡâr tamazaḡ ḡər-essan əd musanan n Əttawret. 15 Togga tamattay ʒaysa ḡas, isammaklal sər-san awen, ozalan sər-əs a tu-saslaman. 16 Inna ʒaysa i nəttulab-net: «Ma dər-san təmməzaḡam?» 17 Inn-as aləs iyyan daḡ tamattay en: «Əlfəqqi, ewâya-du sər-ək barar-in iha

aggəsuf labasan, indâyan iləs-net. ¹⁸ As day-as d-inkar, a t-aggadlu, ad isakafkaf isamakyak, təzzar issəf. Ægmâya day nəttulab-nak a day-as t-əkkəsan, mišan indar-asan» ¹⁹ Inn-asan Yaysa: «Xa! Iket iba n əzəgzan day aytedan n azzaman a! Awak har əmmay əddewa dər-wan, zizaydar dər-wan? Awəyat-i-du barar.» ²⁰ Təzzar ewayan-as-t-id. Da da ɣas ad inay aggəsuf Yaysa, ənta ad izazzakarkar barar, ifataqqat, ad itizəbərdil, isakafkaf. ²¹ Issəstan Yaysa abba ən barar, inn-as: «Əmmay du-t-igaz awa šin agaraw?» Inn-as: «Harwa mədrəy. ²² Əyyəwan-tu aggəsuf təməgirt day təmsay madex aman y ad t-anɣu. Kud təfrəgax a təkneɣ day awa, təhənəttex-ana, tilalax-ana.» ²³ Inn-as Yaysa: «Kud təfrəga ya? Arat kul əfragax igi-net i wa sər-i izzəgzanan.» ²⁴ Idkal abba ən barar əməsli-net day tamazayt ten da, inna: «Əzzigzanax, agəz-i day iba n əzəgzan.» ²⁵ As inay Yaysa uzzal ən tamattay iggād-du sər-əs, iharašsat aggəsuf, inn-as: «Aljayn wa igaddalan awal, izamazag, omaraq-qay s ad təgməda barar di; amaran a tu-wər-tələsax iguz!» ²⁶ Izyak aggəsuf, iga i barar en əzəzzəkərkər labasan, amaran igmad-tu. Wər iha adag barar en itimətəkwəyan, zun t-aba, har ənnan aytedan aggotnen: «Aba-tu.» ²⁷ Mišan ibaz-t-id Yaysa s əfus, issənkar-t-id, ibdad barar.

²⁸ As iggaz Yaysa ehan iyyan, əssəstanan-tu nəttulab-net wər iqqim awedan waliyyan, ənnan-as: «Aljayn wa n ihogan, mafel indâr-anax ikus-net day barar en?» ²⁹ Inn-asan: «Əzzənəf n aggəsuf wen, wər t-itəkkəs ar šiwatriwen.»

Ətəməl wa n əššin n alɣazab wa z'inəy Əlməsix ən Məššina

³⁰ Igmad Yaysa edag wen ənta əd nəttulab-net, ərzagan akal ən Galilaya, mišan wər ira ad issən awedan waliyyan dad illa, ³¹ fəlas əsəssəɣri a itag inəttulab-net. Igann-asan: «Nak Ag Aggadəm əjwâra ad əggâzax ifassan n aytedan, agin iman-in, mišan karad adan dəffər iba-nin, a d-ənkəra day təmattant.» ³² Mišan wər əgren nəttulab-net batu ta dasan-iga den, amaran tah-en tasa n əsəstan-net.

Adkul wa n tidət

³³ Ewad-in Yaysa ənta əd nəttulab-net aɣrəm ən Kafar-nahum. Əggazan-in ehan ɣas issəstan-tan, inn-asan: «Ma təmməzaxam day tarrayt?» ³⁴ Wər das-ənnen arat, fəlas tamazaq a əgan gər-essan day tarrayt, ərân ad əssənən wa day-san ogaran. ³⁵ Iqqim Yaysa, inna i nəttulab-net win maraw d əššin a t-id-ihazan, inn-asan: «Wa day-wan iran

tizart, iwâr-tu ad agu iman-net daw aytedan kul, aget iman-net akli-nasan.» ³⁶ İbaz-du Ƴaysa əfus n arat ən barar iyyan ilân den, issəbdad-tu gar-essan, ibaz-t-id izalammat-tu, inn-asan: ³⁷ «I iqbalan barar şilan wa fəl əddəlil-in, wədi nak iman-nin as di-iqbal; wa di-iqbalan deƷ, wərge nak a iqbal, wa di-d-izammazalan a iqbal.»

I wər nəgəmməy təkma-nana, wədi əmidi-nana a imos

³⁸ Inn-as Yaxya: «Əşşex, nənây aləs iyyan itakkasan kələsuf daƷ aytedan s esəm-nak, nənn-as a wər iləs igi n awen, fəlas wər danaƷ-iha əs ləkkum y-ak.» ³⁹ Inn-as Ƴaysa: «A das-wər-təgdəlam igi n adi, fəlas wər t-illa awedan as z'agin təlməƷjujat s esəm-in, annu sər-i a labasan dəffər adi. ⁴⁰ I wər nəgəmməy təkma-nana, wədi əmidi-nana. ⁴¹ Amaran əggəyyeƷ silakanaƷ-awan as, i kawan-işşəşwan wala ablu n aman fəlas a kawan-iwar esəm n Əlməsix, wədi illikan as ad igrəw arozan-net.»

Ləkkum i Ƴaysa Əlməsix

⁴² «I iqqalan əssəbab n abakkad y iyyan daƷ aytedan win sər-i əzzəgzannen, əmosnen zun bararan madrornen, wədi of-as ad itəwəqqən əzəzəd zəwwəran ən təhunt daƷ iri-net itəwəgər-in daƷ agaraw əmazal wa iga əddi. ⁴³⁻⁴⁴ Kud kay əfus-nak a ibukan a dak-iqqəl əssəbab n igi n abakkad, təfrəsaq-q-in; id of-ak ad təggəza aljannat təgeƷ əfus, y ad təleƷ əşşin fassan təggəzaƷ temsay an Jahannama. ⁴⁵⁻⁴⁶ Kud deƷ adar-nak a ibukan a dak-iqqəl əssəbab n igi n abakkad, təfrəsaq-q-in; id of-ak ad təggəzaƷ aljannat təgeƷ adar y ad təleƷ əşşin daran təggəzaƷ temsay an Jahannama. ⁴⁷ Amaran kud şat-nak a təkukat a dak-təqqəl əssəbab n igi n abakkad, təkəkkərəq-qat-du; id of-ak ad təggəza TaƷmar ta n Məşşina təgeƷ şat y ad təleƷ sanatat şittawen, tətəwəgəra dər-əsnat daƷ təmsay an Jahannama, ⁴⁸ təmosat edag as wərmad tamattatnat təwəkkawen-net, wala deƷ temsay-net.»

⁴⁹ «Awedan kul ad itəwəzəzdəg əs təmsay, zun d əmmək as tətəggaz tesəmt imensewan fəl a tan-təggəz tenbay. ⁵⁰ Tesəmt arat olâƷan a təmos, mişan as tat-təgmad tenbay-net, awak ma imos arat wa daƷ-as z'itəwəggin təqqəl-tat-du? Təqqəlet təməddurt-nawan a ilân tenbay zun tesəmt, amaran iməlet alxer gar-ewwan.»

10

İsalan n əməzzəy

¹ Ifal Ƴaysa edag wen ikka akal ən Yahudəyya ihân aganna wa hadan n agarew wa n Yordan. Təlas fall-as tamattay tiddawt, a tat-isasaxru imos awen arat itaggu faw da. ² Əhozan-t-in Farisaytan əgan-as əsəstan imosan tənagmayt, ənnan-as: «Awak xalal y aləs ad izəmməzzəy tantut-net meɣ wər xalal?» ³ Inn-asan Ƴaysa: «Mas imos alwajib wa dawan-d-oyya Ənnəbi Musa daɣ batu tədi?» ⁴ Ənnan-as: «Ənnəbi Musa ikfâ turagat n ad tətəwəktəb širawt n əməzzəy i təntut, tətəwəzəməzzəy.» ⁵ Inn-asan Ƴaysa: «Aššaddat ən taggarmamt ən wallan-nawan a fəl dawan-d-oyya Musa alwajib wədi. ⁶ Dər iga awen da ya, əs tizarat as d-ixlak Məššina əddənet, "ixlak-du aytedan, ixlak-kan-du əmosan yay əd təntay."

⁷ Adi da a fəl iffâl aləs abba-net d anna-net, irtəy əd təntut-net,

⁸ əqqəlan fəl əššinessan arat iyyanda.

Əmmək en daɣ as ad ib-as əmosan əššin aytedan, kalar ad əqqalan taɣəssa iyyadda.

⁹ Daɣ adi, awa issərtay Məššina a tu-wər-izəmməzzəy awedan.»

¹⁰ As iggaz Ƴaysa ehan, əssəstanan-tu nəttulab-net əntanay da əd batu ten. ¹¹ Inn-asan: «I izamməzzayan tantut-net, izlaf iyyat, wədi əzzəna a iga əddi. ¹² Tantut deɣ ta təmməzzayat d aləs-net, izlaf-tat iyyan, ənta da əzzəna a təga di.»

Bararan əd Taymar ta n Məššina

¹³ A du-tawayan aytedan bararan əs Ƴaysa fəl a tan-issəwər ifassan-net ittər-asan, mišan əššewalan nəttulab fəl aytedan win den. ¹⁴ Inay Ƴaysa awen ɣas iššak-ku, inn-asan: «Ayyiwat bararan a di-d-akkin. A tan-in-wər-təwəɣam fall-i, fəlas Taymar ta n Məššina šin aytedan win šilaten-nasan. ¹⁵ Əggəyyeɣ əsilakanax-awan as, i wər nəga i Taymar ta n Məššina əlqəbulat šilat ən ta das-iga barar, wədi wər das-ilkem a tat-iggaz.» ¹⁶ Təzzar ad itizələmmit Ƴaysa bararan win den, isawar-tan ifassan-net, itattar-asan.

Aləs n əməgğergəs əd Taymar ta n Məššina

¹⁷ As zama imitakway Ƴaysa daɣ adag wen iraz-du sər-əs aləs iyyan sər-əs d-ozâlan, igaraffat dat-əs, inn-as: «Əššex olâɣan, mas di-iwar igi-net y ad əgrəwa təməddurt ta təɣlalət?» ¹⁸ Inn-as Ƴaysa: «Mafel as di-təgannaɣ Əššex olaɣan? Wər t-illa i olâɣan ar Məššina. ¹⁹ Alwajiban-net təssânaq-qan, ih-en as: "Ad wər tagay iman, ad wər

tagax əzzəna, ad wər takəra, ad wər taggayyex əs bahu, ad wər taga təkma y awedan, səxmər abba-nak d anna-nak.»²⁰ Inn-as aləs wen: «Əlfəqqi, aratan win di kul harwa da mədrəya as tan-əssəbdada.»²¹ Təzzar idak-ku Yaysa s asawad təha tara, inn-as: «Arat iyyanda a dak-in-iqqiman əmərədda: Aglu zanz-in təla-nak kul, takfay inazzan-net i tələqqawen, ad təgrəwax ərrəzəx a dak-zansin dəx alaxirat. Dəffər adi amaran tagla-du təlkəməx-i.»²² Isla aləs en i batu ten xas, izakkanzar. Inkar, igla əxşadan man-net fəlas ərrəzəx aggen a ila.

²³ Issəlal Yaysa asawad-net tamattay ta tu-təxalayxalayayt den, amaran inna i nəttulab-net: «Iket əzzəwi ig-ay iguz ən Taymar ta n Məşşina fəl win əggərgasnen.»²⁴ Batu ten, təqqan iyafawan ən nəttulab-net, ilas Yaysa inn-asan: «Bararan-in, iket əzzəwi ig-ay iguz ən Taymar ta n Məşşina!»²⁵ Ogar tərğasay ta iga fəl ałam araday dəx təbuday n ənazmay, i ta iga fəl əməggərgəs iguz ən Taymar ta n Məşşina.»²⁶ Batu ta təsammaklal wəllen əs nəttulab, təzzar ad tinəmənnin: «Adi za ma ifragan ad ixləs dəx təmsay?»²⁷ Iswad dəx-san Yaysa inna: «Muxal a imos adi xur aytedan, mişan Məşşina wər sər-əs t-imos, fəlas arat kul ifrək-ku.»

Alak wa z'igrəw ənalkim ən Yaysa

²⁸ Təzzar inn-as Butros: «Nakkanay za? Awak wərgəy noyya arat kul nəlcam-ak?»²⁹ Inn-asan Yaysa: «Əggəyyex silakanax-awan as, awedan kul wa ifalan fəl əddəlil-in d əddəlil n Əlinjil ehan-net madəx imədrayan-net madəx şimədrayen-net madəx anna-net madəx abba-net madəx bararan-net madəx şiwəgas-net,³⁰ wədi awedan ad igrəw harwa da əmərədda, temeday n ənətfus ən nan madəx imədrayan madəx şimədrayen madəx annaten madəx bararan madəx şiwəgas. Amaran adi ketnet ad t-igrəw iddew-as d alyazab, igrəw dəx təməddurt təxləlat dəx alaxirat.»³¹ Amaran a aggen dəx win əhanen eɣaf əmərədda, ilkâm ad əggəzan ələqqam, win əhanen ələqqam dəx əmərədda, ilkâm a əggəzan eɣaf.»

Ətəməl wa n karad n alyazab wa z'inəy Əlməsix

³² İha Yaysa tarrayt ənta əd nəttulab-net, azzar-asan, taggazzayan əs Yerusalam. As itaggu awen əşşiwaşan nəttulab-net, taha dəx tasa aytedan win das-əlkamnen. İlas Yaysa ikus ən nəttulab-net win maraw d əşşin dəx aytedan y a dasan-iməl arat a fall-as z'agin dəx alwaq wər nəggug.³³ Inn-asan: «Səsəmat: Nakkanay da əggəzzaynen əs Yerusalam da. Den da ad za təwəgga nak Ag Aggadəm dəx

fassan ən muzaran ən limaman, əd musanan n Əttawret. Aytedan win a di-əxkəman təmattant, agin-i daɣ fassan n aytedan wər nəmos Kəl-Əlyəhud, ³⁴ a daɣ-i tajaban, əssutəfan fall-i, ayyawanani-šiwuit, agin iman-in, mišan a d-ənkəra daɣ təmattant əzəl wa n karad.»

Əsəssəyri igân daɣ batu ən tizart

³⁵ Ənkaran nəttulab əşšin win maddanəs ən Zabaday əmosnen Yaqub əd Yaxya, əhozan-du Ƴaysa, ənnan-as: «Əşşex, a daɣ-ak nəgməy arat as nəra a danaq-qu-taga.» ³⁶ Inn-asan: «Mas tərəm a dawan-t-aga?» ³⁷ Ənnan-as: «Nəra daɣ-ak ad aqqam iyyan daɣ-na daɣ əxil-nak, aqqam wa hadan daɣ zalgat-nak alwaq wad za təggəza tanayana-nak.» ³⁸ Inn-asan Ƴaysa: «Wər təssenam almaɣna n arat wa təgməyam əddi. Awak təfragam a dər-i tədrəwam alɣazab wa z'aga daɣ alwaq wər nəggug?» ³⁹ Ənnan-as: «Awalla, nəfrâg a dər-ək tu-nədrəw.» Inn-asan: «Tidət a imos as təfrâgam a dər-i tədrəwam alɣazab wa, tagim deɣ təmattant ta z'aga. ⁴⁰ Amaran daɣ batu ta təqqalat wa z'aqqamin daɣ əxil-in wala zalgat-in, wərgex nak a t-ihakkin. Kalar idaggan win in win as tawasammatagan.»

⁴¹ Əslan maraw nəttulab win hadatnen y awen, əşşakkan Yaqub əd Yaxya. ⁴² Təzzar iyr-en-du Ƴaysa inn-asan ketnasan: «Təssânam as aytedan win tawattafnen daɣ tişit ən muzaran ən təmattiwen saknin tarna y aytedan win as azzaran, amaran aytedan win daɣ-san attafnen əlxəkum saknin aytedan win as azzaran taɣmar. ⁴³ Mišan kawanay ad wər tagim adi gar-ewwan. Kalar as ira iyyan daɣ-wan ad ilu almaqam, wədi iqqəlet zun amaşşaxal-nawan. ⁴⁴ Amaran wa daɣ-wan iran tizart, wədi iqqəlet zun akli n awedan kul, ⁴⁵ fəlas nak Ag Aggadəm wər d-oseɣ əddənet y a di-əşxəlan aytedan. Kalar assa a d-əge y ad əşxəla y aytedan, akfa iman-nin fəl ad səddərfex əs təmattant-in aytedan aggotnen daɣ bakkadan-nasan.»

Əzuzəy wa iga Ƴaysa Bartimay

⁴⁶ Iglə Ƴaysa əd nəttulab-net har din-ewadan ayxəm wa n Yerikaw. As iggaz Ƴaysa šin agamad n əyxəm wen ənta əd nəttulab-net əd tamattay tagget, ill-ay əmədderxəl iyyan igân esəm Bartimay ag Timay iqqiman fəl afay ən tarrayt itansay. ⁴⁷ Da da xas ad isla as Ƴaysa wa n əyxəm ən Nazaret awen, ənta ad idkal əməsli-net ad igannu: «Ya Ƴaysa, Ag ənnəbi Dawəd, hənəttət-i.» ⁴⁸ Ərxaman-as aytedan aggotnen y ad affastu, mišan isahhakət əməsli-net wəllen, igannu: «Ya Ƴaysa, Ag Dawəd, hənəttət-i.» ⁴⁹ Izzəkət Ƴaysa, inna: «Ayriwat-i-t-id».

Itawayra əmədderyəl, itawann-as: «Dawat, təbdəda, iyarr-ik.» ⁵⁰ Igar-in əmədderyəl asalsaw-net wa n afalla, iggad, innəmad Ƴaysa. ⁵¹ Issəstan-tu Ƴaysa inn-as: «Mas tarex a dak-k-aga?» Inn-as əmədderyəl: «Əššex, a əreḡ a di-d-iqqəl asawad-in.» ⁵² Təzzar inn-as Ƴaysa: «Aglu, izzozay-kay əzəgzan-nak sər-i.» Iqqal-t-id asawad-net daḡ tamazayt ten da, obaz tarrayt, iggaz tamattay ta təlkamat i Ƴaysa.

Igitan ən Ƴaysa daḡ əḡrəm ən Yerusalam əd ḡələyḡəlayan-net

11

Igi ən Ƴaysa i Yerusalam iguz n əmənokəl

¹ As din-ihoz Ƴaysa Yerusalam ənta əd nəttulab-net, daḡ ənəmiḡaz ən təḡrəmt ta n Betfajay əd ta n Betanəy, dəgma n ədḡaḡ was itawannu wa n "Eškan ən Zaytun"; izammazal əššin daḡ nəttulab-net. ² Inn-asan: «Akkiwat tayrəmt ten dat-wan den. Təggāzam-tat-in ḡas tənāyam əhulel n əzdan iqqanan, as wər kala ad ittəwan. Ariwat-tu, təlwəyam-t-idu. ³ Amaran as dawan-inna awedan: "Ma tətəgim əddi?" Tannim-as: "Əməli a sər-əs iddəranan." Amaran a t-id-issuxəl tarmad.» ⁴ Əglan nəttulab win den osan-in əhulel iqqān fəl tarrayt dat əmi n ahan iyyan; a tu-tarin. ⁵ Təzzar ənnan-asan aytedan əllānen den: «Ma tətəgim əddi? Mas tətərim əhulel di?» ⁶ Əjjəwwaban-asan nəttulab s awa dasan-inna Ƴaysa. Amaran tawayyan, oran əhulel, əglan dər-əs.

⁷ Əlwayan-t-id i Ƴaysa. Ədfaran-as fall-as isəlsa-nasan, iwan-tu. ⁸ Ad tissəwan aytedan aggotnen i Ƴaysa isəlsa-nasan daḡ tarrayt, wiyyad ḡattasan-du ilədlad wər əhen šənnanan tissəwan-as-tan. ⁹ Aytedan win das-azzarnen əd win das-əlkammen, ketnasan siḡaren, gannin:

«Ozana! Təmmal i Məššina!

Iga Məššina albaraka

daḡ wa d-osan s esəm n Əməli.

¹⁰ Iga Məššina albaraka

daḡ taymar ta du-təzayat,

taymar n amaraw-nana Dawəd.

Ozana! Təmmal i Məššina

daḡ jənnawan di ədkalnen!»

¹¹ Iggaz Ƴaysa aḡrəm ən Yerusalam, ikka Ehan wa Zəwwəran n Əlḡibada, izaggazda arat kul wa daḡ-as itəggin. As iga awen da idḡāz-t-id aḡad, igmad aḡrəm ənta əd nəttulab-net win maraw d əššin, əkkan Betanəy.

Ƴaysa ilyan ašək iyyan as itawannu fiḡ

¹² As əzəl wa hadan, igmâd-du Ƴaysa əd nəttulab-net Betanəy, as ifray i gələk. ¹³ Ogga daƳ igəg ašək ən fig inzâran. Ikk-ay y ad issən erâw. As t-in-osa, wər t-ihâ ar ifərkak fəlas tamert n ara-net a wər nəga. ¹⁴ Təzzar iššewal Ƴaysa s ašək wen, inna: «Təxrədet əddənet wər iles awedan tettay n ara-nak.» Arat wa inna Ƴaysa den sallan-as nəttulab-net.

Asatay ən Ƴaysa kəl jola daƳ Ahan wa Zəwwəran n Əlyibada

¹⁵ As d-ewad Ƴaysa əd nəttulab-net Yerusalām, iggaz aƳalla wa iƳlayan Ehan wa Zəwwəran n Əlyibada a daƳ-as isattay imassatagan əd mazanzan; isabbanbay tebəren šin fəl sansin kəl sanji izərfan-nasan, isabbanbay deƳ šisəqqima ən massatagan ən tədəbren. ¹⁶ Təzzar igdal y awedan waliyyan ad irzəg Ehan wa Zəwwəran n Əlyibada ewây arat. ¹⁷ Inna y aytedan daƳ əsəssəxri wa tan-itaggu: «Wərgəx iktâb as, inna Məššina: "Ehan-in, a das-itəwəggu esəm ehan n əlyibada i tawšeten kul". Kawanay amaran təgâm-tu "əsəlyəs ən baydagan".»

¹⁸ Əslan muzaran ən limaman əd musanan n Əttawret y awen Ƴas, ad gammayan təməwit tas z'agin iman ən Ƴaysa, mišan tah-en tasa-net fəlas tamattay ketnet a təsannahalat təggəma n əsəssəxri-net. ¹⁹ As d-ihoz ahad, igmad Ƴaysa əd nəttulab-net aƳrəm.

Tayart ən fig d əzəgzan əd təwatriwen

²⁰ As affaw əzəl wa hadan, iha Ƴaysa əd nəttulab-net tarrayt ən Yerusalām as d-əllaman dəgma n ašək ən fig wanâd, ənayan-tu iqqur ketnet harkid kewan-net. ²¹ Ikta-du Butros ašək wen, inna i Ƴaysa: «Əššex, ənək fig wa təlyana, ketnet iqqur.» ²² Təzzar inn-asan Ƴaysa: «Zəgzənət əs Məššina. ²³ Əggiyyəx əsilakanax-awan as, i innan y ədƳax ən: "Əgməd edag di təfətəqqe daƳ agarew", amaran as inna awen wər iga aššak daƳ əwəl-net, izzigzan as awa inna da ad agu; awedan wədi a das-agu Məššina awa daƳ-as igmay əddi. ²⁴ DaƳ adi, əmalax-awan as: arat kul wa tonsayam Məššina daƳ təwatriwen-nawan, wədi zəgzənət as təgrâwam-tu, əddi a dawan-t-akfu Məššina.»

²⁵ «Amaran as tətattaram, kud ill-ay arat a iqqal wər noleƳ tətâfam daƳ man y awedan, təssurəfam-as təzzar, əddi Abba-nawan wa ihan ijənnawan ənta da a dawan-issurəf ark mazalan-nawan. ²⁶ [Mišan as wər təssurufam y aytedan, wədi wər dawan-z-issurəf Abba-nawan wa ihan ijənnawan ark mazalan-nawan.]]

Ma ikfan Ƴaysa turagat ta ila

²⁷ Ilas-du Ƴaysa ənta əd nəttulab-net tewaylay n əxrəm ən Yerusalam. Isaylay Ƴaysa daɣ Ahan wa Zəwwəran n Əlyibada as t-id-osan muzaran ən limaman, osan-t-id deɣ musanan n Əttawret əd muzaran ən Kəl-Əlyəhud, ²⁸ ənnan-as: «Awak ma təmos tarna tas tətaggay aratan win? Ma kay-ikfan tarna n igi-nasan?» ²⁹ Inn-asan Ƴaysa: «A dawan-agay əsəstan iyyanda. As di-təjjəwwabam, a dawan-əməla wa di-ikfan tarna n igi n aratan win tagga da. ³⁰ Əməlat-i, awak əsəlməɣ wa iga Yaxya aytedan daɣ aman Məššina a ɣur d-ifal awen meɣ aggadəm?» ³¹ Təzzar ad tinəməšəwwiran gər-essan, gannin: «As das-nənnan: "Məššina a d-ifal" a danaɣ-annu: "Mafel za wər təzzəgzanam s awa dawan-inna Yaxya?" ³² Wər das-za-nannu za: "Aggadəm".» Wər əhelan tənna n awen fəlas tamattay ketnet təttaf as, Yaxya ənnəbi a imos. ³³ Təzzar ənnan i Ƴaysa: «Wər nəssen». Inn-asan Ƴaysa: «Daɣ adi nak da wər dawan-z-əməla wa di-ikfan tarna n igi n aratan win.»

12

Əlmital wa n magyakan n alɣanab

¹ İššewal-asan Ƴaysa daɣ əlmitalan, inn-asan: «Aləs iyyan a inbalan eškan n əzzəbib, issəɣlay-tan afarag. İɣaz daɣ-as tagdayt ta daɣ za itawazmu əzzəbib, ikras deɣ ogga ihokken as z'iggar awedan wa itagazan afarag. Təzzar issəɣfar afarag-net en i magyakan wiyyad, iššokal. ² As du-tewad tamert ta n əmiləy n əzzəbib, izammazal iyyan daɣ eklan-net əs meddan win ɣur-əs əɣfarnen afarag-net y a ɣur-san d-awəy adagar-net. ³ As tan-in-osa əkli en, əbazan-tu, əgan-as šiwwit, əssoɣalan-tu məššis isikarayray ifassan. ⁴ Izammazal sər-san iyyan akli. As tan-in-osa, sabbasan eɣaf-net, əgan-as tar šəxšad. ⁵ Ilas məššis n afarag izammazal sər-san akli-net iyyan. As tan-in-osa, əbazan-tu, ənɣan-tu kərəz. Dəffər adi izammazal sər-san daɣ tanamazray wiyyad eklan-net aggotnen. Wiyyad za əggatan-tan har tan-əksanan, wiyyad ənɣan-tan kərəz. ⁶ Ab'as d-iqqim i məššis n afarag ar barar-net wa ikna tara. Izammazal-tu sər-san daɣ tilkamat, fəlas a inna daɣ man-net: "Immikkan as ad əssəyməran barar-in." ⁷ Mišan as ənayan magyakan win əɣfarnen afarag barar wen, namannan gar-essan: "Ənta əddi amakkasu n afarag. Əndawat a tu-nanɣu kərəz, ad nəkkusət afarag." ⁸ Təzzar əbazan-tu, ənɣan-tu kərəz. Əgaran-in tafəkka-net sədi y afarag.»

⁹ «Daɣ adi ma z'agu məššis n afarag wen? Wərgəɣ assa a du-z-agu ənta iman-net, agu iman ən magyakan win,

issəxfər afarag-net i wiyyad aytedan? ¹⁰ Awak teyaray a wər tægem daɣ Əlkəttaban as: *"Təhunt ta din-əgaran makrasan, ənta a təqqalat təhunt ta təkbalat ehan,* ¹¹ *arat wen Əməli a d-ifal, amaran isimaklal sər-na!"*»

¹² Ad gammayan muzaran win den əmmək was za sətərməsan Ƴaysa fəlas əgrân as əntanay a issoka s əlmital wen; mišan ya wər əhelan awen fəlas tamattay a əksudan. Adi fəl t-oyyan, əglan.

Tənağmayt daɣ batu n amana

¹³ Dəffər awen əssokan-t-id arat daɣ Farisaytan d aytedan wiyyad əwarnen aganna n əmənokal Herod fəl a das-agin tənagmayt, s a tu-sassannin arat fəl t-əbazan. ¹⁴ Osan-t-id ənnan-as: «Əşşex, nəssân as əməggi ən tidət a təmosa, amaran wər t-illa i təksuda daɣ awa təganna, fəlas wər təzlaya daɣ almaqam n aytedan. Təsasaɣra əs tidət awas dana-iwar igi-net daɣ tarrayt ta n Məşşina. A kay-nəssəstən, awak xalal arazam n amana y əmənokal wa zəwwəran Qaysara meɣ wər xalal? A tu-nərzəm, meɣ wər tu-za-nərzəm?» ¹⁵ Inn-asan Ƴaysa igrân təlmənufəqanasan: «Mafel tətajarrabam-i? Akfiwat-i-du tefelt n əzrəf a tat-ənəya.» ¹⁶ Əkfan-as-tat-in, təzzar inn-asan: «Ma ilan udəm d esəm win tat-əwarnen?» Ənnan-as: «In Qaysara.» ¹⁷ Inn-asan: «Adi za agiwat i Qaysara awa kawan-issəwar, tagim deɣ i Məşşina awa kawan-issəwar.» Isammaklal sər-san aljawab wa tan-ikfa Ƴaysa da.

Isalan əgânen daɣ batu ən tanakra daɣ təmattant

¹⁸ Dəffər awen osan-du Sadusaytan Ƴaysa, əmosnen aytedan əttâfnen as wər tu-təlla tanakra dəffər təmattant. Əssəstanan-tu, ənnan-as: ¹⁹ «Əşşex, ənnəbi Musa iktâb as: *"As aba aləs oyya-du tantut dər wər ila barar; ilzâm amadray-net a tat-izləf fəl ad agu əzzurrəyya y əmidi-net wə aba den."*

²⁰ Ənta kala a t-əllan əssa mədrayan. Izlaf wa dasan-waşşaran ketnasan, aba-tu wər d-oyya a imosan barar. ²¹ Izlaf wa n əşşin təntut ta ɣur aba əmidi-net den. Ənta da aba-tu wər d-oyya ara. Iga wa n karad awen da. ²² Əssa mədrayan win, ketnasan əgan awen da, wər tan-iha i d-oyyan ara. Dəffər as tan-aba ketnasan, aba tantut ten ənta da. ²³ Awak əzəl wa n tabadday, ma imos daɣ əssa mədrayan win den was za təqqəl təntut ten taɣurəs, dad zamas ketnasan əzlâfan-tat?»

²⁴ Inn-asan Ƴaysa: «Kawanay alxata a təttafam, fəlas wərmad təssanam awa ənnan Əlkəttaban, wala deɣ təssanam awa dər togda tarna ən Məşşina, ²⁵ fəlas əzəl wa n tabadday, wər t-illa azalaf i meddan wala şidoden.

Kalar tēmëddurt a z'agin šilat ən ta əgan angalosan day jənnawan. ²⁶ Amaran day batu ta təqqalat inəmməttan əd tanakra-nasan: awak təyaray a wər təgem day Əttawret awa inna Məššina y ənnəbi Musa xur ənəfilal wa das-iga xur təfsəq. Wərgex a das-inna Məššina: "*Nak a imosan Əməli n Ibrahim, d Isəhaq, əd Yaqub?*"

²⁷ Məššina wər imos Əməli ən tēməxxa, kalar Əməli ən win əddarnen a imos. Day adi alxata zəwwəran a təham.»

Tamazaq təgât day batu n alwajib wa ogaran

²⁸ Ihoz-du iyyan day musanan n Əttawret issisaman y əməšiwəl wa iga Yaysa da əd Sadusaytan, d aljawab oggâm wa dasan-iga Yaysa, inna i Yaysa: «Ma imos alwajib wa ogaran day alwajiban kul win danaç-ikfa Məššina?» ²⁹ Inn-as Yaysa: «Ənta da alwajib wa ogaran: "*Səsəmat Kəl-İsrayil! Əməli-nana Məššina, ənta ças Əməli.* ³⁰ *Iru Əməli-nak Məššina s əwəl iyyanda əd man ərdânen. Tireq-qu s awa təley kul day tayttay əd təçurad.*"» ³¹ «Amaran alwajib wa ilkaman i wədi as: "*Agu y əşəqqaç-nak tara ta təgex iman-nak.*"»

³² Təzzar inna əmusan n Əttawret wen i Yaysa: «Tidət-nak Əşšex! Məššina iyyanda, amaran wər t-illa iyyan ar ənta. ³³ Amaran as t-ira awedan s əwəl iyyanda, iray deç s awa ila kul day tayttay əd təçurad, ira deç əşəqqaç-net s əmmək was ira iman-net, wər tu-təlla takutay tətirəkəmmet wala takutay iyyat wər oger adi.» ³⁴ Da day ad isla Yaysa i batu təgât s əgərri ta iga aləs a ənta a das-inna: «Kay, wər kay-iggug iguz ən Taymar ta n Məššina.» Ab'as t-illa i ihalan əsəstan ən Yaysa.

İsalan əqqalnen Əlməsix d ənnəbi Dawəd

³⁵ İsaşxru Yaysa day Ahan wa Zəwwəran n Əlçibada as iga əsəstan wa, inna: «Awak wərgex a gannin musanan n Əttawret, Əlməsix Ag əmənokal ənnəbi Dawəd a imos? ³⁶ Dawəd za iman-net as t-isassanna İnfas wa Zəddigan day batu n Əlməsix: "*Əməli Məššina inna y Əməli-nin: Qamu day əyil-in, har əçrədəç əsərəs ən zənga-nak, agaç-qan daw daran-nak.*"

³⁷ Dawəd iman-net as içra Əlməsix s esəm wa n Əməli, day adi manəmmək as z'iqqəl barar-net?» Batu ta iga Yaysa da, toggam-tat tamattay tagget ta das-təssəsamət.

Tarçəmt ən Yaysa fəl ləkkum i musanan n Əttawret

³⁸ İna Yaysa i tamattay day əsəssəçri wa tat-itaggu den: «Agəzat iman-nawan day musanan n Əttawret. Ərân ad saçlayan əzlâgan šikadkaden zagrotnen, d ətəwəsəslam igân əs saçmar day sammanayan n aytedan. ³⁹ Ərân deç

təximit day daggan win əlanen almaqam day nan win əlxibada ən Kəl-Əlyəhud d iguz ən daggan n aytedan win tawasaxmarnen day məgura. ⁴⁰ Taşan awa əlanat tədoden şin as wər ədderan meddan-nasnat, taggin deş imaddan zagrotnen wər nəmos ar sokni. İlkâm a dasan-itəwəxkəm attadib labasan.»

Takutay ta tolayat

⁴¹ Iqqîm Ƴaysa day Ahan wa Zəwwəran n Əlxibada, illa dat-əs əssənduq wa day itiddaw ərrəzəş n Ahan wa Zəwwəran n Əlxibada, iswād day tamattay tətəggu day-as azrəf. Sartakan day-as məggərgas aggotnen azrəf aggen. ⁴² Tosa-du təntut ən tələqqay as wər idder alə-net, təssərtak day-as sanatat təfelen as wər tewed əlqimat-nasnat ərrəyal. ⁴³ Təzzar işra-du Ƴaysa inəttulab-net əs man-net inn-asan: «Əgğiyeyş silakanax-awan as, təntut ən tələqqay ta, əs wər idder alə-net, togar aytedan a ketnasan tehakkay, ⁴⁴ fəlas ketnasan azrəf was wər əddəran a day əkfan, mişan ənta harkid əlləqqu-net tədkal-du ərrəyalan s əntanay şas a fəl təssan, təkf-en.»

13

Əsəssəşri igâ Ƴaysa inəttulab-net

Əsəssəşri igâ Ƴaysa day batu n əbərəşji n Ahan wa Zəwwəran n Əlxibada

¹ Igammad Ƴaysa Ehan wa Zəwwəran n Əlxibada as dasinna iyyan day nəttulab-net: «Əşşəx, ənak şihussay ən təhun şin as ikras ahan a! Şihussay n ahan!» ² Inn-as Ƴaysa: «Təhannayax ehan a zəwwəran a? Wər day-as du-za-taqqam təhunt təwârat təmidit-net. Ketnet ad itəwəşəbbərəşjət.» ³ Dəffər awen, iqqîm Ƴaysa fəl ədşax wa n Eşkan ən Zaytun, day tənəmiwəla n Ahan wa Zəwwəran n Əlxibada, as t-issəstan Butros əd Yaqub əd Yaxya d Andrawəs, wər əqqıman nəttulab win hadatnen, ənnan-as: ⁴ «Əməl-anax əmmay ad z'agu arat wa tənney ihogan? Ma za təqqəl alşalamat ta za tassaknit as ibuk y igi?»

Əsəssəşri igâ Ƴaysa day batu n əzəl wa ilkaman

⁵ Inn-asan Ƴaysa: «Ənkədat, a kawan-wər-issəxrək awedan waliyyan, ⁶ fəlas aytedan aggotnen a du-z-asinen əttafan esəm-in, akkiyyan day-san igannu imos Əlməsix, əssəxrəkan s awen aytedan aggotnen. ⁷ Amaran as təslam i tərnuq ən məşiran, əd salan ən məşiran, a kawan-wər-issərməş awen. Aratan di kundaba osan-du, mişan wərgəş əntanay a əmosnen təzərəst n əddənet. ⁸ Ad əknəsnat addawlaten gar-essanat, əknəsnat tayməren gar-essanat,

əməlān-tu nəgəynəgəyan n amaḍal daɣ daggan aggotnen əd laz labâsan. Mišan aratan win kul, wər əmosan ar ənətti ən təlawayt təhât əlmital ən ta du-tətizarat əs təntut təttaggat amzur.»

⁹ «Kawanay amaran ənəkədat əd man-nawan. Ad tatarmasam, tətəwəsəbdədam dat saggawaran n əşşərixa, təwəgginat-awan təwit daɣ nan n əlyibada ən Kəl-Əlyəhud. Ad tətəwəsəbdədam dat naxkiman əd mənokalan fəlas kawan-iwar esəm-in, akf-iwan adi tarrayt n a fall-i taggayyem, ¹⁰ fəlas tawşeten kul n əddənet kundaba əslenat i salan n Əlinjil. ¹¹ As təttermasam, tətəwasabdadam daɣ adag n əşşərixa, a kawan-wər-işşəwəş awa za tan-nim. Agat ɣas batu ta kawan za tətawakfit daɣ assayət tədi da, fəlas wərgəɣ kawanay iman-nawan a tat-igan; kalar Infas wa Zəddigan a tat-z-agin daɣ mawan-nawan. ¹² Ad sətterməsan aytedan imədrayan-nasan səssugin iman-nasan, sətterməsan abbatan bararan-nasan səssugin iman-nasan, affallagan bararan fəl marwan-nasan səssugin iman-nasan. ¹³ Awedan kul a kawan-igzər fəlas kawan-iwar esəm-in, mišan wa daɣ-wan izmaran har təzərəst, wədi ad iɣləs.»

¹⁴ «As tənayam "taxxaramt ta səksədat" təha edag was wər imməkkan a tu-təha – Agret awedan wa iɣarrin isalan win! – aytedan win d-ogaz adi daɣ akal ən Yahudəyya, win di addaggaganet s ədɣaxan; ¹⁵ wa iqqiman daɣ adag wa n afalla n ahan-net, a du-wər-azzabbat y a din-idkəl arat ihân ehan-net. ¹⁶ Wa ihan tawagost-net a du-wər-iqqəl aɣaywan y a din-idkəl asalsaw-net. ¹⁷ Iket aɣazab ad t-aginət tədoden šin əganen šidusen əd šin sankasnen daɣ adan win di!»

¹⁸ «Əgməyat daɣ Məşşina a du-wər-imazayyat adi əd tamert n asamed irtâyan d akonak, ¹⁹ fəlas aɣazab səksədan a du-z-asin daɣ adan win di as a d-ixlak Məşşina əddənet wər kala tətəwanay tulat-net, za wər ilkem du-tosa tulat-net. ²⁰ Kundaba as adan win di ikf-en Əməli təzərəst, wədi wər t-illa i daɣ-san du-z-irəgan. Kalar ad təwəzzəgzəlan fəl əddəlil n aytedan win tawasanafrannen.»

²¹ «Əddi amaran, as dawan-inna awedan: "Ənəyat! Əlməsix illa da", madəɣ: "Illa den", a das-wər-təzzəgzənam! ²² Fəlas ad t-əməlān əlməsixan ən bahu, əməlan-tu dəɣ ənnəbitan ən bahu. Ad taggin aɣalamaten əd təlməxujaten, har as ənnar əfragen awen, əssəxrəkan aytedan harkid win isannafran Məşşina. ²³ Daɣ adi ənəkədat əd man-nawan! Aratan di ketnasan əgəɣ-awan-tan daw aɣaf.»

İsəssəyri igâ ɣaysa daɣ batu ən tawaylay-net əddənet

²⁴ «Døffør tæssust ta za tagit day adan win di, ad alsinat šiyyay tēfuk, igmød ənnur tallit, ²⁵ ertəkan-du etran, nəgəynəgəynat təxəllak šin əlanen tarna day jənnawan, ²⁶ alwaq wədi da ad za təwənəya nak Ag Aggadəm as du-z-asa əheḡ šignawen, day tarna-nin tagget, əd tanaya-nin, ²⁷ təzzar zəmmizəlay angalosan əs təḡəmmar an əkkozat n əddənet, y a d-əššidəwan aytedan kul win sannafranəḡ.»

²⁸ Inn-asan: «Abəzat alfaydat s əlmital wa n ašək ən fig. Igda ad hussəyan lədlad-net, iggaz-du šin tanazra, ad təssənam as tamert ta n akasa təhōz. ²⁹ Zund əmmək en day əs as tənayam aratan win dawan-əmalay əddi, təssənam as aḡrud n əddənet ihoz, wər illa gar-ewwan dər-əs arət. ³⁰ Əggəyyeḡ əsilakanəḡ-awan as tamattay ta da n azzaman win nəha da, ad tənəy ənətti n aratan kul win dawan-əmala da. ³¹ Ijənnawan d amaḡal ilkam ad ib'as t-əllan, mišan batuten-in əllanat-tu har faw.»

Əsəssəyri day issinkad ḡaysa inəttulab-net

³² «Əzəl amaran wala alwaq wa day z'agu awa dawan-əmala da, wər t-illa i day-san issənan, gər za angalosan a əhanen ijənnawan, wala Barar iman-net. Wər t-illa i day-san issənan ar Abba. ³³ Ənkədat, təsəmmutəgam, fəlas wər təssenam assayət ta day z'agu adi. ³⁴ Iha adi əlmital n aləs išakalan. As iggaz šin teklay iga šinaden n aḡaywan-net day fassan n eklan-net. Akkiyyan imal-as əššəḡəl was t-iwar igi-net. Inna i wa ogazan imi n ahan ad inkəd. ³⁵ Day adi ənkədat, fəlas wər təssenam alwaq wa day du-z-asu məššis n aḡaywan, kud alməz, wala adawannay n ahad, wala datazal, wala aḡora. ³⁶ A kawan-du-wər-asu day alwaq day as wər təswedam, aḡəz-kawan-du tənsəm. ³⁷ Awa dawan-ganna da, ketnawan as dawan-tu-ganna, a t-imosan as: Ənkədat.»

İsalan ən təmattant ən ḡaysa

14

Ətəwənyal n alwardi fəl ḡaysa

¹ Əššin adan a din-aba day əmud wa n Akkay d əmud wa day tamatšinat təḡəlwen šin wər iha xamira. Imuzaran ən limaman əd musanan n Əttawret harwa da gammayan təmərkəst tas z'abəzan ḡaysa agin iman-net, ² fəlas a gannin: «Ad wər nagu adi day adan n əmud, fəl a du-wər-awəy ənəjərway əs tamattay.»

³ Awən as itaggu ḡaysa ənta iha taḡrəmt ta n Betanəy, imigarat i Simḡon was kala a t-igraw kətru. Itamansaw den da as du-t-osa təntut tewəyat butalay igân day təhunt

mallat, iha alwardi iknan šizada d əzzəwi as itawannu nar. Tosa-du ɣas tərza imi ən butalay wa teway da, ad tənəqqal alwardi wen fəl aɣaf ən Ƴaysa. ⁴ Arat wen iga alham daɣ arat daɣ aytedan win əllanen den, ad tinəmənnin gər-essan: «Ma infa əhluk n alwardi a? ⁵ Wərgex ifrâg a din-anzu əlqimat ən karadat təmäd n əzəl n əššəxəl, itəwəkfu awen i tələqqawen?» Ad suɣulan təntut ten tagna.

⁶ Mišan inn-asan Ƴaysa: «Akfət-tat əməslag! Mafəl das-təɣaššadam iman? Əmazal olâɣan a di-təga da, ⁷ fəlas šiləqqawen faw da əllānat ɣur-wan, id təram adi təfrâgam a dasnat-tilalam; nak amaran, wərgə faw əlley ɣur-wan. ⁸ Təntut ta awa təfrag, təg-ay. Tənɣal fall-i alwardi y ad təsəmmutəg taɣəssa-nin y əzəkka harwa dat alwaq. ⁹ Əggiyyex silakanax-awan as, edag a daɣ ittəmal Əlinjil daɣ əddənət ketnet, a daɣ-as attamal awa təga təntut ta, tətəwəkta-du.»

Əsəttərməs ən Yahuza Ƴaysa

¹⁰ Den da ad inkar Yahuza Isxarəyuti wa n iyyan daɣ nəttulab ən Ƴaysa win maraw d əššin, ikka imuzaran ən limaman fəl a dasan-iməl təməwit tas z'agu Ƴaysa daɣ fassan-nasan. ¹¹ Isaddawat-tan awen, təzzar əgan-as arkawal n ad t-akfin azrəf. Ad igammay Yahuza təməwit tas z'agu Ƴaysa daɣ fassan.

Əsəmmutəg n əmud wa n Akkay

¹² Əzəl wa azzaran n əmud wa daɣ tamatšinət təgəlwen šin wər iha xamira, əzəl s ənta a daɣ tawagzaman jəɣal win amud wa n Akkay, ənnan nəttulab i Ƴaysa: «Mənid tareɣ a dak-nəsəmmutəg imensewan n amud wa n Akkay?» ¹³ Təzzar issoka Ƴaysa əššin daɣ nəttulab-net Yerusalem, inn-asan: «Əggəzat aɣrəm, ad tammanayam d aləs ewâyan ətəkin idkâran aman. Əlkəmat-as. ¹⁴ Ehan wa iggaz, annat i məššis, "Inn-ak Əššex: 'Məni edag daɣ ahan-nak wa daɣ za nammansaw nak əd nəttulab-in daɣ amud wa n Akkay?'" ¹⁵ A kawan-assaknu daɣ suru-net ehan wa n afalla elwân, əhân-tu mutag kul, iknâ. Əddi da a dana-za-təsəmmutəgam imensewan win Akkay.» ¹⁶ Əqlan nəttulab, əkkan aɣrəm. As din-ewadan ənayan awa da dasan-imal Ƴaysa. Təzzar sammatagan imensewan win Akkay.

Ətəməl ən təkaddilt

¹⁷ As tuda təfuk osa-du Ƴaysa, iddew əd nəttulab-net win maraw d əššin. ¹⁸ Isixamar Ƴaysa ənta əd nəttulab-net den da tamansawan as dasan-inna: «Əggəyyex əsilakanax-awan as, iyyan daɣ-wan a dər-i idrâwan da da a di-z-aggin daɣ fassan.» ¹⁹ Iɣšad awen iman-nasan, akkiyyan

day-san inna i ʃaysa: «Ēngəm werge nak?» ²⁰ Inn-asan: «Iyyan day-wan, kawanay inəttulab-in win maraw d əššin, a dər-i idrāwan əmərədda day əxəzu iyyanda a z'agin adi.» ²¹ Illikan as nak Ag Aggadəm a di-iba s əmmək iman-net wa əmalan Ēlkəttaban day batu-nin, mišan ya, iket alɣazab a t-inəy awedan wa di-igan day fassan. Awedan wədi, a das-fu fadda a du-wər-iggez əddənet.

Ēsəbdəd ən saktan ən tassaq ta təynayat

²² Tattin da da as idkal ʃaysa tagəlla, iga igodan i Məššina, irza tagəlla ten, izun-tat i nəttulab-net, inn-asan: «Atšiwat da, taɣəssa-nin adi.» ²³ Dəffər awen idkal təkabart, iga igodan i Məššina, amaran ikf-asan-tat, namaglazan awa tatihan ketnasan. ²⁴ Amaran inn-asan: «Adi azni-nin isitaddan arkawal ən tassaq gər Məššina əd tamattay-net. Azni wa, ad inɣəl fəl tənfa n aytedan aggotnen. ²⁵ Ēggəyyeɣ silakanax-awan as, wər z'ələsaɣ tessay n esmad n alɣanab, iket wər d-ewəd əzəl wa day z'ašwa wa aynayan day Taɣmar ta n Məššina.» ²⁶ Dəffər awen issəggad ʃaysa əd nəttulab-net day təmmalen a d-əgmadnen Azzabur. As tanat-əɣradan, əkkan adɣay wa n Eškan ən Zaytun.

Emel ən ʃaysa šigget ta tu-z-agu Butros

²⁷ Inna ʃaysa i nəttulab-net: «Ketnawan ad iwəliwəl əzəgzan-nawan id ənnan Ēlkəttaban: "Ad əwətaɣ amadan, iba-tu, təzzar wəziwəznat ayfad-net."

²⁸ Mišan dəffər ətəwəsənkər-in day təmattant, a dawan-in-izaray s akal wa n Galilaya, əqqələx-awan day-as.»

²⁹ Təzzar inn-as Butros: «Kud iwalawal əzəgzan-nasan ketnasan, da wa-nin wər z'iwəliwil.» ³⁰ Inn-as ʃaysa: «Ēggəyyeɣ silakanax-ak as, ahada da, as z'agu əkəji y aɣora sanatat təxər, taggâdaɣ-i har karadat təklaten.» ³¹ Mišan izazzawat Butros day batu-net, inna: «Kud iqqal as ətəwəɣa kərəz a za nagu nak dər-ək, da wər kay-z-əggəda. Ēnnan nəttulab ketnasan awen da.»

Gatsemanay

³² Dəffər awen iddew dər-san ʃaysa s afarag n eškan ən zaytun igân esəm Gatsemanay. As din-ewadan, inn-asan: «Qamiwat da da iket di ad tagga šiwatriwen.» ³³ Izzənkaz fall-asan, iddew əd Butros əd Yaquub əd Yaxya. Tamazayt tenda a day əssəntan man-net aɣšud, iššəwaš. ³⁴ Inn-asan: «Awa əgan man-in day əɣšud, əbuka a di-aba. Ad wər təfəlam da, amaran a kawan-wər-ibəz etəs.» ³⁵ Izzənkaz fall-asan a əndərran, issəjad ad itattar, igmay day Məššina kud immikkan a t-issəgəg awa t-id-izayan day alwaq wen. ³⁶ Inna day təwatray-net: «Ya Abba-nin, arat kul təfrāgay

igi-net. Sөгөг-i ta day takabart n alyazab, dөр ига awen da ya, taget tara ta-nak, wөргөx ta-nin.»

³⁷ Dөffөр awen iqqal-du Yaysa inөттulab-net win karad en, ogaz-tan-du өnsân. Issөнkar-tan, inna i Butros: «Simyon, kay adis etös a төгөx? Indar-ak ad taga wala xas alwaq iyyanda tokâya? ³⁸ Akөyat, tansөyam Mөsshina a kawan-oggazan day jarrabatan n Iblis. Tidөt as өnnөyat n aggadөm tөsidaran igi n awa olaxan, mišan igdal-as rөkkөm өn tөxөssa-net igi n awen.»

³⁹ Ilas өзөnkөz fall-asan, ига төwatray ta day ига ihogan. ⁴⁰ Dөffөр adi ilas-in tewaxlay өn nөттulab-net win karad, os-en-in өnsân, fөlas awa dasan-iga etös day iguz ab-as өfragan arra өn шттawen-nasan. Wөр өssenana a das-өnnan. ⁴¹ As dasan-d-iga tewaxlay ta n karadat, inn-asan: «Harwa da tөnsâm, tөsanfim? Batu za tөxrad. Эссөнат аs alwaq ewad-du wa day za төwөгga nak Ag Aggadөm day fassan өn nasbakkadan. ⁴² Энкөрат-in өндawat! Энөyat! Wa di-z-agin day fassan ewad-du.»

Tөkaddilt ta ига Yahuza Yaysa d өтөрмөs өn Yaysa

⁴³ Harwada iшšewal Yaysa as d-osa Yahuza wa n iyyan day nөттulab-net win maraw d өsshin, iddew өd tamattay a d-өssiglan muzaran өn limaman өd musanan n Ettawret өd muzaran өn Kөл-Эlyөhud. Tamattay ten tewây шikabiwen өd төburөgen. ⁴⁴ Эмөkkeddөл wa иган Yahuza imâl i tamattay ten өmmөk was z'өzdөyan Yaysa, өs tөнна ta dasan-iga: «Alös was di-tөnayam as tu-zalammex, өnta Yaysa. Abөzat-tu, taglim dөр-өs, tagim dөр-өs өnnөyat.» ⁴⁵ Osa-du Yahuza xas, ihoz-in Yaysa, inn-as: «Эsshex?» Tөzzar izalammat-tu. ⁴⁶ Tөгgad-in tamattay өs Yaysa, төbaz-tu. ⁴⁷ Iha-du iyyan day nөттulab өn Yaysa, ilbay takoba-net iwat sөр-өs akli n Elimam wa Zөwwөran, ifras-du төmөzzuk-net. ⁴⁸ Tөzzar inna Yaysa i tamattay ten: «Awak nak өjajөb iyyan n abaydag a өmosa as di-du-tөtakkim tewayam шikabiwen өd төburөgen y a di-tөbezam? ⁴⁹ Wөргөx өзөл kul өlөx gar-ewwan, sasaxra day Ahan wa Zөwwөran n Эlyibada, mafel wөр di-tөbezam? Эссөнат za as, awa иган da, игâ fөл ad andu awa sөр-i өnnan Elkөttaban.»

⁵⁰ Den da a t-өfalan nөттulab-net ketnasan, өddөгgagan fall-as. ⁵¹ Ilkam өmawad iyyan i tamattay en, ilsa afөр ihossayan daw wөр iqqen arat. Эggadan-in sөр-өs meddan y ad t-өbezam, ⁵² oyy-asan-du afөр wa ilsa, ozal wөр ilsa arat.

Tөbadday өn Yaysa dat Asaggawar wa Zөwwөran

⁵³ Immeway ʒaysa s ʒelimam wa Zəwwəran a ɣur əddewan muzaran ən limaman, əd muzaran ən Kəl-ʒlyəhud, əd musanan n ʒttawret. ⁵⁴ Iga Butros i ʒaysa ləkkum zagren har iggaz ammas n aɣalla n aɣaywan n ʒelimam wa Zəwwəran. Iqqim ad isukus ɣur maššaxalan n ʒelimam wa Zəwwəran əqqimnen əs təmsay tərɣât den.

⁵⁵ As itaggu awen, imuzaran ən limaman d Asaggawar wa Zəwwəran ketnet gammayan i z'aggayen fəl ʒaysa fəl ad əgrəwan tarrayt n igi ən man-net, mišan wər t-əgrewan, ⁵⁶ fəlas aytedan aggotnen a d-ənkarnen əgan fəl ʒaysa šiggəyyawen əmosnen bahu, mišan wər tanat-təha ši tənimmannakat əd tahadat. ⁵⁷ ʒnkaran-du wiyyad daɣ-san əssəwaran-tu bahu, ənnan: ⁵⁸ «Nəsl-âs as inna: "Ehan wa Zəwwəran n ʒlɣibada, s aytedan a t-əkraşnen, a tu-jəbbərəjjeɣ, əssəbdəda daɣ karad adan iyyan wər əkresan aytedan.» ⁵⁹ Mišan batu ta dâ, əmmizrayan daɣ-as.

⁶⁰ Təzzar inkar ʒelimam wa Zəwwəran, ibdad daɣ ammas n əljəmaɣat, issəstan ʒaysa, inn-as: «Awak arat a wər təgəna daɣ təɣəttas šin dak-tawagginen da?» ⁶¹ Mišan igla ʒaysa iffista, wər das-inna wala. Ilas ʒelimam wa Zəwwəran, inn-as: «Awak kay a imosan ʒlməsix, Barar ən was nətaggu təmmalen?» ⁶² Inn-as ʒaysa: «Awalla əmosaq-ɣu; amaran a di-tənəyam nak Ag Aggadəm əqqima daw əxil n ʒməli ən Tarna, tənəyam-i deɣ əzaya-du, əheɣ igarakan əgmâda-du ijənnawan.» ⁶³ As isla ʒelimam wa Zəwwəran y awen, izazzarrat təkadkat-net fəl awa əgan man-net daɣ əɣšud, inna: «Awak ma nəkka i təgəyyawen šiyyad? ⁶⁴ Təslâm y əmadraw wa iga da i Məššina! Ma tənnam?» ʒnnan ketnasan əššəriɣa-net təmattant. ⁶⁵ A fall-as sutufan wiyyad daɣ-san, əɣmasan-as, ad t-əggâtan, gannin-as: «Kay ya ənnəbi, əməl wa kay-iwatan.» Dəffər awen itawakfa i magazan n Ahan wa Zəwwəran n ʒlɣibada a das-tagin šiqqas.

Ikus ən Butros tazdəyt i ʒaysa

⁶⁶ Harwa da iqqim Butros daɣ ammas n aɣalla en da, as du-tosa iyyat daɣ tamaššaxalen n ʒelimam wa Zəwwəran, ⁶⁷ tənay-tu isukus əs təmsay, təzaggazd-ay, tənn-as: «Kay da, iyyan daɣ aytedan win əddewnen əd ʒaysa wa n aɣrəm ən Nazaret!» ⁶⁸ Mišan iggad Butros as t-izdây, inna: «Wərmad əssânaɣ awa daɣ-i təššewala, za wər t-əgreɣ.» Təzzar igmad aɣalla, ikka imi-net. Iɣra əkəji aɣora da tamazayt ten da.

⁶⁹ Tənay-tu təmaššaxalt təlas tənna y aytedan əbdâdnen den: «Aləs wa, iyyan daɣ-san a imos.» ⁷⁰ Ilas Butros iggad ʒaysa.

Arat n amazay dæffær awen, ænnan aytedan æbdâdnen den, æntanay dâ, i Butros: «Illikan as kay da iyyan daḡsan a tæmosa, fêlas kay da in akal æn Galilaya.» ⁷¹ Ad ihhad Butros, igannu: «Mæššina ya tælḡanaḡ-i kud bahu a æge. Æhâdaḡ-awan as wær æzdayaḡ alæs was tægannim æddi.» ⁷² Da da ḡas ad inna Butros awen, ænta ad iga ækæji y aḡora teḡaray ta n sanatad, ikta-du Butros batu ta das-iga Ḣaysa, as das-inna: «As z'agu ækæji y aḡora sanatad tæḡær, tægeḡ-i karad ikusan i tæzdøyt.» Tæzzar æḡšadan man æn Butros wællen iggaz šin tala.

15

Tebadday æn Ḣaysa dat ænaxkim Bilatæs

¹ As affaw aḡora æmmænayan muzaran æn limaman æd muzaran æn Kæl-Ëlyæhud æd musanan n Ættawret, almaḡna Asaggawar wa Zæwwæran ketnet, sassakradan Ḣaysa, ewayan-tu, ægan-tu daḡ fassan n ænaxkim Bilatæs.

² Issæstan-tu Bilatæs, inn-as: «Awak kay daḡ a imosan æmænokal æn Kæl-Ëlyæhud?» Inn-as Ḣaysa: «Kay iman-nak as tænneḡ adi.» ³ Ad sawaran muzaran æn limaman Ḣaysa ark igitan aggotnen. ⁴ Ilas-tu Bilatæs æsæstan, inn-as: «Tæsalla y aratan kul win kay-æsawaran da. Kay ma tænneḡ?» ⁵ Iqqim Ḣaysa wær das-iles tønna n arad. Isammaklal awen æs Bilatæs.

⁶ Id d-iḡlay æmud wa n Akkay a d-ikkæs ænaxkim Bilatæs amaskasaw was tara tamattay agamad. ⁷ As itaggu awen ill-ay alæs igan esøm Baryabbas, ihân kasaw ænta æd næffællag wiyyad æs kala jannajarwayan tamattay har ægan iman n awedan daḡ awen. ⁸ Tænkar tamattay ad tægammay daḡ Bilatæs a das-agu tønæfust ta ḡur-æs tælmad. ⁹ Inn-asan Bilatæs: «Awak tara a tægam a dawan-ækkæsaya æmænokal æn Kæl-Ëlyæhud daḡ fassan?» ¹⁰ Ænta Bilatæs issân as aššaddat æn manzaḡ æn muzaran æn limaman Ḣaysa a fæl t-ægan daḡ fassan. ¹¹ Mišan ægan-du muzaran æn limaman daḡ tamattay ad tædgæz Bilatæs y a das-d-ikkæs Baryabbas, wærgæḡ Ḣaysa. ¹² Ilas Bilatæs awal, inn-asan: «Daḡ adi mas tæram ad t-aga y alæs was tægannim da æmænokal æn Kæl-Ëlyæhud?» ¹³ Ælasan adakal æn maslan-nasan ad gannin: «Taytay-tu fæl tægættawt, a t-iba!» ¹⁴ Inn-asan Bilatæs: «Mafel za? Ma iḡšad?» Mišan sahhaken wællen imaslan-nasan, ad gannin: «Taytay-tu fæl tægættawt!» ¹⁵ Issof Bilatæs lækkum y awa tæra tamattay. Ikkas-asan-du Baryabbas daḡ kasaw, Ḣaysa amaran isassag-as tenaḡay labasat s ælækkud dæffær adi amaran ixkam-as ætæwætøytay fæl tægættawt.

Tamakkakkayt æn sojitan daḡ Ḣaysa

16 Ewayan sojitan Ƴaysa s ammas n aɣarɣar n aɣalla n ahan wa n əššəriɣa. Ƴɣran-du sojitan kul win hadatnen. 17 Ƴssəlsan-tu əbərnuz zaggaxan wa lasan mənokalan, əssəwaran-as dəx almat ən təkəbbut zun ta n mənokalan tɛgât dəx šənnanan. Imos awen igi dəx-as tamakkakkayt. 18 A tu-saslaman, gannin-as: «Oyy-ik, əmənokal ən Kəl-Ƴlyəhud!» 19 Ad əggatan əɣaf-net s agabal ən telant, sutufan fall-as, tigərəffen sajan-as. 20 As dəx-as əɣradan igi ən təmakkakkayt tərtayət əd təsəssəlka, əkkəsan fall-as əbərnuz zaggaxan wa t-əssəlsan, əssoɣalan-tu isəlsa win-da-net, əqlan dər-əs, əgmədan dər-əs aɣrəm y ad t-attaytayan fəl tɛgəttawt.

Ƴtəwətəytəy ən Ƴaysa fəl tɛgəttawt

21 Ƴmmənyan sojitan əd Simɣon wa n əɣrəm ən Qərwan wa erawan Alaskandər əd Rufus ifâl-du šiwəgas. Šahhaššalan-tu aggay ən tɛgəttawt ta fəl z'itəwətəytəy Ƴaysa. 22 Ewayan Ƴaysa s adag as itawannu Golgota, almaɣna n awen «Edag wa n Təkəyya.» 23 Ƴkfan-tu esmad n əzzəbib irtâyan d amagal imosan əzzənəf ən taɣəlbast ifannazan talawayt, mišan ugay Ƴaysa əs təssay-nasan. 24 Təzzar ətaytayan-tu sojitan fəl tɛgəttawt, əzunan isəlsa-net əs təşayeren. 25 Ƴdəgəlşet as t-əttaytayan fəl tɛgəttawt. 26 Ƴttaytayan dənnəg-əs əsellum a fəl iktâb əddəlil wa sər-əs d-ewayan təmattant. Ƴsellum en, iktâb fall-as as: «Awa Ƴmənokal ən Kəl-Ƴlyəhud.» 27 Ijjiyat Ƴaysa d əššin jujab ən baydagan ətəwətəytəy. Iyyan itawataytay dəx əxil ən Ƴaysa, wa hadan itawataytay dəx zalgat-net. 28 Ƴmmək en da as tənda batu ta tənnat dəx Ƴlkəttaban: «*Ad uddan dəy maggan ən təkma.*»

29 A das-taggin aytedan win du-takaynen den ark batuten, siwəliwilan iɣafawan-nasan, gannin-as: «Dew! Kay wa innan ad təjəbbərəjjəɣ Ehan wa Zəwwəran n Ƴlyibada tələsaq-qu akaras dəx karad adan, 30 əmərədda safsu iman-nak, tazabbəɣ-du tɛgəttawt di.» 31 Ƴmmək en dəx as imuzaran ən limaman əd musanan n Ƴttawret da əgân dəx-as tamakkakkayt, tinəmənnin gar-essan: «Ƴnta wa issəfsan aytedan, wər ifreg əsəfsi ən man-net. 32 Kud ənta Ƴlməsix a imos, wa n əmənokal n Israyil, azzabbatet-du tɛgəttawt əmərədda ad nənəy adi, nəzzəgzən sər-əs.» Meddan win dər ijjiyat Ƴaysa ətəwətəytəy əntanay da əhân šin-net.

Agamad ən man Ƴaysa

33 As iga ammasnazal, əlsanat šiyyay akal ketnet har təga tazzar. 34 As təga tazzar, idkal Ƴaysa əməsli-net, inna: «Eli, Eli, lama sabaxtani?»

Almayna n adi: «Ya Æməli-in,
Ya Æməli-nin, mafel toyyex-i əd man-in?»

³⁵ Æslan-as arat daɣ aytedan win əbdadnen den, ad gannin: «Səsəmat! İɣarru ənnəbi İlyas!» ³⁶ Ozal-in sər-əs awedan iyyan, issəlmaɣ-du təduft daɣ bənəgər, ittal-tat d əmi n agabal, izzal-as-tat-in y a tat-aşşəw, igannu: «Səllanat, ad nəssən a t-id-asu ənnəbi İlyas, ikkəs-t-idu fəl təgəttawt ta» ³⁷ Amazay wen da ad ikkas Ƴaysa əməsli issohen, amaran əgmadan-tu man. ³⁸ Assayət ten da ad izzərrat əfər wa zəwwəran imosan anayər gər adag wa zəddigan əd wa ogaran tazdak daɣ Ahan wa Zəwwəran n Əlyibada. Issərrat-du anayər wen ɣur afalla har eres.

³⁹ As inay kabtan ən sojitan ən Kəl-Ərrum ibdâdan den əmmək was əgmadan man Ƴaysa, inna: «İllikan as aləs wa Barar ən Məşşina.» ⁴⁰ Əbdâdnat deɣ tədoden şıyyad sədi, əswâdnat daɣ awa igan den. Şidoden en təh-enat Maryama Madəl, əd Maryama ta terawat Yaqub wa əndərran əd Yosas, d iyyat təgât esəm Salma. ⁴¹ Harwa iha Ƴaysa akal wa n Galilaya as das-əlkamnat, ədhâlnat-tu s awa əfragnat. Əbdâdnat deɣ tədoden şıyyad den aggotnen a d-əddewnen əd Ƴaysa əs Yerusalam.

Ətəwəgga ən təɣəssa ən Ƴaysa daɣ əzəkka

⁴² As tokay takəst n əzəl wa n əlgəmət, simutugan aytedan y əzəl wa n təsanfawt; ⁴³ ikka Yusəf wa n əɣrəm n Arimatay ehan ən Bilatəs. Yusəf aləs a imos itiwasaymaran ihân Asaggawar wa Zəwwəran, imos deɣ awedan igân attama daɣ assa ən Taymar ta n Məşşina. Ənta a igan əmazal ən taholat imosan as ikka Bilatəs, igmay daɣ-as təɣəssa ən Ƴaysa. ⁴⁴ Isammaklal əs Bilatəs tərrib n agamad wa əgan man Ƴaysa. Isassayra-du kabtan wanâd, issəstan-tu kud itidda iba ən Ƴaysa wala. ⁴⁵ As das-iga kabtan wa isalan n iba ən Ƴaysa, ikfa Bilatəs Yusəf turagat n ad idkəl təɣəssa ən Ƴaysa. ⁴⁶ İzzənza-du Yusəf şifit ta təhossayat, ikkas-du Ƴaysa fəl təgəttawt, ig-ay daɣ-as, təzzar ig-ay daɣ əzəkka imosan akazam, isayɣararad-du təhunt zəwwərat ihar sər-əs imi-net. ⁴⁷ Təlla Maryama Madəl den əd Maryama ta terawat Yosas, əswâdnat daɣ adag wa daɣ tətawagga təɣəssa ən Ƴaysa den.

Tanakra ən Ƴaysa daɣ təmattant

16

Emel wa iga angalos tanakra ən Ƴaysa daɣ təmattant

¹ As okay əzəl wa n təsanfawt, tənkar Maryama Madəl əd Maryama ta terawat Yaqub əd Salma əzzənzanat-du ađutan əzodnen y a tan-əsələlnat tağəssa ən Ƴaysa. ² Əglanat ağōra, ħur gəmmud ən təfuk əzəl wa n alxad, əkkanat əzəkka. ³ Əglānat tinəmənninat gər-essanat: «Nakkanatay a da ma dana-z-isəħħərurədan təhunt ta təharat əzəkka?» ⁴ Ədkalnat asawad-nasnat, ənaynat as, təhunt tanad, tətivasaxararad sədi. Təhunt ten da za təkna təzzəwwərt.

⁵ Əggaznat əzəkka, ənaynat dağ-as aləs n əmawad n əsamlal, iqqīm dağ əħil-nasnat, ərmaynat. ⁶ Inn-asnat: «Ad wər tərmeħmat. Ƴaysa wa n Nazaret, wa itawataytayan fəl təgəttawt as təsaggadmat. Wər illa da. Inkar-du dağ təmattant. Ənakmat edag was kala a dağ-as tənsa təğəssanet. ⁷ Əmərədda aglimat təməlmat i nəttulab-net, harkid Butros, as a dasan-in-izar s akal wa n Galilaya. Den da a tu-za-tənəyam s əmmək was dawan-t-inna.» ⁸ Təzzar əgmadnat-du əzəkka ozālnat, təga dağ-asnat taysəst, isi-maklal sər-əsnat awa iğan den. Awa əganat dağ tərəmmeq wər t-illa i s ənnanat arat dağ tarrayt.

Ənəfilal ən Ƴaysa y aytedan aggotnen

⁹ Ağora n əzəl wa n alxad a d-inkar Ƴaysa dağ təmattant, iga ənəfilal-net wa azzaran i Maryama Madəl, tas kala dağ-as ikkas əssa kələsuf. ¹⁰ Təgla təga isalan y aytedan win as kala tidawan əd Ƴaysa. As itaggu awen əħšādan man-nasan, hallin iba-net. ¹¹ Mišan as əslan as iddār, tənây-tu, ugayan s ad əzzəgzənan awen. ¹² Dəffər awen inafalal Ƴaysa əs təməwit iyyat y əššin dağ nalkiman-net jiwankatnen dağ əsuf. ¹³ Təzzar əqqalan Yerusalām əmalan awen i nalkiman win hadatnen, mišan əntanay da wər dasan-itawazagzan awen.

Əzəmmizəl wa iga Ƴaysa i nəttulab-net s əddənet ketnet

¹⁴ Dəffər awen inafalal-du Ƴaysa i nəttulab-net win maraw d iyyan dağ amazay a dağ tattin. Isoħal-tan təgna n iba n əzəgzan-nasan əd taggarmamt ən wallan-nasan, fəlas wər əzzəgzənan y aytedan win t-ənaynen dəffər tanakra-net dağ təmattant. ¹⁵ Inn-asan: «Aqliwat, tilalam əddənet ketnet təmmālam isalan n Əlinjil y id t-illa awedan. ¹⁶ I izzəgzənan, itawasalmaħ deħ dağ aman s esəm-in ad igrəw efsan. Amaran wa ugayan s əzəgzan, ad t-iwər attadib ən Məššina. ¹⁷ Əntanatay da alyalamaten šin za təwənəynen fəl aytedan win sər-i əzzəgzənan: Ad əkkəsan kələsuf dağ aytedan əs tarna n esəm-in, əššiwəlan awalan ən tawšeten

wər əzdayan, ¹⁸ amaran kud ədkalan taššolen əs fassan-nasan wala əšwan sənşəg da wər dasan-z-iğšəd adi wala. As əssəwaran ifassan-nasan imiranan, ad əzzəyan.»

Tewaxlay ən Yaysa ijənnawan

¹⁹ Ig-asan Əməli Yaysa batu ten xas, immədkal əs jənnawan, iqqim dağ əxil ən Məššina. ²⁰ Əntanay amaran, əqlan ad əmmalan isalan n Əlinjil dağ adag kul. Illil-asan Əməli s əššəxəl wen, isataddu awa gannin s alxalamaten əmosnen təlməxjupaten šin taggin.

Elinjil wa n Luqa Æsænti

1-3 Ya Tayofil wa ækney saǵmar, aytedan aggotnen a æktabnen isalan n awa ǵur-naǵ igan, s æmmæk iman-net was dana-tan-æssonalan aytedan win tan-æggəyatnen æs šittawen-nasan harwa ǵur ænætti-nasan, æqqalan aytedan æšǵâlñen daǵ amel n awal æn Mæššina. Awen da fæl di-d-iggaz nak da, dæffer as æššiggarax isalan di kul s ælluǵ a d-ibazan ǵur ælæsæl-nasan, a dak-in-aga y-asan akatab innizzaman, ⁴ fæl ad tækkəsax aššak as tæssunen šin tætəwasasaxra ættiddanat.

Təhəwt æn ǵaysa æd təmmədrəyt-net

Ætamæl æn təhəwt n ænnəbi Yaxya wa isalmayān aytedan daǵ aman

⁵ Elan win daǵ imos Herod æmənokal n akal æn Yahudəyya, ill-ay ælimam iyyan igân esəm Zakarayya ihân taggayt æn limaman win hayawan n Abəya. Tantut-net tahayawt æn Harun, esəm-net Elizabet. ⁶ Ænta dər-æs æmosan alǵadilan dat Mæššina, ægân y alwajiban n Æmæli d alamaran-net lækkum daǵ wər ælen lahan waliyyan. ⁷ Wər ælen barar waliyyan fəlas Elizabet a wər nətalu bararan, ægmâdan-tan deǵ elan wəllen.

⁸ Æzəl iyyan itaggu Zakarayya dat Mæššina æššəǵæl wa taggin limaman fəlas taggayt æn limaman ta iha as d-issəǵlay igi n awen. ⁹ Æbaznat-tu tašaxeren, æmosnen as, ænta a z'iggəzan edag wa zəddigan daǵ Ahan wa Zəwwəran n Ælǵibada n Æmæli, issəqqəd daǵ-as ađutan fæl majmar wa iskatan y awen. Šišaxeren šin imos igi-nasnāt alǵadat æn limaman. ¹⁰ As iga alwaq wa daǵ taqqadan ađutan, tamattay ketnet tæbdâd daǵ tæfərray n Ahan wa Zəwwəran n Ælǵibada, tətattar.

¹¹ Wala a ihogan inafalal-as-du angalos n Æmæli ibdâd daǵ əǵil æn majmar wa n æsəqqəd n ađutan. ¹² Inay Zakarayya angalos ǵas irmaǵ, tæggaz-tu tasa. ¹³ Mišan inn-as angalos: «Zakarayya! A kay wər tæggəz tasa fəlas Mæššina iqbâl mansay-nak, tantut-nak Elizabet ad tægrəw barar, amaran ag-as esəm Yaxya. ¹⁴ Ad taddawex, tæfəliwəsax; tæsəddəwət deǵ təhəwt-net aytedan aggotnen, ¹⁵ amaran ad iqqəl awedan zəwwəran dat Æmæli. Wər mad as z'ašu esmad n alǵanab wala deǵ esmad waliyyan. Ad t-idnəy Infas Wa Zəddigan harwa da iha tadist n anna-net.

¹⁶ Ad d-issuyəl Kəl-Israyil aggotnen Ëməli-nasan Məššina.
¹⁷ Ënta a du-z-izaran y Ëməli imos anammazul-net, igrâw Infas Wa Zəddigan əd tarna šilat ən win igraw ənnəbi İlyas, fəl a d-awəy alxer gər aytedan əd bararan-nasan, awəy-du inəmməzray s ad ilen tayttay ta əlan aytedan win əxdalnen. Təməwit tədi as z'isəmmutəg y Ëməli tamattay təsimatagat i ləkkum y-as.»

¹⁸ Təzzar inna Zakarayya y angalos: «Məni alyalamat ta di-za-təssusənat as adi ad agu? Ënta nak ayymar waššaran a əmosa, tantut-in dey əglân dağ-as elan wəllen.» ¹⁹ Inn-as Angalos: «Awa nak Jibril, akli ən Məššina wa dat-əs ibaddadan. Ënta a di-d-izimmazalan sər-ək y a dak-agax isalan hossaynen win di. ²⁰ Amaran dad zamas wər təzzəgzanax isalan win dak-əgey da, as z'andinen dağ alwaq-nasan, ad ammadad əmi-nak. Wər za tələsax awal iket wər d-osa əzəl wa dağ z'agu arat wədi.»

²¹ Awen as itaggu tamattay təqqâl i Zakarayya, əqqânan yafawan-nasan y awa t-in-isahhagan dağ adag wa zəddigan. ²² As t-id-igmad, indar-as a dasan-iššiwəl fəlas imi-net a immədadan, a dasan-isisidugun. Ëssanan as arat iyyan a das-d-inafalalan.

²³ As issənda adan-net win əššəxəl dağ Ahan wa Zəwwəran n Əlyibada, iqqal ayaywan-net. ²⁴ Dəffər awen təga tantut-net Elizabet tadist, təzzar təgdal i man-net ətəwənay har təga səmmosat təlil, təgannu: ²⁵ «Awa igi n Ëməli! Ënta dağ-i issanan, ikkas-i asakor wa di-əggatan aytedan.»

Ëtaməl ən təhəwt ən Yaysa

²⁶ Təha Elizabet tallit-net ta n sədisat as izammazal Məššina angalos Jibril s əyrəm as itawannu Nazaret ihân akal ən Galilaya. ²⁷ Issok-ay təmawat iyyat wər nəzday meddan harwada təgât esəm Maryama. Amaran Maryama təsimarkas d aləs igân esəm Yusəf, imosan arat dağ əzzurrəyya n əmənokal Dawəd wa n ənnəbi. ²⁸ Os-et-du angalos, inn-as: «Maryama, ma təxlaka! Ëməli izizabbat-du fall-am arraxmat-net. Issân dağ-am.» ²⁹ Iqqan awal wen eɣaf ən Maryama, idgaz-tat, təzzar ad təsamadran awa imos almaɣna n assalam wen.

³⁰ Inn-as angalos: «A kam-wər-təgəz tasa Maryama, Məššina izizzabbat-du fall-am arraxmat-net. ³¹ Ad taga tadist, təgrəwa barar, tagax-as esəm Yaysa. ³² Ad itəwəsəxmər, agu esəm Barar ən Məššina di n Amadkol. Ad t-akfu Ëməli Məššina taymar n amaraw-net Dawəd, ³³ izar i hayawan ən Yaquub har faw, amaran təmənukəla-net ad təxləl.»

³⁴ Tænna Maryama y angalos: «Manəmmək as z'agu adi ənta nak harwada wər əzdaya meddan?» ³⁵ Inn-as angalos: «A fall-am d-azzabbat Infas wa Zəddigan, talsim tanaya ən Məşşina di n Amadkol, təqqəl-am zun telay, awen da fəlas barar wa za tilex ad agu esəm Əmizdag agu dəx esəm Barar ən Məşşina. ³⁶ Ənâm təşəqqaq-nam Elizabet! Əglân dağ-as elan wəllen mişan təga tadist ən barar. Ənta tas itawannu wər tətulu bararan, tallit-net ta n sədisat a təha əmərədda, ³⁷ fəlas wər t-illa a imosan muxal fəl Məşşina.»

³⁸ Tənn-as Maryama: «Nak taklit n Əməli, itəwəgget-i awa tənneç.» Təzzar ifal-tat angalos.

Iki ən Maryama Elizabet

³⁹ Tənkər Maryama dağ adan en da, təhaz təkka təxrəmt iyyat n akal ən Yahudəyya imosan akal n ədxağan. ⁴⁰ Tos-in ehan ən Zakarayya, təssəslam fəl Elizabet. ⁴¹ Da da xas ad təsla Elizabet y assalam ən Maryama ənta ad izabaggat barar wa ihan tadist n Elizabet, təzzar idnay-tat Infas wa Zəddigan. ⁴² Tədkal Elizabet əməsli-net, tənna: «Togara şidoden kul agaraw n arraxmat, barar dəx wa du-z-igmədan tadist-nam igrâw arraxmat. ⁴³ Awak nak ma əmosa as di-du-tətasu anna n Əməli-nin? ⁴⁴ Da da xas ad əsleç y assalam-nam ənta ad izabaggat barar wa ihan tadist-in fəl tədəwit. ⁴⁵ Təbbilaləç kam təzzigzanat as, awa dam-inna Əməli ad andu.»

Təmmal ta təga Maryama i Məşşina

⁴⁶ Tænna Maryama:

«Əwəl-in immâl adkul n Əməli,

⁴⁷ İman-in isidawat-tan Məşşina

di n Əməçlas-in.

⁴⁸ Fəlas asawad a din-iga

daç təmmədrəyt ən təkliit-net.

A ibazan çur əmərədda

aytedan n azzaman kul ad annin əbbilaləç.

⁴⁹ Fəlas Wa ilan Tarna ig-i aratan zawwarnen.

Esəm-net i zəddigan.

⁵⁰ İtihənəttit y aytedan n azzaman kul

win t-əksudnen.

⁵¹ İga əfus-net imazalan ən təla ən tarna.

İziwazawaz aytedan win ədkalnen iman-nasan.

⁵² İkkas daw muzaran təçmar-nasan,

idkal şiləçqawen.

⁵³ İsayyawan win əlluznen daç awa izodan,

oyya iməççərgas əçquran fassan-nasan.

⁵⁴ İdhal Kəl-İsrayil n eklan-net,

fəlas itihənəttit

⁵⁵ y Ibrahim d əzzurrəyya-net har faw,
imos awen arkawal iga i marawan-nana.»

⁵⁶ Təmal Maryama xur Elizabet har təga edag ən karadat
təlil amaran təqqal aḡaywan-net.

Təhəwt ən Yaxya wa isalmayan day aman

⁵⁷ Osa-du alwaq n iguz n əmzur fəl Elizabet, təgraw
barar. ⁵⁸ İslan mahharagan-net əd şəqqayan-net əhənəttə
zəwwəran wa das-iga Məşşina da, əddəwen əntanay da.

⁵⁹ As əzəl wa n əttam osan-du y ad səmməmkədan barar.
Ərân a das-agin esəm Zakarayya, esəm wa daḡ iga abba-
net. ⁶⁰ Mişan tənn-asan anna-net: «Kala kala! Ad agu esəm
Yaxya.» ⁶¹ Ənnan-as: «Esəm ya wədi wər tələx əşəqqay a
t-igân!»

⁶² Təzzar ad sidugunan y abba ən barar, y a dasan-
iməl esəm was ira ad t-agu barar-net. ⁶³ Isaddagan-asan
Zakarayya a t-id-akfin əsəllum. İktab fall-as: «Esəm-net
Yaxya.» Isammaklal sər-san awen ketnasan. ⁶⁴ Təzzar okay
əmədəd Zakarayya amazay wen da, immora iləs-net, ad
itaggu təmmalen i Məşşina.

⁶⁵ Təggaz tasa aytedan kul win əxsarnen daḡ ihəz-nasan,
wazawazan salan n awa igan den daḡ akal ən Yahudəyya
ketnet wa n ədḡayan. ⁶⁶ Aytedan kul win əslanen awen
ətaffan-tu daḡ wallan-nasan, gannin: «Ma z'iqqəl wa da
barar?» İllikan as issiwar-tu Əməli əfus-net.

Təmmal ta iga Zakarayya i Məşşina

⁶⁷ İdnay İnfas wa Zəddigan Zakarayya wa n abba ən barar,
isannafalal-as Məşşina awal-net, ad igannu:

⁶⁸ «Təmmal i Məşşina,
Əməli n İsrayil,
fəlas masnat a iga daḡ tamattay-net,
isaddarf-tat.

⁶⁹ İkkas-ana-du daḡ ahan n əkli-net
Dawəd Amaḡlas ilân tarna,
⁷⁰⁻⁷¹ a dana-z-agəzan daḡ zəngə-nana,
ikkəs-ana daḡ fassan ən maksanan-nana kul.

İmos awen arkawal iga daḡ mawan n ənnəbitan-net
win irəw, isinafran.

⁷² Əmmək wədi as issəkna təhanint-net
i marawan-nana,
issənda arkawal ən tassaq-net
zəddigan.

⁷³ Arkawal wen ihâd fall-as
y amaraw-nana Ibrahim as,

⁷⁴ a danax-assafsu daḡ zəngə-nana,
fəl a tu-nəḡbəd ši wala tasa ən waliyyan.

⁷⁵ Nəzəddig noxâd iket nəddar.

⁷⁶ Amaran kay barar-in,

a kay iwər esəm ənnəbi ən Məşşina di n Amadkol,

kay a du-z-izaran y Əməli

fəl a dat-əs takna tarrayt-net,

⁷⁷ təssusəna tamattay-net

as efsan əllân xur təsureft ən bakkadan.

⁷⁸ Awen itagg-ay Əməli-nana Məşşina

fəl əssəbab ən təhanint tagget ta tu-təhat.

Adi a fəl dana-du-z-asu Əlməsix

ola əd gəmmud ən təfuk,

⁷⁹ fəl ad imələwləw ənnur-net

fəl aytedan win əqqimnen daɣ şiyay,

əhân telay ən təmattant,

izəzzəluləɣ takkolen-nana daɣ tarrayt ta n alxer.»

⁸⁰ Ad idaggal Yaxya, tətawad-t-id tayttay-net. Izday ikallan ən saffan har əzəl wad issosan Kəl-İsrayil fəl man-net.

2

Təhəwt ən Ƴaysa

¹ Azzaman win daɣ z'ihəw Ƴaysa a daɣ omar Qaysara Ogəstəs wa n əttəbəl n Ərrum s ad uddanan aytedan kul win taymar-net. ² Tuddant ten ənta a tazzarat. As təga Kirinəyas a imosan əmuzar n akal wa n Surəya.

³ Aytedan kul gallin ad uddanan. Əkkulluk n awedan ikka aɣrəm ən marawan-net. ⁴ Adi fəl igmad Yusəf ənta da aɣrəm wa n Nazaret ihân akal ən Galilaya, igəzzay s əɣrəm n aljad-net əmənokal Dawəd a t-imosan aɣrəm ən Betalxam, ihân akal ən Yahudəyya, ⁵ fəl a daɣ-as uddan. Iddew əd Maryama dər isimarkas. As itaggu awen da təga tadist. ⁶ Əhân Betalxam as fall-as iga alwaq n iguz n əmzur. ⁷ Təggaz Maryama amzur n aɣafadday-net. Itaggu awen dəgma n əsəgən n aharay osaxan d ahan wa xur əzzəbben fəlas edag a wər əgrewan daɣ ahan en. Təttal barar daɣ əfər, təssəns-ay daɣ əɣlal ilân den.

Ənəfilal wa d-iga angalos i madanan

⁸ Akal en əhân-tu madanan əssimbarnen eharay-nasan. ⁹ Den da a d-inafalal dat-san angalos n Əməli, təsammalawlaw tanaya n Əməli edag wa əhan, əgan tərəmməq zəwwərat. ¹⁰ Inn-asan angalos: «Ad wər tərəməɣam, isalan olaxnen a dawan-d-ewaya a du-z-awəynen tədəwit tagget əs tamattay ketnet. ¹¹ Azalada Əməɣlas-nawan ihəw daɣ əɣrəm n Dawəd. Ənta a imosan

Ēlməsix Ēməli. ¹² Ēnta da awas tu-za-təzdəyam: "Ad tənəyam ajanxay ittalan daɣ əfər, isrâd daɣ əɣlâl."»

¹³ Wala a ihogan inafalal-du agan zəwwəran n angalosan ɣur wen, əmmâlan Məššina gannin:

¹⁴ «Təmmal i Məššina daɣ jənnawan, alxer daɣ əddənet y aytedan win əhanen agna-net.»

¹⁵ Ēqqalan angalosan ijənnawan ɣas, namannan madanan: «Ēndawat Betalxam, ad nənəy awa danaɣ-imal Ēməli da.» ¹⁶ Təzzar əglañ əhâzan. Osan-in Maryama əd Yusəf d ajanxay, isrâd daɣ əɣlâl. ¹⁷ As ənayan madanan barar, əssoɣalan awa dasan-itawannan sər-əs. ¹⁸ Aytedan kul win əslanen y awa ənnan madanan isimaklal sər-san awen. ¹⁹ Maryama ənta, tətât isalan en kul daɣ man-net, tənazzar daɣ-san. ²⁰ Təzzar əqqalan madanan əmmâlan adkul ən Məššina, taggin-as təmmalen fəl aššaddat n arat kul was əslan əd wa ənayan, əs ketnet iga s əmmək wa daɣ as dasan-ittəmal.

²¹ As əzəl wa n əttam, itawasamankad barar, itawagg-as esəm Ƴaysa, imos as esəm wa da a imal angalos y anna-net dat igi-net tadist.

Ēməwəy ən Ƴaysa s Ahan wa Zəwwəran n Ēlɣibada

²² As d-ewad alwaq ən zazdag wa imal Ēttawret n ənnəbi Musa, iddew Yusəf əd Maryama s əɣrəm ən Yerusalam fəl ad əzzəzdəgan iman-nasan. Ewâyan deɣ barar y ad tagin da təɣlift ən Məššina, ²³ s əmmək as iktâb daɣ əššəriɣa n Ēməli as «*Barar kul wa n aɣafadday, ad iskət y Ēməli.*»

²⁴ Yusəf əd Maryama issiwar-tan əššəriɣa n Ēməli daɣ tarrayt n əzəzdəg-nasan ad akfin təzəgzəmt ən sanatat tədəbren šin əsuf madəɣ sanatat šin əɣrəm.

²⁵ Aɣrəm ən Yerusalam ixsâr daɣ-as aləs igân esəm Simɣon n alɣadil n əmiksad ən Məššina. Igâ attama n Ēnəssəsməd a du-z-asin assafsu Israyil. Simɣon en izzîbbad-du fall-as Infas wa Zəddigan, ²⁶ s ənta a das-isanafalan as wər tu-z-iba wər inay Ēlməsix n Ēməli.

²⁷ Eway-t-id Infas ən Məššina s Ahan wa Zəwwəran n Ēlɣibada. Imazayyat-du əd marwan ən Ƴaysa tamazalan s alɣadat ta tan-issəwar əššəriɣa daɣ batu ən barar-nasan.

²⁸ Idkal Simɣon barar, iga təmmal i Məššina, inna:

²⁹ «Ēmərədda Ēməli ad tayyaɣ akli-nak ad t-iba daɣ alxer,

id awa di-tənnəy inda,

³⁰ fəlas ənaya əs šittawen šin-da-nin

Ēməɣlas wa dana-du-təssoka,

³¹ wa du-təsammatagay i təmattiwen kul,

³² imos ənnur

as z'ikkəsan day šiyyay

aytedan win wər nəmos Kəl-Əlyəhud,

awəy-du deḡ adkul əs tamattay-nak Kəl-İsrayil.»

³³ Abba-net d anna-net əqqānan ɣafawan-nasan y aratan win sər-əs tawanninen da. ³⁴ Təzzar ittar-asan Simyon a dasan-igan albaraka, amaran inna i Maryama anna ən Ƴaysa: «Əssən as barar a isinafran-tu Məššina fəl ad d-awəy agadal əd tanakra ən Kəl-İsrayil aggotnen, iqqəl əssəbab n ənəməzray gər aytedan. ³⁵ Əmmək wədi as z'isəffəggu awa ihan iwallan n aytedan aggotnen. Kam iman-nam a kam-izzuzər əwəl zun tu-tərzâg takoba.»

³⁶ Təll-ay deḡ tənnəbit iyyat təknât tuşaray təgât esəm Xənnətu wələt Fanwal ən tawşet ta n Aşşir, ədâsan əssa elan n azalaf day təmmədrəyt-net. ³⁷ A aba aləs-net wər təles azalaf, har təga əttamat təmərwen n awatay d əkköz. Faw təha Ehan wa Zəwwəran n Əlyibada. Təḡbâd Məššina ehad ezal, tətuzam, tətattar. ³⁸ Tamazayt tenda a daḡqan du-tosa, təga igodan i Məššina. Ad tətəggu isalan ən Ƴaysa y aytedan kul win əganen attama n ad d-izəzzəbbət Məššina tədarfit-net fəl Yerusalam.

³⁹ As əssəndan marwan ən Ƴaysa igi n arat kul wa tan-issəwar əşşəriḡa n Əməli, əqqalan aḡrəm-nasan Nazaret ihan akal ən Galilaya.

⁴⁰ Idəggal barar, itilu tayttay d əgərri, izazabbat-du fall-as Məššina arraxmat-net.

Assa ən Ƴaysa Ehan wa Zəwwəran n Əlyibada imos aw maraw elan d əşšin

⁴¹⁻⁴² Awatay kul əggizzayan marwan ən Ƴaysa s aḡrəm ən Yerusalam y əmud was itawannu wa n Akkay, imos awen alḡadat n əmud wen. As iqqal Ƴaysa aw maraw elan d əşšin əddewan dər-əs s əmud wen.

⁴³ As aḡradan adan win amud, əqqalan aḡaywan, Ƴaysa amaran iqqim-in day Yerusalam wər əssenən day awen.

⁴⁴ A əḡilan iha aljamayət ən məşşukal win dər əddewan. As əgan əşikəl n əzəl, a das-saggadan day şəqqayən-nasan əd təməzdəyt-nasan. ⁴⁵ Mišan wər t-əgrewan, təzzar əqqalan Yerusalam, saggadan-as.

⁴⁶ As əzəl-nasan wa n karad gar-essan dər-əs, osan-t-id day Ahan wa Zəwwəran n Əlyibada inixama əd musanan n Əttəwret, ipsisam-asan, isastan-tan deḡ. ⁴⁷ Aytedan kul win əslanen y awa igannu, təsimakləl sər-san tayttay-net d aljawaban-net. ⁴⁸ As t-ənayan marwan-net əhagan, tənn-as anna-net: «Barar-in ma imos awa dana-təge da?

Nak d abba-nak təššiwaš-ana tayara-nak, nosa edag kul nəsaggad-ak.» ⁴⁹ Inn-asan: «Ma fel za as di-təsaggadam? Masnat a wər təgem as təlzâm-i təximit daɣ ahan n Abbanin?» ⁵⁰ Mišan wər əgren awa dasan-inna den.

⁵¹ Iddew Ƴaysa əd marwan-net, zagadayan əqqalan aɣrəm ən Nazaret, ibbirdag-asan. Anna-net tətât aratan en kul daɣ man-net. ⁵² Idaggal Ƴaysa, tətittəy təla-net əgərri, ikannu gərrezat i Məššina d aytedan.

Ƴaysa əd Yaxya wa isalmayan daɣ aman

3

Təlxutbat ən Yaxya

Təsəntit n əššəɣəl ən Yaxya

¹ Awatay wa n maraw əd səmmos ən Qaysara Tabirəyas da taymar, Fons Bilatəs a imosan əmuzar n akal wa n Yahudəyya, amaran Herod ixkâm fəl akal wa n Galilaya, amaqqar-net Filibus ixkâm fəl wa n Iturayya əd wa n Tərakonit, Lisanəya ənta ixkâm fəl akal wa n Abila. ^{2a} Xânan əd Kayif əntanay əmosan ilimaman win zawwar-nen. ^{2b} Awatay wen da a d-izzəbbat awal ən Məššina fəl Yaxya ag Zakarayya daɣ əsuf. ³ Dəffər awen illil Yaxya ikallan kul win ahanen attayan n agarew wa n Yordan, itaggu y aytedan təlxutbat, igann-asan ad təwəsəlməyan daɣ aman imos awen arat issiknan tətubt-nasan, fəl ad əgrəwan təsurreft ən bakkadan-nasan.

⁴ Emmək əddi was tənda batu ta iktab Ənnəbi Isayas, as inna: «*Aləs iyyan idkâl əməsli-net daɣ əsuf igannu: "Səmmutəgat abaraqqa y Əməli! Təsəssiɣədam tarrayen dat-əs!* ⁵ *Id t-illa ənahoy ketnet ad inbəl. Idɣayan əd gefan ad ərəsan, tarrayen šin əfraynen ad ayədnat, ibaraqqa win wər nogda ad agdin* ⁶ *Inəy awedan ketnet əlyillas wa d-izazzabbat Məššina."*»

Təlxutbat ən Yaxya

⁷ Adi a fəl igannu Yaxya i təmattiwen šin t-idu-tasinen y a tanat-issəlməy daɣ aman: «Xa taššolen šin! Ma kawan-issosanan ədərrəg y attadib ən Məššina wa d-izayan. ⁸ Daɣ adi taggiwat imazalan olaynen təsəttəddim sər-san tətubt-nawan! Wər igda ad təgannim daɣ man-nawan: "Nakkanay əzzurrəyya n ənnəbi Ibrahim a nəmos", fəlas silakanay-awan as Məššina ifrâg ad isəmməttəy šihun šin təhannayam da, ixlək-du daɣ-asnat əzzurrəyya y Ibrahim! ⁹ Agat ənnəyat! Tazəft harwa əmərədda da təmmotag y a du-təsəddəngər y eškan. Daɣ adi ašək kul wa wər nətirəw aratan olaynen ad itəwəxtəs, itəwəgər-in daɣ təmsay.»

Emmæk was za nagu alxal wa imal Yaxya

¹⁰ A tu-sastanan aytedan, gannin-as: «Daɣ adi mas danaɣ-iwar a tu-nagu?» ¹¹ Inn-asan: «Awedan wa ilan əşšin səlsa, akf-et iyyan i wa tu-wər-nəla; wa ilan a itša, akfet daɣ-as wa tu-wər-nəla.»

¹² Inabazan n amana əntanay da, tasin-du Yaxya fəl a tan-issəlməx daɣ aman, ənnan-as: «Əşşex, mas danaɣ-iwar a tu-nagu?» ¹³ Inn-asan: «Ad wər təzzərzəmam a ogaran awa dawan-itawannan.»

¹⁴ Əssəstanan-tu deɣ sojitan, ənnan-as: «Nakkanay za, mas danaɣ-iwar a tu-nagu?» Inn-asan: «Ad wər tərəkəbam daɣ awedan waliyyan azrəf-net, wala deɣ təssəwəram-tu bahu. Agdat s alxaq-nawan.»

Assa n Əlməsix

¹⁵ Aytedan kul win əslanen y awa igannu Yaxya, əgân attama; akk awedan isamadranan daɣ əwəl-net kud Yaxya en da a imosan Əlməsix wala. ¹⁶ Awen da fəl dasan-inna Yaxya ketnasan: «Nak, aman a daq qawan-salmaɣa, mišan izay-du aləs s awa di-iga daɣ şigrat, wər eweda wala arra ən suɣan ən ɣateman-net. Ənta Infas Wa Zəddigan əd təmsay a daq qawan-z-issəlməx. ¹⁷ Iha əlmital n awedan ittâfan tesayt y ad izzəzər alkama-net. Işadaw alkama daɣ tadangawt-net, şixal amaran ag-enat daɣ təmsay təbilaglagat faw.»

Iguz ən Yaxya kasaw

¹⁸ Iгла Yaxya daɣ amel n Əlinjil, itaggu y aytedan ənnəsixatan wiyyad aggotnen.

¹⁹ Herod amaran wa n əmənokal n akal ən Galilaya əruɣmatan a das-iga daɣ batu ən Herodəyas təmosat taɣur amadray ən Herod en da igân esəm Filibus, ig-âs deɣ wiyyad əruɣmatan fəl arak mazalan labasnen kul win hadatnen iga. ²⁰ Işşota Herod fəl arak mazalan win den kul igi ən Yaxya daɣ kasaw.

Ətəwəsəlməx ən Ƴaysa daɣ aman

²¹ As tawasalmaɣan aytedan kul daɣ aman, itawasalmaɣ daɣ-san Ƴaysa ənta da. Itattar alwaq wen da as ənnolaman jənnawan, ²² izzəbbat-du fall-as Infas wa Zəddigan iha şaşşelan ən tədabert, igmad-du əməsli ijənnawan, inna: «Kay a imosan Barar-in əknex tara, təssinda-du agna-nin.»

Aljad ən Ƴaysa Əlməsix

²³ Ila Ƴaysa edag ən karadat təmərwən n awatay as issənta əşşəxəl-net. Əttâfan aytedan as ag Yusəf wa n ag Heli.

24 Heli ənta ag Mâtat, Mâtat ag Lebi,
 Lebi ag Malki, Malki ag Yannay, Yannay ag Yusəf,
 25 Yusəf ag Matasiyas, Matasiyas ag Amos,
 Amos ag Nahum, Nahum ag Xasli, Xasli ag Naggay.
 26 Naggay ag Matti, Matti ag Matasiyas,
 Matasiyas ag Samxi, Samxi ag Yosax, Yosax ag Yoda,
 27 Yoda ag Yohanan, Yohanan ag ʔaysa,
 ʔaysa ag Zərubabil, Zərubabil ag Assalat, Assalat ag Nayri,
 28 Nayri ag Malxi, Malxi ag Addi, Addi ag Kosam,
 Kosam ag Almadama, Almadama ag Er,
 29 Er ag ʔaysa, ʔaysa ag Alyazar, Alyazar ag Yorim,
 Yorim ag Mâtat, Mâtat ag Lebi,
 30 Lebi ag Simxon, Simxon ag Yahuda,
 Yahuda ag Yusəf, Yusəf ag Yunam, Yunam ag Ilyakim,
 31 Ilyakim ag Malaya, Malaya ag Mayna,
 Mayna ag Mâtat, Mâtat ag Natan, Natan ag Dawəd,
 32 Dawəd ag Yasay, Yasay ag ʔubayd,
 ʔubayd ag Boxaz, Boxaz ag Sala, Sala ag Nasun,
 33 Nasun ag ʔaminadab, ʔaminadab ag Admin,
 Admin ag Arni, Arni ag Xasrun, Xasrun ag Farəs, Farəs ag
 Yahuda,
 34 Yahuda ag Yaqub, Yaqub ag Isəhaq,
 Isəhaq ag İbrahim, İbrahim ag Terax, Terax ag Naxur,
 35 Naxur ag Sarux, Sarux ag Raggaw,
 Raggaw ag Falax, Falax ag ʔabbir, ʔabbir ag Salax,
 36 Salax ag Kaynam, Kaynam ag Arfakšad,
 Arfakšad ag Sam, Sam ag Nux, Nux ag Lamax,
 37 Lamax ag Matusala, Matusala ag Henox,
 Henox ag Yarit, Yarit ag Malelyal, Malelyal ag Kaynam,
 38 Kaynam ag Enus, Enus ag Set, Set ag Adəm,
 Adəm ənta Məššina t-id-ixlakan.

4

Ətəwəjərrab ən ʔaysa

1 İgmad ʔaysa tamawen n agarew wa n Yordan idkâr-tu
 Infas wa Zəddigan. Infas wa da a t-issokan teneray. 2 İga
 dağ-as əkkozat təmərwen n əzəl itajərrab-tu İblis. Adan
 win kul ig-en wər itša wala, as əğradan ih-ay laz.

3 Inn-as İblis: «Kud kay Barar ən Məššina, taməra təhunt
 ta s ad təqqəl amensay.» 4 Inn-as ʔaysa: «Wərgəğ ənnan
 Əlkəttaban: "Awedan wər itəddər əs mensewan ɣas."»

5 İkka dər-əs İblis edag iknan əhuki, issəsəd-tu dağ
 təxmaren kul n əddənet dağ ellaf ən šat. 6 Amaran inn-
 as: «A kay-akfa təxmaren en kul əd təhussay-nasnat fəlas
 tiwakfanat-i hakkağ-qanat değ i was tanat-əreğ. 7 Dağ adi

as di-tæssajada ad tegrəway awen kul.» ⁸ Inn-as Ƴaysa: «Wərgex ənnan Ǝlkəttaban: "Ǝməli-nak Məššina as za tæssajəda, ənta Ƴas a za təybəda."»

⁹ Təzzar ikka dər-əs Iblis Yerusalām, issəbdad-tu fəl afalla n Ahan wa Zəwwəran n Ǝlɣibada, inn-as: «Kud kay Barar ən Məššina tətərogge, ¹⁰ fəlas ənnan Ǝlkəttaban: "Ad amər angalosān-net a kay aƳəzan dəɣ əššur," ¹¹ iktāb dəɣ as: "A kay-əkbəlan dəɣ fassan-nasan fəl a dak-wər-tənkəf təhunt."» ¹² Inn-as Ƴaysa: «Wərgex za Ǝlkəttaban di ənnān: "Ad wər tətəjjarraba Ǝməli-nak Məššina."»

¹³ As t-iɣrad Iblis əjərrəb, igla oyy-ay har sər-əs iləs agaraw ən tarrayt.

Ǝššəɣəl ən Ƴaysa dəɣ Galilaya

Isalan ən Taymar ta n Məššina

Ǝsəssəɣri ən Ƴaysa dəɣ Nazaret

¹⁴ Dəffər awen, iqqal Ƴaysa akal ən Galilaya, təh-ay tarna n Infas wa Zəddigan. Təffəzzat sallat-net dəɣ akal en ketnet. ¹⁵ Isasayru aytedan dəɣ nan win əlɣibada ən Kəl-Ǝlyəhud, ketnasan əssiɣmaran-tu.

¹⁶ Osa dəɣ Ƴaysa Nazaret, aɣrəm wa dəɣ idwal. As əzəl wa n təsanfawt iggaz ehan wa n əlɣibada ən Kəl-Ǝlyəhud imos awen arat itaggu faw. Ibdad y ad aɣru awal ən Məššina. ¹⁷ Itawakf-ay-in əlkəttab wa n ənnəbi Isayas. Ikkas y əlkəttab aqda wa iga, olam fəl adag a dəɣ iktab as: ¹⁸ «Iwār-i Infas n Ǝməli, fəlas isinafran-i y ad əməlay isalan n Ǝlinjil i tələqqawen. Izimazal-i-du y ad aƳay isalan i win tawattafnen, əgrəwan iman-nasan, əzzuzəyay iməddəɣal, aytedan win tawadgaznen dəɣ aƳaq-qan dəɣ tara ən man-nasan, ¹⁹ əməlay awatay taha arraxmat n Ǝməli.»

²⁰ As iɣrad Ƴaysa təɣaray ihar əlkəttab, issoɣal-tu y amaššayal n ahan wa n əlɣibada ən Kəl-Ǝlyəhud, iqqim. Ǝgaran dəɣ-as aytedan kul win əllanen den šittawen.

²¹ Amaran inn-asan: «Azalada awal ən Məššina was təslam da, inda.» ²² Ketnasan əmmālan-tu. Simaklalnat sər-san batuten olaynen šin du-gammadnen imi-net, ad gannin: «Ak awa wərgex ag Yusəf?»

²³ Inn-asan Ƴaysa: «Illikan as a di-du-tassaktim iggi wa innan: "Anasmagal, zuzəy iman-nak," təzzar tannim-i: "Agu dəɣ akal-nak da da awas nəsla as təgêq-qu dəɣ əɣrəm ən Kafarnahum."» ²⁴ Inn-asan dəɣ: «Ǝggəyyay silakanay-awan as wər t-illa ənnəbi itiwəqbalan dəɣ aɣrəm wa dəɣ idwal. ²⁵ Amaran a dawan-əmələ tidət: Dəɣ elan n ənnəbi Ilyas akal n Israyil əhānat-tu tədoden aggotnen əs wər ədderan meddan-nasnat. Elan en da a dəɣ iga akonak

karad elan d aganna wər iwet, iga laz labasan daɣ akal ketnet. ²⁶ Dər iga awen da ya, wər izammazal Məššina ənnəbi Ilyas əs waliyyat daɣ tədoden en. Kalar izammazal-tu s iyyat təxsârat daɣ təxrəmt ta n Sarəfta təhât akal ən Sidon. ²⁷ Əhân deɣ kətrutan aggotnen akal n Israyil daɣ elan n ənnəbi Elisayas, mišan wər tan-iha i itawazozayan ar Naɣman wa n akal ən Surəya.»

²⁸ As əslan aytedan win əhanen ehan n əlyibada y awen, iggaz-tan alham labasan. ²⁹ Əbdadan, əgan ifassan da Ƴaysa, əkkasan-tu daɣ əxrəm, ewayan-tu s afalla n ədɣaɣ wa fəl ikras əxrəm y ad t-əgəran daɣ əxəxi, iba-tu. ³⁰ Mišan illam Ƴaysa gar-essan igla.

Əššəxəl ən Ƴaysa daɣ Kafarnahum

³¹ Dəffər awen iras Ƴaysa əs təxrəmt təgât Kafarnahum təhât ənta da akal wa n Galilaya, ad isasaɣru aytedan daɣ ahan n əlyibada ən Kəl-Əlyəhud daɣ jilan win təsanfawt. ³² Isimaklal sər-san əmmək was isasaɣru, fəlas əsəssəxri-net in awedan ilân tanaya.

³³ Ehan n əlyibada wen, ih-ay aləs iha aggəsuf. Idkal aləs wen əməsli-net, ad igannu: ³⁴ «Xa! Ƴaysa wa n Nazaret, ma daɣ-na tareɣ? Əngəm assa a du-təgeɣ y a dana-təhləka? Əssanaɣ awa təmosa: Əmizdag wa d-izammazal Məššina.» ³⁵ Iharašsat-tu Ƴaysa, inn-as: «Fəstu, təgmədaɣ aləs di!» Təzzar iggədlə aggəsuf aləs en gər aytedan, amaran igmad-tu wər das-ixšed arat. ³⁶ Əhagan aytedan ketnasan, ad tinəmännin gar-essan: «Ma imos almaɣna n awal n aləs wa? Kələsuf da ittâf daɣ-san tanat, itamar-tan əs tanaya, gammadan aytedan.» ³⁷ Təwazawaz sallat ən Ƴaysa daɣ id t-illa adag daɣ akal en kul.

³⁸ As igmad Ƴaysa ehan n əlyibada ən Kəl-Əlyəhud, ikka ehan ən Simɣon. As itaggu awen tədaggalt ən Simɣon təfrâyat, tənnid wəllen, təzzar əgməyan daɣ-as aytedan a tat-izzuzəy. ³⁹ Inaz-in fall-as Ƴaysa, isannarɣam i tanaday, təzzar təwat fall-as. Tənkar daɣ təmazayt ten da a tan-təsiməgurit.

⁴⁰ As tuda təfuk, ewayan-du sər-əs aytedan imirananasan əgânen šiwərnawen əmosnen əzzənəfan. Akk iyyan issəwar-tu ifassan-net, izzozay-tu. ⁴¹ Gammadan deɣ kələsuf aytedan aggotnen, saɣaren kələsuf en, gannin: «Kay Barar ən Məššina», mišan isannarɣam-asan, igdalasan awal, id masnat a əgan as ənta a imosan Əlməsix.

⁴² As affaw, igmad Ƴaysa aɣrəm, ikka edag issufan. A das-təsaggad tamattay har t-in-tosa. Ad gamməyan təməwit tas das-z-əgdəlan a tan-ifəl. ⁴³ Mišan inn-asan: «Iwâr-i

ad əmələ Əlinjil, imosan isalan ən Tağmar ta n Məşşina, i xəрман win hadatnen əntanay da, fəlas adi da a fəl d-əmmozała.» ⁴⁴ Təzzar igla Ҳaysa, itaggu təlхutbat dağ nan n əlхibada ən Kəl-Əlyəhud win n akal ən Yahudəyya.

5

Inəttulab ən Ҳaysa win azzarnen

¹ Əzəl iyyan ibdād Ҳaysa dağ təşəşwit n agaraw wa n Ganazaret, tətanabdağ fall-as tamattay fəl ad aslin y awal ən Məşşina wa immal. ² Inay Ҳaysa əşşin əğlalan n aman dağ təşəşwit n agaraw. Iğlalan win əgmâdan-tan məssawsan, takkasan təjjərgənt dağ sangaytan-nasan win as tabazan kifitan. ³ Təzzar iggaz dağ-san wa n Simxon, igmay dağ-as a din-izzənkekəz fəl təşəşwit, amaran iqqim ad isasağru tamattay.

⁴ As iraz dağ əsəssəxri inna i Simxon: «Akku kay əd midawan-nak dad zagrotan aman, təgəram sangaytan-nawan, tabəzam kifitan.» ⁵ Inn-as Simxon: «Əşşex, ahad iyrâdan a nəğa nəşğâl eges wər nəbez wala, mişan ya zama adi a tənneğ, adi za ad əgəra sangaytan dağ aman.» ⁶ Əgan awa dasan-inna Ҳaysa, təzzar əbazan kifitan s awa əgan dağ igət har əbukən sangaytan-nasan y azarru. ⁷ Ad tallafan i midawan-nasan win əhanen ağlal n aman wa hadan y a d-aglin a dasan-ilalan. Osan-du, ədnayan əşşin əğlalan win den har əbukən y ədəkəyyi.

⁸ As inay Simxon Butros awen, issəjad i Ҳaysa, inn-as: «Ya Əməli, nəməggəg dər-i fəlas anasbakkad a əmosa.» ⁹ Innâ awen fəlas ənta əd midawan-net ketnasan as əhagan xur anay-nasan igət ən kifitan win əbazan. ¹⁰ Eheg wa iga Simxon den, ənta a iga Yağub əd Yaxya win maddanəs ən Zabadağ dər idrâw əşşəğəl. Təzzar inna Ҳaysa i Simxon: «Ad wər tərməğa, a obazan xur əmərədda, təqqalam meddan a sər-i du-za-tawaynen aytedan y a tan-assafsa dağ bakkadan-nasan.»

¹¹ Amaran əssoğalan iğlalan-nasan təgadamayt n agaraw, oyyan arat kul əlkaman-as.

Təmazaq əd Farisaytan

Əzuzəy ən Ҳaysa aləs iğrâw kətru

¹² Iha Ҳaysa ağrəm iyyan, as t-inay aləs as təlsa təwərna ən kətru elam-net ketnet. Ikk-ay-du issəjad dat-əs, onsaytu, inn-as: «Əməli, as tareğ adi, təfrâgağ a di-təzzuzəyağ, izdaga.» ¹³ Izzal-in Ҳaysa əfus-net, idas-tu, inn-as: «Areğ adi, əzzəy tizdaga!» Amazay wen dağ ad izzay dağ kətru. ¹⁴ Təzzar issənkad-tu Ҳaysa, inn-as: «Ənəy za, ad wər

təmøla y awedan waliyyan awa igan da, amaran aglu tassaknaḡ iman-nak y əlimam, taga takutay ən tazdak ta kay-issəwar əššəriḡa n ənnəbi Musa, ad iqqəl adi y aytedan təgəyya ən təməzzəyt-nak.»

¹⁵ Dər iga awen da ya, təgla sallat ən ʔaysa tətittəy, tətiddaw fall-as tamattay tagget fəl a das-təssəsəm, izzuzəy deḡ šiwərnawen-nasan. ¹⁶ Mišan ənta, itakku idaggan əssufnen y a daḡ-san iḡbəd Məššina.

Tarna ən ʔaysa

¹⁷ Əzəl iyyan isasaḡru ʔaysa, əqqiman Farisaytan əd musanan n Əttawret a d-əgmâdnən šiḡarmaten kul šin n akal ən Galilaya əd wa n Yahudəyya əd Yerusalam. As itaggu awen ʔaysa igrâw ḡur Əməli tarna n əzuzəy n aytedan. ¹⁸ Har d-osan meddan wiyyad misawaynen aləs n anabdon daḡ təssut. Ad gammayan a dər-əs əggəzan, assansin-tu dat ʔaysa. ¹⁹ As dasan-aba təməwit as dər-əs əggəzan fəl igət n aytedan, əwaran afalla ən taḡazamt, olaman əsəfəl-net, əssərasan-tu daḡ-as iha təssut-net har təssənsan daḡ ammas ən tamattay, dat ʔaysa.

²⁰ As inay ʔaysa əzəgzan-nasan, inna y anabdon wen: «Ibakkadan-nak tiwasarafan-ak.» ²¹ Əslan musanan n Əttawret əd Farisaytan y awen ḡas, ad gannin daḡ man-nasan: «Ma imos aləs wa itaggin amadraw da? Ma ifragan əsurəf ən bakkadan ar Məššina ḡas?»

²² Issan ʔaysa awa samadranan, inn-asan: «Mafəl tətihənzəmmem adi daḡ wallan-nawan? ²³ Ma ogaran tərḡəsəy gər i innan: "Tiwasarafan-ak bakkadan-nak" meḡ ak i innan: "Əbdəd jəwənkət?" ²⁴ Amaran areḡ a təssənam as nak Ag Aggadəm ələḡ daḡ əddənet tanaya a di-təšišawadat ad əssurəfa y awedan ibakkadan-net.» Təzzar inna ʔaysa y anabdon: «Əbdəd, tədkəla təssut-nak, takkaḡ aḡaywan-nak.»

²⁵ İbdad aləs wen tamazəyt ten da dat aytedan kul, idkal təssut-net, iqqal ehan-net, immâl Məššina. ²⁶ Aytedan kul isimakləl sər-san awen wəllen. Əmmâlan Məššina, təh-en tasa gannin: «Azalada nənây aratan as wər kala ətawanayan!»

Awa inna ʔaysa əs nashakkadan

²⁷ İgmad ʔaysa edag en, ogga aləs iyyan igân esəm Lebi iqqim daḡ adag wa n əzərzəm n əzrəf ən takəs, inn-as: «Əlkəm-i.» ²⁸ İbdad Lebi, oyya awa iha kul, ilkam i ʔaysa.

²⁹ Dəffər awen iga Lebi i ʔaysa iməgura zawwarnen daḡ ahan-net. Ədrawan d aytedan aggotnen ən nəzzərzam ən takəsən d aytedan wiyyad.

³⁰ Ænayan Farisaytan æd musanan-nasan win Ættawret awen ƣas gatantanan, ad gannin i nøttulab ən Ƴaysa: «Mafel tædrâwam æd næzzæzæm ən takæsen æd nas-bakkadan?» ³¹ Inn-asan Ƴaysa: «Aytedan wær næfray, wær æddærarænan s anasmagal, imiranænan a sær-æs æddærarænen. ³² Nak wær d-oseƣ fæl æddænil n aytedan win ƣur iga as oƣadân, kalar æmazal ad-ægeƣ fæl a d-aƣraƣ inasbakkadan æs tètubt.»

Awa inna Ƴaysa s æzum

³³ Dæffær awen ænnan-as Farisaytan æd musanan n Ættawret: «Inøttulab ən Yaxya æd win Farisaytan tuzaman faw, tattaran, win-nak amaran tattin sassin.» ³⁴ Inn-asan Ƴaysa: «Awak tæfrâgam ad tæzzuzæmam ilagatan a ƣur illa æmazlay? ³⁵ Mišan ælkâman adan a ƣur-san z'ammadkal æmazlay. Adan win di, ad uzaman.»

³⁶ Ig-asan Ƴaysa tangalt iyyat, inn-asan: «Wær t-illa i du-z-ikkæsan šikæst dæƣ tabdoq taynayat y a tat-iwøt dæƣ iyyat waššarat, fælas as iga adi, ad iƣšæd tabdoq ta taynayat, šikæst dæƣ ta dæƣ-as d-ikkas wær tænnøha æd tabdoq ta waššarat. ³⁷ Wær t-illa dæƣ i z'agin esmad n alƣanab aynayan dæƣ gædad. I igan adi ad abbaqgen gædad win, tæzzar affatu dæƣ esmad æd gædad. ³⁸ Kalar esmad n alƣanab aynayan, ibøyaƣ aynaynen a dæƣ itawaggu. ³⁹ Awedan išwân esmad n alƣanab waššaran, wær z'iru dæffær adi tessay ən wa aynayan, fælas ad annu: "Wa waššaran a izodan.»

6

Ƴaysa d æzæl wa n tæsanfawt

¹ Æzæl iyyan imosan æzæl wa n tæsanfawt ən Kæl-Ælyæhud, ijiwankat Ƴaysa dæƣ tæwægæas n alkama, rassaban-du nøttulab-net šixaxanæn, tifæffæren-tanat gær fassan-nasan, tattin-tanat. ² Tæzzar ænnan-asan arat dæƣ Farisaytan: «Mafel tætaggim arat xarâman dæƣ æzæl wa n tæsanfawt?» ³ Ijjæwwab-asan Ƴaysa, inn-asan: «Ak tæƣaray a wær tægæm awa iga ænnøbi Dawød æzæl wa t-iggaz gælæk ønta æd midawan-net? ⁴ Awak wærgæƣ iguz a iga ehan ən Mæššina, idkal šigælwen šin ømosnen takutay tæskâtat i Mæššina æs limaman ƣas as tæxalal tattay-nasnat, itša dæƣ-asnat, ikfa dæƣ-asnat dæƣ aytedan-net?» ⁵ Inn-asan Ƴaysa dæƣ: «Nak Ag Aggadæm a ixkaman fæl æzæl wa n tæsanfawt.»

⁶ Æzæl iyyan ən tæsanfawt ən Kæl-Ælyæhud, iggaz Ƴaysa ehan n ælƣibada ən Kæl-Ælyæhud ad isasaƣru. Ehan-en ih-ay alæs as immût øfus-net wa n øƣil. ⁷ Ægaran dæƣ-as musanan n Ættawret æd Farisaytan šittawæn fæl ad æssønæn kud ad

izzuzəy awedan daχ əzəl wa n təsanfawt wala, fəl tara n ad əgrəwan əddəlil əs təxtəst-net.

⁸ Ƴaysa ənta issân awa ihan iman-nasan. Inna y aləs was immût əfus-net: «Ənkər, əbdəd daχ ammas n əljəməχat.» Inkar aləs, ibdad. ⁹ Təzzar inn-asan Ƴaysa: «Əssistanaq-qawan, awak xalal daχ əzəl wa n təsanfawt igi n arat olâχan meχ igi n a labasan, ereg n awedan daχ təmattant meχ awak šiyyit-net iba-tu?» ¹⁰ Issəlal-tan Ƴaysa asawad-net ketnasan, amaran inna y aləs was immût əfus-net: «Əzzəl əfus-nak» Iga awa das-inna, izzay əfus-net.

¹¹ Arat wen iga daχ-san alham labasan, ad tinəməšiwiran gar-essan fəl awa z'agin i Ƴaysa.

Ƴaysa isassaχru inəttulab-net

Əsənnəfrən ən Ƴaysa inəttulab win maraw d əššin

¹² Adan en da a daχ ikka Ƴaysa adχaχ iyyan y a fall-as agu šiwatriwen. Iga fall-as ahad iχrâdan itattar. ¹³ As affaw iχra-du inəttulab-net, isannafran daχ-san maraw d əššin, ig-asan esəm inəmmuzal. ¹⁴ Ismawan-nasan da: Simχon was iga esəm Butros d amadray-net Andrawəs; Yaçub, Yaxya, Filibus, Bartulamawəs, ¹⁵ Matta, Tuma, Yaçub wa n ag Alfay, Simχon was itawannu wa Isaggatakken, ¹⁶ Yahuz wa n ag Yaçub əd Yahuza Isxarəyuti wa z'akkaddalan Ƴaysa.

Ƴaysa əd tamattay

¹⁷ Dəffər awen izzəbbat dər-san Ƴaysa adχaχ, ibdad daχ ataxas iyyan a daχ təbdâd tamattay tagget ən nalkiman-net əd tamattay tagget a du-təfâlat akal ən Yahudəyya əd Yerusalam əd χərman win Tir əd Sidon əhanen tagadamayt n agaraw wa zəwwəran. ¹⁸ Aytedan en osân-du fəl ad əssəsəman y awa isasaχru Ƴaysa, təwəzuzəyan deχ daχ təwərnawen-nasan. Izzozay daχ-san deχ win əhan kələsuf. ¹⁹ Tamattay en ketnet təgammay d ades ən Ƴaysa fəlas tarna t-id-təgammadat təzuzəy-tan ketnasan.

Əššin əzzənəfan n aytedan a t-əllanen

²⁰ Iswad Ƴaysa daχ nəttulab-net, inna: «Təbbilalam kawanay win sallaqqawnen iman-nawan dat Məššina fəlas Taymar ta n Məššina ši-nawan. ²¹ Təbbilalam kawanay win iha laz əmərədda fəlas ad tayyawanam. Təbbilalam kawanay win hallinen əmərədda fəlas ad tadzim.

22 Təbbilalam kawanay
win əkyadan aytedan,
əkkâsan-kawan dağ ammas-nasan,
rabbadan-kawan, xaşşadan ismawan-nawan
fəlas di-təlkəmam nak Ag Aggadəm.
23 Dawatat, təfəliwəsam əzəl wədi,
fəlas təlâm arozan aggotnen dağ jənnawan.
Arat wa dawan-əgan əddi
ənta iman-net a əgan marawan-nasan y ənnəbitan.

24 Mişan kawanay iməggərgas
iket alxazab iqqâl-awan,
fəlas awa əran man-nawan iha ifassan-nawan.

25 Iket alxazab iqqâl-awan
kawanay win əyyəwənnen əmərədda,
fəlas ad tullazam.
Iket alxazab iqqâl-awan
kawanay win dazzinən əmərədda,
fəlas a dağ-wan tagu təfəyyawt, talim.

26 Iket alxazab iqqâl-awan
kawanay win əmmalan aytedan;
a dida a əgan marawan-nasan y ənnəbitan win bahu.»

Tara n aytedan

27 «Kawanay win di-əssəsəmnen amaran, ənnəx-awan:
"Iriwat izənga-nawan, ad tətamazalam əlluğ i win kawan-
əkyadnen. 28 Tattarat a igan arraxmat i win kawan-
sawarnən allaxanat, tansəyam Məşşina a igan alxer i win
dawan-tagginən tarşəxşad. 29 As dak-iqqas awedan, takfaq-
qu amdəd-nak wa hadan. As dağ-ak irkab awedan əbərnuz-
nak, alxaşşaba-nak da ayy-as-tu. 30 I kay-onsayan takfaq-
qu. Ad wər təgməya dağ awedan a kay-d-issuxəl awa dağ-
ak irkab."»

31 «Arat was təram a dawan-t-agin aytedan, agat-asan-tu
kawanay da. 32 Kud wər tarem ar aytedan win kawan-
əranən, awak ma imos aroz wa za təgrəwam? Wala ark
aytedan da ərân aytedan win tan-əranən. 33 Kud wər
tətəggim a olağan ar i win dawan-tu-tagginən, awak ma
imos aroz wa za təgrəwam? Wala arak aytedan taggin
adi. 34 Kud deş wər təsəmərwisam ar aytedan win as
tordam as a dawan-ərzəman, awak ma imos aroz wa za
təgrəwam? Ark aytedan da tinəməkfin imarwasan gar-
essan fəlas əssânan as a tan-d-iqqəl awa sammərwasan
ketnet.»

35 «Kalar iriwat izənga-nawan, ad tətəggim y aytedan
awa olağan, tətizəbənəm i win dağ-wan əgmaynən
əzəbəna. Tagim adi ketnet da wər təgem attama n a dawan-
itəwəggu. Əddi ad igat aroz-nawan, təqqələm bararan ən

Məşşina di n Amadkol fəlas ənta itaggu əlluğ y aytedan win wər iha agoda əd win maksanan. ³⁶ Təggəzet-kawan təhanint ta təhat Abba-nawan.»

³⁷ «Ad wər tannim ark arat s awedan fəl a sər-wan wər itəwənnu. Ad wər təssəwəram awedan lahan fəl a kawan-wər-itəwəsəwər kawanay da. Sirufat, ad təgrəwam təsureft. ³⁸ Hakkat, ad tətəwakfim. Təsəkət tolâxat, tədkârat, təssiksakat har təfətənyəl a dawan-z-itəwəggin dağ səbbətəran-nawan. Təsəkət tas təkkatam y aytedan ənta as dawan-z-ikət Məşşina.»

³⁹ Ig-asan değ Yaysa tangalt, inn-asan: «Awak əmədderğəl ifrâğ alaway n iyyan əmədderğəl? As iga adi wərgəğ ketnasan as z'uden dağ anu? ⁴⁰ Attalami wər oger əşşex-net, mişan attalami kul wa issəxtaman, ad agdu d əşşex-net. ⁴¹ Mafəl təhannaya tezawt ta təhat şat n amadray-nak, kay amaran wər din-təgreğ şiləlt ta təhat şat ta-nak? ⁴² Manəmmək as təganna y amadray-nak: "Ayy-i a dak-əkkəsəğ tezawt ta təhat şat-nak?" As iga awen, kay iman-nak wər təhənnəya şiləlt ta təhat şat ta-nak. Əmunafiq, əkkəs təzzar şiləlt ta təhat şat-nak, əddi ad za tannaflayağ dağ tazawt ta təhat şat n amadray-nak, təkkəsəğ-as-tat!»

⁴³ «Wər t-illa aşək isxân itârawan âratân əbrarnen, wala iyyan wər nəsxâ itârawan âratân olağnen. ⁴⁴ Əkkulluk n aşək âratân-net as itawazday. Wər tənimidan aratan ən fig dağ tazayt, wala değ itanamad alyanab dağ tamat. ⁴⁵ Awedan wa olağan, əlluğ wa ihan əwəl-net a dağ d-itakkas awa olağan, mişan anallabus ənta, talbast ta təhat əwəl-net a dağ d-itakkas awa labasan. Awa idkaran əwəl n awedan a d-igammadan imi-net.»

Ənalkim wa n tidət əd wa n bahu

⁴⁶ «Ma fel as di-təgannim: "Əməli, Əməli!" Mişan wər tətəggim awa dawan-ganna?»

⁴⁷ «Awedan kul wa di-d-itasin isasam y awal-in, itamazal s awa ənneğ, a dawan-əmələ awedan wa s tu-z-ammattala. ⁴⁸ Immittalaq-qu s awedan ikarrasan ehan. Iğaz wəllen har ewad təsəlît, ikras-du fall-as ehan-net. Dəffər awen osa-du əngəy issohen, irzak-ku mişan wər t-isammatakway fəlas təsəlît a fəl d-ikras.»

⁴⁹ «Amaran awedan wa isasaman y awal-in mişan wər sər-əs itəmizil, iha əlmital n awedan ikrasan ehan-net da wər t-iğez. Osa-du əngəy, istab-as. Ibarajjat, iğrad ahluk.»

7

Təhanint n Əlməsix

Əzuzəy ən Yaysa akli ən kabtan iyyan

¹ As iğrad Ƴaysa emel ən salan win den kul i tamattay en, iggaz tayrəmt ən Kafarnahum.

² Tayrəmt ten ih-et kabtan iyyan ən sojitan n Ğrrum ilân akli-net ikna tara irinan, ibuk y iba. ³ As isla kabtan en isalan ən Ƴaysa, izammazal sər-əs arat dağ muzaran ən Kəl-Ğlyəhud fəl a t-ansəyan a d-asu izzuzəy akli-net. ⁴ Osan-in Ƴaysa, onsayan-tu, ənnan-as: «Aləs a, ihôr a das-tagay tənəfust ta, ⁵ fəlas irâ tamattay-nana, ənta fadda a danağ-issəkranan ehan-nana wa n əlğibada.»

⁶ Təzzar iddew dər-san Ƴaysa. As din-ihoz Ƴaysa ehan, izammazal-du sər-əs kabtan en imidawan-net y a das-annin: «Ğməli, ad wər təsəlliyyəğay iman-nak, nak wər əwedəğ ad təggəzəğ ehan-in. ⁷ Adi da fəl kay-in-wər-oseğ nak iman-in. Annu arat ças ad izzəy amaşşaxal-in. ⁸ Ğssâna dağ adi fəlas awedan a əmosəğ a dağ əttafan wiyyad tanat, əttâfaq-qat nak iman-in dağ sojitan win daw-i əllanen. As ənnəğ y iyyan: "Aglu", ad aglu, as ənnəğ y iyyan: "Iyyaw", a di-d-asu. As ənnəğ y əkli-nin: "agu awa", ad t-agu.» ⁹ As isla Ƴaysa y awen, isammaklal sər-əs, imalallay-in aytedan win das-əlkamnen, inna: «Ğnnəğ-awan, wala Kəl-İsrayil wər dağ-san ənayəğ awedan igân əzəgzan ewâdan wa iga aləs a.»

¹⁰ As din-əqqalan meddan win əmmozalnen ehan, osan-in akli wa irinan izzây.

Ğsənkər ən Ƴaysa əmawad iyyan dağ təmattant

¹¹ Dəffər awen ikka Ƴaysa ağrəm iyyan igân esəm Nayn, əddewan dər-əs nəttulab-net əd tamattay tagget. ¹² As din-ihoz imi n əğrəm immənay d aytedan aggotnen ewaynen ənəmməttən y a t-in-ənbəlan. Aləs wa n ənəmməttən en, wər təla anna-net ar ənta, abba-net değ wər idder.

¹³ As tat-inay Ğməli təsahhanatat-tu, inn-as: «Ayyu tala.» ¹⁴ Ikka-du ənəmməttən, idas təssut ta dağ immeway, əbdadan aytedan win t-ewaynen, təzzar inna: «Ğmawad ənnəğ-ak: Ğnkər!» ¹⁵ Iqqim-du aləs wa aba, išşewal, issoğal-tu Ƴaysa y anna-net.

¹⁶ Ğrmağan aytedan kul, ad əmmalan Məşşina gannin: «Ğnnəbi zəwwəran a d-inafalalan dağ-na, Məşşina osa-du tamattay-net fəl a dağ-as issən.»

¹⁷ Təzzar təffəzzat sallat ən Ƴaysa dağ akal ən Yahudəyya ketnet, əd k Allan win tu-ğalayğalaynen.

Ƴaysa əd Yaxya wa isalmağan aytedan dağ aman

¹⁸ Iğraw Yaxya isalan win den kul çur attalamitan-net. Iğra-du əşşin dağ-san, ¹⁹ izammazal-tan s Ğməli Ƴaysa y a das-annin: «Awak kay da was nəqqəl y a d-asu, meğ ak ad nəssəgəd y iyyan?» ²⁰ As din-osan Ƴaysa, ənnan-as: «Yaxya

wa isalmaḡan daḡ aman a dana-d-izammazalan sər-ək, inn-ak: "Awak kay da was nəqqəl y a d-asu, meḡ ak ad nəssəgəd y iyyan?"»

²¹ Assaḡat ten da iman-net, izozay daḡ-as Ḡaysa aytedan aggotnen daḡ təwərnawen əd təlawayyen əd kələsuf, issəsəwad deḡ iməddərḡal aggotnen. ²² Ijḡəwwab Ḡaysa i meddan win sər-əs d-əmmozałnen, inn-asan: «Əqqələt Yaxya təssuḡəlam-as awa tənəyam d awas təslam, tannim-as: Iməddərḡal əhannayan, inəbdan jawanken, aytedan win igraw kətru əzzayan zaddogan, imzagan əgrawan tesalay, inəmməttan nakkarand-ə daḡ təməttant, šiləqqawen deḡ sallanat y Əlinjil. ²³ Ibbilal awedan wa wər igmed əzəḡzan-net fəlas wər iga aššak daḡ awa əmosa.»

²⁴ As əḡlan meddan win d-izammazal Yaxya, issənta Ḡaysa amagrad i tamattay daḡ batu ən Yaxya, inna: «Ma imos arat was təkkał əsuf y a tu-tənəyam? Awak telant isiwəliwil aḡu? Kala! ²⁵ Daḡ adi ma təkkał y a t-id-tənəyam? Awak aləs ilsān tabdoḡ təknał šihussay? Kala! Ənəyat za aytedan win əlsanen tabdoḡ ta təhossayat, əḡān deḡ təməddurt daḡ ənniflayan, inan ən mənəkalan a əhan. ²⁶ Adi za ma təkkał y a t-id-tənəyam? Awak ənnəbi? Wəllən z'ās ənnəbi. Amaran Yaxya oḡar tišit n ənnəbi fadda. ²⁷ Fəlas Yaxya ənta a fəl ənnał Əlkəttaban: "Ənəy za a dat-ək assaḡlay anammazul-in a z'aknin tarrayt-nak."

²⁸ Ənnəḡ-awan, wər kala a d-ihəw awedan oḡaran Yaxya; dər iga awen da wala ḡas wa oḡaran təmmədrəyt daḡ Taḡmar ta n Məššina, da oḡar Yaxya.»

²⁹ Aytedan win əslanen y awal ən Yaxya, harkid nabazan n amana, kul əqbalan as tarrayt ta n Məššina ənta a toḡadat, adi a fəl ərḡdan issəłmaq-ḡan Yaxya daḡ aman. ³⁰ Mišan Fərisaytan əd musanan n Əttawret, əntanay əssəknał əs tuḡəyt ta əḡan s a tan-issəlməḡ Yaxya daḡ aman, iba ən tərəddawt-nasan s awa ixtas Məššina.

³¹ Inna Ḡaysa: «Mas z'ammattalay aytedan n azzaman win nəha da? Awak ma dər olan? ³² Olān əd bararan əḡqimnen daḡ əssuk tinəməḡrin gannin:

"Nəwat-awan tende,
mišan wər təwəḡam!
Nəḡ-awan isakkał ən təfəyyawt,
mišan wər tələm!"»

³³ «Ənnəḡ-awan adi fəlas Yaxya wa isalmaḡan aytedan daḡ aman as d-osa, issiḡat əzum wər isəssu deḡ esmad n aḡyanab, tənnał agḡəsuf a t-izdaḡan. ³⁴ Amaran, nak Ag Agḡadəm ose-du, ətatta əsassa, mišan tənnał: "Ənəwat aləs wen n amawwalay en, isassin esmad s igət, imos əmidi ən nabazan ən takəsen d ark aytedan!"»

³⁵ Masnat ta du-təfalat Məššina amaran, aytedan kul win əhanen tarrayt ta n Məššina, əntanay a sataddinen aqqad-net.

Agaraw wa təga təntut iyyat təsureft ən bakkadan-net

³⁶ Igmay Farisay iyyan dağ Ƴaysa a ƣur-əs atšu. Təzzar ika Ƴaysa ehan ən Farisay wen, saƣamaran ad taman-sawan. ³⁷ Wala a ihogan tərəz-du təntut iyyat ən tanas-bakkadt təhât aƣrəm en da, təslât as Ƴaysa imigarat i Farisay wen. As du-tosa tewây butalay n alwardi. ³⁸ Təmal-du dəffər Ƴaysa, ƣur daran-net ad təhallu har təssəbdag idaran ən Ƴaysa əs məttawan-net, təmmas-tan əs jəkkad-net. A dasan-tətamallat tənəqqal fall-asan alwardi.

³⁹ As inay Farisay wa isimuguren Ƴaysa awen, inna dağ man-net: «Ənnar imos aləs a ənnəbi, issən as təntut ta tu-təddasat da, tanasbakkadt.» ⁴⁰ Inn-as Ƴaysa: «Simƣon, a dak-annaƣ arat.» Inn-as Simƣon: «Šiwəl, Əššex!»

⁴¹ Inn-as Ƴaysa: «Kala a t-illa aləs iyyan irwâsan əššin meddan. Iyyan irwâs-tu səmmosat təmad ən tamma n əzrəf, wa hadan irwâs-tu səmmosat təmərwen. ⁴² Dad wər əlen as ərzaman, oyy-asan awa tan-irwas. Awak ma tənney mənə dağ-san wa tu-z-iren wəllen?» ⁴³ Inn-as Simƣon: «Ordeğ as was oyya əmarwas wa aggen.» Inn-as Ƴaysa: «Tidət-nak.»

⁴⁴ Amaran imalallay-in tantut təzzar inna i Simƣon: «Tahannayağ tantut ta? As d-əggazağ ehan-nak wər di-təkfəğ aman əs əššorada idaran-in, mišan ənta təssəbdakkan əs məttawan-net təmas-tan əs jəkkad-net. ⁴⁵ As d-oseğ ehan-nak wər di-du-təssəlkada, mišan ənta a d-oseğ tətamallat i daran-in fəl sağmar a di-təga. ⁴⁶ Kay wər təzwayağ eğaf-in, mišan ənta idaran-in a fəl tənğal alwardi. ⁴⁷ Adi a fəl dak-ənney: tara zəwwərat ta di-təssəkna təsitadda as ibakkadan-net tiwasarafan-as kul kuddeğ əggətan; mišan awedan wa igrawan təsureft n a əndərran, ənta tara-net ši əndərrat.»

⁴⁸ Təzzar inna Ƴaysa i təntut ten: «Ibakkadan-nam tiwasarafan-am.» ⁴⁹ Ad gannin aytedan win dər-əs ədrawnen imensewan dağ man-nasan: «Ma imos wa dağ awedan as wala ibakkadan isuruf-tan y aytedan?» ⁵⁰ Amaran inna Ƴaysa i təntut ten: «Əzəğzan-nam a kam-iğlasan, ağı dağ alxer.»

8

Ƴaysa isasayru əs tangalen d əlmitalan

Aytedan win tidawnen əd Ƴaysa

¹ Dæffær awen illil Ƴaysa iƳerman æd tæƳarmaten immâl y aytedan Ælinjil, imosan isalan ən TaƳmar ta n Mæššina. Æddewan dær-æs nættulab-net win maraw d æššin. ² Iddew deƳ æd tødoden as šiiyyad kæləsuf a daƳ-asnat ikkas, šiiyyad šiwærnawen a daƳ-qanat izzozay. Æmosnat Maryama Madəl, s ənta a d-əgmadan əssa kæləsuf, ³ æd Jannata ta n təntut ən Xuza wa innəttafan æd taƳawšiwən n əmənokal Herod, æd Suzana æd šiiyyad šidoden aggotnen. Ketnasnat ədhâlmat Ƴaysa æd nættulab-net s awa əlanat.

Ælmital wa n əmagyak

⁴ Wær t-illa əƳrəm a du-wær-gəmmədan aytedan takkin-du Ƴaysa, təzzar təga fall-as tiddawat tagget, ig-asan əlmital wa: ⁵ «Kala ad igla əmagyak iyyan y ad inbəl amasa-net. DaƳ anabal wa itaggu den imosan anabas n amasa, ərtaknat təblalen šiiyyad fəl tama ən tarrayt, təzzar əkkokalan daƳ-asnat aytedan, ətšan-tanat gədad. ⁶ Šiiyyad ərtaknat daƳ adag əhanat təhun. As d-əgmədnat, əqqurnat fəl iba ən bəddug. ⁷ Šiiyyad ərtaknat daƳ təfəssaƳ, ədwalnat dær-əsnat, əlməznat-tanat. ⁸ Šiiyyad ərtaknat daƳ amaɖal olāƳan, təzzar ədwalnat. Ækkulluk ən təblalt terāw temeday n iyyat.» As inna Ƴaysa awen idkal əməsli-net inna: «Wa isallin, isəsəmet!»

Ma fel isasaƳru Ƴaysa s əlmitalan?

⁹ Dæffær awen əssəstanan-tu nættulab-net d almayna n əlmital wa iga den. ¹⁰ Inn-asan: «Kawanay təgrāwam masnat daƳ əssiran ən TaƳmar ta n Mæššina, mišan aytedan win hadatnen tangalen as dasan-ittəmal əssir wa, fəl ad iqqəl as "əswādan, mišan wær hənnəyan; əssisaman mišan wær gərrin."»

Almayna n əlmital wa n əmagyak

¹¹ Iglə Ƴaysa iššewal, inn-asan: «Ælmital wədi almayna-net da: amasa əlmital a imos n Awal ən Mæššina. ¹² Amasa wa irtakan fəl tama ən tarrayt, əlmital a imos n aytedan win əslanen y awal ən Mæššina, mišan ad d-asu Iblis ikkəs-tu daƳ wallan-nasan fəl ad wær əzzəgzənan, əgrəwan efsan. ¹³ Amasa wa irtakan daƳ təhun, əlmital a imos n aytedan win əslanen y Awal ən Mæššina, əqbalan-tu əs man filawasnen, mišan wær ila awen ekay, əzəgzan-nasan wær itihag. As tawajarraban, a tan-igməd. ¹⁴ Amasa wa irtakan daƳ təfəssaƳ, əlmital a imos n aytedan win əslanen y awal ən Mæššina əqbalan-tu, mišan as tan-ədgəzan aššawašatan n əddənet æd tara n əddənet d arak deranan, əssəfalan-du dənnəg awal wen, ad igdəl awen y əzəgzan-nasan alkamat. ¹⁵ Amasa wa irtakan amaran daƳ

amađal olađan, əlmital a imos n aytedan win əslanen y awal ən Məşşina əlân iwallan olađnen lammodnen, təzzar əqbəlan-tu, əttəfan-tu s əlluđ, təgmad-tan-du tənfa fəlas əzmâran y arat kul.»

Tangalt ta n fətəla

¹⁶ Inn-asan Ƴaysa deđ: «Wər t-illa awedan isarđin fətəla təzzar isəbbənbəy fall-as əđəzu madeđ ag-et daw tessat. Kalar əsiləy a tat-itaggu təşəşsiləyt-net fəl ad ənəyan aytedan win du-taggaznen ehan s ənnur-net. ¹⁷ Wər t-illa a iđbâran əs wərgəđ ad affaggu, wala iyyan istâran əs wərgəđ a d-inənəfiləl, itəwəssən ezal a mallan.

¹⁸ Dađ adi ənkədat y əmmək was təsasamam. Awedan wa ilan, a das-itəwəşitu awa ila; wa wər nəla amaran, arat n awas iđil il-ay da a dađ-as attarmas.»

Imarwan ən Ƴaysa win tidət

¹⁹ Tosa-du anna ən Ƴaysa əd mədrayan-net, mişan orn-en a t-in-awədan fəl igət ən tamattay. ²⁰ Itawann-as: «Annak əd mədrayan-nak əbdâdan-ak, ərân anay-nak.»

²¹ Mişan inn-asan Ƴaysa: «Anna-nin əd mədrayan-in aytedan win sasammen y awal ən Məşşina, tamazalan s awa inna.»

Tarna ən Ƴaysa

Ƴaysa ila tarna fəl ađu

²² Əzəl iyyan iggaz Ƴaysa ađlal n aman ənta əd nəttulab-net. Inn-asan: «Nəxrəset agaraw əs tagadamayt-net ta hadat.» Təzzar əglan.

²³ Əđlân fəl aman as din-ibaz etəs Ƴaysa. Wala a ihogan igar-du ađu issohen fəl agaraw, ad idakkar əđlal aman, əggazan zega n a tan-atşin aman. ²⁴ Əhozan-du nəttulab Ƴaysa, a tu-sankaran dađ etəs, gannin as: «Əşşex, Əşşex, nəhlak.» Inkar-du Ƴaysa isannarđam y ađu əd tanazzamaren takkinen ijənnawan, təzzar ibdad ađu, idrar arat kul. ²⁵ Amaran inn-asan Ƴaysa: «Ma iga əzəgzan-nawan?» Issirmaq-qan awen, isimaklal sər-san. Ad tinəmənnin: «Ma imos wa dađ awedan as wala ađu d aman ittâf dađ-san tanat?»

Ƴaysa ila tarna fəl kələsuf

²⁶ Dəffər awen ewadan-in akal ən Garassenatan in-imađlayan agaraw d akal wa n Galilaya. ²⁷ Da da đas a d-izzəbbat Ƴaysa ađlal n aman ənta a das-d-issəlkad aləs iyyan əhân kələsuf. Aləs wen in əđrəm ihan akal en da. Irəw as issənsa isəlsa, igmad ađaywan, ixsar dađ zəkwan. ²⁸ Inay Ƴaysa đas, ad itakkas imaslan labasnen, təzzar

issəjad i ʔaysa, idkal əməsli-net wəllen inna: «Ya ʔaysa wa n Barar ən Məššina di n Amadkol ma daɣ-i tareɣ? Onsəyaq-qay a di-wər-təzəɣɣəba.»

²⁹ Innâ awen fəlas ʔaysa a omaran aggəsuf wa t-ihan s a t-id-igməd. Iyyəwan-du sər-əs aggəsuf en əsənkər, karradan-tu aytedan əs sassaran əd təzabagawen mišan ad ixtəs awen kul, awəy-tu aggəsuf s əsuf. ³⁰ Issəstan-tu ʔaysa, inn-as: «Ma esəm-nak?» Ijjiwwab-as inn-as: «Esəm-in Egan.» Inn-as aləs en awen fəlas kələsuf aggotnen a t-əhanen. ³¹ Ad tansayan kələsuf win t-əhanen ʔaysa a tan-wər-issuku anu wa wər nəla eder. ³² Illât-tu əsəgən aggen ən ladayan ədânnen fəl tasaga ən təkəşwart. Onsayan kələsuf ʔaysa y a tan-akfu turagat n ad əggəzan iladayan en, ikf-asan-tat. ³³ Əgmadan kələsuf aləs en, əggəzan iladayan. Təzzar ozalan-du ladayan fəl azagada ən təkəşwart ad titərəgtərigan daɣ agaraw, tattan-tan aman.

³⁴ As ənayan madanan ən layadayan awa igan den, ozalan, əgan isalan n awen daɣ əxrəm en əd ɣələyɣələyan-net. ³⁵ Əglan aytedan y ad ənəyan awa igan. As din-osan ʔaysa ogəzan-in ɣur-əs aləs wa əgmadan kələsuf, iqqim ɣur daran-net, ilsâ, təqqâl-t-idu deɣ tayttay-net, təzzar təggaz-tan tasa. ³⁶ Əgan daɣ-san aytedan win əgəyyatnen y awen isalan n əmmək was itawasafsa aləs wa daɣ tawakkasan kələsuf.

³⁷ Mišan ənkaran-du aytedan kul win akal ən Garasse-natan ad gammayan daɣ ʔaysa a tan-ugag fəlas tasa a tan-təggəzat zəwwərat. Iggaz ʔaysa aɣlal n aman iqqal. ³⁸ Onsəy-tu aləs wa əgmadan kələsuf ad t-ayyu a dər-əs idaw, mišan issoɣal-tu ʔaysa inn-as: ³⁹ «Əqqəl ehan-nak, təməla y aytedan iket n arraxmat ta dak-iga Məššina da.» Təzzar igla ad immal daɣ əxrəm en ketnet arat kul wa das-iga ʔaysa.

ʔaysa ila tarnə fəl təwərnawen əd təmattant

⁴⁰ As iqqal ʔaysa əsəlīm wa hadan n agaraw, təssəlkad-as-du tamattay as ketnet təqqâl-as. ⁴¹ Alwaq wen da a d-osa aləs iyyan igân esəm Jayɣus imosan iyyan daɣ muzaran n ahan n əlɣibada wa n Kəl-Əlyəhud ən təxrəmt ten. Issəjad dat ʔaysa, ad t-itansay ad idawan s ahan-net, ⁴² fəlas elles təmosat wələt maraw elan d əşšin, s ənta ɣas a ila, a təbukat y iba.

Iddew dər-əs ʔaysa, tətənanbdaɣ fall-as tamattay. ⁴³ Tamattay en tah-et təntut təgât maraw elan d əşšin igammad-tat əzni. Tənyə təla-net kul daɣ nasmagalan, mišan wər t-illa awedan ifrâgan əzuzəy-net. ⁴⁴ Təhoz-du

Yaysa sa sər təxərden, tēdas tēbənīk ən tēkadkat-net, izzəkkat əzni wa tat-igammadan tamazayt ten da. Təzzay.

⁴⁵ Təzzar inna Yaysa: «Ma di-idasan?» Iggad awedan kul as t-idās, amaran inn-as Butros: «Əššex, tamattay a ketnet as kay-taḡalayḡalay, tēsās-kay.» ⁴⁶ Mišan ya inna Yaysa: «Awedan iyyan idās-i fēlas əfrāya i tarna iyyat as di-təgmad.» ⁴⁷ As tēssan tēntut ten as tēffigga, təkka-du Yaysa tēndaw-tat taysəst, tēsəjad dat-əs, tēmal-as dat aytedan kul əddəlil wa fəl tu-tēdas əd tēməzzəyt ta tēga tamazayt ten da. ⁴⁸ Inn-as Yaysa: «Tabarart-in, əzəgzan-nam sər-i a kam-izzozayan, aglu daḡ alxer.»

⁴⁹ Harwada iššewal Yaysa as d-osa awedan iyyan a d-ifalan aḡaywan ən Jayḡus wa n əmuzar n ahan wa n əlḡibada ən Kəl-Əlyəhud, inn-as: «Allek aba-tat, mazzay d əddaguz n Əššex.» ⁵⁰ Isla Yaysa y awen, inna i Jayḡus: «Ad wər tərmeḡa, zəgzən ḡas, allek ad təzzəy.»

⁵¹ As din-ewad Yaysa ehan ən Jayḡus, igdal y aytedan ad t-əggəzan, wər oyya ar Butros əd Yaxya əd Yaqub d abba ən tēbarart d anna-net. ⁵² Aytedan kul win əllanen den, hallan, sikalalan fəl tēbarart mišan inn-asan Yaysa: «Ayyiwat tala, tēbarart wər tat-aba, etəs ḡas a tēga.» ⁵³ A daḡ-as tajaban fēlas əssānan as wər tēdder. ⁵⁴ Təzzar iggaz Yaysa fəl tēbarart, ibaz əfus-net, iḡr-et, inn-as: «Tabarart ənkər-du!» ⁵⁵ Əqqalan-tat-du man-net tēbdad-du daḡ tamazayt ten da, təzzar omar-tan Yaysa s a tat-akfin a tətša. ⁵⁶ Əhagan marwan ən tēbarart, mišan irḡam-asan Yaysa fəl amel n awen y awedan waliyyan.

9

Yaysa əd nəttulab-net win maraw d əššin

Əzəmmizəl ən Yaysa inəttulab-net

¹ Iḡra-du Yaysa inəttulab-net win maraw d əššin, ikf-en tarna d əlxəkum fəl kələsuf kul, ikf-en deḡ fərregat n əzuzəy ən təwarnawen. ² Izəmmazal-tan y ad agin isalan ən Taḡmar ta n Məššina, əzzuzəyan deḡ imiranən. ³ Inn-asan: «Ad wər tawəyam wala daḡ əšikəl, gər z'iqqal tallaq wala aḡrəg, wala allaw, wala azrəf, wala deḡ a okāyan tēkadkat iyyadda. ⁴ As din-tosam aḡrəm, ehan wa tēggazam isəmmagarat-kawan, zəbbatat daḡ-as har tēgmədam aḡrəm wədi. ⁵ Aḡrəm tēggazam wər kawan-əqbelan aytedan-net, as tu-təgammadam tēbbikbakam-in əgodrar-net wa iwaran idaran-nawan, ilkām ad əgḡayyat awen fall-asan.»

⁶ Æglan nöttulab, ællilan šiğarmaten, ad æmmâlan Ælinjil dağ adag kul, zuzəyan dağ-as deç imiranan.

Iduf wa iga Herod dağ Yaysa

⁷ Isla Herod wa n amuzar n akal ən Galilaya aratan kul win itaggu Yaysa əd nöttulab-net, iqqan awen eçaf-net fəlas əllan-tu aytedan ganninen əs Yaysa: «Awen Yaxya wa isalmayan aytedan dağ aman a d-inkaran dağ təmattant.»

⁸ Wiyyad gannin: «Awen ənnəbi İlyas a d-izzəbben.» Wiyyad deç gannin: «Awen iyyan dağ ənnəbitan win ərəwnen a d-inkâran dağ təmattant.»

⁹ Inna Herod: «Yaxya, nak iman-in a d-issəfrasan eçaf-net, dağ adi ma imos aləs wa fəl sallağ aratan win?» Ad igammay Herod d anay ən Yaysa.

İşətsi ən Yaysa səmmos gim n aləs

¹⁰ Eqqalan-du nəmmuzal, əssoğalan i Yaysa awa əgan kul. Təzzar igmad dər-san aytedan s adag issufan a din-ikitayyen, ihan anamod ən təxrəmt ta n Betsayda. ¹¹ Mišan təsla tamattay awen, təkam-as. Ig-asan Yaysa marxaba, təzzar işşewal-asan dağ salan ən Tağmar ta n Məşşina, izzozay dağ-san win əddərarnen s awen.

¹² As təbuk təfuk y agadal, əhozan-t-idu nöttulab-net win maraw d əşşin, ənnan-as: «Suxəl tamattay a, ad takku šiğarmaten əd çawnatan win əhoznen, ad təgməy id tənsa d a tətša fəlas edag issufan awa.» ¹³ Inn-asan: «Satşat-tan kawanay iman-nawan da!» Ənnan-as: «Nakkanay wər nəttef ar səmmosat təgəlwen d əşşin kifitan, kundaba za ad nəglâ nazzanza-du imensewan i təxlək a kul.» ¹⁴ Edag ən səmmos gim n aləs a əllanen den. Inna Yaysa i nöttulab-net: «Saççamiwat aytedan kul, tagim-tan šiçimten ən səmmosat səmmosat təmərwen n awedan.» ¹⁵ Əgan nöttulab awen da, saççaman aytedan kul. ¹⁶ Təzzar idkal Yaysa səmmosat təgəlwen şin den d əşşin kifitan win, iggəzzay ijənnawan, iga igodan i Məşşina amaran ikaramkaram şigəlwen şin, iga awen da i kifitan, ikf-en i nöttulab-net y a tan-uzanan i tamattay. ¹⁷ Ətşan aytedan en ketnasan har əyyəwanan. Tawaşadawan-du karammutan win du-tawaglaznen, tawadnayan dağ-san maraw əzmaman d əşşin.

Awa inna Butros əs Yaysa

¹⁸ Əzəl iyyan itattar Yaysa ças-net, wər çur-əs illa ar inöttulab-net, dəffər awen issəstan-tan, inn-asan: «Awak dağ iduf n aytedan, ma əmosa?» ¹⁹ Ənnan-as: «Wiyyad a gannin Yaxya wa isalmayan aytedan dağ aman a təmosa, wiyyad a gannin: ənnəbi İlyas, wiyyad deç a gannin iyyan

dağ ənnəbitan win ərəwnen a d-inkâran dağ təmattant.»
²⁰ Təzzar inn-asan: «Kawanay za ma tənnam ma əmosa?»
 Inn-as Butros: «Əlməsix ən Məşşina a təmosa.»²¹ Issənkad
 Ƴaysa nəttulab-net, omar-tan s ad wər əməlan y awedan
 waliyyan isalan win den. ²² Inn-asan: «Nak Ag Aggadəm
 ilzâm-i ad ənəyax arkanay aggen, unkaran-i muzaran
 ən Kəl-Əlyəhud əd muzaran ən limaman əd musanan n
 Əttawret, təwəggin man-in, ənkəra-du dəx dağ təmattant
 əzəl wa n karad.»

Ləkkum i Ƴaysa

²³ Dəffər awen inn-asan ketnasan: «Wa iran a di-ilkəm,
 wədi igmədet tara ən man-net, agu imateran-net idkəl
 təgəttawt-net akk əzəl, ilkəm-i. ²⁴ Əssənət as awedan wa
 wər nəgəmməy ar aggaz ən man-net, wədi ad t-əgmədan,
 mişan wa iqbalan ad t-əgmədan fəl əddəlil-in, wədi ad
 ixləs. ²⁵ Ma z'aknu y awedan ad igrəw əddənət ketnet, ənta
 issixrak iman-net, iffota dağ alaxirat? ²⁶ Awedan kul wa
 isakkarakad ləkkum y-i, madeğ isikarakad-tu əsuxəl n awal-
 in, wədi nak da, Ag Aggadəm, a di-isəkkərəkəd əlqəbulat-
 net əzəl wa du-z-əqqəla aheğ tanaya-nin, təmosat tanaya ta
 n Abba, təmos dəx ta n angalosan a zaddoggen. ²⁷ Əggəyyey
 əsilakanax-awan as, wiyyad dağ-wan əbdâdnen da da, wər
 tan-z-iba wər ənayan Tağmar ta n Məşşina.»

Ətəwənanay ən tanaya ən Ƴaysa

²⁸ Edag n əttam adan dəffər igi wa dasan-iga Ƴaysa
 batuten şin den, inkar iddew əd Butros əd Yaxya əd Yaqub
 s ədyağ iyyan fəl a fall-as ansəy Məşşina.

²⁹ Itattar den da as imməttay udəm-net, təzzar əgan
 səlsa-net təməllay tətassamat. ³⁰⁻³¹ Əhinan-in oggân
 ənnəbi Musa d ənnəbi İlyas dağ tanaya ən Məşşina,
 mişawalan əd Ƴaysa dağ batu n agamad wa z'agu əddənət
 a z'attaddin dağ Yerusalam əs təmattant-net.

³² As itaggu awen Butros əd midawan-net ibâz-tan-in
 etəs. As d-ənkaran ənayan tanaya ən Ƴaysa, ənayan dəx
 əşşin meddan win dər innəbdad. ³³ As iggaz ənnəbi Musa
 d İlyas şin əgəlli, inna Butros i Ƴaysa: «Əşşex, olâğ as
 nəlla da. Əndawat ad nəkrəs karad həktan: iyyan i-nak,
 iyyan in Musa, iyyan in İlyas.» Wər issen Butros a igannu
 den. ³⁴ Igannu Butros awen da as du-tənafalal təgarak
 iyyat, təlsa Ƴaysa d ənnəbitan əşşin win dər innəbdad. As
 təlsa Butros əd midawan-net, təggaz-tan tasa. ³⁵ İgmad-du
 əməsli təgarak ten, inna:

«Awa Barar-in
 wa sannafranax,
 səsəmat-as.»

³⁶ As tända batu ten, wər hənnəyan nəttulab ar Ƴaysa. Ǝffəstan fəl awen, wər t-illa awedan əs t-əmālan daɣ adan en.

Ǝzuzəy ən Ƴaysa barar iha aggəsuf

³⁷ As əzəl wa ilkaman i wen, izzəbbat-du Ƴaysa əd nəttulab-net win karad en adɣaɣ, təzzar təssəlkad-as-in tamattay təgget. ³⁸ Wala a ihogan idkal aləs iyyan daɣ ammas ən tamattay en əməsli-net, inna: «Ya Ǝššex, onsayaq-qay a di-təhənəttəɣ i barar-in, ənta ɣas a ələɣ. ³⁹ Aljayn a t-itabazan, təzzar ad izayyak, itizəbərdil, isakafkaf. Gərrid as t-itayyu, issikn-ay alɣazab. ⁴⁰ Onsəyay inəttulab-nak a daɣ-as t-əkkəsən, indar-asan.»

⁴¹ Təzzar inna Ƴaysa: «Xa! Iket iba n əzəgzan d əššur daɣ aytedan n azzaman a! Awak har əmməy əddewa dərwan, əzmāraɣ-awan? Awəy-du barar-nak.» ⁴² As d-ihoz barar Ƴaysa, iggədl-ay aggəsuf, ad itizəbərdil. Iharaššat Ƴaysa aggəsuf, ikkas-tu daɣ barar, izzay, issoɣal-tu y abbanet. ⁴³ Aytedan kul təsimaklal sər-san təzzəwwərt ən tarna ən Məššina.

Emel ən Ƴaysa təmattant-net

Harwada isimaklal s aytedan arat kul wa iga Ƴaysa den, as inna i nəttulab-net: ⁴⁴ «Təggəzet batu ta šiməzzugenawan, təttafam-tat: "Nak Ag Aggadəm əjwāra ad əggāzay ifassan n aytedan."» ⁴⁵ Mišan wər əgren batu ta dasan-iga den, ittinkal-asan almaɣna-net fəl a tat-wər-agrin, amaran tah-en tasa n əsəstan-net.

Tamazaq gər nəttulab

⁴⁶ Tənkər tamazaq gər nəttulab ən Ƴaysa daɣ batu ən wa daɣ-san ogaran almaqam. ⁴⁷ Issân Ƴaysa awa samadranan, a di fəl d-idkal arat ən barar iyyan issəbdad-tu dəgma-net, ⁴⁸ amaran inn-asan: «I iqbalan barar a, fəl əddəlil-in, nak a iqbal. I di-iqbalan deɣ, wa di-d-izammazalan a iqbal. Wa daɣ-wan wər nəmos arat, ənta a zəwwəran.»

Ǝsəstan daɣ batu n aləs itakkasan kələsuf daɣ aytedan

⁴⁹ Inna Yaxya i Ƴaysa: «Ǝššex, nənəy aləs iyyan itakkasan kələsuf daɣ aytedan s esəm-nak, nənn-as ad wər iləs igi n awen, fəlas wər danay-ihə əs ləkkum y-ak.» ⁵⁰ Inn-as Ƴaysa: «A das-tu-wər-təgdəlam, fəlas i wər nəgəmməy təkma-nawan, wədi əmidi-nawan.»

Iki ən Ƴaysa Yerusalam

Arat wa ilzaman ənalkim ən Ƴaysa d alak wa das-insan

Tuɣəyt ən təyrəmt iyyat ən Samarəya s əlqəbulat ən Ƴaysa

⁵¹ As d-əhozan adan win daɣ z'assandu Ƴaysa arat wa ixtas Məššina, a t-imosan əmədkəl-net əs jənnawan, isaggatakkat y iki n əxrəm ən Yerusalām. ⁵² Issəgla inam-mazalan dat-əs, əkkan təxrəmt iyyat n akal ən Samarəya y a das-aknin edag n əzəbbi. ⁵³ Mišan ugayan aytedan ən təxrəmt ten s a dasan-iməgürət fəlas ikkâ Yerusalām.

⁵⁴ As inay Yaqub əd Yaxya win nəttulab-net awen, ənnan: «Əməli, tareɣ ad nannu i təmsay a fall-asan du-tazzabbat, təsərrəkəmmət-tan?» ⁵⁵ Imalallay-tan-in Ƴaysa, isannarɣam-asan, ⁵⁶ təzzar okayan əs təxrəmt iyyat.

Awa ihan ləkkum i Ƴaysa

⁵⁷ Jiwanke as inna aləs iyyan i Ƴaysa: «A dak-əlkəma s adag kul wa təkke.» ⁵⁸ Inn-as Ƴaysa: «Izagazan əlân enwan, igədad deɣ əlân šisəllula, mišan nak Ag Aggadəm wər əleɣ wala edag daɣ əssənsa eɣaf-in.»

⁵⁹ Inna Ƴaysa y iyyan aləs: «Əlkəm-i.» Təzzar inn-as: «Əməli, akf-i turagat n ad agla har din-ənbəlay abba-nin təzzar.» ⁶⁰ Mišan inn-as Ƴaysa: «Ayyu inəmməttan ad ənbəlan inəmməttan-nasan, kay amaran, aglu taga y aytedan isalan ən Taɣmar ta n Məššina.»

⁶¹ Inn-as iyyan aləs: «Əməli, areɣ a dak-əlkəma, mišan akf-i turagat n ad nəməgga d aytedan-in šiwatriwen təzzar.» ⁶² Inn-as Ƴaysa: «Awedan wa issəntan daɣ ləkkum y-i, mišan wər iga awen s əwəl iyyanda, wədi wər ihor əd Taɣmar ta n Məššina.»

10

Əzəmmizəl wa iga Ƴaysa inəttulab win əssayat təmərwən d əššin

¹ Dəffər awen isannafran Əməli wiyyad inəttulab əmosnen əssayat təmərwən d əššin, izammazal-tan s əššin əššin y a das-in-izaran əs ɣərman əd daggan win as ibuk y a tan-immər. ² Inn-asan: «Ƴarat təggət, mišan wər əggətan mašşaxalan win tat-z-aləynen. Daɣ adi əttərat s esəm ən məššis ən ɣarat ta, a d-assaglu imašşaxalan a tat-olaynen. ³ Aglat! Zimazalaq-qawan təmosam zun jamaran əhanen ammas ən ridalan. ⁴ Ad wər tawəyam azrəf wala aɣrəg wala təsəsəl ta n sanatat. A kawan-wər-səllulen assalaman daɣ tarrayt.»

⁵ «Ehan təggazam, təgəram fall-as assalam təzzar. ⁶ Kud ih-ay awedan n alxer, wədi a kawan-iqbəl, igrəw alxer-nawan. Kud deɣ wər t-iha, wədi takəyam d alxer-nawan. ⁷ As təgrawam ehan n awedan n alxer, təxsəram daɣ-as. Tatšim, tašwim awa kawan-itawakfan, fəlas amašşaxal kul ihor d alxaq-net. Ad wər tilalam inan.»

⁸ «Ayrəm a din-tosam deɣ əqbalan-kawan məssawəs, tatšim arət was kawan-sammagaren, ⁹ təzzuzəyam imiranan win t-əhanen, təzzar tannim y aytedan-net: "Taɣmar ta n Məššina təhōz-kawan-du." ¹⁰ Mišan ayrəm a din-tosam wər kawan-əqbelan məssawəs, ilalat tarrayen-net təgannim: ¹¹ "Təggiyem as wala aboqqə n əyrəm-nawan wa iwaran idaran-nana da nəbbikbakk-in, mišan əssənət as Taɣmar ta n Məššina təhōz." ¹² Ənneɣ-awan, əzəl wa n tabadday, aytedan n əyrəm wədi, ad agin alɣazab ogaran wa z'agin win əyrəm wa n Sədom.»

¹³ «Iket alɣazab iqqâl-awan kəl-ayrəm ən Koradzin! Iket alɣazab iqqâl-awan kəl-əyrəm ən Betsayda! Fəlas təlməxjujaten šin ɣur-wan əganen ənnar əgânat daɣ əyrəm ən Tir əd wa n Sidon, wədi irəw as əqqanan isəlsa ən bəhu əqqiman daɣ ezəd, imos awen əsənnəfiləl n as əhdän. ¹⁴ Awen daɣ a fəlas, alɣazab wa za tagim əzəl wa n tabadday ad agər wa z'agin aytedan n əyrəm ən Tir əd wa n Sidon. ¹⁵ Kawanay aytedan n əyrəm wa n Kafarnahum, adis ad tammadkalam s aljannat? Kalar Jahannama a daɣ za tətəwəgaram.»

¹⁶ Inna ɣaysa deɣ i nəttulab-net: «Awedan wa dawan-issəsaman, nak as issəsam; wa kawan-inkuran deɣ, nak a inkur. Amaran wa di-inkuran, wədi wa di-d-izammazalan a inkur.»

Tewaxlay ən nəttulab ən ɣaysa win əssayat təmərwən d əššin

¹⁷ As d-əqqalan nəttulab win əssayat təmərwən d əššin, əknân təfalawist, gannin i ɣaysa: «Əməli, wala kələsuf əttâfan tənna-nana as dasan-nəɣra esəm-nak!»

¹⁸ Təzzar inn-asan ɣaysa: «Hannayax Aššaytan as d-ifataqqat daɣ jənnawan zun essam. ¹⁹ Əssənət as əkfeq-qawan tarna fəl taššolen əd təzurdam d awa ila azangaw-nana Iblis kul daɣ tarna. Wər t-illa a ifrâgan a dawan-agu təkma. ²⁰ Mišan a kawan-wər-isəfəliwəs as əttâfan kələsuf tənna-nawan, kalar isəffəliwəset-kawan akatab wa əgan əsmawan-nawan daɣ aljannat.»

Tədəwit ən ɣaysa

²¹ Assaxat ten da ad ikna Infas wa Zəddigan əsəddəwi ən ɣaysa, təzzar inna: «Əgeɣ-ak təmmalen ya Abba, Əməli ən jənnawan d amaɖal fəl aɣabar wa təgeɣ aratan win i musanan, əd malan ən tayttay, təsannafalalaq-qan y aytedan win wər nəzlay əd bararan; id adi da a imosan agna-nak ya Abba. ²² Arat kul ig-ay Abba-nin daɣ əfus-in, wər t-illa i issanan awa əmosa ar Abba, wər t-illa deɣ i

issanan awa imos Abba ar nak an Barar-net d awedan was arey a das-tu-sənnəfiləla.»

²³ Imalallay-in Ƴaysa inəttulab-net, iššewal-asan əntanay ƣas, inn-asan: «Əbbilalnat šittawen šin hannaynen awa təhannayam! ²⁴ Silakanay-awan as sidaranan ənnəbitan aggotnen əd mənokalan anay n awa təhannayam, mišan wər t-ənanay, sidaranan deƣ tesalay y awas təsallim, mišan wər das-əslen.»

Awa izlayan ənalkim ən Ƴaysa d aytedan win hadatnen

Əsəstan wa iga əmusan n Əttawret i Ƴaysa

²⁵ Dəffər awen inkar-du əmusan n əššəriƣa iyyan iga i Ƴaysa əsəstan imosan tənagmayt, inn-as: «Əššex, mas dilzam igi-net, y ad əgrəwa təməddurt ta təƣlalət?»

²⁶ Inn-as Ƴaysa: «Ma iktaban daƣ Əttawret? Ma daƣ-as təƣrey?» ²⁷ Ijjəwwab-as, inn-as: «Iktâb daƣ-as as: "Ad tireƣ Əməli-nak Məššina s əwəl iyyanda, əd man ərdânen, tireq-qu əs təƣurad-nak kul əd tayttay-nak kul, tireƣ deƣ əšəqqaqay-nak əs təməwit tas tareƣ iman-nak."» ²⁸ Inn-as Ƴaysa: «Aljawab-nak oƣâd, taggu adi da ad təddəra.»

Əlmital wa n aw Samarəya wa olaƣan

²⁹ Mišan dad ira əmusan wen ad aknu batu-net, inna i Ƴaysa: «Ma imosan za əšəqqaqay-in?»

³⁰ Ijjəwwab-as Ƴaysa s əlmital wa, inn-as: «Aləs iyyan a d-igmadan aƣrəm ən Yerusalām, iras ikka wa n Yeriƣaw har t-əgrawan baydagan. Əbazan daƣ-as awa ila, əggâtan-tu, as t-oyyan illa gər təməddurt d iba. ³¹ Imazayyat d awen d as d-iga əlimam iyyan tarrayt ten. Inay aləs wen, iƣlay-tu. ³² Illam-du iyyan daƣ Kəl-Lebi ənta da den, inay-tu, iƣlay-tu. ³³ Mišan as d-illam aw Samarəya iyyan den iššokalan, inay-tu, təggaz-tu təhanint-net. ³⁴ Ikk-ay-du, iššorad ibusan-net s azzayt d esmad n aƣyanab, ittal-tan, təzzar issəwan-tu təsənəyt-net, eway-tu s azazzabbaw, issan daƣ-as. ³⁵ As affaw, idkal-du əššin dinaran n əzrəf ikf-en y aləs wa innəttafan d azazzabbaw, inn-as: "Əssən daƣ aləs di, as d-əqqala, nak a dak-z-irzəman arat kul wa fall-as tənƣeƣ, kud ənta oƣar adi."»

³⁶ Amaran inna Ƴaysa y əmusan n Əttawret wen: «Məni daƣ meddan win karad a, was tordeƣ as ənta a igan y aləs wa ənƣan baydagan a amazal wa itaggu awedan y əšəqqaqay-net?» ³⁷ Inn-as: «Wa das-ihanatten.» Inn-as Ƴaysa: «Adi za aƣlu, taga kay da zun d awen daƣ.»

Maryama əd Marta

³⁸ Iгла Ҷайса даъ әшкәл-net әнта әд нәттүләб-net һар иггәз тағрәмт ийят иннәфтағ и тәнтүт тәғәт есәм Марта. ³⁹ Тәнтүт та тәлә тәмадрәйт-net тәғәт есәм Мәриямә. Тәққим Мәриямә ғур даран н Әмәли Ҷайса, тәссисәм у аһа игәнну. ⁴⁰ Марта аһаран, ишимаған-тат әшшәғәл н әсәммәғури ән Ҷайса.

Wala ihogan tәhoz-du Ҷайса, тәnn-as: «Әмәли, awak zәләят а wәр тәгеғ дағ аs di-toyya tamadrәйт-in d әшшәғәл ketnet ғas-in? Ann-as а di-tilal.» ⁴¹ Inn-as Ҷайса: «Марта, Марта! Әшшиһаған-kam aratan aggotnen, әssiggadan tayttay-nam. ⁴² Әнта arat ийүанда аs тәға addararat olâғ а t-imosan әsәsәм у awal-in, әнта а тәsannafran Мәриямә, аһаран wәр дағ-as z'әттәrmас.»

11

Tәwatray әn Ҷайса

¹ Әзәл ийүан итәттә Ҷайса дағ адәғ ийүан. Аs issәнда, inn-as ийүан дағ нәттүләб-net: «Әмәли, susән-ana тәwatray zun аһа игә Yaxya и нәттүләб-net.» ² Inn-asan Ҷайса: «Аs тәтәттәram, тәnnim:

"Abba,

Itәwәsәғmәret есәм-nak di zәddigan, taset-du тағmar-nak.

³ Akf-anaғ akk әzәl isudar-nana,

⁴ тәssurәфағ-anaғ ibakkadan-nana,

zund әmmәk аs nakkanay da

nәsuruf и win данағ-әғанән ark mazalan.

A дана-wәр-tаға дағ алғарар ән jarrabatan n Iblis."»

Gәlleyat дағ тәwatriwen

⁵ Inn-asan Ҷайса deғ: «Mәni дағ-wan wa z'ilen әmidi, аs-ay-du adawannay n аһад ann-as: "Zәbәnat-i-du karadat тәғәлwen, ⁶ fәlas ийүан дағ midawan-in а di-d-innәftаған, wәр әleғ а t-әшшәtša." ⁷ Tәzzar ann-as-du дағ ammas n аһан: "A di-wәр-tәdgәza, eһan-in әmәrәdda ixfâl, nak әd bararan-in nәqqâl s etәs, wәр әfrega а din-әbdәdaғ akfaғ-qay arat."»

⁸ Әnnеғ-awan, kud wәр d-inker akf-as-tanat fәlas imos әmidi-net, da ad d-inkәр akf-ay arat kul was iddәrar fәlas wәр t-isakkarakad mansay wa t-iga den.»

Әzәgzan әs тәwatriwen

⁹ Аһаран nak әnnеғ-awan: «Ansәyat Mәшšina а kawan-akfu; әgmәyat, ad тәgrәwam. Kawkawat тәsәһәrt а dawan-tannalam; ағrat-tu, а dawan-akkawan. ¹⁰ Аһalla и onsayan

ad itəwəkfu; i igmayan, ad igrəw, i iḡran deḡ Məššina, a das-akkawan.

¹¹ Məni daḡ-wan wa daḡ z'igməy barar-net isan, akf-ay taššolt? ¹² Wala igməy daḡ-as təkəkkit akf-ay təzardəmt? ¹³ Kud kawanay an nəllubas təssānam tehakkay n awa olaḡan i bararan-nawan, manəmmək as kawan-wər-z-akfu Abba-nawan wa ihan ijənnawan Infas wa Zəddigan as das-tu-tonsayam?»

Iyyat təmazaq əd Farisaytan

Tarna ən Məššina meḡ tarna n Iblis

¹⁴ Dəffər awen ikkas Ḡaysa daḡ aləs iyyan aggəsuf a das-igaddalan awal. Igməd-tu aggəsuf ḡas iššewal, isammaklal awen əs tamattay. ¹⁵ Mišan ad gannin wiyyad daḡ-san: «Awen Aššaytan Baḡalzabul, wa n əmənokal ən kələsuf a t-ikfan fərregat n ikus ən kələsuf daḡ aytedan.»

¹⁶ Wiyyad deḡ arân ad t-ajjarraban, gammayan daḡ-as a dasan-agu təlməḡjujat təmosat alḡalamat a du-təfâlat Məššina. ¹⁷ Ḡaysa ənta issân awa samadranan, adi a fəl dasan-inna: «Taḡmar kul tas əmməgaran məssawəs gar-essan, əbərəjji a za tagu, təzzar əbərəjjen ḡawnatan-net s iyyan iyyan. ¹⁸ Təgannim nak Aššaytan Baḡalzabul a di-ikfan fərregat n ikus ən kələsuf daḡ aytedan; kud adi a igan wədi manəmmək as za tihag taḡmar-net ənta iməggar əd man-net? ¹⁹ Amaran kud nak tarna ən Baḡalzabul as takkasay kələsuf daḡ aytedan, inalkiman-nawan za ma ilan tarna tas tan-takkasan? Adi da fəlas əntanay iman-nasan as kawan-z-əbəzan s əššəriḡa.

²⁰ Kud amaran nak tarna ən Məššina as takkasay kələsuf, daḡ adi Taḡmar ta n Məššina tos-iwan-du. ²¹ Aləs n əməqqerəd otâban fəl təzoli, ogâz ehan-net, wədi təla-net wər tat-in-ikka wala. ²² Mišan as t-id-ibag iyyan a t-ogaran assahat, orn-ay; a daḡ-as ibəz təzoli-net ta fəl iffəlla, irkəb daḡ-as təla-net, uzan-tat. ²³ Wa dər-i wər nəddew, azangaw-nin a imos; wa di-wər-nəllil deḡ s əšidəw, wədi əzəwwəziwəz a itaggu.»

Tewaxlay ən kələsuf

²⁴ «As igmad aggəsuf awedan, ad irəs aggəsuf wen idaggan əqqurnen, igammay id imal, iqqim wər t-igrew, ad annu daḡ man-net: "Nak a za, ad əqqəlay ehan-in wa d-əgmada." ²⁵ As t-id-iqqal, a t-id-asu ifrâd, immotag. ²⁶ Təzzar aglu idaw-du d əssa kələsuf wiyyad a t-ogarnen tallabəst, əggəzan awedan wanâd, əzdəḡan-tu. Tagu taḡara n awedan wen aḡşud ogaran was kala tu-təga.»

Ībbələl wa n tidət

²⁷ Iššewal Ƴaysa den da as tædkal tæntut iyyat æmæslinet, tænn-as: «Tæbbilal tæntut ta kay-terawat, æd fæfan win tænkasaḡ.» ²⁸ Mišan inn-as Ƴaysa: «Aytedan win ogarnen æbbələl da æssəsammen y awal æn Mæššina, tamazalan awa inna.»

Alyalamat ta n Yunæs

²⁹ As inay Ƴaysa aytedan tiddawan fall-as, inn-asan: «Aytedan n azzaman win, inellubas; gammayan tælmæxjujat! Kala! Tælmæxjujat ta dasan-tætawaggat iyyadda ḡas, a tat-imosan ta n ænnəbi Yunæs. ³⁰ Emmæk was kala ad iqqal Yunæs alyalamat y aytedan n æḡræm æn Ninif, æmmæk en da as z'æqqəla nak Ag Aggadæm alyalamat y aytedan n azzaman win. ³¹ Ēzəl wa n tabadday, a du-tænkær tæmænokalt tas kala tæḡkam fall akal n agala igân esəm Šeba, taggayyat fæl aytedan n azzaman win, tæzzæbæz-tan y æššæriḡa fælas d ad iraz amaḡal a du-tægmæd fæl ad tæssəsəm y awal æn tæla n ægærri wa itaggu æmænokal Suliman. Ēssænæt za as, wa illan da æmæredda, ogar ænnəbi Suliman mišan tugayam s a das-tæssəsəmam. ³² Ēzəl wa n tabadday, ad d-ænkæran aytedan n æḡræm wa n Ninif, æzzæbæzan aytedan n azzaman win y æššæriḡa fælas tætuḡt a ægan æzəl wa dasan-iga Yunæs tælxutbat, imal-asan awal æn Mæššina. Ēssænæt za as, wa illan da æmæredda, ogar Yunæs mišan tugayam æs tætuḡt.

Ēnnur æd šiyyay

³³ Wær t-illa awedan isarḡin fætəla tæzzar iḡbær-tat, madex ag-et daw æḡzu, kalar æsəwær a tat-itaggu edag ihhoken fæl ad ænəyan aytedan win du-taggaznen ehan s ænnur-net. ³⁴ Šat, šilat æn fætəla a tæmos i tæḡəssa-nak. As imos as šat-nak tæhannay s ælluḡ, wædi tæḡəssa-nak ketnet tæha ænnur; mišan as imos as šat-nak wær tæhænnəy s ælluḡ, wædi tæḡəssa-nak ketnet tæha šiyyay. ³⁵ Daḡ adi agu ænnəyat æd man-nak, ænnur wa kay ihan a tu-wær-alsinat šiyyay. ³⁶ Amaran kud tæḡəssa-nak ketnet tæha ænnur, wær tat-iha adag ihân šiyyay; wædi ad tæmæləwləw ketnet, zun tæheḡ edag tæsimalawlaw fætəla.»

Tælmænufəqa æn Farisaytan æd musanan n Ēttawret

³⁷ Iḡrad Ƴaysa awal ḡas igmay daḡ-as Farisay iyyan a ḡur-æs ammansaw. Os-in Ƴaysa ehan æn Farisay wen, iggaz edag wa daḡ æskaran mensewan, isaḡḡamar, ad itattu. ³⁸ Isammaklal æs Farisay en awas issənta Ƴaysa tettay wær iššorad ifassan-net awa tænna alyadat-nasan. ³⁹ Tæzzar inn-as Ēmæli Ƴaysa: «Kawanay Farisaytan, tæzazdagam afalla

n əsəlkəw d əxəzu, as iga awen, ammas ən wallan-nawan wər ədnayan ar tarkəbt əd talbast. ⁴⁰ Aljahilan! Wərgex wa d-igan afalla ən təxəssa, ənta a d-igan ammas-net da? ⁴¹ Daḡ adi əkətət i təlaqqawen awa ihan ikassan-nawan, əddi arət kul a dawan-izdag. ⁴² Iket alḡazab iqqâl-awan ya Farisaytan, fəlas təhakkam awa imosan təməssədək-nawan daḡ ənniḡnəḡ d əzzənəfan ən yelatan kul win fərgan, as iga awen, tətamazrayam əššəriḡa ən Məššina əd taranet, s əntanay əs kawan-iwar ləkkum y-asan, da wər din-təglemam win hadatnen!

⁴³ Iket alḡazab iqqâl-awan kawanay Farisaytan, fəlas tərâm təximit daḡ adag wa ilan almaqam daḡ nan n əlḡibada ən Kəl-Əlyəhud, d a kawan-saslaman aytedan daḡ sammanayan. ⁴⁴ Iket alḡazab iqqâl-awan, fəlas tolâm əd zəkwan wər nəmmun, fəl itijəwənkət awedan wər issen, samadasan-tu.»

⁴⁵ Inna iyyan daḡ musanan n Əttawret i Ƴaysa: «Əššex, daḡ awa tənneḡ əddi, nakkanay da, təgex-ana arak batu.»

⁴⁶ Inn-as Ƴaysa: «Iket alḡazab iqqâl-awan kawanay da, imusanan n Əttawret, fəlas təsawaram aytedan əzuk as izzəwat agḡay-net; kawanay amaran wər tu-za-tədəsam əs wala idədwən-nawan.

⁴⁷ Iket alḡazab iqqâl-awan fəlas təkarrasam izəkwan hossaynen y ənnəbitan as imarawan-nawan a tan-əḡyanen.

⁴⁸ Əmmək wədi as təgḡiyyem fəl awa əgan, tərḡdam sər-əs fəlas əntanay za əḡyan-tan, kawanay amaran təkrasam izəkwan-nasan.

⁴⁹ Awen daḡ a fəl inna Məššina daḡ masnat-net wər nəla təzərəst: "A sər-san zəmmizəlay ənnəbitan əd nəmmuzal, ad agin iman ən wiyyad daḡ-san, zəḡḡəzzəban win hadatnen." ⁵⁰ Adi as, aytedan n azzaman win, əhân-tan man n ənnəbitan kul win tanwanḡyanen, wa n ənətti n əddənət har azalada. ⁵¹ Awalla, illikan as, aytedan n azzaman win, əhân-tan man n aytedan di kul, a d-ibazan ḡur man win Habila har win Zakarayya, wa əḡyan daḡ Ahan wa Zəwwəran n Əlḡibada, gər majmar wa zəwwəran n əsəqqəd ən təkutawen d adag wa zəddigan.

⁵² Iket alḡazab iqqâl-awan ya imusanan n Əttawret, fəlas təharam tarrayt ta tətawayat awedan əs masnat ən Məššina; kawanay iman-nawan wər-tat-təggezam, təgdalam deḡ iguz-net i win t-əranen.»

⁵³ As ifal Ƴaysa ehan wen, əssintan musanan n Əttawret əd Farisaytan daḡ əddəguz-net wəllen, taggin-as isəstanan aggotnen, ⁵⁴ daḡ gammayan a tu-sassannin arət a tan-zakfin tarrayt əs təxtəst-net.

12

*Æsammutæg**A kay-wær-tæggæz tasa n æzægzan æs Ýaysa*

¹ As itaggu awen tæddew tamattay tæknât igæt fæl Ýaysa, har æqqiman aytedan tinæmækukulan. Iðšewal Ýaysa, azzar æs nættulab-net, inn-asan: «Ænkædat i xamira wa n Farisaytan a t-imosan tælmænufæqa. ² Arat kul wa iɣbaran ad itæwæsænæfilæl, amaran æssir kul ad affaggu. ³ Daɣ adi, a tønnam daɣ šiyyay, ad itæwæslu ezal a mallan. A tæsammataktakam deɣ daɣ ammas ən nan-nawan, ad attamal fæl fallatan-nasan.

⁴ Kawanay imidawan-in, ænney-awan: Ad wær tiksadam aggadæm æs færregat-net wær t-okay ikus ən man daɣ tæxæssa. ⁵ A dawan-æmælaɣ wa za tiksadam: Iksadat Mæššina a inaqqin, ila deɣ tarna n a kawan-igær daɣ Jahannama. Awalla, ænney-awan ænta en da as kawan-iwar a tu-tiksadam.

⁶ Wærgæɣ sæmmos gæðad a din-nazzinen sanatat tæfelen? Dær iga awen da za, wær tan-iha i din-itataw Mæššina. ⁷ Kawanay amaran wala anzadan ən ɣafawan-nawan da kul æddunan. Daɣ adi ad wær tiksadam wala, togaram igæðad aggotnen ælqimat.

⁸ Ænney-awan, awedan kul wa iggæyyen dat aytedan as nak Ag Aggadæm a t-ilan, nak da, ad æggæyyæɣ dat angalosan ən Mæššina as nak a t-ilan. ⁹ Mišan wa di-inkuran dat aytedan, wædi nak da ad t-unkaray dat angalosan ən Mæššina. ¹⁰ Awedan deɣ wa di-ibyakan nak Ag Aggadæm, ifrâg ad igræw tæsureft; mišan awedan wa ikkasan tarna y Infas wa Zæddigan, wædi wær z'igræw tæsureft.

¹¹ As tæmmewayam æs nan n ælɣibada win Kæl-Ëlyæhud, madæɣ æs mænokalan madæɣ æs muzaran y ad tætæwæšræɣam; a kawan-wær-iðšewæš æmmæk was za tækkæsam iman-nawan, wala awa za tannim, ¹² Infas wa Zæddigan a kawan-z-issusenan daɣ assaɣat tædi da awas inahagga a tu-tannim.»

Ælmital n æmæggærgæs wa wær næla ægærri

¹³ Inna-du awedan iyyan i Ýaysa daɣ ammas ən tamattay: «Æššex, annu y æmaqqar-in a dær-i uzan tækasit-nana.» ¹⁴ Inn-as Ýaysa: «Alæs, ma di-igan ælqali-nawan, wala tuzanaɣ-awan tækasit?»

¹⁵ Tæzzar inna Ýaysa i tamattay: «He kawanay! Agæzat iman-nawan daɣ a imosan æwwæli fælas kud iggærgas awedan, da tæmæddurt-net wær tæqqen daɣ ærræzæɣ-net.»

16 Təzzar ig-asan əlmital wa, inna: «Şiwəgas n əməgğergəs iyyan a əganen igi olâxan. 17 Ad isamadrان gar-es əd man-net, igannu: "Awak ma z'agax? Nak ab'as ələx edag a dağ əgəx attaxam-in." 18 Təzzar inna: "Əssanax awa z'aga. Ad arzağ şidangawen-in, əkrəsax şin tanat-ogarnen, əşşidəwax dağ-asnat attaxam-in kul d awa ələx." 19 Amaran annax i man-in: "Ya mandam, tələx ərrəzəx aggen a dak-igân elan aggotnen, sanfu, tatsa, taşwa, tannaflaya." 20 Mişan inn-as Məşşina: "Ameskel! Ahad a da a kay-z-əgmədan man-nak. Ma z'igrəwan awa təşşedawax? 21 Awen dağ a igarrawan awedan wa işadawan əddənet fəl man-net amaran wər işşedaw wala dağ talxa ta gar-es əd Məşşina."»

Iba n aşşawaşa

22 Dəffər awen inna Үaysa i nəttulab-net: «Awen da fəl dawan-ənnəx: A kawan-wər-təşşəwəş təməddurt gər awa za tatsim, wala awa za talsim, 23 fəlas iman-nawan ogaran imensewan almaqam, tağəssa-nawan deş togar isəlsa almaqam.

24 Ənzərat dağ əxrutan, wərmad nabbalan za wər tiləyan, wərmad əlân isəxbar za wala şidangawen mişan issodartan Məşşina. Tofâm-tan za s aggen. 25 Məni dağ-wan wa ifragan s aşşawaşa-net əşitəy ən təxrəst-net əs wala ellaf ən şat? 26 Dad zama as wər təfregam igi n a ogdân d awa təmmədrəyt, ma fel as kawan işşəwəş awa hadan? 27 Ənzərat dağ əmmək was du-daggalnat təjigawen: wərmad şaqqalnat wala zattinat isəlsa, mişan ənnəx-awan wala Əmənokal Suliman harkid təgərgist-net kul wər kala ad ewad wala iyyadda dağ-asnat şihussay ən talassay. 28 Dad isalsu Məşşina yel əs təməwit tədi, s azalada ibdâd, tufat ad itəwəsərxu dağ təjəngərert; manəmmək as kawan-wər-z-assalsu, kəl əzəgzan əndərran!

29 Dağ adi a kawan-wər-ədgəzan medranan n awa za tatsim, wala awa za taşwim, wala deş işşəwəşan-kawan. 30-31 Aratan win di kul aytedan win wər nəssen Məşşina, a ozalnen dağ agamay-nasan. Mişan kawanay, ədgəzat dağ agamay ən Taşmar ta n Məşşina. Aratan win di kul a kawan-tawakfin əntanay da, fəlas Abba-nawan issân as təddiraram sər-san.

32 Təsəgərt n ayfad-in a kamət-wər-təggəz tasa, fəlas Abba-nakmat igrâz-as wəllen a kamət-akfu taşmar-net.

33 Zanzat-in awa təlam, təkətam-tu i təlaqqawen, tagim i man-nawan fartamanitan wər nətəməndu, təşşidəwam

dağ jənnawan ərrezəy wa wər nəxərrəd, wər mad t-in-z-ihazan baydagan wala dəx təxşəd-tu tamaday. ³⁴ Edag wa təggaz təgərgist-nawan, ənta a z'əggəzan wallan-nawan.»

Assa n Ag Aggadəm

³⁵ «Əqqələt aytedan otâbnen, əs ərğânat fətəlaten-nasan. ³⁶ Talim d eklan əqqâlnen y ad d-ifəl məşşissan takrəst fəl a sər-əs in-əbdədan da da ad d-izzəkkat dağ əmi n ahan. ³⁷ Əbbilalan eklan win d-ogaz məşşissan okâyan. Silakanax-awan as, ad atəb ənta iman-net, isəxçimen, isəmmənsəw-tan. ³⁸ Gər z'iqqâl-du adawannay n ahad wala dəx ammas n ahad, eklan win d-ogaz məşşissan okâyan əbbilalan.

³⁹ Wərgəy kawanay iman-nawan təssânam as, ənnâr issân məşşis n aɣaywan amazay wa dağ du-z-idəl abaydag, akəy isəmmutəg y a das-igdəl terazay n ahan-net? ⁴⁰ Səmmutəgat za kawanay da, fəlas nak Ag Aggadəm ad d-asa dağ assaxat tas wər tordem a dağ-as d-asa.»

⁴¹ Təzzar inn-as Butros: «Əməli, nakkanay ɣas a fəl təgəy tangalt tədi, meɣ aytedan kul?»

⁴² İjjəwwab-as əməli ɣaysa inn-as: «Əmaşşaxal wa iɣdalan ila dəx əgərri ənta a isannafran məşşis izzuzər-tu i maşşaxalan-net win hadatnen fəl a tan-ihakku idəgran-nasan dağ sudar dağ alwaq wa igmadan y awen. ⁴³ İbbilal əkli wen as d-iqqal məşşis, ogaz-t-id iha əşşəxəl wa daq q-id-oyya den. ⁴⁴ Əggəyyəy əsilakanax-awan as, ad t-izzuzər məşşis i təla-net kul.

⁴⁵ Mişan ənnar inna əkli wədi dağ man-net: "Məşşi illolat-in," təzzar ad iggat imaşşaxalan əd təmaşşaxalen win hadatnen, itattu, issasu esmad har ammaswad, ⁴⁶ akli wədi, ilkâm a t-id-iɣdər məşşis dağ əzəl d amazay wər orda, təzzar ad t-iggât har t-iksən, ag-ay dad tawaggin aytedan win wər nəɣdel.

⁴⁷ Amaran akli wa issanan awa ira məşşis, iqqim wər t-iga madəy wər iga ənnəyat n igi-net, a das-təwəgginat təwit aggotnen. ⁴⁸ Mişan akli wa wər nəssen awa ira məşşis, amaran iga arat ihoran d əwəddəb, a das-təwəgginat təwit wər nəggət. Awedan igrawan a aggen, a dağ-as itəwəgməy a aggen. I itawasaxlafan a aggen, a dağ-as itəwəgməy a ogaran awa itawasaxlaf.»

Ənəməzray d əşşəriɣa wa d-izayan

⁴⁹ Dəffər awen inna ɣaysa: «Osey-du fəl ad assarɣa temsay dağ əddənet. Sidaranax ad imos as tərɣâ. ⁵⁰ Amaran ilkâm dağ-i ətəwəsəlmaɣ, s iket wər t-əgəy əknan-i man-in əddəguz.

⁵¹ Tordâm as, assa a d-əgey fəl a d-awəyax alxer s əddənet? Kala kala, ənəməzray a sər-əs d-ewaya. ⁵² Id a ibazan xur əmərədda, səmmos aytedan n ahan iyyanda ad nəməzrəyan, əwaran karad aganna fəl əşšin, əşšin dey əwəran aganna fəl karad. ⁵³ Ad inəməzrəy aləs əd barar-net, barar dey inəməzrəy d abba-net, tənəməzrəy təntut əd tabarart-net, tabarart dey tənəməzrəy d anna-net, tənəməzrəy tədaggalt əd təntut ən barar-net, tənəməzrəy dey təntut əd tədaggalt-net.»

⁵⁴ Inna Yaysa dey i tamattay: «Wərgəy as tənayam tagarak as du-təgmad dəy ataram ad tannim əddi da: "Akonak izay-du." Təzzar agu adi da. ⁵⁵ As tənayam dey əhud as d-igar, ad tannim: "Ad tagu tuksay." Təzzar agu adi da. ⁵⁶ Elmunafiqan, təssānam emel n alxalamaten šin əganen fəl amaḍal əd šin əganen dəy jənnawan, mišan adis wər təgrem azzaman win fall-awan əganen da?

⁵⁷ Mafel za wər təgrem kawanay iman-nawan awa oḡadan? ⁵⁸ Masalan as kay-iḡra awedan s adag n əşşəriḡa, təgməya təməwit əs tənamaknam dəy tarrayt. As wər təgey adi, a kay-ilwəy har kay-issəbdəd dat əlqali. Əlqali amaran a kay-agu dəy fassan ən soji wa kay-z-igəran dəy kasaw. ⁵⁹ Əsilakanax-ak ās: Wər du-za-təgməda iket wər tərzema. Wala tamma iyyadda wər din-za-taqqam.»

13

Addararat əs tətubt

¹ Harwada išşewal Yaysa as d-ənkaran aytedan əllanen den, əsoḡalan-as isalan ən meddan wiyyad ən Galilaya as isisaga ənaxkim Bilatəs iman-nasan alwaq a dəy taggin šikutawen dəy Ahan wa Zəwwəran n Əlḡibada dəy Yerusalam.

² Inn-asan Yaysa: «Awak tordâm as, Kəl-Galilaya win di ogaran Kəl-Galilaya kul win hadatnen tišit ən nəsbakkadan fəl as əgan arak təməttant tədi? ³ Ənnəy-awan, kala! Amaran kawanay da, as wər tətubam, ad təhləkam ketnawan.

⁴ Ma tənnam za s aytedan win maraw d əttam win fəl ibarajjat suru was itawannu Silowam dəy əḡrəm ən Yerusalam, inḡ-en? Tordâm as, ogaran Kəl-Yerusalam kul win hadatnen tišit ən nəsbakkadan? ⁵ Ənnəy-awan, kala! Amaran, kawanay da, as wər tətubam, ad təhləkam ketnawan.»

⁶ Ig-asan Yaysa tangalt iyyat, inn-asan: «Kala inbal aləs iyyan ašək as itawannu fig dəy afarag-net n alḡanab. As təḡa tamert n ara-net, os-ay-du y ad d-inkəd aratan-net, mišan wər dəy-as igrew wala. ⁷ Təzzar inna y amašşaxal wa innəttafan d afarag: "Ənəy! Əmərədda karad elan a

əgey tasa-du, gammaya-du aratan n ašək wa, mišan wər kala daɣ-as əgrawa wala. Daɣ adi əxtəs-t-in! Ma ikannu daɣ amaɖal wər t-idu-təgəmməd tənfa." ⁸ Inn-as amaššaɣal wen: "Məšši, are daɣ-ak a tu-tayya tenewa da ɣas, ad əɣəzəɣ amaɖal wa t-iɣlayan, ənɣəla daɣ-as tamaqqost. ⁹ Iha mijas awatay wa d-izayan ad arəw, as wər erew, təssəxtəsaq-q-in."»

Təməzzəyt ən təntut iyyat daɣ əzəl ən təsanfawt

¹⁰ Əzəl iyyan ən təsanfawt isasaɣru Ƴaysa daɣ ahan n əlɣibada ən Kəl-Əlyəhud. ¹¹ Təlla təntut iyyat den təlât maraw elan d əttam issirantat aggəsuf, imos əruru-net təganzay, wər təfreg aqqad ən tabadday-net. ¹² As tat-inay Ƴaysa, iɣr-et-du, təzzar inn-as: «Təntut, təwərnənam təzzayaɣ daɣ-as!» ¹³ Issəwar-tat ifassan-net, toɣad təbadday-net alwaq wen da, ad təmmâl Məššina.

¹⁴ Mišan iggaz alham əmuzar n ahan n əlɣibada wen fəlas izzozay Ƴaysa awedan daɣ əzəl ən təsanfawt, inna əmuzar en i tamattay: «Wərgəy sədis adan as imməkkan a daɣ-san itəwəggu əššəɣəl? Asiwat-du daɣ-san təgməyam təməzzəyt, wərgəy əzəl wa n təsanfawt!»

¹⁵ Inn-as Ƴaysa: «Əlmunafıqan, məni daɣ-wan wa wər nətəkkəs tewaynay y azgar-net madəy itrəg əjad-net daɣ əzəl wa n təsanfawt y a t-id-aššašəw? ¹⁶ Tahayawt n ənnəbi İbrahim ta amaran, ikrâd İblis a ilân maraw elan d əttam, adis wər imməkkan ad tətəwəzuzəy daɣ əzəl ən təsanfawt?»

¹⁷ As inna Ƴaysa awen, təbaz təkarakit aytedan kul win nəmməzray-net, aytedan sa hadan amaran, ketnasan sidawen-tan mazalan əknənen šihussay win itaggu.

Əlmital n amasa n annabat igân esəm mutard əd wa n xamira

¹⁸ Inna Ƴaysa: «Ma dər tola Taymar ta n Məššina? Mas tat-z-ammattala? ¹⁹ Tolâ d amasa n annabat igân esəm mutard, idkal awedan inbal-tu daɣ afarag-net, idwal, iqqal ašək, ad taggin gəɖad šisəllula daɣ zəlan-net.»

²⁰ Inn-asan Ƴaysa deɣ: «Mas z'ammattala Taymar ta n Məššina? ²¹ Tola əd xamira tərway təntut əd karad annafaxaten n agel n alkama har ikuf agel ketnet.»

Tarrayt ta n Taymar ta n Məššina

Iguz ən Taymar ta n Məššina

²² Iгла Ƴaysa, illil iɣərman əd təɣarmaten, isasaɣru aytedan, idâg sa sər Yerusalām.

²³ Inn-as awedan iyyan: «Əməli, awak aytedan wər nəggət ɣas a z'assafsu Məššina?» Təzzar inna Ƴaysa i

tamattay: ²⁴ «Imi ən Taymar ta n Məššina i kəruzan, day adi ballanat təgməyam d iguz-net. Ənneḡ-awan aytedan aggotnen a z'əgməynen d iguz-net, mišan a dasan-indər.

²⁵ As ijwar məššis n aḡaywan iḡfal-in fəl man-net təsəhərt n ahan, kawanay təbdâdam dat-əs, ad təggəzam šin əkukəw, təgannim: "Mandam, aləm-anax!" Ann-awan: "Wər kawan-əzdayax za wər əssena da du-təfalam."

²⁶ Alwaq wədi a das-tannim: "Wərgəḡ nədraw dər-ək tettay əd tassay, təsisaxra deḡ day ḡərman-nana?" ²⁷ Mišan a dawan-annu: "Nak wər kawan-əzdayax. Ketnawan imaggan ən talbast a təmosam, ugagat-i."

²⁸ As tənayam Ibrahim d Isəhaq əd Yaqub d ənnəbitan kul əqqiman day Taymar ta n Məššina, ənta kawanay iman-nawan tətawastayam day-as, ad talim, ad tədaddam idədwān-nawan fəl təmagraz. ²⁹ Ad d-əgmədan aytedan dənnəḡ d ataram əd tamasna d agala, təzzar nəḡimin ədrəwan iməgura day Taymar ta n Məššina.

³⁰ Ənəyat za! Aytedan win əhanen ələqqam əmərədda ad izaran, win azzarnen deḡ əmərədda ad əggəzan ələqqam.»

Igi n ənnəyat əd Herod

³¹ Alwaq wen da t-id-əhozan arat day Farisaytan, ənnan-as: «Əgməd edag a, fəlas əmənokal Herod ira igi ən man-nak.»

³² Inn-asan Ƴaysa: «Aḡlat tannin y awaqqas wa igan Herod: "Takkasax kələsuf day aytedan, zuzəyax imiranan azalada əd tufat, amaran əzəl wa n karad ad assanda əššəḡəl-in." ³³ Dər iga awen da ya, əššil a imos ad agla day əşikəl-in, azalada əd tufat əd tufat ten, fəlas wər imməkkan ad iba ənnəbi day adag wər nəmos Yerusalam.»

Tala ən Ƴaysa fəl Yerusalam

³⁴ Inna Ƴaysa: «Xa aytedan ən Yerusalam, iket təgam iman n ənnəbitan, tənḡam deḡ əs təgur ən təhun win sərwan d-izammazal Məššina! Awak har mənəket taklaten, gammaya d a kawan-d-əššidəwa s əmmək as du-təšadaw təkəjit ikərətan-net daw əfrutan-net, mišan tugayam s awen! ³⁵ Ənəyat za, Məššina a day-wan idkəl ifassan-net, iqqəl ahan-nawan əməjir. Amaran ənneḡ-awan, wər di-za-tələsam anay iket wər d-osa əzəl wa day za tannim: "Wa d-osan s esəm n Əməli, iḡrāw arraxmat."»

14

Əzuzəy ən Ƴaysa aləs iyyan day əzəl ən Kəl-Əlyəhud wa n təsanfawt

¹ Ëzəl iyyan ən təsanfawt, iggaz Ƴaysa ehan n iyyan daƷ muzaran n Farisaytan fəl a Ʒur-əs atšu. Ëgaran daƷ-as Farisaytan əllānen den šittawen. ² Illa aləs iyyan den as ibəyaƷat alam-net ketnet, iqqīm dat Ƴaysa. ³ Issəstan Ƴaysa imusanan n Ëttawret əd Farisaytan, inn-asan: «Awak əzuzəy n awedan daƷ əzəl wa n təsanfawt xalāl, meƷ wər xalal?»

⁴ Mišan wər das-ənnen wala. Amaran idas Ƴaysa əmiran en, izzozay-tu, issəgl-ay. ⁵ Təzzar inn-asan: «Məni daƷ-wan was z'ihannayan barar-net madəƷ azgar-net har iqqəl daƷ anu əzəl wa n təsanfawt, aqqam wər t-id-ikkəs daƷ-as tamazayt tədi da?»

⁶ Wər əssenən a das-ənnan daƷ batuten šin iga da.

Idaggan win saymar

⁷ Igr-in Ƴaysa əsənnəfran wa əgan naftaƷan idaggan win taggazan aytedan win tawasaymarnen təzzar ig-asan ahol, inn-asan: ⁸ «As daƷ-ak igmay awedan izazlayan a das-in-təməgureƷ, ad wər təsənnəfrənəƷ edag wa taggazan aytedan win tawasaymarnen fəlas mijas igmāy daƷ awedan iyyan a kay-ogaran almaƷam a das-in-iməgurat, ⁹ təzzar as-ik-du məššis n ahan wa kawan-d-iƷran əs məgura-net, ann-ak: "Ëgməd edag y aləs wa." Təböz-kay təkarakit, takkay dəffər aytedan taqqama. ¹⁰ Kalar as daƷ-ak itawagmay a din-tasaƷ iməgura, takka dəffər aytedan taqqama. Ëddi, as d-osa məššis n ahan, a dak-annu: "Ëmidi-nin, zənkəz-du s adag ofān wədi." Akf-ik adi ətəwəsəƷmar Ʒur naftaƷan kul win hadatnen.

¹¹ Fəlas awedan kul wa idkalan iman-net, ad itəwəsərəs, wa issərəsən iman-net dəy ad itəwədkəl.»

¹² Dəffər awen inna Ƴaysa i Farisay was innəftaƷ: «As du-təƷarraƷ aytedan y a tan-taššatšəƷ ezal madəƷ ehad, a du-wər-taƷra imidawan-nak, wala imədrayan-nak wala išəqqəƷan-nak wala imahharagan-nak ən məggərgas, fəl a kay-du-wər-aƷrin əntanay da, əzəl iyyan, ərzəman-ak awa dasan-təgəƷ. ¹³ Kalar as iqqal as təšatšəƷ aytedan, šatšu šiləqqawen əd nəbdan əd məggudal əd məddəryal. ¹⁴ TəbbilaləƷ as təgəƷ adi, fəlas əntanay wər əfregan a dak-ərzaman. Ërruzmatan-nak a tan-təgrəwa əzəl wa n tanakra n alƷadılan.»

Ëlmital wa n məgura win zawwarnen

¹⁵ As isla iyyan daƷ naftaƷan i batu ten, inna i Ƴaysa: «Ibbilal awedan wa z'atšin daƷ məgura win z'aginən daƷ TaƷmar ta n Məššina.»

¹⁶ Inn-as Ƴaysa: «Aləs iyyan a itaggan iməgura zawwarnen, igmay daƷ aytedan aggotnen a t-id-asin.

17 As d-əmməgnen mensewan, izammazal akli-net y ad annu i naftaxan: "Asiwat-du, imensewan əmərədda əmmotagan."

18 «Mişan əggazan-tu ketnasan s iyyan iyyan əd sur. Inn-as wa azzaran: "Səket əzzənza tawagost, kundaba oseqqat ənəyaq-qat. A di-wər-təşşəkaş." 19 Inn-as-du iyyan: "Səket d-əzzanza maraw zəgran y agayak, amaran areş a tan-ərəma. A di-wər-təşşəka." 20 Inn-as-du iyyan: "Səket əzlafa, daş adi wər əfrega a kay-in-asaş."

21 «As d-iqqal əkli, iga i məşşis isalan kul win den. Iggaz alham labasan məşşis n aşaywan, amaran inn-as: "Aglu tarmad, tilalaş aşrəm, tidawa-du əd tələqqawen əd nəbdan əd məddərşal əd məggudal."»

22 «As d-iqqal əkli, inna i məşşis: "Məşşi, əgeş awa di-tənneş, mişan ehan harwa da ih-ay adag." 23 Inn-as məşşis: "Əgməd aşrəm, tilalaş əd tarrayen əd tamawen ən fərgan, təşəhhəşşələş aytedan a d-asin fəl ad idnəy ahan-in. 24 İllikan as aytedan win as əzzara əgməya daş-san a di-d-asin, wər tan-iha i z'irəman imensewan-in."»

Əşşərədan win əhanen ləkkum i Ƴaysa

25 İmalallay-in Ƴaysa tamattay təknaş igaş ta dər-əs təddewat, inn-asan:

26 «Awedan wa iran a di-ilkəm, ənta wər di-iga tara togarat ta iga y abba-net, d anna-net əd təntut-net əd bararan-net əd mədrayan-net əd təmədrayen-net d ənta iman-net, wədi wər ifreg ad iqqəl anattalib-in. 27 I wər nəger iri y ad idkəl təgəttawt-net, agu imateran-net ilkəmi, wədi wər ifreg ad iqqəl ənalkim-in. 28 İd nənna masalan ad ira iyyan daş-wan ad ikrəs ehan imosan suru. Wəgeş təşimit a itaggu, ixşəb awa t-ikrasan təzzar, issən kud ila azrəf a t-issindan wala? 29 As wər iga awen, as t-issənta akaras har t-orna əsəndi-net, a daş-as agin aytedan kul win t-ənaynen tamakkakkayt, 30 annin: "Awedan wa, issənta akaras n ahan, orn-ay ad t-isəkkəsəw."

31 Madəş nənna masalan, əmənokəl iyyan as inkar əməgər gar-es d iyyan. Wəgeş təşimit a z'agu təzzar, isəmmədrən, issən kud ənta wa ilan maraw əgim n aləs, ifrəg terazay n əmənokəl wa hadan ilən ənta sanatat təmərwən n əgim n aləs? 32 As inay as wər t-ifreg, harwa da iggug əmənokəl wa hadan as tu-z-issuku inəmmuzal, igməy daş-as alxer.

33 Kawanay da za əmmək di da, i daş-wan wər nəmməzzay d awa ila kul, wər ifreg ad iqqəl anattalib-in. 34 Tesəmt arat oləşan a təmos, mişan as tat-təgməd tembay-net, məni təməwit tas tat-za-tətəwəsuxəl? 35 Ab-as tat-təha

tænfa waliyyat y amaḍal wala deḡ tah-et tænfa i tamaqqost. Tanaḡla ḡas a din-za-tətəwəḡḡu. Wa isallin, aslet!»

15

Isalan əkkânen aytedan win əxraknen

Əlmital ən tilay ta aba

¹ Osan-du nabazan n amana əd nasbakkadan kul Ƴaysa y a das-əssəsəman. ² Əggazan Farisaytan əd musanan n Əttawret šin əgətəntən, gannin əs Ƴaysa: «Awedan wa iqbâl inasbakkadan, idarraw deḡ dər-san imensewan.»

³ Təzzar ig-asan Ƴaysa əlmital wa, inna: ⁴ «As ila iyyan daḡ-wan temeday ən tilay har daḡ-asnat təssəḡḡal iyyadda, awak wərgəḡ ad ayyu tazayat təmərwen əd tazayat šin hadatnen ədânnat, təzzar azəl iswəd i ta təssəḡḡalat har tat-d-igrəw? ⁵ As tat-d-igrəw, a tat-issəwər izeran-net fəl awa iga daḡ tədəwit, ⁶ as d-iqqal aḡaywan a d-aḡru imidawan-net əd mahharagan-net, ann-asan: "Ayewat, tagim tədəwit ta əgəḡ, fəlas agaraw a d-əgəḡ tilay-nin ta təssəḡḡalat."

⁷ Ənneḡ-awan zund əmmək di daḡ as, təfalawist ta z'agin win əhanen ijənnawan fəl tətubt n anasbakkad iyyanda, toḡar ta tan-za-təsəssuḡu tazayat təmərwen n alḡadil əd taza as ḡur iga as wər əddəraran əs tətubt.»

Tamma n əzrəf ta aba

⁸ «Madəḡ nənna masalan, təntut iyyat a təlat marawat tammaten n əzrəf har daḡ-as aba iyyat. Wərgəḡ ad tassarḡu fətəla, təfrəd ehan-net ketnet, təswəd-as s əlluḡ iket wər tat-təḡrew? ⁹ As tat-təḡraw, a du-taḡru šimidawen-net əd tamahharagen-net, tann-asnat: "Agimat tədəwit ta əgəḡ, fəlas agaraw a d-əgəḡ tamma-nin ta daḡ-i aba." ¹⁰ Ənneḡ-awan zund əmmək di daḡ as, tətubt n anasbakkad iyyanda təsifəliwis angalosan ən Məššina.»

Barar wa ixrakan

¹¹ Inn-asan Ƴaysa deḡ: «Aləs iyyan a ilan əššin bararan. ¹² As əzəl iyyan inna wa mədrəyan y abba-net: "Abba, akf-i adagar-in daḡ təkəsit." Izun-asan abba-nasan təla-net.

¹³ Arat n adan dəffər awen, inkar barar wa əndarran iššədaw awa ila kul, ikka akal iyyan iggugan. İlkam i tara ən man-net, ad iḡaššad awa ila. ¹⁴ As inḡa awa ila kul, osa-du laz labasan akal wa iha, təzzar iggaz šin təmaḡatirt. ¹⁵ Iḡla, išḡal y awedan iyyan n akal en da. Issok-ay šiwəḡas-net y a das-idən daḡ-asnat iladayan-net. ¹⁶ Awa das-iga laz daḡ iguz, isidaran tettay ən šətša win tattin ladayan, mišan wər t-illa i das-tan-ikfân.

¹⁷ Amaran isammadran day man-net, inna: "Awak wərgex imaşşaxalan n abba-nin əggətan mişan ketnasan əlân a ətşan har t-id-əgləzan, ənta nak inaqq-i laz da!" ¹⁸ Ad ənkəraş, əqqəla abba-nin, annaş-as: 'Abba, əmmizrayaş Məşşina, kay deş əbbodaraq-qay, ¹⁹ ab-as əhora d a di-itəwənnu barar-nak, ag-i iyyan day maşşaxalan-nak."

²⁰ Təzzar inkar iqqal abba-net. İzây-in ehan day igəş as t-ogga abba-net, təggaz-tu təhanint-net, ozal sər-əs, izalammat-tu, a das-itamallat.

²¹ Təzzar inna barar y abba-net: "Abba, əmmizrayaş Məşşina, kay deş əbbodaraq-qay, ab-as əhora d a di-itəwənnu barar-nak." ²² Mişan inna abba-net y eklan-net: "Tarmâd awəyat-du takatkat ta təhossayat, təzzəzləgam-as-tat, tagim təsəndərt day adad-net, təssəsəlam-tu. ²³ Tabəzam-du əhəri wa iddəren, təgzəmam-tu, ad natşu, nagu saksas, ²⁴ fəlas barar-in wa, şilat n as t-aba, amaran əmərədda idar-du; kala ixrak, amaran əmərədda igraw-du." Amaran əssəntan day saksas.

²⁵ As itaggu awen, barar-net wa n ayafadday iha şiwəgas. As d-iqqal, ihoz-du ayaywan, isla i səwat d awex. ²⁶ İgra-du iyyan day eklan-nasan, issəstan-tu d awa itaggan den? ²⁷ Inn-as əkli: "Amadray-nak a d-iqqalan, igzam abba-nak əhəri wa iddəren, fəlas tewaxlay a t-id-iga barar-net wər ila malad."

²⁸ İggaz-tu alham, ugay s iguz n ahan. İqqab-du abba-net ad t-itansay. ²⁹ Eges inna y abba-net: "Wərgex a ilan elan əşxâlay-ak, wər kala əmməzrayaş tənna-nak, harkid awen, wər kala di-təkfex wala şas exayd əgzama aga fall-as saksas nak əd midawan-in. ³⁰ Rurek amaran wa işşadan eharay-nak day təkərwaten ənta, osa-du şas təgazaməş-as əhəri wa iddəren."

³¹ Inn-as abba-net: "Barar-in, kay fawda təlley şur-i, awa əley ketnet i-nak. ³² Mişan immikkan ad naddawat nagu saksas, fəlas amadray-nak, şilat n as t-aba, amaran əmərədda idar-du; kala ixrak, amaran əmərədda igraw-du."»

16

Taryəmt fəl tara n əddənet

Amaşşaxal wa ilan tayttay

¹ Inna Ƴaysa i nəttulab-net: «Kala a t-illa aləs iyyan n əməggərgəs ilân amaşşaxal isinattaf d ərərəzəş-net, amaran itawann-as ixaşşat-tu. ² Təzzar isassaşr-ay-du, inn-as: "Ma imos awa fall-ak sallax? Əməl-i awa təgex y ərərəzəş-in, nak ab-as areş əşşəşəl-nak."

³ Inna amaššaxal wa gar-es əd man-net: "Awak əmərədda ma z'aga as di-ikkas amuzar-in daɣ əššəxəl? Nak, wər əfregax agayak, mansay deɣ isikarakad-i. ⁴ Əssânaɣ awa z'aga as kud tawakkasa daɣ əššəxəl-in da, a di-əqbəlan aytedan daɣ nan-nasan."

⁵ Təzzar isassaɣra-du aytedan win irwas aləs was işxal s iyyan iyyan. Inna i wa azzaran: "Ma kay irwas əmuzar-in?" ⁶ Inn-as: "Temeday ən tanaw ən wədi wa n azzayt." Inn-as amaššaxal: "Ƴam, tədkəla širawt-nak ta n əmarwas, təktəbəx fall-as tarmâd səmmosat təmərwen ən tanaw." ⁷ Dəffər awen inna y iyyan: "Kay za ma tətawarwasax?" Inn-as: "Temeday ən bəhu n alkama." Inn-as: "Edkəl širawt-nak ta n əmarwas, təktəbəx fall-as əttamat təmərwen."

⁸ Təmərkest ten, isl-et aləs wa işšəxalan ark amaššaxal wen, təzzar ad t-immâl fəl təla-net tayttay. Tidət a imos as aytedan win wər nəksud Məššina, ogaran win t-əksudnen təla ən tayttay daɣ taɣawšiwən šin əllanen gar-essan.

⁹ Nak za ənneɣ-awan: Agiwat imidawan s ərrəzəxan ən bannan win n əddənet ta; əddi as kawan-əgmadan, ad tətəwəqbalam daɣ adag ən təməxsurt ixlâlan.

¹⁰ Awedan wa təha təfləst daɣ arat əndərran, wa zəwwəran da təh-ay daɣ-as. Wa wər təha təfləst daɣ a əndərran, wa zəwwəran da, wər daɣ-as tu-təha. ¹¹ Daɣ adi, da kawan-wər-təha təfləst daɣ ərrəzəx ən bannan wa n əddənet ta, ma kawan-z-izəzzigəzan ərrəzəx wa n tidət, wa ihan alaxirat. ¹² Amaran kud wər kawan-təha təfləst daɣ arat wa wər təlem, ma kawan-z-akfin arat wa təlam daɣ alaxirat?

¹³ Wər t-illa amaššaxal ifrâgan ad işxəl y əššin muzaran. Wa ɣas ikyad iyyan, iru wa hadan; madəx abbardag y iyyan, alku wa hadan. Wər təfregam ad təxbədam Məššina, taglim deɣ tozâlam dəffər əddənet.»

¹⁴ Əssisaman Farisaytan y awa inna Ƴaysa den kul, taggin daɣ-as tamakkakkayt fəlas imaran n əzrəf a əmosan.

¹⁵ Inn-asan Ƴaysa: «Kawanay təsaknim dat aytedan as alɣadilan a təmosam, Məššina amaran issân awa ihan iwallan-nawan; fəlas arat wa əzzəzwaran aytedan, Məššina ənta tagəlfat a t-iga.»

Əttawret d Əlinjil

¹⁶ «Əttawret d Əlkəttaban win Ənnəbitan əntanay ɣas a tawasasaɣrinen har əzəl wa d-osa Yaxya wa isalmaɣan aytedan daɣ aman. Əddi amaran ad əggazan salan win Əlinjil šin ətəwəgga, əmosnen isalan n assa ən Taɣmar ta n Məššina, amaran ad igammaɣ awedan kul iguz-net s assahat əd tallabəst. ¹⁷ Dər iga awen da za, ogar tərɣasay

ta iga ad iba ijənnawan d amađal, ta iga ad iba wala ęas əsakkal iyyanda n Əttawret.

¹⁸ Adi a fəlas, aləs kul wa izammazzayan tantut-net, izlaf iyyat, wədi iga əzzəna. Aləs deę wa izlafan tantut təmmizzayat, ənta da igâ əzzəna.»

Əmäggergəs iyyan əd təlaqqay təgât Lazarəs

¹⁹ Inn-asan ęaysa deę: «Kala ad t-illa aləs iyyan n əmäggergəs n amayyawan əs faw izlâg isəlsa win hossaynen, əzzəwatnen, faw deę inniflay issiksas. ²⁰ As itaggu awen, dat əmi n ahan-net, isrâd aləs iyyan ən təlaqqay igân Lazarəs, əs əlsânat šiqqas elam-net. ²¹ Isidaran tettay ən kərəmraman win du-rattaknen daę mensewan n əmäggergəs en. Wala idan, tasin-t-idu tallaxan šiqqas-net. ²² Har əzəl wad aba tələqqay ten, təzzar ewayan-tu angalosan s ənnəbi Ibrahim daę aljannat. Əmäggergəs ənta da, aba-tu itawanbal-in. ²³ İha Jahannama, itaxazzab daę-as as idkal asawad-net, ogga Ibrahim daę igəg, illâ ęur-əs Lazarəs. ²⁴ Ad ięarru Ibrahim, igann-as: "Ya Abba Ibrahim, hənəttət-i, təzəmmizəla-du sər-i Lazarəs y ad issəlməę kuddeę imi n adad-net daę aman, issəsməd-i sər-əs iləs-in, fəlas alęazab a tagga daę təmsay ta."

²⁵ Mišan inn-as Ibrahim: "Barar-in, Akta-du as kay təgrâwax arat kul wa tareę daę təməddurt-nak, as iga awen, Lazarəs ənta wər inay ar alęazab. Amaran əmərədda ənta as tawaknan man, kay tətəxazzaba. ²⁶ Wa dəffər adi as, illâ əęęi wər nəla eder gar-ena dər-wan, fəl ad wər iru waliyyan daę-na a kawan-in-akku, ifrəg adi, wala deę ifrəg waliyyan daę-wan a dana-d-akku."

²⁷ Inna əmäggergəs: "Daę adi Abba, əgmâya daę-ak ad təzəmmizəla Lazarəs s aęaywan n abba-nin, ²⁸ fəlas əleę səmmos mədrayan, y a dasan-irxəm fəl a du-wər-əggəzan əntanay da edag n alęazab wa."

²⁹ Mišan inn-as Ibrahim: "İmədrayan-nak əttâfan əlkəttab wa n Əttawret d Əlkəttaban n ənnəbitan win hadatnen, əlkəmanet-asan." ³⁰ Inna y Ibrahim: "Kala kala Abba-nin Ibrahim, adi wər igda, mišan as tan-in-iqqal awedan a d-inkâran daę nəmməttan, ad utaban." ³¹ Mišan inn-as ənnəbi Ibrahim: "As wər əssəsəman y ənnəbi Musa d ənnəbitan win hadatnen, wər z'utaban kuddeę ig-asan awedan a d-inkâran daę nəmməttan isalan."»

17

Əsəssəęri ən ęaysa daę batu n abakkad əd təsureft d əzəqzan

¹ Ëzəl iyyan inna Ƴaysa i nöttulab-net: «Wər t-illa a tu-wər-əmēlan aratan as za səssuginen aytedan ibakkadan, mišan iket alǵazab ill-ay y awedan wa dasan-d-igan əssəbab. ² A das-afu ad itəwəqqən əzəzəd zəwwəran ən təhunt daǵ iri-net itəwəgər-in daǵ agarew, tišit n əssəbab n abakkad i wala iyyanda daǵ aytedan win madrornen di. ³ Agat ənnəyat əd man-nawan!

As kay-idlam amadray-nak, təryəməǵ-as. Kud imməgraz, təssurəfəǵ-as. ⁴ Kud imos as ig-ak əssəyat tādramen daǵ əzəl, ig-ak-du əssa assatan igammay təsureft daǵ əzəl wen da, da surəf-as.»

⁵ Ənnan nəmmuzal y Əməli Ƴaysa: «Šitu əzəgzan-nana.» ⁶ Inn-asan Əməli Ƴaysa: «As təlam əzəgzan ogdân əd wala imi ən təzuyay n əšənnan ad təfrəgam ad tannim y ašək wa: "Əlbəy-du iman-nak, taǵta daǵ agaraw en", agu awa tənnam.»

Tangalt n amaššayal wa wər nəla maruzat

⁷ «Məni daǵ-wan wa du-z-adəw akli-net iddānan madəǵ igayyakan, ann-as: "Ayo tarmad tammansawaǵ!" ⁸ Wərgəǵ tənna a das-za-tagim: "Saŋŋ-i a ətšəǵ təzzar, tawəyay-i-t-id, təšxələ har atša, ašwaǵ, dəffər adi amaran tatša tašwa kay." ⁹ Awak aləs en ad iggudəy y əkli-net fəlas iga awas t-omar? ¹⁰ Kawanay da za, as təgam arat kul was tətawamaram, tannim: "Nakkanay wər nəmos ar eklan, wər nəga ar awas danaǵ-iwar igi-net."»

Assa n Ag Aggadəm

Agoda iga aləs iyyan n aw Samarəya i Məššina

¹¹ Ƴur iki ən Ƴaysa Yerusalem, illam gər akal wa n Samarəya əd wa n Galilaya. ¹² As d-iggaz təxrəmt iyyat, əssəlkədan-as-du maraw meddan igrāw kətru, əbdadan-as-in daǵ igəǵ. ¹³ Ədkalan imaslan-nasan, ənnan-as: «Ya Ƴaysa, Əššəx-nana, hənəttət-ana!»

¹⁴ Iswad daǵ-san, inn-asan: «Aǵlat saknat iman-nawan i limaman.» Əǵlān əkkān ilimaman y a dasan-əmēlan, as əzzayan zaddogan. ¹⁵ As din-igra iyyan daǵ-san təməzzəyt ta iga den, iqqal Ƴaysa, idkāl əməsli-net, immāl Məššina. ¹⁶ As t-in-osa issəjad dat-əs, a das-itigudəy. Aləs en in akal ən Samarəya.

¹⁷ Inna Ƴaysa: «Wərgəǵ marawəssan as əzzayan, zad-dogan, ma əgan taza win hadatnen? ¹⁸ Adis wər tan-iha i d-iqqālan iggudəy i Məššina ar ənaftay wa?»

¹⁹ Amaran inna Ƴaysa y aləs wen: «Əbdəd, aǵlu, əzəgzan-nak a kay-iǵlasan.»

Assa ən Taymar ta n Məššina

²⁰ Ƴaysa, as t-əssəstənan Farisaytan d alwaq wa du-zatasu Taymar ta n Məššina, inn-asan: «Taymar ta n Məššina wər du-tətəggu assa ilân anay. ²¹ Wər mad z'itəwənnu: "Ǝnta da", wala "Ǝnta den". Ǝssənat as, Taymar ta n Məššina təlla gar-ewwan.»

Assa n Ag Aggadəm

²² Dəffər awen inna Ƴaysa i nəttulab-net: «Ǝlkâman adan a daɣ za təsəddirənam anay ən tawaylay-nin nak Ag Aggadəm, kuddeɣ anay n əzəl iyyanda, mišan wər di-zatənəyam.

²³ Amaran a dawan-itəwənnu: "Ǝnta den" madəɣ "Ǝnta da". Ad wər taglim, wala təlkəmam y awen. ²⁴ Ǝbələzləz a itaggu essam daɣ jənnawan, isəmmələwləw tama n amaɗal ta har ta, a dər z'alu assa-nin nak Ag Aggadəm daɣ əzəl-in. ²⁵ Mišan dat adi, ilzâm-i nak Ag Aggadəm anay n alɣazab aggen, unkaran-i deɣ aytedan n azzaman win.

²⁶ Awa igan daɣ azzaman n ənnəbi Nux, a z'agin daɣ adan win daɣ du-z-asa nak Ag Aggadəm. ²⁷ Azzaman win den, aytedan tattin, sassin, zallafan, zâzlafan har əzəl wa d-iggaz Nux aɣlal n aman, təzzar osa-du alwabil, ihlakkan ketnasan. ²⁸ Zun d awen da deɣ a igan daɣ azzaman ən Lot. Aytedan tattin, sassin, zanzan, satagan, nabbalan, gayyakan, karrasan, ²⁹ har əzəl wad igmad Lot aɣrəm ən Sədom, təzzar issofay-du Məššina fəl əɣrəm en adaxas-əntahart ibilaglagan, ihlak aytedan-net ketnasan. ³⁰ Zun d adi da a z'agin əzəl wa du-zatəwəsənəfiləla nak Ag Aggadəm. ³¹ Ǝzəl wədi, awedan wa iqqiman daɣ adag wa n afalla n ahan-net, amaran əhân lalan-net ehan-net, a du-wər-azzabbat y a tan-in-idkəl. Wa ihan tawagost-net deɣ, ad wər iqqəl aɣaywan. ³² Aktiwat-du awa igrawan taɣur Lot. ³³ Id awedan wa wər nəgəmməy ar aggaz ən man-net daɣ əddənet ta, ad affatu daɣ alaxirat; mišan wa isaffatan iman-net daɣ əddənet ta, ad iɣləs.

³⁴ Ǝnnəɣ-awan ahad wədi, ad ənsân əššin aytedan daɣ tessat iyyadda, ammadkal iyyan, itəwəyyad-du wa hadan. ³⁵ Ad taddinat sanatat tədoden daɣ adag iyyanda, tammadkal iyyat, tətəwəyyad-du ta hadat. ³⁶ Ad əhân əššin meddan tawagost iyyadda, ammadkal iyyan, itəwəyyad-du wa hadan.»

³⁷ Ǝssəstənan nəttulab Ƴaysa ənnan-as: «Ǝməli, wədi arat mənid z'agu?» Inn-asan: «Edag təggaz təmaxsayt, a daɣ-as iddawan jadaran.»

18

Elmital n əmaşray əd təntut as wər idder aləs-net

¹ Iga Ƴaysa i nəttulab-net əlmital iyyan a dağ ira a tan-issusən as, ihor ad tansayan Məşşina faw, a dağ-as wər əkkəsən attama.

² Inn-asan: «Ağrəm iyyan a iha əmaşray wər nəksud Məşşina, wər issəğmar değ awedan waliyyan. ³ Amaran ağrəm en, təh-ay təntut as wər idder aləs-net a du-tətasit amaşray en, təğann-as: "Akf-i alxaq-in dağ amakkarad-in."»

⁴ As iga tamert itugəy-as, inna gar-es əd man-net: "Kud wər əksudəğ Məşşina, wala əssiğmarəğ awedan waliyyan, ⁵ da təntut ta, tədgaz-i. A tat-akfa alxaq-net fəl a dağ-as əgrəwəğ iman-in."»

⁶ Təzzar inna Əməli Ƴaysa: «Təsallam y awa inna arak amaşray wa? ⁷ Tordâm as Məşşina wər z'akfu aytedan win isannafran alxaq-nasan, tu-tansaynen hallan ehad ezal? Tordâm as a fall-asan-in isahhagu tadhəlt-net? ⁸ Ənneğ-awan, a tan-akfu alxaq-nasan tarmad. Mişan harkid adi, əzəl wa du-z-əqqəla nak Ag Aggadəm, awak a d-agəzəğ dağ əddənət aytedan əzzigzannen?»

*Tilwat n əlyillas**Elmital wa iga Ƴaysa fəl Farisay d ənabaz n amana*

⁹ Dəffər awen, iga Ƴaysa əlmital y aytedan əttâfnen iman-nasan dağ tişit n alğadılan, as iga awen olkân aytedan, inn-asan:

¹⁰ «Kala ad əggəzzayan meddan əşşin s Ahan wa Zəwwəran n Əlyibada fəl ad agin şiwatriwen. Iyyan Farisay, wa hadan anabaz n amana. ¹¹ Farisay za, ibdad ad itattar, igannu dağ man-net: "Ya Məşşina, əggodayəğ-ak as wər oley d aytedan win hadatnen əmosnen inarkaban əd nəmməzray əd maggan n əzzəna, wala değ oley d anabaz n amana wa. ¹² Əssa adan kul, tuzama dağ-san əşşin. Takkasəğ təməssədək dağ awa garrawa kul."»

¹³ Mişan anabaz n amana ənta, ibdad-in dağ igəğ, wər ihel wala adakal n asawad-net sa sər jənnawan, iggât idmaran-net fəl awa əgan man-net dağ əğşud, igannu: "Ya Məşşina təggəzet-kay təhanint-in nak n anasbakkad."»

¹⁴ Ənneğ-awan, anabaz n amawan wa, iqqal ehan-net igrâw taqqat dat Məşşina, mişan Farisay wen ənta wər igrew taqqat dat Məşşina; fəlas i idkalan iman-net, ad t-issərəs Məşşina, i issərəsan iman-net ad t-idkəl Məşşina.»

Təwatray ən Ƴaysa i bararan

¹⁵ Harkid bararan win janğayan tawayan-tan-du aytedan əs Ƴaysa fəl a tan-issəwər ifassan-net, ittər-asan. Ənayan

nəttulab-net awen, əşşewalan fəl aytedan win den.
¹⁶ Mišan iyr-en-du Ƴaysa əs man-net, inna i nəttulab-net: «Ayyat bararan a di-d-akkin, a tan-in-wər-təwəxam; Taɣmar ta n Məşşina, šin aytedan win šilaten-nasan.
¹⁷ Əggəyex silakanax-awan as, awedan wər nəga i Taɣmar ta n Məşşina əlqəbulat šilat ən ta das-iga barar, wədi wər das-ilkem a tat-iggaz.»

Əddənet meɣ alaxirat

¹⁸ Issəstan əmuzar iyyan ən Kəl-Əlyəhud Ƴaysa, inn-as: «Əşşex olâxan, mas di-iwar igi-net y ad əgrəwa təməddurt ta təxlalat?» ¹⁹ Inn-as Ƴaysa: «Mafel as di-təganna Əşşex olaxan? Wər t-illa i olâxan ar Məşşina. ²⁰ Təssânaɣ alwajiban-net: Ad wər tagax əzzəna, ad wər tagax iman, ad wər takəra, ad wər tagax təgəyya ən bahu, səxmər abba-nak d anna-nak.» ²¹ Inn-as aləs wen: «Aratan win di kul harwa da mədrəya as tan-əssəbdada.» ²² As isla Ƴaysa y awen, inn-as: «Arat iyyanda a dak-in-iqqiman əmərədda: Aglu zanz-in awa tələx kul, tuzanaɣ inazzan-net i tələqqawen ad təgrəwaɣ ərrəzəx a dak-z-ansin dəx alaxirat. Dəffər adi amaran tagla-du təlkəmaɣ-i.» ²³ As isla y awen, əxşadan man-net wəllen fəlas təgərgist tagget a iga.

²⁴ As inay Ƴaysa as, əxşadan man n aləs en wəllen, inna: «İket əzzəwi ig-ay iguz ən Taɣmar ta n Məşşina fəl win əggərgasnen. ²⁵ Ogar tərɣasay ta iga fəl aɫam aradaɣ dəx təbuday n ənəzmay, i ta iga fəl əməggərgəs iguz ən Taɣmar ta n Məşşina.» ²⁶ Təzzar ənnan-as aytedan win das-əssəsammen: «Adi za ma ifragan ad ixləs dəx təmsay?» ²⁷ Inn-asan Ƴaysa: «Awa imosan muxal ɣur aytedan, Məşşina ifrâk-ku.»

²⁸ Inn-as Butros: «Nakkanay za, a oyyanen awa nəla kul, nəlkam-ak?» ²⁹ Inn-asan Ƴaysa: «Əggəyex əsilakanax-awan as, wər t-illa i din-z-ayyin ehan-net madeɣ tantut-net, madeɣ imədrayan-net, madeɣ imarwan-net madeɣ bararan-net fəl əddəlil ən Taɣmar ta n Məşşina, ³⁰ əs wərgəx ad igrəw inədfusan-nasan dəx harwa əmərədda, igrəw dəx təməddurt ta təxlalat dəx azzaman win əlkammen.»

Ihəz n alyazab wa z'inəy Ƴaysa

³¹ İkkas Ƴaysa inəttulab-net win maraw d əşşin dəx aytedan, inn-asan: «Səsəmat: nakkanay da əggəzzaynen əs Yerusalam da, amaran den da ad z'andu arat kul wa əktaban ənnəbitan dəx salan-in nak Ag Aggadəm. ³² Ad tawagga dəx fassan n aytedan wər nəmos Kəl-Əlyəhud,

agin daγ-i tamakkakkayt, agin-i šisəssəlka, əssutəfan fall-i, ³³ ayyawanan-i šiwwit, agin iman-in, təzzar ənkara-du daγ təmattant əzəl wa n karad.»

³⁴ Mišan wər t-illa a əgrân nəttulab-net daγ awa inna den, ittinkal-asan almaγna-net, wər əgren awa daγ dasan-iššewal.

Əzuzəy ən Ƴaysa əmədderyəl iyyan

³⁵ As d-ihoz Ƴaysa aγrəm wa n Yerikaw, okay fəl əmədderyəl iyyan iqqiman fəl afay ən tarrayt, itansay.

³⁶ As isla əmədderyəl i tamattay ta fall-as tətakayat da, issəstan d awa imos awen. ³⁷ Itawann-as: «Ƴaysa wa n əγrəm ən Nazaret a itakayan.» ³⁸ Amaran idkal əməsli-net, igannu: «Ya Ƴaysa wa n Ag ənnəbi Dawəd, hənəttət-i!» ³⁹ Sannaryaman-as aytedan win azzarnen y ad affastu, mišan idkal əməsli-net wəllen, igannu: «Ya Ag Dawəd, hənəttət-i!»

⁴⁰ Təzzar izzəkkat Ƴaysa, omar s a das-d-attalway. As t-id-osa, issəstan-tu, inn-as: ⁴¹ «Mas tareγ a dak-k-aga?» Inn-as əmədderyəl: «Əməli, a əreγ a di-d-iqqəl asawad-nin.»

⁴² Inn-as Ƴaysa: «Iqqəlet-kay-du asawad-nak, əzəgzan-nak a kay-iγlasan.» ⁴³ Iqqal-du asawad əmədderyəl tamazayt ten da, igla ilkam i Ƴaysa, immâl Məššina. Aytedan kul win ənaynen awa igan den, əntanay da əmmâlan Məššina.

19

Zakkəyas wa n anabaz n amana

¹ Iggaz Ƴaysa aγrəm ən Yerikaw, okay daγ ammas-net y ad t-irdəγ. ² Aγrəm en ih-ay aləs igân esəm Zakkəyas imosan əmuzar ən nabazan n amana n əməgğergəs. ³ Ad igammay d anay ən Ƴaysa, mišan təgdal-as-tu tamattay fəlas təgzəlay a igā. ⁴ Təzzar ozal, azzar i tamattay, iftan ašək igân esəm sikamor fəl ad inəy Ƴaysa fəlas den da a du-z-akəy. ⁵ As d-ewad Ƴaysa edag wen, idkal asawad-net, inn-as: «Zakkəyas, zabbat-du tarmâd, azalada kundaba əzzəbbəγ daγ aγaywan-nak.» ⁶ Izzəbbat-du Zakkəyas tarmâd, iqbal awen, ifilawas. ⁷ As ənayan aytedan awen, gatantanan ketnasan, gannin: «Izzəbbat γur aləs n anas-bakkad.» ⁸ Amaran ibdad Zakkəyas dat Əməli Ƴaysa, inn-as: «Ya Əməli, ad akfaγ təzunt ən təla-nin i tələqqawen, kud deγ ill-ay i daγ ətšəγ arat, a das-t-əssuγəla imos əkkoz nədfusan.» ⁹ Təzzar inna Ƴaysa: «Azalada, ehan wa iggaz-t-id əlyillas, fəlas aləs wa, ənta da ahaya n ənnəbi İbrahim a imos. ¹⁰ Nak Ag Aggadəm oseγ-du gammayaγ aytedan win əxraknen y a tan-əγləsa.»

Īššəxəl ən Ƴaysa daƳ Yerusalam

Tangalt ta n tammaten

¹¹ Īssisaman aytedan y awa igannu Ƴaysa ketnet. Ig-asan Ƴaysa tangalt iyyat fəlas ihoz Yerusalam amaran əxilan alwaq wad za tənəfiləl TaƳmar ta n Məššina ewad-du.

¹² Inn-asan: «Kala ikka aləs iyyan n ag əket akal iyyan iggugan y a daƳ-as d-igrəw təmənukəla, iqqəl-du. ¹³ Dat teklay-net, iƳra-du maraw daƳ eklan-net. Akk iyyan daƳ-san ikf-ay tamma inn-asan: "Agiwat daƳ-asnat jola har d-əqqəla." ¹⁴ Amaran aləs en, wər t-əren aytedan n akal-net. As igla, əssəglan inəmmuzal s əmənokal wa zəwwəran y a das-annin: "Aləs di, wər nəra ad iqqəl əmənokal-nana."

¹⁵ Mišan igraw taƳmar, iqqəl-du akal-net. IsassaƳra-du eklan-net winād ikfa tamatten da, fəl ad issən awa sər-san d-iggazan daƳ jola-nasan. ¹⁶ Os-ay-du wa azzaran, inn-as: "Məšši, tamma ta di-təkfəx əgrawa-du fall-as marawat šiyyad." ¹⁷ Inn-as məššis: "Alafəyet! Illikan as akli olâxan a təmosa. Zamas təh-ik təfləst daƳ awa wər nəggət, adi za a kay-əzzuzəraƳ i maraw Ƴərman." ¹⁸ Os-ay-du wa n əššin, inn-as: "Məšši, tamma ta di-təkfəx əgrawa-du fall-as səmmosat šiyyad." ¹⁹ Inna i wa: "Kay, ad tizarəƳ i səmmos Ƴərman." ²⁰ Os-ay-du wa n karad, inna: "Məšši, tamma ta di-təkfəx ənta da. Akamas a tat-əgeƳ daƳ əlkəšifa-nin, ogazaq-qat. ²¹ Təksəda a kay-əgeƳ, fəlas əssənaƳ as aləs labasan a təmosa. TədakkalaƳ a wər təssənsa, tətəlaya deƳ tawagost wər tənbelə." ²² Inn-as məššis: "Kay, ark əkli a təmosa, awa d-igmadan imi-nak as kay-z-abəzaƳ. Dad təssanaƳ as əmôsəƳ awedan labasan, idakkalan a wər issənsa, italay deƳ tawagost wər inbel, ²³ ma fel as wər təgeƳ azrəf-in daƳ bank, əddi as du-z-əqqəla əgrāwa fall-as tətəyt." ²⁴ Təzzar inna y aytedan win əllanen den: "Abəzat daƳ-as tamma ta ittaf, takfim-tat i wa ilan marawat." ²⁵ Īnnan-as: "Məššikkana, wərgəƳ ilā marawat?" ²⁶ İjjəwwab-asan, inna: "SilakanəƳ-awan as, wa ilan, wədi a das-itəwəšitu awa ila; amaran wa wər nəla, arat n arat wa ila da, a daƳ-as attarmas."

²⁷ Amaran aytedan win zənga-nin, wər nəra ad əqqəla əmənokal-nasan, awəyat-tan-du, təgzəmam-tan dat-i.»

Ihəz ən Ƴaysa Yerusalam

²⁸ As inna awen, iggaz eƳaf ən nəttulab-net, iggəzzay əs Yerusalam. ²⁹ As din-ihoz taƳrəmt ta n Betfajay əd ta n Betanəy, dəgma n ədƳəƳ was itawannu wa n "Eškan ən Zaytun", izammazal əššin daƳ nəttulab-net. ³⁰ Inn-asan: «Akkiwat taƳrəmt ten dat-wan den. As tat-in-təggazam,

ad tənəyam əhulel n əzdan iqqânan əs kala wər ittəwan. Ariwat-t-id, təlwəyam-t-idu. ³¹ As kawan-issəstan awedan, inn-awan: "Xa, ma tətəggim əddi?" Tannim-as: "Əməli a sər-əs iddəraran."» ³² Əgla nəttulab win den, ənayan arat kul s əmmək wa dəx as dasan-t-inna Ƴaysa. ³³ Târan əhulel, as dasan-ənnan məssawəs: «Xa, ma tətəggim əddi?» ³⁴ Ənnan-asan nəttulab win əşšin en: «Əməli a sər-əs iddəraran.»

³⁵ Əlwayan-t-id i Ƴaysa. Ədfaran-as fall-as isəlsa-nasan, əssəwanan-as-tu. ³⁶ Imatakway, a das-tissəwan aytedan isəlsa-nasan dəx tarrayt-net. ³⁷ As d-ewad Ƴaysa edag wa dəx təzagaday tarrayt adxax wa n Eşkan ən Zaytun, dəx ənəmi haz ən Yerusalam, ədkalan nalkiman-net ketnasan imaslan-nasan, əssəggadan dəx təmmalen i Məşşina dəx batu ən təlməxujaten kul šin ənayan. ³⁸ Gannin:

«Iga Məşşina albaraka y əmənokal
wa d-osan s esəm n Əməli.
Attadet alxer əd tanaya
dəx jənnawan win ədkalnen!»

³⁹ Təzzar ənnan Fərisaytan əhanen tamattay en i Ƴaysa: «Əşşex, ərxəm i nalkiman-nak!» ⁴⁰ Inn-asan Ƴaysa: «Ən-nəx-awan, as əffəstan, šihun a, a za səxçərətnen.»

Awa iqqalan i Yerusalam

Tala ən Ƴaysa fəl Yerusalam

⁴¹ As din-ihoz Ƴaysa ayxəm ən Yerusalam, ogg-ay, iggaz fall-as šin tala; ⁴² igannu: «Ya Yerusalam, ənnar kam dâ, təssənax əmmək was za təgrəway alxer azalada; mişan wər tu-təssena, fəlas axabar a dam-iga. ⁴³ Elkâman adan a dəx kam-za-xəlixələyan zənga-nam, agin-am afarag issohen n əməgər, ədgəzan-kam fəl gannatan kul. ⁴⁴ Addagdagan-kam, kam d aytedan-nam. Wər dəx-am du-z-ayyin təhunt təwârat iyyat, fəlas tugayax s ad tagrax assa wa dam-d-iga Məşşina y dam-agu arraxmat-net.»

Asatay ən Ƴaysa imassatagan dəx Ahan wa Zəwwəran n Əlyibada

⁴⁵ Dəffər awen, iggaz Ƴaysa axalla wa ixləyan Ehan wa Zəwwəran n Əlyibada, a dəx-as isattay imassatagan. ⁴⁶ Igann-asan: «Wərgex iktâb as, inna Məşşina: "Ehan-in ad iqqəl ehan ən təwatriwen." Kawanay amaran təgâm-tu "əsəlçəs ən baydagan"?"»

⁴⁷ Akk əzəl isassaçru Ƴaysa dəx Ahan wa Zəwwəran n Əlyibada. Ad gammayan muzaran ən limaman əd musanan n Əttawret əd muzaran ən Kəl-Əlyəhud d igi ən man-net,

48 mišan ab-asan tēmawit tas z'agin awen, fēlas aytedan kul əknân-as əsəsam.

20

Əsəssəyri ən Ƴaysa daƷ Ahan wa Zəwwəran n Əlyibada

Ma ikfan Ƴaysa tarna ta ila?

¹ Əzəl iyyan isassaxru Ƴaysa aytedan daƷ Ahan wa Zəwwəran n Əlyibada, immal-asan Əlinjil as t-id-osan muzaran ən limaman əddəwan əd musanan n Əttawret əd muzaran ən Kəl-Əlyəhud, ² ənnan-as: «Əməl-ana da du-təgrawa tarna n igi n aratan win tətəgga da? Ma dak-kat-ikfan?» ³ Inn-asan: «Nak da a dawan-agax əsəstan iyyan, amaran əməlat-i: ⁴ Awak əsəlməx wa iga Yaxya aytedan daƷ aman, Məššina a xur d-ifal awen mex aggadəm?»

⁵ Təzzar namaşawwaran gar-essan, ənnan: «As das-nənnə "Məššina a xur d-ifal" a danax-annu: "Mafel za wər təzzəgzənam s awa inna?" ⁶ As das-nənnə "Aggadəm a xur d-ifal", tamattay ta, ketnet as dana-za-tanxu əs zabaw ən təgur, fēlas təkəkəs aššak as Yaxya ənnəbi a imos.» ⁷ Ənnan-as amaran: «Wər nəssen wa xur d-ifal.» ⁸ Inn-asan Ƴaysa: «Nak da za, wər dawan-z-əmələx dad d-əgrawax tarna n igi n aratan win.»

Əlmital ən magyakan n alyanab

⁹ Amaran imalallay-in Ƴaysa tamattay ig-as əlmital wa, inna: «Kala ad ila aləs iyyan afarag n alyanab. Təzzar issəxfar afarag-net en i magyakan wiyyad, iššokal, ig-in tamert tagget. ¹⁰ As du-tewad tamert ta n əmiləy n alyanab, izammazal sər-san iyyan daƷ eklan-net y a t-id-akfin adagar-net daƷ awa d-eraw afarag, mišan əgan-as šiwwit, əsoxalan-tu məššis isikarayray ifassan. ¹¹ Izammazal sər-san iyyan akli. Ənta da, əgan-as šiwwit, safallasan-tu, əsoxalan-tu wər eway wala. ¹² As taklat ta n karadat, izammazal sər-san iyyan akli. Ənta da sabbasan-tu, əstaخان-tu. ¹³ Dəffər awen inna məššis n afarag: "Awak ma z'aga? A sər-san zəmmizəla ruray wa əkney tara, mijas ənta a t-əssəxməran." ¹⁴ Mišan as ənayan magyakan win əxfarnen afarag barar-net izay-tan-du, namannan gar-essan: "Ənta əddi amakkasu n afarag. Anxiwatanaq-qu kərəz, fəl ad təqqəl təkəsət šin-nana." ¹⁵ Əkkasan-tu daƷ afarag, ənخان-tu kərəz.» Amaran inna Ƴaysa i tamattay: «Əmərədda ma tordam ma z'agu məššis n afarag i win den meddan? ¹⁶ Adi za ad aglu ənta iman-net, agu iman ən magyakan win, issəxfər afarag-net i magyakan wiyyad.» Əslan aytedan y awen xas, ənnan: «Məššina ya wər təgey adi!»

¹⁷ Təzzar idak-kan Ҷaysa s asawad, inn-asan: «Daғ adi ma imos almayna ən batu ta tənnat daғ Ёлкəttaban: "Təhunt ta din-əgaran makrasan, ənta a təqqalat təhunt ta təkbalat ehan"? ¹⁸ Awedan kul wa udan fəl təhunt ta, ad addagdag, wa fəl tuda deғ a tu-təlkəš.»

¹⁹ Ёgran musanan n Ёttawret əd muzaran n limaman as əntanay a fəl iga Ҷaysa əlmital wen, təzzar əgmayan d abbaz-net amazay wen da, mišan wər əgen awen, fəlas tamattay a əksudan.

Arazam n amana i Qaysara

²⁰ Adi a fəl ewalan Ҷaysa, ənkədan-as. Ёssokan-tidu meddan əgānen iman-nasan almat alғadilan, fəl a tu-šəššiwəlan sassannin-tu arat wər nətəwənnu, abəzən-tu sər-əs, agin-tu daғ fassan n əmuzar n akal d əlxəkum-net.

²¹ Ёssəstanan Ҷaysa, ənnan-as: «Ёššəx, nəssān as awa təganna d awa təsassayra oғād; wər tətəgga təmərīt gər aytedan. Təsasayra əs tidət awas danaғ-iwar igi-net daғ tarrayt ta n Məššina. ²² Amaran əməl-ana, awak xalal-ana arazam n amana y əmənokal wa zəwwəran Qaysara meғ?»

²³ Igra Ҷaysa tənəgməyt-nasan, inn-asan: ²⁴ «Saknat-i tefelt n əzrəf. Ma ilan udəm d esəm win t-əwarnen?» Ёnnan-as: «In Qaysara.» ²⁵ Inn-asan: «Adi za agiwat i Qaysara awa kawan-issəwar, tagim deғ i Məššina awa kawan-issəwar.» ²⁶ Indar-asan a tu-səssugin ark awal dat aytedan. Isammaklal sər-san aljawab wa dasan-iga den, əffəstan.

Ёsəstan igān daғ batu ən tanakra daғ təmattant

²⁷ Dəffər awen osan-t-id arat daғ aytedan ən taggayt ta n Sadusaytan. Sadusaytan əttāfan as wər tu-təlla tanakra dəffər təmattant. Ёssəstanan-tu, ²⁸ ənnan-as: «Ёššəx, inna ənnəbi Musa daғ Ёttawret: "As aba aləs, oyya-du tantut dər wər ila barar, a tat-izləf amadrəy-net fəl ad agu əzzurrəyya y əmidi-net wa aba den." ²⁹ Amaran kala a t-əllan əssa mədrayan. Izlaf wa dasan-waššaran ketnasan, aba-tu wər ila barar. ³⁰ Izlaf wa n əššin tantut ta d-oyya əmaq qar-net, ənta da aba-tu wər d-oyya ara. ³¹ Wa n karad deғ awen da. Ёssa mədrayan en ketnasan igraw-tan awen da, wər tan-iha i d-oyyan ara. ³² Dəffər awen, aba tantut ənta da. ³³ Awak əzəl wa n tabadday, ma imos daғ əssa mədrayan win den was za təqqəl təntut ten tayurəs, dad zamas ketnasan əzlāfan-tat?»

³⁴ Inn-asan Ҷaysa: «Daғ əddənet ta nəha da, zallafan meddan, tawazlafnat tədoden, ³⁵ mišan aytedan win isan-naha Məššina əd tanakra daғ təmattant fəl ad əggəzan aljannat, win di wər dasan-t-illa azalaf gər za meddan wala

šidoden. ³⁶ Id ab-as daḡ-san təlcam təmattant, olân d angalosan, aqqalan bararan ən Məššina id tanakra a d-əgan daḡ təmattant. ³⁷ Amaran daḡ awa iqqalan tanakra ən nəmməttan, ənnəbi Musa ənta iman-net as isattadda awen daḡ Əttawret, daḡ batu ən təfsəq, assaḡa wad inna Məššina imos "Əməli n Ibrahim, d Isəhaq əd Yaqub." ³⁸ Daḡ adi Məššina wər imos Əməli ən təməssa, kalar Əməli ən win əddarnen a imos, fəlas ḡur-əs aytedan kul əddâran.»

³⁹ Ənnan wiyyad daḡ musanan n Əttawret i ʔaysa: «Əššex, təgəḡ awal olâḡan.» ⁴⁰ Dəffər adi ab-as əhalan əsəstan-net d arat waliyyan.

Əsəstan igân daḡ batu n awa imos Əlməsix

⁴¹ Dəffər awen issəstan-tan ʔaysa inn-asan: «Manəmmək as itawannu Əlməsix Ag əmənokal ənnəbi Dawəd a imos? ⁴² Ənta Dawəd iman-net as sər-əs inna daḡ əlkəttab wa n Azzabur: "Inna Əməli y Əməli-nin: 'Qamu daḡ əḡil-in, ⁴³ har aḡa izəngə-nak daw daran-nak.'"

⁴⁴ Daḡ adi dad zamas Dawəd iman-net iḡra Əlməsix s esəm wa n Əməli, manəmmək as z'iqqəl barar-net?»

Ənnəkud i təlmənufəqa ən musanan n Əttawret

⁴⁵ Harwada əssîsaman aytedan kul, as inna ʔaysa i nəttulab-net: ⁴⁶ «Ənkədat i musanan n Əttawret, ərân əsəḡləy əzlâgan šikadkaden zagrotnen, d ətəwəsəslam igân əs saḡmar daḡ sammanayan, ərân təḡimit daḡ daggan win əlanen almaqam daḡ nan win əlḡibada ən Kəl-Əlyəhud, əd daggan n aytedan win tawasəḡmarnen daḡ məḡura. ⁴⁷ Tattan eharay ən tədoden šin as aba meddan-nasnat, as iga awen, taggin imaddan tahaginen wər nəmos ar sokni. İlkâm a dasan-itəwəxkəm attadib labasan.»

21

Takutay ən təntut as aba aləs-net

¹ Idkal ʔaysa asawad-net, inay iməggərgas taggin azrəf wa əkkatan daḡ əssənduq wa daḡ itiddaw ərrəzəḡ n Ahan wa Zəwwəran n Əlḡibada. ² Inay deḡ tantut iyyat ən tələqqay as wər idder aləs-net as təga daḡ əssənduq en sanatat təfelen. ³ Təzzar inna: «Əggəyyeḡ silakanəḡ-awan as, tantut ten ən tələqqay en as wər idder aləs-net en, togar aytedan a ketnasan tehakkay. ⁴ Fəlas ketnasan awas wər əddərarən a əkfan, ənta amaran, addararat-net a daḡ təkəl awa təla kul təkət-tu.»

Assa n əzəl wa ilkaman

Əbərəjji wa ilkaman daḡ Ahan wa Zəwwəran n Əlḡibada

⁵ Æššewalan aytedan wiyyad daḡ batu n Ahan wa Zəwwəran n Əlyibada, əmmâlan adalag wa iga əs təhun hossaynen d aratan win əkfan aytedan daḡ təkutawen-nasan. Inna Ƴaysa: ⁶ «A wa təhannayam da, əlkâman adan a daḡ-as du-wər-za-taqqam təhunt təwârat təmidit-net, ketnet ad itəwəjjəbbərajjət.»

Ənkədat y awa ilkaman

⁷ Təzzar əssəstanan-tu, ənnan-as: «Əššex, əmmay ad z'agu wədi arət? Ma za təqqəl alḡalamat ta za tassaknit as ibuk y igi?»

⁸ Inn-asan Ƴaysa: «Ənkədat ad wər tətəwəsəxrəkam, id aytedan aggotnen a du-z-asinen əttafan esəm-in. Akkiyyan daḡ-san igannu: "Nak a imosan Əlməsix", "Taqqan tewad." A dasan-wər-təlkəmam. ⁹ As təslam i tərnuq ən məgiran d əlfəllagatan, ad wər təššəwəšam fəlas, aratan di kundaba izâran-du, mišan wər dasan-za-təlkəm təzərəst n əddənet əddi da.»

¹⁰ Inn-asan deḡ: «Ad əknəsnat addawlaten gar-essanat, əknəsnat tayməren gar-essanat, ¹¹ əməlan-tu nəgəynəgəyan n amaḡal labasnen; iməl-tu laz əd təwərnawen əssiksadnen daḡ daggan aggotnen, əməlan-tu deḡ aratan əssiksadnen d alḡalamaten əsimaklalten daḡ jənnawan.

Ətəwədgaz ən nalkiman

¹² Mišan dat adi kul, ad tattarmasam, tətəwəzəxəzzəbam, tammawayam əs nan win əlyibada ən Kəl-Əlyəhud, tətəwəggim da kasaw, tətəwəsəbdədam dat mənokalan əd naxkiman, tətəwəsəstənam fəlas kawan-iwar esəm-in. ¹³ A kawan-akfu adi tarrayt n a fall-i taggayem.

¹⁴ Daḡ adi sansiwat taytwen-nawan, ad wər təsəmmutəgam awa za tannim y ad təkəkəsam iman-nawan, ¹⁵ fəlas a kawan-akfa masnat n awal əd təla n əgərri as tu-wər-illa azangaw-nawan a dasan-z-ifrəgan wala deḡ ifrəg isəbbəhəw-nawan. ¹⁶ Wala imarwan-nawan a kawan-səttərməsan, səttərməsan-kawan mədrayan-nawan əd šəqqaḡan-nawan əd midawan-nawan, təwənḡin wiyyad daḡ-wan kərəz. ¹⁷ A kawan-əgzəran aytedan kul fəlas kawan-iwar esəm-in, ¹⁸ mišan wər dawan-z-iḡšəd adi wala a odgan əd təzuyay n əmi n əššənnan. ¹⁹ Zəmmerat-nawan as za tagəzam iman-nawan.

Ətəwəšray wa ilkaman daḡ əḡrəm ən Yerusalam

²⁰ As tənayam əḡrəm ən Yerusalam ḡilayḡalayan-tu gənan ən sojitan, təssənam as ijwâr itiwadagdag. ²¹ Əddi, aytedan win ahanen akal ən Yahudəyya, win di addaggaganet s

ədxazan. Win əhanen ayrəm ən Yerusalam, əgmədanet-tu, win t-əgmadnen əs saffan-net, a t-idu-wər-əqqələn, ²² fəlas adan win di, ad əqqələn adan a dağ z'awwaddab Məşşina aytedan, fəl ad andin aratan kul win ənnan Əlkəttaban.

²³ İket alɣazab ad t-əginat tədoden şin əganen şidusen əd şin sankasnen dağ adan win den, fəlas ad tagu təssust labasat dağ akal, azzabbat-du attadib ən Məşşina fəl tamattay ta. ²⁴ Arat dağ tamattay ta ad itəwənyu əs takoba, awa hadan ikfəl əs kallan kul, əggəznat təmattiwen wər nəmos Kəl-Əlyəhud ayrəm ən Yerusalam, a tu-tataftafnat har tandu təmastant ta tanat-ikfa Məşşina.

Assa n Ag Aggadəm

²⁵ Ad təwənəyan aratan saksodnen əmosnen alɣalamaten as z'əginen da təfuk əd təllit d etran. Ad əşşəwəşnat təmattiwen n əddənət wəllen, iqqən əməsli labasan wa tagginat tanazzamaren n aman ən gərwan ixfawan-nasan. ²⁶ Aytedan a tan-tanyu tasa n aratan win hannayan əzayan-du əddənət fəlas ad təwəsənəgəynəgəynat təxəllak şin əlānen tarna dağ jənnawan. ²⁷ Alwaq wədi, a di-ənəyan aytedan nak Ag Aggadəm as du-z-asa, əheɣ tagarak, əley tarna əd tanaya tagget.

²⁸ As əntan aratan win di, təsəmmutəgam, annalamanet man-nawan, fəlas alwaq ən tədarfit-nawan ihôz.»

Əlmital wa iga ɣaysa s aşək ən fig

²⁹ Ig-asan ɣaysa əlmital, inn-asan: «Ənzərat-in dağ aşək ən fig d eşkan win hadatnen. ³⁰ As əggazan şin tanazra, ad təssənam kawanay iman-nawan as tamert ta n akasa təhôz. ³¹ Zund əmmək en dağ âs as tənayam aratan win dawan-əmalax əddi, təssənam as Taɣmar ta n Məşşina təhôz. ³² Əggəyyey əsilakanax-awan as tamattay ta da n azzaman win nəha da, ad tənəy ənətti n aratan kul win dawan-əmalax da. ³³ İjənnawan d amaɖal ilkâm ad ib'as t-əllan, mişan batuten-in əllanat-tu har faw.»

Səmmutəgat, tənkədam

³⁴ «Ənkədat fəl man-nawan! Ad wər iɣşəd igət ən tattay əd tassay n esmad əd medranan n əddənət ənnəyaten-nawan, ag-awan əzəl wədi aɣadar, ³⁵ zun wa tətəggu taftaw y awedan. Arat wədi ad agu fəl aytedan kul win əwarnen tesayt n amaɖal. ³⁶ Dağ adi agat ənnəyat, ad tətənsayam Məşşina alwaq kul a kawan-issəfragan ikus ən man-nawan dağ awa d-izayan ketnet, təfrəgam a dat-i təbdədam nak Ag Aggadəm.»

Əşşəyəl ən ɣaysa dağ Ahan wa Zəwwəran n Əlyibada

³⁷ Faw isasayru Ýaysa aytedan daɣ Ahan wa Zəwwəran n Əlɣibada, amaran as iga ahad, ad adəw adɣaɣ igân esəm wa n Eşkan ən Zaytun. ³⁸ Id affaw, a d-ənzəyan aytedan kul s Ahan wa Zəwwəran n Əlɣibada y a das-əssəsəman.

Tamattant əd tanakra ən Ýaysa Əlməsix

22

Tadrəwt ən Ýaysa ta təlkamat əd nəttulab-net imensewan

Anu ən təɣdərt wa itawaɣazan i Ýaysa

¹ Amud wa daɣ tattin aytedan şigəlwen şin wər iha xamira, was itawannu wa n Akkay, ihôz. ² Imuzaran ən limaman əd musanan n Əttawret gammayan təmərkest tas z'agin iman ən Ýaysa, mişan əksudan ad t-anɣin ijənnəjərwəy awen tamattay.

³ Iggaz Aşşaytan Yahuza was itawannu Isxarəyuti imosan iyyan daɣ nəttulab ən Ýaysa win maraw d əşşin. ⁴ Iгла, ikka imuzaran ən limaman əd muzaran n aytedan win ogaznen Ehan wa Zəwwəran n Əlɣibada, imaşawal dər-san daɣ batu n əmmək was z'agu Ýaysa daɣ fassan-nasan. ⁵ Isaddawat-tan awen; ərdan s ad t-akfin azrəf. ⁶ Ird-asan, təzzar ad igammay təməwit tas z'agu Ýaysa daɣ fassan daɣ amazay a ɣur-əs wər təlla tamattay.

Imutag n əmud wa n Akkay

⁷ As d-ewad əzəl n əmud wa n təgəlwen şin wər iha xamira, wa daɣ tawagzaman jəɣal win əmud wa n Akkay, ⁸ izammazal Ýaysa Butros əd Yaxya, inn-asan: «Aɣlat təsəmmutəgam-anax imensewan win əmud wa n Akkay.»

⁹ Ənnan-as: «Mənid tareɣ a tan-nəsəmmutəg?» ¹⁰ Inn-asan: «As din-təggazam aɣrəm, ad tammanayam d aləs a d-iktəran ətəkin-net. Əlkəmat-as s ahan wa z'iggəz, ¹¹ tannim i məşşis n ahan wədi: "Inn-ak Əşşex: 'Məni tu daɣ ahan-nak edag wa n naftayan, wa daɣ za nammansaw nak əd nəttulab-in daɣ əmud wa n Akkay?'" ¹² A kawan-assaknu daɣ suru-net, ehan wa n afalla, elwân, əhân-tu mutag kul. Əddi da ad za təsəmmutəgam imensewan.»

¹³ Əɣlan, ənayan arat kul s əmmək was dasan-t-inna Ýaysa; təzzar ad simutugan imensewan win Akkay.

Imensewan win əmud wa n Akkay

¹⁴ As iga alwaq ən tattay, inaxama Ýaysa əd nəmmuzal-net, əggazan şin tattay. ¹⁵ Təzzar inn-asan: «Əkneɣ deren ən tədrəwt ta dər-wan əgeɣ imensewan n əmud wa, harwa

wər əxxəzzaba. ¹⁶ Silakanax-awan as, wər di-ilkem a tan-ələsa tettay iket wər d-osa əzəl wa daɣ z'andu almaynana-
nasan daɣ Taɣmar ta n Məššina.»

¹⁷ Təzzar idkal-du Ƴaysa təkabart iha esmad n alɣanab, iggoday i Məššina, inna: «Abəzat təkabart ta, tənəməgləzam awa tat-ihan, ¹⁸ fəlas əsilakanax-awan as, wər ilkem ad əšwəɣ esmad n alɣanab, iket wər du-tosa Taɣmar ta n Məššina.»

Əsəbdəd ən mensewan win əmosnen isaktan n Əməli

¹⁹ Dəffər awen idkal Ƴaysa tagəlla, iga igodan i Məššina, irz-et izun-asan-tat, inn-asan: «taɣəssa-nin adi, tət iwakfat fəl əddəlil-nawan. Tuzanat-tat əs təməwit ta da, imos adi isaktan-in.»

²⁰ Zund əmmək en da âs as ətšan, idkal təkabart, inn-
asan: «Təkabart ta, arkawal wa aynayan ən tassaɣ a təmos gər Məššina əd tamattay-net. Arkawal wa, azni-nin a z'inɣələn fəl tənfa-nawan a t-isattaddan.»

Emel ən Ƴaysa ətəwəkəddal wa z'itəwəɣgu

²¹ «Fadda ənəyat, aləs wa di-z-aggin daɣ fassan, illa da da, idrâw dər-i. ²² Illikan as nak Ag Aggadəm a di-iba əs təməwit ta d-ixkam Məššina harwa dat alwaɣ, mišan iket alɣazab ad t-inəy awedan wa di-igan daɣ fassan.»

²³ Təzzar ad tinəməsəstinan nəmmuzal-net gar-essan əd wa daɣ-san z'agin wen daɣ arat.

Ma imos wa daɣ-wan ogaran

²⁴ Dəffər awen tənkar tamazaɣ gar-essan təgât daɣ batu ən was əttafan as ənta a daɣ-san ogaran.

²⁵ Inn-asan Ƴaysa: «Imənokalan ən təmattiwen n əddənet saknin tarna y aytedan win as azzaran, zamazalan fall-asan deɣ əlxəkum-nasan; mišan dər iga awen da əttâfan as imadhalan n aytedan a əmosan. ²⁶ Mišan kawanay, ad wər tagim awen. Kalar, wa daɣ-wan ogaran almaqam, iqqəlet zun wa daɣ-wan mədrəyan. Wa daɣ-wan azzaran, iqqəlet zun amaššaɣal. ²⁷ Awak ma ogaran awedan wa iqqiman itattu əd wa das-išɣalan? Wərgəɣ wa iqqiman itattu? Mišan nak imosan əmuzar-nawan aheq-qawan əmosa zun amaššaɣal-nawan.»

Əššəɣəl wa ilkaman daɣ nəttulab win maraw d əššin

²⁸ «Kawanay win da, a d-əqqimnen təkâmam-i daɣ jarrabatan win ənaya. ²⁹ Adi as, tehakkay ta di-iga Abbanin taɣmar, ənta a dawan-z-aga y-as nak əmərədda. ³⁰ Fəl a dər-i tədrəwam tettay əd tassaɣ daɣ taɣmar-in, taqqamim fəl təsəqqima ən təmənukəla y ad təšrəɣam i tawšeten marawat əd sanatat šin Israyil.»

Emel ən Ƴaysa ikus wa das-z-əgu Butros tazdəyt

³¹ «Simxon, Simxon! Ĕnkəd! Aššaytan igmây turagat n a dawan-əgu əsəkənsəki wa itawaggin y alkama. ³² Mišan nak onsâyax-ak Məššina fəl a kay-wər-igməd əzəgzan wa sər-i təgeḡ. Amaran as di-du-təqqala, təsəssuheḡ əzəgzan ən mədrayan-nak.»

³³ Inn-as Simxon Butros: «Ĕməli, nak simataga s a dər-ək idawa kuddeḡ əs kasaw, əd təmattant.»

³⁴ Mišan inn-as Ƴaysa: «Butros, silakanax-ak as, wər z'axru əkəji aḡora ahada da wər di-təggeda har karadat təklaten.»

Ĕnnəkud i təməḡutar šin d-əzaynen

³⁵ Dəffər awen inna Ƴaysa i nəmmuzal-net ketnasan: «Alwaq wa kawan-zammazala wər tewayam azrəf, wala aḡrəg, wala təsəsəlt ta n sanatat, awak ill-ay arət a din-todānam?» Ĕnnan-as: «Kala.»

³⁶ Inn-asan: «Ĕmərədda za, wa ilan azrəf awəyet-tu, wa ilan aḡrəg awəyet-tu. Wa wər nəla takoba, azzanzet-in əbərnuz-net, azzanzet-du. ³⁷ Silakanax-awan as, awa fall-i itawannan daḡ Ĕlkəttab ən Məššina n as "iddun daḡ maggan ən təkma." Kundaba inda. Awalla, arət kul wa fall-i itawannan ad andu.»

³⁸ Ĕnnan-as: «Ĕməli, sanatat təkabiwen da.» Inn-asan: «Ayyat batu di, wər di-təgrem.»

*Ĕtərməs ən Ƴaysa d əššəriya wa das-itawaggan**Təwatray ən Ƴaysa*

³⁹ Igməd Ƴaysa, iddēw əd nəttulab-net, ikka adḡax wa n Eškan ən Zaytun, imos awen arət itaggu faw. ⁴⁰ As din-ewadan, inn-asan: «Ansəyat Məššina a kawan-ogazan daḡ jarrabatan n Iblis.» ⁴¹ Ĕnta amaran izzənkaz-in fall-asan, əddukad ən taggor ən təhunt, igaraffat ad itattar, ⁴² igannu: «Abba, kud immikkan adi, təsəgəgəḡ-i təkabart ta n alḡazab di! Dər iga awen da ya, taḡet tara ta-nak wərgəḡ ta-nin.»

⁴³ Amaran inafalal-as angalos y ad t-isəssuhət. ⁴⁴ Təzzar ədgazan man Ƴaysa, idgaz wəllen daḡ təwatriwen, har təqqal tarrafft-net šilat n əzni, ad tətattab daḡ amaḡal.

⁴⁵ As iḡrad šiwatriwen, ibdad, iqqal-du inəttulab-net, os-en-du issins-en əḡšud ən man. ⁴⁶ Inn-asan: «Mafel tənsām? Ĕnkərat tansəyam Məššina a kawan-ogazan daḡ jarrabatan n Iblis.»

Ĕtərməs ən Ƴaysa

⁴⁷ Harwada iššewal-asan as tan-təggaz tamattay təgget as azzar Yahuza wa n iyyan daḡ nəttulab-net win maraw d

əššin. Ihoz-du Yahuza Ƴaysa y ad t-izələmmət. ⁴⁸ Mišan inn-as Ƴaysa: «Adis kay Yahuza, təzələmmət as di-za-təsəssuga daɣ fassan, nak Ag Aggadəm?»

⁴⁹ As ənayan nəttulab win hadatnen awa ibukan y igi da, ənnan: «Əməli, ma iqqal nəššəşxəl šikabiwen-nana?» ⁵⁰ Təzzar iwat iyyan daɣ-san akli n Əlimam wa Zəwwəran, ifras-du təməzzuk-net ta n əxil. ⁵¹ Mišan iharaššat-tan Ƴaysa, inn-asan: «Ayyat adi!» Təzzar idas təməzzuk n əkli wen, izzozay-tat, təqqəl əmmək-net.

⁵² Amaran inna i muzaran ən limaman əd muzaran n aytedan win tagaznen Ehan wa Zəwwəran n Əlyibada əd muzaran ən Kəl-Əlyəhud, əs ketnasan osân-du y ad t-əbəzan: «Awak əjajəb iyyan n abaydag a əmosa as sər-i du-tewayam šikabiwen əd təburəgen? ⁵³ Wərgex əzəl kul ərtāya dər-wan daɣ Ahan wa Zəwwəran n Əlyibada mišan wər di-tobezam? Əmərədda za alwaq-nawan a d-ewadan, kawanay əd taɣmar ta n Iblis əd šiyyay-net.»

Ikus ən Butros tazdəyt i Ƴaysa

⁵⁴ Təzzar obazan Ƴaysa, ewayan-tu s aɣaywan n Əlimam wa Zəwwəran. Ig-asan Butros ləkkum zagren. ⁵⁵ As din-osan, tətawasarya təmsay daɣ ammas n aɣalla, əqqiman sər-əs aytedan. Iggaz-tan-in Butros.

⁵⁶ Tənay-tu təmaššaɣalt iyyat iqqim əs təmsay, təzaggazd-ay wəllen, amaran tənna: «Aləs wa, ənta da, iddew əd Ƴaysa.» ⁵⁷ Mišan iggad Butros awen, inna: «Tantut, wər t-əzdaya.» ⁵⁸ Arat n amazay dəffər awen, inay-tu iyyan awedan, inn-as: «Kay da, iyyan daɣ-san.» Mišan inn-as Butros: «Xa aləs wa, kala wər t-əmosa.» ⁵⁹ As iga adag n alwaq dəffər awen, inna aləs iyyan s assahat: «Illikan as aləs wa iddew dər-əs, fəlas ənta da in akal ən Galilaya.» ⁶⁰ Inn-as Butros: «Xa aləs, wər əssenax awa daɣ-i təššewalax.» Harwa da iššewal Butros alwaq wen da as iɣra əkəji aɣora. ⁶¹ Təzzar imalallay-in Əməli Ƴaysa iswad daɣ Butros. Den da a d-ikta Butros awal wa das-iga Əməli, as das-inna: «Wər z'aɣru əkəji aɣora azalada wər di-təkkesax tazdəyt har karadat təklaten.»

⁶² Təzzar Igmad Butros, ad ihallu fəl awa əgan man-net daɣ əɣšud.

Tamakkakkayt ən sojitan daɣ Ƴaysa

⁶³ Alwaq wen, meddan win əttafnen Ƴaysa, əgân daɣ-as tamakkakkayt, əggâtan-tu. ⁶⁴ Əgan-as abanaban, a das-gannin: «Kay ya ələwli! Əməl wa kay-iwatan.» ⁶⁵ A das-taggin batuten šiyyad aggotnen labasnen.

Tebadday ən Ƴaysa dat Asaggawar wa Zəwwəran

⁶⁶ As affaw aḡôra, immənay Asaggawar wa Zəwwəran ən muzaran ən Kəl-Ëlyəhud, əhân-tu əmuzaran ən limaman əd musanan n Ëttawret, itawasabdad dat-san ʔaysa. ⁶⁷ Ënnan-as: «Kud kay Ëlməsix, təməlay-ana?» Təzzar innasan: «Kud dawan-əmala da wər di-za-təzzəgzənam, ⁶⁸ kud kawan-əssəstana dəy wər di-za-tajjawwabam. ⁶⁹ Mišan a obazan ɣur əmərədda, Nak Ag Aggadəm ad aqqama dəy əyil ən Məššina di n Ëməli ən Tarna.»

⁷⁰ Ënnan-as ketnasan: «Dəy adi kay Barar ən Məššina?» Inn-asan: «Kawanay iman-nawan as tənnam əmosaq-qu.»

⁷¹ Təzzar ənnan: «Ma nəkka y iyyat təgəyya? Wərgəy nakkanay iman-nana nəslâ y awa d-igmadan imi-net?»

23

Təbadday ən ʔaysa dat Bilatəs

¹ Tənkər aljaməyət ketnet, teway ʔaysa əs Bilatəs wa n ənaxkim. ² A ɣur-əs tu-ɣattasan gannin: «Aləs wa, as t-in-nosa isaxrak tamattay-nana. Igaddal dəy y aytedan ad ərzəman amana i Qaysara wa n əmənokal wa zəwwəran, harwa igannu ənta a imosan Ëlməsix, əmənokal.»

³ Awen da a fəl t-issəstan Bilatəs, inn-as: «Awak kay dəy a imosan əmənokal ən Kəl-Ëlyəhud?» Inn-as ʔaysa: «Kay iman-nak as tənney adi.» ⁴ Inna Bilatəs i limaman win zawwarnen əd tamattay: «Wər hənnəyax əddəlil waliyyan a fəl obazaɣ aləs a.» ⁵ Mišan ədgazan wəllən dəy təxəttas-net, gannin: «Ijinəjərwəy aytedan əs səssəxritan-net dəy akal ən Yahudəyya ketnet. Issənta-du awen dəy Galilaya har awas d-ewad Yerusalem da.»

Təbadday ən ʔaysa dat əmənokal Herod

⁶ Isla Bilatəs y esəm wa n Galilaya ɣas, issəstan kud ʔaysa in akal ən Galilaya wala. ⁷ As issan as taɣmar ta n Herod a das-tazzarat, issok-as-tu fəlas iha Yerusalem dəy adan en. ⁸ Herod isidawat-tu wəllən anay ən ʔaysa, irəw ira anay-net fəl əddəlil n aratan win sər-əs isallu. Igâ dəy attama n a dat-əs agu ʔaysa təlməxjujat. ⁹ Ig-as isəstanan aggotnen, mišan wər das-inna ʔaysa wala.

¹⁰ As itaggu awen, imuzaran ən limaman əd musanan n Ëttawret əllân den, siɣaren da təxəttas ən ʔaysa. ¹¹ A das-itaggu Herod əd sojitan-net šisəssəlka, taggin dəy-as tamakkakkayt; əzzəzlagan-tu takatkat təknât əbələzləz, amaran issoɣal-tu Herod i Bilatəs. ¹² Eway-du awen əzəl wen da as immedaw Bilatəs əd Herod, id dat awen nimazaran.

Ëtəwəxkam ən təmattant i ʔaysa

¹³ Iššedaw-du Bilatës ilimaman win zawwarnen əd muzaran ən Kəl-Əlyəhud win hadatnen əd tamattay, ¹⁴ inn-asan: «Tewayam-du sər-i aləs a, tənnam isafallag aytedan. Əşrağax-as dat-wan, mišan wər ənaya əddəlil waliyyan a fəl t-əbaza dağ aratan win tu-təssəwaram. ¹⁵ Wala deɣ inay-tu dağ-as Herod, fəlas issoğal-anaq-q-id. Amaran ənəyat! Aləs wa, wər iga arat waliyyan a t-issiwaran təmattant. ¹⁶ Dağ adi a das-səssuga šiwwit, amaran ayyaq-qu.»

¹⁷ Təll-ay alɣadat təmosat as i d-iɣlay əmud wa n Akkay, iwâr Bilatës a dasan-ikkəs awedan iyyan dağ kasaw. ¹⁸ Jajjayan adakal ən maslan-nasan ketnasan dağ jənnawan gannin: «Agu iman n aləs di, təkkəsax-ana-du Barɣabbas.» ¹⁹ Barɣabbas wen, ənəjərway as kala ad t-əgan aytedan dağ əɣrəm n Yerusalam d igi ən man n awedan a fəl iggaz kasaw.

²⁰ İlas-asan Bilatës awal fəlas tara a iga ad ayyu Ƴaysa. ²¹ Mišan əqlan siɣaren dağ jənnawan, gannin: «Taytay-tu fəl təgəttawt! Taytay-tu fəl təgəttawt!» ²² İg-asan Bilatës tənna ta n karadat: «Mafel za? Ma iɣšad? Wər hənnəyax əddəlil waliyyan a t-issiwaran təmattant. Dağ adi a das-səssuga šiwwit ɣas, ayyaq-qu.»

²³ Mišan əşšotan siɣaraten wəllen, gammayan dağ-as ad itəwətəytəy Ƴaysa fəl təgəttawt. Əɣlaban Bilatës əs takat. ²⁴ Təzzar ixtas Bilatës i Ƴaysa əşşəriɣa wa dağ-as təgmay tamattay ten. ²⁵ İkkas aləs wa dağ-as gammayan, iggâzan kasaw fəl ənəjərway n aytedan d igi n man n awedan. Ƴaysa amaran, ig-ay dağ fassan-nasan, y a dağ-as itəwəxkəm awas ərən.

Tamattant ən Ƴaysa

İki ən Ƴaysa edag wa dağ z'itəwətəytəy

²⁶ Əzzərgazan sojitan Ƴaysa. Əglân dər-əs as əmmənəyan d aləs iyyan n əɣrəm ən Qərwan igân esəm Simɣon a d-ifâlan šiwəgas, təzzar əbazan-tu, sassawayan-tu təgəttawt ta fəl z'itəwətəytəy Ƴaysa, ilkam-as dər-əs. ²⁷ Təlkâm-as tamattay tagget, əhânat tədoden aggotnen a fall-as hallinen, sikalalnat. ²⁸ İswad-in dağ-asnat Ƴaysa, inn-asnat: «Aşšet Yerusalam, ayyimat fall-i tala. Kalar alimat fəl man-nakmat, əd maddannəkmat, ²⁹ fəlas əlkâman adan a dağ z'itəwənnu: "Əbbilalnat tədoden šin wər nətilu bararan, əd šin əs kala wər tan-əlenat, əd šin əs kala wər əsənkasnat." ³⁰ Adan win-di ad annin aytedan y ədɣaxan: "Bərəjjətət fall-ana", annin i kaşwaran: "Alsawat-ana"; ³¹ fəlas dad itawagga əmazal wa y ašək wa ibdagan, wədi ma d-innəyan wa iqquran?»

İtəwətəytəy ən Ƴaysa fəl təgəttawt

³² Ellan meddan den əşšin ən nəsgufa labasnen s əntanay da tiwazargazan s adag ən təmattant.

³³ As ewadan sojitan edag igân esəm Təkəyya, əttəytayan Ƴaysa fəl təgəttawt, əssəxtan-tat dər-əs. Ƴegan awen da i meddan win əşšin en. Iyyan əgan-tu daƣ əxil ən Ƴaysa, wa hadan əgan-tu daƣ zalgat-net. ³⁴ Inna Ƴaysa: «Ya Abba, surəf-asan; wər əssenən awa taggin.»

Ƴezunan tabdoq ən Ƴaysa əs təşaxeren. ³⁵ Tamattay təbdâd den təswâd. Imuzaran amaran əgân tamakkakkayt daƣ Ƴaysa, gannin: «Ƴenta wa issəfsan aytedan, assafset iman-net kud ənta a imosan Ƴlməsix, Tafrənt ən Məşşina.»

³⁶ Sojitan da, əgân daƣ-as tamakkakkayt. Tihazan-t-in, tazzalan-as-in bənəgər. ³⁷ Gannin-as: «Kud kay əmənokal ən Kəl-Ƴlyəhud a təmosaƣ, tassafsəƣ iman-nak.» ³⁸ Ƴttəytayan deƣ dənnəg-əs əsəllum a fəl iktâb as: «Awa Ƴmənokal ən Kəl-Ƴlyəhud.»

Meddan win əşšin ən nəsgufa

³⁹ A das-itaggu iyyan daƣ meddan ən jujab ən baydagan win dəgman-əs tawataytaynen ark batuten, igann-as: «Wərgəƣ kay Ƴlməsix? Safsu za iman-nak, tassafsəƣ-ana.»

⁴⁰ Isannaryam-as wa hadan, inn-as: «Kay təksəda a wər təge Məşşina, kay wa obaz əşşəriƣa imosan təmattant wa t-ibazan? ⁴¹ Nakkanay əşşəriƣa wa danaƣ-itawaggan oƣâd, awa dər əhoran mazalan-nana a danaƣ-itawaxkaman, mişan aləs wa, ənta wər iga ark amazal waliyyan.» ⁴² Təzzar inna i Ƴaysa: «Ƴaysa, aktəw-i-du as du-təqqala taheƣ taƣmar-nak.» ⁴³ Inn-as Ƴaysa: «Ƴggəyəƣ əsilakanəƣ-ak as, azalada ad nənəməgəz aljannat nak dər-ək.»

Tamattant ən Ƴaysa Ƴlməsix

⁴⁴ Awen itaggu attayan n ammasnazal. Təzzar əlsanat şiyay amađal ketnet har təga tazzar, ⁴⁵ fəlas təfuk a igmad ənnur. Afər deƣ wa izammazzayan edag wa zəddigan əd wa ogaran tazdak daƣ Ahan wa Zəwwəran n Ƴlyibada, izzərrat daƣ ammas. ⁴⁶ Təzzar ikkas Ƴaysa əməsli issohen, inna: «Abba, əgeƣ iman-in gər fassan-nak.» Inna awen ƣas əgmadan-tu man.

⁴⁷ As inay kabtan ən sojitan ən Kəl-Ƴrrum win əttəytaynen Ƴaysa awa igan den, iga təmmal i Məşşina, amaran inna: «İllikan as aləs wa alƣadil.» ⁴⁸ Ƴddəwan aytedan aggotnen den y ad ənəyan awa z'agin. As t-ənayan, əqqalan əggâtan idmaran-nasan fəl awa əgan man-nasan daƣ əƣşud. ⁴⁹ As itaggu awen, imidawan ən Ƴaysa kul, əhânat tədoden şin das-d-əlkamnen harwa daƣ akal ən Galilaya, əbdâdan sədi, əswâdan.

*Tanakra ən Ƴaysa day təmattant**Ǝtəwægga ən Ƴaysa day əzəkka*

⁵⁰ Ill-ay aləs igân Yusəf ihân Asaggawar wa Zəwwəran ən muzaran ən Kəl-Əlyəhud, imosan awedan olâxan n alɣadil. ⁵¹ Ǝnta wər irda əs tanat ta əgan muzaran win, wala deɣ s arat wa igan. Yusəf wa, in əɣrəm ən Kəl-Əlyəhud igân esəm Arimatay, amaran igâ attama-net day assa ən Taɣmar ta n Məššina. ⁵² Ikka Yusəf Bilatəs wa n ənaxkim n akal, igraw-du ɣur-əs turagat n ad itkəl taɣəssa ən Ƴaysa. ⁵³ Təzzar ikkas-tat-du fəl təgəttawt, ig-et day šifit, ig-et day əzəkka imosan akazam əs wər kala a daɣ-as itawagga ənəmmettən. ⁵⁴ Awen itaggu day əzəl wa day simutugan aytedan y əmud wa n təsanfawt, ibukan y ənətti. ⁵⁵ Šidoden šin d-əddewnen əd Ƴaysa harwa day Galilaya, əlkâmnat i Yusəf. Ǝnaynat əzəkka d əmmək was daɣ-as tətawagga təɣəssa ən Ƴaysa. ⁵⁶ Ǝqqalnat aɣaywan, təzzar ad simutugnat aɟutan əzodnen d alwarditan win za təwənxəlnen fəl təɣəssa-net. As d-ewad əzəl wa n əssəbət əssənfanat, imos awen alwajib n əššəriɣa wa n Ǝttawret.

24*Agamad ən Ƴaysa əzəkka*

¹ As əzəl wa n alxad, ənzaynat tədoden šin den s əzəkka ən Ƴaysa, ewâynat aɟutan win sammatagnat. ² Osanat-in təhunt ta təharat əzəkka, tətivasaxararad, təlla den y əzəkka. ³ Ǝggaznat əzzəka mišan wər daɣ-as ənaynat taɣəssa ən Ƴaysa. ⁴ Ǝqqanan ɣafawan-nasnat y awen. Wala a ihogan əbdadan-du əššin meddan dəgma-nasnat əlsânen isəlsa bilazlaznen. ⁵ Ǝrmaɣnat, oyyanat idmaran s amaɟal, təzzar ənnan-asnat meddan win əššin en: «Mas təsaggadmat y i iddâran day nəmməttan? ⁶ Ab'as illa da, inkar-du day təmattant. Aktimat-du awa inna harwa iha akal ən Galilaya, ⁷ as inna: "Ag Aggadəm ilzâm-tu ad itəwəggu day fassan ən nasbakkadan, itəwətəytəy fəl təgəttawt, iba-tu, təzzar inkər-du day təmattant əzəl wa n karad."»

⁸ Amaran əktanat-du awa inna Ƴaysa. ⁹ Ǝfalnat əzəkka, əqqalnat əssoɣalnat awen kul i nəmmuzal ən Ƴaysa win maraw d iyyan əd nalkiman kul win hadatnen. ¹⁰ Šidoden šin əmosnat Maryama Madəl əd Taxya əd Maryama ta n anna ən Yaquub əd tədoden šiiyyad dər-əsnat əddawnen. Ǝntanatay a əssoɣalnen aratan win i nəmmuzal. ¹¹ Mišan wər sər-san əlen aratan en almaɣna; adi a fəl dasnat-wər-əzzəgzanan.

¹² Dər iga awen da ya, igga-du Butros, ozal s əzəkka. As t-in-osa, išşägga daḡ-as, wər daḡ-as inay ar šifit, təzzar iqqal, iqqân awen eḡaf-net.

Tarrayt n Emayos

¹³ Əzəl wen da iman-net ad əkkan nalkiman ən Ƴaysa əššin taḡrəmt iyyat təgât Emayos as tälla teklay n əššin alwaqan gar-es əd Yerusalam. ¹⁴ Mišawalan daḡ batu n aratan win əganen den kul. ¹⁵ Mišawalan den da as tan-d-ewad Ƴaysa ənta iman-net, iddew dər-san. ¹⁶ Hannayan-tu mišan wər t-əzdayan.

¹⁷ Inn-asan: «Ma daḡ təmašawalam da?» Əbdadan, təwâr təkənzert udmawan-nasan. ¹⁸ Inn-as wa daḡ-san igan esəm Kləyubas: «Adis kay ḡas daḡ aytedan win əhanen Yerusalam a wər əhen salan n awa daḡ-as igan daḡ adan win?» ¹⁹ Inn-asan: «Ma daḡ-as igan?» Ənnan-as: «Arat wa igrawan Ƴaysa wa n Nazaret, imosan ənnəbi itaggan imazalan d awalan ən təla tarna dat Məššina d aytedan kul. ²⁰ Sattarmasan-tu limaman win zawwarnen əd muzaran-nana, tətawaxkam-as təmattant, sattaytayan-tu fəl təgəttawt. ²¹ Nakkanay dat awen, nəgâ attama n as ənta a z'isəddərfeŋ tamattay n Israyil. Mišan azalada, əzəl n aratan en wa n karad d igi. ²² Dər iga awen da ya, əqqânnat tədoden-nana šiyyad iḡafawan-nana, ənzaynen s əzəkka, ²³ mišan wər daḡ-as ənaynat taḡəssa-net. Əqqalnat-du, ənnanat nifalalan-asnat angalosan, ənnan-asnat iddâr. ²⁴ Təzzar əkkan wiyyad daḡ-na əzəkka, osan-in, ənayan arat kul wa ənnanat tədoden en, mišan ənta wər t-ənayan.»

²⁵ Amaran inn-asan Ƴaysa: «Xa kawanay za aljahilan! İzzəwwat fall-awan əzəgzan s arat kul wa ənnan ənnəbitan daḡ Əlkəttaban. ²⁶ Wərgəḡ Əlməsix ilzâm âs ad inəy aḡazab təzzar, amaran igrəw tanaya-net?» ²⁷ Təzzar a tan-isasagru Ƴaysa awa sər-əs ənnan Əlkəttaban kul. İbaz-du ḡur Əlkəttaban win ənnəbi Musa har win ənnəbitan kul win hadatnen.

²⁸ As dîn-əhozan taḡrəmt ta əkkan, issəkna Ƴaysa as okây. ²⁹ Mišan əwəḡan-tu, ənnan-as: «ḡam ḡur-na fəlas əzəl igla, ehad ibuk y igi», təzzar izzəbbat ḡur-san. ³⁰ As əggazan šin tattay, idkal Ƴaysa tagəlla, iggoday i Məššina, irz-et ikf-asan-tat. ³¹ Əmmoranat şittawen-nasan alwaq wen da, əzdayan-tu, mišan iggaz-asan ətənkul tamazayt ten da. ³² Təzzar namannan gar-essan: «Zaḡnin awen da fəl əknan man-nana təfalawist alwaq wa danaḡ-işşewal daḡ tarrayt, isasagr-ana Əlkəttaban n ənnəbitan.»

³³ Əbdadan tamazayt ten da, əqqalan Yerusalam. Osan-in inəmmuzal win maraw d iyyan əd nalkiman win hadatnen

æddewan day adag iyyanda, ³⁴ gannin: «Tidət day a imos as Æmæli Ƴaysa inkâr-du day tēmattant, amaran inifalal i Simxon.» ³⁵ Æssoḡalan-asan meddan win əššin əntanay da awa ənayan day tarrayt, d əmmək was t-əzdayan alwaq wad irza tagəlla.

Ënəfilal ən Ƴaysa i nalkiman-net

³⁶ Harwada əššewalan day awen as d-ibdad Ƴaysa iman-net gar-essan, inn-asan: «Alxer fall-awan.» ³⁷ Ëgan tərəmməq zəwwərat, təggaz-tan tasa fəlas əxilan aggəsuf a hannayan den.

³⁸ Təzzar inn-asan Ƴaysa: «Ma fel təššiwašam? Ma fel deḡ təgām aššak? ³⁹ Ënəyat ifassan-in əd daran-in, nak iman-in awa. Ëdəsət-i ad tənəyam, fəlas aggəsuf wər ila taḡəssa wala iḡasan win as di-təhannayam da əleq-qan.»

⁴⁰ As dasan-inna awen, isakn-en ifassan-net əd daran-net, ⁴¹ mišan əgłan wər day-as əkkesan aššak fəl awa əgan day təfalawist, ikna deḡ sər-san awen əsəmməkləl. Adi a fəl a dasan-inna: «Awək təlâm a itamatšan da?» ⁴² Ëkfan-tu tablalt ən kifi təḡḡāt. ⁴³ İbaz-tat, itš-et dat-san.

Ëššəḡəl wa day iḡa Ƴaysa inalkiman-net

⁴⁴ Dəffər awen inn-asan Ƴaysa: «Ëntanay da aratan win dawan-ənnə harwa kawan-əheḡ: Aratan kul win fall-i əktabnen day Ëttawret n ənnəbi Musa d Ëlkəttaban win hadatnen d Azzabur əššil ad andin.» ⁴⁵ Amaran ora iḡafawan-nasan alwaq wen da y ad agrin Ëlkəttaban.

⁴⁶ Inn-asan: «Wərgəḡ iktâb as, Ëlməsix ad inəy alyazab, iba-tu, inkər-du day tēmattant əzəl wa n karad, ⁴⁷ təzzar təwəggin salan ən tətubt s esəm-net i təmattiwen kul fəl ad əgrəwnat təsurreft ən bakkadan, antu awen day Yerusalam. ⁴⁸ Kawanay təmôsam šigəyyawen n aratan win. ⁴⁹ Amaran nak a fall-awan du-zəzzəbbəḡ İnfas wa Zəddigan s Abbanin a iḡan arkawal-net. Day adi ad wər təgmədam aḡrəm wa da har d-azzabbat İnfas wa Zəddigan, akf-iwan tarna ta du-təfalat Məššina.»

Təwaylay ən Ƴaysa ijənnawan

⁵⁰ Dəffər awen, iddew dər-san, əgmadan aḡrəm, har din-əhozan taḡrəmt ta n Betanəy, təzzar idkal ifassan-net, ittar-asan a tan-ikfan albaraka. ⁵¹ Itattar-asan harwa da as dər-san imməzzay, immədkał əs jənnawan.

⁵² Ëntanay amaran, as das-əssəjadan, əqqalan Yerusalam əknân təfalawist. ⁵³ Faw əhân Ehan wa Zəwwəran n Ëlyibada, əmmâlan Məššina.

Əlinjil wa n Yaxya Əsənti

Awal wa imosan ənnur əd təməddurt

¹ Əstizarat as d-ixlak Məşşina əddənet da Awal ill-ay. Awal illa xur Məşşina, amaran Awal wa imos Məşşina. ² Awal əstizarat illa xur Məşşina. ³⁻⁴ Ixlak-du sər-əs Məşşina arat kul; wər t-illa arat dağ əddənet wa sər-əs du-wər-nəxlek fəlas Awal wa ənta a ihakkin təməddurt ta təmosat ənnur y aytedan. ⁵ Imilawlaw dağ şiyay mişan wər t-əqbelnat. ⁶ Osa-du aləs iyyan igân esəm Yaxya, a d-izimazal Məşşina; ⁷ imos təgəyya fəl ad ammagrad s ənnur wa, əzzəgzənan aytedan kul s aratan win igannu. ⁸ Ənta iman-net wər imos ənnur, ətəwəsəgla xas a d-iga imos təgəyya fəl ad ammagrad s ənnur wa. ⁹ Awal wa ənta a imosan ənnur wa n tidət, wa d-ikkan əddənet isimələwləw aytedan kul. ¹⁰ Ənta a ihan əddənet, ixlak-kat-du sər-əs Məşşina, mişan wər tu-təqbel əddənet. ¹¹ Osa-du akal-net eges wər t-əqbelan aytedan-net. ¹² Amaran aytedan kul win t-əqbalnen, əzzəgzənan sər-əs, win di ikf-en almaqam ən tişit ən bararan ən Məşşina. ¹³ Bararan ən əlâsan təhəwt. Mişan təhəwt ən wər tola əd ta tətawazdayat. Wər təga əs ləkkum i deran n aggadəm, wala tanat-net. Kala kalar Məşşina iman-net as tan-iga bararan-net. ¹⁴ Wa imosan Awal, iqqal awedan ixsar xur-na, ikna təla n əlxurma, imos məşşis ən tidət. Nəsinagra tanaya-net, tanaya ta igarraw Barar a n iyyanda xur Abba-net. ¹⁵ Iggəyyat-as Yaxya, işşewal s afalla ad igannu: «Wa dağ as əhe batu-net, assaxa wa dawan-ganna: "A d-asu dəffər-i mişan ogar-i, fəlas dat-i da ill-ay."» ¹⁶ Awalla ketnana nəgraw albaraka wər nəla əddukad s əlxurma-net ikmâlan. ¹⁷ Fəlas Məşşina ikf-anax əşşərixa dağ əfus ən Musa, əlxurma əd tidət amaran osa-du dər-san Ƴaysa Əlməsix. ¹⁸ Wər t-illa awedan inâyan Məşşina, mişan Barar a n iyyanda imosan Məşşina, illa xur Abba, ənta a danaq-q-issosanan.

İşşəxəl wa iga Ƴaysa dat aytedan kul

Təgəyya ən Yaxya wa isalməxan dağ aman

¹⁹ Ənta da təgəyya ta iga Yaxya y arat dağ limaman əd Kəl-Lebi win d-əfalnen Yerusalam assaxa wa tan-du-zammazalan muzaran ən Kəl-Əlyəhud y ad t-əssəstənan d awa imos. ²⁰ Wər ugay s a dasan-ajjawwab. Kala kalar idkal əməsli-net s afalla inn-asan: «Nak wər əmosax Əlməsix.»

²¹ Ænnan-as: «Ma təmosa za? Ilyas a təmosa?» «Kala kala» inn-asan, «wər t-əmosa.» «Ænnəbi wa ittəmalan a təmosa?» «Kala kala» inn-asan, «wər t-əmosa.» ²² Təzzar ənnan-as: «Dağ adi ma təmosa? Ihor a din-nasu aytedan win dana-d-əssəglanen newây-asan aljawab n awa təmosa. Dağ adi əməl-anaq-qu.» ²³ Inn-asan arat wa inna ənnəbi Isayas irəw, as inna: «Nak, a imosan wa isaxaren dağ əsuf igannu: "Səssiğədat abaraqqa y Əməli."»

²⁴ Aytedan win d-əmmozalnen əs Yaxya da, əhân-tan kəl taggayt ta n Farisaytan. ²⁵ Əlasan-tu əsəstan ənnan-as: «Ma fəl təsalmağay aytedan dağ aman, kay tənne wər təmosay Əlməsix, wər təmosay deyə ənnəbi wa ittəmalan?» ²⁶ Inn-asan: «Nak, aman a dağ salmağa, mişan illa gərəwwan awedan wər təzdayam, ²⁷ s ənta a du-z-asin dəffər-i, amaran awa di-iga dağ şigrat, wər eweda wala arra ən suğan ən xateman-net.» ²⁸ Aratan win kul amaḍal ən Betanəy a dağ taggan fəl tagadamayt ta hadat n agarəw wa n Yordan s ənta a dağ isalmağ Yaxya aytedan.

²⁹ As iga əzəl wa hadan ogga Yaxya Ƴaysa izay-t-idu, təzzar inna: «Ənta den ajağol ən Məşşina wa itakkasan ibakkadan dağ əddənet. ³⁰ Ənta as əhe batu-net as dawan-ganna: "Aləs iyyan a d-asu dəffər-i, mişan ogar-i fəlas dat-i da ill-ay." ³¹ Nak iman-in wər t-əzdaya mişan ose-du ad salmağay aytedan dağ aman, fəl a d-inəfiləl i Kəl-Əlyəhud.» ³² İlas Yaxya təgəyya inna: «Əswāda dağ İnfas wa Zəddigan as d-igmad jənnawan, iha şaşşelan ən tədabert, iwar-tu. ³³ Dat awen wər t-əzdaya, mişan Məşşina, s ənta di-d-izammazalan y ad əsalmağay aytedan dağ aman, inn-i: "Aləs was tənayay İnfas wa Zəddigan as fall-as d-izzəbbat, aləs wədi ənta a z'isalmağan aytedan dağ İnfas wa Zəddigan." ³⁴ Əmərədda arat wa ənayaq-qu əs şittawen-in; amaran əggəyye silakanay as aləs wa ənta Barar ən Məşşina.»

İnəttulab win azzarnen

³⁵ As iga əzəl wa hadan, iha Yaxya edag wa harwa da, ənta əd nəttulab-net əşşin, ³⁶ ogga Ƴaysa as dagma-nasan d-illam, inna: «Ənta den, Ajağol ən Məşşina.» ³⁷ Əslan nəttulab win əşşin a i batu ta iga da, təzzar əlkaman i Ƴaysa. ³⁸ İswad-in Ƴaysa dəffər-əs ogg-en əlkâman-as, inn-asan: «Mas təsaggadam?» Ænnan-as «Mənid təxsara Əşşex?» ³⁹ Inn-asan «Ağliwat-du a tu-tənəyam». Itaggu awen takəst zagret. Əglan əddəwan dər-əs, ənayan dad illa, təzzar əssəndan xur-əs əzəl. ⁴⁰ Meddan win əşşin əlkamnen i Ƴaysa dəffər tasalay ta əgan y awal ən Yaxya, esəm n iyyan dağ-san Andrawəs, amadray

ən Simxon Butros. ⁴¹ Immənay Andrawəs d əmaq qar-net Simxon əstizarat, inn-as: «Nakkanay nəmminay d Əlməsix.» (Almaḡna Kristos.) ⁴² Amaran ilway-tu əs Ƴaysa. Iswad Ƴaysa daḡ Simxon ḡas inn-as: «Kay Simxon ag Yaxya, ad tagaḡ esəm Qayfas.» (Esəm wa ola əd wa n Butros, almaḡna-net təhənt.) ⁴³ As affaw ira Ƴaysa iki n amaḡal ən Galilaya. Immənay əd Filibus inn-as: «Əlkəm-i.» ⁴⁴ (Filibus d Andrawəs əd Butros aḡrəm-nasan iyyanda, esəm-net Betsayda.) ⁴⁵ Immənay Filibus əd Natanəyel inn-as: «Nakkanay nəmminay əd was imməgrad ənnəbi Musa daḡ Əttawret, əmmigradan sər-əs deḡ Əlkəttaban n ənnəbitan, a t-imosan Ƴaysa wa n ag Yusəf wa n aḡrəm ən Nazaret.» ⁴⁶ Təzzar inn-as Natanəyel: «Immikkan aḡrəm ən Nazaret a t-id-əḡməd arat ihossayan?» Inn-as Filibus: «Ayaw tənəya.» ⁴⁷ Ogga Ƴaysa Natanəyel izay-t-idu, inna: «Ənta den awedan n Israyil wa n tidət, wa wər iha a imosan təlmənufəqa.» ⁴⁸ Inn-as Natanəyel: «Məni awas di-təzdaya?» Ijəwwab-as Ƴaysa inn-as: «Harwa kay du-wər-iḡra Filibus, assaḡa wad təlle daw ašək wa n fiḡ, da əhannayaq-ḡay.» ⁴⁹ Inn-as Natanəyel: «Əššex, kay a imosan Barar ən Məššina, təmosaḡ əmənokal n Israyil.» ⁵⁰ Inn-as Ƴaysa: «Təzzəḡzana fəl as dak-ənneḡ əhannayaq-ḡay daw ašək ən fiḡ. Ad tənəyaḡ aratan wiyyad zawwar-nen ogarnen wədi.» ⁵¹ Inn-as Ƴaysa deḡ: «Əḡḡəyyeḡ əsilakanax-awan as dəffər awa ad tənəyam ijənnawan ənnolaman tagazzayan sər-san angalosan, tazabben-du fall-i nak Ag Aggadəm.»

2

Takrəst ta təgat daḡ aḡrəm ən Kâna

¹ Əzəl wa n karad təmal-tu təkrəst daḡ aḡrəm ən Kâna daḡ amaḡal ən Galilaya, təh-et anna ən Ƴaysa, ² təzzar itawaḡra-du Ƴaysa ənta da, iddew-du əd nəttulab-net əs təkrəst en. ³ As ab'as d-iqqim wala daḡ esmad n alḡanab, tənna anna ən Ƴaysa y as: «Esmad n alḡanab iḡrad.» ⁴ Inn-as Ƴaysa: «Anna, tədi a kam-wər-tədgəz. Alwaq-in wər d-ewed.» ⁵ Tənna anna-net i maššaḡalan: «Aḡat awas dawan-inna kul.» ⁶ Əskâran den sədis təkan taggazan aman as taggin Kəl-Əlyəhud əzəzdəḡ imosan alḡadat-nasan. Əkkulluk n iyyan itaggaz-tu əddukad ən temeday ən litər. ⁷ Inna Ƴaysa i maššaḡalan en: «Ədnəyat itəkan di aman.» Əntanay deḡ ədnayan-tan har fayyan. ⁸ Inn-asan amaran: «Əlkəwat daḡ-san əmərədda y əmaway ən saksas.» Əgan awen da. ⁹ As iram əmaway ən saksas aman win əmməttaynen da, əqqalan esmad n alḡanab,

as wər issen iguz wa d-iga, mišan imaššaxalan win tan-d-əlkawnen da əssānan, iḡra amazlay, ¹⁰ inn-as: «Iməssəksas kul esmad n alḡanab wa izodan a garrawan, amaran dəffər as filawasan ad garrawan wa isammakkanan. Eges kay təḡbara wa izodan har əmərədda!» ¹¹ Ənta əddi təlməxjujat təmosat alḡalamat ta tazzarat immozal Ƴaysa. Ig-et daḡ əḡrəm ən Kāna ta n Galilaya. Isannafalal sər-əs tanayaneṭ, təzzar əzzəgzanan sər-əs nəttulab-net. ¹² Dəffər awen izagaday Ƴaysa, ikka taḡrəmt ən Kafarnahum, ənta d anna-net, əd mədrayan-net, əd nəttulab-net. Wər daḡ-as əgen ar arat n adan.

Assa ən Ƴaysa Ehan wa Zəwwəran n Əlyibada

¹³ As d-ihoz əmud wa n Akkay imosan amud maqqaran ən Kəl-Əlyəhud, iggəzzay Ƴaysa ikka Yerusalām. ¹⁴ Ogaz-in Ƴaysa daḡ aḡalla wa iḡlayan Ehan wa Zəwwəran n Əlyibada, imassatagan ən zəgran, d ayfəd, əd tədəbren, əd təximiten ən kəl sanji. ¹⁵ Iga ələkkud əs ḡunan istaq-ḡan daḡ afarag en ketnasan, əntanay d ayfəd, əd zəgran, infaz daḡ amaḡal izərfaṇ ən kəl sanji, isabbanbay tebərənnasan. ¹⁶ Imassatagan ən tədəbren əntanay inn-asan: «Əkkəsət awa daḡ adag a, ad wər tagim ehan n Abba-nin əssuk.» ¹⁷ Ektan-du nəttulab akatab n ənnəbi Dawəd wa innan: «Tara-nin ehan-nak tərḡa daḡ-i šilat ən təmsay.» ¹⁸ Əssəstanan-tu muzaran ən Kəl-Əlyəhud ənnan-as: «Ma təmos təlməxjujat tas təfragay igi-net təmosat alḡalamat, təsitaddat as tələḡ tarrayt n igi n adi?» ¹⁹ Ijjəwwabasan Ƴaysa inn-asan: «Jəbbərəjjətət Ehan wa Zəwwəran n Əlyibada di, ad t-əssəbdəda daḡ karad adan.» ²⁰ Ənnan-as: «Ehan wa Zəwwəran n Əlyibada di əkkozat təmərwən n awatay əd sədis a fəl itawakras. Kay mas tu-za-təssəbdəda daḡ karad adan?» ²¹ Ehan wa Zəwwəran n Əlyibada wa immal Ƴaysa da, taḡəssa-net a sər-əs issoka. ²² As d-inkar daḡ təmattant əktan-du nəttulab-net tənna ta iga adi. Əzzəgzanan s Awal ən Məššina, d awal wa iga Ƴaysa da. ²³ Aytedan aggotnen əzzigzanan əs Ƴaysa ḡur anay ən təlməxjujaten šin immozal əmosnen alḡalamaten, daḡ adan win iga daḡ Yerusalām ḡur əmud wa n Akkay. ²⁴ Mišan ya Ƴaysa wər tan-ifles fəlas izdāy-tan ketnasan, ənta ²⁵ wər iddərar s i das-igan isalan n awedan id wər das-iḡber awa ihan əwəl-net.

3

Ƴaysa əd Nikodemos

¹ Ill-ay aləs iyyan igan esəm Nikodemos, ihân taggayt ən Farisaytan, imos iyyan daḡ muzaran ən Kəl-Əlyəhud.

² Osa-du Ƴaysa ahad iyyan inn-as: «Ēššex-in, nakkanay næssân as Məššina kay d-izammazalan sər-na, a dana-təsassaxra, id wər t-illa i z'agin təlməxjujaten šin təge əmosnen alxalamaten, ar əs tədhəlt ən Məššina.» ³ Ƴaysa deƳ inn-as: «ĒggəyyeƳ əsilakanax-ak as: Wər t-illa awedan ifrāgan anay ən TaƳmar ta n Məššina ar s ad ilas təhəwt.» ⁴ Issəstan-tu Nīkodemos inn-as: «Mas z'iləs awedan waššaran təhəwt? Ši təgat da wər ifreg ad iləs tewaƳlay ən tədīst n anna-net.» ⁵ Inn-as Ƴaysa: «ĒggəyyeƳ əsilakanax-ak as: awedan wər ifreg iguz ən TaƳmar ta n Məššina ar s ad ihəw s aman d Infas wa Zəddigan.» ⁶ Ǝləsəl n aggadəm iyyan aggadəm, amaran awedan wa d-igmadan Infas wa Zəddigan, Infas wa Zəddigan a daƳ-as innodan. ⁷ DaƳ adi a dak-wər-iqqən eƳaf as dak-ənnəy: Iwār-kawan ad tələsam təhəwt. ⁸ Adu iggār sas ira, təsalla y əməsli-net, mišan wər təssena da d-ifal wala dad ikka. Samal di da a iha awedan wa ihəwan s Infas wa Zəddigan.» ⁹ Issəstan-tu Nīkodemos inn-as: «Məni tat təməwit tas z'agin aratan win di?» ¹⁰ Ijjəwwab-as Ƴaysa inn-as: «Təmosax əmusan zəwwəran daƳ Israyil eges wər təssenax aratan win! ¹¹ ĒggəyyeƳ əsilakanax-ak as: Nətamagrad s awa nəssan, nətagayyat deƳ fəl awa nənay, eges tugayam s ad təqbəlam təgəyya-nana. ¹² Dad wər təzzəgzanam s awa dawan-ganna s əddənət mas za təzzəgzənam awa dawan-ganna s alaxirat? ¹³ Wər t-illa is kala ad inay ijənnawan, ar nak Ag Aggadəm a tan-d-igmadan. ¹⁴ Ǝmmək was issərgag ənnəbi Musa taššolt fəl əgət daƳ taneray, əmmək wen daƳ as kundaba tawasahake nak Ag Aggadəm, ¹⁵ fəl ad iqqəl as i sər-i izzəgzanan, ad igrəw təməddurt ta təƳlalət. ¹⁶ Fəlas, Məššina awa iga y əddənət daƳ tara ikfa Barar-net a n iyyanda fəl ad iqqəl as i sər-əs izzəgzanan wər z'ihlək, kalar ad igrəw təməddurt ta təƳlalət. ¹⁷ Məššina wər d-issoka Barar-net əddənət fəl a tat-ihlək kalar issok-as-tat-du fəl a sər-əs tafsu. ¹⁸ I sər-əs izzəgzanan wər ihlək, mišan wa sər-əs wər nəzzəgzan ihlāk fəlas wər izzəgzan s esəm ən Barar a n iyyanda ən Məššina. ¹⁹ Ǝddəlil da wa d-ewayan ahluƳ: Ǝnnur a d-osan əddənət, mišan əssofan-tu aytedan šiyyay id arak mazalan a taggin. ²⁰ Amaran i itaggan təkma wədi oglaf ənnur, wər t-id-z-akku fəlaš iksud ad nəfiləlan arak mazalan-net ezal a mallan. ²¹ Mišan wa itaggan arət wa imosan tidət, wədi itakka-du ənnur, fəl ad itəwənəy as əmazal-net issind-ay daƳ ləkkum i Məššina.»

Ƴaysa əd Yaxya wa isalmayan daƳ aman

²² Dæffær awen ikka Ƴaysa æd nættulab-net amaḍal ən Yahudæyya. Iqqim daḡ-as har iga arat n azzaman ænta dær-san, isalmaḡ Ƴaysa aytedan daḡ aman. ²³ Yaxya ænta da isalmaḡ aytedan daḡ aman daḡ tæsæssəngəyt ta n Aynon, dagma ən Salim, fəlas əllan-tu aman den aggotnen. Tasin-tidu aytedan isalmaḡ-qan. ²⁴ Arat wa as itaggu Yaxya harwa da wər iggez kasaw. ²⁵ Tənkær təmazaq gær nættulab ən Yaxya d iyyan daḡ Kəl-Əlyəhud, daḡ batu ən təməwiten šin as itaggu zazdag. ²⁶ Əkkan Yaxya ənnan-as: «Əššəx-nana, təkittəwa aləs wa dær təddəwa fəl afay ən Yordan wen sen, s ænta as dana-təmməgrada? Tahannaya! Əmərədda isalmaḡ aytedan daḡ aman amaran ketnasan takkin-tu!» ²⁷ Inn-asan Yaxya: «Awedan wər z'igrəw ar awa t-ikfa Məššina. ²⁸ Kawanay iman-nawan təggəyyem-i as ənnəy: "Wər əmosaḡ Əlməsix, ətəwəzəmizal ḡas a d-əge dat-əs." ²⁹ Əmazlay da ilan təmazlayt, amaran əmidi-net wa n ənafliis-net, ænta a innəttafan æd zəzlay, issigad den da iqqâl-as. As isla y əməsli n əmazlay igmây-du təmazlayt, ad aknu tədəwit. Tədəwit tædi za ænta a əgeḡ, amaran əmərədda tənda. ³⁰ Ittəyet ətəwəsəḡmar-net ifnəz wa-nin. ³¹ Wa d-igmadan afalla, ænta a idkalan dənnəg awedan kul, wa ihan əddənət in əddənət amaran aratan n əddənət as itamagrad. Wa d-igmadan ijənnawan, idkâl dənnəg awedan kul, ³² iggəyyat s awa inay d awas isla mišan wər t-illa i iqbâlan təgəyya-net. ³³ Wa iqbalan təgəyya-net, isilakan awa inna Məššina, ³⁴ fəlas wa d-izammazal Məššina, awal ən Məššina a immal, id Məššina a das-igan y Infas wa Zəddigan tehakkay wər nəla əddukad. ³⁵ Abba ira Barar-net amaran aratan kul ig-en daḡ əfus-net. ³⁶ Wa izzəgzanan əs Barar ən Məššina wədi igraw təməddurt ta təylâlat, amaran wa ugayan s a sər-əs izzəgzən wədi eway-du əs man-net alham ən Məššina.»

4

Ƴaysa æd tæntut ən Kəl-Samarəya

¹⁻³ Əslan Farisaytan as itawannu Ƴaysa igarraw inættulab ogarnen win Yaxya isalmaḡ-qan daḡ aman. (Arat wa imosan tidət as Ƴaysa iman-net wər isəlmiḡ awedan waliyyan daḡ aman, inættulab-net a salmaḡnen aytedan daḡ aman.) As isla Ƴaysa y awa itaqqalan, igmad amaḍal wa n Yahudæyya, iqqal Galilaya. ⁴ Dad t-ilzam imur n amaḍal wa n Samarəya, ⁵ iššokal har ewad aḡrəm iyyan ən Samarəya igân esəm Šixar, dagma ən tawagost ta ikfa Yaquub barar-net Yusəf. ⁶ Edag wen ænta a iha əḡarus ən Yaquub. As t-id-ewad Ƴaysa, iddâz əšikəl, təzzar iqqim

fəl əmi n əxarus, itaggu awen ammasnazal. ⁷⁻⁸ As əkkan nəttulab-net aXRəm y ad d-azzanzin imensewan, təwardu təntut ən Kəl-Samarəya a du-təzrâgat anu en. Inn-as Ƴaysa: «Šašw-i-du.» ⁹ Tənn-as: «Kay təmosax iyyan daX Kəl-Əlyəhud təgammaya daX-i aman, nak təmosat iyyat daX Kəl-Samarəya?» ¹⁰ Inn-as Ƴaysa: «Ənnar təssânaX arat wa ihakku Məššina, təssânaX deX awa əmosa nak wa kam-itansayan aman ən tassay, tansiyax-i-tan kam, akfay-aman deX əmosan win sidurnen.» ¹¹ Tənn-as təntut: «Əššəxin, anu i zagren amaran kay wər tələX aga, daX adi mənî du-za-təgrəwax aman win sidurnen di? ¹² Šigrat a təgeX əmaraw-nana Ƴaqub a danaX-ikfan anu a, işwa aman-net, əšwan-tan maddanəs d aharay-net?» ¹³ Inn-as Ƴaysa: «İ işwan aman di, ad t-iləs fad iguz, ¹⁴ mišan i işwan aman win tu-z-akfa wədi immizzay əd fad, fəlas a daX-as əqqəlan adri ingayan s aman win hakkinen təməddurt ta təxlalat.» ¹⁵ Tənn-as təntut: «Šašw-i-du daX aman win di, fəl a di-igməd fad, ammazzaya d azarog n anu a.» ¹⁶ «Aglu», inn-as Ƴaysa. «AƳra-du aləs-nam təqqələX-i-du da da.» ¹⁷ Tənn-as: «Wər ələX aləs.» Inn-as Ƴaysa: «Tidət-nam as tənne wər tələX aləs, ¹⁸ fəlas səmmos as kala tan-təle, amaran wa Xur tələX əmərədda wərgəX aləs-nam. Tidət a di-təge.» ¹⁹ Təzzar tənn-as: «ƏhannayaX as kay ənnəbi a təmosa. ²⁰ İmarwan-nana adXax a da a fəl əXBədan Məššina, mišan kawanay Kəl-Əlyəhud tənnam Yerusalem a iha adag wa daX itawaxbad Məššina.» ²¹ «Təntut», inn-as Ƴaysa, «Zəgzən-i, alwaq izay-du a daX wər za təXabbadam Abba gər za fəl ədXax wa, wala deX Yerusalem. ²² Kawanay Kəl-Samarəya wər təzdayam wa təXBədam, nakkanay Kəl-Əlyəhud nəzdây wa nəXBəad, fəlas efsan iguz wa n Kəl-Əlyəhud a d-əgan. ²³ Mišan alwaq izay-du – amaran osa-du – was inaxbidan win tidət ad əXBədan Abba s İnfas wa Zəddigan əd tidət, fəlas Abba inaxbidan win t-əXBəadnen əs təməwit tədi, əntanay a ira. ²⁴ Məššina İnfas wa Zəddigan a imos, amaran inaxbidan-net ilzâmtan ad t-əXBədan s İnfas wa Zəddigan əd tidət.» ²⁵ Tənn-as təntut: «ƏssânaX as Əlməsix, itawann-as Kristos, a d-asu. As d-osa a danaX-isassagru aratan kul.» ²⁶ Inn-as Ƴaysa: «Nak a t-imosan, nak wa dam-iššewalan da.» ²⁷ Assaxat ten da a d-əqqəlan nəttulab, iqqan-asan eXaf əməšiwəl wa iga Ƴaysa əd təntut. Mišan wər tan-iha i ihalan ad t-issəstən, ann-as: «Ma daX-as tare?» MadəX: «Mas dər-əs təmašawala?» ²⁸ Təzzar toyya-du təntut ətəkin-net təqqal aXRəm tənna y aytedan: ²⁹ «Ayewat ad tənəyam awedan a di-imâlan arat kul was kala ad t-əge,

ifrâg as ənta a imosan Əlməsix!»³⁰ Təzzar əgmadan-du aytedan axtərəm əkkan Ƴaysa.³¹ As itaggu awen inəttulab gammayan daƣ Ƴaysa ad atšu, gannan-as: «Əššex, atšu arat iyyan.»³² Inn-asan: «Imensewan win z'atša wər tan-təzdayam.»³³ Ad tənəmännin nəttulab gar-essan: «Əngəm ƣas wərgəƣ awedan iyyan a das-d-ewayan imensewan?»³⁴ Inn-asan Ƴaysa: «Imensewan-in wər tan-imos ar ad ammazala tara ən wa di-d-izammazalan, əxtərədaƣ əššəxəl wa daƣ-i iga.»³⁵ Awak kawanay wər təgənnim: "İqqimnat-in əkkozat təlil y ad tagu ƣarat?" Nak za ənneƣ-awan akniwat əzəggəzdi ən təwəgas ad tənəyam as šixaxanen ənjanat, wər ərenat ar əmiləy.³⁶ Awedan wa italayan, wədi igraw ərruzmatan-net. Šixaxanen šin təməddurt ta təxlalat a išadaw, fəl ad ajjayat wa inabbalan əd wa italayan tədəwit.³⁷ Fəlas tidət ən təmajəq ta tənnat: "Aləs iyyan inabbal, iyyan italay." ³⁸ Əssəglaq-qawan fəl ad taləyam tawagost a daƣ wər təşxəlam, aytedan wiyyad a daƣ-as əşxələn, mišan təgrawam tənfa daƣ əššəxəl wa əgan den.»³⁹ Əzzəgzanan aytedan aggotnen ən Kəl-Samarəya əs Ƴaysa fəlas tantut a dasan-tənnat: «Imâl-i aratan win as kala tan-əge.»⁴⁰ Awen da a fəlas osan-t-idu ƣas əgmayan daƣ-as a ƣur-san aqqam. İqqim ƣur-san Ƴaysa har iga əššin adan.⁴¹ Əslan aytedan y awal-net, əzzəgzanan sər-əs wiyyad ogarnen winad igət.⁴² Təzzar ənnan i təntut: «Nakkanay səket nəkna əzəgzan fəlas əstizarat kam ƣas a danax-igan isalan, əmərədda iman-nana as das-nəsla, amaran nəssân as tidət as ənta a imosan Ənəssefsi n əddənet.»

Təməzzəyt ən barar n amaššaƣal n əmənokal ən Kafarnahum

⁴³ As əndan əššin adan win den, ikka Ƴaysa amaɖal ən Galilaya,⁴⁴ fəlas ənta iman-net as inna, ənnəbi wər itəwəsəxtmir daƣ axtərəm wa daƣ idwal.⁴⁵ As din-osa Galilaya əqbalan-tu Kəl-Galilaya id ənâyan imazalan kul win iga daƣ Yerusalam ƣur əmud wa n Akkay fəlas əntanay da osân-in amud en.⁴⁶ İlas-du Ƴaysa assa ən təxtərəmt ən Kâna ta n Galilaya, ta daƣ isammattay aman ig-en esmad n alƣanab. İll-ay aləs imosan amaššaƣal n əmənokal daƣ təxtərəmt ən Kafarnahum. Aləs a ila barar-net irinan.⁴⁷ As isla as Ƴaysa igmâd-du amaɖal ən Yahudəyya iha Galilaya, os-ay-du onsay-tu ad idawan, a das-izzuzəy barar-net a ƣur təlla təmattant.⁴⁸ Inn-as Ƴaysa: «As wərgəƣ ad tənâyam alƣalamaten əmmittaynen əd təlməxtujaten, wər za təzzəgzənam fadda.»⁴⁹ Inn-as amaššaƣal n əmənokal: «Əməli, ərəs-anax əs Kafarnahum tarmad harwa ad wər

aba barar-in.» ⁵⁰ Inn-as ʔaysa: «Aglu, barar-nak izzay.» Aləs deɣ izzəgzan s awal ən ʔaysa, igla. ⁵¹ Iha tarrayt iqqâl as immənay əd maşşaxalan-net das-d-əlkammen. Ənnan-as: «Barar-nak izzay.» ⁵² Issəstan-tan inn-asan: «Ma imos alwaq wa deɣ igraw iman-net?» Ənnan-as: «Əndazəl iggi ən tazzar a fall-as təwat tanaday.» ⁵³ Ikta-du aləs as alwaq wen da iman-net a deɣ-as inna ʔaysa: «Barar-nak izzay.» Izzəgzan sər-əs ənta d aɣaywan-net kul. ⁵⁴ Ənta da da təlməxjujat təmosat aɣalamat ta n sanatat immozal ʔaysa deɣ Galilaya dəffər agamad-net Yahudəyya.

5

Təməzzəyt n anabdon

¹ Dəffər adi ewad-du əmud iyyan ən Kəl-Əlyəhud, təzzar ikka ʔaysa Yerusalam. ² Ayrəm wa n Yerusalam təh-ay təɣazart təhozat edag was itawannu təsəhərt ta n Aɣfəd. Təɣazart ta esəm-net Betsada, deɣ təɣibrit, amaran təlla gər səmmosat taliwen. ³ Taliwen šin əsrâdan daw-əsnat miranan əgânen deɣ məddəryal, əd məggudal, əd nəbdan. Əssigadan y ad əggəzan aman šin əmətəkwəy, ⁴ fəlas immal-tu alwaq a deɣ d-itazabbat angalos iyyan n Əməli ijənnəjərwəy aman ən təɣazart ten. Əmiran kul wa azzaran iguz-net dəffər ənəjərwəy wa təga da, wədi ad izzəy deɣ təwərna ta tu-təgrawat, a təqqal.

⁵ Edag en ih-ay aləs igân karadat təmərwən n awatay d əttam irin. ⁶ Ogg-ay ʔaysa isrâd, amaran issan as iga təwərna tərəwat, issəstan-tu inn-as: «Awak tere təməzzəyt?» ⁷ Inn-as əmiran wa: «Əşşex, nak wər əleɣ awedan a di-igan deɣ təɣazart ta deɣ amazay wa deɣ tinəjərwəyan aman-net, amaran id əgmaya d iguz-net, a di-izar sər-əs awedan iyyan.» ⁸ Inn-as ʔaysa: «Əbdəd, tədkəla təssut-nak təjəwənke» ⁹ Izzay aləs wen deɣ tamazayt ten da, idkal təssut-net ijawankat.

Ənta arat wa itaggu deɣ əzəl ən təsanfawt ən Kəl-Əlyəhud. ¹⁰ Ənnan muzaran ən Kəl-Əlyəhud y aləs wa izzayan da: «Kay ak masnat a wər təgəɣ as azalada əzəl ən təsanfawt a deɣ-ak wər xalal aggay ən təsalat-nak?» ¹¹ Eges ya inn-asan aləs wen: «Aləs wa di-izzozayan, ənta a di-innan: "Ədkəl təsalat-nak təjəwənke".» ¹² Ənnan-as: «Ma imos za aləs wa dak-innan: "Ədkəl təsalat-nak təjəwənke"?» ¹³ Ənta aləs wa izzayan da, wər t-əhen salan n awa imos awedan wa t-izzozayan den, fəlas aytədan əknanen igət a əhanen edag wa daq-q izzozay ʔaysa den, iras-tan ʔaysa, ijawankat.

¹⁴ Dæffær awen ogaz-t-in Yaysa daḡ Ahan wa Zəwwəran n Əlyibada inn-as: «Səsəm. Kay da izzayan da əmərədda. Əxrəd d igi ən bakkadan, a kay wər igrəw arat ogaran wanad tallabəst.» ¹⁵ İjawankat aləs wen təzzar imal i muzaran ən Kəl-Əlyəhud as Yaysa a tizzozayan. ¹⁶ Arat wa eway-du sər-san as əknan gezzar ən Yaysa fəlas əzəl ən təsanfawt a daḡ iga awen. ¹⁷ Mišan inn-asan Yaysa: «Abba-nin faw da işyâl, daḡ adi nak da əşyâla.» ¹⁸ Batu ta, teway-du əs muzaran ən Kəl-Əlyəhud as əşšotan daḡ agamay ən tanaḡay ən Yaysa, fəlas wərgəy əlqanun n əzəl wa n təsanfawt ḡas a imməzray, kalar işšota-du fall-as as inna imos Məşşina abba-net. Daḡ adi işəşagda iman-net əd Məşşina.

Tanaya ən Yaysa

¹⁹ Inn-asan Yaysa: «Əggəyyey əsilakanax-awan as Barar wər ifreg igi n arat waliyyan gar-es əd man-net. Wər itəggu ar arat was ihannay Abba-net itagg-ay. Amaran arat kul wa itaggu Abba, Barar da itagg-ay s asaway wen da. ²⁰ Fəlas Abba ira Barar, amaran isakn-ay arat kul wa itaggu; ad t-assaknu aratan ogarnen win da təla n almayna y a tan-agu, fəl ad taḡjim. ²¹ Əmmək wa daḡ-as d-isankar Abba inəmməttan itaggu daḡ-san iman, əmmək wədi da as ihakku Barar ənta da təməddurt i was tat-ira. ²² Wa dæffær adi as Abba wər ixəkkəm y awedan waliyyan, kalar əşşəriḡa kul ig-ay daḡ əfus ən Barar ²³ fəl ad əzzəzwəran aytedan kul Barar s əmmək was əzzəzwaran Abba. Awedan kul wa wər nəzzəzwar Barar, wədi wər izzəzwar Abba wa t-id-izammazalan.»

²⁴ «Əggəyyey əsilakanax-awan as awedan kul wa issəsaman i batuten-in, izzəgzan əs wa di-d-izammazalan, wədi igrâw təməddurt ta təylalat. Wər z'awwaddab, kalar təmattant a d-igmad əs təməddurt.»

²⁵ «Əggəyyey əsilakanax-awan as izay-du alwaq – s ənta da da nəha da əmərədda – as aytedan win sər-i wər nəzzəgzan ad aslin y əməsli ən Barar ən Məşşina, amaran win das-əslanen əkkəwanan-as ad əgrəwan təməddurt ta təylalat. ²⁶ Fəlas əmmək wa daḡ as ihakku Abba təməddurt, əmmək wədi daḡ as ikfa Barar fərregat n a tat-ihakku ənta da. ²⁷ İkf-i deḡ turagat n əşşəriḡa y aytedan, fəlas nak Ag Aggadəm a mosa. ²⁸ Ad wər əqqənan ḡafawan-nawan y arat wa: ilkâm a d-awəd alwaq a daḡ z'aslin nəmməttan kul daḡ zəkwan-nasan, y əməsli-nin nak Ag Aggadəm ²⁹ əgmədan-du izəkwan-nasan əddi da. Win əganen aratan olaynen, a d-əgmədan izəkwan y a d-ənkəran daḡ təmattant əgrəwan təməddurt, win əganen

tækma amaran a d-əgmədan izəkwan y ad awwaddaban. ³⁰ Wər t-illa arat as əfragax igi-net gər-i əd man-in. Əššərixa wa tagga, əlkama daḡ-as y awa di-igannu Məššina, amaran əššərixa-nin oḡād, fəlas wər əlkema y arat wa əre nak iman-in, kalar arat wa ira wa di-d-izammazalan as əlkama.»

Šigəyyawen ən Ƴaysa

³¹ «As imos as nak ḡas-in as əggəyyeḡ i man-in, wədi təgəyya-nin wər təmos tidət. ³² Illat-tu wa di-imosan iyyat təgəyya, amaran əssānaḡ as arat wa igannu daḡ talxa-nin, tidət a imos. ³³ Təssəḡlam inammazalan əs Yaxya, iggəyyat-asan fəl arat wa imosan tidət. ³⁴ Nak wər əddəraray əs təgəyya n awedan. Arat wa, wər tu-gənnay ar fəl ad təgrəwam təsureft. ³⁵ Yaxya zun fətəla tərḡât təbilazlaz a imos, amaran təqbalam ad tagim arat n assaxat ən tədəwit daḡ ənnur-net. ³⁶ Nak amaran əle təgəyya togarat ta n Yaxya assahat: Əššəḡəlan win tagga, a tan-imosan win as di-issəwar Abba igi-nasan, əntanay a əmosnen təgəyya-nin, sitaddan as Abba di-d-izammazalan. ³⁷ Abba iman-net s ənta a di-d-izammazalan, ənta da iggiyyat-i. Wər kala ad təslam y əməsli-net wala deḡ tənāyam azzat-net. ³⁸ Amaran wər iha awal-net iwallan-nawan, arat wədi isitadd-ay iba n əzəḡzan-nawan əs wa d-izammazal. ³⁹ Tətaggam y Awal ən Məššina təḡaray təgat s ənnəzər fəlas təḡilam a sər-əs təgrəwam təməddurt ta təḡlalət. Awal wa təḡarrim da, ənta iman-net as fall-i iggəyyat, ⁴⁰ eges wər tərem a di-du-takkim y ad təgrəwam təməddurt.»

⁴¹ «Nak wər gəmməyay ətəwəsəḡmar ḡur aytedan. ⁴² Əzdāyaq-qawan: əssānaḡ as iman-nawan wər tan-təha tara i Məššina. ⁴³ Nak Abba-nin a di-d-issəḡlan mišan wər tərem əlqəbulat-in. Amaran as kawan d-osa awedan iyyan a d-iglān gar-es əd man-net, a tu-təqbəlam! ⁴⁴ Tərām ad tətīnəməsəḡmiram gar-ewwan, eges wər tərem saḡmar wa d-ifalan Məššina di n iyyan. Daḡ adi manəmmək as za təzzəḡzanam? ⁴⁵ Ad wər təḡilam a kawan-əssəwəra lahan ḡur Abba-nin. Ənnəbi Musa ənta kawan z'issəwəran lahan, ənta wa daḡ təgam attama-nawan. ⁴⁶ Ənnar təzzigzanam əs Musa, təzzəḡzanam sər-i nak da, fəlas immigrad sər-i daḡ Əlkəttaban-net. ⁴⁷ Mišan dad imos as wər təzzəḡzanam s Əlkəttaban-net, manəmmək as za təzzəḡzanam awa ganna?»

6

Əsətši wa iga Ƴaysa i səmmos gim n aləs

¹ Dæffer adi ikka Ƴaysa tægadamayt ta hadat n agaraw wa n Galilaya, itâwann-as deƷ agaraw wa n Tiberæyad. ² Tælkâm-as tamattay tagget, fêlas æhannayan aytedan alƷalamaten ŝin as itamazal æmosnen æmmæk was izuzæy imiranen. ³ Iggæzzay Ƴaysa adƷaƷ, tæzzar iqqim den da ænta æd nættulab-net. ⁴ As itaggu awen amud wa n Akkay ihoz-du.

⁵ Iswad Ƴaysa inay tamattay tagget tæzây-t-idu, inna i Filibus: «Mæni du-za-nazzanzu tagëlla ætŝan aytedan en kul?» ⁶ Æsæstan wa as t-iga Ƴaysa da issân arat was otas igi-net. A ira Ʒas ad issæn awa das-z-annu Filibus. ⁷ Inna Filibus i Ƴaysa: «Kud du-næzzænza tagëlla æn sanatat tæmad æn tafelt, almaƷna alxaq æn sanatat tæmad n æzæl n æŝŝæƷæl, da wær dasan-tækna arat.» ⁸ Inn-as ænattalib-net igân Andrawæs wa n amadray æn SimƷon Butros: ⁹ «Illa barar da ilân sæmmosat tægælwen n æŝŝæƷir d æŝŝin kifitan, miŝan ya ma za aknin y aytedan ogdânen d awa?»

¹⁰ Inna Ƴaysa: «SaƷƷamiwat tamattay kul.» Tæzzar æqqiman aytedan kul daƷ yel aggen illân den. Sæmmos gim n alæs a æhanen tamattay en. ¹¹ Idkal-du Ƴaysa ŝigælwen ŝin den. As iga igodan i Mæŝŝina, izun-tanat i tamattay. Iga awen da i kifitan. Igraw awedan kul awa das-igdan. ¹² As æyyæwanan aytedan inna Ƴaysa i nættulab-net: «ŝidæwat-du ikarammutan win du-tawaglaznen, fæl a daƷ-as wær iƷŝæd wala.» ¹³ ÆƷradan-du ækæmmi æn karammutan win d-æglazan aytedan daƷ tægælwen n æŝŝæƷir ŝinad æn sæmmosat a. Maraw æzmaman d æŝŝin a d-ædnayan daƷ gælzan en.

¹⁴ As ænayan aytedan win alƷalamat tas immozal Ƴaysa da, ad gannin: «Igmâd aŝŝak as alæs wa ænta a imosan ænnæbi wa du-z-asin æddænet!» ¹⁵ Issan Ƴaysa as aytedan win abbaz a tu-z-agin ŝæhhæŝælan-tu tiŝit n æmænokal, ilas-tan efel, ikka edag iyyan daƷ ædƷaƷ en da, Ʒas-net.

ÆƷwæнки wa iga Ƴaysa fæl aman

¹⁶ As tæga takæst zagadayan nættulab-net s agaraw, ¹⁷ æggazan aƷlal æssæwalan agaraw y ad æƷræsan æs taƷræmt ta n Kafarnahum. Itaggu awen ehad, Ƴaysa amaran wær tan-in-ewed harwa da. ¹⁸ Igar-du aƷu issohen ad tanastaban aman n agaraw. ¹⁹ As ægan nættulab æn Ƴaysa edag æn sæmmos kilawtan madæƷ sædis n æŝikæl, oggan Ƴaysa daƷ ihæz ijiwankat-du fæl aman izay-du aƷlal wa han, tæzzar tæggaz-tan tasa. ²⁰ Miŝan inn-asan Ƴaysa: «Tægmædet-kawan tasa, nak awa!» ²¹ Gammayan d a t-id-æzzugæzan aƷlal den da, as dær-san ewad æƷlal edag wa ækkan.

Yaysa a imosan amensay wa ihakkin tæmæddurt

²² As æzæl wa hadan tægr-in tamattay ta tæwarat efay n agaraw wen sen as aylal iyyanda ɣas a illan den ændazæl, amaran æssanan as Yaysa wær inamaggaz aylal wa æd nættulab-net. Æssânan ænta da as inættulab-net ɣas-nasan as æglan. ²³ Ænzayan-du wiyyad a d-æfalten aɣræm æn Tiberæyad. Osan-du dagma n adag wa daɣ tætša tamattay tagælla dæffær godan win iga Yaysa y Æmæli. ²⁴ As tænay tamattay as Yaysa wær illa den ænta wala inættulab-net, tæggaz iɣlalan win den ægmayan Yaysa æs Kafarnahum.

²⁵ Osan-t-in fæl afay n agaraw wa hadan, tæzzar ænnan-as: «Ya Æššex, Æmmay du-tose da?» ²⁶ Ig-asan Yaysa aljawab wa, inna: «Æggæyye silakanay-awan as wær di-tæsæggædam ar fæl as tætšam tagælla har daɣ-as tæyyæwanam, wærgex aššaddat n ægærri n almaɣna n alɣalamaten šin æmmozaala a fæl di-tælkamam. ²⁷ Ayyat æššæɣæl daɣ agamay æn mensewan win ɣaššadnen, gammayat imensewan win wær næɣæššæd, hakkin tæmæddurt ta tæɣlalat. Imensewan win nak Ag Aggadæm a dawan-tan-z-akfin fælas nak a issæwar Mæššina di n Abba ejwal wa n taɣmar-net.»

²⁸ Æssæstanan-tu ænnan-as: «Mæni za arat was danaɣ-iwar a tu-nagu y ad naknu æššæɣælan win ira Mæššina?» ²⁹ Ijjæwwab-asan Yaysa inn-asan: «Æššæɣæl wa daɣ-wan ira Mæššina, wær t-imos ar ad tæzzægzanam æs wa d-issægla.» ³⁰ Ælasan-tu æsæstan ænnan-as: «Ma tæmos za alɣalamat ta dana-za-tammazala fæl a sær-æk næzzægzan? Ma za taga? ³¹ Imarawan-nanay ætšan daɣ taneray amensay wa n Manna. Ænta da awa ænnan Ælkættaban daɣ batu tædi: "Iššætš-en amensay wa d-ifalan ijænnawan."»

³² Inn-asan Yaysa: «Æggæyyeɣ silakanay-awan as wærgæ ænnæbi Musa a kawan-ikfan amensay wa d-ifalan ijænnawan. Abba-nin ænta kawan-ikfan amensay wa d-ifalan ijænnawan, imos amensay wa n tidæt. ³³ Fælas amensay wa d-ifalan Mæššina ænta a d-igmadan ijænnawan, amaran ænta a ihakkin tæmæddurt y æddænet.» ³⁴ Ænnan-as: «Æmæli, amensay wædi hakk-anaq-qu faw.»

³⁵ Inn-asan Yaysa: «Nak a imosan amensay wa ihakkin tæmæddurt ta tæɣlalat. Wa di-d-ikkan wær das-ilkem ad t-iggaz gælæk, amaran wa sær-i izzægzanan wær daɣ-as ilkem ad t-iggaz fad. ³⁶ Mišan ænnæɣ-awan: tænayam-i eges wær tæzzægzanam.

³⁷ Awedan kul wa di-ikfa Abba a di-d-asu, amaran wær za mælællæya fæl i di-d-ikkan, ³⁸ fælas æzæbbi a d-æge

dağ ijənnawan fəl ad ammazala s arat wa ira wa di-d-issəglan, wərgex arat wa əre nak iman-in. ³⁹ Ənta wa di-d-izammazalan wər ira ad ixrək awedan waliyyan dağ win di-ikfa, kalar a ira a tan-d-əssənkəra dağ təmattant əzəl a ilkaman. ⁴⁰ Awalla, ənta da awa ira Abba-nin: Aytedan kul win di-ənaynen nak Barar-net, əzzəgzanan sər-i, əntanay a z'əgrəwnen təməddurt ta təxlalat, əssənkəraq-qan-du dağ təmattant, əzəl wa ilkaman.»

⁴¹ Təzzar ad tigətəntinan Kəl-Əlyəhud əhân batu-net fəl as inna: «Nak a imosan amensay wa d-igmadan jənnawan.»

⁴² Gannin: «Awak awen wərge Ƴaysa wa n ag Yusəf, nəkna təməzdəyt n abba-net d anna-net, manəmmək as du-z-inkər əmərədda ad igannu ijənnawan a d-igmad?»

⁴³ Ijəwwab-asan Ƴaysa inn-asan: «Ayyiwat əgətəntən garəwwan. ⁴⁴ Wər t-illa i di-du-z-akkin ar s a t-id-ewây sər-i Abba a di-d-issəglan, nak amaran əssənkəraq-q-idu dağ təmattant əzəl wa ilkaman. ⁴⁵ Əlkəttaban n ənnəbitan ih-en as: "*Ketnasan a tan-isassayru Məşşina.*"

Awedan kul wa islan y Abba, iqbəl əsəssəxri-net wədi a di-d-akku. ⁴⁶ Wər t-illa is kala ad inay Məşşina di n Abba ar wa t-id-ifalan. Ənta xas a t-inayan.

⁴⁷ Əggəyyex əsilakanax-awan as i izzəgzanan ad igrəw təməddurt ta təxlalat. ⁴⁸ Nak a imosan amensay wa ihakkin təməddurt. ⁴⁹ İmarawan-nawan ətşan Manna dağ taneray mişan wər dasan-igdel awen təmattant. ⁵⁰ As iga awen amensay was ganna nak, ijənnawan a dağ d-igmad. I t-itşan wər tu-z-iba. ⁵¹ Nak a imosan amensay wa d-igmadan jənnawan ihakku təməddurt. Awedan kul wa itşan amensay wa ad iddər har faw. Amaran taxəssa-nin a təmosat imensewan win z'akfa fəl ad təgrəw əddənet təməddurt.»

⁵² Tənkər tamazaq təsohet gər Kəl-Əlyəhud ad gannan: «Manəmmək as dana-z-akfu awedan wa taxəssa-net natş-et?»

⁵³ Təzzar inn-asan Ƴaysa: «Awalla, əggəyyex əsilakanax-awan əs as wər tətşem taxəssa-nin nak Ag Ag-gadəm, taşwim dəx azni-nin, wər dawan-tu-təlla təməddurt ta təxlalat. ⁵⁴ Awedan wa itşan taxəssa-nin işwa ənta da azni-nin, wədi igrəw təməddurt ta təxlalat, əssənkəraq-q-idu dəx dağ təmattant əzəl a ilkaman. ⁵⁵ Fələs taxəssa-nin amensay wa n tidət a təmos, azni-nin dəx aman ən tassay win tidət a imos. ⁵⁶ Awedan wa itşan taxəssa-nin, işwa dəx azni-nin, wədi irtay dər-i, nak dəx əheç əwəl-net. ⁵⁷ Abba wa di-d-izammazalan ənta xur təlla təməddurt, amaran ənta a di-tat-ikfan, dağ adi wa itşan taxəssa-nin ad t-əssudəra nak da. ⁵⁸ Ənta əddi da amensay wa d-igmadan ijənnawan. Wər ola əd wa ətşan marawan-nawan fələs

wər dasan-igdel adi tēmattant. Awedan wa t-itšan, wədi ad igrəw tēməddurt ta təxlalat.» ⁵⁹ Arat da da wa inna ʔaysa daɣ ahan n əlɣibada ən Kəl-Əlyəhud daɣ əxrəm wa n Kafarnahum.

Efel wa əgan aytedan wiyyad dəffər ʔaysa, əlkaman-as wiyyad

⁶⁰ As əslan nəttulab-net aggotnen y arat wa inna da, ənnan: «Batu ta ši labasat, izzəwat əzəgzan-net. Ma ifragan əlqəbulat-net?» ⁶¹ Issan ʔaysa daɣ man-net as gitantanan nəttulab-net gar-essan daɣ talɣa ten, inn-asan: «Əngəm əzəgzan-nawan a tədas batu di? ⁶² Ma za tagim za as di-toggam nak Ag Aggadəm tagazzaya s adag wa əheɣ əstizarat? ⁶³ Infas wa Zəddigan a ihakkin tēməddurt. Awedan əs təɣəssa-net, wər imos wala. Awalan win dawan-əgeɣ, Infas a mosan, hakkin deɣ tēməddurt. ⁶⁴ Mišan əhân-kawan aytedan wər nəzzəgzan.» ʔaysa harwa ɣur tizarat da issân win wər nəzzəgzan, issân deɣ wa tu-z-agin daɣ fassan. ⁶⁵ Ilas inn-asan: «Adi da a fəl dawan-ənnə: "Wər t-illa i ifragan a di-d-akku ar s ad t-ikfa Abba fərregat n adi."»

⁶⁶ Den da dəffər-əs ifal a əggen daɣ nəttulab-net, əɣradan əd tidawt-net. ⁶⁷ Təzzar inna ʔaysa i nəttulab win maraw d əššin: «Meqqal kawanay da təram teklay?» ⁶⁸ Inn-as Simɣon Butros: «Əməli, ma imos wa za nakku? Kay a itaggan awalan win əhakkanen tēməddurt ta təxlalat. ⁶⁹ Nakkanay nəzzigzan sər-ək, nəssân as kay Əmizdag a d-ifâlan Məššina.» ⁷⁰ Inn-asan ʔaysa: «Ak wərgəɣ əsənnəfrən a kawan-əge ketnawan, fəl marawewwan d əššin, kuddeɣ âs iyyan daɣ-wan Iblis.» ⁷¹ Batu ta Yahuza wa n ag Simɣon Isxarəyuti a fəl tat-iga ʔaysa. Fəlas Yahuza a tu-z-agin daɣ fassan kuddeɣ âs iyyan daɣ nəttulab win maraw d əššin a imos.

7

Əlməsix iha tarrayt əs Yerusalam

¹ Dəffər adi issəwal ʔaysa d akal ən Galilaya, fəlas wər ira əsəwəl ən wa n Yahudəyya, id imuzaran ən Kəl-Əlyəhud a gammaynen əd tanayay-net. ² As itaggu awen əmud ən Kəl-Əlyəhud was itawannu wa n Təkarbanen ihoz-du. ³ Ənnan-as mədrayan-net: «Əfəl da takka akal wa n Yahudəyya fəl ad ənəyan nəttulab-nak əššəɣəlan win tətəgga. ⁴ Awedan as ira fall-as tagu masnat wər išəqqəl daɣ əssir. Dad zama as tətəggaɣ aratan ogdanen d awa, wədi agu təməwit ta fəl tan-z-inəy awedan kul.» ⁵ As das-gannin mədrayan-net awen da wər sər-əs əzzəgzanan. ⁶ Inn-asan ʔaysa:

«Assaxat ta-nin harwa da wər du-tewed. Kawanay amaran wər təzlayam assaxaten. ⁷ Wər t-illa əddəlil a fəl kawan-za-təgzər əddənet. Nak amaran əddənet təgzâr-i fəlas təgəyya a əmosa y arak mazalan win daɣ-as tagginen. ⁸ Akkiwat amud wen kawanay. Nak wər t-əkke fəlas assaxat-in harwa da wər du-tewed.» ⁹ As dasan-ıxrad tənna n aratan win, iqqim-du daɣ Galilaya.

¹⁰ Dər iga awen da ya as əkkan mədrayan-net amud, ikk-ay Ƴaysa ənta da, eges iki wa zun as iga daɣ əssir, fəlas wər issəkna iman-net y aytedan. ¹¹ Itaggu əmud den da gammayan-tu muzaran ən Kəl-Əlyəhud gannan: «Ma iga aləs a?» ¹² As itaggu awen tənkar təmazaq gər aytedan daɣ talɣa ən Ƴaysa. Wiyyad za gannan: «Aləs di olâɣ.» Wiyyad amaran gannan: «Kalar əsəxrək fadda a itaggu tamattay.» ¹³ Mişan wər t-illa awedan ihalan amagrad dat aytedan daɣ talɣa-net, fəl təksəda ən muzaran ən Kəl-Əlyəhud.

Assa ən Ƴaysa Ehan wa Zəwwəran n Əlyibada

¹⁴ As isaggaraygaray əmud ikka Ƴaysa Ehan wa Zəwwəran n Əlyibada a daɣ-as isasaxru. ¹⁵ Əsəssəxri wa iqqan ıxafawan ən Kəl-Əlyəhud wəllen har əqqiman gannin: «Wa ak awedan ma t-issosanan aratan win, ənta wər ıxra?» ¹⁶ Inn-asan Ƴaysa: «Əsəssəxri-nin wərge nak a d-ifal, kalar wa di-d-izammazalan a d-ifal. ¹⁷ Awedan kul wa iran ad ammazal tara ən Məşşina, wədi ad issən kud əsəssəxri-nin ənta Məşşina a d-ifal wala deɣ arat a imos a d-ənzama gər-i əd man-in. ¹⁸ Awedan wa işşewalan s aratan a d-inzâm gar-es əd man-net, wədi iman-net as igammay tanaya. Mişan awedan wa işɣalan daɣ əsənnəfiləl ən tanaya ən wa t-id-izammazalan, wədi tidət a immal, wər daɣ-as t-illa a imosan lahan. ¹⁹ Wərgəɣ ikf-iwan ənnəbi Musa Əlqanun? Wər kawan-iha za i das-ilkâman. Mafel as təram a di-tanɣim?» ²⁰ Ənnan-as aytedan: «Kay aggəsuf a kay-ihan. Ma iran tenaxay-nak?»

²¹ Inn-asan Ƴaysa: «Nak təlməxjujat iyyadda ɣas a əge daɣ əzəl ən təsənfawt, mişan əqqanan-as ɣafawan-nawan. ²² Kawanay wərgəɣ təşəqqalam daɣ əzəl ən təsənfawt fəlas bararan-nawan a daɣ-as təsəmənkadam? Amaran wər fall-awan imos awen lahan, fəlas ənnəbi Musa a dawan-t-innan – as iga awen imarawan-nana a t-id-əssəntanen, wərge Musa. ²³ Ənəyat za, dad imos as itawasamankad barar daɣ əzəl ən təsənfawt fəl ləkkum y əşşəriɣa wa n ənnəbi Musa, mafel as kawan-iha alham-in fəlas əgeɣ y awedan əzuzəy ikmâlan daɣ əzəl ən təsənfawt? ²⁴ Ad wər təxakkamam awedan s azzahir-net. Kalar xakkamat əs tidət.»

²⁵ As t-oggan arat day aytedan win Yerusalam ad gannin: «Awak aləs wen, wərgex ənta as əran muzaran-nana tenaxay-net? ²⁶ Amaran ənta den əmərədda išşewalan den dat awedan kul, wər t-illa i das-igannin wala! Awak immikkan imuzaran-nanax a sallakannen as ənta a imosan Əlməsix? ²⁷ As iga awen da za aləs wa nəssân akal wa d-igmad, Əlməsix amaran assaxa wa du-z-asu ənəfilal xas a du-z-agu, wər t-illa awedan a issânan da d-igmad.» ²⁸ Harwa da isasayru Yaysa day Ahan wa Zəwwəran n Əlyibada as idkal əməsli-net wəllen inna: «Təzdâyam-i təssânam sas d-əhe! As iga awen da ya wər d-ose gər-i əd man-in, kalar wa imosan tidət a di-d-izammazalan; amaran wər tu-təzdayam. ²⁹ Nak əzdayaq-qu, fəlas ənta sər-wan d-əfala, amaran ənta di-d-izammazalan.»

³⁰ Den da ad əgməyan muzaran ən tamattay d abbaz-net mişan wər tan-ihə i t-idasan, fəlas alwaq-net a du-wərnewed harwa da. ³¹ Aytedan aggotnen a əzzəgzannen əs Yaysa day tamattay en, gannin: «Tordâm as kud d-osa Əlməsix ifrâg əsəkni n alxalamaten ogarnen şin issəkna aləs wa?»

³² Arat wa simətəktikan aytedan day tamattay ta, əslantu Farisaytan. Ənkaran limaman win zawwarnen, əd Farisaytan əssəqlan-du iməgazan n Ahan wa Zəwwəran n Əlyibada y ad abəzan Yaysa. ³³ Inn-asan Yaysa: «Nak ad agax arat ən tamert əddewa dər-wan, dəffər adi amaran ad z'akka wa di-d-izammazalan. ³⁴ A di-təgməyam mişan wər di-za-təgrəwam fəlas edag wa z'akka wər təfregam ikinet.» ³⁵ Ad tinəməsəstinan Kəl-Əlyəhud, gannin: «Ma imos za adag wa z'akku daq-qu wər za nəgrəw? Meqqal Kəl-Əlyəhud win wazawaznen day kallan win tama a z'akku iggəz-tan? Məx ak aytedan win wər nəmos Kəl-Əlyəhud a z'isasayru? ³⁶ Ma imos almayna ən batu ta iga da, as inna: "A di-təgməyam mişan wər di-za-təgrəwam, fəlas wər təfregam iki n adag wa z'akka"?»

Aman win sidurnen

³⁷ As d-ewad əzəl wa ilkaman n əmud wa n Təkarbanen, s ənta a imosan əzəl wa zəwwəran day əmud en, ibdad Yaysa dat tamattay idkal əməsli-net inna: «Awedan kul wa iffudan akkiwet-i-du ad aşəw. ³⁸ Awedan kul wa sər-i izzəgzanan "ad əngəyan gərwan n aman win sidurnen day əwəl-net", s əmmək was iktab awen day Əlkəttaban.» ³⁹ Batu ta iga Yaysa den, Infas wa Zəddigan a sər-əs issoka, a z'əgrəwan aytedan win sər-əs əzzəgzannen. Ənta azzaman en Infas wa Zəddigan wər itawakfa harwa da fəlas Yaysa a wər nəggez tanaya-net.

Ɛmæzzəy gər aytedan

⁴⁰ As isla ades ən tamattay en i batuten šin iga Ƴaysa da ənnan: «Illikan as aləs wa ənta a imosan Ɛnnəbi wa ittəmalan!» ⁴¹ Ɛnnan wiyyad: «Ɛlməsix awa!» Ɛnnan-asan wiyyad: «Manəmmək as du-z-igməd Ɛlməsix Galilaya?» ⁴² Awak Ɛlkəttaban wərgeğ a ənnan: "Ɛzzurrəyya ən Dawəd, əd təxrəmt ən Betalxam s ənta as kala dağ-as iğsar Dawəd, a du-z-igməd Ɛlməsix." ⁴³ Ɛmmək en dağ as təmməzray tamattay dağ talğa ən Ƴaysa. ⁴⁴ Wiyyad dağ-san ərân abbaz-net, mišan wər tan-iha is t-idas əfus-net.

⁴⁵ Ɛqlan magazan n Ahan wa Zəwwəran n Ɛlğibada əqqalan ilimaman win zawwarnen, əd Farisaytan. Osan in ɣas ənnan-asan: «Mafel wər t-idu-tewayam?» ⁴⁶ Ɛnnan-asan magazan: «Wər kala itawanay awedan igan awal wa iga aləs en.» ⁴⁷ Ɛnnan-asan Farisaytan: «Dağ adi kawanay da toyyam iman-nawan tətawasaxrakam?» ⁴⁸ Ɛssənat illay i sər-əs izzigzanan dağ-na? ⁴⁹ Wər sər-əs izzəgzan ar tamattay n aljahilan wər nəssen wala dağ awa ihan əššəriğa n Ɛttawret, as ketnasan təwâr-tan tulğant.» ⁵⁰ Innasan Nikodemos imosan iyyan dağ Farisaytan s ənta dinosan Ƴaysa dat awen: ⁵¹ «Ɛššəriğa-nana wər t-iha ad itəwəxkəm awedan iket wər iššewal, itəwəssən awa dağ iššokal.» ⁵² Ɛnnan-as: «Galilaya kay təlät kay da? Aknu təğaray n Ɛlkəttaban ad tənəya kay iman-nak as wər t-illa ənnəbi a du-z-igmədan Galilaya.»

⁵³ Təzzar ikka awedan kul ehan-net.

8*Tantut ta təgat əzzəna*

¹ Ikka Ƴaysa adɣax as itawannu wa n Eškan ən Zaytun. ² As affaw ağôra iqqal Ehan wa Zəwwəran n Ɛlğibada, təzzar tək-kay-du tamattay ketnet. Iqqim a tan-isaşayru. ³ Iššewal den da as d-osan muşanan n Ɛttawret əd Farisaytan ewâyan tantut a d-əğdaran tətəggü əzzəna. Ɛssəbdadan-tat dat awedan kul, ⁴ ənnan i Ƴaysa: «Ya Ɛššex-nana, tantut a əzzəna a təga, amaran tətowanay tətəgg-ay. ⁵ Dağ Ɛttawret za a inna Musa: "Tantut zun ta, ilzâm a tat-əggaran aytedan əs təhun har tat-iba." Amaran kay ma tənne?»

⁶ Arat wa təmərkest a imos a das-əğân fəl ad t-əssəwəran lahan. Edag ân a dasan-ajjawwab Ƴaysa, inaz ad ikattab s adad-net fəl amağal. ⁷ Ɛqqiman ədgâzan-tu s əsəstan, as ihog ibdad-du inn-asan: «Inkəret-du dağ-wan was kala wər iga abakkad izaret əs taggor-net.» ⁸ İlas enez ad ikattab s adad-net fəl amağal. ⁹ Ɛslan i batu ta ɣas, mazazaran əqlan,

azzaran-asan win waššarnen. Iqqim-du Ƴaysa Ƴas-net ənta əd təntut ta nad, təbdād dat-əs.

¹⁰ Ibdad-du inn-as: «Tantut, ma əgan aytedan win kam-əbaznen? Wər tan-ihā i kam-ibāzan s əššəriḡa?» ¹¹ Tənn-as: «Waliyyan daḡ-san, Ɛməli-nin». Inn-as Ƴaysa: «Nak da za wər kam-z-abəza s əššəriḡa. Aglu təjəwəanke, mišan ad wər tələsaḡ igi ən bakkadan.»

Ƴaysa ənta a imosan ənnur n əddənet

¹² Ilas Ƴaysa awal i tamattay inna: «Nak a imosan ənnur n əddənet. Daḡ adi wa di-ilkaman ad igrəw ənnur wa isiduran, amaran iḡrād d ad ijiwankat daḡ šiyyay.»

¹³ Ənnan-as Farisaytan: «Təgəyya ən man-nak a təmosa, arat wa təgannaḡ əddi irkam wəllen.» ¹⁴ Inn-asan Ƴaysa: «Kud imos as təgəyya ən man-in a mosa da təgəyya-nin tidət a təmos fəlas əssāna sas d-əhe, əd sas ədaga. Kawanay amaran wər təssenam sas d-əhe, wala sas ədaga.

¹⁵ Kawanay azzahir Ƴas as təšarraḡam aytedan, nak amaran wər šərrəḡa waliyyan. ¹⁶ As iḡa awen da as fall-i d-osa adi, ad šarraḡa, amaran əššəriḡa-nin issohat, fəlas iddew dər-i Abba wa di-d-izammazalan. ¹⁷ Ɛššəriḡa-nawan iktāb daḡ-as əs təgəyya n əššin meddan a təmosat tidət.

¹⁸ Nak za təgəyya iyyadda a mosəḡ i man-in, təgəyya-nin ta n sanatat amaran Abba s ənta di-d-izammazalan a tat-imosan.» ¹⁹ Təzzar ənnan-as: «Mənid illa za Abba-nak?» Inn-asan Ƴaysa: «Wərmad di-təzdāyam za wər təzdayam Abba-nin. Ənnar di-təzdāyam təzdəyam Abba-nin.»

²⁰ Batuten šin itagg-enat Ƴaysa assaḡa wa daḡ isasaḡru daḡ Ahan wa Zəwwəran n Ɛlḡibada dagma n adag wa ihā əssənduḡ wa daḡ tiddawnat təkutawen. Mišan wər t-illa i igmāyan d abbaz-net fəlas alwaq-net a du-wər-newed harwa da.

Wər təfregam iki ən dad əkke

²¹ Ilas Ƴaysa inn-asan: «Nak teklay a z'aga. A di-təgməyam amaran a kawan-iba daḡ tišit ən nasbakkadan. Wər təfregam a din-tawədam edag wa əkke.» ²² Ad tinəmənnin arat daḡ Kəl-Ɛlyəhud gar-essan: «Məqqal iman-net a z'anḡu, fəlas a inna wər nəfreg a din-nawəd edag wa ikka.»

²³ Inn-asan Ƴaysa: «Kawanay aytedan n ares a təmosam, nak in afalla. Kawanay kəl əddənet a da a təmosam, nak wər di-təla əddənet a. ²⁴ A di da a fəl dawan-ənnə a kawan-iba daḡ tišit ən nasbakkadan. As wər təzzəgzanam as nak a imosan "Wa Illan da", wədi a kawan-iba əd tišit ən bakkadan.»

²⁵ Ənnan-as: «Ak ma təmosəḡ?» Inn-asan Ƴaysa: «Awa dawan-əmala ḡur tizarat har əmərədda ənta a mosa. ²⁶ Ɛllān-tu aratan aggotnen as

əfrâgax a tan-anna day talxa-nawan, əllân-tu dey aratan aggotnen as əfrâgax a kawan-awwaddaba fall-asan. Mişan wa di-d-izammazalan məşşis ən tidət a imos, amaran arat wa di-d-inna, xas a əmmala y əddənet.»

²⁷ Wər əgren as batu n Abba a day dasan-imməgrad.
²⁸ Inn-asan Yaysa: «As təgam iman-in nak Ag Aggadəm s əsəhhuki wa di-za-tagim fəl təgəttawt, ad təssənam as nak da a imosan "Wa Illan da", təssənam dey as wər t-illa a tagga gər-i əd man-in, arat wa di-isassaxra Abba xas a ganna.
²⁹ Wa di-d-izammazalan iddew dər-i. Wər di-oyya xas-in fəlas faw da arat wa das-igrazan xas a tagga.» ³⁰ Əslan aytedan aggotnen y awa inna Yaysa den əzzəgzanan sər-əs.

Win əmosnen əzzurrəyya n Ibrahim əs tidət

³¹ Inna Yaysa i Kəl-Əlyəhud win sər-əs əzzəgzannen: «As təbbərdagam y awa kawan-sassaxra, ad təqqəlam inəttulab-in win tidət, ³² təssənam tidət, tidət amaran ənta kawan-za-təsaddarfit.»

³³ Ənnan-as: «Nakkanay ya əzzurrəyya n ənnəbi Ibrahim a nəmos, wər kala day əddənet ad nəqqal eklan ən waliyyan, mafel təganna: "Ad taddarfem"?» ³⁴ Inn-asan Yaysa: «Əggəyyex əsilakanax-awan as awedan kul wa itaggin ibakkadan, wədi akli ən bakkadan a imos. ³⁵ Akli amaran wər das-t-illa adag ən faw day axaywan, mişan Barar wa eraw axaywan wədi edag-net ill-ay har faw. ³⁶ Day adi as kawan-isaddarfət Barar, wədi ad taddarfem əs tidət. ³⁷ Əssânax as əzzurrəyya n Ibrahim a təmosam, mişan təgammayam d ad tagim iman-in fəlas awal-in a wər nədes iwəllan-nawan. ³⁸ Nak arat wa ənaya xur Abba-nin a əmmala, amaran kawanay tətəggim awas təslam xur abba-nawan Iblis.»

³⁹ Ənnan-as: «Abba-nana ya ənnəbi Ibrahim a t-imosan.» Inn-asan Yaysa: «Ənnar tidət əs təmosam bararan n Ibrahim ad tətəggim imazalan win iga Ibrahim. ⁴⁰ Kawanay amaran əmərədda təgammayam əd tanaaxay-nin, nak imosan awedan a dawan-imməlan tidət s əmmək was di-tat-d-inna Məşşina. Arat wədi wər t-iga Ibrahim. ⁴¹ Imazalan win iga abba-nawan a tətəggam.» Ənnan-as: «Nakkanay wər nəmos iniba; wər nəla ar abba iyyanda a t-imosan Məşşina.»

⁴² Inn-asan Yaysa: «Ənnar Məşşina a imosan Abba-nawan tarim-i, fəlas Məşşina a d-əgmada, ənta a d-əfala, wərge gər-i əd man-in as d-ose, kalar ənta di-d-izammazalan. ⁴³ Mafel wər təgrem awal-in? Wər dawan-igdel əgərri-net ar as wər təfregam əsəsəm y as. ⁴⁴ Wər təlem day abbatan ar Iblis, amaran tərâm ad tassandim

deranan n abba-nawan. Harwa xur ənətti ad iqqal əməggi ən man, amaran wər ibded daɣ tidət, fəlas wər təha tidət əwəl-net. Igi ən bahu a imosan əttəbiɣat-net fəlas anasbahu a imos, imos deɣ abba ən bahu. ⁴⁵ Nak amaran tidət as tamagrada, adi da fəl di-wər-təzzəgzanam. ⁴⁶ Məni daɣ-wan wa ifragan ad aggayyat as kala ad əgeɣ abakkad? Kud tidət a əmmala mafel wər di-təzzəgzanam? ⁴⁷ Awedan imosan arat daɣ tamattay ən Məššina, əsəsəm a itaggu y awa inna Məššina. Kawanay amaran wər das-təsəsımam, fəlas wər təmosam tamattay ən Məššina.»

Yaysa d Ibrahim

⁴⁸ Təzzar ənnan Kəl-Əlyəhud i Yaysa: «Wərgəɣ kala ad nənna kay iyyan daɣ Kəl-Samarəya a təmosaɣ amaran ih-ik aggəsuf?» ⁴⁹ Inn-asan Yaysa: «Wər di-ihə aggəsuf, Abba-nin ɣas a əssəxmara, kawanay amaran wər di-təssəxmaram. ⁵⁰ Wər gəmməyaɣ tanaya i man-in. Ill-ay wa di-igammayan tanaya, amaran ənta a ixakkaman. ⁵¹ Əggəyyeɣ əsilakanax-awan as awedan wa ittəfan awal-in, wər ilkem ad inay təmattant.»

⁵² Ənnan-as arat daɣ Kəl-Əlyəhud: «Əmərədda ad nəkkas aššak as ih-ik aggəsuf! Ibrahim da aba-tu ənta harkid ənnəbitan kul, kay amaran təganna: "Awedan kul wa ittəfan awal-in, wər ilkem ad inay təmattant." ⁵³ Abba-nanax Ibrahim dā aba-tu: tordeɣ as togaraq-qu almaqam? Ənnəbitan dā aba-tan. Kay ma təxsabaɣ iman-nak?»

⁵⁴ Inn-asan Yaysa: «As imos as iman-in a fəl sanamala, wədi tanaya-nin wər tənfa wala. Abba-nin s ənta as təgannım imos Əməli-nawan, ənta a di-ihakkan tanaya, ⁵⁵ amaran wər tu-təzdayam, mišan nak əzdâyaq-qu. As ənne wər t-əzdaya, wədi ad əqqələɣ anasbahu ən šilat-nawan. Kalar əzdâyaq-qu, amaran əttâfaɣ awal-net. ⁵⁶ Abba-nawan Ibrahim imâl-tu əd tədəwit fəl as das-igmad aššak as ad inəy assa-nin, amaran inay-tu, ikn-ay awen əsəffəliwəs.» ⁵⁷ Ənnan-as Kəl-Əlyəhud: «Kay wər teweda wala səmmosat təmərwen n awatay eges tənne tənâyaɣ Ibrahim?» ⁵⁸ Inn-asan: «Əggəyye silakanax-awan as dat təhəwt n ənnəbi Ibrahim da nak əmosa "Wa Illan da".» ⁵⁹ Təzzar ad takammen šihun y a das-agin zabaw, mišan ya igmad-tan daɣ tamattay, irdaɣ afarag n Ahan wa Zəwwəran n Əlyibada.

9

Əzuzəy wa iga Yaysa y awedan a d-ihəwan əd taddaryalt

¹ Ijiwankat Ƴaysa as inay aləs s as d-ihəw da iddiryal.
² Əssəstanan-tu nəttulab-net ənnan-as: «Əşşex, mafəl d-ihəw aləs a əd taddarxalt? Awak əddəlil n abakkad-net, meyx ak abakkad ən marwan-net?»
³ Inn-asan Ƴaysa: «Wərmad iddiryal fəl əddəlil n abakkad-net, wala dey abakkad ən marwan-net. Wər d-ihəw əd taddarxalt ar y a sər-əs təwənəyan igitan ən Məşşina.
⁴ Iwâr-anax ad naknu əşşəxələn ən wa di-d-izammazalan iket di ad iga azal, fələs ehad izay-du, amaran wər t-illa i dağ-as ifragan əşşəxəl.
⁵ Iket əhey əddənet əmosax ənnur n əddənet.»

⁶ As iga batu ta, issotaf dağ amaçal, iga arat ən talaq əs mətman-net, issələl-tat i şittawen n əmədderyəl en,
⁷ inn-as: «Aglu takka təxazart ta n Siloxam təşşirəda dağ-as udəm-nak.» (Siloxam almağna-net anammazal.) Iгла əmədderyəl išşorad udəm-net, as d-iqqal da ihannay.

⁸ Ad gannin mahharagan-net, d aytedan win t-ənaynen dat awen imos əmədderyəl itansayan: «Ak awen wərgəx aləs was faw iqqim itansay?»
⁹ Wiyyad gannin: «Ənta dağ awen.»
 Wiyyad ənta da gannin: «Kala, tulat ɣas a dər-əs iga.»
 Ənta amaran iganu: «Nak dağ awa.»
¹⁰ A tu-sastanan gannan-as: «Məni təməwit tas təgrawax asawad-nak?»
¹¹ Igann-asan: «Aləs as gannin Ƴaysa, a igan arat ən talaq, təzzar issələl-tat i şittawen-in, inn-i ad aglay əşşirədağ udəm-in dağ təxazart ta n Siloxam. Eglex əşşoradaq-qu ɣas, əgrawax asawad-in.»
¹² Ənnan-as: «Ma iga za aləs wədi?»
 Inn-asan: «Wər əssəna.»

¹³ Əlwayan aytedan win aləs was kala ad imos əmədderyəl da əs Farisaytan.
¹⁴ Ənta əzəl ən təsanfawt ən Kəl-Əlyəhud a dağ iga Ƴaysa talaq, issəsəwad əmədderyəl wen.
¹⁵ A tu-sastanan Farisaytan əntanay da əd təməwit tas igraw asawad-net. Inn-asan: «Arat ən talaq a issələl şittawen-in, əşşoradağ udəm-in, əswada.»
¹⁶ Ad gannin arat dağ Farisaytan: «Aləs wa igan arat wa, wər d-ifel Məşşina fələs wər isassahat əzəl ən təsanfawt-nana.»
 Ənnan wiyyad: «Aɣalamaten şin, manəmmək as tanat-z-agu awedan imosan anasbakkad?»
 Təzzar iga əməzrəy garəssan.
¹⁷ Əlasan əsəstan n aləs was kala ad idderyəl ənnan-as: «Kay a innan izzozay-kay aləs dağ taddarxalt, əməl-anax was tordey as imos-tu.»
 Inn-asan: «Ənnəbi a imos.»

¹⁸ Eqlan Farisaytan wər əzzəgzanan as aləs wa kala ad idderyəl har du-sassaxran imarwan-net.
¹⁹ Ənnan-asan: «Ak ənta da da barar-nawan was tənnam as d-ihəw da iddiryal? Məni təməwit tas igraw asawad-net əmərədda?»
²⁰ Ənnan-asan marwan n aləs: «Nəssân as barar-nanax a imos, nəssân ənta da âs as d-ihəw da iddiryal,
²¹ mişan wərmad nəssân təməwit tas igraw asawad-net, za wala

dey awedan wa t-issəswardan. Səstənat-tu iman-net, fəlas aləs waşşaran a imos ifragan ad ammagrad day talxa ta tu-təqqalat.» ²² Batu ta wər tat-əgen marwan-net ar fəl təksəda ən muzaran ən Kəl-Əlyəhud fəlas tənna a gan awedan kul wa iggəyyen as Ƴaysa a imosan Əlməsix, wədi ad t-əkkəsən day əljəməyat n ahan n əlxibada ən Kəl-Əlyəhud. ²³ Awen da fəl ənnan marwan-net: «Tuşaray-net təşişawad-tu a dawan-ammagrad day talxa ta tu-təqqalat, səstənat-tu.»

²⁴ Əlasan-du Farisaytan teşaray n aləs was kala ad iddərşal ənnan-as: «İksad Məşşina təməla tidət. Nakkanay nəssân as aləs di anasbakkad.» ²⁵ Inn-asan aləs wa: «Nak wər əssena kud anasbakkad a imos wala. Arat iyyanda Ƴas a day əssana, as kala ad əddərşala, əmərədda əhannaya.» ²⁶ Dəffər awen ənnan-as: «Ma imos arat wa dak-iga? Məni təməwit tas kay-issəsward?» ²⁷ Inn-asan: «Arat wədi ya əməlay-awan-tu mişan wər di-təzzəgzanam. Mafəl təräm a dawan-t-ələsəş emel? Meqqal ak kawanay da a təräm ad təqqəlam inalkiman-net ketnawan?» ²⁸ Əgan-as ərrəbdan ənnan-as: «Kay a imosan ənalkim-net, nakkanay inalkiman n ənnəbi Musa a nəmos. ²⁹ Musa nəssân as işşewal-as Məşşina, amaran aləs wədi wər nəssen sas d-ihə fadda.»

³⁰ Inn-asan: «Aləs wa wər təssenam wala sas d-ihə mişan izzozay-i day taddərşalt! Arat ya wa ənta a isammaklalan wəllen! ³¹ Təssânam as Məşşina wər iqəbbəl şiwatriwen ən nasbakkadan. Awedan wa das-ibbərdagan itamazal tara-net, ənta as iqqabbal şiwatriwen-net. ³² Wər kala ad itawasla awedan ipsiswardan iyyan a d-ihəwan əd taddərşalt. ³³ Ənnar du-wər-ifel aləs di Məşşina, wər z'ifrəş igi ən wala.» ³⁴ Hərəşşen-tu ənnan-as: «Ko! Adis kay was as du-təhəwa da təmosa təbəluləş n abakkad, kay a iran a dana-takfaş alfaydaten?» Təzzar əstəşan-tu.

Aytedan win əddərşalnen day batu ta təqqalat əddin

³⁵ As isla Ƴaysa əməzal wa igan da, iswad y aləs wen har t-igraw inn-as: «Awak təzzigzanəş sər-i Ag Aggadəm?» ³⁶ Inna aləs i Ƴaysa: «Əməl-i awa imos, Əməli-nin, fəlas areş a sər-əs əzzəgzəna.» ³⁷ Inn-as Ƴaysa: «Tənayaq-qu, amaran ənta da da dak-imməgradan da.» ³⁸ Inn-as aləs: «Day adi əzzigzanəş Əməli-nin.» Təzzar işşəjad-as.

³⁹ Amaran inna Ƴaysa: «Nak assa a d-əşəş əddənət y ad ammazalaş əşşərişə, əşwədan win wər nəhənnəy, addərşalan win hannaynen.» ⁴⁰ Əşlan arat day Farisaytan win dər iddew y awa inna da ənnan-as: «Day adi nakkanay da iməddərşal a nəmos?» ⁴¹ Inn-asan Ƴaysa: «Ənnar təmosam iməddərşal wədi wər kawan-iwer abakkad,

mišan dad imos as tægannim: "Nakkanay nəhannay", wədi iwâr-kawan abakkad.»

10

Yaysa ənta a imosan amadan wa olağan

¹ «Əggəyyeş əsilakanax-awan as: Awedan wa wər nəggez afarag n ayfəd s əmi was itawaggaz, itaraggat-t-idu, wədi abaydag a imos n ənarkab. ² Amaran wa d-iggazan s əmi n afarag, wədi ənta a imosan amadan n ayfəd. ³ Ənaşlif n afarag a das-z-aləman imi, aslinat ayfəd y əməsli-net, ad iyarru şin-net s esmawan-nasnat isardaş-qanat afarag. ⁴ As d-işrad ikus ən şin-net, a dasnat-izar, əlkəmnat-as, fəlas əzdâynat əməsli-net. ⁵ As iga awen awedan wa dasnat-imosan ənaftaş, wər das-z-əlkəmnat, ewef fadda a tu-z-aginət fəlas wər əzdaynat əməsli-net.» ⁶ Əlmital wa da, a dasan-iga Yaysa, mišan wər əgren almaşna n awa daş-san imməgrad da.

⁷ İlas Yaysa inn-asan: «Əggəyyeş əsilakanax-awan as nak a imosan imi was raddaşnat ayfəd. ⁸ Win dat-i d-osanen kul ibaydagan ən narkaban a mosan, amaran wər dasan-əssəsamnat ayfəd. ⁹ Nak a imosan imi n afarag. Wa sər-i d-iggazan ad afsu. İfrâş ad itaggaz iraddaş, igrəw əntada imensewan-net. ¹⁰ Abaydag wər d-itisu ar fəl şikra, d igi ən man d əhluk. Nak amaran ose-du fəl ad əgrəwan aytedan təməddurt, əgrəwan-tat da za əs təməwit wər nələ əddukad.

¹¹ Nak a imosan amadan wa olağan. Amadan wa olağan iman-net a ihakku fəl ayfəd-net. ¹² Mišan awedan wâs ayfəd wərgəş şin-net, ətəwəşfar şas a itawagga y a tanat-idən, wədi as ogga əridal izay-tanat-du, ad addaggag ayy-enat-in, abəz daş-asnat əridal awa ira, izəwwəziwəz-tanat. ¹³ Arat wa itagg-ay aləs wa fəlas ətəwəşfar şas a iga y əşşəşəl wa, wər izlay a əganat ayfəd. ¹⁴ Nak a imosan amadan wa olağan. Əzdâyaş ayfəd-in, ayfəd-in deş əzdaynat-i, ¹⁵ əs təməwit ta daş as di-izday Abba-nin, nak deş əzdâyaş-qu. Əkfəş iman-in fəl ayfəd-in. ¹⁶ Əleş ayfəd şiyad wər nəha afarag wa. Əntanatay da kundaba azzaraş-asnat, aslinat y əməsli-nin. Ayfəd-in kul ad ərtəynat əqqəlnat əsəgən iyyanda, ilân amadan iyyanda. ¹⁷ Abba ir-i fəlas iman-in a əkfe fəl a tan-ələsaş agaraw. ¹⁸ Wər t-illa i daş-i z'abəzan iman, kalar iman-in a əkfəş əs təradaş-in. Əleş fərregat ən tahakkay-nasan, əleş da fərregat n əsuşəl-nasan. Ənta da daş arat was di-omar Abba-nin s iga-net.»

19 Elasan Kəl-Əlyəhud əməzrəy dağ talxa n aratan win igannu Ƴaysa da. 20 A dağ-san aggen gannin: «Aləs wa aggəsuf a t-ihan! Awa əmeskel! Mafel təssisamam-as?» 21 Wiyyad gannin: «Awedan iha aggəsuf wər itəggu awal wa. Tordam as ill-ay aggəsuf ifrāgan əsəswəd ən məddərəl?»

Ƴaysa ənta a imosan Əlməsix, imos Barar ən Məşşina

22 Azzaman en tagrəst. Ewad-du əmud imosan isaktan n ətəwəzəzdağ wa iga Ahan wa Zəwwəran n Əlyibada dağ Yerusalam. 23 Itijəwənkit Ƴaysa dağ Ahan wa Zəwwəran n Əlyibada issiwal əd tarrayt təfəlat as itawannu «ta n Suliman.» 24 Ƴilayğalayan-tu Kəl-Əlyəhud win əllanən den gannin-as: «Kay ak har əmmay wər dana-tore dağ ağaf? Kud kay Əlməsix a təmosa, təzəluləxa-du da da tannağ-anaq-qu.»

25 Inn-asan Ƴaysa: «Əmālağ-awan, mişan wər di-təzzəgzanam. Imazalan win əge s esəm n Abbanin, əggəyyen-i, 26 mişan wər di-təzzəgzanam fəlas wər tətəbaqqəm dağ ayfəd-in. 27 Ayfəd-in əsallinat y əməslinin, əzdāyaq-qanat, amaran əlkâmnat-i. 28 Əkfeq-qanat təməddurt ta təğlalət, wər dağ-asnat təlkem təmattant, amaran wər t-illa i dağ-i tanat-z-irkəban. 29 Abbanin a di-tanat-ikfan, wər t-illa i wər oger. Amaran wər t-illa i tanat-z-irkəban dağ əfus-net. 30 Nak d Abba arət iyyanda a nəmos.»

31 Elasan-du sər-əs adakal ən təhun y ad t-anğin. 32 İlas Ƴaysa inn-asan: «Əssiknaq-qawan imazalan aggotnən olaynən a d-əfalnən Abba. Məni dağ-san wa fəl taram a di-tanğim?» 33 Ənnan-as: «Nakkanay wər nəra tenayay-nak fəl as təgeğ əmazal olağan, kalar əmadraw wa təgeğ əddi a fəl kay-za-nanxu. Kay wər təmosay ar aggadəm amaran tareğ ad tagay iman-nak Məşşina.»

34 Inn-asan Ƴaysa: «Awak wərgəğ iktâb dağ Əttawret as inna Məşşina: "*Kawanay təmosam imalan*"?»

35 Wər nəfreg a din-nəgər arət wa ihan Əlkəttaban. Esəm wa n malan, iğra sər-əs Məşşina aytedan win ikka awal-net. 36 Nak Məşşina a di-isannafranən izammazal-idu s əddənet. Manəmmək dağ adi as za tannim tagğay əmadraw fəlas ənnə: "*İmosa Barar ən Məşşina*"? 37 As imos as wər təgğay imazalan win as di-d-issəğla Abbanin y a tan-aga, a di-wər-təzzəgzənam. 38 Mişan dad imos as tagğaq-qan, wədi kud sər-i wər təzzəgzanam da, zəgzənat kuddeğ əs mazalan win tagğa, fəl ad təssənam, tassantim değ dağ əgərri n as Abba irtây dər-i, nak değ ertāya d Abba.» 39 Elasan agamay d abbaz-net, mişan igmad-tan.

⁴⁰ Ilaş Ƴaysa iki ən tēgadamayt ta hadat ən Yordan, dağ adag wa dağ issənta Yaxya əsəlməx n aytedan dağ aman, iqqim den da. ⁴¹ Osan-t-in aytedan aggotnen, gannin: «Yaxya wər iga alxalamat waliyyat, mişan aratan kul win danax-inna s aləs wa, tidət a mosan.» ⁴² Den dağ ad əzzəgzanan aytedan aggotnen əs Ƴaysa.

11

Iba ən Lazarəs

¹ Ill-ay aləs irinan igan esəm Lazarəs, ihan təxrəmt ən Betanəy s ənta a dağ təxsar Maryama əd Marta əmosnen şimədrayen. ² Maryama ta da a tənçalat alwardi fəl Əməli Ƴaysa, təmas idaran-net əs jəkkad-net. Amaran amadrəy-net Lazarəs a irinan den. ³ Əssokanat təmədrayen-net Ƴaysa əmazal as: «Əməli, əməri-nak irin.»

⁴ As isla Ƴaysa i salan win den, inna: «Təsəlkaht ən təwərna ten, wər za təqqəl təmattant ən Lazarəs, arat a təmos a z'assaknin tanaya ən Məşşina, isənnəfiləl-du əntada tanaya ta ila Barar ən Məşşina.» ⁵ Ƴaysa ira Marta wəllen, ənta əd təmadrəy-net, əd Lazarəs. ⁶ Isla təwərna-net, mişan iga dəffər awen əşşin adan wər igmed edag wa iha. ⁷ Dəffər adi inna i nəttulab-net: «Əndawat ad nəqqəl Yahudəyya.» ⁸ Ənnan-as nəttulab-net: «Əşşex-nana, imuzaran-nana wərge edes-nasan səket dâ da dâ gammayan əd tanaxay-nak, kay amaran tarex tewaxlay n akal wen?» ⁹ Inn-asan Ƴaysa: «Əzəl wərgey maraw alwaqan d əşşin a imos? As ijawankat awedan ezal, wər z'inəgərtəttəf, fəlas ihannay dat-əs. ¹⁰ Mişan as ijawankat awedan ehad, ad inəgərtəttəf, fəlas wər t-ihə ənnur.»

¹¹ As iga batu ta inna tolas: «Əmidi-nana Lazarəs insâ, ad aglay a t-id-əssənkəra.» ¹² Ənnan-as nəttulab-net: «Əməli, dad zamas insâ, wədi əngəm ad izzəy.» ¹³ Ənta Ƴaysa təmattant ən Lazarəs as dasan-imməgrad den, mişan əntanay a xilan etəs wa n alxadat as igannu. ¹⁴ Adi a fəl d-izalalay Ƴaysa inn-asan: «Lazarəs aba-tu. ¹⁵ Amaran isidawat-i as wər əlle den alwaq wədi, fəlas arat wa ənta sər-wan du-z-awəyan a sər-i təzzəgzənam. Əmərədda əndawatanaq-qu.» ¹⁶ Inkar Tuma was gannin Eknay, inna i nəttulab win hadatnen: «Əndawat nakkanay da a danax-iba nəddew dər-əs.»

Ƴaysa ənta a imosan tanakra dağ təmattant, imos təməddurt

¹⁷ As din-osa Ƴaysa ittəmal-as as Lazarəs iga əkkoz adan dağ əzəkka. ¹⁸ Betanəy təhoz Yerusalam. Edag ən karad kilawtan xas a illan gar-essanat. ¹⁹ Osan-in Kəl-Əlyəhud

aggotnen Marta əd Maryama fəl a dasnat-in-şəwwəşkənan dağ adag n amadray-nasnat.

²⁰ As təsla Marta as Ƴaysa ihoz-du təxrəmt, təssəlkad-as. Maryama ənta təqqim-in dağ aƳaywan. ²¹ Tənnə Marta i Ƴaysa: «Əməli, ənnar təlle da, wər z'iba amadray-nin. ²² Mişan əmərədda da əssanaƳ as arat kul wa təgmaya dağ Məşşina a dak-k-agu.» ²³ Inn-as Ƴaysa: «Amadray-nam a d-inkər dağ təmattant.» ²⁴ Tənn-as Marta: «ƏssânaƳ as amadray-nin a d-inkər Ƴur tanakra n aytedan əzəl wa ilkaman.» ²⁵ Inn-as Ƴaysa: «Nak a imosan wa d-isankaran dağ təmattant, əmosa təməddurt. Awedan wa sər-i izzəgzanan, wədi kud t-aba da a d-iddər. ²⁶ Amaran awedan kul wa iddaran izzigzan sər-i, wədi wər ilkem ad t-aba. TəzzigzanaƳ adi?» ²⁷ Tənn-as: «Awalla, Əməli, əzzigzanaƳ as kay a imosan Əlməsix, təmosa deƳ Barar ən Məşşina, as ittimal as a d-asu əddənet.»

Tanakra ən Lazarəs dağ təmattant

²⁸ As təga Marta batu ta, təkka təmadrayt-net Maryama, təwat-tat s ahal tənn-as: «Əşşex illa-da, isastan dər-əm.» ²⁹ As təgraw Maryama isalan win, təggad-du, təssəlkad i Ƴaysa. ³⁰ As itaggu awen harwa da wər d-iggez təxrəmt, wər igmed edag wa daq-q in-tosa Marta. ³¹ Əllân Kəl-Əlyəhud Ƴur Maryama a das-du-şiwaşkannen. As tat-ənayan as du-təggad tarmad təqqab, əlkaman-as əxilan əzəkka a təkka y a fall-as təhallu.

³² As din-tosa Maryama edag wa iha Ƴaysa togg-ay Ƴas təfataqqat Ƴur daran-net, tənn-as: «Əməli, ənnar təlle da, wər z'iba amadray-nin.» ³³ As tat-inay Ƴaysa təhallu, inay Kəl-Əlyəhud win dər-əs d-əddewnen əntanay da əhallin, ikna tərəmməq, əxşadan man-net. ³⁴ Inn-asan: «Məni tu-təgam?» Ənnan-as «Əməli, ayaw tənəya.» ³⁵ Ad ihallu Ƴaysa. ³⁶ Ənnan aytedan: «Ənawat awa dər togda tara ta iga y aləs wa.» ³⁷ Təzzar ənnan wiyyad dağ-san: «Aləs wa issəswadan əmədderxəl, wərgex ifrâg a ad igdəl i Lazarəs təmattant?»

³⁸ İlas Ƴaysa tərəmməq, təzzar ikka əzəkka imosan akazam, tədbâx təhunt zəwwərat. ³⁹ İnnə Ƴaysa: «Əkkəsət təhunt!»

Tənn-as Marta ta n tamadrayt n aləs wa aba da: «Əməli, aləs di əmərədda ila ađu, fəlas əzəl-net wa n əkkoz d anabal awa.» ⁴⁰ Inn-as Ƴaysa: «Wərgex ənnex-am as təzzəgzana ad tənəyaƳ tanaya ən Məşşina?» ⁴¹ Tətawakkas-du təhunt. İswad Ƴaysa dağ jənnawan inna: «Abba, əggodayaƳ-ak as di-təqbala təwatray-nin.

⁴² Nak iman-in əssânaḡ as faw da təqqabbala šiwatriwen-in. Əddəlil ən tamattay ta di-təḡalayḡalayət da a fəl dak-əššewala fəl ad təzzəgzən as kay a di-d-izammazalan.» ⁴³ As iga təwatray ta, idkal əməli-net inna: «Lazarəs, əgmədu!» ⁴⁴ Igmədu ənəmməttən wa nad, əttâlan fassan-net əd daran-net əs təsəwad, təlsa deḡ təbdoḡ udəm-net. Inn-asan ḡaysa: «Əkkəsət-as itul tayyim-tu ad ijəwənkət.»

Šimərkas šin tanəḡay ən ḡaysa

⁴⁵ Kəl-Əlyəhud aggotnen a d-osânen Maryama, ənayan arət wa, əzzəgzanan əs ḡaysa. ⁴⁶ Wiyyad daḡ-san amaran əkkan Farisaytan əmalan-asan awa iga ḡaysa da. ⁴⁷ Təzzar sassagan limaman win zawwarnen, əd Farisaytan əmənəy ən muzaran ənnan: «Ma za nagu? Aləs wa itaggu aḡalamaten aggotnen.» ⁴⁸ As tu-noyya itaggu aratan win, a sər-əs əzzəgzənan aytedan kul, təzzar asin-du sojitan ən Kəl-Ərrum a dana-sitəḡmarnen, addəgdəgan Ehan wa Zəwwəran n Əlyibada, əḡrədan deḡ tenəḡay ən tamattay-nana. ⁴⁹ Inkar-du iyyan daḡ-san igân esəm Kayif, imosan Əlimam wa Zəwwəran daḡ awatay wen, inn-asan: «Kawanay wər təgrem wala. ⁵⁰ Wər din-təgrem as ofa ad ammat awedan iyyanda daḡ adəḡ ən tamattay n Israyil ketnet?» ⁵¹ Batu ta iga da wər tat-iga gar-es əd man-net, kalar tišit-net Əlimam wa Zəwwəran daḡ awatay wen, a fəl igraw əlwəlayət n as ḡaysa kundaba immut daḡ adəḡ ən tamattay ketnet. ⁵² Amaran wərge tamattay n Israyil ḡas as tu-z-iba daḡ adəḡ-net, kalar bararan ən Məššina kul win wazawaznen gər k Allan a du-z-iššidəw əqqəlan təḡəssa iyyadda.

⁵³ Əzəl wen da daḡ əgan muzaran ən Kəl-Əlyəhud tanat ta n tanəḡay-net. ⁵⁴ Awen da fəlas ab'as itallam ḡaysa dad ira daḡ Kəl-Əlyəhud. Igmədu akal wen, ikka əḡrəm igân esəm Efrayim iniməhazan əd taneray, iqqim daḡ-as ənta əd nəttulab-net.

⁵⁵ Azzaman en amud ən Kəl-Əlyəhud wa n Akkay ihozdu. A du-gammadan aytedan idəḡgan aggotnen takkin-du Yerusalām, fəl ad əzzəzdəgan dat əmud. ⁵⁶ Səḡḡadan i ḡaysa tinəməninin gar-essan daḡ Ahan wa Zəwwəran n Əlyibada: «Kawanay ak ma tənnam, tordâm as a d-asu amud a meḡ?» ⁵⁷ Ənta ilimaman win zawwarnen əd Farisaytan omâran aytedan s âs i issanan edəḡ wa iha ḡaysa isaffəḡget-tu fəl ad attarmas.

12

Ətəwəḡal n alwardi fəl ḡaysa daḡ Betanəy

¹ Sədis adan dat Əmud wa n Akkay ikka Ƴaysa Betanəy, s ənta daƷ ixsar Lazarəs wa d-issodar daƷ təmattant. ² As din-osa Ƴaysa tawagƷan-as mægura olaƷnen. A du-tətaway Marta imensewan, Lazarəs amaran iha aytedan win naƷamanen əd Ƴaysa ədrāwan dər-əs. ³ Təzzar tədkal-du Maryama aganna ən litər n alwardi iknan šizada d əzzəwi as itawannu nar, a tu-tənaqqal fəl daran ən Ƴaysa, təmmas-tan əs jəkkad-net, idnay ahan ađu n alwardi. ⁴ Inkar Yahuza Isxarəyuti wa n iyyan daƷ nəttulab ən Ƴaysa was ənta tu-z-agin daƷ fassan inna: ⁵ «Mafel wər din-nəzzənza alwardi wa azrəf a z'awədan karadat təmad n əzəl n əššəƷəl nakf-ay i tələqqawen?» ⁶ Arat wa wər t-inna fəl təhanint i tələqqawen, kalar abaydag a imos, amaran ənta a ittafan əssənduq wa itaggaz əzrəf ən nəttulab, idakkal daƷ awa t-ihan. ⁷ Eges ya inna Ƴaysa: «Ayy-et! Alwardi wa kala da togāz-tu y əzəl wad za təwəga daƷ əzəkka. ⁸ Šiləqqawen faw da əllānat Ʒur-wan, nak amaran wərgəƷ faw əlle Ʒur-wan.»

Assa ən Ƴaysa aƷrəm ən Yerusalam

⁹ Təsla tamattay tagget ən Kəl-Əlyəhud as illa Ƴaysa den təzzar əkkan ehan wen, mišan wərgə Ƴaysa Ʒas din-əkkan, kalar awnaf a tan-ihan ən Lazarəs wa d-issənkər daƷ təmattant. ¹⁰ Təzzar əkkasan-du limaman win zawwarnen tanat n ad anƷin Lazarəs ənta da, ¹¹ fəlas əddəlil-net a fəl dəffər-san əfalan Kəl-Əlyəhud aggotnen əzzəƷzanan əs Ƴaysa.

¹² As affaw əslan aytedan aggotnen a d-əkkanen amud, as Ƴaysa iggaz-du aƷrəm wa n Yerusalam. ¹³ Ədkalan-du ilədlad ən tagayt əƷlan əssəlkadan-as gannin s afalla:

«Ozana! Təmmal i Məššina!

Iga Məššina albaraka daƷ

wa d-osan s esəm n Əməli!

Kay əmənokəl n Israyil!»

¹⁴ Igraw Ƴaysa əhulel, iwan-tu, s əmmək wa əmalan Əlkəttaban as ənnan: ¹⁵ «Ad wər təššəwəša ya wəlat Səyon, əmənokəl-nam əddi a din-izayan əddi, iwān əhulel.»

¹⁶ Arat wa wər t-əƷren nəttulab-net daƷ tizarat, mišan as igraw Ƴaysa adkul-net, əktan-du as aratan win əməlan-tan Əlkəttaban, amaran kul əndan fall-as.

¹⁷ Tamattay ta təmməƷnet assaƷa wa daƷ d-iƷra Ƴaysa Lazarəs daƷ əzəkka issənkər-t-idu daƷ təmattant, təƷəyyat-as. ¹⁸ Awen da fəl das-du-təssəlkad tamattay, fəlas əslān aƷalamat ta iga. ¹⁹ Təzzar ad tinəmənnin Farisaytan Ʒar-essan: «TogƷām-tu? Indar-awan a dər t-in-təkkam, har as aytedan kul əlkaman-as.»

Emel wa iga Ƴaysa tɛmattant-net

²⁰ Ellan-tu arat ɛn Kɛl-Ƴlyunan ɛhanen aytedan win d-ɛkkanen Yerusalem y a daɣ-as ɛɣbɛdan Mɛššina daɣ adan en da n ɛmud en. ²¹ Ƴkkan iyyan daɣ nɛttulab ɛn Ƴaysa igan Filibus wa n tɛɣrɛmt ɛn Betsayda ta n akal ɛn Galilaya, ɛnnan-as: «Nɛɣmay daɣ-ak a dana-tassakna Ƴaysa.» ²² Iɣla Filibus imal y Andrawɛs, iddew dɛr-ɛs Andrawɛs ɛmalan i Ƴaysa. ²³ Inn-asan Ƴaysa: «Alwaq ewad-du ɛmɛrɛdda wa daɣ z'ɛɣrɛwa nak Ag Aggadɛm adkul-in. ²⁴ Ƴɣɣɛyyɛɣ ɛsilakanay-awan as tablalt n alkama as wɛr tɛrtɛk daɣ amaɗal tɛmmut, ad taglu tɛmos iyyadda, mišan as tɛmmut a du-tɛdwɛl, tagu ara aggen. ²⁵ Awedan wa iran iman-net daɣ ɛddɛnet ta ad affatu daɣ alaxirat. Amaran wa irdan ad isaffatu iman-net daɣ ɛddɛnet ta, wɛdi wɛr tu-z-ɛɣmɛdan, kalar ad igrɛw tɛmɛddurt ta tɛɣlalat. ²⁶ Awedan kul wa iran a di-išɣɛl, ilkɛmet-i, as iga adi edag wa ɛhɛɣ ɛnta a z'iggɛz, akf-ay deɣ Abba-nin almaqam.

²⁷ Ƴmɛrɛdda ɛɣšɛdan man-in. Ma z'anna? Awak ad anna: "Abba saf-s-i daɣ assayɛt ta? Mišan wɛr d-ewedaɣ alwaq wa, ɛr y a fall-i agu. ²⁸ Abba, sɛnnɛfilɛl tɛla-nak tanaya."» Tɛzzar igmad-du ɛmɛsli ijɛnnawan inna: «Tɛla-nin tanaya ɛsinafalalaq-qat, amaran a tat-ɛlɛsɛɣ ɛsɛnnɛfilɛl.»

²⁹ Tamattay ta tɛllat den, tɛsla y ɛmɛsli wa, a tɛɣil eggag. Ad ɛgannin wiyyad: «Angalos das-iššewalan den.» ³⁰ Inn-asan Ƴaysa: «Ƴmɛsli wa wɛrɣɛɣ ɛddɛlil-in a fɛl d-iga, kalar ɛddɛlil-nawan kawanay. ³¹ Ƴmɛrɛdda ad za tɛtɛwɛɣkɛm ɛddɛnet ta, itɛwɛstɛɣ ɛmɛnokal-net Iblis. ³² Amaran nak as tawasahake fɛl amaɗal ɛwara tɛgɛttawt, a d-aɣraɣ aytedan kul ɛs man-in.» ³³ Batu ta isidagan sɛr-ɛs tɛmɛwit tas tu-z-iba.

³⁴ Tɛnn-as tamattay: «Nɛnɛy daɣ Awal ɛn Mɛššina as Ƴmɛsɣ ad agu tɛmɛddurt tɛɣlalat. Manɛmmɛk amaran as dana-za-tannaɣ Ag Aggadɛm ad itɛwɛsɛhukɛt fɛl amaɗal? Ma imos Ag Aggadɛm was tɛgannaɣ ɛddi?» ³⁵ Tɛzzar inn-asan Ƴaysa: «Ƴnnur harwa da illa ɣur-wan, har agin arat n azzaman. Jɛwɛnkɛtat iket di ad t-illa fɛl a kawan-wɛr-ɛɣdɛrnat šiyyay, fɛlas wa ijawanken daɣ šiyyay, adi wɛr issen sas idag. ³⁶ Zɛgzɛnat s ɛnnur harwa togazam, fɛl ad tɛqqɛlam kɛl ɛnnur.»

As iɣrad Ƴaysa igi ɛn batu ta igguk-kan, ikka edag wɛr ɛssenɛn.

Tɛzɛrɛst n ɛššɛɣɛl wa iga Ƴaysa dat awedan kul

³⁷ Alɣalamaten aggotnen šin iga Ƴaysa dat-san, wɛr sɛr-san d ewaynat as sɛr-ɛs ɛzzɛgzɛnan, ³⁸ fɛl ad tandu batu ta

iga ənnəbi Isayas as inna: «*Əməli, ma imos wa izzəgzanan s arat wa nəmal? Ma imos was tənafalal tarnə n Əməli?*»

³⁹ Əddəlil wa fəl wər əfregan ad əzzəgzanan da imaltu ənnəbi Isayas as inna: ⁴⁰ «*Məşşina a tan-isaddarxalan, issəyar iwəllan-nasan, fəl ad ib'as hannaynat şittawennasan, ib'as garrin wallan-nasan, fəl ad wər utaban, izzuzəytan.*»

⁴¹ Aratan win inn-en Isayas fəlas inây tanaya ən Yaysa, immigrad dəx dəx batu ən Yaysa. ⁴² As iga awen imuzaran iman-nasan da a dəx-san aggen əzzigzanan əs Yaysa, mişan wər əhelan emel n awen fəl təksəda ən Fərisaytan, fəlas wər aren ad təwəkkəsən dəx əljəməxət n ahan n əlxibada ən Kəl-Əlyəhud. ⁴³ Amaran əssofan səymər wa n aytedan tanaya ta ihakku Məşşina.

⁴⁴ Idkal Yaysa əməsli-net inna: «Awedan wa sər-i izzəgzanan, wərgə nak xas as izzəgzan, kalar wa di-d-izammazalan da izzigzan sər-əs. ⁴⁵ Amaran wa dəx-i iswadan, adi wa di-d-izammazalan a dəx iswad. ⁴⁶ Nak zun ənnur a mosa, əkke-du əddənət y âs i sər-i izzəgzanan wər z'aqqam dəx şiyay. ⁴⁷ As isla awedan i batuten-in iqqim wər tanat-ittef, wərgə nak a tu-z-awwaddaban, fəlas nak efsan n aytedan a d-əkke s əddənət, wərgəx attadib-nasan. ⁴⁸ Dəx adi awedan kul wa di-olkan, iqqim wər iga tenbay dəx batuten-in, wədi ill-ay wa tu-z-awwaddaban. Awal iman-net wa da əge da, a das-z-ışrəxan əzəl wa ilkaman. ⁴⁹ Fəlas aratan win dawan-əmala da, wərgəx nak a tan-d-inzaman gər-i əd man-in, kalar Abba wa di-d-izammazalan iman-net as di-omar s arat was di-iwar ad t-anna, əd was di-iwar a fall-as ammagrada. ⁵⁰ Əssənax as arat was omar ənta a itawayan əs təməddurt ta təxlalat. Dəx adi arat was əmməgrada, əmmək wa dəx as di-t-imal Abba ənta as sər-əs əmməgrada.»

Iba ən Yaysa əd tanakra-net dəx təmattant

13

Əsirəd wa iga Yaysa idaran ən nəttulab-net

¹ Ahad wa oggan amud wa n Akkay, issân Yaysa as alwaq-net osa-du wa dəx z'igməd əddənət iqqəl Abba. Yaysa faw da isaknu inəttulab-net tara, amaran əmərədda isannahaltan əsəkni ən tara ta dasan-iga.

² Itamansaw Yaysa əd nəttulab-net ehad, as itaggu awen da Iblis igâ dəx əwəl ən Yahuza wa n ag Simxon Isxarəyuti təkaddilt-net. ³ Issân Yaysa as Məşşina di n Abba igâ arat kul dəx əfus-net, issân dəx as igmâd-du Məşşina amaran

ad t-iqqəl. ⁴ Ibdad fəl mensewan, ikkas takadkat-net ta n afalla, idkal afər igbas-tu, ⁵ təzzar iga aman daɣ əɣlal, ad iṣarad idaran ən nəttulab-net, immas-tan s əfər wa igbas da.

⁶ As d-ewad Ƴaysa Simɣon Butros inn-as: «Ɛməli, kay, a z'iṣṣirədan idaran-nin?» ⁷ Inn-as Ƴaysa: «Awa tagga da wər təfrega əgərri-net əmərədda mišan a tu-tagra dəffər awa.» ⁸ Inn-as Butros: «Kay, ad təṣṣirəda idaran-in? Wala ənəmihaz!» Inn-as Ƴaysa: «As dak-kan-wər-əṣṣorada nak dər-ək nəmmizzay.» ⁹ Inn-as Simɣon Butros: «Daɣ adi Ɛməli, wərge idaran-nin ɣas, ṣirəd harkid fassan-in d ayaf-in.» ¹⁰ Inn-as Ƴaysa: «Awedan iṣṣoradan, wər iddarar ar əṣirəd ən daran fəl ad izdag ketnet, amaran kawanay, təzəddigam, mišan wərge ketnawan.» ¹¹ Ƴaysa issân wa tu-z-akkaddalan; adi a fəl inna: «Wər təzəddigam ketnawan.»

¹² As iɣrad Ƴaysa əṣirəd ən daran-nasan, izlag takadkat-net, iqqal edag-net, inn-asan: «Awak təgrâm awa dawan-əge da? ¹³ Təgannim-i "Aməsəsseyri" d "Ɛməli", təgannim a olayan, fəlas əmosaq-qan. ¹⁴ Daɣ adi dad zamas nak imosan Ɛməli d Ɛməsəsseyri, əṣṣorada idaran-nawan, iwâr-kawan, kawanay da, daɣ ilkam a, ad tətimaṣiridam idaran. ¹⁵ Ɛsəknaq-qawan arat wa fəl a tu-tətaggim kawanay da s əmmək was dawan-t-əge. ¹⁶ Ɛggəyyey silakanay-awan as, akli wər oger məṣṣis, anammazal deɣ wər oger wa t-id-izammazalan. ¹⁷ Dad zamas təssânam aratan win, wədi təbbilalam kudis tətamazalam-tan.

¹⁸ Wər dawan-ganna ketnawan; win sannafrana kul əzdâyaq-qan amaran kundaba inda awa imal Awal ən Məṣṣina as inna: *"Wa dər ədrawa, iqqal amaksan-in."* ¹⁹ Arat wa, as igâ ad təzzəgzənam as nak a imosan "Wa Illan da." Adi da a fəl dawan-t-ənnəy əmərədda harwa wər iga. ²⁰ Ɛggəyyey silakanay-awan as wa iqbalan iyyan daɣ nəmmuzal-in, nak iman-in a iqbal. Harwa wa di-iqbalan, wa di-d-izammazalan a iqbal.»

Emel ən Ƴaysa təkaddilt ta tu-z-agu Yahuza

²¹ As inna Ƴaysa awen, əɣṣadan man-net, təzzar inna: «Ɛggəyyey əsilakanay-awan as iyyan daɣ-wan a di-z-aggin daɣ fassan.» ²² Ad tinəməswidan nəttulab-net, əqqânan ɣafawan-nasan i was igannu. ²³ Iyyan daɣ nəttulab-net, wa isannahal Ƴaysa tara, isiɣamar daɣ ihəz n ədmaran ən Ƴaysa. ²⁴ Isaddagan-as Simɣon Butros ad issəstən Ƴaysa əd was igannu. ²⁵ Təzzar inaz-in ənattalib wen fəl ədmaran ən Ƴaysa, inn-as: «Ɛməli, ma z'iqqəl?» ²⁶ Ijjəwwab-as Ƴaysa inn-as: «Wa əkfe akarammu ən təgəlla wa z'əssəlməɣa daɣ ədrəz a.» Təzzar issəlməɣ akarammu ən

tægälla ikf-ay i Yahuza ag Simxon Isxarəyuti. ²⁷ As igraw Yahuza akarammu wen, iggaz-tu Aššaytan. Təzzar inn-as Ƴaysa: «Tagaxet tarmad awa kay-iwaran.» ²⁸ Awa fəl inna Ƴaysa awen i Yahuza, wər iha inəttulab-net win hadatnen siḡamarnen den tattin i t-igrân. ²⁹ Wiyyad ordân as, iduf wa iga Yahuza azrəf ən nəttulab a fəl das-inna Ƴaysa: «Zanzadu arat was za naddarar y əmud; madex akfu šiləqqawen arat iyyan.» ³⁰ Ibaz Yahuza akarammu ən tagəlla, igmad tarmad, as itaggu awen da ehad igâ.

Alwajib wa aynayan

³¹ As igmad Yahuza, inna Ƴaysa: «Əmərədda tanaya-nin nak Ag Aggadəm tənifalal, tənifalal daḡ-i deḡ tanaya ən Məššina. ³² Dad zamas tanaya ən Məššina tənifalal daḡ-i, Məššina da ad isənnəfiləl daḡ man-net tanaya-nin nak Ag Aggadəm daḡ alwaq ihozan wəllen. ³³ Imaran-in, alwaq wər nəggət a ḡur-wan z'aga. A di-təgməyam mišan edag wa əkkeḡ wər təfregam a t-in-tawədam. Kala ad ənneḡ adi i Kəl-Əlyəhud, amaran kawanay da əmərədda ənneḡ-awan-tu. ³⁴ A kawan-akfaḡ alwajib aynayan, a t-imosan as namariwat. Namariwat kawanay da s əmmək was kawan-are. ³⁵ As tənamaram, ad issusən adi aytedan kul as kawanay inəttulab-in.»

Ƴaysa əd Butros

³⁶ Inn-as Simxon Butros: «Əməli, mənid təkke.» Inn-as Ƴaysa: «Edag wa əkke, wər təfrega a di-sər-əs-təlkəma əmərədda, eges a din-təlkəma dəffər awa.» ³⁷ Inn-as Simxon Butros: «Əməli, mafel as wər əfrega a dak sər-əs əlkəma əmərədda. Əgarax iri y a fall-ak akfa iman-nin.» ³⁸ Inn-as Ƴaysa: «Adis a fall-i takfaḡ iman-nak? Əggəyyeḡ silakanax-ak as wər z'aḡru əkəji aḡora wər di-təggəda har karadat təklaten.»

14

Ƴaysa ənta a imosan tarrayt

¹ Inn-asan Ƴaysa: «Ad wər təššəwəšam, zəgzənat əs Məššina, təzzəgzənam sər-i nak da. ² Ehan n Abba-nin ahân-tu daggan aggotnen ən təməxsurt. Awak ənnar wər iga adi manəmmək as dawan-z-anna ad agla səmmutəḡax-awan edag təzdaḡam? ³ As tu-sammataga, ad d-əqqala, idawaḡ-in dər-wan fəl ad təggəzam edag wa əhe. ⁴ Edag wa əkke təssānam tarrayt-net.» ⁵ Inn-as Tuma: «Əməli wər nəssen dad təkke, manəmmək as za nəssən tarrayt-net?» ⁶ Inn-as Ƴaysa: «Nak a imosan tarrayt id əmosa tidət əmosa əntada wa ihakkan təməddurt. Awedan waliyyan

wər in-z-awəd Abba, ar əs tarrayt-in. ⁷ Ənnar təssânam awa mosa, təssənam awa imos Abba-nin da. Əmərədda təssânam awa imos, amaran tənayam-tu.» ⁸ Inn-as Filibus: «Əməli, susən-anax awa imos Abba, igd-ana adi.» ⁹ Inn-as Ƴaysa: «Filibus, əruwaş as dər-wan əddewa, eges harwa da wər təssenax awa mosa? Wər təssenax as wa di-inayan inây Abba! Daş adi manəmmək as təganna: "Susən-anax awa imos Abba?" ¹⁰ Wər təzzəgzanax as, nak d Abba arat iyyanda a nəmos? Aratan win dawan-əmala da wərgex nak a tan-d-inzaman gər-i əd man-in, kalar Abba dər əmosax arat iyyanda a isandan igitan-net. ¹¹ Zəgzanat-i, nak d Abba arat iyyanda a nəmos; kud əzəgzan a wər təgem s awa ənne, zəgzənat fəl əddəlil ən mazalan win as di-tənayam taggaq-qan. ¹² Əggəyyex əsilakanax-awan as wa sər-i izzəgzanan, ad agu imazalan win tagga. Fadda ad agu win tan-ogarnen, fəlas nak abba a z'akka. ¹³ Amaran a iqqal arat wa təgmayam s esəm-in ad t-aga, fəl ad tətəwənəy tanaya n Abba daş Barar. ¹⁴ As daş-i təgmayam arat a iqqal s esəm-in, ad t-aga.

¹⁵ Kud tara a di-təgam, tətəfam alwajiban-in. ¹⁶ Amaran ad əgməya daş Abba a kawan-akfu əmadhal iyyan a şur-wan z'iməlan har faw. ¹⁷ Ənta a imosan Infas wa isinəfililan tidət, as wər təfreg əddənət əlqəbulat-net, fəlas wər tu-təhənnəy wala da təzday-tu; eges kawanay təzdâyam-tu fəlas ihoz-kawan amaran ad iggəz iwallan-nawan har faw. ¹⁸ Wər kawan-z-ayya daş əddənət təmosam şilat ən gugelan, a kawan-d-əqqəla. ¹⁹ Dəffər alwaş wər nəggət, əddənət wər di-za-tələs anay; eges kawanay a di-tələsam anay fəlas əddâra, kawanay da ad təddəram. ²⁰ Alwaş wədi ad təssənam as nak d Abba-nin arat iyyanda a nəmos, təssənam dəş as təhâm əwəl-in, nak da ahex win-nawan. ²¹ Wa ittəfan alwajiban-in, ənta a di-iran. Wa di-iran ad t-iru Abba-nin, ireq-qu nak da, sənnəfilələş-as iman-in.» ²² Inn-as Yahuza wa wər nəmos ag Isxarəyuti: «Əməli, manəmmək as dana-za-təsənnəfilələş iman-nak nakkanay şas, wər tan-təssosana y əddənət?» ²³ Inn-as Ƴaysa: «Awedan wa di-iran, ad ittəf awa ənne, ir-ay Abba-nin, nas-ay-du nəməl şur-əs. ²⁴ Wa di-wər-nəra, wədi wər əttef batuten-in; amaran batu tas təsallim da, wərgə nak a tatigan kala ar şin Abba s ənta a di-d-izammazalan.

²⁵ Əgex-awan-tat harwa kawan-əhe. ²⁶ Amaran əmadhal imosan Infas wa Zəddigan wa dawan-du-z-assaglu Abba s əsəm-in, a kawan-isassaxru aratan kul, assakt-iwan-du arat kul wa dawan-ənne nak iman-in. ²⁷ Oyyex-awan-du alxer, əkfeş-qawan alxer wa-nin; nak wər dawan-t-əkfeş

əs tēmawit tas tu-təhakku əddənet; ad wər təššəwəšam wala təggəz-kawan tasa. ²⁸ Təslām-i as dawan-ənnə: "Teklay a əgəx", ənnəx harwa: "A kawan-d-əqqəla." Ənnar ixsâl as di-tərâm, təseffəliwəset-kawan tənna ta əgəx: "Əqqalax Abba", fəlas Abba oğar-i. ²⁹ Amaran aratan win, əmâlay-awan-tan əmərədda harwa wər əgen, fəl a sər-i təzzəgzənam alwaq wad z'agin. ³⁰ Wər dər-wan z'ələsa igi ən batu tagget, fəlas əmənokal n əddənet izay-du. Wər di-in-ikka d arat, ³¹ mišan kundaba əgəx awas di-omar Abba, təssən əddənet dəx as arex Abba.» As iyrad batu ta innasan: «Ənkərat əgmədatana edag a.»

15

Yaysa ənta a imosan esab n alyanab wa n tidət

¹ Inna Yaysa i nəttulab-net: «Nak a imosan esab n alyanab wa olağan, Abba-nin imos məššis. ² Alədlid-in kul wa wər nətirəw ad t-ixtəs, wa itarawan ad t-ifnəz fəl ad d-inzər agu ara aggen. ³ Zun d adi da, kawanay da eway-du sər-wan awal-in tazdak; ⁴ agiwat dər-i tartəyt šilat ən ta dər-wan əge, azəl wər z'arəw xas-net as d-iqqətas dəx ašək; kawanay da əlmital di da a təham as dər-i wər tərtayam.

⁵ Nak a imosan esab n alyanab, kawanay ilədlad-net. Wa dər-i igan tartəyt ta dər-əs əge, a t-idu-təgməd tənfa tagget fəlas as dəx-i in-təqqətasam wər təfregam wala. ⁶ Wa dər-i wər nərtay, a din-itəwəgər šilat n ələdlid iqqitasan, aqqar, itəwəkəmməd-du, itəwəgər dəx təmsay, ibələgləg. ⁷ As dər-i tərtayam, tətəfam batuten-in, əgməyat dəx Məššina di n Abba arat kul wa tərām, a tu-təgrawam. ⁸ Ənta da awas tətāwanay tanaya n Abba-nin: a du-tarəwam tənfa tagget, assaknu adi as təmosam inəttulab-in. ⁹ Tara ta di-iga Abba, ənta a dawan-əge; əttəfat-tat. ¹⁰ As imos as tətəfam alwajiban-in, wədi təhâm tara-nin zund əmmək as nak da əttafa win Abba, əhe tara-net.

¹¹ Ənnəx-awan adi fəl ad tagim təfalawist zun ta əgəx, tagim dəx təfalawist təkmâlat. ¹² Ənta da alwajib wa-nin: "Namariwat s əmmək was kawan-are." ¹³ Wər tu-təlla tara togarat ad akfu awedan iman-net fəl midawan-net. ¹⁴ As imos as tətəggim awas kawan-omara, wədi kawanay imidawan-in. ¹⁵ Wər dawan-gannax eklan, fəlas akli wər itəssən arat wa itag məššis. Kala kalar a dawan-gannax imidawan-in, fəlas awas əsleḡ xur Abba-nin kul əssosanaḡ-awan-tu. ¹⁶ Wər di-təsannafranam, kawanay amaran, nak a kawan-isannafran; əssiwaraq-qawan ad taglim, tammazalam awa təha tənfa tagget xur Məššina.

Tənfa di da ta za tahagit. A təgmayam dəx dəx Abba s əsəm-in a dawan-t-agu. ¹⁷ Omâraq-qawan s ad tənəmërim.

¹⁸ Kud gezzar a kawan-təga əddənet, əssənət as təgzâr-i dat-wan. ¹⁹ Kud kawanay əddənet kawan-təlat, wədi əddənet tərâ wa təla; mişan wər kawan-təla, fəlas nak kawan dəx-as d-isannafranan, adi a fəl kawan-təgzar. ²⁰ Aktiwat-du awa dawan-ənnex, as: "Akli wər oger məşşis." Kud əsəkni a di-əgan alyazab, a dawan-t-assaknin kawanay da; kud tərəddawt a əgan s awal-in, wədi kawanay da, ad ardin əs wa-nawan. ²¹ Adi kul, əddəlil-in a fəl dawan-tu-z-agin; fəlas wər əssenən wa di-d-izammazalan.

²² Ənnar du-wər-ose, əşşewalax-asan, wər z'attarmasan əs bakkadan-nasan, eges əmərədda wər t-illa əsarü waliyyan a dasan-z-igdəlan a sər-san attarmasan. ²³ Wa di-igzaran, igzâr Abba-nin ənta da. ²⁴ Ənnar wər əge garesan imazalan əs wər t-illa awedan as kala tan-iga, wər z'attarmasan əs bakkadan-nasan. Ənayan-tan eges əgłan əgzârən-ana nak d Abba-nin. ²⁵ Mişan adi igâ fəl ad tandu batu ta tətawaktabat dəx Əttawret, tənnât: "*Əgzaran-i bannan.*"

²⁶ As d-osa əmadhal wa dawan-du-z-assagla xur Abba, imosan Infas wa isinəfililan tidət a sər-wan du-z-igmədan Abba, a fall-i aggayyat. ²⁷ Kawanay da, a fall-i taggayyem, fəlas təddewam dər-i harwa xur tizarat.»

16

¹ «Əmâlay-awan adi fəl a kawan-wər-igməd əzəgzan-nawan. ² Ad tətəwəkkəsəm dəx əljəməxət ən nan n əlyibada ən Kəl-Əlyəhud, fadda ilkâm alwaq dəx-as wa dəx-wan ikkasan iman, illa xur-əs as tara ən Məşşina a immozal den. ³ Adi a dawan-z-agin aytedan fəlas wərmad a di-əzdayan wala əssânan Abba. ⁴ Əmâlay-awan aratan di əmərədda, fəl a tan-du-taktim as d-ewad alwaq wa dəx z'agin aytedan tara-nasan. Aratan win wər dawan-tan-əmela dəx tizarat n əşşəxəl-in xur-wan, fəlas alwaq wədi harwa da əddewa dər-wan.»

Əşşəxəl n Infas wa Zəddigan

⁵ «Əmərədda ad əqqəla wa di-d-izammazalan, mişan wər kawan-iha i di-issistanan əd dad əkke. ⁶ Eges əknân man-nawan axşud fəl as dawan-ənnex adi. ⁷ Dər iga adi da ya, a dawan-əmela tidət: of-awan ad agla, fəlas as wər əgle wər kawan-du-z-asu Əmadhal, as əgle amaran a dawan-t-id-assagla. ⁸ As d-osa ad issusən aytedan n əddənet as əxrâkan dəx batu n awa imosan abakkad, d awa imosan

taqqat ən Məşşina d awa imosan əşşərixa-net. ⁹ Issusən-tan as əxrâkan day batu n awa imos abakkad fəlas tugəyt a əgan a sər-i əzzəgzənan. ¹⁰ Issusən-tan as əxrâkan day batu n awa imosan taqqat fəlas tewaxlay a əgey Abba amaran wər z'ələsəy ətəwənay. ¹¹ Issusən-tan as əxrâkan day batu n awa imosan əşşərixa ən Məşşina fəlas əmənokal n əddənet, a t-imosan Iblis, ibâz-tu əşşərixa.

¹² Harwada əle batuten aggotnen as are a dawan-tanat-aga eges wər dasnat-təzmeram əmərədda. ¹³ As d-osa Infas wa Zəddigan isinifililan tidət, a kawan-issəlkəm i tidət kul ta du-təfalat Məşşina fəlas batuten-net wərgəy ənta a du-z-əgmədnat, awa as z'aslu xas a day dawan-z-işşiwəl ketnet, iməl-awan aratan win d-əzaynen, ¹⁴ issəxmər-i fəlas awa z'igrəw day awa əle a dawan-z-iməl. ¹⁵ Awa ila Abba ketnet i-nin nak da; adi a fəl dawan-ənnə, awa igraw Infas wa Zəddigan day awa əle a dawan-z-iməl.»

Təkenzert ən nəttulab təqqal tədəwit

¹⁶ «A dawan-əgməday anay dəffər alwaq wər nəggət, mişan a di-tələsam anay day adan wər nəggət dəffər adi.» ¹⁷ Təzzar namannan wiyyad day nəttulab-net: «Ma imos almayna n awa danax-inna da: "A dawan-əgməday anay dəffər alwaq wər nəggət, mişan a di-tələsam anay day adan wər nəggət dəffər adi?" Ma imos dey almayna n "Abba a əkke"? ¹⁸ Ma imos almayna ən "day alwaq wər nəggət" wa imal da? Arat wa day işşewal da wər tu-nəgra.»

¹⁹ Issan Yaysa as ərân ad t-əsəstanan. Inn-asan: «Tətinamasəstinam fəlas ənnə: "A dawan-əgməday anay dəffər alwaq wər nəggət, mişan a di-tələsam anay day adan wər nəggət dəffər adi." ²⁰ Əggəyyey silakanax-awan as ad talim, təsəkkələlam mişan aytedan n əddənet əntanay əddəwen. Ad əxşədan man-nawan eges axşud di a tu-təzrəy tədəwit. ²¹ Təntut as tətəggaz amaçal, ad əxşədan man-net fəl əggad wa du-təga alwaq-net; mişan as d-ihu barar-net, ad tamməzəy d əsəmmədrən day arkanay wa tənay, isəddəwat-tat as du-təga awedan day əddənet. ²² Kawanay da zun d adi da, əmərədda əxşədan man-nawan, mişan a kawan-ələsəy anay, əzəl wədi ad tagim tədəwit as tu-wər-illa i day-wan tat-z-ikkəsan. ²³ Wər di-za-təssəstanam d arat waliyyan əzəl wədi. Əggəyyey silakanax-awan as, a təgməyay day Abba s esəm-in a dawan-t-əgu. ²⁴ Harwada wər t-illa a təgməyam s esəm-in. Əgməyat ad təgrəwam fəl ad tagim tədəwit təkməlat.»

Yaysa irza əddənet

²⁵ «Ēmâlay-awan adi s əlmital, mišan ilkâm alwaq day awan-wər-z-əlasay emel n arat waliyyan iqqâlan Abba s əlmital, kalar a dawan-t-əmêla s awa imos. ²⁶ Alwaq wêdi ad təgməyam day Abba s esəm-in. Wər dawan-ənnə a dawan-t-ansəya, ²⁷ fêlas Abba iman-net ir-iwan fêl as di-təram, təzzigzanam dey as ħur-əs d-əgmâda. ²⁸ Abba a ħur d-əgmada, ose-du əddənet amaran əmərədda a tat-əgməda əqqəlaq-qu.»

²⁹ Təzzar ənnan-as nəttulab-net: «Ēnəy, əmərədda təmmalay-anay aratan s awa mosan, wərge s əlmital. ³⁰ Nəssän as təssâna day arat kul, wər t-illa arat a iqqal a dak-iħbaran; adi da a fêl nəzzəgzan as Abba a ħur du-təgmada.» ³¹ Inn-asan Ğaysa: «Adis əmərədda təzzəgzanam? ³² Ēnəyat, alwaq ihoz, fadda iga, wa day za tətəwəzəwəziwizam, akkiyyan ikka aħaywan-net, tayyim-i-d ħas-in; mišan ya wər əmosa ħas-in fêlas illa ħur-i Abba. ³³ Ēmâlay-awan arat wa fêl ad təgrəwam alxer day tətəyt ta dər-i təgam. Ad tənəyam arkanay day əddənet, ad wər tiksadam wala, fêlas əddənet ərzêq-qat.»

17

Təwatray ən Ğaysa i nəttulab-net

¹ As inna Ğaysa awen, idkal asawad-net iggəzzay ijənnawan, ittar inna:

«Abba, alwaq ewad-du, saknu tanaya ən Barar-nak fêl ad assaknu ənta da ta nak, ² id təzzozaraq-qu y aytedan kul fêl ad akfu təməddurt ta təxlalat i win tu-təkfe. ³ Amaran təməddurt ta təxlalat awa tat-imosan, ad inəfiləl y aytedan awa təmosa, kay a imosan Məššina wa n tidət; inəfiləl-asan əntada as Ğaysa Ēlməsix a du-təzammazala. ⁴ Ēssikna tanaya-nak fêl amaḍal s əsəndi wa əge əššəxəl was di-təssəwaray igi-net. ⁵ Amaran əmərədda kay Abba, akf-i ħur man-nak tanaya ta ħur-ək ələx harwa dat əxluk n əddənet. ⁶ Sinafâlalay awa təmosa y aytedan win du-təsannafrana təkataq-qan-du day əddənet, təgeq-qan day əfus-in əttafan awal-nak. ⁷ Ēmərədda əssânan as arat kul wa di-təkfe, kay a ħur d-igmad. ⁸ Fêlas əmâlay-asan awa di-tənnə, əqbalan-tu, amaran silakanan as kay a ħur d-əgmada, əzzigzanan dey as di-du-təzimazala. ⁹ Wər kay-tinsəya y aytedan win əddənet, kalar aytedan win di-təkfe as kay-tansayay fêlas əntanay a tələx. ¹⁰ Awa əle kul i-nak, kay da awa tèle kul i-nu; amaran əntanay en da a day tənafalal tanaya-nin. ¹¹ Nak, ab'as aheç əddənet, kay a din-əkke, əntanay amaran əhân-tat. Ya Abba di zəddigan, agəz-tan s esəm-nak wa di-təkfeç, fêl ad əqqəlan

arat iyyanda šilat ən wa dər-ək əmosa. ¹² Harwa tan-əhe, ogâzaq-qan s esəm-nak, a di-təkfê, wər day-san ixrek waliyyan ar wa ixrakan fəl ad andu awa ənnan Ælkəttaban. ¹³ Æmərədda kay a din-əkke, gannağ awa harwa əheğ əddənet fəl ad agin təfalawist təndât ta da əgeğ. ¹⁴ Æmâlağ-asan awal-nak təgzar-tan əddənet fəlas wər tan-təla zun d as nak iman-in da wər di-təla. ¹⁵ Wər day-ak əgmaya a tan-təkkəsa day əddənet, mišan əgmâya day-ak a tan-tagəza day Iblis. ¹⁶ Wər tan-təla əddənet, zun d as nak iman-in da wər di-təla. ¹⁷ Zəzdəg iwallan-nasan s awal-nak imosan tidət. ¹⁸ Æzəmmizəl wa di-du-təge s əddənet, ənta a tan-sər-əs-əge nak da. ¹⁹ Amaran əkfeq-qay iman-in fəl əddəlil-nasan fəl ad akfin win-nasan əntanay da əs tidət. ²⁰ Wərgəğ inəttulab-in ças as kay-tansaya, kalar tansayaq-qay y aytedan win sər-i z'əzzəgzənnen s əssəbab n as əslan y awal-nasan. ²¹ Ægmâya day-ak a tan-igan ketnasan arat iyyanda s əmmək was dər-ək t-əmosa; nəqqəl-tu dər-san nakkanay da fəl ad təzzəgzən əddənet as kay a di-d-izammazalan. ²² Ækfêq-qan tanaya ta di-təkfê, fəl ad əqqəlan arat iyyanda s əmmək was tu-nəmos nak dər-ək. ²³ Nak ərtâya dər-san, kay tərtâya dər-i. Æqqəlanet arat iyyanda əs təməwit təndât fəl ad təssən əddənet as kay a di-d-izammazalan təgeğ-asan değ tara ta di-təge. ²⁴ Abba, areğ as win di-təkfê ad əggəzan əntanay da edag wa əhe fəl ad əhannayan tanaya ta di-təkfê fəlas di-tare harwa dat əxluk n əddənet. ²⁵ Abba, kay a oğadan, əddənet wər kay-təssen eges nak əssânaq-qay amaran inəttulab-in, əssânan as kay a di-d-izammazalan. ²⁶ Æssôsanaq-qan awa təmosa amaran wər z'ammazzaya d igi n adi, fəl a tan-təggəz tara ta di-təgeğ, ərtəya dər-san.»

18

Ætərməs ən Yaysa

¹ As iga Yaysa batu ta, ikka tama ta hadat n əgirer wa n Kedron. Iggaz afarag n eškan illân-den ənta əd nəttulab-net. ² Edag wen issân-tu Yahuza Isxarəyuti wa z'akkaddalan Yaysa, fəlas faw da itakk-ay Yaysa ənta əd nəttulab-net. ³ Azzar-du Yahuza y agan ən sojitan ən Kəl-Ërrum, əd magazan n Ahan wa Zəwwəran n Ælçibada a d-əssiğlan muzaran ən limaman, əd Farisaytan, ewâyan fətəlaten, əd belan, əd təzoli-nasan. ⁴ As din-ewadan ihoz-tan-in Yaysa issânan day arat kul wa tu-z-igrəwan, issəstan-tan inn-asan: «Ma imos was təsaggadam?» ⁵ Ænnan-as: «Yaysa wa n Nazaret as nəsggad.» Inn-asan: «Nak da da.» İbdâd gar-essan Yahuza wa t-ikkəddalan.

⁶ Amazay wa da day dasan-inna Ƴaysa: «Nak da da» ənta a day ərmaɣan əqqalan dəffər-san har udan. ⁷ Ilas Ƴaysa inn-asan: «Ma imos was təsaggadam?» Ənnan-as: «Ƴaysa wa n Nazaret as nəsggad.» ⁸ Inn-asan: «Wərgəɣ ənnəɣ-awan nak da da. Day adi kud nak as təsaggadam, tayyim aytedan win da ad jəwənkən.» ⁹ Əmmək wen da as inda awal wa iga dat awen as inna: «Wər day-i z'ixrək waliyyan day win di-təkfe.» ¹⁰ Ihād-du Simɣon Butros ilbây-du takoba-net iwat sər-əs akli n Əlimam wa Zəwwəran, ifras-du təməzzuk-net ta n əxil. Akli wa esəm-net Malxus. ¹¹ Təzzar inna Ƴaysa i Butros: «Suxəl takoba-nak tətərut! Awak ad aqqama wər əgeɣ alɣazab wa di-ixkam Abba?»

Ətəwəsəbdad ən Ƴaysa dat limaman

¹² Təzzar obazan Ƴaysa, əkradan-tu, əmosan egan ən sojitan ən Kəl-Ərrum d əmuzar-nasan, əd magazan n Ahan wa Zəwwəran n Əlyibada a d-əssiglan muzaran ən Kəl-Əlyəhud. ¹³ Ewayan-tu azzaran dər-əs s aɣaywan ən Xânan wa n ədaggal ən Kayif wa imosan Əlimam wa Zəwwəran day awatay wen. ¹⁴ Amaran Kayif ənta a igan i muzaran ən Kəl-Əlyəhud tanat ta n as ofa ad ammat awedan iyyanda day adag ən tamattay. ¹⁵ Ilkam Simɣon Butros i Ƴaysa ənta d ənattalib iyyan. Ənattalib wa izdây Əlimam wa Zəwwəran iman-net, təzzar iggaz afarag wa iɣlayan aɣaywan n Əlimam wa Zəwwəran day amazay wa da daq-q iggaz Ƴaysa. ¹⁶ Butros ənta iqqim-du dat ahan, ɣur əmi n aɣalla. Irdax-du ənattalib wen, igraw ɣur təntut ta togazat təsəhərt ad tayyu Butros iggəz aɣaywan. ¹⁷ Təzzar tənna təməşşaxalt ta togazat imi n ahan i Butros: «Wərgə kay da iyyan day nəttulab n aləs wa a təmosa?» Inn-as: «Wər t-əmosa.» ¹⁸ Asamed igâ. Ƴilayɣalayan eklan əd magazan n Ahan wa Zəwwəran n Əlyibada temsay ən təkakaten əsukusan sər-əs. Ik-en-in Butros ənta da ad isukus.

¹⁹ As itaggu awen isastan Əlimam wa Zəwwəran Ƴaysa day talɣa ən nəttulab-net, d əsəssəɣri wa itaggu. ²⁰ Inn-as Ƴaysa: «Awal wa əge y əddənət, wər imos arat iɣbâran. Faw da inan ən taɣaray ən Kəl-Əlyəhud d Ahan wa Zəwwəran n Əlyibada a day sasayra dad əddewan Kəl-Əlyəhud kul, day adi wər t-illa awal əge day əssir. ²¹ Mafel as di-təsastana? Səstən aytedan win di-əslanen d aratan win day dasan-əmməgrada; əntanay əssânan day arat wa ənne.» ²² As inna Ƴaysa arat wa, iqqas-as iyyan day magazan n Ahan wa Zəwwəran n Əlyibada ibdâdan den, inn-as: «Ma kay-issəhalan igi n aljawab wa y Əlimam wa Zəwwəran?» ²³ Ijjəwwab-as Ƴaysa inn-as: «Kud arak batu a əge, əməl-i edag wa daq qat-əge. Kud amaran əgeɣ batu

tolaxat, ma imos äddälil wa fäl di-tëggata?» ²⁴ Issärdaq-qu Xânan da ikrad, issok-ay Kayif wa n Ælimam wa Zëwwëran.

²⁵ As itaggu awen, Simxon Butros illa den isukus äs tëmsay en da. Itawann-as: «Wërgë kay da arat day nëttulab n alës wa a tëmosa?» Ilas Butros šigget ën Yaysa, inna: «Kala kala wër t-ëmosa.» ²⁶ Inkar-du iyyan day eklan n Ælimam wa Zëwwëran, imosan äšëqqay n alës was d-ifras Butros tëmëzzuk-net, inna i Butros: «Wërgëx ënâyaq-qay tëddewa dër-ës day afarag?» ²⁷ Ilas Butros šigget ën Yaysa. Amazay wen da day iyra ëkëji açora.

Ætawësäbdad ën Yaysa dat Bilatës

²⁸ Immeway Yaysa çur Kayif s açaywan n ënaxkim. Itaggu awen çur ëfërirëy n anay. Aytëdan win dër-ës d-ëddewnen wër dër-ës äggezan açaywan wa n ënaxkim, fäl ad ëttëfan tazdak-nasan har atšin amensay wa n Akkay. ²⁹ Awen da fäl sër-san d-igmad Bilatës wa n ëmuzar n akal ehan-net, ikk-en-du inn-asan: «Ma imos lahan wa fäl tëbazam alës wa?» ³⁰ Ænnan-as: «Ænnar wër imos ëmëggi ën tækma, wër dak-k-idu-za-nawëy». ³¹ Inn-asan Bilatës: «Awëyat-tu tëxkëmam-as s äššëriça wa-nawan.» Ænnan-as Kël-Ëlyëhud: «Nakkanay wër nëla turagat ën tanaxay n awëdan.» ³² Arat wa igâ fäl ad andu awal wa iga Yaysa assaxa wad imal ënnuç ën tëmattant ta z'agu. ³³ Tëzzar iqqal Bilatës ehan-net içr-in Yaysa issëstan-tu inn-as: «Awak kay day a imosan ëmënokäl ën Kël-Ëlyëhud?» ³⁴ Inn-as Yaysa: «Arat wa kay iman-nak as tu-tënnë, mëx ak aytëdan wiyyad a dak-k-ënnanen sër-i?» ³⁵ Inn-as Bilatës: «Un nak iyyan day Kël-Ëlyëhud a mosa? Tamattay-nak, äd limaman win zawwarnen a kay-d-ewaynen sër-i, ma imos arat wa tëçšada?» ³⁶ Ijjëwwab-as Yaysa inn-as: «Taymar-in wër tat-tëla äddënet ta da. Ænnar taymar-in täll-et äddënet a, ënkërnat-du tëçurad-in ëknësnat fäl ad wër äggëzay ifassan ën Kël-Ëlyëhud. Kala kala, igmäd äššak as taymar-in wër tat-tëla äddënet ta da.» ³⁷ Inn-as Bilatës: «Ak tidët as kay a imosan ëmënokäl ën Kël-Ëlyëhud?» Ijjëwwab-as Yaysa inn-as: «Kay da tënney adi. Awalla ëmënokäl a mosa. Arat da wa fäl d-ëhëwa amaran ënta fäl d-äggazay äddënet a t-imosan as assa a d-ëge y ad äggayyëx i tidët. Awëdan wa ilkaman i tidët, kul issisam y awal-in.» ³⁸ Inn-as Bilatës: «Tidët za ma tëmös?»

Tëzzar iqqal-du Bilatës Kël-Ëlyëhud inn-asan: «Fäl aganna za wa di-iqqalan nak, wër ëhënnëya lahan waliyyan iga alës wa. ³⁹ Mišan ya, day arat wa imosan alçadat äs id d-içlay ëmud wa n Akkay a dawan-d-ëkkësay iyyan day mëskësa-nawan. Mëqqal tarâm a dawan-sassayya

əmənokal ən Kəl-Əlyəhud?» ⁴⁰ Əlasan adakal ən maslan-nasan wəllen ketnasan ənnan-as: «Kala, kala, wərgex ənta! Baryabbas as nəra danaq-q-idu-təkkəsa.» Baryabbas wa əjajəb n ənəffelləg a imos.

19

¹ Təzzar omar Bilatəs s ad təwəgginat təwit n ələkkud i Ƴaysa; itawagg-as awen da. ² Əzdän sojitan təkəbbut təgât əs šənnanan əssəwaran-tat eƣaf-net, əzzəzlagan-tu deƣ əbərnuz zaggaxan. ³ Tihazan-t-in gannan-as: «Oyy-ik! Əmənokal ən Kəl-Əlyəhud!» Taqqasan-as sa əd sa. ⁴ İlas-du Bilatəs aradaƣ, inna i Kəl-Əlyəhud: «Ənəyat! A dawan-t-id-əssərdəƣa, ad təssənam as wər fall-as ənaya lahan waliyyan fəl iwwəddab.» ⁵ Təzzar irdaƣ-du Ƴaysa təwâr-tu təkəbbut ən šənnanan, izlâg əbərnuz zaggaxan, inn-asan Bilatəs: «Aləs-nawan əddi.» ⁶ As t-oggan muzaran ən limaman əd magazan n Ahan wa Zəwwəran n Əlyibada, ədkalan imaslan-nasan gannin: «Taytay-tu fəl təgəttawt! Taytay-tu fəl təgəttawt!» Inn-asan Bilatəs: «Abəzat-tu kawanay iman-nawan tattaytayam-tu, nak wər hənnəyaƣ əddəlil waliyyan a t-issiwaran təmattant.» ⁷ Ənnan-as muzaran ən Kəl-Əlyəhud: «Nakkanay nəla əššəriƣa, amaran əššəriƣa wa, ih-ay as aləs wa ihor əd təmattant, fəlas a inna ənta Barar ən Məššina a imos.»

⁸ Batu ta təga tasa wəllen daƣ Bilatəs, ⁹ iqqal ehan-net, iggaz edag wa n əššəriƣa, inna i Ƴaysa: «Mənis du-təhe?» Mišan wər das-iga Ƴaysa aljawab waliyyan. ¹⁰ Amazay wen da das-inna Bilatəs: «Nak as tugaya s a di-təššiwəla? Wər təssenax as əle fərregat n a kay-sassayya, əleƣ əntada fərregat n a kay-attaytaya fəl təgəttawt?» ¹¹ Inn-as Ƴaysa: «Wər fall-i təle tarna waliyyat ar ta sər-ək du-təfalat Məššina. Adi da fəlas awedan wa di-igan gər fassan-nak, ogar-kay igi n abakkad.» ¹² Amazay wen da daƣ iggaz Bilatəs šin agamay n asaway was z'ayyu Ƴaysa. Mišan ənkaran-du Kəl-Əlyəhud ad gannin s afalla: «Aləs di as tu-təsassayya, wədi wər təmosax əmidi ən Qaysara, əmənokal ən Kəl-Ərrum, fəlas awedan wa innan imos əmənokal, wədi azangaw ən Qaysara a imos!»

¹³ As isla Bilatəs i batu ta, issərdəƣ-du Ƴaysa, təzzar iqqim daƣ təxawit ta n adag n əššəriƣa. Edag wa esəm-net «Aƣarƣar ilsân təsəlīt» itawann-as daƣ təlyibrit «Gabbata». ¹⁴ Itaggu awen ammasnazal n əzəl wa oggan amud wa n Akkay, simutugan aytedan y əmud. Inna Bilatəs i Kəl-Əlyəhud: «Əmənokal-nawan əddi!» ¹⁵ Iqqal-asan awen as sahhaken imaslan-nasan wəllen gannin: «Ammatet! Ammatet! Taytay-tu fəl təgəttawt!» Inn-asan Bilatəs: «Daƣ

adi ad attaytayə əmənokal-nawan fəl təgəttawt?» Ənnan-as muzaran ən limaman: «Əmənokal-nana wər t-imos ar Qaysara.»¹⁶ Təzzar ikf-en Bilatəs Ƴaysa y ad itəwətəytəy fəl təgəttawt.

İtəwətəytəy ən Ƴaysa fəl təgəttawt

Əzzərgazan sojitan Ƴaysa.¹⁷ İgmad ayrəm ewây ənta iman-net təgəttawt ta fəl z'itəwətəytəy. Əkkan dər-əs edag as itawannu «Təkəyya», itawann-as dəx dəx təlxibrit «Golgota».¹⁸ Den da ad əttəytəyan sojitan Ƴaysa fəl təgəttawt. Tawatəytəyan əşşin meddan wiyyad əntanay da fəl təgəttawen dəgma-net, a dəx illa Ƴaysa gar-essan.¹⁹ Omar Bilatəs s ad ammadkal əsəllum itəwəktəb fall-as: «Awa Ƴaysa WA N NAZARET, Əmənokal ən Kəl-Əlyəhud», itəwətəytəy dəx afalla ən təgəttawt. Itawagga awen da.²⁰ Əxran Kəl-Əlyəhud aggotnen əsəllum wa. Ənta edag wa dəx itawatəytəy Ƴaysa fəl təgəttawt ihoz ayrəm, amaran əsəllum wa iktâb dəx awal wa n təlxibrit, əd wa n təlätint əd wa n təlyunant.²¹ Ənnan limaman win zawwarnen ən Kəl-Əlyəhud i Bilatəs: «Ad wər tayyax əsəllum wa təssəltəyax təgəttawt iktâb fall-as âs: "Aləs wa əmənokal ən Kəl-əlyəhud", kalar əktəb fall-as âs: "Aləs da wa innan ənta a imosan əmənokal ən Kəl-Əlyəhud."»²² Inn-asan Bilatəs: «Arat wa əktaba, wər-tu-za-səmməttəyax.»

²³ As əttəytəyan sojitan Ƴaysa fəl təgəttawt, ədkalan isəlsa-net, əgan-asan əkkozət təzunen, əkkulluk n iyyan dəx-san igrâw iyyat. Ədkalan əntada təkadkat-net ta zəwwərat, təgât dəx təbdoq wər iha a imosan azamay, tosâx-du xur afalla har eres.²⁴ Ənnan gar-essan: «Ad wər nəzəzzərrət təkadkat ta, ofa ad nagu şışaxeren fəl ad nəssən wa tat-z-ilen.» Arat wa ənnân-tu fəl ad tandu batu təhât Əlkəttaban ta tənnat: «*Əzunan tabdoq-in, təzzar əgan şışaxeren fəl təkadkat-in.*»

Arat wen ənta iman-net a əgan sojitan win den.²⁵ Təgəttawt ta fəl ittəytəy Ƴaysa, əbdâdnat dagma-net tədoden əmosnen anna-net, əd Maryama ta n tamadrəyt n anna-net, təmosat təxur Klobas, əd Maryama Madəl.²⁶ Ogga Ƴaysa anna-net, inay ənattalib-net wa n əməri-net ibdâd dagma-net, inn-as: «Anna, barar-nam əddi.»²⁷ Təzzar inna y ənattalib-net wen: «Anna-nak əddi.» Amazay wen da dəx dər-əs iddew ənattalib wen s aƳaywan-net issan dəx-as.

²⁸ Dəffər awen inna Ƴaysa: «İh-i fad», fəlas issân as arat kul ikmal, amaran arat wa wər t-inna ar fəl ad andu awa ənnan Əlkəttaban.²⁹ Edag en inna dəx-as əxəzu iha bənəgər, təmmədkal-du təduft tətawattal d əmi n agabal

n əzzənəf n ənniɣnaɣ iyyan idwâlan as itawannu xisof, tətawasalmaɣ-du daɣ bənəgər wa, tətawazzal-in s əmi-net.
³⁰ As izannalmaz Ƴaysa bənəgər, inna: «Arat kul ikmal.»
 Təzzar issəras eɣaf-net, əgmadan-tu man.

Ʒtəwəgga ən Ƴaysa daɣ əzəkka

³¹ Ʒzəl wen simutugan aytedan y əmud wa n Akkay. Wər əren Kəl-Ʒlyəhud ad aqqaminat alzanazaten n aytedan əwərnat šigəttawen daɣ əzəl wa n təsanfawt-nasan. Ʒnta əzəl wen, wər ogda əd win hadatnen təzzəwwərt. Ʒkkan muzaran ən Kəl-Ʒlyəhud Bilatəs ənnan-as: «Amər s ad tawarzin daran-nasan, fəl a tan-iba tarmad, təssukəsa-du alzanazaten-nasan!»
³² Ʒkkan-du sojitan meddan win tawataytaynen dagma ən Ƴaysa. Ʒrzan idaran ən wa azzaran, okayan əs wa n əššin əgan-as awen da.
³³ As d-ewadan Ƴaysa ənayan əs as d-osan da aba-tu. Ʒqqiman da wər ərzen idaran-net,
³⁴ Mišan idag iyyan daɣ sojitan win tasaga ən Ƴaysa s allax-net, iffay-du daɣ-as əzni d aman.
³⁵ Awedan wa igan isalan win, inay-tan əs šittawen-net, amaran təgəyya-net tidət a təmos. Issân as tidət ta təzdarat as iššewal da, fəl ad təzzəgzənam kawanay da.
³⁶ Ʒnta aratan win kul wər əgen ar fəl ad tandu batu təhât Ʒlkəttaban ta tənnat: «*Eɣas-net waliyyan wər z'arraz.*»

³⁷ Ʒlkəttaban ih-en əntada as: «*Ad əssədəgan isawadan-nasan sa sər wa saxxarabben.*»

³⁸ Dəffər adi osa-du Yusəf wa n əɣrəm n Arimatay, imosan iyyan daɣ nalkiman ən Ƴaysa, eges daɣ əssir, fəlas iksud Kəl-Ʒlyəhud. Ikka Bilatəs igmay daɣ-as ad awəy taɣəssa ən Ƴaysa. Ikf-ay Bilatəs turagat n awen, təzzar igla eway-tat.
³⁹ Osa-du Nikodemos ənta da, s ənta as kala din-osa Ƴaysa ahad iyyan. Eway-du təfaršit daɣ ənɣâlan alwarditan təmosat amaɗal ən karadat təmərwen ən kilaw.
⁴⁰ Idkal-du Yusəf əd Nikodemos taɣəssa ən Ƴaysa əgan-tat daɣ šifit təgât daɣ təsəwad, əssəlalan-tat aɗutan əzodnen win. Arat wa imos aɣadat ən Kəl-Ʒlyəhud daɣ anabal ən nəmməttan.

⁴¹ Edag wa daɣ itawataytay Ƴaysa fəl təgəttawt ih-ay afarag. Amaran afarag wen ih-ay əzəkka imosan akazam as wər kala a daɣ-as itawagga ənəmməttən.
⁴² Ʒzəl wen ənta daɣ simutugan Kəl-Ʒlyəhud y əzəl-nasan wa n təsanfawt, awen da fəl iga Yusəf əd Nikodemos Ƴaysa daɣ əzəkka wa, fəlas ənta a ihozan.

20

Tanakra ən Ƴaysa daɣ təmattant

¹ As affaw əzəl wa n alxad, harwa da wər ifarayray anay, as təkka Maryama Madəl əzəkka. As din-tosa tənay as

təhünt ta təharat əzəkka tətivakkas-du. ² Tozal təkka Simyon Butros d anattalib wa isannahal Yaysa tara tənn-
asan: «Əməli itawakkas dağ əzəkka amaran wər nəssen
edag wa dağ itawagga.»

³ Irdağ-du Butros d anattalib wa hadan əkkan əzəkka.
⁴ Ozalan, azzar-in ənəttalib wa hadan fəlas orna Butros dağ
azzal. ⁵ İşşəgga inay şisəwad şin şifit ənsânat den, mişan
wər iggez. ⁶ As d-ewad Simyon Butros wa das-d-ilkaman,
iggaz əzəkka, inay əntada şisəwad şin ənsânat den. ⁷ Inay
asalsaw wa iwaran eyaf ən Yaysa wər irtay əd şifit, ittâl
insa s aganna. ⁸ Təzzar iggaz-du anattalib wa hadan, s ənta
a d-azzaran, inay arat wa izzəgzan-tu. ⁹ Ənta harwa da
wər əgren batu ta tənnat dağ Əlkəttaban, Əlməsix kundaba
inkar-du dağ təmattant. ¹⁰ Təzzar əqqalan nəttulab win
den ağaywan.

Ənəfilal ən Yaysa i Maryama Madəl

¹¹ Təqqim-du Maryama təhallu dagma n əzəkka.
Təşşəgg-in dağ-as, ¹² tənay əşşin angalosən əssimlalnən,
əqqiman dağ adag was kala a tu-təha təxəssa ən Yaysa.
Iyyan illa xur anamod n ağaf-net, wa hadan illa xur
daran-net. ¹³ Ənnan-as: «Ma kam-isâlan, tantut?» Tənn-
asan: «Wər di-isəlu ar as immeway Əməli-nin, amaran
wər əssena dad itawagga.» ¹⁴ As tənna arat wa, təswad
dəffər-əs, togga Yaysa ibdâd. Mişan wər təssen as ənta
awen. ¹⁵ Inn-as Yaysa: «Ma kam-isâlan tantut? Ma imos
was təsaggada?» Tənn-as Maryama: «Ya aləs, kud kay
a t-ewayan, təmələx-i dad illa, a t-id-awəya.» Arat wa, as
das-tu-tənna a təxil əmagyak n afarag wa iha əzəkka a
das-işşewalan den. ¹⁶ Inn-as Yaysa: «Maryama!» Təzzar
təmalallay-t-in tənn-as dağ awal wa n təlxibrit: «Rab-
buni!» (Almağna n awen Əşşex-in.) ¹⁷ Inn-as Yaysa: «A di-
wər-təgdəla teklay, fəlas harwa da wər əggəzzaya s Abba,
kalar aglu əməl i mədrayan-in as nak ad əggəzzaya s Abba-
nin, s ənta a imosan Abba-nawan kawanay da, əggəzzaya
s Əməli-nin s ənta a imosan Əməli-nawan kawanay da.»
¹⁸ Təgla Maryama Madəl təmal i nəttulab as tənây Əməli,
təmal-asan dəx awa das-inna.

Awa d-izdaran dağ Əlkəttab wa

Ənəfilal ən Yaysa i nəttulab-net

¹⁹ Tadwit n alxad wen da iman-net, əddewan nəttulab,
əxfalan-du ehan fəl man-nasan, fəlas əksudan imuzaran
ən Kəl-Əlyəhud. Osa-du Yaysa ibdad gar-essan inn-
asan: «Alxer fall-awan!» ²⁰ As dasan-inna awen issəkn-en
ifassan-net, əd tasaga-net. Falawasan nəttulab fəl anay

wa əgan Əməli. ²¹ İlas inn-asan: «İg-awan Məşşina alxer! Əzimazalaq-qawan s əmmək was di-d-izammazal Abba.» ²² As dasan-iga batu ta, issəwad-du fall-asan s əmi-net, inn-asan: «Təgrəwamet Infas wa Zəddigan!» ²³ Win as təssorafam ibakkadan-nasan za, a dasan-təwəsürəfan, amaran win as tan-wər-təssorafam, wər z'əgrəwan təsureft-nasan.»

Ənəfilal ən Yaysa i Tuma

²⁴ Tuma was təsəmmadəq-net Eknay imosan iyyan day nəttulab win maraw d əşşin, wər illa den as ənayan Yaysa. ²⁵ As das-ənnan nəttulab win: «Nənây Əməli!» Inn-asan: «Wər z'əzzəgzənax iket wər ənaya şimijar ən nəsmar day fassan-net, ədəsax idaggan-nasan s adad-in, ədəsa dəx tasaga-net s əfus-in.»

²⁶ As əgan əttam adan dəffər awen, əddewan-du nəttulab ən Yaysa day ahan iyyan amaran taklat ten ih-en Tuma. İggaz-du fall-asan Yaysa da əharnat təsəhar n ahan, ibdad gar-essan, inn-asan: «İg-awan Məşşina alxer!» ²⁷ Dəffər adi inna i Tuma: «Agu adad-nak da, təswəda day fassan-in, tədəsa dəx tasaga-nin s əfus-nak, təzzəgzəna taqqama da wər təqqəlay awedan wər nəssen Məşşina!» ²⁸ Inn-as Tuma: «Ya Məşşina di n Əməli-nin!» ²⁹ Inn-as Yaysa: «Kay wər təzzəgzəna har di-tənaya. Əbbilalan aytedan win di-wər-nənay mişan əzzigzanan!»

Əlməxsud n Əlkəttab wa

³⁰ Immozal Yaysa alyalamaten şiyyad aggotnen dat nəttulab-net, mişan ya wər sər-əsnat imməgrad əlkəttab wa. ³¹ Eges arat wa t-ihan, itiwaktab fəl ad təzzəgzənam as Yaysa ənta a imosan Əlməsix, imos dəx Barar ən Məşşina, amaran, as sər-əs təzzəgzənam ad təgrəwam təməddurt s esəm-net.

21

Ənəfilal ən Yaysa i nəttulab-net yur tama n agaraw

¹ Dəffər awen ilas Yaysa ənəfilal i nəttulab fəl təgadamayt n agaraw wa n Tiberəyad. Əmmək da was dasan-inafalal: ² Simxon Butros, əd Tuma was təsəmmadəq-net Eknay, əd Natanəyel wa n Kâna day amađal ən Galilaya, əd bararan ən Zabaday, d əşşin nəttulab wiyyad, ketnasan əddewan. ³ Inn-asan Simxon Butros: «Nak ad akkax edag n abbaz ən kifitan.» Ənnan-as: «Nakkanay da nəddew dər-ək.» Əqlan, əggazan aylal n aman. Ahad wen wər obezan wala.

⁴ As affaw iwar-in Yaysa təgadamayt n agaraw, mişan wər əssenən nəttulab-net as ənta awen. ⁵ Inn-asan:

«Imaran-in, awak abbaz a wər tægem wala daɣ kifitan?»
 Ɛnnan-as: «Kala». ⁶ Inn-asan: «Ɛgərat əməzzezdər-nawan
 wa n abbaz ən kifitan fəl aganna n əɣlal wa n əɣil, a tan-
 təgrəwam.» Ɛgaran əməzzezdər-nasan daɣ agaraw, təzzar
 indar-asan a t-id-ədkəlan, fəl awa əgan kifitan win t-əhanen
 daɣ igət. ⁷ Inkar ənəttalib wa isannahal Ƴaysa tara inna i
 Butros: «Awen Ɛməli!»

Da daɣ ad isla Simɣon Butros as Ɛməli awen, ənta ad
 iqqan asalsaw-net wa n afalla, fəlas izzâf, təzzar itaraggat
 daɣ agaraw. ⁸ Amaɗal ən sanatat təmad n əɣil a əllanen gar-
 essan əd təgadamayt n agaraw. Ɛqqiman-du nəttulab win
 hadatnen daɣ əɣlal ərkâban-du dəffər-san əməzzezdər-
 nasan, idnây kifitan. ⁹ Ɛzzəbben-du ɣas oggan temsay
 ən təkakaten fəl naŋŋin kifitan, tənsa deɣ təgəlla den.
¹⁰ Inn-asan Ƴaysa: «Awəyat-du arat daɣ kifitan win du-
 tobazam əmərədda.» ¹¹ Igməd-du Simɣon Butros aman illil-
 asan s arakab n əməzzezdər wa əhan kifitan. Təmeday
 əd səmmosat təmərwen ən kifi əd karad əs kul win
 zawwarnen a t-əhanen mišan wər izzərrat. ¹² Inn-asan
 Ƴaysa: «Ayewat tatsim.» Wər iha inəttulab i ihalan ad
 issəstən Ƴaysa ann-as: «Ma təmosa?» Fəlas əssânan as
 Ɛməli awen. ¹³ Ihoz-tan-in Ƴaysa, obaz-du tagəlla ikf-asan-
 tat, ikf-en əntada kifitan. ¹⁴ Taklat ta ənta a təmosat ənəfilal
 wa n karad a d-iga Ƴaysa i nəttulab-net dəffər tanakra-net
 daɣ təmattant.

Ƴaysa əd Butros

¹⁵ As ətšan inna Ƴaysa i Simɣon Butros: «Simɣon ag
 Yaxya, awak tidət as tara ta di-təge togar ta di-əgan
 nəttulab win hadatnen?» Inn-as Simɣon: «Ayew Ɛməli,
 təssâna daɣ tara ta dak-əge.» Inn-as Ƴaysa: «Agəz za
 ijamaran-in.» ¹⁶ Ig-as y əsəstan wa igi wa n əššin inn-as:
 «Simɣon ag Yaxya, awak tərəɣ-i?» Inn-as Butros: «Ayew
 Ɛməli, təssâna daɣ tara ta dak-əge.» Inn-as Ƴaysa: «Ɛqqəl
 za amadan n ayfəd-in.» ¹⁷ Ig-as y əsəstan wa igi wa n
 karad inn-as: «Simɣon ag Yaxya, awak tərəɣ-i?» Ɛɣšadan
 man ən Simɣon Butros fəlas karad igitan das-iga Ƴaysa y
 əsəstan wa. Inn-as: «Ɛməli, kay a issanan daɣ arat kul,
 təssânay as əreɣ-qay.» Inn-as Ƴaysa: «Ɛssən za daɣ ayfəd-
 in. ¹⁸ Ɛggəyyeyə əsilakanay-ak as harwa taynaya, iman-nak
 as təlassa tabdoq-nak, tətakkay edag was tare, mišan as
 təqqalax aɣmar, ad təzzələx ifassan-nak, assals-ik awedan
 iyyan tabdoq-nak, awəy-kay s adag as wər tareɣ iki-net.»
¹⁹ Batu ta issoka sər-əs Ƴaysa ənnux ən təmattant ta z'agu
 Butros s ənta as z'assaknu adkul wa iga i Məššina. As iga

Үaysa batu ta inn-as: «Әлкәм-и» ²⁰ Iswad-in Butros дөффәр-әс ogga anattalib wa isannahal Үaysa tara ilkâm-asan-du. Anattalib wa әнта a isayxamaran даҗ ihәz n әdmaran әn Үaysa ahad wad tattin imensewan n әмud wa n Akkay, әнта dex as kala ad issәstanan Үaysa inn-as: «Әмәли, ma imos wa kay z'akkaddalan.» ²¹ As t-ogga Butros issәstan Үaysa inn-as: «Әнта за Әмәли, ma даҗ-as ilkaman?» ²² Inn-as Үaysa: «Kud tara a әgeҗ ad iddәр har d-әqqәla, tәdi wәр kay-tәqqel. Kay әлкәм-и җас!» ²³ Wazawazan salan даҗ мәzzәgzan әs Үaysa as anattalib wa wәр tu-z-iba. Әнта Үaysa wәrgеҗ a inna wәр tu-z-iba, tәnna җас a iga: «Kud tara a әgeҗ ad iddәр har d-әqqәla tәdi wәр kay-tәqqel.»

Zagzal даҗ batu ta tәmosat әlmәxsud n әлкәttab wa

²⁴ Anattalib wa әнта iman-net as iggәyyat fәl igitan win, iktab-tan. Nәssân as tәgәyya-net tidәt a tәmos. ²⁵ Үaysa iga aratan wiyyad aggotnen. As igmay awedan d a sәр-san ammagrad s iyyan-iyyan, ordeҗ as әddәnet ketnet da wәр za tawәy әлкәttaban win z'iktәb.

Igitan ən Nəmmuzal

Ēkkozat tēmərwen n əzəl win dat əmædkəl ən Ƴaysa

Īsənti

¹ Ya Tayofil, əlkəttab-in wa azzaran əktâbağ dağ-as aratan kul win as issənta Ƴaysa igi-nasan d əsəssəğri-nasan, ² har əzəl wa d immædkal əs jənnawan dəffər as iga ammaran-net əs tarna n Infas wa Zəddigan i nəmmuzal-net win isannafran. ³ Ēntanay en da a issəkna iman-net dəffər alyazab-net. Isattad-asan əs tēməwiten aggotnen tanakra-net dağ tamattant. Ēkkozat tēmərwen n əzəl a iga itinəfilil-asan, itagg-asan isalan ən Tağmar ta n Məššina.

Arkawal n assa n Infas wa Zəddigan

⁴ Ēzəl iyyan idrâw dər-san imensewan as tan-omar, inn-asan: «Ad wər təgmədam ağrəm ən Yerusalam. Ēqqəlat y arkawal n Abba wa dawan-əmala, ⁵ fəlas Yaxya aman a dağ issəlməğ aytedan mišan kawanay, ħur adan wər nəggət, Infas wa Zəddigan a dağ za tətəwəsəlməğam.» ⁶ Ēddəwan ħur-əs nəmmuzal-net as t-əssəstanan, ənnan-as: «Ēməli, awak əmərədda ad za təssuğəla təmənukəla y Israyil?» ⁷ Inn-asan: «Wər kawan-təwer masnat n alwağ wala tamert win otas Abba əs tanaya-net. ⁸ Mišan ya a fall-awan d-azzabbat Infas wa Zəddigan, təgrəwam tarna, təqqəlam šigəyyawen-in dağ əğrəm wa n Yerusalam, d akal kul wa n Yahudəyya əd wa n Samarəya, taglim har da d-iraz amaḍal.»

Ēmædkəl ən Ƴaysa

⁹ As inna awen, immædkal əs jənnawan. Ēswâdan dağ-as har dasan-tu-təlsa tagarak. ¹⁰ Harwâda əggizzayan ijənnawan assağa wad itagazzay Ƴaysa as nafalalan əššin meddan ən samlalan dəgma-nasan. ¹¹ Ēnnan-asan: «Ya meddan ən Galilaya, mas təbdadam, təswâdam dağ jənnawan? Ƴaysa wa immædkalan gar-ewwan da əs jənnawan, ilkâm a d-iqqəl s əmmək wa da as tu-tənayam ikk-en.»

Ēnətti n Ēlkənīsat - Šigəyyawen dağ Yerusalam

Awedan wa z'iggəzan edag ən Yahuza

¹² Təzzar əfalan nəmmuzal adğağ was itawannu wa n Eškan ən Zaytun, əqqalan ağrəm ən Yerusalam a das-ihân

edag ən teklay tas tətawala turagat-net day əzəl wa n təsanfawt ən Kəl-Əlyəhud, almaɣna edag ən kilaw iyyanda ən teklay. ¹³ As din-osan, əggazan ehan wa n afalla day suru wa day saganan. Əmosan Butros, Yaxya, Yaqub, Andrawəs, Filibus, Tuma, Bartulamawəs, Matta, Yaqub wa n ag Alfay, Simɣon was itawannu wa Isaggatakken əd Yahuza wa n ag Yaqub. ¹⁴ Ketnasan tiddawan-du y igi ən təwatriwen s əwəl iyyanda, əntanay əd mədrayan ən Ƴaysa əd tədoden təha Maryama ta n anna-net.

¹⁵ Adan en da a day ibdad Butros gər nəlkiman ən Ƴaysa, əmosnen temeday n awedan əd sanatat təmərwen, innasan: ¹⁶ «Imədrayan-in, əşşil ad andu awa inna Infas wa Zəddigan day Əlkəttaban irəw s əmi n ənnəbi Dawəd day salan ən Yahuza wa d-issəlalan aytedan win əbaznen Ƴaysa. ¹⁷ Fəlas kala day-naɣ iddun nakkanay inəmmuzal, amaran igrāw adagar-net day əşşəxəl wa dər-naɣ isanattaf Ƴaysa Əlməsix. ¹⁸ Aləs za wa, izzənza tawagost day azrəf wa igray day abakkad-net, dəffər awen uda day-as əs tədistanet, ibbəqqat, iffəzzat awa ihan tadistanet kul. ¹⁹ Aytedan kul win əxsarnen day Yerusalam əslən awen, har as tawagost ten əgan-as esəm day awal-nasan "Akaldama", alamaɣna tawagost ta n əzni. ²⁰ Amaran iktāb day əlkəttab wa n Əzzəbur as: "İqqəlet ahan-net əməjir, a tu-wər-iləs awedan iguz." İktāb day-as dəx as: "İggəzet awedan iyyan edag-net day əşşəxəl."

²¹ Day adi ilzām-ana ad nəsənnəfrən iyyan day meddan win dər nətidaw faw day şikilan n Əməli Ƴaysa, ²² a d-ibazan ɣur əzəl wa t-issəlmaɣ Yaxya day aman har əzəl wa ɣur-naɣ immədkal əs jənnawan. Aləs wa za nəsənnəfrən da, ad iqqəl təgəyya ən tanakra ən Ƴaysa day tamattant.»

²³ Əssəbdadan əşşin meddan əmosnen Yusəf was itawannu Barsabbas, gannin-as dəx Yustus, əd Matəyyas. ²⁴ Təzzar əttaran, ənnan: «Ya Əməli, kay a issanan awa ihan iwallan n aytedan kul, sakn-ana wa təsannafrana gər meddan win əşşin a, ²⁵ fəl ad iggəz əşşəxəl n anammazul wa igmad Yahuza ikka edag wa imosan wa-net.» ²⁶ Əgan şişəxeren, əbaznat Matəyyas, iddun day nəmmuzal win maraw d iyyan.

2

Assa n Infas wa Zəddigan

¹ As d-iɣlay əzəl n əmud ən Kəl-Əlyəhud was itawannu Fantəkawt, əddəwan nalkiman ən Ƴaysa ketnasan day adag iyyanda. ² Wala a ihogan igmad-du əjit iyyan ijənnawan olən d in aɣu issohen, itkar ehan ketnet wa day əqqiman.

³ Nafalalan-asan d ilsawan olanen d in abalagleg ən təmsay, əmməzzayan ilsawan en; əkkulluk n iyyan iwar iyyan daḡ-san, ⁴ Idnay-tan Infas wa Zəddigan ketnasan, təzzar əssəntan awal daḡ awalan wər nəmos win-nasan, s əmmək was tan-ikfa Infas wa Zəddigan fərregat n awen. ⁵ As itaggu awen, aḡrəm ən Yerusalem əxsâran daḡ-as Kəl-Əlyəhud zizawatnen daḡ əddin a d-əgmâdnen ikallan n əddənet kul. ⁶ As əslan y awal wen, təddew-du tamattay tagget, təzzar isammaklal sər-san awen fəlas akkiyyan daḡ-san isallu i nalkiman əššewalan daḡ awal n akal wa d-igmad. ⁷ Iga sər-san awen əsəmməkləl labasan, gannin: «Xa! Aytedan a əššewalnen da, awak wərgəḡ ketnasan Kəl-Galilaya? ⁸ Mas za, akkiyyan daḡ-na isall-asan əššewalan awal ən marwan-net? ⁹ Ənta nakkanay əhân-anax aytedan a d-əgmâdnen amaḡal ən Bartəya, d akal wa n Medəya, əd wa n Ałam, d aytedan əxsârnen daḡ akal wa n Mezobotaməya, əd wa n Yahudəyya, əd wa n Kabadokəya, əd wa n Fontəs əd wa n Asəya, ¹⁰ əd wa n Frijəya, əd wa n Banfiləya əd wa n Masar. Wiyyad əgmâdan-du akal ən Libəya daḡ ḡələyḡələyan n əḡrəm wa n Qərwan, wiyyad aytedan n Ərrum, ¹¹ wiyyad aytedan ən Kəret əd win Arabəya. Gər za win daḡ-na əmosnen Kəl-Əlyəhud wala deḡ aytedan a d-əhdânen s əddin wa n Kəl-Əlyəhud, ketnana nəsall-asan əmmâlan daḡ awalan-nana igitan ən tarna ən Məššina.» ¹² Ketnasan isimaklal sər-san awen, wər əssenən a ənnan, tinəmənnin: «Ma imos almaḡna n awa?» ¹³ Mišan ya wiyyad daḡ-san əgan daḡ nəlkiman tamakkakkayt, gannin: «Awen esmad n alḡanab a tan-isammaswadan.»

Təlɣutbat ən Butros əzəl wa n Fantəkawt

¹⁴ Təzzar ibdad Butros ənta əd nəmmuzal win maraw d iyyan, idkal əməsli-net iššewal i tamattay, inna: «Meddan ən Yahudəyya əd kawanay ketnawan win əxsarnen daḡ Yerusalem, aḡriwat awa igan da, təssəsəmam wəllen y awa dawan-z-anna da. ¹⁵ Meddan win wər əmməswadan, arat wa təḡilam əddi, fəlas taza alwaḡan win aḡora awa harwa da. ¹⁶ Kala kalar arat wa imal ənnəbi Yowəl a d-osan, as inna: ¹⁷ "Inna Məššina: 'Ənta da awa du-z-asin daḡ adan n əddənet win əlkamnen: a du-zəzzəbbəḡ Infas-in fəl i t-illa awedan, əssuḡələn maddanəwan d aššekkawan awa dasan-z-əməla; sənnəfilələḡ aratan əttinkalnen i mawadan-nawan, səssuḡa iḡmaran-nawan targəten. ¹⁸ Awalla, a du-zəzzəbbəḡ daḡ adan win den Infas-in fəl naḡbidan-in əd tənaxbiden-in təzzar əssuḡələn awa dasan-z-əməla.

¹⁹ Ad aḡax təlməḡjujaten daḡ jənnawan, aḡax aratan əmosnen alḡalamaten fəl amaḡal: Inḡəl əzni, tarḡu təmsay,

akku əhu ijənnawan. ²⁰ Təfuk ad tamattay, təqqəl šiyyay; tizway təllit šilat n əzni; izar-du adi kul y assa n əzəl zəwwəran ilân əlxurma wa issəbdad Əməli. ²¹ Amaran i igmayan dağ Əməli əlyillas ad t-igrəw."

²² Ya meddan n Israyil, səsəmat i salan win: Yaysa wa n Nazaret, aləs a imos as kawan-issikna Məşşina əs təlməxjujaten d aratan əmmittaynen, əd wiyyad əmosnen alyalamaten win as t-ikfa igi-nasan gar-ewwan as ənta a isannafran. Kawanay iman-nawan təssānam dağ adi. ²³ Aləs di, Məşşina di as tu-wər-illa a das-idrâgan a t-igan dağ fassan-nawan, imos awen arat ixtâs irəw, təgam iman-net s ətəwəsətəytəy wa tu-təsassagam i nəzzulam fəl təgəttawt. ²⁴ Mišan isənkərt-idu Məşşina, ikkas-t-idu dağ tarna ən tamattant fəlas wər t-illa əmmək as t-in-təttəf tamattant. ²⁵ Batu-net a dağ inna ənnəbi Dawəd irəw: "Hannaya Əməli dat-i faw, iha əxil-in fəl ad wər əxşədan man-in. ²⁶ Adi fəl falawasan man-in, təkna tədəwit iguz n awal-in, wala təxəssa-nin wər nəmos tamaylolt da ad tagu attama, ²⁷ id wər za tayyağ iman-in dağ alaxirat, wala değ tayyağ Əmizdag-nak tarqu təxəssa-net. ²⁸ Kay a di-issəknan tarrayt ta təha təməddurt. A di-təsəffəliwəsa wəllen əs tassağ ta dər-ək əgeğ."

²⁹ Imədrayan-in, ələx tarrayt n a dawan-agağ isalan dağ əkkâsağ aşşak n əmaraw-nana Dawəd n as, abatu, itawanbal-in. Əzəkka-net, har azalada illa gar-ena. ³⁰ Ənnəbi a imos, issān değ fəl arkawal wa fəl das-ihad Məşşina n as, ilkâm ad agu dağ təxmar-net iyyan dağ hayawan-net. ³¹ Dağ adi Dawəd inây dat alwaq tanakra n Əlməsix dağ təməttant, amaran isalan ən tanakra-net a dağ inna: "Wər din-itawayya dağ alaxirat, wala değ tərqa təxəssa-net." ³² Yaysa za wa, issənkərt-idu Məşşina gər nəmməttan, nakkanay nəggəyat adi. ³³ Idkal-tu Məşşina di n Abba-net ig-ay dağ əxil-net, ikf-ay Infas wa Zəddigan was iga arkawal-net, ənta amaran izazzabbat-t-idu fall-ana. Adi a imos arat wa təhannayam da, təsallim-as. ³⁴ Wərgəx ənnəbi Dawəd a ikkan ijənnawan, kalar ənta iman-net a innan: "Inna Əməli Məşşina y Əməli-nin: 'Yam dağ əxil-in, ³⁵ iket di ad taggağ izənga-nak daw daran-nak.'" ³⁶ Dağ adi akninet Kəl-Israyil kul masnat dağ as, Yaysa wa təttəytayam fəl təgəttawt, ənta a iga Məşşina Əməli d Əlməsix.»

³⁷ Idas awal wa iga Butros den iwallan n aytedan wəllen, ənnan-as ənta əd nəmmuzal win hadatnen: «Imədrayan-nana mas danay-ilzam igi-net?» ³⁸ Inn-asan Butros: «Utabat. Akkiyyan dağ-wan itəwəsəlməxət dağ aman

s esəm ən Үaysa Ёlməsix fəl ad təgrəwam təsureft ən bakkadan-nawan, təgrəwam təhəkkut ən Məššina təmosat Infas wa Zəddigan, ³⁹ ənta arkawal wa iga Məššina, kawanay as t-iga, kawanay əd hayawan-nawan d aytedan kul win əxsarnen dağ igəg, almağna aytedan kul win du-z-ağru Ёməli-nana Məššina əs man-net.» ⁴⁰ Har irəw Butros itagg-asan təlxutbat idgâz wəllen igann-asan: «Agəzat iman-nawan dağ aytedan əxrâknen ən nəllubas win azzaman a.»

Tassaq ta əgan məzzəgzan win azzarnen

⁴¹ Aytedan win əzzəgzannen s awa inna, tawasalmağan dağ aman, təzzar təttəy tiddawat ən məzzəgzan əzəl wen s adag ən karad gim n awedan. ⁴² Wər əgmedan ar əs tağaray daw nəmmuzal, əmosan arat iyyanda ketnasan, darrawan imensewan-nasan, tuzanan amensay wa n saktan, taggin šiwatriwen. ⁴³ Təkna tasa ən Məššina igguz n awedan kul, inəmmuzal değ taggin s əlqudrat ən Məššina təlməxjujaten aggotnen d aratan əmosnen alyalamaten.

⁴⁴ Ёrtâyan məzzəgzan ketnasan, ədrâwan değ arat kul wa əlan. ⁴⁵ Zanzin-in dağ ərrəzəğ-nasan, tuzanan attaman-net, ewal awen s awa dər togdâ addararat n akkiyyan dağ-san. ⁴⁶ Ёzəl kul tamanayan dağ Ahan wa Zəwwəran n Ёlyibada, nimannakan s awen. Tuzanan amensay wa n saktan dağ nan-nasan, darrawan değ imensewan-nasan dağ təfalawist əd tazdak n əwəl. ⁴⁷ Ёmmâlan Məššina, əssiğmaran-tan aytedan kul. Akk əzəl iššota Ёməli əljəməğat-nasan s aytedan win iğlas.

3

Təməzzəyt n anabdon iyyan

¹ Ёzəl iyyan iggəzzay Butros əd Yaxya s Ahan wa Zəwwəran n Ёlyibada y ad agin šiwatriwen šin tazzar. ² Alwaq wen da a dağ d-immeway aləs iyyan a d-ihəwan əd bəddən s əmi n Ahan wa Zəwwəran n Ёlyibada was itawannu: «Imi wa Ihossayan» itawasansa fəl ad igməy takutay dağ aytedan win tu-tagaznen. Akk əzəl itawasansu den. ³ As inay Butros əd Yaxya əbukən y iguz n Ahan wa Zəwwəran n Ёlyibada, a tan-itansay. ⁴ Idak-ku Butros əd Yaxya s asawad, inn-as Butros: «Ёswəd dağ-na.» ⁵ Ikna dağ-san asawad, iga attama n ad t-akfin arat iyyan. ⁶ Təzzar inn-as Butros: «Urəğ wala azrəf, wər tan-ələğ, mišan a kayakfa awa ələğ: Ёs tarna n esəm ən Үaysa Ёlməsix wa n əğrəm ən Nazaret, əbdəd jəwənkət!» ⁷ Təzzar ibaz Butros əfus-net wa n əxil, issəbdad-tu. Ёddaran-du daran-net əd təlazzen-net alwaq wen da. ⁸ Innad-du zəllat ibdad,

ijawankat. Iddew dər-san, əggazan Ehan wa Zəwwəran n Əlyibada, ijiwankat itaggad fəl tədəwit immâl Məššina. ⁹ Hannayan-tu aytedan kul ijiwankat immâl Məššina. ¹⁰ As din-əgran as, ənta a itaxamin xur əmi n Ahan wa Zəwwəran n Əlyibada was itawannu: «Imi wa Ihossayan», itənsay, əhagan, isammaklal sər-san awa t-igrawan.

Emel ən Butros i tamattay almaɣna n əzuzəy wa iga y anabdon

¹¹ Iгла aləs wa itawazozayan da iltāx dəx Butros əd Yaxya. Jiwankeŋ dəx tarrayt təfâlat as itawannu «ta n Suliman» as sər-san du-tozal tamattay ketnet. Igâ awen s aytedan əsəmməkləl labâsan. ¹² As inay Butros awen, inna y aytedan: «Meddan n Israyil, mafel ikna sər-wan awa əsəmməkləl? Təgâram dəx-na şittawen, təgâm dəx-na asawad n as nakkanay a izzozayan aləs wa əs fərregat-nana nakkanay iman-nana, madex nəzzozay-tu fəl aššaddat ən təksəda-nana Məššina? ¹³ Əməli n Ibrahim d Isəhaq əd Yaqub, Əməli ən marawan-nana, ənta a ikfan akli-net Ƴaysa əlxurma. Kawanay iman-nawan a t-igan dəx fassan, tənkuram-tu dat Bilatəs s ənta ikus-net a otas. ¹⁴ Awalla tənkuram Aɣadil di n Əmizdag, təgməyam a dawan-d-itəwəkkəs aləs n əməggi ən man. ¹⁵ Təgam iman ən wa ihakkin təməddurt. Ənta a d-issənkar Məššina dəx tamattant, nakkanay nəggəyat adi. ¹⁶ Əzəgzan-nana əs tarna n esəm ən Ƴaysa a ikfan aləs a təhannayam da, təzdâyam-tu şixurad-net. Illikan as əzəgzan əs Ƴaysa a ikfan aləs di şixurad-net kul dat-wan ketnawan. ¹⁷ Amaran imədrayan-in, əssânaɣ as əljəhəl a dəx təgam adi kawanay əd muzaran-nawan. ¹⁸ Mišan əssənət as irəw as iməl Məššina dəx mawan n ənnəbitan kul as Əlməsix ilzâm-tu ad inəy aɣazab, amaran issənda adi əs təməwit tədi da. ¹⁹ Dəx adi utabat tiksadam Məššina fəl ad iməs ibakkadan-nawan, ²⁰ izəzzəbbət-du fall-awan şimeren ən təsasmit, issuxəl-du Əlməsix a dawan-isinafran dat alwaq, almaɣna Ƴaysa. ²¹ Ilzâm-tu ad aqqam dəx jənnawan har d-asu alwaq wa dəx z'issuxəl Məššina arət kul əmmək-net wa azzaran, imâl awen irəw əs mawan n ənnəbitan-net di zaddognen.

²² Awalla a inna ənnəbi Musa: "Məššina, Əməli-nawan a dawan-d-isənnəfiləl iyyan ənnəbi ən şilat-in dəx mədrayan-nawan amaran ad təsəsəmam y awa dawan-z-annu kul. ²³ Awedan kul wa wər nəbbərdag y ənnəbi wədi, ad itəwəkkəs dəx tamattay ən Məššina, ihlək." ²⁴ Ənnəbitan kul win hadatnen, a d-ibazan xur ənnəbi Saməwel əd win t-əzraynen ketnasan, əmâlan arət wa igan dəx adan win. ²⁵ Kawanay a imosan iməkkusa n ənnəbitan win

den, təkkošem dey arkawal ən tassağ wa idkal Məşşina i marawan-nawan as inna y Ibrahim: "Tawşeten n əddənet kul ad əgrəwnat albaraka s əssəbab n əzzurrəyya-nak."²⁶ Kawanay as d-isannafalal Məşşina Akli-net Үaysa dağ tizarat, issok-awan-t-id, fəl a kawan-akfu albaraka-net ikkəs akkiyyan dağ-wan dağ tarrayt ta n əşşur.»

4

Tebadday ən Butros əd Yaxya dat Asaggawar wa Zəwwəran

¹ Harwada išşewal Butros əd Yaxya i tamattay as fall-asan əhan limaman əddewan d əmuzar n aytedan win tagaznen Ehan wa Zəwwəran n Əlyibada əd Sadusaytan; ² ih-en alham n əsəssəyri wa taggin tamattay, əmmālan əs dad zamas Үaysa inkar-du dağ təmattant, wədi inəmməttan da a dağ-as d ənkaran. ³ Sattarmasan-tan əgan-tan dağ kasaw har ifaw fəlas ehad a igan. ⁴ Mişan ya əzzəgzanan aytedan aggotnen dağ win əslanen i təlxutbat ten, təzzar əqqalan məzzəgzan edag ən səmmos gim n aləs.

⁵ As affaw əmmənəyan muzaran ən Kəl-Əlyəhud, d əmyaran-nasan əd musanan n Əttawret dağ Yerusalam. ⁶ Ih-en Xânan wa n Əlimam wa Zəwwəran əd Kayif, əd Yaxya d Alaskandər d aytedan n aqaywan n Əlimam wa Zəwwəran ketnasan. ⁷ Əssəbdadan Butros əd Yaxya garesan, əsəstanan-tan ənnan-asan: «Ma ilan tarna madex esəm was təgam adi?» ⁸ Təzzar inn-asan Butros idkâran Infas wa Zəddigan: «Ya imuzaran ən tamattay-nana d əmyaran n İsrayil, ⁹ əzalada nəbdâd dat asaggawar wa fəlas nəga əmazal olâğan imosan tilalt y awedan ibdânan, amaran ilzâm-ana ad nəməl əmmək was itawazozay. ¹⁰ Əssənat za ketnawan, kawanay d aytedan n İsrayil kul as, aləs wa ibdadan dat-wan da wər ila malad waliyyan, tarna n esəm ən Үaysa Əlməsix wa n Nazaret a t-izzozayan, wa tətəytayam fəl təgəttawt, issənkər-t-idu Məşşina dağ təmattant. ¹¹ Үaysa, ənta a imosan "təhunt ta din-təgaram kawanay win makrasan, amaran ənta a təqqalat təhunt ta təkbalat ehan." ¹² Ənta qas a iyallasan, amaran wər ikfa Məşşina gər jənnawan d amağal esəm n awedan iyyan was za nəyləs ar wa-net.»

¹³ As ənayan taholat ən Butros əd Yaxya awal isammaklal sər-san awen fəlas əgran as aljahilan a əmosan, əssânan dey as aytedan a əmosan as kala tiddawan əd Үaysa, ¹⁴ mişan wər t-illa as əfrâğan a dasan-t-annin fəlas han-nayan aləs wa itawazozayan ibdâd den qur-san. ¹⁵ Təzzar

əkkasan-tan daɣ ahan wa daɣ immənay asaggawar, amaran ad tinəməggin šinaden. ¹⁶ Gannin: «Ma za nagu y aytedan a? Illikan as ənâyan Kəl-Yerusalām kul təlməxjujat zəwwərat ta əgan, amaran wər nəfreg əsəbbəhəw-net. ¹⁷ Mišan ya fəl ad wər wəziwəzan salan n awen daɣ tamattay kul, daɣ adi agiwatana y-asan šisəksədawen fəl a du-wər-ələsan adakal n esəm ən Ƴaysa dat awedan waliyyan.»

¹⁸ Təzzar sassaxran-tan-du, ərxaman-asan fəl a du-wər-ələsan adakal n esəm ən Ƴaysa wala deɣ əsəssəxri n arat a t-iqqâlan. ¹⁹ Mišan inn-asan Butros əd Yaxya: «Kawanay iman-nawan ma tənnam: Məni daɣ aratan win wa oɣadan dat Məššina: awak əbərdəg y-awan meɣ əbərdəg i Məššina? ²⁰ Nakkanay za, wər nəfreg ad nayyu emel n aratan win nənəy əd win as nəsla.» ²¹ İlas-asan asaggawar igi n təsəksədawen, amaran oyyan-tan, id wər əgrewan əsarū fəl tan-əwwəddaban. Əgân awen fəl əddəlil n aytedan, fəlas aytedan en ketnasan taggin i Məššina təmmalen fəl awa igan den. ²² Ənta aləs wa igan təməzzəyt təmosat təlməxjujat ten, elan-net ogaran əkkozat təmərwən n awatay.

Šiwatriwən ən məzzəgzan əs Ƴaysa a dasan-olaman fəl man

²³ İtawayya Butros əd Yaxya ɣas, əkkan imidawan-nasan, əsoɣalan-asan awa dasan-ənnan muzaran ən limaman d əmɣaran ən Kəl-İlyəhud. ²⁴ As əslan i salan win, jajjayan daɣ təwatray ta, s əwəl iyyanda, ənnan s afalla: «Ya Əməli, kay a d-ixlakan ijənnawan d amaɗal, əd gərwan d awa tan-ihan kul, ²⁵ kay a innan əs tarna n İnfəs wa Zəddigan s əmi n amaraw-nana akli-nak Dawəd: "Mafel ɣišəšatnat addawlaten n əddənet, tagginat təməttiwen šinaden wər nənfə wala? ²⁶ Əbdadan mənokalən n əddənet, əddəwan deɣ muzaran daɣ adag iyyanda, fəl ad ammaddin Əməli d Əlməsix-net." ²⁷ İd illikan as, aɣrəm wa da, a daɣ immənay Herod əd Fons Bilatəs əntanay əd təməttiwen šin nəzzulam əd šin İsrayil, əmməddan Ƴaysa, imosan Akli-nak zəddigan, wa təgeɣ Əlməsix. ²⁸ İmos awen igi n arat ketnet was təxtasa fəl igi-net dat alwaq əs tarna-nak əd tara-nak. ²⁹ Amaran əmərədda Əməli, əswəd daɣ təsəksədawen šin dana-taggin, təzzar təssəhəlay-ana wəllen nakkanay an eklan-nak emel n awal-nak, ³⁰ tilalay-ana əs tarna n əfus-nak fəl ad nəzzuzəy aytedan, nagu təlməxjujaten d aratan əmosnən alɣalamaten s esəm ən Ƴaysa, Akli-nak Zəddigan.» ³¹ As əxradan təwatray-nasan inagaynagay adag wa daɣ əddəwan, idnay-tan İnfəs wa

Zəddigan ketnasan, təzzar ad əmmâlan awal ən Məşşina şî wala tasa.

Tartəyt ta əgan məzzəgzan

³² Əljəməxat ta n məzzəgzan ketnet tənimmannak təmos arat iyyanda. Wər tan-iha i igannin awa ilə, i-net ɣas-net, kalar ədrâwan arat kul wa əlan. ³³ Tagayyen nəmmuzal əs tarna zəwwərat fəl tanakra n Əməli Ƴaysa daɣ təmattant, ikf-en deɣ Məşşina ketnasan arraxmat-net s igət. ³⁴ Əljəməxat en wər tat-iha i iddiraran əs wala, fəlas win daɣ-san əlanen inan madeɣ şiwəgas zanzan-tan-in, tawayan-du attaman-nasan, ³⁵ hakkin-tu i nəmmuzal, amaran itəwizən gər məzzəgzan ewâlan dəgran-nasan s awa dər ogdanat təməxutar-nasan. ³⁶ Awen da a iga aləs iyyan igân Yusəf imosan iyyan daɣ Kəl-Lebi n akal ən Qıbrus. Ənta as əgan nəmmuzal təsəmmədəq Barnabas, almaɣna «Ənalam fəl man» ³⁷ İzzənz-in tawagost təhat təlanet, eway-du attaman-net ikf-ay i nəmmuzal.

5

Bahu wa iga Ananəyâs əd Safira

¹ İll-ay aləs iyyan igân esəm Ananəyâs a din-izzinzan, ənta əd təntut-net Safira, tawagost-net, ² təzzar inamarda əd təntut-net fəl a din-ittəf arat daɣ əzrəf wa din-tənza, eway-du awa hadan, ikf-ay i nəmmuzal. ³ Inn-as Butros: «Ananəyâs, mafel as toyyeɣ Aşşaytan iga y əwəl-nak iguz ogdân d awa, ewad daɣ-ak ad taga y İnfas wa Zəddigan bahu s iduf wa din-təgeɣ arat daɣ əzrəf wa din-tənza tawagost-nak? ⁴ Harwa tat-in-wər-təzzənza, wərgəɣ təlanak a təha? As tat-in-təzzənza deɣ, wərgəɣ azrəf wa tat-in-təzzənza kay a ittafan tanat-net? Daɣ adi, mafel təsəmarkasa daɣ əwəl-nak igi n əmazal ogdân d awa? Wərgəɣ aytedan as təgeɣ bahu, kalar Məşşina əs tu-təgeɣ.» ⁵ As isla Ananəyâs i batu ten, ifataqqat, əgmadan-tu man. Təggaz tasa zəwwərat aytedan kul win əslanen awen. ⁶ Təzzar osan-t-idu meddan ən mawadan, əgan-tu daɣ şifit, əqlan dər-əs ənbalan-t-in.

⁷ Edag ən karadat assayaten dəffər awen, tosa-du təntut n Ananəyâs, wər tessen fəl awa igan. ⁸ İssəstan-tat Butros, inn-as: «Safira, əməl-i, awak tawagost-nawan azrəf wa tat-in-təzzənzam, ənta da da ketnet?» Tənn-as: «Awalla, ənta əddi da.» ⁹ Təzzar inn-as Butros: «Manəmmək əs tənəmmannakam fəl igi ən taremt y İnfas wa Zəddigan? Səsəm, meddan win din-ənbalnen aləs-nam əllân dat əmi n ahan; a kam-awəyan kam da.» ¹⁰ Təfataqqat tamazayt

ten da ɣur daran ən Butros, əgmadan-tat man. Əggazan-du meddan winad ən mâwadan a, osan-tat-du wər tədder, ewayan-tat ənbalan-tat-in dəgma n aləs-net. ¹¹ Eway-du awen as təggaz tasa labasat Əlkənisat ketnet d aytedan kul win əslanen awen.

Inəmmuzal dat Asaggawar wa Zəwwəran

¹² Taggin nəmmuzal təlməxjujaten aggotnen əmosnen aɣalamaten d aratan aggotnen simaklalten daɣ aytedan. Tamanayan faw məzzəgzan əs Ƴaysa ketnasan, daw tafala n Ahan wa Zəwwəran n Əlyibada tas itawannu «ta n Suliman». ¹³ Əssiɣmaran-tan aytedan mišan wər-t-illa i ihalan a tan-in-ihaz. ¹⁴ Dər iga awen da ya, tittəyan s aytedan əknanen igət əgânen daɣ meddan əd tədoden win zagzannen s Əməli. ¹⁵ Har as, tamawayan-du miranan tawasansin daɣ tessaten madəɣ şisalaten fəl afay ən tarrayen ən Yerusalam, fəl a din-tawəd kuddeɣ telay ən Butros wiyyad daɣ-san as d-illam den. ¹⁶ Tazalan-du deɣ aytedan əknanen igət ən ɣərman win əhoznen Yerusalam, əs Yerusalam ewâyan imiranan-nasan d aytedan-nasan win əssəranan kələsuf. Ketnasan deɣ tiwəzuzəyan.

¹⁷ Əggaznat təsmiten labasnen Əlimam wa Zəwwəran ənta d aytedan kul win təximit-net, ən taggayt ta n Sadusaytan, ¹⁸ təzzar ənkarən sattarmasan inəmmuzal əgan-tan daɣ kasaw dat awedan kul. ¹⁹ Mišan osa-du angalos n Əməli ehad, olam şisəhar ən kasaw, ikkas-tan-du, inn-asan: ²⁰ «Akkiwat Ehan wa Zəwwəran n Əlyibada, təməlam y aytedan isalan kul win təməddurt ta taynayət.» ²¹ Əgan nəmmuzal awa dasan-itawannan, ənzəyan s Ahan wa Zəwwəran n Əlyibada, a daɣ-as sasaxrin aytedan.

As d-osa Əlimam wa Zəwwəran ənta d aytedan win təximit-net, sassaxran-du Asaggawar wa Zəwwəran almaɣna iɣmaran kul win əmosnen şiggətawen ən Kəl-İsrəyil, amaran əssəgmayan inəmmuzal əs kasaw. ²² Osan-in maşşaxalan win tan-əgmaynen ehan ən kasaw, mišan wər tan-in-ogezan daɣ kasaw, təzzar əqqalan əgan isalan, ²³ ənnan: «Nos-in kasaw ketnet itimantammat, əbdâdan sojitan win t-ogaznen dat mawan-net, mišan as nolam təsəhərt ən kasaw, wər daɣ-as in-nosa awedan waliyyan.» ²⁴ As isla kabtan ən sojitan win tagaznen Ehan wa Zəwwəran n Əlyibada, əd muzaran ən limaman i salan win den, əqqanan ɣafawan-nasan, ad samadranan daɣ awa z'iqqəl awen. ²⁵ Əhân ten da as tan-d-osa awedan, inn-asan: «Səsəmat! Meddan win təgam daɣ kasaw, əbdâdan daɣ Ahan wa Zəwwəran n Əlyibada, sasaxrin daɣ-as tamattay.»

²⁶ Təzzar igla kabtan alwaq wen da iddêw əd sojitannet əbazan-du inəmmuzal, mişan wər tan-ədesan fəlas əksudan a sər-san du-təggəd tamattay əntanay en da, tanğ-en əs zabaw ən təgur.

²⁷ As tan-d-ewayan, zazzakken-tan dat Asaggawar wa Zəwwəran, təzzar issəstan-tan Əlimam wa Zəwwəran, ²⁸ inn-asan: «Wərgəx nərğâm-awan wəllen fəl a imosan əsəssəxri n awedan waliyyan dağ batu n esəm di? Mişan ənəyat awa təgam! Təzawwazawazam dağ Yerusalam ketnet əsəssəxri-nawan, tərâm a dana-təssəwaram tamattant n aləs di.» ²⁹ Inn-asan Butros əd nəmmuzal win hadatnen: «Məşşina as danax-ilmam a das-nabbardag, wərgəx aytedan! ³⁰ Məşşina, Əməli ən marawan-nana a d-issənkaran Ƴaysa was təgam iman-net s ətəytəy wa tu-təgam fəl təgəttawt. ³¹ Ənta a da, a idkal Məşşina ig-ay dağ əxil-net, ig-ay Əmuzar d Əmaylas y ad igrəw i Kəl-İsrayil tarrayt ən tətubt, əgrəwan təsureft ən bakkadan-nasan. ³² Nəmos şigəyyawen n awen, nakkanay d Infas wa Zəddigan ihakku Məşşina y aytedan win əlkamnen i taranet.»

³³ As əslan muzaran n Asaggawar wen i batu ten, iggaz-tan alham labasan, əran a dağ-san əkkasan iman. ³⁴ Mişan ibdad iyyan dağ-san ən taggayt ta n Fərisaytan igân esəm Gamaləyel imosan əmusan zəwwəran n Əttəwret, əssiğmaran aytedan kul, omar s ad təwəkkəsan nəmmuzal dağ ahan wa dağ iga əmənəy har din-əgin arat n amazay, ³⁵ amaran inn-asan: «Kəl-İsrayil, ənkədat y a was təräm a tu-tagim i meddan en. ³⁶ Wər irəw adi as d-inkar aləs igân Tedas inna ənta imos arat, təzzar əlkaman-as meddan ewâdnen əkkozat təmad n aləs. Ənta za iman-net itawənğa kərəz, meddan win das-əlkamnen wazawazan, ibənnan awen ketnet. ³⁷ Dəffər-əs, dağ azzaman win tuddant, inkardu iyyan aləs igân esəm Yahuza wa n Galilaya, isaffallag aytedan aggotnen, əlkaman-as. Ənta da za, itawənğa kərəz, təzzar wazawazan aytedan kul win das-əlkamnen. ³⁸ Dağ adi dağ talğa ta, ənnəsixa wa dawan-z-aga: Əgmədat batu ən meddan en, tayyim-tan ad aglin; fəlas kud arat wa ənnəyən madəy wa taggin wər imos ar arat ərân aytedan a, wədi ad ibərəjjət. ³⁹ Mişan kud arat a imos as Məşşina a t-iran, wədi wər təfregam əzərəz-nasan. Ənkədat, a din-wər-tagrim iman-nawan təmosam əllid ən Məşşina.» Təzzar əttafan ənnəsixa-net. ⁴⁰ Sassaxran-du inəmmuzal, sassagan-asan şiwuit labasnen s ələkkud. Dəffər awen ərğaman-asan fəl a du-wər-ələsan adakal n esəm ən Ƴaysa, amaran oyyan-tan.

⁴¹ Əfalan nəmmuzal ehan wa dağ itamanay Asaggawar

wa Zəwwəran, əknân tədəwit id Məşşina a tan-issəharan d ad tawasaknin mälka fəl əddəlil ən Үaysa. ⁴² Akk əzəl, gər za daḡ Ahan wa Zəwwəran n Əlyibada wala deḡ daḡ nan n aytedan, wər kala əmməzzayan d əsəssəḡri d igi ən salan n Əlinjil a tan-imosan âs Үaysa ənta a imosan Əlməsix.

6

Əssa meddan win tawasanafrannen y ad ilalan i nəmmuzal

¹ Azzaman en, inalkiman ən Үaysa tittəyan wəllen. Eway-du awen as gatantanan Kəl-Əlyəhud win əşşewalnen təlyunant fəl Kəl-Əlyəhud win əşşewalnen təlyibrit fəlas wər tətawagga masnat tolâḡat daḡ tədoden-nasan šin as aba meddan-nasnat ḡur təzunt ta tawaggin mensewan akk əzəl. ² Adi a fəl sassagan nəmmuzal win maraw d əşšin əmənəy təha əljəmaḡat ən nalkiman ən Үaysa kul, ənnan-asan: «Wər ihor ad nayyu emel n awal ən Məşşina fəl ad nannataf əd təzunt ən mensewan. ³ Daḡ adi imədrayan-nana, sənnəfrənat daḡ-wan əssa meddan as təga masnat fəl əlluḡ-nasan, idkâr-tan Infas wa Zəddigan, əmosan imusanan, a tan-nəsənnəttəf d əşşəḡəl wədi. ⁴ Nakkanay amaran nəgməd s igi ən təwatriwen d əşşəḡəl wa n amel n awal ən Məşşina ḡas.» ⁵ Tanat ten, toḡgam-tat aljəmaḡat ketnet. Təzzar sannafranan Əstefanos imosan aləs izzigzanan wəllen, idkâr-tu deḡ Infas wa Zəddigan, əd Filibus əd Frukurus əd Nikanor əd Timun əd Barmenas əd Nikolayos wa n əḡrəm n Antəyoxəya as kala-net əddin wa n Kəl-Əlyəhud a iha. ⁶ Təzzar əssəbdadan-tan dat nəmmuzal, əssəwaran-tan nəmmuzal ifassan, əttəran-asan. ⁷ Ad itəyttəy ətəwəsəḡmar wa itawaggan y awal ən Məşşina. Təzzar əttəyan nalkiman ən Үaysa wəllen daḡ Yerusalām, fadda əhdan-du limaman ən Kəl-Əlyəhud aggotnen əs Үaysa, əzzəgzanan as Əlməsix a imos, əlkaman y awas omar.

Ətərməs n Əstefanos

⁸ Əstefanos aləs a imos iknân agaraw n arraxmat əd tarna ən Məşşina. Itamazal dat aytedan aratan simaklalnen əd təlməḡjujaten əmosnen alḡalamaten zawwarnen. ⁹ Təzzar ənkaran-du aytedan wiyyad n ahan n əlyibada ən Kəl-Əlyəhud was itawannu «wa n Dərfan» âs wiyyad daḡ-san Kəl-Əlyəhud ən Qərwan, wiyyad in əḡrəm n Alaskandrəya, wiyyad in akal wa n Kilikəya əd wa n Asəya, ad tamazayan d Əstefanos. ¹⁰ Mišan wər t-illa a dər din-əkkân masnat ta t-ikfa Infas wa Zəddigan. ¹¹ Təzzar ərzaman i meddan wiyyad daḡ əssir fəl ad əssəwaran Əstefanos bahu, ann-in:

«Nəsl-âs itaggu batuten əmosnen ikus ən tarna i Məşşina, əmosnat deḡ iba n safrar n ənnəbi Musa.» ¹² Əgan s awen alham daḡ tamattay əd muzaran ən Kəl-Əlyəhud əd musanan n Əttəwret. Wər isla Əstefanos wala as t-id-osan aytedan, əbazan-tu. Ewayan-tu s Asaggawar wa Zəwwəran ən Kəl-Əlyəhud. ¹³ Təzzar əssəbdadan şigəyyawen ən bahu, ənnanat: «Aləs wa, wər itəməzzəy d abayak n ahan wa zəddigan [wa] d Əttəwret. ¹⁴ Igmâd aşşak as nəsl-âs as inna, ilkâm ad ijəbbərəjjət Ƴaysa di ən Nazaret di ehan wa, isəmməttəy alḡadaten şin dana-d-oyya Ənnəbi Musa.» ¹⁵ Əgaran aytedan ketnasan win asaggawar şittawen daḡ Əstefanos, iqqal sər-san udəm-net zun in angalos.

7

Təlxtubat n Əstefanos dat Asaggawar wa Zəwwəran

¹ Təzzar issəstan Əlimam wa Zəwwəran Əstefanos, inn-as: «Awak aratan win tidət?» ² Inna Əstefanos: «Kawanay imədrayan-in d abbatan-in, səsəmat-i! Məşşina di n əməli ən tanaya, ənta as kala a d-inafalal y amaraw-nana Ibrahim harwa iha akal wa n Mezobotaməya, dat təməxsurt-net daḡ akal wa n Xaran. ³ Inn-as: "*Əgməd akal-nak əd marwan-nak, takkaḡ akal wa kay-z-assakna.*" ⁴ Təzzar igmad Ibrahim akal wa n Kasdaytan, ixsar daḡ wa n Xaran. Dəffər iba n abba-net a t-id-isaggalat Məşşina s akal wa da daḡ təxsaram da azalada. ⁵ Akal wa, wər daḡ-as ikfa Məşşina Ibrahim edag as z'iggəzan təkəsət-net, wala ḡas edag daḡ issənsa adar-net, mişan idkal-as Məşşina arkawal n *a das-t-akfu ənta d əzzurrəyya-net*, kuddeḡ as alwaḡ wen, wər ila Ibrahim ara waliyyan.

⁶ Ənta da awa inna Məşşina: "*Thayawan-nak ad əxsəran daḡ akal a daḡ əmosan iḡərab, əqqəlan daḡ-as eklan, ad tawazaxazzaban har aḡin əkkozət təmad n awatay.* ⁷ Mişan *addawlat ta tan-təgat eklan, nak iman-in a tat-z-abəzan s əşşəriḡa, dəffər adi, əkkəsaq-qan-du daḡ-as, əḡbədan-i daḡ adag wa da.*" ⁸ Təzzar inamagga Məşşina d Ibrahim arkawal ən tassaḡ s ənta as imos əmənəkəd ejwal-net. Adi a fəlas, as ihəw barar-net Isəhaq isammankad-tu əzəl wa n əttam dəffər təhəwt-net. Iga Isəhaq awen da i barar-net Yaqub, Yaqub deḡ iga awen da i bararan-net əmosnen maraw d əşşin, win əmosnen aljadan-nana. ⁹ Ənkaran meddan win əmosnen aljadan-nana əmmənzaḡan amadray-nasan Yusəf, təzzar əzzənzən-t-in, immeway s akal ən Masar; mişan issan daḡ-as Məşşina. ¹⁰ Ikkas-t-idu Məşşina daḡ təməḡutar kul şin iggaz. Ikf-ay masnat, d udəm ḡur

Firɣawna wa n əmənokal ən Masar, har as ig-ay Firɣawna daw-əs, izzozar-tu y akal ən Masar d aɣaywan-net ketnet.

¹¹ Dəffər awen, iga laz daɣ akal ən Masar ketnet, ənta əd wa n Kanan. Ad taɣazzaban aytedan wəllen, aba i meddan win əmosnen aljadan-nana a ətšan.

¹² As isla Yaqub as Masar tah-et təbzəst, izammazal sər-əs meddan win dana-sahhayawnen, imos awen iki-nasan y-as wa azzaran. ¹³ Ƴur iki-nasan Masar wa n əššin, ad izzəzday Yusəf iman-net i mədrayan-net, əggazan deɣ salan Firɣawna n aɣaywan wa d-igmad Yusəf.

¹⁴ Issəgmay Yusəf abba-net Yaqub əd marwan-net kul, əmosan əssayat təmərwen n awedan əd səmmos. ¹⁵ Təzzar iras Yaqub akal ən Masar, s ənta a daɣ t-aba, aba daɣ-as deɣ imarawan-nana. ¹⁶ Əmmewaynat təxəswen-nasan s əxərəm ən Šəkem, tawanbalnat daɣ əzəkka wa izzənza Ibrahim azrəf wa ibalalaxan ɣur maddanəs ən Xamor daɣ Šəkem, y ad iqqəl tanbəlt-net.

¹⁷ As d-ihoz alwaq wa daɣ z'assandu Məššina arkawal wa fəl ihad y Ibrahim, tamattay-nana tətətəy, təmôs taxlək tagget daɣ Masar, ¹⁸ har "*iggaz iyyan əmənokal wər nəssen fəl Yusəf taɣmar [ən Masar].*" ¹⁹ Ikkərras kəl-tamet-nana, iga i marawan[-nana] əzəxəzzəb labâsan har âs išahhaššaltan a din-tayyin bararan-nasan win əs səket əhəwan daɣ əsuf fəl ad wər əddəran. ²⁰ Azzaman en da a daɣ ihəw Musa, imos barar ihossayan, igrâwan arraxmat ən Məššina. Əttafan-tu marwan-net daɣ ahan-nasan har iga karadat təlil.

²¹ Oyyan-t-in marwan-net ɣas fəl afay n Ənnil, tənay-tu tabarart ən Firɣawna, tədkal-tu təg-ay barar-net, təg-as əsədwəl wa za tagu i barar ən tədist-net. ²² Itawasasaxru Musa masnat kul ta n Kəl-Masar, iqqal aləs ilân tənna daɣ awa igannu d awa itaggu.

²³ As iga əkkozat təmərwen n awatay əd təhəwt, iggaz-t-id a din-asu imədrayan-net Kəl-İsrayil inəy awa dər t-əllan. ²⁴ Inay iyyan daɣ-san tawagginat-as taršəxšad, oɣ-as šinaxən, iga iman n aw Masar wa das-itaggin ark aratan.

²⁵ Iɣil ad agrin mədrayan-net Kəl-İsrayil as Məššina a t-id-izammazalan sər-san fəl a tan-assafsu, mišan wər əgřen awen. ²⁶ Əzəl wa ilkaman i wen, osa-du əššin daɣ-san əknâsan. Igmay d a tan-aknu, nəməggin alxer, inn-asan: "Meddan, kawanay əmosnen imədrayan, mafel as tətinəmənɣim?"

²⁷ Mišan ibdaq-q-in aləs wa itaggin taršəxšad y əmidi-net, inn-as: "*Ma kay-igan əmuzar-nana wala əmašray-nana?*"

28 *Ἐγγәм а тәреҫ а di-tаgа tenаҫау та тәgeҫ у аw Masar wа n әndazәl?"*

29 Isla Musa i batu ten ҫas, тәggaz-tu tasa, igmad Masar ilyas daҫ akal wa n Midəyan, iqqal daҫ-as әҫәrib, izlaf daҫ-as igraw әššin bararan. 30 As әganat әkkozat тәмәрwen n awatay дәffәр awen, *"inafalal-as-du angalos daҫ tәfsәq tәbilaglagat daҫ taneray ҫur әdҫаҫ"* wa n Sinay.

31 Isammaklal әs Musa arat wa das-d-inafalal den. Itihaz-in za tәfsәq fәl ad annaflay daҫ awen, as isla y әmәsli n Әmәli Mәššina as das-inna: 32 *"Nak а imosan Mәššina әn marawan-nak, Әmәli n Ibrahim, d Isәhaq әd Yaqub."* Tәndaw taysәst Musa ab'as ihal ad ilәs asawad daҫ tәfsәq en. 33 *Inn-as deҫ Әmәli: "Әkkәs iҫateman-nak, fәlas edag wa daҫ tәbdadaҫ әddi amaҫal zәddigan а imos."*

34 *Ἐγγәууанаҫ аҫаzab wa tәtaggu tamattay-nin daҫ Masar, әslәҫ deҫ i hәрәrrәkitan-nasan. Ezzәbbe-du fәl а tan-assafsa. Әmәрәdda ihaz-du, а kay-zәmmizәla әs Masar."*

35 Musa wen da, а әnkuran әs тәнna та das-әgan: *"Ma kay-igan әmuzar-nana wala әmašray-nana?"* Әnta en da za, а d-izammazal Mәššina y ad izar i Kәl-Israyil, isәddәrfәt-tan, әs tarna n angalos wa das-d-inafalalan daҫ tәfsәq. 36 Әnta en da, а tan-d-ikkasan daҫ Masar s aratan simaklалnen win itaggu әd tәlmәxjujaten әmosnen аҫalamaten әn tarna әn Mәššina. Iga aratan wiyyad simaklалnen әd tәlmәxjujaten әmosnen аҫalamaten ҫur aradaҫ wa әgan daҫ Agaraw was itawannu wa Zaggаҫan, igla itaggu awen da daҫ taneray har iga әkkozat тәмәрwen n awatay. 37 Musa en da, а innan i Kәl-Israyil: *"Ilkām а sәр-wan d-izәmmizәl Mәššina әnnәbi iyyan әn šilat-in, а kawan-du-z-igmәdan."* 38 As тәddew tamattay n Israyil daҫ taneray әn Sinay, әnta en da а ibdadan gәр marawan-nana win den d angalos wa das-iššewalan fәl әdҫаҫ wa n Sinay, тәzzar ikf-ay Mәššina awalan hakkinen тәмәddurt y а dana-tan-imәl. 39 Mišan ugayan marawan-nana s ad әlkәman y awa inna Musa, ugayan sәр-әs, saddaranan ad әqqәlan Masar. 40 Әnnan i Harun: *"Ag-ana imalan а z'әmәlnen dat-na, fәlas Musa wa dana-d-ikkasan daҫ akal әn Masar da, wәр nәssen awa daҫ-as in-igan."* 41 Adan en da а daҫ әgan әssәnәm igән тәмәwit а n abarkaw, әkatan fall-as. Isidawat-tan wәllen arat wa әgan әs fassan-nasan.

42 Tәzzar inamaggag dәр-san Mәššina, oyy-en әd man-nasan, әҫbadan тәfuk әd тәllit d etran, imos awen arat әnnән Elkәttaban, as әnnan: *"Ya Kәl-Israyil, awak nak as tәtaggim šizәgzam әd tәkutawen daҫ әkkozat тәмәрwen n awatay šin tәgam daҫ teneray?"* 43 *Wәrgеҫ ahaket n әssәnәm wa igan Molox а tewayam, әd šәššәlan n әtri wa*

igan Rəmfan wa n əssənəm-nawan, əmosnen əssənəman win təgam" fəl a tan-təxbədam! "*Adi fəl kawan-z-əstəxa har takəyam*" Babəylon. ⁴⁴ Amaran imarawan-nana win d-ikkas Məşşina daɣ Masar əggazan teneray, əlân əhaket wa n əmənəy əd Məşşina, was omar Məşşina Musa s ad t-əgu s əmmək wa t-issəkna. ⁴⁵ Ahaket en, iggaz-du əs marawan-nana win dəffər win den, azzaman win daɣ dasan-azzar Joswe, ewayan-tu s akal wa əbazan, s ənta a daɣ istəx Məşşina tawşeten dat-san. Iggaz ahaket wen akal en da har azzaman n ənnəbi Dawəd. ⁴⁶ Ənnəbi Dawəd igrāw arraxmat ɣur Məşşina. Ənta a igmayan daɣ Məşşina turagat n ad ikrəs ehan y Əməli ən Yaqub.

⁴⁷ Mişan ənnəbi Suliman a igrawan turagat ten, ikras ehan y Əməli Məşşina. ⁴⁸ Dər iga awen da ya, Məşşina di n Amadkol wər ixser daɣ a əkrasan fassan n aytedan. Adi a inna ənnəbi Isayas as inna: ⁴⁹ Inna Əməli Məşşina: "*Ijənnawan a əmosnen təxawit-in ta n taɣmar, amadal wər imos ar arat illan daw daran-in. Daɣ adi ma imos əzzənəf n ahan wa di-za-təkrəsəm? Madəx edag wa daɣ z'assanfa?*" ⁵⁰ Wərgəx əfus-in a d-ixlakan adi kul?"» ⁵¹ Harwa inn-asan Əstefanos: «Ya meddan win əqəssatnen, təxfəlam iwallan-nawan, tədbâxam şiməzzugen-nawan wər təzlayam d aytedan wər nəksud Məşşina, faw tugāyam s Infas wa Zəddigan. Adi da a əgan marawan-nawan. ⁵² Məni daɣ ənnəbitan wa wər zaɣxazzaban marawan-nawan? Əgan iman ən nəmmuzal ən Məşşina win əmalnen dat alwaq assa ən Wa Oɣadan, as kawanay əmərədda a t-ikkəddalan təgam iman-net. ⁵³ Kawanay win d-issoka Məşşina angalosan ewâynen əlqanun-net, mişan tugayam s a das-təlkəmam.»

Tamattant n Əstefanos

⁵⁴ As əslan i batu ten, iggaz-tan alham labasan, ad samadadan fəl alham n Əstefanos.

⁵⁵ Mişan ənta idkâran Infas wa Zəddigan, idkal asawad-net sa sər jənnawan, inay tanaya ən Məşşina, inay deɣ ɣaysa ibdâd daɣ əxil ən Məşşina. ⁵⁶ Təzzar inn-asan: «Ənəyat, ijənnawan ənnolaman! Hannayaɣ Ag Aggadəm ibdâd daɣ əxil ən Məşşina.»

⁵⁷ Əslan y awen ɣas, ad zayyakan ədbâxan şiməzzugen-nasan, əggadan-in ketnasan s Əstefanos, əbazan-tu. ⁵⁸ Əkkasan-tu daɣ əxrəm, ad t-əggaran əs təhun. Amaran meddan win fall-as əgəyyatnen, aləs n ammas igân esəm Talut a ɣur əssənsan ibərnaz-nasan. ⁵⁹ Əggâran Əstefanos əs təhun as ittar inna: «Ya Əməli ɣaysa, əqbəl iman-in!»

⁶⁰ Dəffər awen, igraraffat, idkal əməsli-net s afalla, inna: «Ya Əməli, a tan-wər-təssəwarax abakkad wa!» As inna awen, əgmadan-tu man.

8

¹ Amaran Talut ənta, iha win ərđanen s ətəwənxə n Əstefanos.

Təttəyt n Əlkənisat - Şiggəyyawen dəy Yahudəyya əd Samarəya

Ətəwədgaz d əwəziwəz ən məzzəgzan əs Ƴaysa

Əzəl wen da ad tənta təssust labasat fəl Əlkənisat ta təhat Yerusalam; təzzar wazawazan əlməsixitan ketnasan dəy kallan win Yahudəyya əd Samarəya. Wər d-iqqim dəy Yerusalam ar inəmmuzal. ² Osan-du meddan ən miksadan ən Məşşina, ənbalan-in Əstefanos. Ƴyyəwanan fall-as tala.

³ Talut ənta, issənta dəy əhluk n Əlkənisat. Irzag inan, ilabbay-du dəy-san meddan əd tədoden, iggar-tan dəy kasaw.

Emel ən Filibus isalan win Əlinjil dəy Samarəya

⁴ Amaran iməzzəgzan əs Ƴaysa win təwazawaznen den, ərzagan akal ketnet əmmâlan y aytedan isalan win əhanen Əlinjil.

⁵ Awen da a d-əwayan Filibus s əxrəm iyyan n akal ən Samarəya a dəy-as immâl y aytedan isalan n Əlməsix. ⁶ As təsla aljamaxat tagget tənimmannakat y awal ən Filibus, tənay dəy təlməxujaten şin itaggu əmosnen alxalamaten ən tarna ta igraw, təsoxal-in ənnəyat-net aratan win igannu. ⁷ Fəlas aytedan aggotnen a əgmadan kələsuf. As tan-du-gammadan, takkasan imaslan labasnen. Tawazoza-yan dəy nəbdan əd məggudal aggotnen. ⁸ Eway-du awen tədəwit agget dəy əxrəm en.

⁹ Amaran əxrəm en, ih-ay aləs iyyan n amassaxar igân esəm Simxon itaggin işaxawan simaklalnen s aytedan ən Samarəya. Igannu ənta awedan zəwwəran a imos. ¹⁰ Aytedan kul sasaman-as s əlluş, gər za win wər nəla almaqan, wala win t-əlanen, gannin: «Aləs wa, tarna n Əməli tas itawannu ta togarat a imos.» ¹¹ Aytedan win sasaman-as s əlluş, fəlas irəw itagg-asan işaxawan sər-san simaklalnen.

¹² Mişan as əzzəgzanan i Filibus a dasan-immâlan isalan ən taxmar ta n Məşşina əd tarna n esəm ən Ƴaysa Əlməsix, tawasalməxan dəy aman, meddan harkid tədoden. ¹³ İzzəgzan Simxon ənta da, itawasalməx dəy aman; iltəx dəy Filibus. Əqqânnat alxalamaten ən tarna əd təlməxujaten zawwarnen şin itaggu Filibus eyaf-net.

¹⁴ As əslan nəmmuzal dağ Yerusalam as Kəl-Samarəya əqbalan awal ən Məşşina, zammazalan sər-san Butros əd Yaxya. ¹⁵ As tan-in-osan, əttaran-asan a fall-asan d-izazzabben Infas wa Zəddigan, ¹⁶ fəlas harwa da wər tan-ihə i fəl d-izzibbat, ətəwəsəlməx xas a tawaggan dağ aman s esəm n Əməli Ƴaysa. ¹⁷ Təzzar a tan-isawar Butros əd Yaxya ifassan-nasan, garrawan Infas wa Zəddigan. ¹⁸ As inay Simxon as, Infas wa Zəddigan əsəwər ən fassan ən nəmmuzal as itawagraw, igmay dağ-san a tan-akfu azrəf, inn-asan: ¹⁹ «Akfiwat-i nak da tarna tədi, tas i əssəwara ifassan-in ad igrəw Infas wa Zəddigan.» ²⁰ Inn-as Butros: «Təhləkəyet kay d əzrəf-nak, zama təxila təfrəgəy a tazzanza təhəkkut ən Məşşina. ²¹ Batu ta, wərmad tat-təhəy za wala tələx dağ-as tanat fəlas əwəl-nak wər oxdə dat Məşşina. ²² Dağ adi utab dağ əşşur-nak, tansəya Məşşina a dak-issurəf ark ənnəyat ta təhat əwəl-nak, kud immikkan adi. ²³ Fəlas hannayəx as, əwəl-nak wər idker ar tara n əddənət labasat d ibə n aqqad.»

²⁴ Təzzar inn-asan Simxon: «Ansəyat-i Əməli kawanay iman-nawan fəl a di-wər-abəz s awa tənnam.» ²⁵ Butros əd Yaxya win nəmmuzal, as əmalan y aytedan awa əggəyyen fəl Ƴaysa Əlməsix, əməlan-asan dəx awal n Əməli, əqqalan Yerusalam. Əmalan isalan n Əlinjil dağ təxarmaten aggot-nən ən Samarəya şin əhanen tarrayt-nasan.

Filibus d aləs iyyan n Etəyofəya

²⁶ Dəffər awen işşewal angalos n Əməli i Filibus, inn-as: «Ənkər tawəya əd tarrayt təkkât agala ta təgmadat Yerusalam tərəs təkka Gaza.» Tarrayt ten, təssuf. ²⁷ Inkar Filibus, igla. Ijiwankat dağ tarrayt as immənay d aləs n ənazum n akal n Etəyofəya imosan awedan zəwwəran dağ təymar ən Kandas ta n təmənokalt n Etəyofəya s ənta a innəttəfan d ərrəzəy kul wa n təmənokalt en. Osâ-du Yerusalam fəl a dağ-as ixbəd Məşşina. ²⁸ Iqqâl akal-net, iqqîm dağ amalankay-net, iğarru əlkəttab n ənnəbi Isayas.

²⁹ Inna Infas wa Zəddigan i Filibus: «Ihaz-in amalankay en, təmmudəxəy i məşşis» ³⁰ Ozal-in sər-əs Filibus. Isl-as iğarru əlkəttab n ənnəbi Isayas, inn-as: «Awak təgrex almayna n awa təxarra əddi?» ³¹ Inn-as aləs wen: «Manəmmək as tu-z-agra, wər t-illa awedan a di-t-iffəssaran?» Təzzar igmay dağ Filibus a d-iwən, aqqam dəgma-net. ³² Edag wa iğarru dağ əlkəttab en, ənta da awa inna: «Ittilway zun tilay s adag n agazam, təfastit a itaggu əjayol y aytedan lazzinen təduft-net a iga, wər d-igmed əlxərəf imi-net. ³³ Itiwasaras, wər das-əgen əşşərixa

wa dər ihor. Ma ifragan igi ən salan kul ən hayawan-net, id tətihazaraz təyrəst-net daɣ əddənet?»

³⁴ Təzzar issəstan aləs wa n Etəyofəya Filibus, inn-as: «Kay ak əməl-i, was iha ənnəbi šin-net da. Ənta iman-net meɣ awedan iyyan?» ³⁵ İbaz Filibus ɣur batu ten da, imal-as isalan n Əlinjil ən Ƴaysa.

³⁶ Əglân za, as d-osan edag əhân aman, təzzar inna aləs wa n Etəyofəya: «Aman da, ma di-z-igdəlan ad təwəsəlməɣ?» ³⁷ [Inn-as Filibus: «wər t-illa, kud təzzigzana s əwəl iyyanda.»] Inn-as aləs wen: «Əzzigzanay as Ƴaysa Əlməsix Barar ən Məššina a imos.»] ³⁸ Omar alwaɣ wen da s ad itəwəsəbdəd amalankay, əzzəbben ənta əd Filibus, əggazan aman, issəlməq-qu Filibus.

³⁹ Da da ɣas a d-əgmədan aman, ənta ad idkal Infas n Əməli Filibus, ab'as t-ihannay aləs wen, mišan igla daɣ tarrayt-net, ikna tədəwit. ⁴⁰ Filibus ənta, as din-igra iman-net iha aɣrəm n Azot. As t-igmad illil akal en itaggu daɣ ɣərman kul win əhanen tarrayt isalan n Əlinjil har osa aɣrəm ən Qaysarəya.

9

Talut ihdad-du

¹ As itaggu awen, Talut harwada isamahad fəl igi ən man ən nəttulab n Əməli Ƴaysa. Ikka Əlimam wa Zəwwəran, ² igmay daɣ-as a das-agu šira əs nan n əlyibada ən Kəl-Əlyəhud win əyrəm ən Damas əmosnen šira a t-əkfânen turagat s as, as igraw aytedan, gər za meddan wala šidoden, win əhanen tarrayt ta n Ƴaysa, a tan-ikrəd ilwəy-tan-du əs Yerusalam. ³ İkkâ za aɣrəm ən Damas, as t-in-ihoz, wər isla a igan as fall-as ibalazzat ənnur a d-igmədan ijənnawan. ⁴ İfataqqat, isla y əməsli wa das-innan: «Talut, Talut mafel as di-təzaxazzaba?» ⁵ Inn-as Talut: «Ma təmosay, Əməli?» İsla i wa das-innan: «Nak Ƴaysa wa təzaxazzaba. ⁶ İbdəd əggəz aɣrəm a dak-attamal awas kay-iwar igi-net.»

⁷ Meddan win əddewnen əd Talut əbdâdan, təgdal-asan tərəmməq awal, sallan y əməsli mišan wər hənnəyan awedan waliyyan.

⁸ İbdad-du Talut, ora šittawen-net, mišan indar-as anay ən wala. Kundaba as əbazan midawan-net əfus-net, əlwayan-tu har dər-əs əggazan Damas. ⁹ Har iga karad adan wər ihənnəy arat, wər itša za wər işwa.

¹⁰ Amaran Damas ih-êt ənalkim ən Ƴaysa igân esəm Ananəyâs. İyr-ay Əməli daɣ tərgət inn-as: «Ananəyâs!» İkkəwan-as inn-as: «Nak da, Əməli!» ¹¹ Inn-as Əməli: «Ənkər, təssəwəla əd tarrayt tas itawannu "ta toɣadat",

takkay ehan ən Yahuza, təssəstənaɣ d aləs n əxrəm ən Tarsa igân esəm Talut, id itansay-i daɣ alwaq wa da.
¹² Amaran inay [daɣ tərgət] aləs igân esəm Ananəyâs as t-id-osa, issəwar-tu ifassan-net fəl a t-id-iqqal asawad-net.»

¹³ Təzzar inn-as Ananəyâs: «Ya Əməli, aytedan aggotnen əgân-i isalan n aləs di, əd talbast tagget ta issəkna imizdagan-nak win əhanen Yerusalam. ¹⁴ Da da ila turagat n abbaz n aytedan kul win tattarnen s esəm-nak, amaran imuzaran ən limaman a t-əkfanen turagat ten.» ¹⁵ Mišan inn-as Əməli: «Aglu, aləs di nak a t-isannafran fəl a di-iməl y aytedan wər nəmos Kəl-Əlyəhud əd mənokalan-nasan, iməl-i dex i Kəl-İsrayil. ¹⁶ Nak iman-in as das-z-agay əzəxxəzzəb kul wa t-iwaran fəl əddəlil-in.»

¹⁷ Təzzar igla Ananəyâs har din-osa ehan, iggaz-tu, inay Talut, issəwar-tu ifassan-net, inn-as: «Amadray-nin Talut, Əməli Ƴaysa wa dak-inafalalan daɣ tarrayt ta du-təgeɣ, ənta a di-d-izammazalan fəl a kay-d-iqqəl asawad-nak, idnəy-kay Infas wa Zəddigan.» ¹⁸ Tamazayt ten da a daɣ d-ərtakan aratan olanen əd təfərənkwəwen daɣ şittawen ən Talut, təzzar iqqal-t-id asawad-net. İbdad, itawasalmaɣ daɣ aman. ¹⁹ Dəffər awen itša, əqqalnat-t-idu təxurad-net.

Tewaxlay ta iga Talut təgəyya ən Ƴaysa Əlməsix

Talut iha Damas

Iga arat n adan ɣur nalkiman ən Ƴaysa win əhanen Damas. ²⁰ Tarmâd as ikka Talut inan n əlɣibada win Kəl-Əlyəhud a daɣ-san immâl as Ƴaysa Barar ən Məşşina a imos. ²¹ Isammaklal awen s aytedan ad gannin: «Ak wərgəɣ ənta, as kala ibbənbay daɣ aytedan win tattarnen s esəm ən Ƴaysa daɣ Yerusalam ihallak-kan? Wərgəɣ wər t-id-eway s əxrəm wa, ar a tan-abəz, ilwəy-tan əs muzaran ən limaman?» ²² Mišan Talut ənta itisuhit əzəzgzan-net. Wər əssenən Kəl-Əlyəhud win Damas a das-ənnan daɣ əsəkni wa tan-itaggu as Ƴaysa ənta a imosan Əlməsix.

²³ As irəw Talut daɣ Damas, namaggan Kəl-Əlyəhud eɣaf fəl ad agin iman-net, ²⁴ mišan ittəmal-as awen. Ewadan daɣ tara ən tənaxay-net as das-ənkadan ehad ezal ɣur mawan n əxrəm. ²⁵ As ahad iyyan, ənkaran nəttulab-net əgan-tu daɣ əzmam zəwwəran, ərdafan daɣ-as aɣan, zazzabben-tu fəl aganna wa hadan n ayalla wa iɣlayan aɣrəm.

Talut iha Yerusalam

²⁶ As osa Talut Yerusalam, igmay d ad irtəy əd nalkiman ən Ƴaysa, mišan əwafan-tu ketnasan fəlas harwa da wər əzzəgzanan as iyyan daɣ-san a imos.

²⁷ Ibaz-t-idu Barnabas əs man-net, iddew dər-əs əs nəmmuzal, təzzar ig-asan isalan kul n əmmək was inay Talut Əməli Ҳaysa daҗ tarrayt ən Damas d awal wa das-iga, imal-asan deҗ igi wa iga isalan n Əməli Ҳaysa daҗ Damas wər t-illa i as tu-təha tasa-net. ²⁸ Alwaq wədi a dər-san irtay, itidaw dər-san daҗ Yerusalām. Itaggu isalan n Əməli Ҳaysa ši wala tasa ən waliyyan. ²⁹ Itiməšiwil Talut əd Kəl-Əlyəhud win əššewalnen təlyunant, itamazay deҗ dər-san; ad gammayan d igi ən man-net. ³⁰ As əslan mədrayan-net daҗ əzəgzan awen, əddewan dər-əs wiyyad daҗ-san s əҗrəm ən Qaysarəya, amaran əssokan-tu wa n Tarsa.

Tagadezt ta n Butros iməzzəgzan win Yahudəyya

³¹ Azzaman en, əgrāwan daҗ-san nalkiman ən Ҳaysa d Əlkənisaten alxer daҗ akal kul wa n Yahudəyya əd wa n Galilaya əd wa n Samarəya. Itasahat əzəgzan n Əlkənisaten, tagginat imazalan əssiҗmarnen Əməli, tittəynat deҗ əs tilalt n Infas wa Zəddigan.

Təmməzzəyt n Enəyas

³² Illil za Butros akal ketnet har iras təҗrəmt ta n Ludda fəl ad inəy imizdagan win daҗ-as əxsarnen. ³³ Inay daҗ-as aləs igān esəm Enəyas, igān əttam elan əd bəddən, wər kala igmad təssut-net. ³⁴ Inn-as Butros: «Enəyas, əbdəd tada təssut-nak, Ҳaysa Əlməsix izzozay-kay.» Ibdad Enəyas tamazayt ten da.

³⁵ Enayan-tu aytedan kul win təҗrəmt ən Ludda əd win azaway wa n Šaron, təzzar əhdan-du s Əməli.

Ətəwəsənkər ən Tabita daҗ tamattant

³⁶ As itaggu awen əҗrəm ən Yaffa təxsār daҗ-as tənalkimt ən Ҳaysa təgāt esəm Tabita, almaҗna n esəm wa daҗ təlyunant Dorkas, almaҗna «Tenert». Wər təgmed ar s igi ən mazalan olaynen əd təkutawen i maddararan. ³⁷ Adan en da a daҗ tərin, aba-tat. Tətawašarad, tətawasansa daҗ ahan wa n afalla ən suru. ³⁸ Dad imos as Ludda wər təggug Yaffa, as əslan nalkiman ən Ҳaysa win əhanen Yaffa as Butros iha Ludda, zammazalan sər-əs əššin meddan fəl ad t-ansəyan a tan-d-akku tarmâd. ³⁹ Inkar Butros iddew dər-san. As din-osa, ewayan-tu əs suru wa təha təҗəssa ən təntut, əkkanat-idu tədoden šin as wər ədderan meddan-nasnat hallinat, sakninat-tu šikadkaden əd səlsa wiyyad a dasnat-təga Dorkas harwa təddâr.

⁴⁰ Issərday Butros awedan kul, igaraffat ad itattar. As issənda təwatray-net, imalallay-du təҗəssa ən təntut ta aba, inna: «Tabita, ənkər-du», təzzar tora šittawen-net, tənay Butros, təqqim-du. ⁴¹ Izzal-as-in əfus-net, illil-as

əs tebadday, amaran iyra-du imizdagan əd tədoden šin as wər ədderan meddan-nasnat, issəkn-asan-tat təddâr.⁴² Itawasla awen daḡ əḡrəm ən Yaffa ketnet, təzzar əzzəgzanan aytedan aggotnen s Əməli.⁴³ Iha Butros Yaffa har irəw, illa ḡur aləs iyyan igân esəm Simḡon as imos əššəḡəl-net əšifəl ən gəškan.

İlkənisat əd təgəyya dat aytedan wər nəmos Kəl-Əlyəhud

10

Butros əd Korniləyas

¹ Aḡrəm ən Qaysarəya ih-ay aləs iyyan ən Kəl-Ərrum igân esəm Korniləyas, imos iyyan daḡ kabtanatan win azzarnen y agan ən sojitan was itawannu «İtaləya». ² Imos aləs iksudan Məššina, ixbâd-tu ənta d aytedan n ahan-net ketnasan, itaggu šikutawen aggotnen i Kəl-Əlyəhud, faw deḡ itattar əs Məššina. ³ As əzəl iyyan ḡur amaḡal ən karad alwaqan win tazzar, inafalal-as-du angalos ən Məššina, inay-tu as d-iggaz ehan-net, inn-as: «Korniləyas!» ⁴ Irmaḡ Korniləyas, igar šittawen daḡ angalos, inn-as: «Ya Məšši, ma tareḡ?» Inn-as angalos: «Šiwatriwen-nak əd təkutawen-nak əggəzzaynat əs Məššina, iqbâl-tanat. ⁵ Daḡ adi əmərədda, zəmmizəl meddan s əḡrəm ən Yaffa a dak-d-idawan d aləs iyyan igân esəm Simḡon as itawannu Butros, ⁶ inniftaḡan i Simḡon wa išafalan igəškan s ehan-net ihâ tagadamayt n agaraw.» ⁷ Ifal-tu angalos wa das-iššewalan ḡas, iyra-du imaššəḡalan-net əššin d iyyan daḡ sojitan win išašḡal imosan awedan iksudan Məššina, ⁸ issoḡal-asan awa igan kul, amaran izammazal-tan əs Yaffa.

⁹ Əhōzan-in aḡrəm əzəl wa hadan, as iwar Butros afalla ən taḡazamt attayan n ammas n azal fəl ad agu šiwatriwen. ¹⁰ Itattar den da as t-iggaz gələk, isaddaran a itša. Tawaggin-as-du mensewan as tu-tobaz tarna n Infas wa Zəddigan. ¹¹ Ogga ijənnawan as əmmoran, itawasaras-du daḡ-san arat olân d əfər zəwwəran itiwattafan s əkkozat təsəlkad-net, har dat-əs imal. ¹² Əhân-tu əzzənəfan ən mudaran kul win jawankatnen fəl amaḡal əd dəmərdəmaran əd gəḡad. ¹³ Təzzar isla y əməsli iyyan as das-inna: «Butros, ənkər, təgzəma, tatša!» ¹⁴ Mišan inn-as Butros: «Kala kala Əməli, id wər kala ad ətšəḡ a xaraman wala a immidasan.» ¹⁵ İlas tesalay y əməsli en as inna: «Awa issəxlal Məššina, wərgəḡ kay a tu-z-agin i xaraman!» ¹⁶ Har iga əməsli en y awen karadat tənnawen, amaran immədkal əfər en əs jənnawan.

¹⁷ Harwada iqqân awen eyaf ən Butros, isamadran day awa z'iqqəl almaɣna-net n awa das-d-inafalalan den, as d-əbdadan meddan win d-izammazal Korniləyas day əmi n ahan ən Simyon, dəffər as əssistanan əd dad illa. ¹⁸ Əyran-du məssawəs n ahan, əssəstanan-tan kud den da ad izzəbbat Simyon was itawannu Butros. ¹⁹ Harwada isamadran Butros day awa z'iqqəl almaɣna n arat wa das-d-inafalalan as [das]-inna Infas wa Zəddigan: «Ənəy! Meddan den karad a dər-ək sastannen. ²⁰ Ad wər təzləyay aytedan, əbdəd, tazzabbə, tidawa dər-san; id nak a tan-d-izammazalan.» ²¹ Təzzar izzəbbat-du sər-san Butros inn-asan: «Nak da as təsaggadam. Ma imos əddəlil wa kawan-d-ewayan da?» ²² Ənnan-as: «Korniləyas wa n kabtan ən Kəl-Ərrum a dana-d-izammazalan, imosan aləs oɣâdan, n əmiksad ən Məşşina, əssiɣmaran-tu Kəl-Əlyəhud ketnasan. Ənta as inafalal angalos zəddigan ən Məşşina omar-tu s a kay-issəgməy, tsaɣ-in ehan-net fəl ad aslu y awa za tanna.» ²³ Amaran izzogaz-tan-du Butros, isammagarat-tan. As affaw, iddew dər-san. Əddewan dər-əs arat day nalkiman ən Ƴaysa win n əxrəm ən Yaffa.

²⁴ As əzəl wa hadan ewadan aɣrəm wa n Qaysarəya. As din-osan da, iqqâl-asan Korniləyas ənta əd marwan-net d aytedan win dər ikna təmmidwa s ənta a tan-d-iyran. ²⁵ As zama din-iggâz Butros ehan, issəlkad-as-du Korniləyas, igaraffat ɣur daran-net, issəjad-as. ²⁶ Mişan issəbdad-tu Butros, inn-as: «Əbdəd! Nak aggadəm ɣas a əmosa.» ²⁷ Əggazan ehan mişawalan, os-in daɣ-as Butros aljamayət tagget. ²⁸ Təzzar inn-asan: «Təssânam kawanay iman-nawan as issixram əlqanun ən Kəl-Əlyəhud y iyyan daɣ-san tassaɣ madəɣ iguz n ahan n awedan wər nəmos iyyan daɣ Kəl-Əlyəhud. Mişan nak issosan-i Məşşina day as ad wər aɣay y awedan waliyyan iduf n as i xaraman wala immidas. ²⁹ Adi da fəlas, as di-təssəgməyam, əkkeq-qawan-du əddi da wər əgeɣ asarəw waliyyan. Amaran əmərədda əməlat-i əddəlil wa fəl di-təssəgməyam.»

³⁰ Inn-as Korniləyas: «Əzəl iyyan tattara daɣ ahan-in, ila adi əmərədda karad adan, wər əsley a igan as dat-i ibdad aləs ilsân isəlsa bilazlaznen. ³¹ Təzzar inn-i: "Korniləyas! Təwatray-nak təqbâl, şikutawen-nak dəy iqbâl-tanat Məşşina. ³² Day adi, zəmmizəl əs Yaffa, təssəgməya Simyon was itawannu Butros. Inniftay y aləs igân Simyon wa isafalan igəşkan ihân tagadamayt n agaraw." ³³ Təzzar əssəgməyaq-qay tamazayt tədi da, olâɣ dəɣ as du-toseɣ. Amaran əmərədda ketnana nəlla da dat Məşşina, fəl ad nəssəsəm y arat kul was kay-omar Əməli s a danaq-qtanna.»

Talxutbat ən Butros dağ ahan ən Korniləyas

³⁴ İşşewal Butros inna: «Əmərədda əgreq as, tidət dağ a imos as Məşşina wər izlay aytedan. ³⁵ Kalar awedan kul wa t-iksudan, itaggu awa oğadan, awedan wədi, ad t-iqbəl Məşşina, a təqqal tawşet-net. ³⁶ Issoka-du Kəl-İsrayil awal-net imosan isalan n Əlinjil, əmmâlnen isalan n alxer wa ihakku Ƴaysa Əlməsix, ənta wa n Əməli n awedan kul. ³⁷ Təssânam dağ awa igan dağ akal kul ən Yahudəyya, intâ-du adi dağ wa n Galiləya dəffər təlxutbat ta iga Yaxya y aytedan dağ batu n alamağ dağ aman; ³⁸ d əmmək was issəkna Məşşina aytedan as Ƴaysa wa n Nazaret a issannafran əs tahakkay ta t-iga Infas wa Zəddigan əd tarna. Təssânam değ dağ tilalt ta iga akal itamazal əlluğ, izuzəy aytedan kul win dağ innoda İblis, id tarna ən Məşşina a igrəw.

³⁹ Nakkanay inəmmuzal nəggəyat awa iga ketnet dağ əxrəm wa n Yerusalam d akal sa hadan wa n Kəl-Əlyəhud. Ənta wa itawataytayan fəl təgəttawt, aba-tu; ⁴⁰ issənkər-t-idu Məşşina əzəl wa n karad dəffər İba-net, ikf-ay turagat n ad itəwənəy iddâr. ⁴¹ Wərgəğ aytedan kul a t-ənaynen, kalar wər t-inay ar şigəyyawen şin isannafran Məşşina harwa dat alwaq, a tanat-imosan nakkanay win dər-əs ədrawnen tətay əd tassay dəffər tanakra ta d-iga dağ tamattant. ⁴² Təzzar omar-ana Ƴaysa s ad nəməl Əlinjil y aytedan, naggayyat-asan as, ənta da, a isannafran Məşşina ig-ay əmaşrağ n id t-illa awedan, gər za win əddarnen wala win aba. ⁴³ Ənta en da as əggəyyen ənnəbitan kul as, i sər-əs izzəgzanan ad igrəw təsureft ən bakkadan-net s esəm-net.»

Agaraw wa əgan aytedan wər nəmos Kəl-Əlyəhud Infas wa Zəddigan

⁴⁴ Harwada işşewal Butros as d-izzəbbat Infas wa Zəddigan fəl aljamağat ketnet ta təssəsamat i təlxutbat-net. ⁴⁵ İkna awen əsəmməkləl əs nalkiman ən Ƴaysa win Kəl-Əlyəhud win d-əddewnen əd Butros, âs, wala aytedan win wər nəmos Kəl-Əlyəhud da garrawan s igət təhəkkut ta n Infas wa Zəddigan. ⁴⁶ Fəlas sallan-asan əşşewalan awalan wər nətawazday, əmmâlan adkul ən Məşşina. Təzzar inna Butros: ⁴⁷ «Awak ma z'igdəlan y aytedan əgânen y Infas wa Zəddigan agaraw wa das-nəga ad təwəsəlməğan dağ aman?» ⁴⁸ Amaran omar s ad təwəsəlməğan dağ aman s esəm ən Ƴaysa Əlməsix. Dəffər awen əğməyan dağ Butros a Ƴur-san agu adan.

11

Isalan win iga Butros dat nalkiman ən Үaysa win Yerusalam

¹ Ёslan nəmmuzal əd mədrayan daҗ əzəgzan win əhanen akal wa n Yahudəyya as, əllân-tu aytedan wər nəmos Kəl-Əlyəhud əzzigzannen əntanay da s awal ən Məşşina.

² Alwaq wad iggəzzay Butros əs Yerusalam, əşşewalan fall-as inalkiman ən Үaysa win Kəl-Əlyəhud win əttafnen alyadat-nasan ta n əmənəkəd. ³ Ёnnan-as: «Manəmmək as tətəggaza ehan n aytedan wər nəmmənkəd, wala tədarraw dər-san imensewan.»

⁴ Təzzar issoҗal-asan Butros awa igan kul, wa n ənətti, inn-asan: ⁵ «Tattara daҗ əҗrəm ən Yaffa as di-tobaz tarna n Infas wa Zəddigan, inafalal-i arat iyyan. Arat wa, itawasaras-du daҗ jənnawan, olâ d əfər zəwwəran itiwattafan s əkkəzət təsəlkəd-net, har dat-i d-imal. ⁶ Ёswada daҗ-as, zaggazdaq-qu, ənayax daҗ-as eharay, əd təwaqqast əd dəmərdəmaran əd gədad. ⁷ Təzzar əsleҗ y əməsli wa di-innan: "Butros, ənkər, təgzəma, tatša!" ⁸ Mişan ənnəҗ-as: "Kala kala Ёməli, id imi-nin wər kala t-iggaz arat xaraman wala iyyan immidasan." ⁹ Ёlasa tesalay y əməsli en as inna daҗ jənnawan: "Awa issəxlal Məşşina, wərgəҗ kay a tu-z-agin i xaraman!" ¹⁰ Har iga əməsli en y awen karadat tənnawen, amaran itawarkab-in awen ketnet əs jənnawan.

¹¹ Tamazayt ten da a d-əbdadan karad meddan s ahan wa daҗ əssəgana, sər-i d-əmmozaalnen daҗ əҗrəm ən Qaysarəya. ¹² Təzzar inn-i Infas wa Zəddigan a dər-san idawa əddi da. Ad wər əzləyax aytedan. Ёddewa deҗ əd mədrayan-nana sədis win, har nəggaz ehan n aləs wa di-d-issəgməyan. ¹³ Isoҗal-ana əmmək was das-inafalal angalos daҗ ahan-net, ibdad dat-əs inn-as: "Zəmmizəl awedan s əҗrəm ən Yaffa y a dak-d-idaw əd Simҗon was itawannu Butros. ¹⁴ A dak-agu amagrad a sər-ək du-z-awəyan efsan kay d aҗaywan-nak ketnet." ¹⁵ Harwada wər əhoga əşşewala as fall-asan d-iga Infas wa Zəddigan əzəbbi wa fall-ana d-iga nakkanay daҗ tizarat. ¹⁶ Təzzar əkteҗ-du tənna ta iga Ёməli: "Yaxya, aman a daҗ issəlməҗ aytedan, mişan kawanay, Infas wa Zəddigan a daҗ za tətəwəsəlməҗam." ¹⁷ Daҗ adi, dad zamas ig-asan Məşşina təhəkkut zun ta danax-iga as nəzzəgzan s Ёməli Үaysa Ёlməsix, ma əmosa nak as gaddala i Məşşina igi n awa ira?» ¹⁸ As təsla aljamaҗat i salan win, təffəsta, təzzar ad təmmal Məşşina təgannu: «Daҗ adi aytedan win wər nəmos Kəl-Əlyəhud, da issəfrak-kan Məşşina ad utaban, əgrəwan təməddurt ta təylalat.»

Ətəməl n Əlinjil i Kəl-Əlyəhud dağ Antəyoxəya ta n Surəya

¹⁹ Inalkiman ən Ҷaysa win izawwazawaz alyazab wa d-izrayan ətəwənxə n Əstefanos, əqlan wiyyad har osan akal wa n Fenisəya, wiyyad osan akal imosan gərwətlan as itawannu Qibrus, wiyyad osan ayrəm wa n Antəyoxəya. Əmmâlan awal ən Məşşina, eges i Kəl-Əlyəhud җas. ²⁰ Dər iga awen da ya, wiyyad dağ-san n akal wa n Qibrus əd wa n Qərwan, as din-osan ayrəm wa n Antəyoxəya əşşewalan y aytedan win wər nəmos Kəl-Əlyəhud win əşşewalnen təlyunant, əmmâlan-asan isalan n Əlinjil n Əməli Ҷaysa. ²¹ Tədhə-tan tarna ən Məşşina dağ awa taggin, təzzar əzzəgzanan aytedan aggotnen əs Ҷaysa Əlməsix, ətuban, əlkaman y Əməli imosan əmənokal-nasan.

²² Isalan n awen ewadan-in Əlkənisat ta təhat Yerusalam, təzzar təzammazal Barnabas s əyrəm n Antəyoxəya. ²³ As din-osa inay arraxmat ən Məşşina ta du-təzzəbbet den, iddəwat. Təzzar ig-asan ketnasan ənnəsixa imosan ad əlkəman y Əməli. ²⁴ Ənta iman-net Barnabas, aləs olâyan a imos, itkâran Infas wa Zəddigan, issohat dəx əzəgzan-net. Əzzəgzanan aytedan wiyyad aggotnen s Əməli Ҷaysa. ²⁵ Amaran ikka Barnabas ayrəm ən Tarsa, isaggad i Talut. ²⁶ As t-igraw, iddew-du dər-əs s Antəyoxəya. Əgan dağ-as awatay iyrâdan osâyan əd nalkiman ən Ҷaysa win əhanen Əlkənisat ten, sasayrin aytedan aggotnen. Ayrəm wen da n Antəyoxəya en a dağ əssəntan aytedan təxaray nalkiman ən Ҷaysa s esəm wa n «əlməsixitan».

²⁷ Adan en da a dağ əgmədan ənnəbitan wiyyad Yerusalam, ərasan s əyrəm wa n Antəyoxəya. ²⁸ İbdat iyyan dağ-san igân esəm Agabus, imal dat alwaq əs tarna n Infas wa Zəddigan as, ilkâm ad agu laz labasan dağ əddənət ketnet. Laz en da dəx osa-du s əmmək was t-imal dağ azzaman n əmənokal Klawdəyus Qaysara. ²⁹ Təzzar namardan nalkiman ən Ҷaysa win Antəyoxəya fəl tanat təmosat ad irəg akkiyyan dağ-san awa ifrag səssiwəyan tədhəlt ta i mədrayan-nasan dağ əzəgzan win əhanen akal ən Yahudəyya. ³⁰ Əgan awen da, əgan şirgitan-nasan dağ əfus ən Barnabas əd Talut y a tanat-awəyan i muzaran n Əlkənisat ta təhat Yahudəyya.

12

Tamattant ən Yaqub d iguz ən Butros kasaw

¹ Azzaman en da a dağ issənta əmənokal Herod əzəxğəzzəb n arat dağ aytedan n Əlkənisat. ² Isassanxə əs takoba Yaqub wa n amadray ən Yaxya. ³ As inay as oggaman Kəl-Əlyəhud awen, isattarmas Butros. Itaggu awen adan n

əmud wa daɣ tattin aytedan ſiɣəlwen ſin wər iha xamira. ⁴ Isassag-ay daɣ kasaw, issəwəq-qu i maraw sojitan əd sədis a tu-tinəməzrəynen s əkkoz əkkoz. Otās a das-iſrəx dat awedan kul dəffər əmud wa n Akkay. ⁵ A iha Butros kasaw den, İlkanisat ənta tədgâz wəllen tətansay-as Məſſina.

⁶ As ahad wad z'ifaw iſrəx-as Herod, insâ Butros gər əſſin sojitan a t-əttâfnen s əſſin sassaran, əbdâdan deɣ magazan wiyyad dat əmi ən kasaw. ⁷ Wala a ihogan inafalal-du angalos iyyan n Əməli, imalawlaw adag wa daɣ insa Butros daɣ ammas ən kasaw. Təzzar idas angalos tasaga ən Butros, issənkar-tu inn-as: «Əbdəd tarmâd!» Ərtakan sassaran win as əkradan fassan-net daɣ tamazayt ten. ⁸ Harwa inn-as: «Əzləg isəlsa-nak, təsəlay iɣateman-nak.» Iga Butros awen da. «Əmərədda əzləg əbərnuz-nak, təl-kəmaɣ-i-du.» ⁹ Igmad-du Butros ilkâm y angalos, wər issen as awa itaggu angalos den tidət a imos, iɣil targət awen. ¹⁰ Okayan fəl magazan win azzarnen əd win əllanen dənnəg-san, amaran osan-du təsəhərt ən təzoli təswâdat sa sər əxrəm. Tənnolam dat-san ſin man-net, ərdəyan. Əssəwəlan əd tarrayt iyyat, wala a ihogan ifal-tu angalos.

¹¹ Təzzar iggaz Butros annawalat n aɣaf-net, inna: «Əmərədda əkkasaɣ aſſak daɣ-as, Əməli Məſſina a d-izammazalan angalos-net, ikkas-i-du daɣ fassan n əmənokal Herod əd talbast kul tas əran Kəl-İlyəhud a di-təgrəw.» ¹² Amaran igra taɣara-net, ikka ehan ən Maryama ta n anna ən Yaxya was itawannu Markus. Əmminayan ɣur-əs aytedan aggotnen tansayan Məſſina. ¹³ Ikawkaw imi n aɣalla, təgla-du tamaſſaɣalt təgât esəm Ƴoda y ad təssən awa imos awedan. ¹⁴ As təzday əməsli ən Butros, awa təga daɣ tədəwit, edag n a das-tələm, tozal təqqal ammas n ahan, təmal as Butros illa dat əmi n aɣalla. ¹⁵ Ənnan-as: «Kam, əmməskəl a təgex!» Miſan təzazzayyar-asan daɣ-as ənta daɣ awen. Amaran ənnan-as: «Daɣ adi angalos-net adi.» ¹⁶ A əgənnin awen, Butros ənta itakawkaw-asan imi n aɣalla. As olaman, ənayan-tu, iga sər-san awen əsəmməkləl labasan. ¹⁷ Isaddagan-asan s əfus-net ad affastin, təzzar imal-asan təməwit kul tas t-id-ikkas Əməli Məſſina daɣ kasaw. Inn-asan deɣ: «Əmələt adi i Yaɣub əd mədrayan-nana win hadatnen.» Amaran ifal-tan, ikka edag iyyan. ¹⁸ As affaw, təga tənajarwayat labasat daɣ sojitan; akk iyyan isastan əmidi-net d awa iga Butros. ¹⁹ As t-id-aba y aytedan win as t-issəsəwad Herod, issəstan sojitan win t-ogaznen, amaran omar s ad tawanɣin kərəz. Dəffər awen igmad Herod akal wa n Yahudəyya, izagaday ikka aɣrəm ən Qaysarəya y a daɣ-as agu tamert.

Iba ən Herod

²⁰ Awen as itaggu, Herod ih-ay alham labasan n aytedan n əxrəm wa n Tir əd wa n Sidon. Idhal-tan Blastus wa n əməššewwər ən Herod, namannakan zammazalan əs Herod almawakkilan-nasan, fəl a dər-əs aknin, fəlas akal-net a du-gammadan sudar-nasan. ²¹ As d-osa əzəl wa itawasanafran, izlag Herod isəlsa-net win taɣmar təzzar iqqim fəl təxawit-net ta n taɣmar, amaran iššewal i tamattay. ²² Ad saɣaren aytedan, gannin: «Əməli wa in əməli iyyan, wərgex in awedan!» ²³ Wala a ihogan iwattu angalos n Əməli fəlas igi a iga iman-net daɣ adag ən Məššina, wər iga y Əməli adkul wa dər ihor; təzzar ətšanattu təwakkawen, aba-tu.

²⁴ Awal ən Məššina ənta, igla itiwəzəwiz, tigatan aytedan win sər əzzəgzannen.

²⁵ Amaran Barnabas əd Talut as əxradan əššəxəl wa tand-ewayan s əxrəm ən Yerusalam, əqqalan s as d-əhan, əddewan əd Yaxya was itawannu Markus.

Şigəyyawen daɣ Asəya əd daɣ akal ən Kəl-Əlyunan

13

Ətəwəsənnəfrən ən Barnabas əd Talut y ad əšşikəlan

¹ Əlkənisat ta təhat əxrəm n Antəyoxəya əhân-tat ənnəbitan əd məsəssəxra əmosnen Barnabas əd Simyon was itawannu "Akawel" əd Luqəyus wa n akal ən Qərwan əd Manahin wa inamadwəlan d əmənokəl Herod daɣ ahan iyyanda amaran əd Talut. ² Əzəl iyyan ad əmminəyan əxbâdan Əməli əzuman deɣ, inn-asan Infas wa Zəddigan: «Səwərat-i Barnabas əd Talut aganna fəl ad agin əššəxəl was tan-d-əxreɣ.» ³ Əzuman əgan šiwatriwen təzzar, amaran əssəwəran Barnabas əd Talut ifassan-nasan əgan-asan šiwatriwen, dəffər adi əssəglan-tan.

⁴ Issoka Infas wa Zəddigan Barnabas əd Talut əxrəm ən Salukəya. Əggazan daɣ-as aylal n aman əkkan akal imosan gərwətlan as itawannu Qibrus. ⁵ As osan əxrəm ən Salamin, ad əmməlan awal ən Məššina daɣ nan n əlyibada win Kəl-Əlyəhud. Iddew dər-san Yaxya was itawannu Markus. Illil-asan idhâl-tan.

Əmənəy d Eləymas wa n amaššaxaw daɣ Qibrus

⁶ Ərzagan Qibrus, sannaqqaban-tu har osan əxrəm ən Bafus. Den da ad əmmənəyan d aləs iyyan ən Kəl-Əlyəhud igân esəm Bar-Ŷaysa n amaššaxaw, igannin ənta ənnəbi.

⁷ Amaran osây əd Sarjəyus Buləs wa n ənaxkim n akal,

imosan awedan ilân əgərri. Issəgmay əmuzar wa Barnabas əd Talut fəlas ikna əsənnəhəl ən tara n ad aslu y awal ən Məššina. ⁸ Mišan inkar Eləymas wa n amaššaxaw – awen da a imosan almaḡna n esəm-net daḡ təlyunant – iqqal əllid-nasan, ad igammay d ad igdəl y ənaxkim wen əzəgzan. ⁹ Təzzar ijajjanḡal daḡ-as Talut, as itawannu deḡ Buləs, igrâwan s igət Infas wa Zəddigan, ¹⁰ inn-as: «Agg Aššaytan, azangaw n arat kul wa oḡadan. Wər t-illa əzzənəf ən təkərras a kay-wər-nəha, əməkkerrəs n ənallabus a təmosaḡ. Emmay ad za tammazzayaḡ d agamay n əsəfrəḡ ən tarrayt toḡâdat n Əməli Məššina?

¹¹ Əmərədda ənəy, a fall-ak assansu Əməli əfus-net, taddarḡala. Ad tagaḡ azzaman wər təlesəḡ anay n ənnur ən təfuk.» Tamazayt ten da a fall-as əganat šiyyay, idalammat fall-as amaḡal, təzzar ad iddâz, igammay i t-ilwayan. ¹² As inay ənaxkim wen awa igan den, izzəgzan. Isimaklal sər-əs əsəssəḡri was isla daḡ batu n Əməli.

Təlxutbat ta iga Buləs daḡ əḡrəm wa n Antəyoxəya wa n Bissidəya

¹³ Iggaz Buləs aḡlal n aman ənta əd midawan-net daḡ Bafus, əkkan aḡrəm ən Bərge ihân akal ən Banfiləya. Den da a dər-san imməzzay Yaxya was itawannu Markus, iqqal Yerusalam. ¹⁴ Əntanay amaran əgmadan Bərge, əkkan aḡrəm n Antəyoxəya wa n akal ən Bissidəya. As iga əzəl wa n təsənfawt, əggazan ehan n əlḡibada ən Kəl-Əlyəhud, əqqiman. ¹⁵ As tawaḡran daggan daḡ Əttəwret d Əlkəttaban win Ənnəbitan sa hadan, ənnan-asan-in muzaran n ahan n əlḡibada wen: «İmədrayan-nana, kud təll-ay batu as za təsəssuhet əzəgzan n aytedan, tagimtat.» ¹⁶ İbdad Buləs, isaddagan-asan s əfus-net ad affastin, amaran inna: «Məddan win Kəl-İsrayil əd kawanay win miksadan ən Məššina, səsəmat-i!

¹⁷ Məššina di n Əməli ən tamattay ta da n İsrayil a isan-nafranan imarawan-nana, təzzar issəgat-tan daḡ elan win daḡ əmosan inaftaḡan daḡ akal ən Masar, dəffər adi ikkastan-du daḡ-as əs tarna n əfus-net. ¹⁸ Iga edag n əkkozat təmərwən n awatay, šin əgan daḡ taneray, izizaydar dər-san. ¹⁹ İkf-en as ərzan əssayət tawšeten daḡ akal ən Kanan, ikf-en akal-nasan, iggaz təkəsət-nasan. ²⁰ Awen ketnet, edag n əkkozat təmad n awatay əd səmmosat təmərwən a daḡ iga. Dəffər awen a dasan-izuzir əlqalitan taqqalan-asan imənokalan har azzaman n ənənəbi Saməwel.

²¹ Azzaman en da a daḡ əgmayaḡ əmənokəl, təzzar ikf-en Məššina Talut aḡ Kiš wa n tawšət ta n Benyamin. Iga əkkozat təmərwən n awatay ixkâm fall-asan. ²² Dəffər adi

ikkas-tu Məşşina da taymar, iga Dawəd day adag-net s ənta a fəl inna Məşşina: "Əgrawa Dawəd ag Yasay, imosan aləs ilkâman i tara-nin, wa z'ammazalan əs tara-nin ketnet."

²³ İhayawan-net a day d-ikkas Məşşina Ƴaysa s ənta a imosan İmaylas was iga arkawal-net i Kəl-İsrayil. ²⁴ Dat assa-net ad iga Ƴaxya i tamattay n İsrayil ketnet isalan əmosnen ad utaban, təwəsəlməyan day aman, assaknu adi tətubt-nasan. ²⁵ As ibuk Ƴaxya y əsəndi n əşşəxəl-net, ad igannu: "Ma təxilam, ma əmosax? Wər əmosax za awedan was təxilam. Kala, kala! İlkâm-i-du, nak wər əweda wala arra ən suyan ən xateman-net."

²⁶ İmədrayan-in kawanay win hayawan n İbrahim əd kawanay win wər nəmos Kəl-Əlyəhud təksudam Məşşina, isalan n əlxillas wa, nakkanay as tan-d-issoka Məşşina. ²⁷ Amaran aytedan ən Yerusalam əd muzaran-nasan wər əgren awa imos Ƴaysa, wər əgren deƳ wala day awa ənnan ənnəbitan day Əlkəttaban win tawaxrinen akk əzəl wa n təsanfawt day nan n əlxibada, əssəndan awa ənnan ənnəbitan win di s abbaz wa t-əgan s əşşərixa. ²⁸ Wər əgrewan arət waliyyan a t-issiwaran tamattant, mişan harkid awen, əgmayan day Bilatəs a day-as təwəkkəsən man. ²⁹ As əssəndan arət kul awa fall-as ənnan Əlkəttaban, əkkasan-t-idu fəl təgəttawt, əgan-tu day əzəkka. ³⁰ Mişan issənkar-t-idu Məşşina day tamattant. ³¹ Iga adan aggotnen itinəfilil y aytedan win dər-əs d-əddawnen day akal ən Galilaya əgəzzayyan s əxrəm ən Yerusalam. Əntanay a əmosnen əmərədda şigəyyawen-net xur tamattay n İsrayil.

³² Amaran nakkanay da, nətagg-awan isalan n Əlinjil, əmosnen isalan win as itawagga arkawal-nasan i marawan-nana. ³³ Arkawal wen issənd-anaq-qu Məşşina nakkanay win hayawan-nasan s əsənkər wa d-iga Ƴaysa s əmmək was iktab day təsarnat ta n sanatat n Azzabur, as inna day salan ən Ƴaysa: "*Kay Barar-in, əqqalay azalada Abba-nak.*"

³⁴ Əsənkər wa t-id-iga Məşşina day tamattant, da wər tərqa təxəssa-net day əzəkka imâl-tu Məşşina day Əlkəttaban əs təməwit ta, as inna: "*A kawan-akfa arraxmaten zaddognen, ətiddanen şin as əgey arkawal-nasnat i Dawəd.*" ³⁵ İktâb deƳ as: "*Wər za tayya İmizdag-nak arku day əzəkka.*"

³⁶ Dawəd amaran, dəffər as immozal day azzaman-net s aratan win ixtas Məşşina, aba-tu, itawanbal dəgma ən marawan-net, tərqa təxəssa-net; ³⁷ mişan Ƴaysa, ənta a d-issənkar Məşşina day tamattant, wər tərqa təxəssa-net. ³⁸⁻³⁹ Day adi imədrayan-in əssənət as təsureft ən bakkadan, tətimal-awan əs tarrayt-net; amaran i sər-əs izzəgzanan ad igrəw tədarfit day aratan kul win as wər ifreg tədarfit

dağ-san əs tarrayt ta n ləkkum y əşşərixa wa d-izzəbben fəl ənnəbi Musa.

⁴⁰ Adi a fəl za tənəkədam y a kawan-igrəw awa əmalan ənnəbitan, as ənnan: ⁴¹ *"Ənəyat kawanay win nujaban; səmməkləlat, təhləkam; fəlas ad ammazala arat dağ azzaman-nawan, as kud dawan-iga awedan isalan-net kul da, wər das-za-təzzəgzənam."*»

⁴² Igammad Buləs əd Barnabas as dağ-san əgmayan aytedan ad d-ələsan tewaylay əzəl ən təsanfawt wa d-izayan fəl a dasan-əşşitin dağ igi ən salan win den. ⁴³ As təwazawaz əljəməxət, əddəwan Kəl-Əlyəhud aggotnen d aytedan wiyyad ad d-əhdānen s əddin wa n Kəl-Əlyəhud əd Buləs əd Barnabas. Maşawalan dər-san, gammayan dağ-san ad zəzzəwen dağ arraxmat ən Məşşina ta əgrawan.

⁴⁴ As d-ixlay əzəl wa n təsanfawt, təddew-du taşşam n əxrəm ketnet y ad issəsəm y awal n Əməli. ⁴⁵ As ənayan Kəl-Əlyəhud igət ən tamattay, əggaznat-tan təsmiten labasnen, ad sabahawan Buləs, rabbadan-tu. ⁴⁶ Təzzar inn-asan Buləs əd Barnabas wər təha tasa ən wala: «Kawanay a iddəraran s a dawan-attamal awal ən Məşşina əs tizarat, mişan dad zamas tugayam sər-əs, wər təssəharam iman-nawan əd təməddurt ta təxlalat, wədi ad nəmələlləy s aytedan win wər nəmos Kəl-Əlyəhud. ⁴⁷ Fəlas awen da as danağ-omar Əməli Məşşina s əmmək was inna dağ Əlkəttaban as ənnan: *"Əgeq-qay ənnur i tawşeten şin wər nəmos Kəl-Əlyəhud fəl ad tawəyağ isalan n əlxillas har d a du-təraz əddənət."*»

⁴⁸ As əslan aytedan win wər nəmos Kəl-Əlyəhud y awen, əddəwen, əzzəzwəran awal n Əməli Məşşina, əzzəgzənan aytedan kul win as itawatas ad əgrəwan təməddurt ta təxlalat. ⁴⁹ Ad itiwəziwiz awal n Əməli dağ akal ketnet.

⁵⁰ Mişan ənkarən Kəl-Əlyəhud əgan ark-man dağ tədoden şiyad tiwasaymarnen əhānen əddin ən Kəl-Əlyəhud əd muzaran n əxrəm, ewayan-du əs Buləs əd Barnabas ətəwədgaz labasan, təzzar əstəyan-tan, əkkasan-tan dağ akal-nasan. ⁵¹ Əbbəkbakan aboqqa ən daran-nasan dağ batu n əxrəm wen, təzzar əkkan əxrəm wa n Ikonəyum. ⁵² Inalkiman ən Yaysa win d-oyyan dəffər-san dağ Antəyoxəya amaran, əknān təfalawist, idnay-tan değ Infas wa Zəddigan.

14

Buləs əd Barnabas dağ Ikonəyum

¹ Iga Buləs əd Barnabas dağ əxrəm n Ikonəyum arat wa da taggin fawda, a t-imosan iguz n ahan n əlxibada ən Kəl-Əlyəhud; təzzar əgan dağ-as awal a d-ewayan as

əzzəgzanan aytedan aggotnen daḡ Kəl-Əlyəhud əd Kəl-Əlyunan əs Үaysa. ² Mišan ənkaran Kəl-Əlyəhud win ugaynen s əzəgzan əs Үaysa, əgan daḡ aytedan win hadatnen wər nəmos Kəl-Əlyəhud ark-man əs məzzəgzan əs Үaysa. ³ Harkid awen iga Buləs əd Barnabas tamert tagget daḡ Ikonəyum. Taggin awal a daq-qan wər təha tasa, tagayyen fəl Əməli. Ikf-en Əməli fərregat n igi ən təlməxjujaten əmosnen alyalamaten d aratan simaklalten sataddinen tidət a mosan salan win əqqalnen arraxmat-net.

⁴ Mišan təzun tamattay n əxrəm. Wiyyad əwaran aganna wa n Kəl-Əlyəhud, wiyyad aganna wa n nəmmuzal. ⁵ Ənkaran aytedan win wər nəmos Kəl-Əlyəhud əd Kəl-Əlyəhud əd muzaran-nasan sammarkasan ad agin taršəxšad labasnen i Buləs əd Barnabas, anxin-tan kərəz əs təgur ən təhun. ⁶ As isla Buləs əd Barnabas awen, əgmadan əxrəm wen, əkkan Lustra əd Derbe əmosnen i xərman n akal wa n Lukawnəya əd kallan win tan-əxlaynen, ⁷ a daḡ-san əmmalan isalan n Əlinjil.

Buləs əd Barnabas daḡ Lustra

⁸ Axrəm ən Lustra ih-ay aləs n anabdon s as d-ihəw da, əmmutan daran-net, wər kala təwer takkolt-net amaḡal. ⁹ As əzəl iyyan ad issisam i Buləs iššewal, idak-ku Buləs s asawad, inay daḡ-as as, ila əzəgzan a t-izzozayan; ¹⁰ təzzar inn-as s afalla: «Ənkər, təxəda tebadday-nak!» Iggad aləs, iggaz šin teklay. ¹¹ As tənay tamattay təgget awa iga Buləs den, ad gannin aytedan s afalla daḡ awal wa n təlukawnəysat: «Imalan əhānen šaššelan an aytedan, a fall-ana d-əzzəbbatnen.» ¹² Əgan i Barnabas esəm n iyyan daḡ əssənaman-nasan as gannin «Zus», Buləs əgan-as esəm n iyyan as gannin «Hərmes» fəlas ənta a imosan əməššewəl. ¹³ Inkar əlimam n əssənəm wa igan «Zus» əs ehan n əlxibada-net iha imi n əxrəm, isassalway-du əs mawan n əxrəm izəgran əd tətəltəla ən təjigay, ira ənta əd tamattay tagget a tan-agin šizəgzam i Buləs əd Barnabas.

¹⁴ Mišan as əslan nəmmuzal win əganen Barnabas əd Buləs awen, zazzarren šikadkaden-nasan fəl man-nasan, ozalan əs tamattay təgget ədkâlan imaslan-nasan s afalla gannin: ¹⁵ «Xa meddan! Ma tətəggim da? Nakkanay wər nəmos ar aytedan ən šilaten-nawan. Isalan n Əlinjil a dawan-du-neway fəl ad tammazzayam d əlxibada n əssənəman, tutabam əs Məššina di n Amaxlol a d-ixlakan ijənnawan d amaḡal əd gərwan d awa tan-ihan kul. ¹⁶ Daḡ elan win ərəwnen, oyya šimattiwen kul, əlkamnat i tara ən man-nasnat. ¹⁷ Mišan dər iga awen da ya, iga i man-net təgəyya id issəkna əlluḡ-net imosan: əsufəy wa

dawan-d-itaggu akonak day jənnawan, ihakk-iwan šimeren olaynen əd sudar, isifəliwis-kawan.» ¹⁸ Gərrid as sahadarren aytedan əs batu ta əgan den, əgdalan-asan a dasan-agin šinagzamen. ¹⁹ Osan-du Kəl-Əlyəhud wiyyad a d-əfalnen ayrəm n Antəyoxəya əd wa n Ikonəyum, əššewalan y aytedan har tan-əssəwaran aganna wa-nasan. Ad əggaran Buləs əs təhun, dəffər adi zarorawan-tu har dər-əs əgmadan ayrəm, əxilan aba-tu. ²⁰ Mišan as sər-əs d-əddewan nalkiman ən Yaysa, xalayxalayan-tu, ibdad-du iqqal ayrəm. As affaw, iddew əd Barnabas əkkan ayrəm ən Derbe.

Tewaxlay ən Buləs əd Barnabas Antəyoxəya

²¹ As əmalan isalan n Əlinjil day əyrəm wen, əlkaman aytedan aggotnen i Yaysa; iqqal Buləs əd Barnabas ayrəm ən Lustra əd wa n Ikonəyum əd wa n Antəyoxəya, ²² ad gammayan day nalkiman ən Yaysa win xərman win ad zəzzəwen day tarrayt-nasan. Šəwalan-asan, talaman-asan fəl man s ad zəzzəwen day əzəgzan-nasan, gannin-asan: «Illikan as, iguz ən Taymar ta n Məššina, iddew əd təssust tagget.» ²³ Əkkulluk n Əlkənisat sinafran-as imuzaran, əššedawan awen əd təwatriwen d əzum, amaran agin-tan day təxlift ən Məššina di as əzzəgzanan. ²⁴ Dəffər awen ərzagan akal wa n Bissidəya, okayan əs wa n Banfiləya. ²⁵ Əmalan isalan n Əlinjil day əyrəm wa n Bərge, amaran ərasan əs wa n Attaləya. ²⁶ Əggazan axlal n aman day Attaləya, ənnəmadan Antəyoxəya, ayrəm was ənta as kala day-as tawaggan day təxlift ən Məššina y əššəxəl wa əssəndan den. ²⁷ As din-osan, sassaxran-du aytedan kul n Əlkənisat, təzzar əsoxalan-asan isalan n arat kul was tan-ikfa Məššina turagat n igi-net, d əmmək was olam Məššina tarrayt n əzəgzan i təmattiwen šin wər nəmos Kəl-Əlyəhud. ²⁸ Dəffər awen əmalan xur nalkiman win den har əgan tamert tagget.

15

Əmənəy ən məzzəgzan əs Yaysa day Yerusalam

¹ Osan-du meddan wiyyad a d-əgmadnen akal ən Yahudəyya ayrəm n Antəyoxəya ad sasaxrin inalkiman ən Yaysa, gannin-asan: «As wər təlkemam y alxadat n əmənəkəd ta d-oyya ənnəbi Musa, wər za təgrəwam əlxillas.» ² Wər irda Buləs əd Barnabas əs batu ten, eway-du awen tamazaq labasat gar-essan əd Buləs əd Barnabas. Təzzar tətawagga tanat n ad aggəzzay Buləs əd Barnabas əd nalkiman ən Yaysa wiyyad əs Yerusalam fəl ad ənəyan inəmmuzal əd muzaran n Əlkənisat day batu

ten. ³ Təkf-en Əlkənisat ta n Antəyoxəya arat kul was əddəraran, amaran əqlan. Ərzagan akal wa n Fenisəya əd wa n Samarəya suxulan isalan kul ən tətubt ta d-əganat təmattiwen šin wər nəmos Kəl-Əlyəhud əs Məššina. Isifilawas awen wəllen inalkiman kul win kallan en. ⁴ As osan Yerusalam təg-asan Əlkənisat ketnet marxaba əd nəmmuzal əd muzaran. Təzzar əgan dağ-san isalan n arat kul was tan-ikfa Məššina igi-net. ⁵ Mišan əggadan-du meddan wiyyad ən nalkiman ən Үaysa əhanen taggayt ta n Farisaytan ənnan: «Əmənəkəd əd ləkkum y əlqanun wa n ənnəbi Musa fərəd a imos fəl aytedan win wər nəmos Kəl-Əlyəhud.»

⁶ Təzzar əmmənayan nəmmuzal əd muzaran n Əlkənisat fəl ad əssənan awa z'əgin dağ batu ten. ⁷ As ərəwan əmmizaxan, ibdad Butros inn-asan: «Imədrayan-in, təssānam as irəw as di-isannafran dağ-wan Məššina fəl ad aslin aytedan win wər nəmos Kəl-Əlyəhud isalan n Əlinjil dağ imi-nin, əzzəgzənan əs Məššina. ⁸ Məššina issānan awa ihan əwəl n awedan kul, issikna tərəddawt ta sər-san iga əs təhakkay ta tan-iga Infas wa Zəddigan əs təməwit tas dana-t-ikfa nakkanay win Kəl-Əlyəhud. ⁹ Wər danağ-izannamazlay dər-san fəlas Məššina a izazdagan iwəllan s əzəgzan sər-əs. ¹⁰ Dağ adi əmərədda ma fel tətəggim tənəgməyt i Məššina s igi wa tətəggim fəl rawan ən nalkiman əzuk əs wərməd əfrāgan marawan-nana adakal-net wala değ nəfrāk-ku nakkanay? ¹¹ Wərgəğ arraxmat n Əməli Үaysa as nəzzəgzan, təssəfs-ana? Əntanay da za, əntanay win wər nəmos Kəl-Əlyəhud, təməwit ta da as əfsan!»

¹² Təzzar təffəsta tamattay ketnet, əssəsaman aytedan i Barnabas əd Buləs suxulan isalan kul ən təlməxjujaten əmosnen alyalamaten d aratan simaklalten win as tan-ikfa Məššina igi-nasan dağ təmattiwen šin wər nəmos Kəl-Əlyəhud.

¹³ As iffəsta Barnabas əd Buləs, išşewal Yaqub, inna: «Imədrayan-in, səsəmat-i. ¹⁴ Simyon Butros issôğal-ana təməwit tas issənta Məššina harwa dağ tizarat əsəkni ən tara ta iga i təmattiwen šin wər nəmos Kəl-Əlyəhud s əsənnəfrən wa dağ-asnat iga aytedan as z'əqqələn tamattay-net. ¹⁵ Amaran inimannak awen d awa ənnan ənnəbitan dağ Əlkəttaban as ənnan: ¹⁶ "Ad d-əqqəla dəffər awa, ələsəy i Dawəd akaras n ahan-net ibirajjen, əkrəsəy iməggulaz-net, əssəbdədaq-qu, ¹⁷ fəl ad əgməyan aytedan win d-əqqimnen Əməli. Awəlla šimattiwen kul šin wər nəmos Kəl-Əlyəhud, ad əqqəlnat tamattay-nin, əybadnat-i.

Adi a inna Ɛməli wa igan aratan di kul", ¹⁸ fəl təga masnat harwa irəw.

¹⁹ Awen da fəlas nak Yaqub, ərđêx s ad nayyu əsəmməxītər n aytedan win wər nəmos Kəl-Ɛlyəhud win du-tutabnen əs Məššina. ²⁰ Mišan əktəbatana y-asan širawt, nann-asan ad ammazzayan d əsəmmədəs ən man-nasan s arat ad d-immâran əssənəm, ammazzayan d igi n əzzəna əd tattay ən şan n əmudar tənxa tarzam əd təssay n əzni. ²¹ Fəlas irəw ad t-əmalan əlfəqqitan sasaxrinen Ɛttawret daɣ əkkulluk n əxrəm, itawayru deɣ akk əzəl ən təsanfawt daɣ nan ən Kəl-Ɛlyəhud win əlxibada.»

Širawt ta tətawasokat i nalkiman ən Ɛaysa win wər nəmos Kəl-Ɛlyəhud

²² Təzzar ərđan nəmmuzal əd muzaran d Ɛlkənisat ketnet s ad sənnəfrənan wiyyad daɣ-san, zəmmizəlantan s əxrəm n Antəyoxəya, idawan əd Buləs əd Barnabas. Sannafranan Yahuza was itawannu Barsabbas əd Silas, əmosnen imuzaran daɣ məzzəgzan əs Ɛaysa. ²³ Ɛssəwaran-tan ad awəyan širawt s ənta da awa daɣ-as əktaban: «Awa nakkanay inəmmuzal əd muzaran ən nalkiman ən Ɛaysa win mədrayan-nawan. Nəhul-in imədrayan-nana win wər nəmos Kəl-Ɛlyəhud, win əhanen axrəm n Antəyoxəya əd win əhanen akal ən Surəya əd wa n Kilikəya. ²⁴ Nəslâ assa wa kawan-in-əgan meddan danaɣ-in-əfalnen ši wala turagat-nana, əxšadan iman-nawan, əššəwašan-kawan s awa gannin. ²⁵ Adi a fəl nənammannak ketnana, nəga tanat ad nəsənnəfrən meddan, nəzəmmizəlantan-in sər-wan, idawan-in əd maran-nana Barnabas əd Buləs, ²⁶ əmosnen meddan əgânen iman-nasan daɣ alxarar fəl əddəlil n esəm n Ɛməli-nana Ɛaysa Ɛlməsix. ²⁷ Adi da fəl din-nəzammazal Yahuza əd Silas fəl a dawan-ələsan əsuxəl ən salan win imi s imi. ²⁸ Fəlas issibdad Infas wa Zəddigan əd nəkkannay iman-nana tanat n as wər kawan-za-nəssəwər əzuk waliyyan ar wa n aratan win əwwəjjabnen, ²⁹ əmosnen: ad tammazzayam əd tattay n amensay itiwakfan y əssənəman əd tassay n əzni əd tattay ən şan n əmudar tənxa tarzam d igi n əzzəna. As tətəfam iman-nawan fəl igi n aratan win di, ad tagim a olāxan. Nəhul-kawan-in wəllen.»

³⁰ Dəffər awen tawasallaman, əzagadayyan, əqqalan Antəyoxəya, ewāyan širawt. As din-ewadan əššədawan-du inalkiman ən Ɛaysa, əkfan-tan širawt ten. ³¹ Tətawayra, təzzar saddawen-tan salan talammen fəl man win əgrawen den. ³² Amaran iššewal Yahuza əd Silas əmosnen əntanay iman-nasan ənnəbitan ad taggin ənnəsixa aggen i mədrayan talaman-asan fəl man, sisuhen əzəgzan-nasan.

³³ As iga Yahuza əd Silas tamert den, əssəllaman-tan mədrayan win Antəyoxəya fəl ad əqqələn Əlkənisat ta tandu-təzammazalat. [³⁴ Mišan issof Silas ad aqqam den da, iqqal əs Yahuza ɣas a iqqalan Yerusalam.] ³⁵ Ixsar Buləs əd Barnabas daɣ Antəyoxəya, xattaban əntanay əd wiyyad imədrayan aggotnen y aytedan Əlinjil n Əməli, sasaxrin-asan-tu deɣ.

Əməzzəy ən Buləs əd Barnabas

³⁶ As əgan tamert dəffər awen, inna Buləs i Barnabas: «Əqqələna imədrayan-nana daɣ əzəgzan win əhanen ixərman kul win daɣ nəmal awal n Əməli, ad nəssən awa daɣ-san in-igan.» ³⁷ Ira Barnabas ad idawan əd Yaxya was itawannu Markus. ³⁸ Mišan inna Buləs wər ihor ad idawan d aləs as dat awen a daɣ-san ixtas iman-net daɣ Banfiləya, wər ɣur-san iqqim har səkkəsəwan əşşəxəl-nasan. ³⁹ Təkkus talɣa gar-essan har d-eway awen as əmməzzayan. Iddew Barnabas əd Markus əggazan aɣlal n aman əkkan Qıbrus. ⁴⁰ Buləs ənta isannafran Silas, iddew dər-əs. As t-əgan mədrayan daɣ təɣlift ən Məşşina, igla. ⁴¹ Illil Buləs akal wa n Surəya əd wa n Kilikəya isisuhit əzəgzan n Əlkənisaten.

16

Tidawt ən Timotay əd Buləs əd Silas

¹ Osa Buləs aɣrəm ən Derbe, as t-ifal ikka wa n Lustra. Amaran Lustra ih-et ənalkim ən Ƴaysa igân Timotay s anna-net iyyat daɣ Kəl-Əlyəhud təzzigzanat əs Ƴaysa, mišan abba-net iyyan daɣ Kəl-Əlyunan. ² Əmmâlan-tu mədrayan daɣ əzəgzan win Lustra d İkonəyum əlluɣ. ³ Ira Buləs tidawt-net, inkar isammankad-tu fəl əddəlil ən Kəl-Əlyəhud win əhanen akal wen, fəlas əssânan ketnasan as abba-net iyyan daɣ Kəl-Əlyunan a imos. ⁴ Aɣrəm a d-osa Buləs əd Silas a daɣ-as əməlan i nalkiman win t-əhanen şinaden şin əgan nəmmuzal əd muzaran n Əlkənisat ta n Yerusalam, əgməyan daɣ-san a dasnat-əlkəman. ⁵ Ad itasahat əzəgzan n Əlkənisaten, təyttəynat akk əzəl.

Ətəwəɣra ən Buləs əs Masedonəya

⁶ Irzag Buləs əd Silas akal wa n Frijəya əd wa n Galatəya əqlan okâyan, fəlas İnfas wa Zəddigan a dasan-igdalan emel n awal ən Məşşina daɣ akal wa Asəya. ⁷ As osan əgogas n akal wa n Məsəya, əgməyan d iguz n akal wa n Bitinəya, mišan igdal-asan-tu İnfas wa Zəddigan. ⁸ Təzzar ərzagan Məsəya, əzagadayyan s əɣrəm wa n Trowas. ⁹ As iga ahad orga Buləs: İnay aləs iyyan n akal ən

Masedonəya ibdâd dännəg-əs, itansay-tu, igann-as: «Akka-du Masedonəya, tədhəlaχ-ana.»¹⁰ Iga Buləs targət ten χas, nəsammatag y iki ən Masedonəya fəlas nəkkâs aššak as Məššina a danaχ-iχran fəl a daχ-as nəməl isalan n Əlinjil.

Əzəgzan ən Lidəya s Əməli day Filib

¹¹ Nəggaz aχlal n aman daχ Trowas, nənnəmad akal imosan gərwətlan as itawannu Samotras. As affaw nəkka aχrəm ən Neyabolis. ¹² Ənta nəgmad-tu əs wa n Filib imosan aχrəm fəl təxkâm Errum; imos deχ aχrəm wa azzaran daχ akal ən Masedonəya. Nəga daχ-as adan. ¹³ As d-ewad əzəl wa n əssəbət, əzəl wa n təsanfawt ən Kəl-Əlyəhud, nəgmad-in aχrəm əs təgadamayt ən təsəssəngəyt iyyat as norda as, ih-et adag a daχ taggin Kəl-Əlyəhud šiwatriwen. Nogaz-in šidoden əmminaynen den, təzzar nəqqim, nəššewal-asnat, nəg-asnat deχ təlxutbat.

¹⁴ Təssəsəm-ana iyyat daχ-asnat ən təmiksət ən Məššina təgât esəm Lidəya n əχrəm ən Təyatir tətəggit jola ən təbəddəχ zaggəχnen hossaynen. Ora Əməli əwəl-net, təga əsəsəm olâχan y awa igannu Buləs, təzzar təzzəgzan əs Ƴaysa. ¹⁵ As tətawasalmaχ daχ aman ənta d aytedan n aχaywan-net, tonsay-ana, tənn-ana: «Zama təhannayam as əzzigzana s Əməli, wədi akkiwat-du ehan-in tazabbem daχ-as.» Təgraw-du daχ-na as nərçə.

¹⁶ Əzəl iyyan nəkkâ edag ən təwatriwen wen as nəmmənay əd təmawat iyyat ən təkliit iha aggəsuf a das-immalan awa d-izayan, garrawan sər-əs məssawəs tənfa tagget daχ awen. ¹⁷ Təlkam-ana nakkanay əd Buləs təsiχarat təgannu: «Meddan win, eklan ən Məššina di n Amadkol a əmosan. Isalan ən tarrayt ta n əlχillas as d-osan y a dawan-tan-agin.» ¹⁸ Təga adan aggotnen tətəggu awen. Iгла Buləs har t-išəχaššašat awen, imalallay-tat-in inna y aggəsuf wa tat-ihan: «Omaraq-qay əs tarna ta təhat esəm ən Ƴaysa Əlməsix, əgməd-tat!» Təzzar igmad-tat aggəsuf daχ tamazayt ten da.

¹⁹ As ənayan məssawəs as ab-as sər-san tat-du-təgammad tənfa, əbazan Buləs əd Silas, əlwayan-tan s asammanay n əχrəm, əssəbdadan-tan dat naxkiman. ²⁰ Ənnan i naxkiman: «Meddan win jannajarwayan aχrəm-nana. Kəl-Əlyəhud a əmosan, ²¹ sasəχrinen aytedan aχadaten as nakkanay Kəl-Errum wər nəla turagət ən tərəddawt sər-əsnat wala ləkkum y-asnat.» ²² Tənkar tamattay ənta da təzzan əs Buləs əd Silas. Ənnan naxkiman a fall-asan təwəzəzərren səlsa, omaran s a dasan-təwəgginat təwit. ²³ As tan-əyyəwanan šiwwit, əgaran-tan daχ kasaw, omaran əmuzar ən kasaw s a dasan-agu aggaz

olâyan. ²⁴ Əmuzar ən kasaw dey as das-itawanna awen, inkar ig-en day adangaya ən kasaw, inday idaran-nasan day şiləlt.

²⁵ As isaggaraygaray ahad, ad itattar Buləs əd Silas sihaken imaslan-nasan taggin dey təmmalen i Məşşina, əssisaman-asan məskəsa win hadatnen. ²⁶ Wala a ihogan iga amađal ənəgəynəgəy s awa iga day assahat har in-agaynagay ahan ən kasaw ketnet, ənnolamnat təsəhar ən kasaw kul tamazayt ten da, zalabben sassaran day məskəsa kul. ²⁷ Inkar-du əmuzar n ahan ən kasaw day etəs. As inay şisəhar ən kasaw ənnolamnat, ilbay-du takoba-net y sər-əs anğu iman-net fəlas a ixil iməskəsa əddəggagan. ²⁸ Mişan isayarat-as Buləs inn-as: «Ad wər tanxağ iman-nak, ketnana nəlla da.» ²⁹ Inna əmuzar ən kasaw ad d-ammawaynat fətəlaten, iggaz ammas ən kasaw tarmad igla har ewad adangaya-net təndaw-tu təysəst har issəjad i Buləs əd Silas. ³⁰ Təzzar ikkas-tan-du inn-asan: «Meddan, mas di-iwar igi-net əgrəwəğ əlxillas?» ³¹ Ənnan-as: «Zəgzən s Əməli Yaısa ad təxləsa kay d ağaywan-nak.» ³² Amaran əmalan-as awal n Əməli ənta d aytedan kul n ağaywan-net. ³³ Eway-tan alwaq wen da adawannay n ahad, işşorad ibusan-nasan. Den da ad itawasalmay day aman, ənta d aytedan n ağaywan-net ketnasan. ³⁴ Təzzar iddew əmuzar ən kasaw əd Buləs əd Silas s ahan-net, isammagarat-tan. Isidawat-tu wəllen ənta d ağaywan-net ketnet əzəgzan wa əgan əs Məşşina.

³⁵ As affaw, zammazalan naxkiman sojitan s əmuzar ən kasaw y a das-annin ad ikkəs Buləs əd Silas. ³⁶ Imal əmuzar ən kasaw əmazal wen i Buləs, inn-as: «Inaxkiman n əğrəm ənnan-du ad tətəwəkkəsam. Day adi əgmədat, taglim day alxer.» ³⁷ Mişan inna Buləs i sojitan: «A danağ-agin šiwwit dat awedan kul da wala əşşəriğa, ənta nakkanay nəmos Kəl-Ərrum; əgəran-ana day kasaw, amaran əmərədda iren a danağ-əkkəsan wər t-illa i issanan! Kala kala! Asinet-du iman-nasan, əkkəsan-ana.» ³⁸ Əqqalan sojitan əssoğalan batu ten i naxkiman. As əslan as Buləs əd Silas Kəl-Ərrum a əmosan, ərmağan. ³⁹ Osan-tan-du a tan-talayden, təzzar əkkasan-tan day kasaw, a dağ-san gammayan ad əgmədan ağrəm-nasan. ⁴⁰ Ifal Buləs əd Silas kasaw, əkkan ehan ən Lidəya. As əmmənayan əd mədrayan day əzəgzan, əşşewalan-asan, olaman-asan fəl man, amaran əqlan.

17

Tugəyt ən Kəl-Əlyəhud win Tesalonik s ad əqbəlan əsəssəyri ən Buləs əd Silas

¹ Iga Buləs əd Silas tarrayt ta tərzagat Anfibolis d Abollonəya har din-osan aɣrəm ən Tesalonik a daɣ əlân Kəl-Əlyəhud ehan n əlyibada. ² Os-en-in Buləs, awa da itaggu fawda. Iga den karadat əssəbəten itiməšiwil əd Kəl-Əlyəhud daɣ salan n awa ənnan Əlkəttaban. ³ Isassagrasan-tan, issosan-tan əs, Əlməsix ilzâm-tu ad aɣɣazzab ibatu, təzzar inkər-du daɣ təmattant. Igann-asan deɣ: «Yaysa wa dawan-əmmala da, ənta Əlməsix.» ⁴ Əzzəgzanan wiyyad daɣ-san s awa igannu, təzzar əwaran aganna ən Buləs əd Silas, əntanay əd Kəl-Əlyunan əknanen igət ən miksadan ən Məššina əd tədoden aggotnen əlânen esəm daɣ aɣrəm.

⁵ Mišan əggaznat təsmiten labasnen taššam ən Kəl-Əlyəhud, əššədawan-du ark aytedan win əssuk, əqqalan tiddawat təzzar jannajarwayan aɣrəm. Əstaban y ahan ən Yason gammayan Buləs əd Silas fəl a tan-əssəbdədan dat aljamayət təsrəɣ-asan. ⁶ Wər ɣur-əs tan-əgrewan, təzzar əlwayan Yason ənta d arat daɣ mədrayan daɣ əzəgzan har tan-əssəbdədan dat naxkiman n əɣrəm, ad gannin s afalla: «Aytedan win, əddənet ketnet as sər-əs d-ewayan iba n alxer, əmərədda əntanay da. ⁷ Amaran Yason a tan-igan daɣ aɣaywan-net. Ketnasan tamazrayan əlqanun n əmənokalnana Qaysara fəlas tənna a taggin ill-ay iyyan əmənokal igân esəm Yaysa.» ⁸ Isalan win den as dasan-təsla tamattay əd naxkiman n əɣrəm əgan aššawaša labasan. ⁹ Əgan azrəf daɣ Yason d aytedan win ɣur-əs əllanen, har t-ərzaman as tawayyan.

Buləs əd Silas daɣ Berawya

¹⁰ Tarmad as əssokan mədrayan daɣ əzəgzan Buləs əd Silas aɣrəm ən Berawya ahad wenda. As t-in-osan, əggazan ehan ən Kəl-Əlyəhud wa n əlyibada. ¹¹ Əssəknan-tan Kəl-Əlyəhud win Berawya əlləllu ogaran wa tawasaknan daɣ Tesalonik. Əntanay əknân əlqəbulat n awal ən Məššina. Əzəl kul ɣarran Əlkəttaban, tašaggaran kud awa igannu Buləs tidət a imos wala. ¹² Eway-du awen as əzzəgzanan wiyyad daɣ-san aggotnen, əntanay əd tədoden ən Kəl-Əlyunan tiwasaymarnen əd meddan aggotnen ən Kəl-Əlyunan.

¹³ Mišan as əslan Kəl-Əlyəhud win Tesalonik as aɣrəm wa n Berawya ənta da immâl daɣ-as Buləs awal ən Məššina, əkkan-tu ənta da, əgan arak man daɣ aytedan, jannajarwayan aɣrəm. ¹⁴ Den da ad ənkarən nalkiman ən Yaysa əssəglan Buləs, əssokan-tu tama n agaraw. Silas əd Timotay əntanay əqqiman-du daɣ Berawya. ¹⁵ Aytedan win məššidaw ən Buləs, əddəwan dər-əs har tu-šəššawadan

əxrəm n Atena, amaran əqqalan ewâyan əmazal ən Buləs i Silas əd Timotay n as, a das-d-əlkəman tarmâd.

Buləs daɣ Atena

¹⁶ A iqqal Buləs i midawan-net daɣ əxrəm n Atena, tamatšin man-net fəl alham n igət wa əgan əssənəman daɣ əxrəm wen. ¹⁷ Təzzar ad itakku ehan ən Kəl-Əlyəhud wa n əlxibada itiməšiwil dər-san əntanay d aytedan wiyyad ən miksadan ən Məššina, itakku deɣ akk əzəl asammanay n əxrəm, itiməšiwil əd win dər itamanay. ¹⁸ Itiməšiwil deɣ Buləs əd meddan wiyyad ən musanan ən taggayt ta n Efikurəyan d Əstoyisəyan. Tamazaɣan dər-əs wiyyad daɣ-san gannin: «Wa akk tawalaqqat, ma igannu?» Wiyyad gannin: «Əs tanna imalan wiyyad wər nəzday as immâl isalan-nasan.» Wər tan-isassanna awen ar, a fəl dasan-immâl Buləs isalan n Əlinjil, itagg-asan isalan ən Ƴaysa əd tanakra-net daɣ təmattant. ¹⁹ Təzzar əkkan dər-əs s asaggawar n əxrəm n Atena as itawannu Aryofagəs, ənnan-as: «Ag-ana isalan ən masnat təzrâyat ta dər du-toseɣ da, ²⁰ fəlas təssislaɣ-ana aratan wər nəzday, as nərə ad nəssən almaɣna-nasan.» ²¹ Əntanay Kəl-Atena kul əd naftaɣan win tan-əhanen, wər əgmədan ar s awal d əsəsəm i salan win d-əzraynen.

²² Ibdad Buləs daɣ ammas n Aryofagəs inna: «Hannaya wəllen as, kawanay Kəl-Atena təddinam wəllen, ²³ fəlas əssiɣlaya daɣ əxrəm-nawan, zigazdaɣ idaggan win daɣ təɣabbadam imalan-nawan, əssiha fadda fəl adag a daɣ tawakfinat təkutawen fəl iktâb: "Edag n əlxibada n əməli wər nətawassan". Əməli wa təɣbadam da wər tutəssenam, ənta as dawan-əmmâla isalan-net da. ²⁴ Məššina wa d-ixlakan əddənet d arat kul wa tat-ihan, ənta a imosan Əməli ən jənnawan d amaɣal, wər ixser daɣ nan n əlxibada əkrâsan fassan n aggadəm, ²⁵ wala iddirar s a ikna aggadəm fəlas wər iddərər əs wala. Ənta a isuduran, ihakku infas, ihakku arat kul. ²⁶ Ixlak-du tawšeten n əddənet kul daɣ awədan iyyanda, y ad əxsərnat fəl əruru n amaɣal ketnet. Ixtas-asnat azzaman, iga deɣ šizəraz i kallan win daɣ əxsaran. ²⁷ Igâ Məššina awen fəl ad t-əgməyan aytedan kuddeɣ s adez, mijas a t-əgrəwan; kuddeɣ as wər danaɣ-iha i iggug, ²⁸ fəlas ənta a ittafan təməddurt-nana d əmətəkwəy n akk iyyan daɣ-na d awa nəmos. Adi da a ənnan arat daɣ məssiway-nawan wiyyad əs tənna ta əgan: "Awalla, nakkanay da nəmos bararan-net." ²⁹ Daɣ adi dad zamas nəmos bararan ən Məššina, wər imməkkan ad narɣu as iha šaššelan n əssənam igân daɣ urəɣ, wala azrəf, wala təhunt, a d-inzâm awədan gar-es əd man-net. ³⁰ Əljəhəl wa əgan

aytedan daḡ aratan win di, wər fall-asan t-ixseb Məššina daḡ elan win təljuhəla, mišan əmərədda omar aytedan kul, edag əhan, əs tətubt, ³¹ fəlas ilkâm əzəl igâ təmastant, wa daḡ z'agu y əddənət ketnet əššəriḡa oḡâdan. Isinafran aləs wa z'agu daḡ əššəḡəl wədi. Issikna adi y awedan kul s əsənkər wa t-id-iga daḡ təmattant.»

³² As əslan i Buləs iššewal daḡ batu ən tanakra daḡ tamattant, əgan daḡ-as wiyyad tamakkakkayt, wiyyad amaran ənnan-as: «Nəra a dak-nələs əsəsəm daḡ batu tədi əzəl iyyan.» ³³ Den da a tan-ifal Buləs, igla. ³⁴ Dər iga awen da osaxan dər-əs wiyyad daḡ-san təzzar əzzəgzanan. Aytedan win, ih-en Dəyonusəyəs ihân asaggawar wa n Aryofagəs əd təntut təgât Damaris əd wiyyad aytedan.

18

Buləs daḡ Korent

¹ Dəffər awen igmad Buləs aḡrəm n Atena, ikka wa n Korent. ² Den da ad immənay d aləs ən Kəl-Əlyəhud igân esəm Akilas n akal ən Fontəs, a d-osân səket ifâl-du akal wa n Italəya ənta əd hannes Friska; fəlas əmənokəl Klawdəyus Qaysara a omaran s ad təwəstəḡan Kəl-Əlyəhud kul daḡ əḡrəm n Ərrum. Osax dər-san Buləs. ³ Amaran dad imos as ola dər-san əššəḡəl – ketnasan əššəḡəl-nasan igi ən həktan – imal ḡur-san Buləs, iḡḡal. ⁴ Akk əzəl ən təsanfawt, itaggu Buləs isalan daḡ ahan ən Kəl-Əlyəhud wa n əlḡibada, igamma d ad əzzəgzanan Kəl-Əlyəhud əd Kəl-Əlyunan.

⁵ As d-osa Silas əd Timotay Buləs əfâlan-du Masedonəya, igmad Buləs ənta s amel n awal ən Məššina ḡas, itagayyat i Kəl-Əlyəhud as ḡaysa a imosan Əlməsix. ⁶ Mišan ugayan sər-əs Kəl-Əlyəhud, a tu-rabbadan. Ibbəkbak Buləs isəlsa-net, almaḡna ab'as dər-san idraw wala. Inn-asan: «Təlmanam iman-nawan; iwəret alxaq-nawan iḡafawan-nawan, nak ab'as di-iwar alxaq n iba n əlḡillas-nawan. A obazan ḡur əmərədda aytedan win wər nəmos Kəl-Əlyəhud a z'akkaḡ.»

⁷ Təzzar ifal-tan, iggaz ehan n aləs igân esəm Titəyus Yustus imosan əmiksad ən Məššina as illa ahan-net dəgma n ahan wa n əlḡibada ən Kəl-Əlyəhud. ⁸ Krisbəs wa n əmuzar n ahan ən Kəl-Əlyəhud wa n əlḡibada ənta izzigzan s Əməli, ənta harkid aytedan n aḡaywan-net kul. Əslan Kəl-Korent aggotnen i salan win itaggu Buləs, əzzəgzanan əntanay da, təzzar tawasalmaḡan daḡ aman.

⁹ As ahad iyyan iga Buləs targət a daḡ das-inna Əməli: «A kay wər təggəz tasa, kalar šawal ad wər taffasta, ¹⁰ əlleq-qu dər-ək, wər t-illa i z'ifrəgan a dak-ixsəd arət, fəlas əley

aytedan aggotnen daɣ əɣrəm wa.» ¹¹ Ixsar Buləs daɣ əɣrəm ən Korent har iga awatay d aganna, isasaɣru aytedan awal ən Məššina.

¹² Azzaman win daɣ imos Galləyyun ənaxkim n akal wa n Akayya, ənkaran Kəl-Əlyəhud əgan eɣaf fəl Buləs, əbazan-tu, ewayan-tu s adag n əššəriɣa, ¹³ ənnan: «Aləs wa, igammay d ad əɣbədan aytedan Məššina əs təməwit təmmizrayat əššəriɣa.» ¹⁴ As zama issinta Buləs daɣ awal, inna Galləyyun i Kəl-Əlyəhud: «Kawanay Kəl-Əlyəhud, ənna assa a di-du-təgam daɣ batu n arat immizrayan əššəriɣa madeɣ ark amazal labasan, iməl-tu əddəlil wa fəl dawan-z-əssəsəməɣ; ¹⁵ mišan zama awa tamazaq təgât fəl təfir d əsmawan d əššəriɣa-nawan, əsrəɣat-tan kawanay iman-nawan, nak wər areɣ ad əqqəla əmaşraɣ n aratan zun win di.»

¹⁶ Amaran isassardaɣ-qan ehan wa n əššəriɣa. ¹⁷ Təzzar ənkaran ketnasan, əbazan Sustinəs wa n əmuzar n ahan ən Kəl-Əlyəhud wa n əlɣibada, ad t-əggatan da da dat ahan wa n əššəriɣa; mišan wər izlay Galləyyun daɣ awen.

Iqqal Buləs aɣrəm n Antəyoxəya

¹⁸ Iгла Buləs ixsâr daɣ əɣrəm ən Korent har irəw. Dəffər adi inamagga əd nalkiman ən Ƴaysa šiwatriwen, iggaz aɣlal n aman ikka Surəya, iddew əd Friska d Akilas. Harwada wər iggez aɣlal n aman daɣ Qankrəya inimahazan əd Korent akku Surəya ad ilza eɣaf-net y ad assaknu s awen aɣdawal wa iga. ¹⁹ As osan aɣrəm n Efez, imməzzay dər-san Buləs. Iгла ənta iggaz ehan ən Kəl-Əlyəhud wa n əlɣibada imaşawal dər-san. ²⁰ Əgməyan daɣ-as a ɣur-san ihag, uɣay-asan. ²¹ Mišan as tan-ifal inn-asan: «[Wər imməkkan a di-wər-iga əmud wa d-izayan daɣ Yerusalam.] A kawan-d-əqqəla kud Məššina irda.» Iɣmad Efez iha aɣlal n aman. ²² As izzəbbat daɣ əɣrəm wa n Qaysarəya, iggəzzay, ikka Yerusalam issəslam Əlkənisat, dəffər adi izagaday, ikka aɣrəm n Antəyoxəya. ²³ As daɣ-as iga tamert, iɣmad-tu, illil akal wa n Galatəya əd wa n Frijəya, isisuhit əzəgzan ən nalkiman ən Ƴaysa kul.

Assa n Abbolos Efez d əššəɣəl ən Buləs daɣ Akayya

²⁴ As itaggu awen, aɣrəm n Efez os-ay-du aləs ən Kəl-Əlyəhud igân esəm Abbolos n əɣrəm n Alaskandrəya, imosan aləs issânan awal wəllen, igân masnat tagget y Əlkəttaban. ²⁵ Itiwasasaɣra tarrayt ta n Əməli, amaran ikf-ay Infas wa Zəddigan gəlleɣat daɣ igi ən təlɣutbat, isasaɣru deɣ s əlluɣ daɣ batu ən Ƴaysa; dər iga awen da ya, isalan n əsəlməɣ wa itaggu Yaxya aytedan daɣ aman ɣas a t-əhanen. ²⁶ Ad itaggu awal daɣ-qu wər təha tasa daɣ ahan

ən Kəl-Əlyəhud wa n əlyibada. As das-təsla Friska d Akilas, əddewan dər-əs, sassaxran-tu s əlluḡ, əššotan-as masnat ta iga tarrayt ta n Məššina.

²⁷ Dəffər awen isammarmkas Abbolos iki n akal wa n Akayya, təzzar ədhalan-tu mədrayan-net daḡ əzəgzan s awen. Əktaban širawt i nalkiman ən Ƴaysa win t-əhanen fəl a das-agin təməwit tolâḡat as tan-in-osa. As din-osa, təggaz-tu tənfa zəwwərat a du-təfállat arraxmat ən Məššina y aytedan win əzzəgzannen, ²⁸ fəlas isabbahaw s assahat dat tamattay iduf wa əgan Kəl-Əlyəhud. Issəkn-en daḡ Əlkəttaban as, Ƴaysa a imosan Əlməsix.

19

Buləs daḡ Efez

¹ Azzaman win daḡ iha Abbolos Korent, ad irzag Buləs akal n ədḡaxan har iras fəl aḡrəm n Efez. Inay daḡ-as inalkiman ən Ƴaysa wiyyad, ² inn-asan: «Awak kawanay, as təzzəgzanam təgrâwam Infas wa Zəddigan?» Ənnan-as: «Wər nəsla fadda as t-illa Infas wa Zəddigan.» ³ Inn-asan Buləs: «Daḡ adi ma imos əzzənəf n əsəlməḡ wa tətawaggam daḡ aman?» Ənnan-as: «Əsəlməḡ wa n Yaxya.» ⁴ Amaran inn-asan Buləs: «Yaxya, aytedan win ətubnen daḡ bakkadan a isalmaḡ daḡ aman, assaknu adi tətubt-nasan, immâl-asan ad əzzəgzənan əs wa du-z-asin dəffər-əs, almaḡna Ƴaysa.» ⁵ As əslan y awen, tawasalmaḡan daḡ aman daḡ esəm n Əməli Ƴaysa. ⁶ Təzzar issəwar Buləs akk iyyan daḡ-san ifassan-net, əgrawan deḡ Infas wa Zəddigan, əššəwəlan daḡ awalən wər nətawazday, əgrawan emel ən salan a d-izizabbat Məššina. ⁷ Meddan en, marawessan d əššin.

⁸ Amaran ad itakku Buləs ehan wa n əlyibada ən Kəl-Əlyəhud, itaggu daḡ-as təlɣutbat wər t-illa is tu-təha tasa-net har iga karadat təlil. Igammay d ad isəttəddu i Kəl-Əlyəhud isalan win itaggu daḡ batu ən Taḡmar ta n Məššina. ⁹ Mišan saggarmaman wiyyad daḡ-san iwallan-nasan, ugayan s ad əzzəgzənan s awa igannu, fadda ad gannin dat tiddawat aratan wər noləḡ əs tarrayt ta n Əməli. Imməzzay dər-san Buləs, iddew əd nalkiman ən Ƴaysa; a tan-isasayru akk əzəl daḡ ahan ən taḡaray n aləs iyyan igâ esəm Turanus, ¹⁰ har iga əššin elan; har as aytedan win akal n Asəya, gər za win Kəl-Əlyəhud wala win Kəl-Əlyunan, ketnasan əslan y awal n Əməli.

¹¹ Isisugu Məššina Buləs təlməḡjumatən wər nətawazday, ¹² har as, tamawayan əlkəšifatan əd təsəwad ən təbdoq ədasnen Buləs fəl a sər-san təwədəsan miranan. Tazzayan

aytedan en daɣ təwərnawen-nasan; win daɣ-san əhan kələsuf deɣ gammadan-tan.

¹³ Ənkaran Kəl-Əlyəhud wiyyad əllâmnen gər kallan, takkasan kələsuf daɣ aytedan, ad gammayan əntanay da d-ikus ən kələsuf daɣ aytedan s esəm ən Ƴaysa, gannin daɣ təməgraw-nasan: «Əhâdaɣ-awan əs Ƴaysa, was itaggu Buləs isalan-net ar, ad təgmədam awedan a!» ¹⁴ Əssa meddan ən mədrayan əmosnen maddanəs n əmuzar iyyan n əlimam igân esəm Sewa a tagginen awen. ¹⁵ As ənnan awen y aggəsuf, a dasan-annu: «Əzdâyax Ƴaysa, Buləs deɣ əşşânaɣ awa imos, kawanay amaran, ma təmosam?» ¹⁶ Təzzar ifətəqqət daɣ-san awedan wa əhan kələsuf da, əggəznat-tu təɣurad a tu-sisarnanen meddan en ketnasan, ixləb-tan əs təwit, har as, as gammadan ehan wen, ozâlan, əzzâfan, əbbôsən.

¹⁷ Əslan aytedan n Efez kul awen, gər za win Kəl-Əlyəhud wala win Kəl-Əlyunan. Təggaz-tan tasa ketnasan, təzzar əzzəzwaran wəllen esəm n Əməli Ƴaysa. ¹⁸ A du-tasin aytedan aggotnen əzzigzannen əs Məşşina, suɣulan ark mazalan win as kala tan-taggin. ¹⁹ Ewayan-du massaxaran aggotnen əlkəttaban-nasan, əssəqqadan-tan dat awedan kul. Itawaxsab awa d-ənzən, iqqal səmmosat təmərwən n əgim ən tamma n əzrəf. ²⁰ Əmmək en da as təzawwazawaz tarna n Əməli awal ən Məşşina, təssəkna assahat ta təhat awal ən Məşşina.

²¹ Dəffər awen, isammarkas Buləs daɣ man-net iki ən Yerusalam, immər akal wa n Masedonəya əd wa n Akayya. Igannu daɣ man-net: «Dəffər as oseɣ Yerusalam, kundaba əkkeɣ aɣrəm wa n Ərrum ənta da.» ²² Təzzar izammazal Timotay d Erastus win madhalan-net s akal ən Masedonəya, mişan ənta iman-net igla iha akal wa n Asəya har daɣ-as ihog.

Şiməɣutar šin d-eway əlxibada n əssənəman daɣ Efez

²³ Azzaman en inijarway daɣ-san aɣrəm n Efez wəllen fəl əddəlil ən tarrayt ta n Əməli. ²⁴ Ill-ay anad iyyan igân esəm Demetrəyəs, itaggin daɣ əzrəf fototan n ahan n əssənəm iyyan imosan tantut təgât esəm Artemis. Igarraw daɣ awen tənfa təkənât igət i nadan win midawan-net. ²⁵ İşsedaw-tan-du ketnasan, əntanay əd nadan wiyyad win əddarnen daɣ awen, inn-asan: «Ya meddan, təssânam as təgərgist-nana, təqqân daɣ əşşəxəl wa da. ²⁶ Mişan təhannayam kawanay iman-nawan, təslâm deɣ awa itaggu aləs wədi as itawannu əddi Buləs. A igannu: "İmalan win əgan fassan n aytedan, wər əmosan fadda imalan." İzazzagzan awen y aytedan aggotnen, wərge da da daɣ Efez ɣas ad issəxrak

aytedan, kalar harkid taššam n aytedan win akal n Asəya kul. ²⁷ Arat wa, wərgex əššəxəl-nana xas as du-z-awəy iguz ən tazak n ad itəwəlku, kalar ehan n əlxibada wa n Artemis di maqqarat, ta təmosat təməlit-nana ənta da ad irtək almaqam-net, tammazzay fadda d ətəwəsəxmar, ənta əxbâdan aytedan kul win akal n Asəya, d əddənet ketnet.»

²⁸ As əslan aytedan win das-əssəsammen y awen, iggaztan alham labasan, əssokan imaslan-nasan ijənnawan gannin: «Artemis ta n Kəl-Efez di maqqarat!» ²⁹ Təga tənajarwayat dağ əxrəm ketnet. Tənkar tamattay təggag s ahan zəwwəran wa n əmənəy, təlwây Gayəs d Aristarxus win akal ən Masedonəya əmosnen imidawan ən Buləs dər iddew dağ əşikəl. ³⁰ Təzzar ira Buləs ad akku tamattay ten, mišan əgdalan-as-tu nalkiman ən Ƴaysa. ³¹ Wala arat dağ muzaran n akal n Asəya ən midawan-net da, zammazalan sər-əs aytedan y a dağ-as əgməyan ad wər ikka ehan en. ³² As itaggu awen, tamattay ta təddewat dağ ahan en, ketnet tənjarway. Siğaren aytedan dağ jənnawan gannin aratan wər nola, fəlas taššam-nasan wər əssenən fadda əddəlil wa fəl əddewan den. ³³ Əbdəyan-in Kəl-Əlyəhud aləs igân esəm Alaskandər əs tiddawat, ittəmal-as awa igan den. Təzzar ad isidugin s əfus-net i tamattay təfastit, y a dasan-iššiwəl s esəm ən Kəl-Əlyəhud. ³⁴ Mišan as əgran as awedan ən Kəl-Əlyəhud a imos əssokan imaslan-nasan ijənnawan jajjayan gannin: «Artemis ta n Kəl-Efez di maqqarat!» Har din-əkkan edag ən sanatat assaxaten gannin awen.

³⁵ Aləs wa imosan ənaktab n əxrəm en, ənta a isahhadarren tamattay en, inn-as: «Ya meddan n Efez, awak ill-ay awedan wər nəssen as, əxrəm wa n Efez ənta a imosan əmagaz n ahan wa dağ tətəwəxbad Artemis di maqqarat əd šaššəlan-net igân dağ təhənt as jənnawan a dağ du-tərtak? ³⁶ Zama wər t-illa awedan as ijhâl awen, wədi ihôr ad təhədərrem, ad wər tagim arat waliyyan dağ tararada, ³⁷ fəlas meddan win du-təlwayam da, wərmâd əmôsan ibaydagan ən nan win əlxibada, wala dəx ənnan a labasan əs təməlit-nana. ³⁸ Amaran kud Demetrəyəs əd nadan win midawan-net ill-ay a dasan-iğšâd awedan, wədi əllân-tu jilan win dağ itaggu əššərixa, əllân-tu dəx naxkiman win tu-tagginen. Akkinet-tan. ³⁹ Kud dəx wiyyad aratan a dər təssəstanam, ad tətəwəknu tağawšay tədi dağ asaggawar wa iskatan s awen. ⁴⁰ Nakkanay da əmərədda əhanen tazak n ad itiwənnu əfəlləg a nəga fəl əddəlil n awa igan azalada; fəlas wər t-illa əsaru nəga as nənna ənta a fəl təga tənajarwayat ta.» Iğrad ənaktab n əxrəm awal wen xas, inna i tamattay ad təwəziwəz.

20

Īššəxəl ən Buləs daχ Masedonəya d akal ən Kəl-Īlyunan

¹ As ədraran aytedan, isassaχra-du Buləs inalkiman ən Ƴaysa ig-asan ənnəsixa issəsmađ iwallan-nasan, amaran inamagga dər-san šiwatriwen, igla ikka akal ən Masedonəya. ² Irzag akal en itaggu ənnəsixatan aggotnen i nalkiman ən Ƴaysa, italam-asan fəl man, dəffər awen ikka akal wa n Kəl-Īlyunan. ³ Iga daχ-as karadat təlil. Isimutug y iguz n əχlal n aman s akal ən Surəya as t-əggazan salan n as əgân Kəl-Īlyəhud eχaf fəl a t-anχin, təzzar iga tanat n ad iqqəl dəffər-əs, agu tarrayt ta n Masedonəya.

⁴ Iddew əd Sofatrəs ag Fərəs wa n əχrəm ən Berawya, d Aristarxus əd Səkəndus win n əχrəm ən Tesalonik, əd Gayəs wa n əχrəm ən Derbe, əd Tişik əd Trofiməs win n akal n Asəya amaran əd Timotay. ⁵ Eqlan meddan win, azzaran-anax, əqqalan-anax daχ əχrəm ən Trowas. ⁶ Amaran nakkanay as fall-anax okay əmud wa daχ tattin aytedan šigəlwen šin wər iha xamira, nəggaz aχlal n aman daχ Filib nəkka Trowas. As nəga səmmos adan fəl agaraw nos-en-in, nəga den əssa adan.

Assa ən Buləs i Trowas

⁷ As əzəl wa n alxad imosan əzəl wa azzaran daχ jilan, nəmmənay daχ adag iyyanda y ad nədrəw imensewan win saktan. İššewal Buləs i nalkiman ən Ƴaysa win əllanən den har isiggaraygaray ahad fəlas əşikəl a fəl insa. ⁸ Əhanat fətəlaten aggotnen ehan imosan suru wa daχ nəmmənay. ⁹ A iššewal Buləs den, iqqim aləs iyyan n əmawad igân esəm Yutəxos fəl fənetər. İlla den har t-iggaz etəs ad itanaddam. İgla har daχ-as igla etəs wəllən, ifataqqat, ikka amađal. Fənetər ən suru wa n karad a fəl d-ifataqqat den. As d-immədkal, wər idder. ¹⁰ İzzəbbat-du sər-əs Buləs ənta da, ifataqqat fall-as, izalammat-tu, inna: «Ad wər təššəwəšam, iddâr.» ¹¹ Təzzar iqqal Buləs ehan wa d-izzəbbat, izun imensewan win saktan, as ətšan, ilas Buləs iššewal-asan har du-təgmad təfuk, əddi amaran ad igla. ¹² Əmawad ənta, əddewan dər-əs aytedan s aχaywan iddâr, wər ila əχəli. Ketnasan olam-asan awen wəllən fəl man.

Šiwatriwen šin əlkamnen inamagga Buləs əd muzaran n Əlkənisat n Efez

¹³ Nakkanay nəgla nəggaz aχlal n aman nəkka aχrəm n Assos, nazzar i Buləs. Den da a fall-ana du-z-iggəz aχlal, imos as awen da as otas igi-net. Ənta iman-net a ira a din-ijəwənkət. ¹⁴ As dana-d-osa daχ Assos, nənamaggaz dər-əs aχlal n aman, nəkka aχrəm ən Mitilenəs. ¹⁵ Nəgmad

Mitilenəs nəhâ aɣlal n aman, as əzəl wa hadan nəmmodaɣ y akal imosan gərwətlan as itawannu Xəyyaw, əzəl wa dəffər wədi newad wa n Samos, əzəl wa dəffər wədi nosa aɣrəm ən Miletəs. ¹⁶ Igâ Buləs tanat n as, wər z'immər Efez fəl ad wər allalat daɣ akal n Asəya, fəlas irrorad Yerusalam fəl a daɣ-as t-agu əmud wa n Fantəkawt, kud adi ifrâg igi.

¹⁷ Əzəbbi wa nəga daɣ Miletəs a ɣur izammazal Buləs awedan, issəgməy imuzaran n Əlkənisat n Efez. ¹⁸ As t-id-osan inn-asan: «Kawanay iman-nawan əhân-kawan salan ən tassaɣ ta dər-wan əgeɣ, wa d-əggazaɣ akal n Asəya əzəl w'azzaran, har awas kawan-əfala; ¹⁹ d əmmək was tagga əşşəɣəl n Əməli əssirasəɣ iman-in daɣ arat kul, iddew-i awen əd məttawan əd təməɣutar šin sər-i du-tawaynat ark tənagmayen šin di-taggin Kəl-Əlyəhud. ²⁰ Təssânam deɣ as, wər kala a dawan-əɣbara arat waliyyan a dawan-təha tənfa, aqqama wər dawan-t-əmela, sassəɣr-awan-tu, gər za dat aytedan wala deɣ daɣ nan-nawan. ²¹ Wər kala əmməzzaya d agamay daɣ Kəl-Əlyəhud əd win tan-wər-nəmos ad utaban əs Məşşina, əzzəgzənan s Əməli-nana Ƴaysa.

²² Amaran əmərədda nak da izzəlzam Infas wa Zəddigan iki n Yerusalam, wər əssenəɣ awa di-iqqalan daɣ-as. ²³ Arat iyyanda ɣas a daɣ əssanəɣ as, ig-i Infas wa Zəddigan ta daw aɣaf as, aɣrəm oseɣ da ilkâm daɣ-i kasaw d aɣazab. ²⁴ Wər ɣur-i təmos təməddurt-in fadda wala, arat wa ɣur-i t-imosan a d-əssəxsəla arat wa dəffər ozala, əɣrəda əşşəɣəl wa daɣ-i iga Əməli Ƴaysa, imosan emel n Əlinjil a əhan salan n arraxmat ən Məşşina. ²⁵ Amaran əmərədda əssâna daɣ-as, kawanay win gər əllama da, əmmâla Taymar ta n Məşşina, wər di-za-tələsam anay. ²⁶ Adi a fəl kawan-əgeɣ azalada šigəyyawen n as, ab'as di-iwar alxaq n əzni ən waliyyan daɣ-wan. ²⁷ Fəlas wər kala a dawan-əɣbaraɣ arat waliyyan, əmələɣ-awan tarrayt kul ta d-iktab Məşşina.

²⁸ Daɣ adi ənkədat əd man-nawan, təssənam deɣ daɣ tamattay ketnet tas kawan-iga Infas wa Zəddigan imagazan-net, tagim y Əlkənisat ən Məşşina təmədint tolâɣat, ənta di da a d-izzənza Əlməsix s əzni wa-net iman-net. ²⁹ Əssânaɣ as, nak as əgleɣ a kawan-d-əggəzan aytedan wər nəzlay əd təzoriyawen labasnen, wər za nayyu Əlkənisat-nawan wər tat-ədesan. ³⁰ Kawanay iman-nawan da, əhân-kawan aytedan as za safrəɣnen tidət fəl ad əssəxrəkan inalkiman ən Ƴaysa. ³¹ Daɣ adi agat ənnəyat, a du-təkattim as karad elan a əgeɣ sasəɣraq-qawan s iyyan iyyan ehad ezal, əssirtayəɣ awen əd məttawan.

³² Amaran əmərədda əssiylafaq-qawan i Məşşina əd salan win əmmalnen arraxmat-net. Məşşina ifrâg əsəssuhi n əzəgzan-nawan d əsəttəddi n agaraw wa za tagim dağ təkəsīt ta issənsa y aytedan kul win zaddognen. ³³ Wər di-ides as əgêx attama-nin dağ əzrəf wala urəx wala isəlsa n awedan waliyyan. ³⁴ Kawanay iman-nawan təssānam as, ifassan win-da-nin as əşyala, əkney s əşşəxəl-nasan tuməxlaten-in əd šin midawan-in win dər əddewa. ³⁵ Faw saknaq-qawan as, əmmək en da as kawan-iwar kawanay da, ad təşxəlam fəl ad tilalam i maddararan, a du-təkattim batu ta iga Əməli Yaysa ənta iman-net, as inna: "Əbbələl wa itaggu awedan wa ikfan, ogar wa itaggu awedan wa igrawan."»

³⁶ As inna Buləs awen, igaraffat ənta dər-san ad itattar. ³⁷ Ketnasan hallin, tizələmmen Buləs, tamallen-as. ³⁸ Arat wa ixsadan iman-nasan wəllen, tənna ta dasan-iga, wər tu-z-ələsan anay. Amaran əntagan-tu har osa aɣlal n aman.

Şigəyyawen dağ Ərrum

21

Iki ən Buləs əd midiwān-net Yerusalam

¹ As dər-san nəmməzzay gərrid, nəggaz aɣlal n aman, izzal dər-na s akal imosan gərwətlan as itawannu Kos. As əzəl wa dəffər wen, nəgmad-tu s akal imosan gərwətlan as itawannu Rodəs. Nəgmad Rodəs nəkka aɣrəm ən Fatara. ² Nogaz-in dağ-as aɣlal n aman itakkin akal wa n Fenisəya, təzzar nəggaz-tu, nəgla. ³ As nogga akal imosan gərwətlan as itawannu Qibrus, nəxlay-tu fəl aganna wa n agala, nədag sa sər akal wa n Surəya har nəzzəbbat dağ aɣrəm ən Tir s ənta a dağ za təwəzəzəbben lalan win eway aɣlal. ⁴ Nəgmay inalkiman ən Yaysa har tan-nəgraw, nəzzəbbat xur-san har nəga əssa adan. Nəlla xur-san as tan-issosan Infas wa Zəddigan dağ ad annin i Buləs, ad wər akku Yerusalam. ⁵ Dər iga awen da ya, as əndan adan win den, nəmatakway nəgla. Əntagan-ana ketnasan, harkid tədoden-nasan əd bararan-nasan har nəgmad aɣrəm, amaran nəgaraffat dağ tama n agaraw, nəttar. ⁶ As dər-san nənamagga šiwatriwen, nəggaz aɣlal n aman; əntanay əqqalan iɣawnatan-nasan. ⁷ Nəgla dağ əşşikəl-nana, nəgmad Tir nəkka Bətolemayəs. As dağ-as nəzzəbbat, nəkka imədrayan-nana win t-əhanen y a tan-nəssəsləm, nəga xur-san əzəl. ⁸ As əzəl wa dəffər wen nəkka aɣrəm ən Qaysarəya. As t-in-nosa nəzzəbbat dağ ahan ən Filibus wa n əməggi ən salan n Əlinjil imosan iyyan

dağ meddan win əssa, win as kala tawasanafranan fəl ad tilalan y Əlkənisat ta n Yerusalam.

⁹ İla əkkozat təbararen wər nəzday meddan. Şibararen şin əmosnat tənnəbiten. ¹⁰ As nəğa adan aggotnen den, osa-du ənnəbi iyyan igân esəm Agabus, a d-ifalan akal ən Yahudəyya. ¹¹ Os-ana-du, idkal əsatəb ən Buləs, ikrad sər-əs idaran win-net iman-net əd fassan-net, amaran inna: «Ənta da awa inna Infas wa Zəddigan: "Aləs wa ilan əsatəb wa, əmmək wa da as tu-z-əkrədan Kəl-Əlyəhud dağ Yerusalam, agin-tu dağ fassan n aytedan wər nəmos Kəl-Əlyəhud."» ¹² As nəsla y awen, ad nətansay Buləs, nakkanay əd nalkiman ən Ƴaysa win əğrəm en fəl ad wər aggazzay akku Yerusalam. ¹³ Mişan inn-ana Buləs: «Ma fel təhallim, təsimələşşem əwəl-in? Nak, wərgəy kerrad Ƴas as sammataga, kalar tamattant da simatagağ-as dağ əğrəm ən Yerusalam fəl əddəlil n esəm n Əməli Ƴaysa.» ¹⁴ As nənay as wər t-idu-za-nəssuxəl dağ awas ira igi-net, noyy-ay, nənna: «Aget Əməli tara-net!» ¹⁵ Dəffər adan win den ad nasammatag i teklay, nəgla nəggəzzay əs Yerusalam. ¹⁶ Əddewan dər-na arat dağ nalkiman ən Ƴaysa win əğrəm ən Qaysarəya. Ewayan-ana s ahan n aləs igân esəm Mənasən n akal imosan gərwətlən as itawannu Qibrus, irəwan imos analkim ən Ƴaysa, nəzzəbbat Ƴur-əs.

Əmələy ən Buləs əd muzaran n Əlkənisat ən Yerusalam

¹⁷ As din-nəggaz Yerusalam, əgan-ana mədrayan-nana dağ əzəgzan win əllanən den marxaba, əddəwen. ¹⁸ As affaw iddew dər-na Buləs s ahan ən Yaqub Ƴur əddəwan əmyaran n Əlkənisat ketnasan. ¹⁹ İssəslam-tan Buləs, təzzar iğrad-asan əsuxəl n aratan kul win iga Məşşina əs tarrayt n əşşəxəl wa itaggu Buləs dağ aytedan win wər nəmos Kəl-Əlyəhud. ²⁰ As əslan y aratan win inna, ad əmməlan Məşşina. Dər iga awen da ya ənnan i Buləs: «Amadray-nana, ənəy igiman əs giman n aytedan win əzzəgzannen əs Ƴaysa dağ Kəl-Əlyəhud, ketnasan zizawen wəllən dağ iduf n əşşəriya wa n Əttəwret. ²¹ Ewədan-tan-du za salan wizawaznen dağ batu-nak, əmosnen as: əsəssəyri wa tətəgga, itaway-du əs Kəl-Əlyəhud kul win əhanən şimattiwen şin wər nəmos Kəl-Əlyəhud əməzzəy d əşşəriya wa n Əttəwret, təgannağ-asan ad ammazzayan d əsəmmənkəd ən bararan-nasan əd ləkkum y alxadəten ən Kəl-Əlyəhud. ²² Dağ adi ma za nagu? Fəlas igmâd aşşak as ad aslin as tosêğ-du. ²³ Əddəlil wədi a fəl za taga a wa dak-za-nannu da: Əhân-anay əkkoz meddan ədkələnən ađđawal. ²⁴ İdaw dər-san s adag wa dağ zazdagan

aytedan, təzzəzdəga iman-nak kay dər-san, tərzəməy fall-
asan arat wa tan-ihan, fəl a dasan-təwəlzin xafawan-nasan.
Əddi ad z'əssənan aytedan kul as, awa sər-ək itawannin
wər t-ihə a igân, kalar kay da təl-kâməy y əşşərixa wa n
Əttəwret. ²⁵ Amaran aytedan win wər nəmos Kəl-Əlyəhud
win əlkammen i Yaysa, nəktâb-asan şirawt əhânat tənaden
şin nəga əmosnen as, ad wər atşin isan əmosnen takutay y
əssənam, wala aşwin azni, wala atşin isan n əmudar tənxa
tarzam, wala agin əzzəna.»

²⁶ Təzzar iddew Buləs əd meddan win əkkoz en. As əzəl
wa dəffər wen izzəzdg iman-net ənta dər-san, amaran
iggaz Ehan wa Zəwwəran n Əlyibada, imal i limaman əzəl
wa dəy za tandu tazdak-nasan, əzəl wa dəy za tətəwəkfə
təkutay fəl akk iyyan dəy-san.

Ətərməs ən Buləs dəy Ahan wa Zəwwəran n Əlyibada

²⁷ As zama dəy-san əkmâlan əssa adan, tandu tazdak-
nasan, ənayan Kəl-Əlyəhud wiyyad n akal n Asəya Buləs
dəy Ahan wa Zəwwəran n Əlyibada; təzzar jannajarwayan
tamattay, əgan dəy-as arak man əs Buləs, əbazan-tu.
²⁸ Gannin s afalla: «Ya Kəl-İsrayil, agəzat! Ənta da aləs wa
itaggin dəy təl-xutbaten şin itaggu y aytedan kul dəy adag
kul ark awalan fəl tamattay-nana, d əşşərixa wa n Əttəwret
d Ahan wa Zəwwəran n Əlyibada wa. Iglə har as, iga-du Kəl-
Əlyunan dəy Ahan wa Zəwwəran n Əlyibada, isammadas
edag zəddigan wa.» ²⁹ Gannin awen fəlas dat awen ənâyan
Trofiməs wa n Efez dəy əxrəm iddew əd Buləs; təzzar ordan
as izzogaz-tu Buləs Ehan wa Zəwwəran n Əlyibada.

³⁰ İnarjarway əxrəm ketnet, ozalan-du aytedan dəy
təsədag kul. Əbazan Buləs, əlwayan-tu əgmadan dər-əs
Ehan wa Zəwwəran n Əlyibada, təzzar tawaharan mawan-
net dəffər-san tamazayt ten da. ³¹ Gammayan ad agin iman
ən Buləs as din-ewadan salan kumanda ən sojitan n Ərrum
n as, əxrəm ən Yerusalam ketnet injarway. ³² İyra-du
sojitan əd kabtanatan-nasan dəy tamazayt ten da, ozalan
sər-san. As togga tamattay kumanda əd sojitan, təraz dəy
təwit ən Buləs. ³³ Təzzar ikka-du kumanda Buləs, ibaz-
tu, omar s ad itəwəkrəd s əşşin sassaran, amaran issəstan
d awa imos, d awa ixsad. ³⁴ Təsəxarat tamattay ketnet,
gannin aratan əmmizraynen. Indar i kumanda ad issən
awa imosan tidət dəy takat ten, təzzar omar s ad ammayay
Buləs əs bərəki wa n sojitan. ³⁵ As ewad Buləs şisəffəttan
n ahan wa n bərəki, awa sər-əs təga tamattay dəy əwəjjən,
kundaba as t-ədkalan sojitan s afalla. ³⁶ Təl-kâm-as tamattay
ketnet, təsixarat təgannu: «Ammatet, ammatet!»

Aljawab wa iga Buləs dat əljəməyat

³⁷ As zama dər-əs əggâzan sojitan barêki, inna Buləs i kumanda: «Awak ələx tarrayt n a dak-annax arat?» Inn-as kumanda: «Ko! Kay təssana təlyunant? ³⁸ Dağ adi wər təmosax aw Masar was kala isaffallag aytedan, təzzar iggaz teneray ənta d əkkoz gim n awedan ən maggan ən man?» ³⁹ Inn-as Buləs: «Nak, Ag-Əlyəhud a əmosax, ihəwan dağ əxrəm ən Tarsa dağ akal ən Kilikəya imosan əxrəm fəl təga masnat. Onsayaq-qay a di-takfa turagat n ad əşšiwəla i tamattay ta.» ⁴⁰ İkf-as-tat kumanda, ibdad Buləs fəl təsəffəttan, isaddagan s əfus-net i tamattay ad təssəsəm. Təffəsta tamattay ketnet, təzzar işşewal-asan Buləs dağ təlxibrit, awal wa-da-nasan, inn-asan:

22

¹ «Imədrayan-in d abbatan-in, səsəmat əmərəddə a kawan-sassagra tādłəmt ta tawagga.» ² As das-əslan işşewal-asan dağ təlxibrit, əşšotan dağ əsəsəm y-as; təzzar inn-asan: ³ «Nak Ag-Əlyəhud a əmosa, ihəwan dağ əxrəm ən Tarsa ihân akal ən Kilikəya, mişan əxrəm wa dağ a dağ ədwala, əxreç daw Gamaləyel. Isassaxr-i s əlluç ləkkum y əlqanun n aljad-nana. Əgeç gəllejat dağ ləkkum i Məşşina şilat ən ta təgam azalada. ⁴ Əzaxazzabaç aytedan win əhanen tarrayt ta da ən Ƴaysa, har əgmadan man wiyyad, karrada meddan əd tədoden, əggaraq-qan dağ kasaw. ⁵ Əlimam wa Zəwwəran d Asaggawar wa n əxmaran əggəyyen fəl adi. Əntanay fadda a di-əkfanen şira əkkanen imədrayan-nana, Kəl-Əlyəhud win Damas, fəl ad əgrəwa as din-oseç tarrayt n abbaz ən nalkiman ən Ƴaysa kul win t-əhanen, awəyaq-qan-du əs Yerusalam əkrâdan fəl ad awwaddaban.

⁶ Əşšokala za dağ awen da, as din-əhozax əxrəm ən Damas attayan n ammas n azal, wala a ihogan, ibalazzat ənnur labasan a d-igmâdan ijənnawan dağ xələyxələyan-in. ⁷ Udeç, əsleç y əməsli iyyan as di-inna: "Talut, Talut ma fel as di-təzaxazzaba?" ⁸ Ənneç: "Əməli, ma təmosax?" Inn-i: "Nak awa, Ƴaysa wa n Nazaret, wa təzaxazzaba." ⁹ Ənâyan aytedan win dər əddewax ənnur wen, mişan wər əslən y əməsli wa di-işşewalan.

¹⁰ Təzzar ənneç: "Əməli, mas di-iwar igi-net?" Inn-i Əməli: "Əbdəd, takkax əxrəm ən Damas, a dak-dağ-as-attamal arat kul was kay iwar igi-net." ¹¹ Əddərçala fəl təllabəst n ənnur en, təzzar əbazan aytedan win dər əddewa əfus-in, əlwayan-i əs Damas.

¹² Amaran Damas ih-et aləs iyyan igân esəm Ananəyâs iksudan Məššina wəllen, ilkâm y əlqanun-nana, as Kəl-Əlyəhud kul win Damas əssiğmaran-tu. ¹³ Os-i-du, ibdad dægma-nin, inn-i: "Amadray-nin Talut, iqqəlet-kaydu asawad-nak." Iqqal-i-du asawad-in tamazayt ten da, ənayaq-qu. ¹⁴ Inn-i deş: "Məššina wa əğbadan marawan-nana a kay-isannafranan harwa dat alwaq, y a kay-issusən tara-net, tənəyax Alğadil-net, tasla deş y əməsli wa-net iman-net, ¹⁵ id ad təqqəla təgəyya-net dat aytedan kul, təməlaş-asan awa tənəyax d awas təsleş. ¹⁶ Əmərədda mas təqqala? Əbdəd, tətəwəsəlməğa daş aman, tansəyax Əməli a kay-izzəzdəğ daş bakkadan-nak."

¹⁷ Dəffər awen əqqala Yerusalam. Tattara əzəl iyyan daş Ahan wa Zəwəwəran n Əlyibada as di-tobaz tarna n Infas wa Zəddigan. ¹⁸ Ənəyax Əməli, inn-i: "Ətrəb, təgməda Yerusalam tarmâd, fəlas wər z'əqbəlan aytedan-net təgəyya ta fall-i tətəgga." ¹⁹ Təzzar ənneş-as: "Ya Əməli, wərgeş əntanay iman-nasan əssânan daş əmmək was kala ad tilala inan n əlyibada s iyyan iyyan, saşfaləş aytedan win sər-ək əzzəgzannen, əggataq-qan? ²⁰ As itawənşal deş əzni n Əstefanos imosan təgəyya-nak, nak iman-in əlleş den, ərdêş s ətəwənşə-net, nak a ogazan ibərnaz n aytedan win əganen iman-net." ²¹ Amaran inn-i: "Aglu, nak a kay-z-izəmmizəlan s igəğ, əssukaq-qay aytedan win wər nəmos Kəl-Əlyəhud."»

Buləs əd kumanda ən sojitan win Ərrum

²² Əssisaman-as aytedan har d-idkal batu n aytedan win wər nəmos Kəl-Əlyəhud, təzzar saşaren daş jənnawan gannin: «Itəwəkkəset awedan wa fəl amađal! Awedan şilat ən wa, wər immək ad iləs təməddurt.» ²³ Takkasan imaslan saksodnen, əggaran-in ibərnaz-nasan, əggaran aboqqa daş alhawa. ²⁴ Omar kumanda s ad itəwəzugəz Buləs ammas ən barəki, təwəgginat-as təwit s ələkkud fəl a dasan-iməl əddəlil wa fall-as təsaşarat tamattay. ²⁵ Mişan as t-əkradan y a das-agin šiwwit, inna i kabtan wa illan den: «Awak təlâm tarrayt ən təwit n iyyan daş Kəl-Ərrum wər ibez əşşərişə harwada?» ²⁶ As isla kabtan en y awen, igla imal i kumanda, inn-as: «Ma tətəgga da? Aləs a, in Ərrum!» ²⁷ Ikka-du kumanda Buləs, inn-as: «Tidət as kay in Ərrum?» Inn-as Buləs: «Awalla!» ²⁸ Təzzar inna kumanda: «Nak, azrəf aggen a əzzənza tişit n iyyan daş Kəl-Ərrum.» Inn-as Buləs: «Nak ələsəl-in a təmos.» ²⁹ Tarmâd as fall-as əzzənkazan sojitan win as zama a t-əggazan şin tanəşay y a tu-şəşşiwəlan. Kumanda iman-net as issan as iyyan daş Kəl-Ərrum a isassakrad den əs sassaran, təggaz-tu tasa.

Tebadday ən Buləs dat Asaggawar wa Zəwwəran

³⁰ As əzəl wa dəffər wen, omar kumanda imuzaran ən limaman d Asaggawar wa Zəwwəran ən Kəl-Əlyəhud ketnet s ad ammanay, fəlas ira ad ikkəs aššak daɣ əddəlil wa fəl sattarmasan Kəl-Əlyəhud Buləs. Təzzar issokas-du Buləs, issəbdad-tu dat-san.

23

¹ Idag Buləs Asaggawar s asawad-net, inna: «Imədrayan-in, wər di-təha tərək waliyyat n as ill-ay arat a iqqal wər ira Məššina as kala ad t-əmmozala har awas əbdada da.» ² Mišan omar Ananəyās wa n Əlimam wa Zəwwəran iyyan daɣ aytedan win əllanen dəgma ən Buləs s a das-infəz. ³ Təzzar inn-as Buləs: «Məššina a dak-z-infəzan, əlmunafiq! Wər təqqimay əddi ar y a di-təsrəɣa s awa inna əššəriɣa, kay təmməzrayaq-qu ad təsawataɣ imi-nin.» ⁴ Ənnan-as aytedan win əllanen dəgma-net: «Kay, Əlimam wa Zəwwəran ən Məššina a tərabbada?» ⁵ Inn-asan Buləs: «Wər əssenay imədrayan-in as ənta a imosan Əlimam wa Zəwwəran; tidət daɣ as iktâb as: "Ad wər tannay a labasan s əmənokal ən tamattay-nak."»

⁶ Issân Buləs as təzunt n Asaggawar en iyyat Sadusaytan a daɣ təga, ta hadat Farisaytan; adi a fəl idkal əməsli-net wəllen dat Asaggawar, inna: «Imədrayan-in, nak Farisay a əmosa, erâwan wiyyad Farisaytan, wər d-əmmewaya s adag n əššəriɣa wa, ar fəlas əgeɣ attama daɣ as inəməttan ilkâm a d-ənkəran daɣ tamattant.» ⁷ Inna awen ɣas tənkar tamazaq gər Farisaytan əd Sadusaytan, təzun tiddawat, ⁸ fəlas Sadusaytan əttâfan as wər tu-təlla tanakra daɣ tamattant, wala əllân-tu angalosan, wala kələsuf. Farisaytan amaran əntanay əzzigzanan as awen kul ill-ay. ⁹ Təkkus tamazaq wəllen. Inkar arat daɣ musanan win Farisaytan əbbəllanan fəl awen, əwaran aganna ən Buləs, ad gannin: «Aləs wa, wər fall-as nəhənnəy lahan waliyyan! Mijas tidət daɣ as iššəwal-as aggəsuf madeɣ angalos.» ¹⁰ Awa təga tamazaq-nasan daɣ tuksay, təggaz tasa kumanda n ad agin Buləs tankət-tankət. Adi a fəl omar sojitan s ad azzabben fəl a daɣ-san d-əxtəsan Buləs, awəyan-tu əs barəki-nasan. ¹¹ As iga ahad, inafalal Əməli i Buləs, inn-as: «Buləs, a kay-wər-təggəz tasa! Əmmək wa daɣ as fall-i təggəyyey daɣ əɣrəm ən Yerusalam, əmmək di da as kay-iwar a fall-i taggayyey daɣ wa n Ərrum ənta da.»

Əgan Kəl-Əlyəhud eɣaf fəl ad anɣin Buləs

¹² As affaw, namaggan Kəl-Əlyəhud eɣaf, əhadan as wər z'atšin, wala ašwin iket wər əgen iman ən Buləs. ¹³ Aytedan

win əhadnen den, ogaran əkkozat təmərwen. ¹⁴ Əkkan imuzaran ən limaman d əmɣaran ən tamattay, ənnan-asan: «Nəhād as, wər z'iggəz arat imawan-nana iket wər nəga iman ən Buləs. ¹⁵ Daɣ adi əmərədda kawanay d Asaggawar wa Zəwwəran əgməyat daɣ kumanda a dat-wan issəbdəd Buləs, tassaknim as, a təram ad taşşaggaram taɣara-net s əlluɣ. Amaran nakkanay, nasimatag y igi ən man-net harwa du-wər-ewed da.» ¹⁶ Mişan isla tagazay ən Buləs i taftaw ten, ikka barəki ən sojitan, iggaz-tu, imal i Buləs. ¹⁷ Təzzar iɣra-du Buləs iyyan daɣ kabtanatan, inn-as: «Əlwəy abi di əs kumanda, ila isalan a das-z-əgu.» ¹⁸ Iddew dər-əs kabtan, eway-tu əs kumanda, inn-as: «Amaskasaw wa igan Buləs a di-d-iɣran, igmay daɣ-i a sər-ək d-əlwəya abi a, ilân isalan a dak-z-iməl.» ¹⁹ İbaz kumanda əfus n əbi, igmad dər-əs aytedan, issəstan-tu, inn-as: «Mas tareɣ a di-tu-təməla?» ²⁰ Inn-as əbi: «Kəl-Əlyəhud əgân eyaf fəl a daɣ-ək əgməyan tufat ad təssəbdəda Buləs dat Asaggawar-nasan wa Zəwwəran, almat ərân ad aşşaggaran taɣara-net s əlluɣ. ²¹ A dasan-wər-tarɗa fəlas wiyyad daɣ-san ogarnen əkkozat təmərwen n aləs a das-za-bəkəmmətnen y ad agin iman-net. Əhādān as wər z'atşin za wər z'aşwin iket wər əgen adi. Simatagan əmərədda, wər əqqəlan ar y a t-id-tayya sər-san.»

²² İrɣam kumanda y əbi wen fəl amel y awedan waliyyan isalan win das-iga den, amaran issəgl-ay.

Əməwəy ən Buləs s əmuzar ən Qaysarəya

²³ Dəffər awen iɣra-du kumanda əşşin kabtanatan, inn-asan: «Səmmutəgat sanatat təmad ən soji d əssəyat təmərwen ən soji daɣ win əggannen əggəsan əd sanatat təmad daɣ win əttafnen allaxan; y ad akkin Qaysarəya dəffər təsüdəsen. ²⁴ Təsəmmutəgam deɣ şisənay şin z'iwən Buləs, təşəşiwədam-t-in Felikəs wa n ənaxkim daɣ alxer.» ²⁵ Amaran iktab-as-in kumanda şirawt inn-as-in:

²⁶ «Awa nak Klawdəyus Lusəyas din-ihulan ənaxkim Felikəs əknəɣ saɣmar. ²⁷ Aləs di, a əbazan Kəl-Əlyəhud, as zama əgân iman-net as tan-in-oseɣ əddewəɣ əd sojitan. As di-əggazan salan n as awedan n İrrum a imos, əgeq-qu daɣ adag a daq-q-in wər ikka arat. ²⁸ Dəffər awen ewayaq-qu s Asaggawar-nasan wa Zəwwəran fəl ad əssənəɣ lahan wa t-əssəwaran. ²⁹ Ənayaɣ as, arat iqqālan əşşəriɣa wa-nasan ɣas a fəl tu-ɣattasan, wərgəɣ arat a t-issiwaran tamattant wala iguz ən kasaw. ³⁰ Mişan as əsləɣ as əgân Kəl-Əlyəhud eyaf fəl ad agin iman-net, əssokəɣ-ək-in əddi da, əntanay amaran ənnəɣ-asan a sər-ək in-awəyan kay şixəttas şin t-əgan.»

³¹ Ǝgan sojitan awas tawamaran. Ǝglan ahad wen da, əddewan əd Buləs har osan aƣrəm n Antifatris. ³² As əzəl wa dəffər wen əqqalan-du sojitan win jawankatnen barəkinasan, əglan win əwannen əggəsən əd Buləs. ³³ As din-osan aƣrəm ən Qaysarəya, əgan širawt tanad daƣ əfus n ənaxkim, əssəbdadan dat-əs deƣ Buləs. ³⁴ Iƣr-et, amaran issəstan Buləs d akal wa t-ilan. As issan as akal ən Kilikəya a t-ilan, ³⁵ inn-as: «As d-osan aytedan win kay-əƣtasnen, a kay-du-sassaƣra.» Təzzar omar s ad itəwəttəf Buləs daƣ ahan ən təmənkəla was kala t-issəkraş əmənokəl Herod.

24

Ǝtəwəsəbdad ən Buləs dat ənaxkim Felikəs

¹ Səmmos adan dəffər awen, osa-du Ananəyəs wa n Ǝlimam wa Zəwwəran, iddeu-du d arat daƣ əmyaran ən Kəl-Ǝlyəhud d aləs a d-əwwikkalan Kəl-Ǝlyəhud igân esəm Tertuləs. Ǝƣtasan Buləs ƣur ənaxkim n akal Felikəs. ² Təzzar itawaƣra-du Buləs, amaran issənta Tertuləs daƣ amel n aratan win as ənnan Kəl-Ǝlyəhud iƣşād-tan, inna: «Ya əmizwar Felikəs, əddəlil-nak d əddəlil n aratan win təgeƣ a fəl igraw akal wa alxer aggen, amaran təgeƣ ənnizam olaƣan i tamattay-nana fəl əşşaddat ən təla-nak əgərri. ³ Nətigudəy-ak wəllen daƣ adag kul aratan olaƣnen kul win təgeƣ, ya əmizwar Felikəs! ⁴ Wər areƣ a kay-səlluleƣ, batu-nana ši gəzzulat, mišan əgmāya daƣ-ak fəl əddəlil n əlluƣ-nak a dər kay-nəzdāy a dana-təssəsəma. ⁵ Nənāy as aləs a, əlməssibat a imos, igammayan d əsəffəlləg ən Kəl-Ǝlyəhud edag əhan daƣ əddənət, imos deƣ əmuzar ən taggayt n arat n aytedan as itawannu Nazari-tatan. ⁶ Wala Ehan wa Zəwwəran n Ǝlƣibada da, igmāy d əsəmmədəs-net; nəbaz-tu. [Nərâ a das-nagu əşşəriƣa wa-nana, ⁷ mišan os-ana-du kumanda Lusəyas, ibaz-tu daƣ-na s assahat, ⁸ omar deƣ a dat-ək əbdədan aytedan win əƣtasnen Buləs.] Kay iman-nak as tu-təssəstana, ad tənəya tidət ən təƣəttas kul šin das-nəga.» ⁹ Təzzar ərđan Kəl-Ǝlyəhud əd batu ən Tertuləs, ənnan tidət a təmos.

¹⁰ Isaddagan ənaxkim i Buləs ad iššiwil. Inna Buləs: «Isidawat-i a dat-ək aga batu tas əgməyəƣ aggaz ən man-in, fəlas əssānəƣ əmənokəl-in as, irəw təmosaƣ amaşraƣ ən tamattay n akal wa. ¹¹ Kay iman-nak təfrāgəƣ ad təssənəƣ kud tidət wala bahu as, a ilân maraw adan d əşšin ad əggəzzayəƣ əs Yerusalām y a daƣ-as əƣbəda Məşşina. ¹² Wərmād a di-ənāyan daƣ Ahan wa Zəwwəran n Ǝlƣibada, wala daƣ nan win əlƣibada, wala deƣ daƣ əƣrəm, mişawala d awedan waliyyan za wala jinajarwayəƣ

tamattay. ¹³ Aytedan win, wər əfregan əsəbdəd ən təxəttas šin di-əgan da. ¹⁴ Mišan ya ərdeş s arat iyyanda, amaran ad t-anna dat-ək, a t-imosan as: Məššina di n Əməli ən marawan-nana as əlkama əs təməwit tas tu-təna tarrayt ta n Əlməsix Ƴaysa, tas gannin əntanay taggayt. Əzzigzanax s arat kul wa iktaban daƷ Əttəwret d Əlkəttaban n Ənnəbitan. ¹⁵ Əgəx attama wa daƷ Məššina, amaran əntanay da əgân-tu, a t-imos as təll-ay tanakra daƷ tamattant, gər za y aytedan win oƷadnen wala win wər noƷed. ¹⁶ Adi a fəlas faw da gammaya nak da wəllen a di-wər-təggəz tərək n a labasan dat Məššina wala deƷ dat aytedan.

¹⁷ A ilan elan ad əgmadax Yerusalam, as əmərədda əqqala-du y a d-awəyax i tamattay-nin širgiten, aga deƷ šikutawen šin izzəlzam Məššina. ¹⁸⁻¹⁹ Awa da a əheƷ as di-d-osan Kəl-Əlyəhud win Asəya daƷ Ahan wa Zəwwəran n Əlxibada, əssindaƷ arat wa di-issəwar əššərixa daƷ salan n əzəzdəg-in; wərmad Ʒur-i təlla tamattay za wala əssinkara ajeqqax n aytedan. Əntanay as ihor a dat-ək əbdədan, əxtəsan-i Ʒur-ək, kud ənta əlân əddəlil waliyyan, ²⁰ madeƷ əməlan aytedan win əllanen da lahan was inna Asaggawar wa Zəwwəran əgəq-qu alwaq wa dat-əs əbdada, ²¹ a wər nəmos as ənnəƷ gar-essan s afalla: "Wər di-issəbdad dat-wan azalada y a di-təšrəƷam ar fəl as əzzəgzanax as ilkâm a d-ənkəran nəmməttan."»

²² Felikəs əhân salan wəllen ən tarrayt ta n Əlməsix Ƴaysa, as isla i batu ten, izzərəz əššərixa har iyyan əzəl, inna: «As d-osa Lusəyas wa n kumanda ad əxtəsa əššərixa-nawan.» ²³ Təzzar omar Felikəs kabtan s ad agəz Buləs, mišan ad wər itəwədgəz, wala itəwəgdəl y aytedan-net a daƷ-as əssənan.

²⁴ Arat n adan dəffər awen, osa-du Felikəs iddew əd təntut-net Drusilla, təmosat wələt əlyəhud; təzzar isassaƷra-du Buləs, issəsam i salan win itaggu daƷ batu n əzəgzan s Əlməsix Ƴaysa. ²⁵ Mišan as d-ewad Buləs isalan win əqqalnen taqqat d ənudi daƷ man d əššərixa ən Məššina wa d-izayan, təggaz tasa Felikəs, inn-as: «Əmərədda aglu, as əgrawa təmazayyat n a dər-ək məšiwala, a kay-d-ələsax əsəssəƷri.» ²⁶ A itaggu Felikəs awen, igâ attama daƷ ad t-akfu Buləs azrəf, adi fəl t-id-isasaƷru itaggu dər-əs takkayt. ²⁷ Awen da a igan har əgan əššin elan. Igməd Felikəs tizart, iggaz Borkəyəs Festus edagnet. Oyya-du Buləs daƷ kasaw fəl ad agu tənəfust i Kəl-Əlyəhud.

25

Tebadday ən Buləs dat Festus – Buləs issof a das-işrəy Qaysara wa n əmənokal wa zəwwəran

¹ As iga Festus karad adan d iguz ən tizart ən Yahudəyya, igmad aɣrəm ən Qaysarəya, iggəzzay əs Yerusalam. ² As din-osa, əmmənyan dər-əs muzaran ən limaman əd muzaran ən Kəl-Əlyəhud, əxtasan ɣur-əs Buləs. A tütansayan, ³ a dasan-agu tənəfust n ad d-issuku Buləs Yerusalam y a daɣ-as işrəy. A gannin awen, əntanay əgân eɣaf fəl a das-bəkəmmen daɣ tarrayt, agin iman-net. ⁴ Mişan inn-asan Festus: «Buləs kasaw wa n Qaysarəya a daɣ itawattaf, amaran ənta iman-net ad iqqəl tarmâd. ⁵ Daɣ adi idawanet dər-i muzaran-nawan əs Qaysarəya, əxətəsanet-tu den da kud ill-ay a iɣşâd.»

⁶ Iga Festus daɣ Yerusalam adan əllanen gər əttam əd maraw, amaran iqqal Qaysarəya. As əzəl wa dəffər wen, iqqim daɣ adag wa daɣ işşarraɣ, təzzar omar s a dat-əs itəwəsəbdəd Buləs. ⁷ As d-osa Buləs ɣalayɣalayan-tu Kəl-Əlyəhud win d-əgmadnen Yerusalam, a tu-ɣattasan sawaran-tu igi n aratan aggotnen labasnen as wər əfregan əsəttəddi-nasan. ⁸ İşşewal Buləs y ad agəz iman-net, inna: «Nak wər əgeɣ ark amazal waliyyan immâran əşşəriɣa ən Kəl-Əlyəhud, za wala Ehan wa Zəwwəran n Əlɣibada wala deɣ əgeq-qu i Qaysara əmənokal wa zəwwəran.» ⁹ Festus irân igi ən tənəfust i Kəl-Əlyəhud, inna i Buləs: «Awak tərdeɣ s ad taggazayay əs Yerusalam dak-daɣ-as-əşrəya aratan win di?» ¹⁰ Inn-as Buləs: «Kala, kala! Edag n əşşəriɣa wa, in Ərrum; daɣ adi da da ad za təwəşrəya. Wər əɣşedaɣ arat waliyyan i Kəl-Əlyəhud, kay iman-nak təssânaɣ wəllen daɣ adi. ¹¹ Kud əşşəriɣa a əmməzraya, madəɣ əgeɣ arat a di-issiwaran tamattant, ərddeɣ əs tamattant. Mişan kud aratan win as itawanna əɣşâdaq-qan bahu a əmosan, wədi wər t-illa awedan ilân tarrayt n a di-agu daɣ fassan-nasan. Amaran, dad zamas adi a igan, wədi əmənokal Qaysara as areɣ a di-işrəy.» ¹² İmaşşawwar Festus əd məşşewwar-net, amaran inna i Buləs: «Əmənokal Qaysara as tərəɣ a dak-işrəy, a tu-takka za.»

Tebadday ən Buləs dat Agriffa əd Bernikəs

¹³ Arat n adan dəffər awen, osa-du əmənokal Agriffa aɣrəm ən Qaysarəya, iddew əd tamadrəyt-net təgât Bernikəs fəl ad əssəsləman Festus agin-as alafəyet d assa. ¹⁴ Adan aggotnen win əgan den, idkal-du daɣ-san Festus y əmənokal Agriffa isalan ən Buləs, inn-as: «İlla aləs da,

a d-oyya ənaxkim Felikəs daḡ kasaw. ¹⁵ Alwaq wa d-əkkeḡ Yerusalem, əxtasan-tu ḡur-i muzaran ən limaman d əmḡaran ən Kəl-Əlyəhud, əḡmayan daḡ-i a t-əzzəbəza s əššəriḡa. ¹⁶ Mišan ənneḡ-asan, əššəriḡa wa n Kəl-Ərrum wər itibəz awedan ar s ad iśrâḡ. Kundaba innəbdad awedan d aytedan win t-əxtasnen, aḡəz iman-net daḡ arat wa itawasawar.

¹⁷ Adi a fəl dər-i d-əddewan əs Qaysarəya. Ose-du ḡas, as əzəl wa dəffər wen əqqima daḡ adag wa n əššəriḡa omara s a d-ammaway aləs wen. ¹⁸ Əbdadan meddan win t-əxtasnen, mišan wər t-əssəwaran arak əmazal labasan waliyyan daḡ win əḡila. ¹⁹ Awa zaḡnin təmazaq ḡas təḡât daḡ batu n əddin-nasan əd salan n aləs iyyan igân esəm ḡaysa abâ, mišan igla Buləs immâl as iddâr. ²⁰ Nak iman-in wər əssenəḡ əmmək was z'əšrəḡa əzzənəf n aratan win den, adi a fəl əssəstanəḡ Buləs kud irda s ad akku Yerusalem iśrəḡ daḡ-as. ²¹ Mišan issof a das-iśrəḡ Qaysara s ənta əmənokal wa dənnəḡ mənokalan. Adi a fəl omara s ad itəwigəz har t-itəwəsuku.» ²² Amaran inna Agriffa i Festus: «Nak da areḡ ad asla y aləs wədi.» Inn-as Festus: «Tufat a das-taslaḡ.»

²³ Əzəl wa dəffər wen iga-du əmənokal Agriffa assa wa n mənokalan ənta əd tamadrəyt-net Bernikəs. Əggazan ehan wa n əššəriḡa əddewan əd kumandatan ən sojitan əd mizwaran n əḡrəm. Omar Festus s a d-ammaway Buləs, təzzar immeway-du.

²⁴ Amaran inna Festus: «Əmənokal Agriffa, əd kawanay ketnawan win əmmənəynen da, ənta da aləs was əddəlil-net a fəl di-d-osan Kəl-Əlyəhud kul, daḡ Yerusalem harkid deḡ da da, gannin s afalla wər imməkkan ad iləs təməddurt. ²⁵ Amaran nak za, wər ənayəḡ as iga əmazal waliyyan a t-issiwaran tamattant, mišan dad zamas ənta iman-net a igmayan a das-iśrəḡ əmənokal wa dənnəḡ mənokalan, wədi əge tanat təmosat a das-t-əssuka. ²⁶ Dər iga awen da ya, wər əssenəḡ fəl arat waliyyan igmâd aššak daḡ talḡa-net a din-z-əktəba y əmənokal wa dənnəḡ mənokalan. Adi a fəl t-əssəbdada dat-wan, wəllen kay əmənokal Agriffa, fəl a tu-nəssəstən, əssənəḡ awa z'əktəba daḡ talḡa-net; ²⁷ fəlas wər sər-i ila almaḡna ad əssuka Qaysara amaskasaw as din-wər-əmələḡ əddəlil wa fəl itawattaf.»

26

Aljawab wa iga Buləs dat Agriffa

¹ Inna Agriffa i Buləs: «Təgrawa turəgat n awal, tagəzəḡ iman-nak.» Təzzar izzal Buləs əfus-net y a das-təssəsəm

tamattay, inna: ² «Ya əmənokal Agriffa, əbbələl zəwwəran a di-təmos tahakkay ta di-təgəx azalada turagat n aggaz ən man-in dağ aratan kul win as ənnan Kəl-Əlyəhud əxşadaq-qan, ³ wəllen as əhân-kay salan wəllen n alxadaten-nasan kul d aratan kul win fəl tamazağan. Dağ adi, onsayaq-qay ad taga tazaydart, təssəsəməx-i.

⁴ Kəl-Əlyəhud kul əzdâyan-i harwa xur təmmədrəyt-in. Əssânan dağ awa əgəx kul dağ tamattay-nin harkid dəx dağ Yerusalam. ⁵ Irəw as di-əzdayan, amaran as imos as ərdân, əfrâgan a dak-aggayyen as, taggayt ta n Farisaytan a əhəx, s ənta a togarat əzəzzəwi dağ əddin-nana. ⁶ Əmərədda nak da ibdadan da şarrağa fəlas əgəx attama dağ arkawal wa iga Məşşina i marawan-nana. ⁷ Attama en da a əganat tawşeten-nana an marawat əd sanatat, eway-du sər-əsnat awen əlxibada ən Məşşina əs gəlleyat ehad ezal, əqqâlnat y ad andu. Ya əmənokal-in, Agriffa, attama en da za, a fəl di-əxtasan Kəl-Əlyəhud. ⁸ Ma fel as dawan-orna kawanay Kəl-Əlyəhud əzəgzan âs Məşşina ilkâm ad d-issənkər inəmməttan?

⁹ Nak iman-in, kala a xur-i illa as, iwâr-i igi n arat kul wa əfraga fəl a din-anxa esəm ən Yaysa wa n Nazaret. ¹⁰ Arat wen iman-net a əgəx dağ əxrəm ən Yerusalam. Əkfan-i dağ as muzaran ən limaman turagat, təzzar əbazax inalkiman ən Yaysa aggotnen əgeq-qan dağ kasaw. Əwârax aganna ən win tan-əbaznen s əşşərixa wa n tamattant ta n kərəz. ¹¹ Əyyəwanax ilum gər nan ən Kəl-Əlyəhud win əlxibada tawaddabaq-qan, şahaşşalaq-qan əbudər ən Yaysa. Awa dasan-əge dağ gezzar, lakkaməx-asan əs xərman ən kallan win tamawen.

¹² Əzəl iyyan əşşokala dağ awen da əkkey Damas, əgrâwa turagat xur muzaran ən limaman n igi n awen imos as əntanay a di-əganen dağ əşşəxəl wen. ¹³ Ya əmənokal-in, ewâyax əd tarrayt ammas n azal wala a ihogan ənayax ənnur a d-igmâdan ijənnawan ogaran wa n təfuk əmələwləw as ibalazzat dağ xələyxələyan-nana, nak d aytedan win dər əddewa. ¹⁴ Nuda ketnana, təzzar əsley i wa di-innan dağ təlxibrit: "Talut! Talut! Mas di-təzağazzaba? Tugəyt-nak əs ləkkum i tara-nin, wər tənfa wala; wər təzlay əd ta n ays iddag məşşis əs xayman." ¹⁵ Ənneş-as: "Əməli, ma təmosax?" Təzzar inn-i Əməli: "Nak awa, Yaysa wa təzağazzaba. ¹⁶ Mişan ənkər, təbdədəx, fəlas ənifalalax-ak fəl a kay-aggax amaşşaxal-in əd təgəyya-nin a za taggayyet y aytedan anay wa [di-]təgəx, taggayyex-asan dəx awa kay-z-assakna dəffər awa. ¹⁷ A kay-aggaza dağ Kəl-Əlyəhud, əd təmattiwen şin tan-wər-nəmos,

əzəmmizəlaq-qay sər-san, ¹⁸ fəl ad tara şittawen-nasan, təkəkəsaq-qan-du dəy şiyay s ənnur, əgmədan-du tarna ta n Iblis əlkəman i Məşşina, fəl ad əgrəwan təsüref tən bakkadan-nasan, əgrəwan dəy tadagart dəy mizdagan əs tarrayt n əzəgzan sər-i."

¹⁹ Ya əmənokal Agriffa, əddəlil wədi a fəl wər əmməzrayay awa di-d-inafalalan, igmād-du ijənnawan. Igi ən Məşşina a imos. ²⁰ Kalar azzaray əs Kəl-Əlyəhud win Damas əd win Yerusalam, d aytedan win Yahudəyya ketnet, d aytedan win wər nəmos Kəl-Əlyəhud, taggay-asan təlxtubat gannay-asan, iwâr-tan ad utaban, ahdin-du əs Məşşina, agin imazalan əssiknanen tətub-nasan. ²¹ Əddəlil n awen da a fəl di-əbazan Kəl-Əlyəhud dəy Ahan wa Zəwwəran n Əlyibada, əgməyan əd tanayay-nin. ²² Tadhəlt ta di-iga Məşşina a di-du-təşəşşawadat əzəl wa n azalada, tebadday ta əge da taggay isalan-net y aytedan gər win wər nəla almaqam, wala win t-əlanen, wər d-əşşotay wala dəy salan ən was əmalan ənnəbitan sa hadan d ənnəbi Musa əs a d-asu; ²³ a t-imosan as, Əlməsix ilkâm ad inəy alyazab, ibatu, izar-du dəy i nəmməttan tanakra, iməl ənnur wa ihakku Məşşina, imosan isalan n əlyillas, i Kəl-Əlyəhud d aytedan win tan-wər-nəmos.»

²⁴ Harwada işşewal Buləs, işarray fəl man-net, as idkal Festus əməsli-net, inna: «Kay Buləs əmməskəl a təgey, igət ən tayaray ta təgey isammaskal-kay.» ²⁵ Inn-as Buləs: «Əmizwar Festus, nak wər əmməskala. Kalar awa ganna da, tidət a imos, təkfat əs tayttay. ²⁶ Amaran əmənokal Agriffa əhân-tu salan win di. Adi a fəl wər əksuday iginasan dat-əs, fəlas əkkâsay aşşak as, wər tan-iha waliyyan a das-ijhâlan, id wər tawaggan dəy əssir. ²⁷ Əmənokal-in Agriffa awak təzzigzanay s awa ənnan ənnəbitan? Əssânay as təzzigzanay sər-əs.» ²⁸ Təzzar inna Agriffa i Buləs: «Torda-nak a di-taga əlməsixi fəl arat n amazay!» ²⁹ Inn-as Buləs: «Gər za fəl arat n amazay wala, əgmâya dəy Məşşina a kay dər-i işəşşalan, kay harkid aytedan kul win di-əssəsammen da azalada, as wər əhen sassaran win.» ³⁰ Təzzar inkar əmənokal Agriffa əd Festus wa n ənaxkim əd Bernikəs d aytedan kul win dər nəxaman, ³¹ əgmədan tinəmännin gar-essan: «Aləs wen wər iga arat waliyyan as ihor a fall-as ammat wala dəy iggəz fall-as kasaw.» ³² Amaran inna Agriffa i Festus: «Aləs wen ənnar wər igmay a das-işrəy Qaysara əmənokal wa zəwwəran, itəwəyyu.»

27

Əmiwəy ən Buləs s əyrəm n Ərrum

¹ As itawanna ad nəggəz aɣlal n aman nakku akal n Italəya, itawagga Buləs ənta əd wiyyad iməskəsa daɣ əfus ən kabtan iyyan igân esəm Yuləyus ihân egan ən sojitan as itawannu «Wa n Qaysara». ² Təzzar nəggaz aɣlal n aman n əxrəm n Adramutenəs ikkân ikallan n Asəya win əwarnen efay n agaraw. Ih-âna Aristarxus imosan awedan n əxrəm ən Tesalonik n akal wa n Masedonəya.

³ As əzəl wa dəffər wen, nəzzəbbat daɣ əxrəm ən Sidon. Yuləyus imosan awedan isâknin Buləs əlluɣ, ikf-ay turagat n ad akku imidawan-net win əhanen əxrəm wen fəl a daɣ-as əssənan. ⁴ As dər-naɣ igmad əɣlal n aman Sidon, nəllil əsəlīm n agaraw daɣ nəha ifi n akal imosan gərwətlan as itawannu Qıbrus fəlas aɣu dər nəmməqqas. ⁵ Dəffər awen, nəşşokal fəl agaraw was iwar akal ən Kilikəya əd wa n Banfiləya tama-net, newad-in əxrəm ən Mira ihân akal wa n Lukəya, nəzzəbbat daɣ-as. ⁶ Igraw daɣ-as kabtan wa dər nəddew iyyan aɣlal n əxrəm n Alaskandrəya, itakkin akal n Italəya, ig-ana daɣ-as.

⁷ Nəga adan aggotnen nəsilalam fəl aman sollan, gərrid as din-nəhoz əxrəm ən Kənidos. Təgdal-ana assahat n aɣu ad naglu daɣ anamod wen, təzzar nənnamad akal imosan gərwətlan as itawannu Kəret. As nokay fəl Salmone, nəmmoday i Kəret, nəggaz ifi-net. ⁸ Gərrid as nəllil əsəlīm n agaraw har newad edag igân esəm «Izəzzəbba win Hossaynen n əɣlalan» inimahazan d əxrəm ən Lasaya.

Tazafa d alamaz n aman aɣlal

⁹ Isilalat-ana əşikəl wen wəllen, əşikəl daɣ əɣlal n aman deɣ əmərədda iggaz-tu aɣyarar, fəlas wala əzum ən Kəl-Əlyəhud wa n ɣarat okay. Adı a fəl iga Buləs y aytedan win ənnodanen daɣ əɣlal n aman ənnəsixa, inn-asan: ¹⁰ «Meddan, hannayaɣ as əşikəl-nana ad t-iggəz iba ən taɣara d əɣşud zəwwəran. Wərgəɣ aɣlal n aman ɣas əd lalan-net a z'əhləknen, kalar nakkanay da, ad nəggəz tazak ten.» ¹¹ Mişan issof kabtan iduf ən batu ta dasan-iga aləs wa ewayan aɣlal n aman əd wa t-ilan, iduf n ənnəsixa wa dasan-iga Buləs. ¹² Dad imos as azazzabbaw n əɣlalan n aman wen wər daɣ-as oley ikus ən təgrəst, tənkar taşşam n aytedan win maşşayalan n əɣlal əgan tanat ad aglin, əgməyan d aggad n iyyan əxrəm imosan azazzabbaw n əɣlalan n aman igân esəm Fenikəs ihân akal imosan gərwətlan as itawannu Kəret, əkkəsan tagrəst daɣ ɣayanɣayan-net s iyyan iswâd sa sər agala daɣ ataram, wa hadan sa sər tamasna daɣ ataram.

¹³ Əllan den da as d-igar arat n aɣu wa n agala, təzzar əkkəsan y əɣlal anaday, əqlan, sammaɣayən y akal imosan

gərwətlan ən Kəret day əhəzan təšəšwit-net, əxilan ad əfrəgan əmərədda igi n awa əran. ¹⁴ Mišan wər əhəgan əd teklay as fall-asan du-təgar tazafa təssohet as itawannu ta n tamasma day dənnəg, təgât esəm Yurakilon, a dasan-du-təgât iguz wa n akal ən Kəret. ¹⁵ Təzzar ibat ađu ađlal n aman, indar-ana iduf-net, igla dər-nađ ibât-tu ađu.

¹⁶ As nəggaz ifi n arat n akal imosan gərwətlan, igân esəm Kawda, nəga y arat ən təxlalt n aman ilwây ađlal wa nəha, təməwit ta nərə gərrid. ¹⁷ Ədkalan-tat-du maššaxalan n əđlal, əgan-tat day ammas n əđlal, təzzar əssəđlayan-du ađlal n aman ketnet iđunan zawwarnen otaban-as sər-san fəl a tu-wər-zəmməzzəyan aman. Əssərasan afər wa isakaf ađu isəluləm fəl aman fəl ad agu sollan, fəlas əksudan ad istəb əđlal y amađal day adag igân esəm Surtis a day gəzzul agaraw, igla əđlal ibât-tu dər-nađ ađu. ¹⁸ Awa təga tazafa en day assahat, as əzəl wa hadan a din-əggaran maššaxalan n əđlal ilalan day agaraw fəl ad ifsas əđlal. ¹⁹ As əzəl wa n karad, əgaran-in day aman əs fassan win-da-nasan isəssəkna n əđlal. ²⁰ Təfuk wala etran nəgâ adan aggotnen wər tan-nənay. Awa təga tazafa en day assahat, nəkkas fadda attama ən man-nana.

²¹ Adan en nəg-en wər t-illa i itsan arat, təzzar ibdad Buləs day ammas n aytedan, inna: «Meddan, ənnar təttaşfam ənnəsixa wa dawan-əgeđ, taqqamim da wər du-təgmedam akal wa n Kəret; əddi wər kawan-z-igrəw iba n tađara wa d əhluk wa. ²² Amaran əmərədda əgmâya day-wan ad wər təkkesam attama, fəlas wər kawan-iha i z'əgmədan man-net, mišan ya ađlal n aman ənta a danax-igməd. ²³ Əndod a di-inafalal angalos ən Məššina wa di-ilan, əheđ əššəđəl-net, ²⁴ inn-i: "Buləs, a kay-wər-təggəz tasa, Qaysara wa n əmənokəl wa zəwwəran, kundaba təbdəda dat-əs isrəđ-ak. Amaran ənəy, Məššina ig-ak arraxmat təmosat aggaz n aytedan kul win dər tənamaha ađlal n aman da." ²⁵ Day adi meddan ad wər təkkesam attama, fəlas əzzigzanađ əs Məššina. Awa di-inna den, ad agu s əmmək en da. ²⁶ Amaran kundaba istab dər-nađ əđlal n aman i təšəšwit n akal iyyan imosan gərwətlan.»

²⁷ As iga adawannay n ahad n əzəl-nana wa n maraw d əkkəz təgâr fall-ana tazafa, ibât dər-nađ ađu ađlal fəl agaraw igân esəm Adrəyatik, ənnəfrayan maššaxalan n əđlal n aman d as amađal wər iggug. ²⁸ Təzzar əgaran day aman ađan y sər-əs əkətan təzzəgrət n agaraw. Təqqal təzzəgrət n aman day adag wen əssayat təmərwen n əđil d əkkəz. As əgan amazay, əlasan tađkot, osan-in edag wen təmos təzzəgrət-net səmmosat təmərwen n əđil əd

sədis. ²⁹ Təggaz-tan tasa n ad infəl əxlal n aman i təhun, təzzar əgaran daɣ aman daɣ ələqqam n əxlal əkkozat təzoliyawen šin as tu-naddayan, amaran ad tattaran a tan-issəknan ezal. ³⁰ Ad gammayan maššaxalan n əxlal n aman ad addaggagan. Təzzar əssərasan taɣlalt n aman ta əndərrat daɣ agaraw, əgan əsarū ās a əran ad əndəyan eɣaf n əxlal əs šiyyad šizoliyawen. ³¹ Mišan inna Buləs i kabtan əd sojitan: «Meddan en, as əgmadan aɣlal wa, wədi wər dawan-t-illa agamad əd man-nawan.» ³² Təzzar olayan sojitan iɣunan win əqqannen taɣlalt, əqlan dər-əs aman.

³³ As ibuk azal y igi, igmay Buləs daɣ awedan kul ad atšu, inn-asan: «Azalada, əzəl-nawan wa n maraw d əkkoz d aššawaša labasan, wər t-illa arat as tərâm tettay-net, wala iyyan iggâzan imawan-nawan. ³⁴ Daɣ adi əgmâya daɣ-wan ad tatšim fəl ad tərəgam, fəlas wər kawan-iha i daɣ in-z-iba wala anzađ iyyanda n aɣaf-net.» ³⁵ As inna Buləs awen, idkal-du tagəlla iga igodan i Məššina dat-san ketnasan, amaran ikarammat daɣ-as, ad itattu. ³⁶ Təgmad-tan tasa ketnasan, ətšan əntanay da. ³⁷ Awa nəmos daɣ əxlal en ketnana, sanatat təmad n awedan d əssayət təmərwen əd sədis. ³⁸ As əyyəwanan a din-naqqalan alkama daɣ agaraw fəl ad əssəfsəsan aɣlal n aman.

³⁹ As iga azal, ənayan maššaxalan n əxlal as akal wa din-əhozan den wər t-əzdayan. Oggan əzazəl daɣ təšəšwit, ənnan ad əgməyan d a sər-əs awəyan aɣlal har das-t-əssəstəban kud ad əfrəgan awen. ⁴⁰ Əkkasan šizoliyawen šin əndaynen aɣlal, oyyan-tanat-in s aman, oran deɣ iɣunan ən katakawtan win sanamadnen aɣlal. Dəffər adi əkkasan ađda y əfər wa ihan dat əxlal fəl ad t-issəkəf ađu, amaran sannamawalan-tu əd təgadamayt iha əzazəl. ⁴¹ Mišan ənfalan i tageft n əzazəl təhât agaraw, ittıtay daɣ-as aɣaf n əxlal, iməzzay d əmətəkwəy; təzzar ad tərəzzu assahat [n tənazzamaren] ələqqam-net. ⁴² Ənayan sojitan awen ɣas, namannakan fəl ad əkkəsan iman daɣ məskəsa fəl ad wər iššəf waliyyan daɣ-san, addaggag. ⁴³ Mišan igdal-asan kabtan-nasan igi n awen, fəlas a ira ad agəz Buləs. Təzzar omar kabtan aytedan win əsannen ewet n aman, ad tərəggen daɣ agaraw izaran-in əs təgadamayt. ⁴⁴ Amaran aytedan win hadatnen, əntanay omar-tan s ad əwəran katakawtan əd gannatan n əxlal win du-nassarnen. Əmmək en da as ewadan ketnasan tagadamayt n agaraw əragan-du.

28

Buləs iha akal imosan gər wətlan as itawannu Malta

¹ As du-nərag day awen, nəgmad-du aman, itawann-ana akal wen imosan gərwətlan, esəm-net Malta. ² Əssəknan-anax aytedan n akal wen əlluɣ wər nəla tulat. Əgan-ana ketnana marhaba, əssərxan-ana temsay, fəlas akonak a iffayan, iga deɣ asamed. ³ İşşedaw-du Buləs eɣaf n eşkan, ig-en day təmsay, təkkas-du day-san tüksay taşşolt, tədad əfus-net, təkarayray day-as. ⁴ As ənayan kəl akal wen taşşolt təkirayray day əfus ən Buləs, ad tinəmənnin: «İgmâd aşşak as aləs wen əmæggi ən man a imos. İrag-du day agaraw, mişan harwa da ilkâm-as əşşəriɣa, wər ira ad iddər.» ⁵ İrsak-in Buləs taşşolt, tørtak day təmsay, wər t-illa a t-igrâwan. ⁶ Əqqalan aytedan y ad ihədədəy Buləs, madəɣ ifətəqqət iba-tu tamazayt ten da; mişan as ərəwan wər hənnəyan a t-igrâwan, əqqalan-du day awa ənnan, ad gannin amaran: «Əməli iyyan awa!»

⁷ Edag en əhoznat-tu təwəgas ən Bubləyəs, aləs wa n əmuzar n akal wen. İzazzabbat-ana day ahan-net, nəga karad adan nənniftay-as. İg-ana marhaba əd mægura əknanen əlluɣ. ⁸ As itaggu awen, təzizalallat tanaday abba ən Bubləyəs, tørtây-as əd tədist. Os-ay-in Buləs issəwar-tu ifassan-net, onsay-as Məşşina. İzzozay-tu. ⁹ Dəffər awen a du-tasin miranan n akal wen win hadatnen, ətiwəzuzəyan. ¹⁰ Əssəknan-anax aytedan n akal wen saɣmar aggen, as nəggaz şin teklay day əɣlal n aman iyyan. Əkfan-anax arat was nəddərar y əşikəl.

Assa ən Buləs aɣrəm n Ərrum

¹¹ As nəga karadat təlil day Malta, nəggaz aɣlal n aman a d-igmâdan aɣrəm n Alaskandrəya, as əwâran əssənəman as itawannu "win əknewan" eɣaf-net, s ənta da akal wen da imosan gərwətlan a day ikkas tagrəst, nəgla. ¹² As nosa aɣrəm ən Surakusa, nəga day-as karad adan. ¹³ Nəgmad Surakusa nəgla har nosa aɣrəm ən Regəyon. As əzəl wa dəffər wen, igar-du aɣu wa n agala, nəgla. As əzəl wa hadan newad aɣrəm ən Batəyoləs. ¹⁴ Den da ad nəssəha fəl arat day nalkiman ən Ƴaysa, əgməyan day-na a ɣur-san nagu əssa adan. Dəffər awen nənnəmad aɣrəm n Ərrum. ¹⁵ As danax-əslan mədrayan-nana day əzəgzan win əɣrəm n Ərrum, əssəlkadan-ana-du əs təxrəmt ta n Əssuk n Affəyus, wiyyad əssəlkadan-ana-du əs təxrəmt as itawannu Ta n Karad Zəzzəbba. As tan-inay Buləs iga igodan i Məşşina, ikna awen iman-net. ¹⁶ As din-nəggaz aɣrəm n Ərrum, irɣa əlxəkum i Buləs s ad ixsər day ahan wər inamaha ar əd soji wa t-ogazan.

Təlɣutbat ən Buləs day batu ən Ƴaysa Əlməsix day Ərrum

¹⁷ Karad adan dəffər awen, isassayra-du Buləs imuzaran ən Kəl-Əlyəhud win əxrəm n Ərrum. As d-əddewan inn-asan: «Imədrayan-in, nak wər nəxşed arat waliyyan i tamattay-nana wala dəx əmmizraya alxadaten šin du-nogaz xur marawan-nana, mišan əttərməsaḡ dəx Yerusalam, tawagga dəx fassan ən Kəl-Ərrum. ¹⁸ As di-əşrayan, əran di-ayyin fəlas wər əgeḡ arat waliyyan a di-issiwaran tamattant. ¹⁹ Mišan ənkarən Kəl-Əlyəhud ugayan s ad tawayya, iqqal-i əşšil agamay n a di-işrəḡ Qaysara əmənokal wa zəwwəran, dər iga awen da ya wər əgeḡ ənnəyat n ad aga i tamattay-nana taḡtəst waliyyat. ²⁰ Adi a fəl kawan-əssəgmaya, a kawan-ənəya, məšiwəla dər-wan. Isassaran win, wər sər-i tan-d-eway ar as əgeḡ attama-nin dəx was əqqalan Kəl-İsrayil.» ²¹ Ənnan-as: «Nakkanay za, wər nəgrew širawt waliyyat a du-təfəlat akal ən Yahudəyya dəx talxa-nak wala dəx os-āna-du iyyan dəx mədrayan-nana dəx əddin, ag-ana isalan-nak madəḡ annu sər-ək ark arat. ²² Amaran nəra a dana-təməla kay iman-nak awa təsamədranəḡ, fəlas arat iyyanda as danəḡ-əhan salan-net as, taggayt ta n tarrayt n Əlməsix Ḡaysa, wər t-illa adag a tat-wər-nəşšek.» ²³ Təzzar namaggan dər-əs təmastant əzəl iyyan. As d-iḡlay əzəl wen, osan-t-idu s igət dəx ahan wa iha. İşşewal-asan əs gəlleyat dəx salan ən Taḡmar ta n Məşšina wa n aḡora har iga ahad, isasagr-asan-tat. Isakn-en əs təməwit təsisagrat dəx Əttawret ən Musa d Əlkəttaban n Ənnəbitan win hadatnen as, awa igannu əs Ḡaysa tidət dəx a imos. ²⁴ Wiyyad əssokasan dəx-san aratan win inna Buləs aššak, əzzəgzanan; win hadatnen ugayan s əzəgzan. ²⁵ Təzzar əmməzəḡan gar-essan. As əggəzan šin teklay, inna Buləs: «Tidət da a inna Infas wa Zəddigan i marawan-nana dəx əmi n ənnəbi Isayas, as inna: ²⁶ *"Aglu, akku tamattay en, tannaḡ-as: 'Ad tayyawan əsəsəm, mišan wər ilkem ad təgra wala, tayyawan asawad, mišan wər ilkem ad tənay wala';* ²⁷ *fəlas tamattay di, əsəḡər a təga əwəl-net, gərrid as sallinat təməzzugen-net, təqqān šittawen-net; fəl ad wər tənəy za wala taslu, taqqam da wər təgra s əwəl-net, əngəm tutab, əzzuzəyaq-qat!"*»

²⁸ Dəffər awen, inn-asan Buləs: «Əssənət za as, šimattiwen šin wər nəmos Kəl-Əlyəhud əntanatay da issokenat-du Məşšina isalan n efsan-net. Əntanatay a dasanz-əssəsəmnen.» ²⁹ [As inna Buləs awen, əfalan-tu Kəl-Əlyəhud, əmmizəḡan wəllen gar-essan.]

³⁰ Iga Buləs əşšin elan əxrâdnen dəx ahan ixfâr ənta iman-net, itaggu marhaba y aytedan kul win əranen anay-net. ³¹ Itagg-asan isalan ən Taḡmar ta n Məşšina, isasayr-en

dey arat kul wa iqqalan Əməli Yaysa Əlməsix ši wala tasa,
wər t-illa dey awedan a das-igdâlan awen.

Şirawt ta iktab Buləs i Kəl-Ərrum Əsənti

Assalam

¹ Awa nak Buləs akli n Əlməsix Үaysa, itiwaxran əs tişit n anammazul itiwaskat deḡ y igi ən salan n Əlinjil ən Məşşina. ² Əlinjil wen irəw Məşşina as iga arkawal-net y ənnəbitan daḡ Əlkəttaban win zaddognen. ³ Isalan n Əlinjil win den əmmigradan daḡ batu ən Barar ən Məşşina a d-ihəwan daḡ əzzurrəyya n ənnəbi Dawəd daḡ batu ta təqqalat tişit-net aggadəm. ⁴ Daḡ batu amaran ta təqqalat Infas wa Zəddigan ən Məşşina itawaxsab Barar ən Məşşina əs tarna s əssəbab ən tanakra-net daḡ təmattant. Ənta a imosan Үaysa Əlməsix Əməli-nana. ⁵ Tarrayt-net as nəgraw arraxmat ən tişit ən nəmmuzal fəl a du-nawəy şimattiwen kul şin wər nəmos Kəl-Əlyəhud s əbərdəg wa d-itaway əzəgzan, fəl saḡmar n esəm-net. ⁶ Şimattiwen şin kawanay da təhâm-tanat, kawanay a iḡra Үaysa Əlməsix. ⁷ Katabaḡ-awan-in ketnawan kawanay a əhanen aḡrəm n Ərrum təmosam win ikna Məşşina tara tət iwaxram s ad tizdagam. Əgmaya daḡ Məşşina di n Abba-nana d Əməli Үaysa Əlməsix a dawan-igan arraxmat d alxer.

Igodan əd səsəgritan

⁸ Daḡ tizarat əggodayaḡ i Məşşina əs tarrayt ən Үaysa Əlməsix daḡ batu-nawan ketnawan id əzəgzan-nawan itiwasla daḡ əddənet ketnet. ⁹ Iggıyyat-i Məşşina a əḡbada s əwəl iyyanda s amel wa taggaḡ isalan n Əlinjil ən Barar-net âs faw tahâm şiwatriwen-in. ¹⁰ Faw da gammaya daḡ təwatriwen-in ad əgrəwax təməwit n a kawan-in-asa, as irda Məşşina. ¹¹ Tidət as əkneḡ tara n a kawan-ənəya fəl a dər-wan ədrəwax arat ən təhəkkuten şıyyad a d-əfalnen Infas wa Zəddigan fəl ad təgrəwam əzəzzəwi daḡ əzəgzan-nawan. ¹² Almaḡna as dər-wan namaggazaḡ edaḡ, əzəgzan wa nəla nak dər-wan a danaḡ-isəssuhət ketnana daḡ tarrayt ta nəha, inəməsəsuhat deḡ əzəgzan wa-nawan əd wa-nin. ¹³ Ya imədrayan-in, areḡ ad təssənam as əyyəwanax tara n a kawan-in-asa fəl ad əgrəwa ḡur-wan tənfa n əşşəḡəl-in wa n anammazul zun ta əgrawa ḡur təməttiwen şin hadatnen wər nəmos Kəl-Əlyəhud. Mişan indar-i awen har harwa. ¹⁴ Tişit-in anammazul təsiwar-i əşşəḡəl daḡ aytedan kul gər Kəl-Əlyunan as əmoranat şittawen-nasan wala win tanwər-nəmos, gər win musanan wala win aljahilan. ¹⁵ Awen

dağ a fəlas sidaranay wəllən a dawan-agay isalan n Əlinjil kawanay da a əhanen ağrəm n Ərrum.

Awa dağ təşşewal şirawt ta

¹⁶ Fəlas wər di-imos Əlinjil təkarakit id tarna ən Məşşina a imos, itaway-du efsan s aytedan kul win əzzəgzannen a obazan ğur Kəl-Əlyəhud ikka aytedan win tan-wər-nəmos. ¹⁷ Illikan as taqqat ta n Məşşina tənifalal dağ Əlinjil s əzəgzan, amaran s əzəgzan ğas, id ənnan İlkəttaban: «Awedan wa oğadan dağ tarrayt ta n əzəgzan a igarrawan təməddurt taynayt.»

Əlinjil ənta immalan taqqat ən Məşşina

Aytedan kul ibaz-tan əşşəriya ən Məşşina

Inəmməzray kul obâz-tan əşşəriya ən Məşşina

¹⁸ Alham ən Məşşina iffal-du ijənnawan itakka-du aytedan kul win wər nəksud Məşşina d aytedan kul win wər noğed, əwâğan tidət əgdâlan-as ənəfilal s iba n taqqat-nasan. ¹⁹ Fəlas arat wa ifrağan ətəwəssan dağ batı ən Məşşina ibbiyyan-asan id Məşşina iman-net a dasan-t-isannafalalan. ²⁰ Awalla, harwa ğur əxluk ən Məşşina əddənət da assayfaten-net şin wər nətəwənəy, əmosnən tarna-net təylâlat əd tişit-net Əməli, tawahan-naynat, əmmunnat dağ igitan-net. Dağ adi wər əlen əsarı waliyyan a tan-ikkasan, ²¹ id əssânan Məşşina mişan wər das-əgen sağmar wa dər ihor za wər das-əgen igodan. Kalar oyyan iman-nasan əssəxrakan-tan medranan wər nənfa wala, əjawanken değ dağ şiyay id iwallan-nasan a əxfalnen. ²² Əğân iduf n as əmosan imalan ən tayttay, əntanay amaran imeskəlan a əmosan. ²³ Ənkaran əs tanaya ən Məşşina di n Amaylol əgan dağ adag-net şaşşelənan n əggadəm wər nəğləl əd gəğad əd hərwan əd wəxsan əd dəmərđəmaran. ²⁴ Awen dağ a fəl tan-oyya Məşşina əlkaman y arak deranan-nasan. Əmmək en dağ as samadasan iman-nasan əs təməwit təsifallasat əggadəm.

²⁵ Əntanay a sammattaynen tidət ən Məşşina əgan bahu dağ adag-net, əğbâdan əməttəwəxlək oyyan Wa d-ixallakan. Attamalet eşəm-net har faw! Amin! ²⁶ Awen dağ a fəl tan-oyya Məşşina əğğazan tara ən man-nasan eway-du sər-san awen şifəllas, har âs şidoden-nasan ab-as tinəmənsinat əd meddan, kalar şidoden a dər tinəmənsinat, imos awen arat immizrayan əttəbiğat n əggadəm. ²⁷ Meddan değ əgan awen da. Ab-as tinəmənsin əd tədoden-nasan, ad tinəməğgin əzzəna gar-əssan, əknân tara n awen. Aytedan win əxraknen en, a tan-abəz

əşşərixa ən Məşşina s attadib wa dər əhoran mazalan wər nətəwəggu win taggin den.

²⁸ Dad zamas ugayan s ad əssənan Məşşina, oyy-en Məşşina əlkaman y arak tayttay-nasan ad taggin imazalan wər nəmməkkan. ²⁹ Taggin əzzənəfan kul ən mazalan wər noxed, d aššar, d attama daɣ a wər əlen, d əzzəngu əd manzaɣ, d igi ən man, əd kənnasan, əd təkərras, əd tišit ən maksanan. Sawaran aytedan bahu, ³⁰ akkiyyan igannu ark aratan əs wa hadan. Əmosan izənga ən Məşşina, wər əlen aladab, tanarbadan, ih-en zazwar ən man, gammayan tarrayen kul šin igi ən təkma. Wər əbbərdagan i marwan-nasan. ³¹ Wər əlen tayttay, wər əɣdelan, wər əlen tafrəyt za wər tan-təha tahanint. ³² Əknân masnat n əşşərixa imosan tamattant təɣlalat wa issənsa Məşşina i win tagganen imazalan win den. Mišan dər iga awen da, əssərtayan as tamazalan ark aratan win den, d as əqbâlan aytedan win tan-tamazalnen.

2

Aytedan win əganen iduf n as olayan obaz-tan əşşərixa ən Məşşina

¹ Daɣ adi kay wa ixakkaman y aytedan, əssən as wər dak-tu-təlla təsureft a təqqala da, fəlas as təxakkama y aytedan, wədi iman-nak a tətəbaza s əşşərixa, id kay iman-nak da tətəggaɣ arak mazalan win taggin aytedan win den.

² Amaran nəssân as əşşərixa ən Məşşina was obaz aytedan win tagginen imazalan win den oɣâd. ³ Ənzər-in daɣ as kay wa ixakkaman aytedan a dər-ək olanen alxal, wər t-illa əmmək as du-za-tərəga daɣ əşşərixa wa n Məşşina.

⁴ Meɣ ak əsəttəlkək a təgeɣ əlluɣ ən Məşşina, d əlləllu-net, əd təzaydart-net, təqqima wər din-təgreɣ as ira a kay-isəmməttəy s əlluɣ-net tutaba? ⁵ Əqqəssu-nak əd tugəyt-nak əs tətubt a d-ewaynen as itiwəsəmutig-ak alyazab zəwwəran əzəl wad z'izəmmizəl Məşşina alham-net inəfiləl əşşərixa-net oɣâdan.

⁶ Əzəl wen, awedan kul ad t-akfu Məşşina awa dər əhoran mazalan-net. ⁷ Win əganen təzaydart za daɣ əmazal n awa olayan, gammayan s awen ətəwəsəxmər ɣur Məşşina, d ədkul, gammayan təməddurt ta wər nəɣərrəd, win di ad tan-akfu Məşşina təməddurt ta təɣlalat. ⁸ Amaran win wər nəgəmmay ar tənfa ən man-nasan, əmosan əllid ən tidət, tamazalan deɣ aratan wər noxed, win di a tan-assaknu Məşşina aššar n alham-net. ⁹ Awalla, təssust əd təməɣutar əllânat-tu y aytedan win tamazalnen talbast a obazan ɣur Kəl-Əlyəhud ikka win wər nəmos Kəl-Əlyəhud. ¹⁰ Amaran

awedan kul wa itamazalan awa olağan, wədi ill-as-tu ətkul d ətəwəsəxmər d alxer a obazan ğur Kəl-Əlyəhud ikka win wər nəmos Kəl-Əlyəhud, ¹¹ fəlas Məşşina wər itəggu təmərıt.

¹² Adi a fəlas aytedan kul win tagginen ibakkadan imos as ijhal-asan əşşəriğa wa n Əttawret, win di wər z'attarmasan s əşşəriğa wen. Amaran win əssannen əşşəriğa wa n Əttawret taggin ibakkadan, win di ketnasan a dasan-itəwəxkəm s əşşəriğa wədi da. ¹³ Wərgex win sasammen y əşşəriğa a oğadnen dat Məşşina, kalar win sər-əs tamazalnen əntanay a z'əgrəwnen ətəwəqbal əd taqqat ğur Məşşina. ¹⁴ Aytedan win wər nəmos Kəl-Əlyəhud amaran wər əssenən fəl əşşəriğa wa n Əttawret mişan imazalan win əttəbiğat-nasan nimannakan d əşşəriğa wa, win di əntanay a əmosnen əşşəriğa i man-nasan. ¹⁵ Saknin s awen as imazalan win as omar əşşəriğa əktâban dağ wallan-nasan. Ənnəyatən-nasan değ tagayyatnat awen. Amaran iduf wa namaggan gar-essan assayət iyyat tinəməsəwiran sər-əs lahan assayət iyyat değ gammayan sər-əs ənəməsurağ. ¹⁶ Ənta da da awa z'agin əzəl wad z'ışrəğ Məşşina əs tarrayt ən Ƴaysa Əlməsix imazalan n aggadəm win əğbarnen, s əmmək was t-inna Əlinjil wa əmmala.

Kəl-Əlyəhud obâz-tan əşşəriğa ən Məşşina

¹⁷ Kay wa igannin təmosağ Ag Əlyəhud təffilla fəl əşşəriğa wa n Əttawret, tətəggağ ibaragan as kay təmosağ əmaray əs Məşşina, ¹⁸ təssânağ awa ira Məşşina, təssânağ arat wa imosan əlməxsud id tətivasasağra əşşəriğa wen. ¹⁹ Kay wa ikkasan aşşak as təmosağ əmalway ən win əddərğalnen, təmosağ ənnur i win əhanen šiyyay, ²⁰ təmosağ əməsəsəğri n aytedan win nəbbənnan, d əməsəsəğri ən bararan, təgêğ awen fəlas tənâya dağ Əttawret masnat əd tidət əkmâlnen. ²¹ Xasil kay wa isasağrin aytedan amaran wər təsəsəğrağ iman-nak! Kay wa itamaran aytedan s ad wər akəran, mafel tətakara? ²² Kay wa itamaran aytedan s ad wər agin əzzəna, mafel tətəggağ-qu? Kay wa ikəyağan əssənəman, mafel təgalla tətakaray awa ihan idaggan n əğyibada-nasan? ²³ Kay wa isabaragan fəl əşşəriğa n Əttawret amaran tətamazrayağ-qu imos awen iba n safran n esəm ən Məşşina. ²⁴ «Fəlas esəm ən Məşşina sammadrayan-tu aytedan win wər nəmos Kəl-Əlyəhud amaran imazalan-nawan a d-ewaynen awen», s əmmək was t-əmalan Əlkəttaban.

²⁵ Illikan as əmənəkəd təh-ay tənfa as imos as təbbirdağ a əşşəriğa wa n Əttawret, mişan as tətamazrayağ əşşəriğa

wen, wədi əmənəkəd-nak wər izlay d iba-net. ²⁶ As imos as awedan wa wər nəmməkəd ilkâm y alwajiban n əşşərixa ibbirdag-asan, awak wərgex a das-itəwəxsəb as imminkad? ²⁷ Awedan wa wər nəmməkəd amaran ibbirdag y əşşərixa wa n Əttawret, ənta dak-z-işrəxan kay wa ittafan Əttawret təmminkada tətamazraya-q-qu. ²⁸ Arat wa imosan tidət as tişit n Ag Əlyəhud wər təmos arat iwaran azzahir xas, wala əmənəkəd xas. ²⁹ Kalar awa ihan əwəl ənta a itaggin awedan Ag Əlyəhud amaran əmənəkəd wa itaggin awedan Ag Əlyəhud əwəl a day itaggu imos arat a d-ifalan Infas ən Məşşina, wərgex arat iktaban xas day Əttawret. Ənta di da Ag Əlyəhud wa igarrawan təmmalen şin d-əfalnen Məşşina, wərgex şin d-əfalnen aggadəm.

3

¹ Day adi məni tat alfaydat ən tişit n Ag Əlyəhud, madey məni tənfa n əmənəkəd? ² Tənfa-net şi agget day anamod kul, amaran ta zəwwərat âs Kəl-Əlyəhud əntanay as d-iga Məşşina awal-net day fassan-nasan. ³ Tidət as wiyyad day-san əmmizrayan Məşşina. Awak immikkan iba n təlɣudəlanasan ad təsəmməttəy arat day təlɣudəla ən Məşşina? ⁴ Kala kala! Itəwəqbəlet as Məşşina ənta a imosan tidət, aggadəm anasbahu. Tişit ən Məşşina tidət ənta a fəl ənnan Əlkəttaban: «*Təgrawa taqqat day awal-nak, təgrawa tidət day əşşərixa-nak.*»

⁵ Mişan ma za nannu as imos as iba n aqqad-nana isannafalal-du aqqad ən Məşşina? Awak Məşşina imos fall-as iba n aqqad ad izəmmizəl alham-net? Illikan as awal wa tagga da taggaq-qu əs tayttay ta n aggadəm. ⁶ Kala, kala! Məşşina inimaggag d ad imos as wər oxed. Kundaba adi, manəmmək as z'işrəx y əddənet? ⁷ Amaran as imos as bahu-nin isannahal əsənəfiləl ən tidət ən Məşşina, eway-du awen əs təbbəyyan tanaya-net, wədi mafel tətawaxkam-i tişit n anasbakkad? ⁸ Ma ikma fadda nənna: «Mazalatana talbast fəl a tat-du-təgmad tənfa?» Arat s ənta a sər-na gannin arat n aytedan gammaynen a danax-əxşədan esəm. Aytedan win di əhoran d ad attarmasan s əşşərixa ən Məşşina.

Aytedan kul obâz-tan əşşərixa ən Məşşina

⁹ Ma za? Awak nakkanay an Kəl-Əlyəhud təll-ay alfaydat nəgrâw dənnəg aytedan harwa da? Kala kala, fəlas nəjwâr nəsattda as ketnana gər za Kəl-Əlyəhud wala aytedan win tan-wər-nəmos, as nəha təla n abakkad, ¹⁰ s əmmək was ənnan Əlkəttaban: «Wər t-illa i oγadan, wala xas iyyanda,

11 wər t-illa i igarrin,
wər t-illa i igammayan masnat ən Məşşina

12 Kul əxrâkan əmmək a mosan,
ketnasan əknân aşşar,
wər tan-iha i itaggan awa olayan,
[wala] ƣas iyyanda.

13 Şigarsaten-nasan əmosnat zun təsəska ənnolammen,
ilsawan-nasan takarrasan sər-san aytedan,
idəlay-nasan wər əxberan ar assam ən taşşolt.

14 Imawan-nasan ədnâyan batuten samommen əd tulƣant,

15 idaran-nasan təh-en tadasayt ən tanaƣla n əzni,

16 ahluk d əlməssibat əwâran tarrayt-nasan,

17 wər əzdayan tarrayt ta n alxer.

18 Təksəda ən Məşşina wər təha wallan-nasaŋ.»

19 Ənta nəssân as arat kul wa inna əşşəriƣa wa n
Əttawret, inn-ay y aytedan win əllanen daw əlxəkum wa n
Əttawret fəl ad affastin mawan kul itəwəqbəl as əddənet
kul obâz-tat əşşəriƣa wa n Məşşina. 20 Fəlas wər t-illa
awedan as za tətəwəqbəl taqqat-net dat Məşşina əs tarrayt
ən mazal n awa ihan əşşəriƣa, fəlas əşşəriƣa ənta a danaƣ-
isusunan awa imos abakkad.

Aytedan əgrâwan taqqat əs tarrayt n əzəƣzan

Əsəssəƣri ən taqqat ta ihakku əzəƣzan

21 Mişan əmərədda, Məşşina isinafalal əmmək was
z'iqbəl taqqat-nanaƣ da wala tarrayt ta n Əşşəriƣa ittiddan
daƣ Əlkəttaban. 22 Məşşina iqabbal taqqat əs tarrayt
n əzəƣzan əs ƴaysa Əlməsix. Amaran aytedan win
əzzəƣzannen kul iqabbal taqqat-nasan, fəlas aytedan wər
əzlayan: 23 Ketnasan əgân ibakkadan aba fall-asan tanaya
ən Məşşina. 24 Amaran əgrâwan taqqat təmosat təhəkkut
n arraxmat ən Məşşina əs tarrayt ən tədarfit ta du-teway
tassaƣ d Əlməsix ƴaysa. 25 Ənta a d-issəƣla Məşşina ixkâm-
as ad iqqəl takutay ta təmmasat ibakkadan n aytedan əs
tarrayt n əzəƣzan s əzni-net. Əmmək en daƣ as issəkna
Məşşina taqqat-net. Fəlas Məşşina oyya ibakkadan da wər
tan-iwwəddab daƣ azzaman win ərəwnen, 26 ən təzaydart-
net, amaran azzaman win əmərədda, ira ad assaknu
taqqat-net əs təməwit a daƣ z'itəwəqbəl as oƣâd, fəl ad iqbəl
taqqat n awedan kul wa izzəƣzanan əs ƴaysa.

27 Daƣ adi, awak ill-ay əddəlil a fəl nəƣa ibaragan?
Kala wər t-illa, fəlas wərgəƣ əbərdəƣ y əşşəriƣa a işƣalan
əməredda, kalar əzəƣzan. 28 Fəlas nakkanay nəƣa iduf n
as awedan igarraw taqqat əs tarrayt n əzəƣzan, wərgəƣ
ləkkum y əşşəriƣa. 29 Məƣ ak nəƣa iduf n as Məşşina
Kəl-Əlyəhud ƣas as imos Əməli-nasan? Awak Məşşina wər

imos Əməli n aytedan win wər nəmos Kəl-Əlyəhud? Awalla Əməli n aytedan kul a imos, harkid win wər nəmos Kəl-Əlyəhud. ³⁰ Dad zamas Məşşina iyyanda ɣas, wədi ad iqbəl taqqat ən Kəl-Əlyəhud s əssəbab n əzəgzan, iqbəl dex taqqat ən win wər nəmos Kəl-Əlyəhud əs tarrayt n əzəgzan wa. ³¹ Daɣ adi wərgex emes a din-nətaggu əşşəriɣa nətaggu əzəgzan daɣ adag-net. Kalar əsəttəddi a nətaggu əşşəriɣa.

4

Ibrahim imos almasal n aɣaraw ən taqqat s əzəgzan

¹ Ma za nannu daɣ adi s Ibrahim imosan əmâraw-nanay daɣ batu ta təqqalat tişit n aggadəm? Ma igraw? ² Ənnar imos as Ibrahim tarrayt ən mazalan-net as igraw taqqat ɣur Məşşina, wədi ila əddəlil n igi ən baragan. Mişan wərgex awen a igan ɣur Məşşina. ³ Fəlas ənnan Əlkəttaban: *Izzəgzan Abram əs Məşşina, awen daɣ a fəl t-ikfa Məşşina taqqat.* ⁴ Awedan wa itaggan imazalan olaynen, wədi alak-net wər das-imos tənəfust, kalar alxaq-net a imos. ⁵ Awedan amaran wa wər nəga imazalan olaynen, mişan izzigzan əs Məşşina s ənta ihakkin taqqat i nasbakkadan, wədi ad igrəw taqqat s əssəbab n əzəgzan-net. ⁶ Əmmək en daɣ as inna ənnəbi Dawəd daɣ batu n əbbələl n awedan wa ikfa Məşşina taqqat da wala imazalan-net, inna:

⁷ «Əbbilalan win as tawasarafan arak mazalan-nasan, Tawamasan bakkadan-nasan!

⁸ İbbilal aləs wa fəl wər ixəssəb Məşşina ibakkadan-net!»

⁹ Awak əbbələl wa in Kəl-Əlyəhud ɣas, meɣ ak in aytedan kul harkid win wər nəmos Kəl-Əlyəhud? Fəlas nəgannu: *Əzəgzan n Ibrahim igraw sər-əs taqqat dat Məşşina.* ¹⁰ Awak ma dər ola Ibrahim as igraw ətəwəqbal wen ɣur Məşşina? Awak imminkad meɣ wər immənkad harwa? Kalar harwa da dat əmənkəd-net ad igraw ətəwəqbal wen. ¹¹ Dəffər awen ad igraw Ibrahim ɣur Məşşina asannal wa n əmənkəd imosan əsəttəddi ən taqqat ta igraw s əzəgzan harwa dat əmənkəd-net. Arat wen igâ fəl ad iqqəl Ibrahim əmâraw n aytedan kul win əzzəgzannen əs Məşşina da wər əmmənkadan, fəl ad əgrəwan əntanay da taqqat ɣur Məşşina. ¹² Ibrahim imos harwa da abba n aytedan win əmmənkadnen, mişan wərgex əmənkəd-nasan ɣas a fəl əffəllan, kalar tilalt a əgan tarrayt n əzəgzan ta iga əmaraw-nanay Ibrahim harwa da wər immənkad.

¹³ Məşşina iga arkawal y Ibrahim əd hayawan-net as ad əgrəwan əddənet. Arkawal wen wər itawagga y Ibrahim fəl ləkkum-net y əşşəriɣa, kalar ig-as-tu Məşşina əs tarrayt

ən taqqat tat-t-ikfat əzəgzan-net. ¹⁴ As imos as tarrayt ən ləkkum y əššərixa as z'əgrəwan aytedan arkawal wen, wədi əzəgzan wər ila tarna waliyyat, arkawal wen dəx ad ib'as t-illa. ¹⁵ Fəlas əššərixa itaway-du təmazrəyt id wər nəfreg a t-idu-nəsandu, təmazrəyt amaran tətaway-du alham. Amaran edag wa wər iha əššərixa, wədi wər tu-za-təggəz təmazrəyt.

¹⁶ Ənta den dağ əddəlil wa fəlas arkawal wen ad itəwəgrəw əs tarrayt n əzəgzan, fəl ad iqqəl təhəkkut təmosat arraxmat. Emmək en dağ as arkawal wen ittidda y əzzurrəyya n İbrahim ketnet, almayna wərgəx win əlkamnen y əššərixa xas, kalar harkid win obaznen tarrayt n əzəgzan ta n İbrahim imosan abba-nana ket-nana. ¹⁷ Awen da a ihan Əlkəttaban id ənnan: «*Əgeq-qay əmaraw ən təmattiwen əknânen igət.*» Imos abba-nana ketnana dat Məšşina s ənta as izzəgzan, Məšşina s ənta a ihakkin təməddurt i win aba, ixallak-du awa tu-wər-nəlla. ¹⁸ İbrahim iggaz alxalat a dağ-as tu-wər-illa attama waliyyan, mişan izzəgzan iga attama-net dağ Məšşina. Emmək en dağ as iqqal *abba ən təmattiwen əknânen igət*, s əmmək was das-itawanna: «*Awen dağ a dər z'əgdin hayawan-nak.*» ¹⁹ Wər ides wala əzəgzan n İbrahim kuddeğ as issân as tağəssa-net [zun as] təmmût fəlas izay-in temeday n awatay, Sarata dəx təwašşar təggigra. ²⁰ İbrahim wər iga ašşak dağ arkawal ən Məšşina zun awedan wər nəzzəgzan, kalar isassahat-tu əzəgzan-net issəxmar tanaya ən Məšşina. ²¹ Isannahal ikus n ašşak as Məšşina ila tarna n ad assandu arat was iga arkawal-net. ²² Awen dağ a fəl «*das-itawaxsab awen əs tišit n awedan oyâdan.*»

²³ Mişan wərgəx əddəlil-net ənta xas a fəl itawaktab as: «*Itawaxsab-as awen*», ²⁴ kalar nakkanay da itiwaktab fəl əddəlil-nana, amaran Məšşina nakkanay da ad ixsəb taqqat-nana. Nakkanay əzəgzan a sər-əs nəga, ənta a d-issənkaran Əməli-nana Yaysa dağ təməttant ²⁵ s ənta a itawakfan fəl əddəlil ən bəkkadan-nana, itawasankar-du fəl ad nəgrəw taqqat dat Məšşina.

5

Agaraw ən taqqat əs tarrayt n əzəgzan d əlyillas

¹ Dağ adi as nəgraw taqqat dat Məšşina s əzəgzan-nana, wədi nəgrâw alxer gar-enax əd Məšşina əs tarrayt n Əməli-nana Yaysa Əlməsix. ² Tarrayt n Əlməsix as nəgraw arraxmat [s əssəbab n əzəgzan-nana]. Arraxmat en ənta fella-nana. Nəddəwat amaran attama wa nəga dağ

tanaya ən Məşşina, ənta a imosan abarag-nana. ³ Dənnəg awen fadda, nəsabarag kudde nəha təssust, fəlas nəssân as təssust ənta a du-tətawayat zəmmerat. ⁴ Zəmmerat ten amaran ənta a dana-təhakkıt tişit n aytedan əlânen almağna, amaran as nəqqal aytedan əlânen almağna wər za nammazzay d igi n attama dağ Məşşina.

⁵ Məşşina amaran wər isərmig i dağ-as igân attama, id tara-net a tədnayət iwallan-nana əs tarrayt n Infas wa Zəddigan wa danağ-itawakfan. ⁶ Fəlas harwa danağ-wər-təqqel alfaydat waliyyat ad immut Əlməsix fəl əddəlil n aytedan wər nəzəgzan əs Məşşina dağ alwaq wa iskat Məşşina y awen. ⁷ İzzəwat i z'iqbələn ad t-iba kuddeğ fəl əddəlil n awedan oğadan. Mijas ifrâğ awedan ad iqbəl təmattant fəl awedan olağan. ⁸ Mişan əmmək da was danağ-issəkna Məşşina tara ta danağ-iga: Harwada nəmos inasbakkadan ad aba Əlməsix fəl əddəlil-nana.

⁹ Dad zamas əmərədda nəgraw taqqat əs tarrayt n əzni n Əlməsix, manəmmək as danağ wər z'assafsu dağ alham ən Məşşina? ¹⁰ Fəlas, dad zamas harwa nəmos izənga ən Məşşina da nəga dər-əs alxer əs tarrayt ən təmattant ən Barar-net, manəmmək as wər za nəgrəw efsan s əssəbab ən təməddurt ən Barar-net əmərədda a dər-əs nəga alxer. ¹¹ Amaran iyyan arat as Məşşina a fəl nəsaftalla əs tarrayt n Əməli-nana Ƴaysa Əlməsix s ənta a danağ-igan əmərədda alxer əd Məşşina. Ənta den dağ abarag-nana.

Abakkad n Adəm d arraxmat ən Ƴaysa Əlməsix

¹² Ma təssoka za batu ten? Adi za as tarrayt n awedan iyyanda as d-iggaz abakkad əddənət, abakkad amaran ənta a d-ewayan təmattant. Əmmək en dağ as təmattant təll-ay y aytedan kul fəlas ketnasan əgân ibakkadan. ¹³ Ənta abakkad ill-ay harwa da wər d-izazzabbat Məşşina əşşəriğa-net fəl ənnəbi Musa, amaran abakkad wər ixəssəb, as tu-wər-illa əşşəriğa. ¹⁴ Dər iga awen da ya təmattant təll-ay təkâm dağ əddənət a d-obazan çur Adəm har Musa. Təll-ay harkid y aytedan win wər nəga abakkad olân əd wa n Adəm s ənta a ihan əlmital ən wa du-z-asin.

¹⁵ Mişan təmazrəyt n Adəm wər tola əd təhəkkut ta danağ-iga Məşşina s arraxmat-net. Tidət as aytedan aggotnen aba-tan fəl əddəlil ən təmazrəyt n awedan iyyanda a t-imosan Adəm. Ma dər ogda igət n arraxmat ən Məşşina, təmosat təhəkkut-net ta du-tosat əs tarrayt n awedan iyyanda a t-imosan Ƴaysa Əlməsix? Arraxmat ten əd təhəkkut ten wər əlenat əddukad, amaran ewâdnat-in aytedan əknânen igət. ¹⁶ Awa du-tətaway təhəkkut ən Məşşina wər ola d awa d-eway abakkad n awedan iyyanda.

Dəffər abakkad wa iga Adəm, Məşşina iwwiddab s əşşəriḡa-net aytedan kul. Təhəkkut amaran ta d-iga Məşşina taqqat as tətaway aytedan, amaran tosâ-du dəffər as əgân aytedan təmazrəyt tægget. ¹⁷ Illikan as təmazrəyt n awedan iyyanda a du-tewayat as təkam təmattant əddənet əs tarrayt n awedan iyyanda wen. Mişan əs tarrayt ən Ƴaysa Əlməsix ḡas-net, əgrâwan aytedan a ogaran awen wəllen. Aytedan win əgrawnen arraxmat wər nəla əddukad əd təhəkkut-net təhakkit taqqat, win di ad əddəran əxkəman dəḡ əs tarrayt n awedan iyyanda a t-imosan Ƴaysa Əlməsix.

¹⁸ Dəḡ adi, kud təmazrəyt n awedan iyyanda teway-du attadib s aytedan kul, wədi aytedan kul ad əgrəwan taqqat təhakkit təməddurt əs tarrayt n əmazal oḡadan n awedan iyyanda. Əmazal wen tamattant ən Ƴaysa Əlməsix a t-imosan. ¹⁹ Zund əmmək as təmazrəyt n awedan iyyanda teway-du as əqqalan aytedan aggotnen inasbakkadan, əmmək en dəḡ as əbərdəḡ n awedan iyyanda a du-z-awəyan s aytedan aggotnen ad əgrəwan taqqat dat Məşşina.

²⁰ Əşşəriḡa amaran osâ-du fəl ad təttəy təmazrəyt wəllen. Mişan ibakkadan as əggətan dəḡ adag a dənneḡ-san du-təssəfəl arraxmat ən Məşşina. ²¹ Dəḡ adi dad zamas abakkad ixkâm fəl əddənet iddew əd təmattant, wədi arraxmat ən Məşşina da ad təkam tidaw əd taqqat fəl a danəḡ-takfu təməddurt ta təḡlalat əs tarrayt n Əməli-nana Ƴaysa Əlməsix.

Tarna n Əlinjil: Awa du-tətaway taqqat ta ihakku əzəḡzan

6

Nəddirfa dəḡ əkkəlu n abakkad

Ab-ana dəḡ batu ta təqqalat abakkad nəddar əs tərtəyt d Əlməsix

¹ Ma za nannu dəḡ adi? Awak ad naglu dəḡ igi ən bakkadan fəl ad təttəy arraxmat ən Məşşina? ² Kala kala! Nakkanay win əḡanen təmattant ta dana-təzammazzayat əd bakkadan, manəmmək as za naglu dəḡ igi-nasan?

³ Nakkanay ketnanəḡ əmmək a nəmos as nətawasalməḡ dəḡ aman s esəm ən Ƴaysa Əlməsix, awak tatawt a dintəḡam as nərtây dər-əs dəḡ təmattant-net? ⁴ Dəḡ adi tamattant a nəḡa, nətawanbal-in, nərtây d Əlməsix s alaməḡ wa nəḡa dəḡ aman s esəm-net. Awen dəḡ as zund əmmək as d-inkar Əlməsix dəḡ təmattant əs tarrayt ən tanaya n Abba-nana, əmmək en dəḡ as nakkanay da ad nagu təməddurt taynayət. ⁵ Dad zamas nərtây dər-əs dəḡ

təmattant tolat əd ta-net, wədi a dər-əs nərtəy əs tanakra day təmattant tolat əd ta-net.

⁶ Nəssân day adi âs aggadəm was kala a tu-nəmos, wədi itawataytay fəl tэгəttawt iddew d Əlməsix. Emmək en day as təmust-nana ta tərəwat ən tişit ən nasbakkadan təhlak, ab-as tu-təlla, nakkanay deş nəmməzzay d əkkəlu, a timosan tişit ən nasbakkadan. ⁷ Fəlas awedan wa aba, wədi iddirfa day abakkad. ⁸ Nakkanay amaran, dad zamas abana nəddew d Əlməsix wədi nəzzigzan as a dər-əs nidaw day təməddurt da, ⁹ id nəssân as Əlməsix wər tu-z-iba dəffər tanakra ta d-iga day təmattant. Ab-as fall-as təla təmattant tarna waliyyat. ¹⁰ Fəlas aba-tu, amaran əddəlil n abakkad a fəl t-aba day taklat iyyadda. Əmərədda təməddurt ta iga, Məşşina as tat-iga. ¹¹ Day adi kawanay da agiwat i man-nawan iduf n as aba-kawan day batu ta n abakkad, tagim deş iduf n as təddâram i Məşşina day tassaş d Əlməsix Үaysa.

¹² Day adi ad wər iləs abakkad axakam fəl təşəswen-nawan əmosnen arat itamattin, wala təlkəmam y arak deranan-net. ¹³ Ad wər tətəyyim şisəllad-nawan y abakkad, əqqəlnat zun təzoli as tətawamazal təkma; kalar akfiwat iman-nawan i Məşşina, təqqəlam zun aytedan aba a d-ənkarnen day təmattant, takfim şisəllad-nawan i Məşşina ad əqqəlnat təzoli tətamazalat awa oşadan. ¹⁴ Fəlas ab-as təham təla n abakkad id ab-as təham taşmar ta n əşşərişə wa n Əttawret, kalar tэгgazam taşmar ta n arraxmat ən Məşşina.

Nəddirfa day bakkadan fəl ad nəşbəd Məşşina

¹⁵ Ma za nagu za? Awak ad nagu ibakkadan fəlas nokay-du azzaman win əşşərişə nəggaz win arraxmat? Kala kala! ¹⁶ Awak wər təssenay âs as təgeş iman-nak akli n awedan təbbərdagay-as, wədi kay təqqalay akli n awedan wen? Day adi wa şas təqqalay akli n abakkad itawayan əs təmattant, wa təqqalay akli ən tarrayt ta n əbərdəş i Məşşina tətawayat əs taqqat? ¹⁷ Mişan təmmalen i Məşşina! Dəffər as kala təmosam eklan n abakkad, əmərədda təbbərdagam day wallan-nawan y əşşərədan n əsəssəşri wa tətawaggam. ¹⁸ Təddərfam day bakkadan, təqqalam əmərədda eklan n awa oşadan. ¹⁹ Əlmital wa taggaş-qu s anamod wa n aggadəm fəl əddəlil ən rəkkəm-nawan a dər du-təxlâkam. Zund əmmək as kala ad təsammalkawam şisəllad-nawan təmosam eklan n awa immədəsan d awa xaraman fəl ad tawədəm taxxaramt ketnet, əmmək di day as əmərədda akfiwat şisəllad-nawan y ad təqqəlam eklan n awa oşadan fəl ad tawədəm tazdak. ²⁰ Fəlas assayə wad təmosam eklan n abakkad,

əddi təddirfam day anamod wa n taqqat. ²¹ Ma dər ola awa du-təsaxsalam day azzaman win di? Əngəm aratan as əmərədda sikarakadan-kawan, fəlas təsəlkaht-nasan təmattant? ²² Mişan əmərədda dad zamas təddərfam day bakkadan təqqalam eklan ən Məşşina wədi tazdak a du-za-təssəxsəlam, amaran təsəlkaht-nawan təməddurt ta təxlalat. ²³ Fəlas ərruzmatan n abakkad təmattant, mişan təhəkkut ta danax-issənsa Məşşina təmos arraxmat-net, təməddurt a tat-imosan ta təxlalat day tassaq d Əməli-nana Əlməsix Ƴaysa.

7

Nəddirfa day əşşəriya wa danax-obazan

Nəddirfa day awa danax-issəwar əşşəriya

¹ Awak masnat a wər təgəm ya imədrayan-in as əşşəriya wər ilzem ar aytedan win əddarnen? Əssənaş as əhân-kawan salan n əşşəriya. ² Emmək en day as tantut təzləfat iket iddar aləs-net oşaq-qat dər-əs əşşəriya. Mişan as aba aləs-net ad taddafart day əşşəriya was kala a tan-osax. ³ Day adi as imos as harwa ad iddar aləs-net a tat-izlaf aləs iyyan, wədi əzzəna a təga, mişan as aba aləs-net wədi təddərfa day əşşəriya. Əddi kud tat-izlaf aləs iyyan da wər z'itəwənnu təga əzzəna. ⁴ Emmək en da a təmosam kawanay da ya imədrayan-in: kawanay da aba-kawan day batu ta n əşşəriya wa n Əttawret əs tarrayt ta n taşəssa n Əlməsix. Əmərədda təhəm təla iyyat taynayət a tat-imosan ta n Wa d-inkaran day nəmməttan fəl a du-nəsaxsal tənfa day tarrayt ta n Məşşina. ⁵ Harwa ad nəlkâm i deranan ən wallan-nana, əhân-anax arak deranan win d-itaway əşşəriya, əttâfan tanat ən təsəllad-nana fəl a du-nəsaxsal aratan win tawaynen əs təmattant. ⁶ Mişan əmərədda, nəddirfa day əlxəkum wa n Əşşəriya, ab-ana day batu n aratan win danax-əganen day təla. Day adi nəfrâg ad nəşbəd Məşşina əs təməddurt taynayət əs tarrayt n Infas wa Zəddigan, wərgəş s anamod wa irəwan n əşşəriya wa n Əttawret imosan arat igmâdan.

Assa n əşşəriya d ənəfilal n abakkad

⁷ Ma za nannu day adi? Awak əşşəriya imitalla d abakkad? Kala kala! Mişan ya əşşəriya ənta a di-izzəzdayan abakkad, id ənnar wər inna əşşəriya: «*Ad wər tagay attama-nak day ares n awedan.*» Wər z'əssənaş awa imos almaşna n igi n attama day ares n awedan. ⁸ Emmək en day as issolam abakkad daw alwajiban, təzzar iga-du day əwəl-in arak deranan as tu-wər-illa a day wər

əgen. Fəlas as tu-wər-illa əşşəriya, wədi abakkad da zun as immut. ⁹ Dat awa harwa a tu-wər-illa əşşəriya nak əddâra. Mişan assaya wa d-osan alwajiban ənta ad iqqal abakkad arat iddâran, ¹⁰ nak amaran ab-i. Alwajiban win as a ihoran âs təməddurt as ətawayan, nak təmattant as di-ewayan ¹¹ fəlas abakkad a issolaman daw alwajib n əşşəriya, issəxrak-i inç-i sər-əs. ¹² Day adi əşşəriya i zəddigan, alwajib deç zəddig oçad olâç.

Təməddurt ta n ləkkum y əşşəriya

¹³ Awak nak arat olaçan a di-iqqalan təmattant? Kala kala! Abakkad a imosan əssəbab n awen kul. Day adi abakkad isannafalal-du awa imos əs tidət. İşşəçal awa olaçan fəl a sər-i d-awəy təmattant. Emmək en day âs tarrayt n alwajib as tənafalal tallabəst wər nəla əddukad ta təhat abakkad. ¹⁴ Nəssân as əşşəriya Infas ən Məşşina a d-ifal. Mişan nak awedan a əmoşa wər nəlkem ar i deranan-net. İnzey-in əmosa zun akli n abakkad. ¹⁵ Fəlas awa tagga wər t-əgre. Arat wa areç wər tu-təgga, amaran arat wa əkyada ənta a tagga. ¹⁶ Amaran as imos as taggaç awa wər əre, wədi əqbâlaç as əşşəriya olâç. ¹⁷ Əmərədda wərgəç nak a itaggin awen, kalar abakkad wa daç-i içsaran a t-itaggin. ¹⁸ Fəlas əssânay as arat wa olaçan wər daç-i içser, almaçna wər iha təçəssa-nin. Əfrâga tara n awa olaçan, mişan wər əfregaç əmazal-net. ¹⁹ Wər təmizilaç awa olaçan s ənta a areç, kalar awa wər noleç a tamazala s ənta a wər areç. ²⁰ As imos as tamazalaç awa wər areç, wədi wərgəç nak a t-itamazalan, kalar abakkad wa di-izdaçan. ²¹ Emmək en day as d-əgreç as: Id areç igi n awa olaçan, a dat-i d-iməl awa wər noleç. ²² Əfrâya day əwəl-in y as areç əşşəriya ən Məşşina, ²³ mişan əfrâya day təsəllad-in y əşşəriya iyyan ibbillanan d əşşəriya wa əqbalan man-in. Emmək en day as əqqalaç akli n əşşəriya wa n abakkad ihân şisəllad-in. ²⁴ İket açşud ən man igraw-i! Ma di-za-assafsin day təçəssa tas təsəlkamt-net təmattant? ²⁵ Təmmalen i Məşşina əs tarrayt n Əməli-nana Çaysa Elməsix! Day adi əs tayttay-nin za əmosaç akli n əşşəriya ən Məşşina, əs təçəssa-nin amaran əmosaç akli n əşşəriya wa n abakkad.

8

Infas ən Məşşina ihakk-ana təməddurt taynayt

Təməddurt ta danay-ihakku Infas ən Məşşina

¹ Adi a fəlas əmərədda ab'as t-illa attadib i win ərtaynen d Elməsix Çaysa. ² Fəlas tarna ta n Infas wa ihakkin

təməddurt ihân Ƴaysa Əlməsix təsiddarfat-kay day tarna ta n abakkad əd təmattant. ³ Əşşərixa wa n Əttawret wər ifreg igi n awen, fəlas igdal-as-tu rəkkəm ən təxəssa n aggadəm. Adi a fəl d-issəgla Məşşina Barar-net iman-net iha təxəssa zun ta n nasbakkadan a nəmos, iqqal takutay ta təmmasat ibakkadan id Məşşina a t-itəwwəddaban day adag-nana. Əmmək en day as z'izzərəz tarna ta fall-anay ila abakkad. ⁴ Arat wen ig-ay fəl ad nəfrəg əmazal n Əşşərixa wa n Əttawret əs təməwit toxadat nakkanay win əlkamnen i tara ta n Infas wa Zəddigan, wərgəx ta n aggadəm.

⁵ Aytedan win əlkamnen i tara ta n aggadəm, win di imedranan əd deranan win aggadəm a taggin, amaran win əlkamnen i tara ta n Infas wa Zəddigan, win di imedranan əd deranan win Infas wa Zəddigan a taggin. ⁶ Ləkkum i medranan əd deranan win aggadəm təmattant as itaway, amaran ləkkum i medranan əd deranan win Infas wa Zəddigan, təməddurt taynayət as itaway d agaraw n alxer yur Məşşina. ⁷ Fəlas imedranan əd deranan win aggadəm əzzingen Məşşina id aggadəm wər ibbərdag y əşşərixa wa n Məşşina, amaran wər t-ifreg. ⁸ Aytedan win əlkamnen i deranan ən təxəssa-nasan wər əfregan gərrezat i Məşşina. ⁹ Kawanay, as imos as izdây-kawan Infas ən Məşşina wədi ab-as təlkamam i medranan əd deranan n aggadəm, kalar win Infas wa Zəddigan as təlkamam. Awedan wa wər iha Infas wa n Əlməsix, wədi wərgəx i n Əlməsix. ¹⁰ Mişan as imos as tərtâyam d Əlməsix, wədi kud imos as təxəssanawan təsəlkamt-net təmattant fəl əddəlil n abakkad, da Infas wa Zəddigan ikf-iwan təməddurt taynayət fəlas aytedan oxadnen a təmosam dat Məşşina. ¹¹ Şixəswen-nawan təsəlkamt-nasnət təmattant; dər iga awen da ya as imos as ih-iwan Infas ən Wa d-issənkaran Ƴaysa Əlməsix day təmattant, wədi Wa d-issənkaran Ƴaysa Əlməsix day təmattant ad agu təməddurt taynayət day təxəswen-nawan s Infas-net Zəddigan a kawan-ihân.

¹² Day adi, imədrayan-in, əllan-tu aratan a danax-əhhişşalnen, mişan wərgəx day anamod wa n deranan n aggadəm əranen ad nəlkəm y awa əran man-nana. ¹³ Fəlas as təgam təməddurt təlkâmam y awa əran man-nawan, wədi a kawan-iba təggəzam Jahannama. Mişan as toyyam imazalan win əran man n aggadəm, təlkamam i win ira Infas wa Zəddigan a kawan-ihân, wədi ad təddəram har faw.

Məşşina ig-anay bararan-net əs tahakkay ta danax-iga Infas-net di Zəddigan

¹⁴ Fəlas aytedan kul win day innoda Infas ən Məşşina, win di bararan ən Məşşina a mosan. ¹⁵ Infas wa təgrawam əddi, wər kawan-iga eklan, wər tu-təgrawam fəl a taglim tah-iwan tasa, kalar təgrâwam-tu fəl a təqqəlam bararan ən Məşşina. Infas en day a sər-na d-ewayan as nədkâl imaslan-nana nəgannu i Məşşina: «Abba! Abba!» ¹⁶ Infas wa Zəddigan əd nakkanay iman-nana a tagayyatnen as nəmos bararan ən Məşşina. ¹⁷ Amaran, dad zamas bararan ən Məşşina a nəmos, wədi iməkkusa n arraxmaten-net a nəmos, amaran nədrâw təkasi ten d Əlməsix dad zamas nəddew dər-əs day alyazab fəl ad nəgrəw tədagart-nana day tanaya-net.

Infas əd tanaya win d-əzaynen

¹⁸ Iga çur-i âs alyazab wa nətaggu əmərədda wər ewed wala day tanaya ta dana-du-z-isənnəfiləl Məşşina.

¹⁹ Awa d-ixlakan kul ikna əddəguz day anay n alwaç wad z'isənnəfiləl Məşşina bararan-net. ²⁰ Fəlas awa d-ixlakan kul iggâz təla ən taymar ta n təbənnan. Wərgəç əntanay a əranen awen, kalar Məşşina a tan-igan day fassan ən taymar ten. Ill-ay attama n ²¹ as taxlək ten ənta iman-net da ketnet ad taddarfat day əhluk wa təga imosan əkkəlu, fəl ad əgrəwan əntanay da əlləllu igân day tanaya ta z'əgrəwan bararan ən Məşşina. ²² Amaran nəssân wəllən as har harwa da taxlək ketnet təddew day təhənəffa əd təlawayt zun təntut tətəgəzət amzur. ²³ Mişan wərgəç əntanay ças a tihənəffitnen, nakkanay a əgrawnen Infas wa Zəddigan imosan tədagart ta tazzarat day təhək ən Məşşina, da nətihənəffit day man-nana nəkna əddəguz day a danax-əgu Məşşina bararan-net akf-anax tədarfit təkmalat. ²⁴ Fəlas nəgrâw efsan, s attama wa nəga. As nəhannay awas nəga attama-net, wədi ab'as imos attama. Ma imos wa z'əgin attama n arat ihannay? ²⁵ Mişan as nəga attama-nana day awa wər nəhənnəy, wədi a das-nəqqəl əs zəmmerat.

²⁶ As nəga awen a d-asu Infas wa Zəddigan idhəl-ana day rəkkəm-nana fəlas nakkanay wər nəssen arat was ihor a tu-nansəy day təwatriwen-nana. Mişan Infas wa Zəddigan iman-net itaggu şihənəffa as wər ifreg awedan emel-nasnat. ²⁷ Amaran wa itamayyan iwallan, issân awa təmos ənnəyat n Infas wa Zəddigan id ənta agna wa n Məşşina as itattar s esəm ən məzzəgzan.

²⁸ Amaran nəssân âs aratan kul əmosan tənfa n aytedan win əranen Məşşina tiwayran-du dəç əs tarrayt-net. ²⁹ Fəlas win isannafran harwa day tizarat win di otâs-asan ad əqqələn əlmital ən Barar-net, fəl ad iqqəl Barar-net en ayafadday day bararan aggotnen. ³⁰ Amaran win as otas

Məşşina tɛɣaray-nasan kala da, win di iɣr-ên, amaran ig-en aytedan oɣâdnen, ikf-en deɣ tanaya.

Ikus n aššak daɣ tara ta danaɣ-iga Məşşina

³¹ Daɣ adi ma za nannu daɣ batu ta? As imos as Məşşina iwâr aganna-nana, ma ifragan ad iqqəl əllid-nana?

³² Məşşina as Barar-net an iyyanda da wər t-oyya, kalar ikf-ay fəl əddəlil-nana ketnana, manəmmək as dana-wər-z-akfu arat kul s arraxmat-net, nədrâw awen əd Barar-net? ³³ Ma z'abəzan s əššəriɣa aytedan win isannafran Məşşina? Awak aytedan win, wərgex Məşşina a tan-ikfan taqqat. ³⁴ Ma imos za wa tan-z-abəzan s əššəriɣa? Əlməsix [Yaysa] iman-net as t-aba, amaran wərgex awen ɣas, kalar itawasankar-du daɣ təmattant. Iha əmərədda aɣil ən Məşşina imos almawakkil-nanaɣ a danaɣ-itaggin šiwatriwen.

³⁵ Ma ifragan a danaɣ-izəmməzzəy əd tara n Əlməsix? Awak təssust? Məx təməɣatirt, məx ətəwədgaz, məx gələk, məx zəlləm, məx igguz n alɣarar ən tamattant, məx takoba? ³⁶ Ənnan Əlkəttaban: «*Tâwakkasan daɣ-na man əzəl kul fəl əddəlil-nak. Nətiwaxsab zun ayfəd tawagzamnen.*» ³⁷ Mišan daɣ awen ketnet nəgarraw tarna ta togarat əs tarrayt ən wa danaɣ-iran. ³⁸ Fəlas əkkasaɣ aššak as gər za təmattant, wala təməddurt, wala angalosan win əmməzraynen Məşşina, wala taɣmaren n əššur šin əhanen ətənkul, wala azzaman win nəha əmərədda, wala azzaman win d-əzaynen, wala šiɣurad, ³⁹ wala awa ihan afalla, wala wa ihan eres, wala arat waliyyan a d-ixlâkan, xasil wər t-illa a ifragan a danaɣ-izəmməzzəy əd tara ta danaɣ-isannafalal Məşşina əs tarrayt n Əməli-nana Əlməsix Yaysa.

Əlinjil d Israyil: Edag wa ittaf Israyil daɣ attarix n əlyillas

9

Tarna ən Məşşina tosâ-du əs tarrayt n Israyil

Iduf wa iga Buləs i Kəl-Israyil daɣ əwəl-net

¹ Tidət a əmmala s esəm n Əlməsix, wər tægga bahu, iman-in əggəyyen-i fəl awen əs tarrayt n Infas wa Zəddigan. ² Əɣşâdan man-in wəllen, əššiwaša deɣ wəllen. ³ Awalla wər di-ikma ilɣan-i Məşşina ammazzaya d Əlməsix fəl əlyillas ən kəl tamet-in d aytedan win di-erawnen, ⁴ a tan-imosan Kəl-Israyil. Əntanay a əlanen almaqam ən tišit ən bararan ən Məşşina win d-iskat i man-net. Əntanay deɣ a mosnen aytedan win daɣ du-tənafalal təmust ən

Məşşina əs tanaya, nafalalan-du dəx dəx-san arkawalan ən tassaq, əd təkəküt ta n Əşşəriya, d əlyibada, d arkawalan. ⁵ Əntanay dəx a mosnen əzzurrəyya ən marawan-nana win ərəwnen, Əlməsix dəx imos iyyan dəx-san əs tişit-net aggadəm. Əlməsix s ənta a illan dənənəg əkkulluk n arat, imos Məşşina. Attamalet esəm-net har faw! Amin!

Awa imos akal wa n Israyil

⁶ Arat wen wər imos almağna-net as awal ən Məşşina ab-as ila almaqam. Kala kala! Ənta ya wərgəx aytedan kul win d-əğmadnen Israyil a mosnen Israyil. ⁷ Win d-əğmadnen İbrahim dəx wərgəx kul əmosan bararan-net, kalar a inna Məşşina y İbrahim dəx Əlkəttaban: «*Aytedan win d-əğmadnen İsəhaq a z'iqqəlnen əzzurrəyya-nak.*» ⁸ Almağna n awen as wərgəx bararan win əhəwnen əs təməwit ta n aggadəm a mosnen bararan ən Məşşina. Kalar bararan win əhəwnen əs təməwit ta tənəmännakat d arkawal ən Məşşina, əntanay a ixsab Məşşina dəx əzzurrəyya n İbrahim. ⁹ Ənta da awa inna arkawal: «*A kay-d-əqqəla adan a da âznin, əddi da tamahharak-nak Sarata təla barar.*»

¹⁰ Amaran wərgəx awen ɣas. Awen dəx a təga Raqqiyetu, ənta da əşşin bararan ən yayyan n eknewan a təla, amaran ketnasan aljad-nanağ İsəhaq a dər tan-təla. ¹¹⁻¹² Məşşina ila tarrayt-net tas isanafran aytedan. Əsənnəfrən-net aytedan ilkâm i taɣaray ta tan-iga əs tarrayt-net, wərgəx imazalan-nasan. Fəl ad isattaddu tarrayt ta d-iga den, təmosat arat isinafran, inna i Raqqiyetu harwa da wər əhəwan bararan-net, wər əknen wala za wər t-əğşedan: «*Wa waşşaran ad iqqəl akli ən wa əndarran.*» ¹³ Inimannak awen d awa ihan Əlkəttaban as ənnan: «*Arey Yaqub, əkyâday Esaw.*»

Məşşina ənta məşşis ən tarna oyâdan

¹⁴ Dəx adi ma za nannu y awen? Awak Məşşina wər oğed? Kala kala! ¹⁵ Fəlas a inna i Musa: «*Ad hənəttey i was arex a das-hanattex, ilalay i was arex a das-ilala.*» ¹⁶ Emmək en dəx as arat wen wərməd iqqân dəx wa ira awedan, wala aratan win as ozal dəx agamay-nasan. Kalar wər iqqen ar dəx Məşşina di n əməhhenən, ¹⁷ s ənta a innan i Firɣawna dəx Əlkəttaban: «*Enəy! Ekfeq-qay almaqam fəl ad assakna tarna-nin əs tarrayt-nak, tagu masnat fəl esəm-in dəx əddənət ketnet.*» ¹⁸ Dəx adi Məşşina itihənəttit i was ira, isagarmam əwəl ən was ira.

¹⁹ Amaran əssânağ as a di-tanna: «*Mafel [dəx adi] Məşşina harwada itabaz aytedan əs mazalan-nasan, dad zamas wər t-illa i ifrâğan əməzrəy ən tara-net?*» ²⁰ Fadda, kay

aggadəm, ma təmosay as təšarraya əd Məššina? Awak talaq təfrâg ad tannu i wa sər-əs išaqqalan: «Mafel tətaggay-i əmmək wa?»²¹ Awak akanaw wərgex ənta a ilân talaq itaggu sər-əs ikassan âs wiyyad za tiwasansan y əzəl a sər-san iskâtan, win hadatnen amaran tiwasataymalan əzəl kul?²²⁻²³ Emmək en dəx a əgan aratan win isammatag Məššina. Iga dər-na təzaydart tagget nakkanay a əhornen d əhluk fəlas ira ad isənnəfiləl alham-net əd tarna-net. Ira dəx ad isənnəfiləl y aytedan wiyyad tanaya-net wər nəla əddukad. Aytedan win den əntanay as ihanattat, əntanay dəx a isammatag kala da, y a dər-əs ərtəyan dəx tanaya-net.

Məššina iyra Kəl-Əlyəhud d aytedan win tan-wər-nəmos

²⁴ Aytedan win den nakkanay a tan-imosan. Iyr-ana-du Məššina dəx Kəl-Əlyəhud, iyr-ana-du dəx dəx win wər nəmos Kəl-Əlyəhud.²⁵ Awen dəx a ihan əlkəttab wa n ənnəbi Osay as inna: «*Win wər nəmos tamattay-nin, a tan-d-ayray aga-qan "tamattay-nin". Win wər nəmos win əkney tara, a tan-aga "win əkney tara".*²⁶ Amaran idaggan win dəx dasan-itawannu: "*Wər təmosam tamattay ən Məššina!*" Idaggan win di da a dəx dasan-z-itawannu "*bararan ən Məššina di iddaran*".»

²⁷ Ənnəbi Isayas dəx iktâb dəx batu n Israyil as: «*As əgan maddanəs n Israyil igət wa n təblalen n amađal, arat dəx-san ças a z'afsin.*²⁸ *Fəlas Amaylol ad assandu awal-net fəl əddənet əs təməwit təkmâlat tətrabat.*»

²⁹ Zun batu ta iga ənnəbi Isayas dat awen as inna: «*Kundaba as Əməli di ilan tarna a dəx-na d-iglazan amasa, wədi ad nəqqəl zun Sədom, nalu əd Gamora.*»

Awa iwaran aggadəm d awa iqqalan Israyil dəx azzaman win əmərədda

Agaraw ən taqqat s əzəgzan wərgex əs mazalan

³⁰ Ma za nannu dəx adi? Aytedan win wər nəmos Kəl-Əlyəhud wər əglayan dəx agamay ən taqqat mišan əgrawan-tat əs tarrayt n əzəgzan-nasan.³¹ Kəl-Israyil amaran a gammaynen a d-əssəkməlan ləkkum y əššəriça fəl ad əgrəwan taqqat, indar-asan.³² Ma d-ewayan za awen? Adi za iba n agamay-nasan taqqat ten əs tarrayt ta n əzəgzan, əgməyan-tat əs mazalan-nasan. Tənkaf-asan təhunt ta təsəgadlit.³³ Təhunt ten təmmittal Əlməsix, amaran ənnan Əlkəttaban dəx batu-net: «*Ənəyat, əssinsa dəx Səyon təhunt təmosat təsənkəft, təmos dəx təsəlît tətəgadlit aytedan. Mišan awedan wa sər-əs izzəgzanan wər z'ikərukəd.*»

10

¹ Imədrayan-in, əkney deran n ad əgrəwan Kəl-İsrayil efsan, amaran awen dağ a tansaya Məşşina faw dağ təwatriwen-in. ² Fəlas əggəyyeğ as əglāyan dağ batu ta n Məşşina mişan wər əssərtayan awen əd masnat. ³ Wər əgren təməwit tas ihakku Məşşina aytedan taqqat, a tat-gammayan əs mazalan-nasan. Emmək di dağ əs wər əbbərdəgan i Məşşina, uəyan əs ləkkum i tarrayt tas ihakku Məşşina taqqat. ⁴ Əlməsix ənta a imosan təsəxtəmt n əşşəriyə y ad iqqəl as aytedan kul win sər-əs əzzəgzannen ad əgrəwan taqqat dat Məşşina.

Efsan s əzəgzan, wərgəğ əs ləkkum y əşşəriyə

⁵ Arat da wa iktab ənnəbi Musa dağ batu ən taqqat ta tətawagrawat əs ləkkum y Əşşəriyə wa n Əttawret: «Awedan kul wa d-issəndan əşşəriyə, wədi ad igrəw təməddurt s əssəbab n əşşəriyə.» ⁶ Mişan ənta da əmmək was tətawagraw taqqat əs tarrayt ta n əzəgzan: «Ad wər təganna dağ man-nak: "Ma z'əggəzəyan əs jənnawan?"» Awak Əlməsix wərgəğ izzibbat-du? ⁷ Madəğ tanna: «Ma z'əzzabben iggəz imawetan n amađal?» Awak Əlməsix wərgəğ inkar-du dağ təməttant? ⁸ Awak ma inna Awal ən Məşşina dağ batu ta? A inna: «Awal ihoz-kay, iha imi-nak, iha əwəl-nak,» amaran awal wa batu n əzəgzan a dağ işşewal, ənta değ as nətaggu təlxutbat. ⁹ As təşşewala təqbaləğ as Ƴaysa imos Əməli, təzzəgzana dağ əwəl-nak as issinkar-t-idu Məşşina dağ təməttant, wədi kay təgrāway efsan. ¹⁰ Fəlas awedan wa izzəgzanan dağ əwəl-net, wədi ad t-akfu Məşşina taqqat. Amaran wa işşewalan imal əzəgzan-net, wədi ad t-akfu Məşşina efsan. ¹¹ Ənnan Əlkəttaban: Awedan kul wa «fall-as iffəllan iga dağ-as attama-net, wər ilkem ad ikirakad.» ¹² Wər izlay wa imosan Ag Əlyəhud wala wa tu-wər-nəmos. Ketnasan Əməli-nasan iyyanda, ihakkin s əlləllu-net taggast y aytedan kul win dağ-as tat-əgməynen. ¹³ «Fəlas awedan kul wa igməyan taggast dağ Əməli, wədi ad igrəw efsan.»

Kəl-İsrayil wər əzzəgzanan s Əlinjil

¹⁴ Məni za əmmək was z'əgməyan taggast dağ was wər əzzəgzanan? Məni əmmək was sər-əs z'əzzəgzənan wər əslən y awal-net? Məni əmmək was das-z-aslin da wər t-illa i dasan-t-imalan? ¹⁵ Məni əmmək was tu-z-əməlan aytedan a dasan-t-əmalnen as imos as wər t-illa i tan-issiglan? Ənnan Əlkəttaban: «Iket šihussay əganat-tanat takkolen n aytedan win əmmalnen isalan n alxer a imos Əlinjil!»

¹⁶ Mišan wərgex Kəl-Əlyəhud kul əbbirdagan y Əlinjil. Inna Ənnəbi Isayas: «*Əməli, məni wa izzəgzanan s awa nənna?*» ¹⁷ Dağ adi, isalan win as nəsla, əntanay a dutawaynen əzəgzan, amaran awal n Əlməsix a əmosan. ¹⁸ Mišan əsəstan da wa tagga: Awak Kəl-Əlyəhud wər əslen y awal wen? Wəllen za as əslân-as. Ənnan Əlkəttaban: «*Əməsli-nasan təsl-as əddənət ketnet, awal-nasan əruru n amađal ketnet ewād-tu.*»

¹⁹ Əlasax əsəstan harwa da ənne: Awak tamattay n Israyil masnat a wər təga dağ awen? Ənnəbi Musa a dasan-t-imalan əs tizarat. Inn-asan: «*Inna Məşşina, a kawan-agay inəmmənzağ ən win əs tamattay da wər tat-əmosan, aknağ dağ-wan igi n alham ən tamattay wər nəla tayttay.*» ²⁰ Ənnəbi Isayas fadda a dasan-innan əs təholat: «*Əgrawan-i win di-wər-nəgəmməy, sannafalalay iman-in i win di-wər-nonsay wala.*» ²¹ Mišan dağ batu ta n Kəl-Israyil inna: «*Əzəl kul əzzələğ əfus-in yarra tamattay təmosat inəmməzray ən nəffəllag.*»

11

Tarrayt ta d-iga Məşşina d awa d-izayan Israyil

Məşşina isinafran i man-net aytedan win d-əggolaznen

¹ Ənne dağ adi: Awak Məşşina agamad a iga batu ən tamattay-net? Kala kala! Fəlas nak iman-in iyyan dağ Kəl-Israyil a mosa, əmosax ahaya n Ibrahim, əgmâdadu tawşet ta n Benyamin. ² Məşşina wər igmed batu ən tamattay-net as irəw as tat-isannafran. Əngəm təkittəwam awa ənnan Əlkəttaban dağ batu n ənnəbi İlyas assaxa wad eway tala-net əs Məşşina dağ batu ən Kəl-Israyil? ³ Inna i Məşşina: «*Əməli, ənğan ənnəbitan-nak, jabbarajjen idagğan-nak win təkutawen, wər d-iqqim ar nak, amaran gammayan d a dağ-i əkkəsan iman.*» ⁴ Təssânam za awa das-ijjəwwab Məşşina? Inn-as: «*Əsinafranax i man-in əssa gim n aləs wər nəssəjad dat əssənəm wa igan Baxal.*»

⁵ Zund əmmək en dağ as dağ azzaman win nəha əmərədda əggolazan-du aytedan isinafran Məşşina s arraxmat-net. ⁶ Dağ adi, dad zamas arraxmat-net as tan-isannafran, wədi wərgex fəl əddəlil ən mazalan-nasan, madex amaran iqqəl as arraxmat ab-as təmos arraxmat.

⁷ Ma igan dağ adi? Kəl-Israyil wər əgrewan awa gammayan. Wər dağ-san t-igrew ar win isannafran Məşşina. Win hadatnen amaran tawagğan aytedan as garmoman wallan-nasan, ⁸ inimannak awen d awa ənnan Əlkəttaban as ənnan: «*Ikkas-tan Məşşina dağ əlxəyyar ən man-nasan, ikf-en şittawen wər nəhənnəy wala, əd təməzzugen*

wər nəsəllu har azalada.» ⁹ Ənnəbi Dawəd deyx inna: «*Əqqəlānet-asan mensewan-nasan taftaw, əqqəlān sangay a tan-z-ibazan. Əqqəlānet-asan aǧadal, əǧrəwanet attadib wa dər əhoran.* ¹⁰ *Alsinet šiyyay şittawen-nasan, igmədet-tan asawad-nasan. Kərənbəwanet roran-nasan har faw!*»

Edaǧ wa əhan Kəl-Əlyəhud d aytedan win tan-wər-nəmos daǧ tarrayt ta d-iga Məşşina

¹¹ Ənne daǧ adi: Awak Kəl-İsrayil nigartattafan y ad uden har faw? Igmâd aşşak as wərgəx awen. Mişan təmazrəyt-nasan a du-tewayat as əǧrawan aytedan win wər nəmos Kəl-Əlyəhud efsan fəl ad əǧǧəznat təsmiten Kəl-İsrayil. ¹² Wala təmazrəyt-nasan təqqal tənəfləyt y əddənət, ətəwərna-nasan deyx iqqal tənəfləyt i win wər nəmos Kəl-Əlyəhud, əngəm in za as d-əǧradan əsənəd əbdadan-du?

¹³ Əmərədda kawanay win wər nəmos Kəl-Əlyəhud as əşşewala: Nak anammazul a mosa s aytedan win wər nəmos Kəl-Əlyəhud amaran əssiǧmarax əşşəxəl wen, ¹⁴ har âs as imməkkan awen a d-awəya şismiten s aytedan win tawşet-in afsin daǧ-san wiyyad. ¹⁵ Fəlas as iqqal as ətəwəkkas-nasan əs tama eway-du amaknaw daǧ əddənət, əngəm in za ətəwəsuxal-nasan? Wər t-illa a dər z'alu ar tanakra daǧ təmattant.

¹⁶ Amaran as imos as tadagart ta tazzarat daǧ təǧəlla təskât i Məşşina, wədi awa daǧ-as in-iqqiman ketnet da in Məşşina. As imos as deyx ikewan tiwaskatan i Məşşina, wədi ilədlad da tiwaskatan-as. ¹⁷ Əlmital en daǧ a əhan Kəl-İsrayil: İlədlad wiyyad a din-tawakarammatnen daǧ aşək. Kay amaran wa wər nəmos iyyan daǧ Kəl-İsrayil, təmosa zun ələdlid ən zaytun n əsuf, təzzar tətawagga daǧ adag-nasan. Daǧ adi kay da tədrâwa dər-san isudar olâxnen win du-nakkasan kewan n azzaytun wa itawanbalan den. ¹⁸ Dər iga awen da ya, ad wər talkax ilədlad win din-tawakarammatnen. Amaran as kay du-təǧǧaz ənnəyat ən zazwar ən man-nak, takta-du as wərgəx kay a ilan ikewan, kalar ikewan a kay-ewaynen əkbâlan-kay. ¹⁹ Ad tanna daǧ adi: İlədlad tawakarammen-in fəl ad əǧǧəzax edaǧ-nasan. ²⁰ Tidət as ətəwəkərəmma a din-əǧan lədlad win den fəl iba n əzəǧzan. Kay amaran təddara s əzəǧzan-nak. Ad wər tagax imedranan əmosnen zazwar ən man, kalar əqqəl əmiksad ən Məşşina. ²¹ Fəlas dad zamas Məşşina wər oyya ilədlad win dər d-ixlak aşək, wədi kay da wər kay-z-ayyu.

²² Daǧ adi əssən fəl əlluğ ən Məşşina, əd tallabast n alham-net. Tallabast n alham-net isakn-et i win nəmməzray, əlluğ-net amaran isakn-ak-ku, iket təzizawe daǧ tarrayt

n əlluy wen. As wər təgey adi, wədi kay da a din-tətəwəkərəmme. ²³ Kəl-Əlyəhud da as oyyan tarrayt ta n iba n əzəgzan a du-təwəsuxəlan ašək, fəlas Məššina ila tarna n a tan-d-iləs əsuxəl n ašək wen. ²⁴ Dad zamas kay tətawakaramme-du dağ ašək ən zaytun n əsuf, tətawaggay ələdlid ən zaytun wa n ənebəl olāxan, manəmmək as du-wər-za-təwəsuxəlan əntanay da təwəggin dağ azzaytun wa dağ d-əxlakan?

Əlyillas wa d-izayan Kəl-İsrayil

²⁵ Imədrayan-in, wər arey a dawan-ijhâl əssir wa, fəl ad wər təxilam təlâm masnat iyyat zəwwərat. Edes ən Kəl-İsrayil wər z'ammazzayan ad əfillagan iket wər d-əxsəlan aytedan kul win wər nəmos Kəl-Əlyəhud əs Taymar ən Məššina. ²⁶ Əmmək en dağ as z'igrəw İsrayil ketnet efsan id ənnan Əlkəttaban: «*Wa iyallasan a d-igməd Səyon, ikkəs inəmməzray dağ əzzurrəyya ən Yaqub.* ²⁷ *Ənta da da arkawal wa dər-san z'aga, assaya wa fall-asan z'əkkəsəy ibakkadan-nasan.*»

²⁸ Dağ batu ta təqqalat tugəyt-nasan s Əlinjil, wədi Kəl-Əlyəhud əntanay a mosnen izənga ən Məššina fəl ad təgrəwam tənfa n awen. Mišan dağ batu ta təqqalat anafran wa n Məššina, wədi əntanay a mosnen aytedan win ikna Məššina tara fəl əddəlil ən marawan-nasan. ²⁹ Fəlas Məššina wər d-itəqqəl dağ təhəkkuten-net, za wər isəmməttəy anafran-net. ³⁰ Kawanay iman-nawan dat awa təmmizrayam Məššina mišan əmərədda ihanattat-awan s əssəbab ən təmazrəyt-nasan. ³¹ Zund əmmək en dağ as, dad zamas təmazrəyt-nasan ta n əmərədda teway-du as təgrawam əhənəttə, arat wədi iga fəl a dasan-ihənəttət Məššina əntanay da [əməərədda]. ³² Fəlas Məššina ittâf aytedan kul dağ təmazrəyt fəl a tan-assaknu ketnasan təhanint-net.

Təmmalen i Məššina fəl masnat-net

³³ Ya Məššina! Təgərgist-nak, əd tayttay-nak əd masnat-nak wər əlenat əddukad. Əlxəkuman-nak wər t-illa i ifragan əsəggər-nasan, tarrayen-nak wər t-illa i ifragan əgərri-nasnat. ³⁴ «*Məni wa issanan awa dağ isamadran Əməli? Məni was kala ad iqqal əməššewwər-net?* ³⁵ *Məni was kala ad iga i Məššina tənəfust, əngəm iqqəl as irwâstu tənəfust?»* ³⁶ Arat kul ənta a d-ifal, ənta a d-ewayan as t-imal arat kul, ənta dəx a ilan arat kul. Igrəwet Məššina adkul dağ azzaman kul har faw! Amin.

**Əzəmmizəl n Əlinjil: Awa dər tətalu
təməddurt n əlməsixi**

12

Ammar s igi ən təməddurt ta n əlməsixi

Təməddurt təmmittayat fəl ta tərəwat

¹ Dağ adi əgmâya dağ-wan, ya imədrayan-in, fəl tişit ta iga Məşşina əməhhenən, ad takfım şixəswen-nawan əqqəlnat takutay təddarat, zəddigat, təgrâzat i Məşşina. Emmək en dağ as za tagim i Məşşina əlxibada wa n tidət. ² Ad wər tayyim iman-nawan səmməttəyan-kawan azzaman win nəha da əmərədda, kalar ayyiwat iman-nawan a kawan-təşəşşinəy tayttay-nawan ta taynayət, fəl ad tagrim, tardim değ s arət wa imosan tara ən Məşşina, a t-imosan: Awa olağan, d awa igrazan i Məşşina, d awa ikmalan.

Agiwat təməddurt âs akkiyyan dağ-wan imos amaşşayal ən win hadatnen, təşğalam əs təhəkkuten ən Məşşina

³ Arat da wa ganna y akkiyyan dağ-wan s əssəbab n arraxmat ta di-iga Məşşina: Ad wər təqqəlam aytedan əzzizwarnen iman-nasan, kalar agiwat i man-nawan iduf igân s ənnəyat tolağât, ewâl awen s əzəgzan wa ikfa Məşşina y akkiyyan dağ-wan. ⁴ Akkiyyan dağ-na tağəssa iyyadda a ila, mişan təga dağ təsəllad aggotnen, amaran şisəllad şin den akkiyyat d əşşəğəl-net. ⁵ Emmək en dağ as nakkanay nəggət, mişan tağəssa iyyadda a nəmos dağ tərtəyt d Əlməsix, amaran akkiyyan dağ-na imôs taslət dağ əljəməğat-nana. ⁶ Mişan nəgrâw şihəkkuten wər nola ewalnen s arraxmat ta tətawakfat akkiyyan dağ-na. As imos as igray iyyan dağ-na təhəkkut n emel y aytedan isalan a fall-as d-izazabbat Məşşina, işşəşəğəlet-tat ewâl awen s awa dər ogda əzəgzan-net. ⁷ Was təhəkkut-net tadhəlt n aytedan, idhəlet-tan. Wa igrayan təhəkkut n əsəssəğri, issassəğriwet. ⁸ Wa igrayan tişit n awedan italaman y aytedan fəl man, amazalet s awen. Wa igrayan tişit n awedan təha tahakkay, akfet s əwəl iyyanda. Wa igrayan tizart agiwet tizart n əlməxsud. Wa itassanan dağ aytedan win məğatarnen, issənet dağ-san əs man filawasnen.

Agiwat təməddurt taha tara d əsəmmədrəy ən man əd tugəyt s a imosan təkma

⁹ Tara a tat-wər-təggəz təlmənufəqa. Əkəydat arat kul wa imosan təkma. Zəzzəwətat wəllen dağ əmazal n awa olağan.

¹⁰ Dağ batu ta təqqalat tara ta gər mədrayan, akkiyyan dağ-wan akniwet tara ən win hadatnen. Dağ batu ta təqqalat sağmar,

zuzərat tənfa ta n mədrayan-nawan i ta-nawan.

¹¹ Dağ batu ta təqqalat əşşəxəl,
əqqəlat imaşşaxalan, wərgex iməssəndad,
təmähəndəret dağ-wan tamse ta tətakkasat sandad,
a tat-imosan ta n Infas ən Məşşina,
təxbədam Əməli.

¹² Dağ batu ta təqqalat igi n attama, fəliwəsət.
Dağ batu ta təqqalat təssust, əqqəlat iməzəzzəydar.
Dağ batu ta təqqalat šiwatriwen,
ad wər tammazzayam d igi-nasnat.

¹³ Dahhalat imizdagan dağ addararaten-nasan,
təqqəlam aytedan iha amagaru fawda.

¹⁴ Tattarat a igan albaraka y aytedan win [kawan]-
ədgaznen. Ad wər tələxənam awedan waliyyan, kalar
tattarat y aytedan. ¹⁵ As təggazam aytedan filawasnen,
təfəliwəsam kawanay da, as təggazam win hallinen, talim
kawanay da. ¹⁶ Nəməggiwat iduf iyyanda gar-ewwan. Ad
wər təgammayam almaqam i man-nawan, kalar gammayat
awa wər nəla anay. Ad wər tagim iduf n as təmosam imalan
ən tayttay.

¹⁷ Ad wər təzzalam təkma əs təkma y awedan
waliyyan. Gammayat awa olağan xur aytedan kul, a sər-
əs tətamazalam. ¹⁸ As immikkan awen, iket iqqan dağ-wan
adi, iməlet-tu alxer gar-ewwan d awedan kul. ¹⁹ Ad wər
təzazalam i man-nawan, imaran-in, kalar ayyiwat alham
wa n Məşşina ad işxəl, fəlas ənnan Elkəttaban: «*Nak a
itabazan s əşşəriya, nak a z'ixkəman y awedan kul awa dər
ihor, inna Əməli.*» ²⁰ Kawanay amaran arat da wa kawan-
iwaran: «*As tənayax azangaw-nak ih-ay gələk, taşşatşaq-
qu; as t-ihə fad dəx taşşəşwaq-qu; fəlas as das-təgex adi,
zun as təssinsa fəl axaf-net şiməkaten ərxənen.*» ²¹ A
dak-wər-ilkəm ad toyeyə əşşur issəfəl-du dənnəg-ək, kalar
əxləb əşşur s əmazal n awa olağan.

13

Eqqəlat kəl akal olâynen

¹ Awedan kul ilzâm-tu əbərdəg i muzaran n akal fəlas
tağmar kul Məşşina a du-təfal. Tağmaren kul şin t-əllanən,
Məşşina a tanat-issəbdadan. ² Awen dağ a fəlas awedan
kul wa iffəllagan fəl əlxəkum n akal-net, awedan wədi
ənnizam ən Məşşina a fəl iffəllag. Win əffəllagnen dəx a
d-awəyan attadib əs man-nasan. ³ Imuzaran wər tan-iksud
awedan wa itaggin awa olağan, kalar wər tan-iksud ar wa
itaggin təkma. As tarex a kay-təgməd tasa ən muzaran
ad tətamazalay awa olağan, əddi a xur-san təgrəway

əlqəbulat. ⁴ Fəlas imuzaran n akal əşşəxəl ən Məşşina a əhan imosan tənfa-nak. Mišan as tətəggağ awa wər noley, wədi iksad imuzaran fəlas wərgex bannan əlân fərregat n attadib əs təmattant. Məşşina a išşəşxalan imuzaran fəl ad tawaddaban aytedan win tamazalnen təkma, ewayan-du əs man-nasan alham n Əməli.

⁵ Awen dağ a fəlas təga addararat s ad abbardagan aytedan i muzaran. Wərgex təksəda n attadib xas a fəl danağ-ilzam awen, kalar ənnəyat-nanağ a dana-tu-təzzəlzamat. ⁶ Əddəlil n awen dağ a fəl tərəzzamam amana fəlas win tu-garrawnen den Məşşina a tan-işşəşxalan fəl ad sənnəhəlan amaknaw n əşşəxəl wen. ⁷ Ərzəmat y awedan kul awa dağ-wan ila. Ərzəmat amana i wa dağ-wan t-ilan, tərzəməmə takəs i wa dağ-wan tat-iran, tiksadam was kawan-təwar təksəda-net, təssəxməram was kawan-iwar saymar-net.

Tara n əşşəqqay-nak, ənta a təmosat əsəkməl ən ləkkum y əşşərixa

⁸ A tu-wər-iməl waliyyan dağ-wan itiwarwasan arat a iqqal. A tu-wər-iməl gar-ewwan ar ənəmərə, id awedan wa iran aytedan, wədi issinda-du əşşərixa ən Məşşina. ⁹ Fəlas əlwajiban zun win ənnanen: «*Ad wər tagay əzzəna, wala tagay iman, wala takəra, wala tagay attama-nak dağ ares n awedan*», d əlwajiban kul win hadatnen, əxsəlan-du dağ əlwajib iyyanda, wa innan: «*Agu y əşşəqqay-nak tara ta təgex i man-nak.*» ¹⁰ Awedan irân əşşəqqay-net wər ilkem a das-iga təkma waliyyat. Dağ adi tara, təssinda-du əşşərixa.

Agiwat təməddurt a dağ təhâm ənnur fəlas tewaxlay n Əməli təhöz

¹¹ Dağ adi, əlwaq ewad-du əmərədda wa daq-qawan iwar ad tənkeram dağ etəs, fəlas efsan oğar ihəz wa dana-d-əgan əmərədda i wa dana-d-əgan əssağa wa du-nəzzəgzan. ¹² Ehad iglâ, ezal ihoz-du. Mazzayatana dağ adi əd mazalan win şiyay. Əttəfatana təzoli ta n ənnur. ¹³ Şikəlatana dağ əzzəbun, zun as nəjiwənkət ezal a mallan. Ad wər nəsasakay dağ tattay wala tessay n esmad. Ad wər nətaggu əzzəna əd mazalan zizallatnen əggadəmə, nənəməggəg əd təmazaxən əd manzağ. ¹⁴ Kalar təqqəlet təbdəq-nawan əlxal wa n Əməli Yaysa Əlməsix. Ad wər tayyim tarrayt waliyyat y arak deranan win əggadəmə ənnadin dağ-wan.

14

Tara d ənəmənnak gər aytedan win ədrawnen əzəgzan

Ad wər təxakkamay y aytedan win dər tədraway əzəgzan

¹ Qabbalat aytedan win as irkam əzəgzan-nasan. A dər-san wər tətamazam dəx batu n idufan-nasan. ² Awedan iyyan iga iduf n âs təxalal-as tattay n arat kul. Iyyan as irkam əzəgzan-net wər das-xalal âr tettay n annabatan win fərgan. ³ Wa itattin amensay, ad wər alku wa tu-wər-nətəttu. Wa wər nətəttu amensay dəx ad wər issəwər lahan i wa t-itattin fəlas ənta da iqbâl-tu Məşşina. ⁴ Ma təmosay as təxakkama y əkli ən wiyyad? Gər ibdâd wala uda, da məşşis a təqqal batu ten. Mişan wər z'udu, kalar ad ibdəd, fəlas Əməli ilə fərregat n akabal-net.

⁵ Awedan iyyan iga iduf n as əzəl iyyan ogar ijilan win hadatnen, iyyan iga iduf n as ijilan kul olân ogdân. Awedan kul iwâr-tu ikus n aşşak dəx iduf wa iga. ⁶ Awedan wa izlayan ijilan, Əməli a fəl iga awen. Wa itattin amensay was ira dəx Əməli a fəl iga awen, fəlas iggoday i Məşşina amensay wa itattu. Wa issəban fəl man-net imensewan wiyyad dəx Əməli a fəl iga awen id ənta da iggoday i Məşşina. ⁷ Əssənət as wər danaş-ihə i iddaran fəl əddəlil ən man-net wala dəx i itiba fəl əddəlil ən man-net, ⁸ fəlas as nəddâr, wədi Əməli a fəl nəddar, as danaş-aba dəx Əməli a fəl danaş-aba. Gər za nəddar wala dəx ab-ana, Əməli a danaş-ilan. ⁹ Fəlas Əlməsix aba-tu, iqqal-du təməddurt fəl ad iqqəl Əməli ən win aba əd win əddarnen.

¹⁰ Amaran kay, mafel təxakkama y amadray-nak madex tolkeq-qu? Awak wərgex ketnana kundaba nəbdad dat adag n əşşərixa ən Məşşina? ¹¹ Fəlas ənnan Elkəttaban: «*Inna Məşşina: "Nak əddâra, i d-ixlâkan kul kundaba issəjad dat-i, iləs dəx kul kundaba iga təmmalen i Məşşina."*»

¹² Emmək en dəx as akkiyyan dəx-na kundaba ibdad fəl mazalan-net [dat Məşşina].

Ədgəz dəx awa infan aytedan win dər tədrawax əzəgzan

¹³ Dəx adi mazzayatana d ad nəxakkam imidawan-nana. Kalar akkiyyan dəx-wan idgəzet dəx ad inkəd y arat a z'isənnəgərtəffətan əmidi-net madex aggadl-ay dəx alxata. ¹⁴ Əssânaş, amaran əkkasay aşşak dəx esəm n Əməli Ƴaysa as wər t-illa arat xaraman. Mişan as iga awedan iduf n as xaram fall-as arat iyyan, wədi a fall-as ixram. ¹⁵ As imos as təşşâda iman n amadray-nak dəx batu n amensay, wədi kay wər təşşokala dəx tara. Ad wər-təhləka imədrayan-nak dəx əzəgzan dəx batu ən mensewan fəlas Əlməsix iman-net as t-aba fəl əddəlil-nasan. ¹⁶ Dəx adi ad wər itəwənnu ark arat s aratan win as təgam iduf n âs olâxan. ¹⁷ Fəlas Taymar ta n Məşşina wər təmos tettay wala tessay. Kalar taqqat a təmos d alxer əd təfalawist əs tarrayt n Infas wa

Zəddigan. ¹⁸ Wa iybadan Əlməsix s əmmək wədi, ad igrəz i Məşşina igrəw dəx ətəwəsəxmar xur aytedan.

¹⁹ Dağ adi gammadatana wəllen aratan win du-tawaynen alxer əd win dana-z-ilnen s ad issuhət əzəgzan-nana ketnana. ²⁰ Ad wər təjəbbərəjjeş əşşəxəl ən Məşşina fəl batu ən mensewan. Tidət as amensay kul təxalal tattaynet, mişan təxaram tattay n amensay a du-za-tawəyat ad inəgərtəttəf awedan iyyan dağ əzəgzan-net. ²¹ Olây ad ayyu awedan tettay ən şan, ayyu tessay n esmad n alxanab, ammazzay d arat kul wa z'arzin əzəgzan n amadray-net. ²² Iduf wa dağ təkkaşay aşşak dağ əwəl-nak, wədi ag-ay gar-ek əd Məşşina. Ibbilal wa ikkasan aşşak as wər t-obez əşşərixa s arat was iga iduf n âs ənta a oğadan! ²³ Mişan awedan wa igan aşşak dağ awa itattu, wədi ibâz-tu əşşərixa id awa itaggu wər inamannak d əzəgzan-net. Amaran arat kul wa wər nənammannak d əzəgzan-nak wədi abakkad.

15

Ədgəz dağ tədhəlt n aytedan win dər tədrawəx əzəgzan

¹ Nakkanay as issohat əzəgzan-nanaş təwâr-ana zəmmerat i win as wər issohat əzəgzan-nasan, nayyu agamay n arat wa əran man-nana. ² Akkiyyan dağ-na iwar-tu ad igammay d ad igrəz y aytedan win dər idraw əzəgzan dağ anamod n awa olaşan imos awen agamay n awa tan-z-işşitin. ³ Fəlas Əlməsix da wər igmay awa das-igrazan, kalar ənnan Əlkəttaban: «*Ərrəbdan win dak-tawagginen əqqalan fall-i.*» ⁴ Amaran aratan win ənnan Əlkəttaban dāt əzəl, kul tiwaktaban fəl ad nəgrəw attama wa itawayan əs tarrayt ən zəmmerat əd təsasmit ən wallan-nana şin danaş-əhakkin Əlkəttaban. ⁵ Əgmâya dağ Məşşina s ənta a du-təfal zəmmerat d allam fəl man a kawan-akfu təməddurt a dağ tənimardam gar-ewwan dağ təlkâmam y almasal n Əlməsix Yaysa. ⁶ Əmmək en dağ as za tagim təmmalen ən tanaya ən Məşşina di n Abba n Əməli-nana Yaysa Əlməsix, təgâm awen s ənəmənnak ən wallan d əməli iyyanda.

Tinəməqbilat gar-ewwan zund əmmək âs Əlməsix osâ-du fəl əddəlil ən Kəl-Əlyəhud d aytedan win tan-wər-nəmos

⁷ Tinəməqbilat gar-ewwan zund əmmək as kawan-iqbal Əlməsix, tagim awen fəl saşmar ən tanaya ən Məşşina. ⁸ Illikan as Əlməsix iqqal amaşşaxal ən Kəl-Əlyəhud fəl ad isattaddu arkawalan win iga Məşşina y aljadan-nasan, assaknu s awen aş Məşşina tidət a imos. ⁹ Osâ-du əntada fəl ad igrəw Məşşina təmmalen ən tanaya-net xur aytedan win wər nəmos Kəl-Əlyəhud fəl əddəlil ən təhanint-net,

zun awa ihan Ǝlkəttaban, as ənnan: «*Awen day a fəl kay-z-əmala day aytedan wər nəmos Kəl-Ǝlyəhud, ayağ şigaytalen ən saɣmar-nak.*» ¹⁰ Ǝnnan deɣ Ǝlkəttaban: «*Tawşeten şin wər nəmos Kəl-Ǝlyəhud, agimat təfalawist ta təga tamattay ən Məşşina.*» ¹¹ Ǝnnân deɣ: «*Agimat təmmalen y Ǝməli ketnakmat tawşeten şin wər nəmos Kəl-Ǝlyəhud, şimattiwen kul əməlnatet-tu!*» ¹² Ǝnnəbi Isayas da innâ: «*Ahaya ən Yasay a d-asu, ibdəd ixkəm fəl tawşeten şin wər nəmos Kəl-Ǝlyəhud, amaran ketnasnat a day-as aginat attama-nasnat.*» ¹³ Ǝgmâya day Məşşina s ənta a ɣur d-iffal attama ketnet a kawan-akfu təfalawist d alxer əkmâlnen əs tarrayt n əzəgzan-nawan fəl ad təsənnəhəlam agaraw n attama əs tarna n Infas wa Zəddigan.

Təsəxtəmt

Ǝşşəxəl wa iwaran Buləs əd şikilan win as otas igi-nasan

Ǝşşəxəl wa iwaran Buləs day batu n aytedan win wər nəmos Kəl-Ǝlyəhud

¹⁴ Day batu ta kawan-təqqalat kawanay, nak iman-in əkkasay aşşak imədrayan-in, as təknam əlluɣ təknam agaraw ən masnat, təfrâgam ad tətınəməsəsəɣrim garəwwan. ¹⁵ Dər iga awen da ya, kud ira annay əktabaɣ-awan-in əs taholat, fəl a kawan-d-asakta, əs tarrayt n arraxmat ta di-iga Məşşina, arat əs kala da təssanam day-as. ¹⁶ Arraxmat ten təmos as di-iga amaşşaxəl n Ǝlməsix Ǝaysa day aytedan win wər nəmos Kəl-Ǝlyəhud. Taggaɣ əşşəxəl zəddigan s amel wa taggaɣ Ǝlinjil ən Məşşina. Awen əgêq-qu fəl ad əqqəlan aytedan win wər nəmos Kəl Ǝlyəhud takutay təgrâzat i Məşşina, təmosat arat a dər inihagga əs tarrayt n Infas wa Zəddigan. ¹⁷ Day adi əley s ad səbbərəga day tassaɣ n Ǝlməsix Ǝaysa day batu n əşşəxəl wa əgeɣ i Məşşina. ¹⁸ Wər əhəlay awal day aratan ar win issənda Ǝlməsix əs tarrayt-in əmosnen as d-ewayay aytedan win wər nəmos Kəl-Ǝlyəhud s əbərdəg i Məşşina. Arat wen iga s awal əd mazalan, ¹⁹ igâ deɣ əs tarna ən təlməxjujaten əmosnen alɣalamaten, d aratan simaklalten, əgânen əs tarrayt ən tarna n Infas ən Məşşina. Ǝmmək en day as a d-obazan ɣur Yerusalām harkid Ǝlurəya, akal wədi kul sinahalay day-as emel ən salan n Ǝlinjil n Ǝlməsix. ²⁰ Amaran əşşəxəl-in wa day ədgaza wəllen imos emel n Ǝlinjil y aytedan win âs wər kala ad əslan y esəm n Ǝlməsix. Arat wen əgeq-qu fəl ad wər iqqəl əşşəxəl-in arat intân fəl əşşəxəl n iyyan awedan. ²¹ Ǝşşəxəl wen əgeq-qu s əmmək wa əmalan Ǝlkəttaban as ənnan: «*Win as wər ittəmal ad t-ənəyan, amaran win wər nəsla isalan-net a tan-aslin agrintan.*»

Işikilan win otas Buləs

²² Arat wa dağ a di-igaddalan fawda a kawan-in-asa. ²³ Mišan əmərədda əyradağ əşşəxəl-in dağ kallan win den. A ilan elan ad əknex tara n a kawan-in-azzayyara, ²⁴ amaran arex igi n adi assaxa wa din-z-asax Esbanəya. Fəlas əgey attama n a kawan-ənəyağ as din-əmmarağ əddi, amaran əffilla fall-awan y a di-tilalam s iki n akal wen dəffər as xur-wan əgey azzaman.

²⁵ Əmərədda ad akka Yerusalam y ad əşxələx i tamat-tay ən Məşşina ta təllat den. ²⁶ Fəlas Əlkənisaten šin Masedonəya d Akayya əknânat tara n igi ən širgiten fəl ad ədhəlnat šiləqqawen əhanen imizdagan win Yerusalam. ²⁷ Əlkənisaten šin əknanat tara n awen, amaran iwâr-tanat igi-net, fəlas dad zamas əlməsixitan win əmosnen Kəl-Əlyəhud ədhâlan win wər nəmos Kəl Əlyəhud fəl aganna wa n əzəgzan-nasan, wədi əlməsixitan win wər nəmos Kəl Əlyəhud iwâr-tan əntanay da ad ədhəlan s ərrəzəxan-nasan win əmosnen Kəl Əlyəhud. ²⁸ Dağ adi as əyradağ əşşəxəl wa, šašşawada širgiten šin i məssawəsnat, ad akkağ Esbanəya əmməraq-qawan-in. ²⁹ Amaran əssânağ as albaraka ikmâlan n Əlməsix a imos asa wa kawan-in-z-aga.

Agamay ən Buləs šiwatriwen ən məzzəgzan s Əlməsix

³⁰ Ya imədrayan-in, əgmaya dağ-wan wəllen əs tarrayt n Əməli-nana Ҳaysa Əlməsix əd tara ta ihakku Infas wa Zəddigan a di-tilalam dağ təbəllant ta əgey s a di-tətansayam Məşşina dağ təwatriwen-nawan. ³¹ Tattarat-in a di-iylasan dağ aytedan win ugaynen s əbərdəg i Məşşina əhanen Yahudəyya, təttəram-i dəx a fəl əqbalan mizdagan win Yerusalam širgiten šin dasan-z-awəya. ³² As iga adi a kawan-in-asa əknex təfalawist, kud ira Məşşina adi, aga xur-wan azzaman ən təsanfawt. ³³ Əgmâya dağ Məşşina a ihakkin alxer a kawan-agəz ketnawan. Amin!

16*Assalaman d ənnəsixatan əd təwatriwen*

¹ Əssiflasaq-qawan təmadrayt-nana Fəbay təmosat təmadhalt n Əlkənisat ta n Qankrəya ² fəl a tat-təqbəlam s esəm n Əməli, igâ awen s əmmək wa dər əhoran mizdagan. İlalat-as dağ arat kul wa dağ təddərar tilalt-nawan fəlas ənta da təllil y aytedan aggotnen as nak iman-in aheq-qan.

³ Təhulam-in Friska d Akilas əmosnen imidawan-in dağ əşşəxəl y Əlməsix Ҳaysa. ⁴ Əntanay a əganen iman-nasan dağ alxarar ən tamattant fəl a di-agəzan dağ win əranen tenaxay-nin. Wərgəx nak xas a dasan-iggodayan awen.

Kalar Əlkənisaten kul šin aytedan win wər nəmos Kəl-Əlyəhud, da əggodaynat-asan. ⁵ Təhulam-in deyə Əlkənisat ta təhat aqaywan-nasan.

Təhulam-in əməri-nin Efaynet s ənta a azzaran əzəgzan s Əlməsix daq akal n Asəya. ⁶ Təhulam-in Maryama təyyəwanat əşşəxəl aggen imosan tilalt y-awan. ⁷ Təhulam-in Andronikus əd Yunəya, əmosnen kəl tamet-in a dər nimaggaza kasaw, əmosan deyə aytedan a fəl təga masnat daq nəmmuzal amaran azzaran-i əzəgzan s Əlməsix. ⁸ Təhulam-in deyə Anfləyatus əkney tara fəl tərtəyt a nəga daq əzəgzan s Əlməsix. ⁹ Təhulam-in Urbanus imosan əmidi-nana daq əşşəxəl y Əlməsix, təhulam-in deyə əməri-nin Əstaxus. ¹⁰ Təhulam-in Abalus imosan awedan isitad-dan əzəgzan-net s Əlməsix. Təhulam-in deyə kəl aqaywan n Aristabul. ¹¹ Təhulam-in Herodəyon s ənta da iyyan daq kəl tamet-in. Təhulam-in kəl aqaywan ən Narsisos win əzzəgzannen s Əlməsix.

¹² Təhulam-in Trifina əd Trifoza əgānen əşşəxəl aggen daq tarrayt n Əməli. Təhulam-in təmərit-nana Fərsida təgāt əntada əşşəxəl aggen daq tarrayt n Əməli. ¹³ Təhulam-in Rufus imosan anafron ən Məşşina d anna-net as nak da təmos-i zun anna.

¹⁴ Təhulam-in Asinkrit əd Flegon əd Yermes, əd Fətrobas əd Yermas əd mədrayan-nana win qur-san əllanen. ¹⁵ Təhulam-in Filologos əd Yuləya, əd Neray əd tamadrəyt-net, əntanay harkid Olinbas əd məzzəgzan kul win qur-san əllanen. ¹⁶ Tinəməggat assalam zəddigan. Əhulnat-kawan-in Əlkənisaten n Əlməsix ketnasnat.

Ənnəsixa wa ilkaman

¹⁷ Ya imədrayan-in, əgməya daq-wan ad tənəkədam y aytedan win du-tawaynen iməzzəyan qar-ewwan əd təsənkaf sikarakadnen əmosnen əllid n əsəssəxri wa tətawəggam. Nəməggəgat d aytedan win di ¹⁸ fəlas wər əybedan Əməli-nanay Əlməsix, kalar wər gəmməyan ar a əgan daq tədusen-nasan. Awalən-nasan hossaynen əd šizada n iləs-nasan as takarrasan aytedan win wər nəla arak man. ¹⁹ Əbərdəg-nawan i Məşşina awedan kul issən daq-as, adi a fəl as isifalawas-i awen daq batu-nawan. Mişən arex ad tilem tayttay daq batu ta təqqalat əmazal n awa olağan, tizdagam deyə daq i tu-təlla talbast. ²⁰ Məşşina s ənta a d-iffal alxer kul, tarmad as z'addagdag Aşşaytan daw daran-nawan. Tidawet dər-wan arraxmat n Əməli-nana Yaysa.

²¹ İhul-kawan-in əmidi-nin daq əşşəxəl a t-imosan Timotay ənta harkid Luqəyus əd Yason əd Sosifater əmosnen kəl tamet-in. ²² Nak iman-in Tertəyus a itawasaktaban

širawt ta, da əhulaq-qawan s esəm n Əməli. ²³ Ihul-kawan-in Gayəs s ənta a yur əssəgana nak d Əlkənisat ketnet. Ihul-kawan-in Erastus imosan aləs wa innəttafan d ərrəzəyan n əyrəm wa, ihul-kawan-in deyx amadray-nana Kartus. ²⁴ [Tidawet dər-wan arraxmat n Əməli-nana Yaysa Əlməsix ketnawan! Amin!]

²⁵ Təmmalən i Məššina s ənta a ilan tarna n ad isəssuhət əzəgzan-nawan dəyx anamod inimannakan d Əlinjil-net wa əmala imos təlxitbat ta əge dəyx batu ən Yaysa Əlməsix. Inimannak deyx awen d əssir ən Məššina wa danağ-inafalalan. Əssir wen, iybâr dəyx azzaman win okaynen. ²⁶ Mišan əmərədda sannafalalan-tu Əlkəttaban win d-əzzəbbatnen fəl ənnəbitan. Məššina di n Amaɣlol a omaran s ad inəfiləl awen i tawšeten n əddənət ketnasnat fəl a sər-əs əzzəgzənət abbardagnat-as. ²⁷ Məššina ənta məššis ən masnat kul! Tanaya kul šin-net. Attamalet har faw, əs tarrayt ən Yaysa Əlməsix! Amin!

Şirawt ta tazzarat iktab Buləs i Kəl-Korent Əsənti

Təhult

¹ Awa nak Buləs, iyrâ Məşşina dağ tara-net əs tişit n ənammazul ən Elməsix Үaysa. Nak d amadray-nana Sustinəs ² nəhul-in İlkənisat ən Məşşina ta təhat aғrəm ən Korent. Iyr-et y ad təqqəl tamattay-net zəddigat, təhât təla-net s əssəbab ən tassağ-nasan d Elməsix Үaysa; ənta d aytedan kul win hadatnen edag əhan, əғbâdan Əməli-nana Үaysa Elməsix, imosan Əməli-nasan, imos deғ wa-nana. ³ Məşşina di n Abba-nana, d Əməli-nana Үaysa Elməsix təkfeq-qawan arraxmat d alxer.

Igodan

⁴ Faw tigudəyağ i Məşşina di n Əməli-nin dağ talğanawan, tehakkay ta kawan-iga arraxmat-net s əssəbab ən tassağ-nawan d Elməsix Үaysa. ⁵ Fəlas tassağ-nawan dər-əs a sər-wan d-ewayan as kawan-isabbalal dağ arat kul, wəllen dağ awa təgannim kul d awa təssanam kul. ⁶ Isalan ən Үaysa win nəga əttiddan ғur-wan wəllen. ⁷ Adi as wər tu-təlla təhəkkut ən Məşşina wər təğrewam, kawanay win waraғwaraғnen i tawaғlay n Əməli-nana Үaysa Elməsix; ⁸ s ənta a z'isəssuhen əzəğzan-nawan har təzərəst, awəd-du fall-awan əzəl wa du-z-asu wər kawan-iwer lahan waliyyan. ⁹ Məşşina di kawan-d-iğran y ad tərtəyam əd Barar-net Əməli-nana Үaysa Elməsix, wər d-itəqqəl dağ tənna-net.

Ətəwətəytay n Elməsix d ənəmənək n əlməsixitan

Iba n ənəmənək dağ İlkənisat

¹⁰ Imədrayan-in, əgmâya dağ-wan fəl udəm n Əməli-nana Үaysa Elməsix ad tənəmənəkam ketnawan dağ awa təgannim, taqqamim wər təqqelam təzunen. Kalar nəmənəkəkat dağ awa təsamadranam d awa tənnəyem. ¹¹ Fəlas imədrayan-in, əğân dağ-i aytedan n aғaywan ən Kələway isalan n as, təlla gar-ewwan tamazaq. ¹² Ənney adi fəlas wiyyad dağ-wan gannin: «Nakkanay Buləs as nəlkam», wiyyad gannin «Nakkanay Abbolos as nəlkam», wiyyad gannin «Nakkanay Butros as nəlkam», wiyyad gannin: «Nakkanay Elməsix as nəlkam». ¹³ Awak Elməsix təzunt a iğa? A təğilam nak Buləs, a itawanyan fəl

təgəttawt fəl əddəlil ən bakkadan-nawan? Məx ak esəm wa-nin Buləs as tətawasalməxam day aman?

¹⁴ Eɡgodayax i Məşşina âs wər dax-wan əssəlməxax awedan waliyyan dax aman, ar Krisbəs əd Gayəs. ¹⁵ Dax adi wər t-illa awedan ifrâgan ad annu itiwasalmağ dax aman s esəm-in fəl ad iqqəl ənalkim-in. ¹⁶ Awalla, əkte-du as əssilməxa dax aman aytedan n ahan n Əstefanos əntanay da. A wər nəmos aytedan win, wər kəttəwəx id əssilməxa dax aman awedan iyyan.

Ətəwətəytay n Əlməsix issikna tarna əd masnat şin Məşşina

¹⁷ Fəlas wər di-d-izammazal Əlməsix fəl ad əssəlməxax aytedan dax aman, kalar izimazal-i-du fəl a dasan-əmələx isalan n Əlinjil, açağ-asan deş emel wər nəga əs masnat n awal, fəl ad wər tabbannan tamattant n Əlməsix fəl təgəttawt, təqqəl arat wər nəla almağna. ¹⁸ Tidət as, isalan ən tamattant ən Yaysa fəl təgəttawt, çur aytedan win əhanen tarrayt n əhluk, isalan wər nəla almağna a əmosan; mişan nakkanay win əhanen tarrayt n əlxillas, nəssân as tarna ən Məşşina a əmosan. ¹⁹ Isalan n awen da a dax ənnan Əlkəttaban: «Ad səbbənnana masnat ən musanan, səbbənnana deş tayttay ən malan ən tayttay.» ²⁰ Dax adi ma din-igan dax musanan? Ma din-igan za dax musanan n Əttawret? Imusanan n awal n azzaman win den, əntanay ma dax-san in-igan? Wərgəç Məşşina issəkna as, masnat ta əlan aytedan n əddənət ta, əmməskəl a təmos?

²¹ Fəlas Məşşina a igan əs masnat-net as aytedan wər əfregan a t-əssənan əs masnat ta-nasan iman-nasan, adi a fəl igrax i Məşşina ad ixləs aytedan win sər-əs əzzəgzannen əs tarrayt ən salan n Əlinjil əmosnen əmməskəl s aytedan win sər-əs wər nəzzəgzan. ²² Kəl-Əlyəhud za əntanay gammayan a dasan-ətəwəgginat təlməxjujaten əmosnen alyalamaten, Kəl-Əlyunan amaran gammayan masnat. ²³ Adi a fəlas nakkanay emel wa nətaggu tamattant n Əlməsix fəl təgəttawt, təsənkəft a imos i Kəl-Əlyəhud a dasan-təgdâlat əzəgzan, aytedan amaran win wər nəmos Kəl-Əlyəhud əntanay imos çur-san əmməskəl. ²⁴ Mişan çur aytedan win iğra Məşşina, gər za Kəl-Əlyəhud wala deş Kəl-Əlyunan, Əlməsix tarna əd masnat ən Məşşina a imos. ²⁵ Fəlas igi ən Məşşina wədi imosan s aytedan əddi əmmiskəl, wər tu-tewed masnat n aggadəm. Igi-net deş wədi imosan s aytedan iba ən təla ən tanaya, wər tu-təlla tarna n aggadəm wər oger.

²⁶ Ya imədrayan-in, aktiwat-du awa təmosam as kawan-d-iğra Məşşina. Wər dağ-wan əggətan aytedan as itiwagga iduf n as əmosan imusanan, wala wiyyad əlanen fərregat, wala wiyyad əmosnen kəl əket. ²⁷ Kalar Məşşina isannafran aratan win wər nəla almağna çur aytedan n əddənət ta fəl ad izzəbəz imusanan təkarakit. Isannafran deç win wər nəla farregat dağ əddənət ta fəl ad izzəbəz təkarakit aytedan win əlanen farregat. ²⁸ Awa itawalkan dağ əddənət ta, d awa itawakyadan, əd wa wər nətəwagga wala a isannafran Məşşina y a sər-san assabu tamayyamayt ən win əmosnen arət çur aytedan. ²⁹ Arat wen kul, ig-ay Məşşina fəl ad dat-əs wər idkəl awedan waliyyan iman-net. ³⁰ Kawanay amaran Məşşina a kawan-osağan əd Ƴaysa Əlməsix, s ənta a danaç-iqqalan masnat a du-təfəlat Məşşina – almağna ikf-ana sər-əs taqqat, əd tazdak, əd tədarfit. ³¹ Adi a fəl ənnan Əlkəttaban: «Awedan wa iran adkul ən man-net, idkəlet-tan fəl aşşaddat n awa iga Məşşina.»

2

¹ Nak iman-nin, imədrayan-in, as kawan-in-oseç y a dawan-əməla tidət ta du-təfalat Məşşina təmosat əssir, wər kawan-əssəkna masnat n awal wala igət ən masnat. ² Fəlas əgeç tanat n as, iket əheq-qawan, wər dawan-z-agaç isalan wər nəmos win Ƴaysa Əlməsix, d ətəwənça wa itawagga fəl təgəttawt.

Masnat ta n Məşşina isannafalal-tat Infas wa Zəddigan

³ Nak azzaman win çur-wan əge, əgeq-qan d iba n assahat əd tasa di-təssindawat taysəst labasat. ⁴ Amaran isəssəçritan-in əd təlxutbaten-in wər əgen əs masnat n awal wala təla ən tayttay, kalar isəssəçritan a əmosan as issikna Infas wa Zəddigan əs tarna-net as tidət a əmosan, ⁵ fəl ad iqqəl əzəgzan-nawan arət a sər-wan du-teway tarna ən Məşşina wərgəç masnat n aggadəm. ⁶ Dər iga awen da ya, tidət as, təll-ay masnat nəsasaçru aytedan win saggatakkänen dağ əzəgzan; mişan masnat ten, wər tat-təla əddənət ta, za wər tat-əlen muzaran-net as ilkâm ad iba tamayyamayt-nasan.

⁷ Kalar masnat ta du-təfalat Məşşina a nəsasaçru, təmosat əssir irəwan iğbâr y aytedan. Masnat ta, harwa dat əxluk n əddənət ad otas Məşşina a dana-sər-əs-akfu adkul. ⁸ Wər t-illa dağ muzaran n əddənət ta da, i iğrâwan əgərri ən ta da masnat; fəlas ənnar tat-əgrân, wər z'attaytayan Əməli ən tanaya. ⁹ Dər iga awen da ya ənnan Əlkəttaban: «Awa issənsa Məşşina i win t-əranen, wər kala tu-tənay şat, wər kala tu-təsla təməzzuk, wər kala dey ad

t-isammadran awedan.» ¹⁰ Nakkanay amaran isannafalal-anaq-qu Məşşina əs tarrayt n Infas wa Zəddigan; fəlas Infas wa Zəddigan wər t-illa a daɣ wər issen, wala ɣas aratan win as otas Məşşina igi-nasan da issân daɣ-san. ¹¹ Id wər t-illa awedan issânan awa ihan iman n iyyan awedan, ar iman n awedan wədi da ɣas. Emmək di daɣ as, wər t-illa awedan issânan awa otas Məşşina. Infas-net di Zəddigan ɣas a t-issanan. ¹² Amaran nakkanay, wərgəɣ infas şilat ən wa n əddənet a nəgraw, kalar infas wa d-ifalan Məşşina a nəgraw, fəl ad nagru arraxmaten şin fall-ana d-izazzabbat Məşşina. ¹³ Adi a fəlas, aratan win nəsasaxru, wər tan-nəsəsəxru əs masnat ta n aggadəm, kalar masnat ta danaɣ-ihakku Infas wa Zəddigan as tan-nəsəsəxru. Nəsasəgru tidət ta du-təfalat Məşşina y aytedan win iha Infas di Zəddigan ən Məşşina. ¹⁴ Mişan awedan wa wər nəlkem ar i masnat ta n aggadəm, wədi wər ifreg ad iqbəl arat wa d-ifalan Infas di Zəddigan ən Məşşina, id ɣur-əs əmməskəl a imos awen, wər ifreg ad t-agru fəlas Infas di Zəddigan ən Məşşina a ihakkan əgərri-nnet. ¹⁵ Awedan wa iha Infas wa Zəddigan, wər t-illa arat a d-ifalan Məşşina as wər ifreg əgərri-nnet, amaran ənta iman-net, wər t-illa awedan wər iha Infas wa Zəddigan ifrâgan a sər-əs annu arat. ¹⁶ Adi a fəl ənnan İlkəttaban: «*Ma issanan daɣ awa otas Eməli Məşşina, wala ifrâg a das-agu ənnəsixa?*» Nakkanay za a igrawan Infas di Zəddigan ən Məşşina nəssân daɣ awa otas Elməsix.

3

Buləs d Abbolos, imaşşaxalan ən Məşşina

¹ Nak amaran, imədrayan-in, harwa ɣur-wan əlle, wər dawan-təggəɣ awal wa tagga y aytedan win iha Infas wa Zəddigan. Kalar əgəɣ-awan awal zun wa itaggu awedan y aytedan win wər nəlkem ar i tara ən man-nasan, zun əşşewala y aytedan as səket əlkaman y Elməsix. ² Zun as ax a kawan-əşşəşwa, wər kawan-əssətşa imensewan win əqqurnen, fəlas harwa da wər dasan-təfregam. Wala əmərədda da, wər dasan-təfregam, ³ id harwa da wər t-illa a kawan-izlâyan d aytedan win wər nəlkem ar i tara ən man-nasan. Şismiten şin tətəggim fəl midawan-nawan əd təmazaq ta təmmalat gar-ewwan wərgəɣ sitaddanat as harwa da kəl əddənet a təttəlalam, təlkâmam i tarrayt-nasan? ⁴ As inna iyyan daɣ-wan: «Nak Buləs as əlkama», inna iyyan: «Nak Abbolos as əlkama», wədi wərgəɣ alxal n aytedan n əddənet ta da a təgam?

⁵ Abbolos a da, ənta wala Buləs, awak ma əmosan? Wər nəmos ar imaşşaxalan ən Məşşina, win sər-wan d-ewaynen əzəgzan sər-əs, nak harkid ənta, wər nəga ar əşşəxəl wa danaç-ikfa Əməli. ⁶ Nak awa əmmozała, iha şaşşelan n amasa as nak a t-inbalan, təzzar išşəşw-ay Abbolos, mişan Məşşina ənta a t-id-issədwalan. ⁷ Daç adi, wərgəç awedan wa inbalan amasa wala wa t-işşəşwin a imosan arat; kalar Məşşina a t-id-issədwalan a t-imosan. ⁸ Awedan wa inbalan amasa əd wa t-işşəşwin arat iyyanda a əmosan, akkiyyan daç-san ad t-akfu Məşşina alxaç n əşşəxəl-net. ⁹ Nak d Abbolos nədrəw əşşəxəl wa danaç-ikfa Məşşina, amaran kawanay a mosnen şilat ən tawagost-net, təmosam deç əkərrus-net.

¹⁰ Nak, əgəç s arraxmat ta di-ikfa Məşşina, əşşəxəl zun wa itaggu əmakras ən nan issânan əşşəxəl-net, əssəxta təsəkbəlt ta təmosat şixurad ən taçazamt, dəffər adi osa-du awedan iyyan a fall-as ikarras; mişan akk awedan inkədet d əmmək was işatu əkərrus ən taçazamt tədi. ¹¹ Wər t-illa awedan ifrâgan əsəxti n iyyat təsəkbəlt wər nəmos ta təxtat kala da, ad tat-imosan Үaysa Əlməsix. ¹² Wiyyad aytedan əkarrasan fəl təsəkbəlt ən taçazamt ta, s urəç, wiyyad s azrəf, wiyyad əs təhun əknânen şihussay, wiyyad s eşkan, wiyyad s ələmmuz, wiyyad s agabal. ¹³ Akk awedan ilkâm ad itəwənəy əşşəxəl-net, id ad itəwəsəknu əzəl wa ilkaman, itəwəjərrəb əs təmsay, fəlas temsay ta ənta a za təsənnəfiləlat əzzənəf n əşşəxəl wa iga akk awedan. ¹⁴ Kud təməkrust ta fall-as iga awedan wər tat-tətşə təmsay, awedan wədi ad igrəw alxaç-net. ¹⁵ Mişan as imos as tətş-ət təmsay, awedan wədi ad affatu. Dər iga awen da ya, ənta iman-net ad ixləs, mişan ad alu əlxillan-net d in awedan ad d-ittirkaban daç təmsay. ¹⁶ Awak masnat a wər təgema as, kawanay iman-nawan a imosan ehan ən Məşşina, iha deç Infas wa Zəddigan iwallan-nawan? ¹⁷ Amaran awedan kul wa ihallakan ehan ən Məşşina, a t-ihlək Məşşina; fəlas ehan ən Məşşina i zəddigan, amaran kawanay a t-imosan.

¹⁸ Ad wər issudəf awedan waliyyan iman-net alxata. Wa daç-wan içilan ila masnat ta fəl təgla əddənət, wədi aget iman-net əmeskel, ad t-akfu Məşşina masnat ta n tidət. ¹⁹ Fəlas masnat ta n əddənət ta, əmməskəl a təmos çur Məşşina, id a ənnan Əlkəttaban: «*Imusanan n əddənət ta, şimərkas şin-nasan as tan-ibaz Məşşina.*» ²⁰ Ənnân deç: «*İssân Əməli âs, imedranan ən musanan n əddənət ta, wər əzlayan əd bannan.*» ²¹ Daç adi, ad wər tədakkalam iman-nawan fəlas təlkamam y awedan, fəlas arat kul i-nawan, ²² gər za nak Buləs wala Abbolos, wala Butros, wala əddənət, wala təməddurt əd tamattant, gər za aratan

win əmərədda wala win əlkamnen, awa ketnet i-nawan. ²³ Kawanay iman-nawan, Əlməsix a kawan-ilan; Əlməsix amaran, Məşşina a t-ilan.

4

¹ Dağ adi, nak d Abbolos a dana-wər-itəwəggu iduf wər nəmos ar wa n maşşaxalan n Əlməsix, d almawakkilan-net as imos əşşəxəl-nasan emel y aytedan igitan ən Məşşina win dasan-əhanen ətənkul. ² Amaran ma itawaran dağ awedan imosan almawakkil, ar ad imos awedan n alxadil. ³ Nak əs man-in, wər əzlaya dağ iduf wa dağ-i təgam wala wa dağ-i əgan aytedan wiyyad. Nak əs man-in, wər əgeç iduf waliyyan dağ man-in. ⁴ Wər di-təha tərək n ark əmazal waliyyan, mişan wərgəç adi a di-z-ikkəsən. Əməli, ənta a di-z-İsrəxan. ⁵ Dağ adi ad wər təssəwəram awedan waliyyan lahan dat tawaçlay n Əməli s ənta a z'assaknin ezal a mallan arat kul wa itawaggan dağ əssir, isəffəggu awa ihan iwallan n aytedan. Alwaç wədi, awedan kul ad igrəw çur Məşşina təmmal ta dər ihor.

⁶ Amaran imədrayan-in, ədkâlax-awan-du isalan-in nak d Abbolos fəl ad iqqəl awen almasal a kawan-z-isassagrin batu ta tənnat: «Ad wər takəyam awa ənnan Əlkəttaban». Əgeç adi ənta da fəl a kawan-wər-iggəz awedan waliyyan isifaxaran s awedan iyyan alku wa hadan. ⁷ Kay wa itaggan ibaragan, ma kay-izlayan d iyyan awedan? Ma tələç, as wərgəç Məşşina a dak-k-ikfan? Dad zamas awa tələç kul ətəwəkfa a kay-itawagga bannan, ma əmosan baragan win tətagga?

⁸ Kawanay əmərədda təlâm arat kul wa taram, har as təgərgəsam! Təqqalam fadda imənokalan ənta nakkanay wər tan nəmos! Nəsidaran a tan-təqqəlam əs tidət, fəl a dər-wan nədrəw taçmar nakkanay da. ⁹ Mişan əs tannax sər-i nakkanay inəmmuzal, ig-ana Məşşina dağ ələqqam n aytedan, nola d aytedan issiwar əşşəriçə tamat-tant, nətawagga ares n awnaf y əddənət ketnet, gər za aytedan wala angalosan. ¹⁰ Nakkanay za nəqqal s aytedan imeskalan fəl əddəlil n əşşəxəl wa nətagg y Əlməsix, kawanay amaran təqqalam imalan ən tayttay fəl əddəlil ən tassaç-nawan dər-əs. Nakkanay nərkam, kawanay amaran təsohem. Nətiwakyad, mişan kawanay tətivasaxmaram.

¹¹ Nakkanay wala ças əmərədda da ih-âna laz, nəffûd, nəzlâm, nətatawat, wər nəla id nəxsar; ¹² izaçazzab-ana əşşəxəl ən fassan-nana. Nətattar a igan arraxmat y

aytedan win dana-tagginen ark awalan, nəzmâr i win dana-sakninen arkanay. ¹³ Aytedan win ƣaššadnen ismawan-nana, nəgammay daƣ-san əs man mallolnen ad ammaz-zayan d adi. Har harwa da əgân-anax aytedan šilat ən ferədan n əddənet əd səfrađ-net.

¹⁴ Wər dawan-in-əktebaƣ aratan win fəl a kawan-əzzəbəza təkarakit, kalar əktabaƣ-awan-tan-in fəl a dawan-aga ənnəsixa, wa z'aga i bararan-in əkne tara. ¹⁵ Amaran kud təlâm maraw gim n əlfəqqi a kawan-sasaƣren tarrayt n Əlməsix, da wər təlem ar abba iyyanda, fəlas əzəl wa dawan-əgeƣ isalan ən ƴaysa Əlməsix, təlkamam-as, ənta ad əqqala šilat n abba-nawan. ¹⁶ Adi a fəl ədgaza gammaya daƣ-wan a di-tattalalam.

Əzzəna daƣ Əlkənisat

Ədərrəg y əzzəna

Ark aratan wər nəmməkkan win ətawagginen daƣ Əlkənisat

¹⁷ Əddəlil n adi da a fəl sər-wan in-zammazala Timotay ən ruray əkneƣ tara, issiflasan wəllen daƣ ləkkum-net y Əməli. Əssokaƣ-awan-t-in fəl a kawan-d-assaktu əzzənəf ən ləkkum wa əgeƣ y Əlməsix, s ənta a sassaxra daƣ əlkənisaten kul daƣ adag kul.

¹⁸ Wiyyad daƣ-wan taggin ibaragan, fəlas əxilan wər kawan-in-zələsaƣ assa. ¹⁹ Mišan əs turagat n Əməli, a kawan-in-asa daƣ alwaq wər nəggug. Alwaq wədi, aytedan win tagginen ibaragan əddi, ad ənəyaƣ awa əfragan, wərgəƣ awa gannin ƣas. ²⁰ Fəlas Taƣmar ta n Məššina, imazalan win taggin aytedan əs tarna-net a daƣ tətawanay wərgəƣ awa əgannin əs mawan-nasan. ²¹ Awak məni daƣ aratan win wa təssofam? A kawan-in-asa ewâyax ələkkud, meƣ a kawan-in-asax əd tara əd man lammodnen?

5

¹ Aytedan kul gannin ih-iwan awedan itaggin əzzəna, igân təllabəst ta daƣ âs wala aytedan win wər nəssen Məššina da wər tu-təggin; imosan as ih-îwan aləs itinəmənsin əd təntut n abba-net!

² Eges harwa da tətəggim ibaragan, edag n a kawan-assakmu adi iman, təzəmməzzəyam iman-nawan d awedan wa itamazalan adi. ³ Kud nak wər ƣur-wan əlley s azzat-in, da iman-in əllân ƣur-wan. Amaran awedan wa igan əmazal labasan wədi, obâzaq-qu s əššərixa šilat n as əlley ƣur-wan. ⁴ As təmmənayam gar-ewwan fəl əddəlil n Əməli-nana ƴaysa, əggəzaq-qawan-in əs man-in wərgəƣ s azzat-in, a fall-awan d-izəzzəbbət Əməli-nana ƴaysa tarna-net;

⁵ tayyim awedan wədi y Aşşaytan ad təhlək təğəssa-net, fəl ad igrəw efsan əzəl wa n tabadday.

Əşşəriyə gər əlməsixitan

⁶ Wər təlem əddəlil waliyyan fadda s igi ən baragan. Awak wər təssenam as, «arat ən xamira a isakafan təbəluləq n agel irwayan ketnet?» ⁷ Əkkəsət dağ man-nawan xamira wa waşşaran a t-imosan abakkad, tizdagam fəl ad təqqələm şilat ən təbəluləq n agel irwayan wər iha xamira, s ənta a təmosam kala da, fəlas Əlməsix, imos təfaskay-nana ta n amud wa n Akkay, immut dağ adag-nana. ⁸ Dağ adi nəssəxməret amud wa n Akkay, wərgex əs xamira wa waşşaran, a t-imosan iwallan iha əşşur əd talbast; kalar nəssəxməret-tu əs təgəlla ta wər iha xamira, a tat-imosan iwallan zaddognen, təha tidət.

⁹ Dağ şirawt-in ta dat ta, əktâbağ-awan-in as, ad tu-wər-təməl tassağ waliyyat gar-ewwan d aytedan win tagginen əzzəna. ¹⁰ Mişan ya wər əssoka s adi iba ən tassağ d aytedan win wər nəşşokal dağ əddənet ta ar dağ igi n əzzəna, madeğ win as əffofen wallan-nasan, madeğ win narkaban əd win əğbadnen əssənəman, fəlas aytedan win di, wər za taqqamim wər dər-san toseyam, ar s ad təgmâdam əddənet ketnet da. ¹¹ Kala kalar a dawan-ganna, ad wər tasəğam d awedan wədi igannin imos amadray-nawan dağ əddin, ənta wər işşokal ar dağ igi n əzzəna, iffofat əwəl-net, iğbâd əssənəman, ilâ ark iləs, imos əməşwi n esmad, imos anarkab. Awedan şilat ən wa, wala ɣas tettay da a dər-əs tat-wər-tədrəwam.

¹²⁻¹³ Fəlas wərgex nak a iwar ad əbəza s əşşəriyə aytedan win wər nəzzəgzən s Əlməsix, Məşşina a tan-z-ibəzan s əşşəriyə, mişan aytedan win Əlkənisat-nawan, kawanay a iwar a tan-tabəzam s əşşəriyə, fəlas ənnan Əlkəttaban: «*Əkkəsət ɣur man-nawan inəllubas.*»

6

¹ As illam arat gər iyyan dağ-wan d əmədi-net, ma kawan-issəhalan ad tətakkim aytedan wər nəzzəgzən əs Məşşina y a dawan-əşşrəğan, təğləyam tamattay zəddigat ən Məşşina? ² Awak masnat a wər təgəm as, tamattay tədi ənta a za təsrəğat y əddənet? Dağ adi, dad imos as kawanay di da a z'əşrəğnen y əddənet, manəmmək as wər təfregam əşşəriyə ən tağawşiwen madrornen? ³ Awak masnat a wər təgəm as, wala angalosan, nakkanay a dasan-z-işrəğan, əngəm-in za şığawşiwen n əddənet ta! ⁴ Dağ adi, as t-imal əğşud gar-ewwan dağ tağawşay iyyat, manəmmək as tətayyim aytedan wər nəmos wala ɣur

Əlkənisat şarrağan-awan? ⁵ Imos fall-awan təkarakit ad imos as, wər kawan-iha awedan waliyyan ilân masnat a tu-təssifragat ad izəmməzzəy əşşərixa i mədrayan-net dağ əddin. ⁶ Awak ma kawan-igrawan as təşarrağam gar-ewwan har təqqimam əşşarrağan-awan aytedan wər nəzzəgzan s Əlməsix.

⁷ Wala ənəməşray wa tətəggim gar-ewwan da agadal zəwwəran a dawan-imos. Mafel wər təzəzzaydaram d iba ən tidət wa dawan-itâwaggan, madeş təzəzzəydəram d əmişi wa tətawəggim? ⁸ Edag n ad tagim adi, kala kalar kawanay iman-nawan a itamazalan s iba ən tidət, tətəğam aytedan win hadatnen, əs fadda imədrayan-nawan a əmosan dağ əddin.

Inasbakkadan əd Taymar ta n Məşşina

⁹ Awak masnat a wər təgem as inəllubas wər z'əgrəwan adagar dağ Taymar ta n Məşşina? Əqqəlat-du dağ əxruk wa təgam, təssənəm as imaggan n əzzəna, d aytedan win əşbadnen əssənəman, əd win tagginen i tədoden-nasan şidoden, əd meddan win tagginen iman-nasan şidoden əd win tagginen imidawan-nasan şidoden, ¹⁰ əd baydagan, əd win as əffofen wallan-nasan, əd maşwan n esmad, əd mawayan ən tənnawen, əd narkaban, aytedan win kul wər əlen adagar dağ Taymar ta n Məşşina. ¹¹ Wiyyad dağ-wan kala ad əhan samal n aytedan win di, mişan əmərədda tətəwaşaradam dağ awen, tətəwazazdagam, təqqalam aytedan təsisəğad tarrayt n Əməli Үaysa Əlməsix d Infas wa Zəddigan n Əməli-nana Məşşina!

Batu ta təqqalat iki ən təkərwaten

¹² Təgənim: «Arat kul xalal-ana», tidət mişan wərgəş arat kul təh-ay tənfa. Tidət as «arat kul xalal-ana», mişan nak wər z'ayyaş arat waliyyan ittəf dağ-i tanat. ¹³ Təgənim deş «Isudar, tadist a fəl d-əxlakan, amaran tadist, isudar a fəl du-təxlak.» Dər iga awen da za, tadist harkid mensewan ilkâm ad asabu Məşşina taməyyamayt-nasan. Tayəssa n awedan ənta wər du-təxlek fəl ad tagu əzzəna. Kalar təxlâk-du fəl ad tagu tara n Əməli, s ənta a tat-ilan. ¹⁴ Amaran Məşşina a d-issənkarən Əməli Үaysa dağ tamattant a dana-dağ-as-d-issənəkər nakkanay da, əs tərna-net.

¹⁵ Wər təssenəm as, şixəswen-nawan, şisəllad n Əlməsix a mosnat? Dağ adi manəmmək as z'əsərtəya şisəllad n Əlməsix əd təşəssa ən təkərwat? Kala Kala! Wər ilkem ad iga adi! ¹⁶ Məş masnat a wər təgem as awedan wa issərtəyan iman-net əd təkərwat, wədi iqqal dər-əs tayəssa iyyadda? Awak wərgəş ənnan Əlkəttaban: «Aləs

əd tantut-net ad aqqalan tağəssa iyyadda»? ¹⁷ Awedan amaran wa irtayan d Əməli, wədi Infas wa Zəddigan n Əməli a t-ihan. ¹⁸ Darragat y igi n əzzəna. Ibakkadan kul win tamazalan aytedan wər ədrewan arat əd təğəswen-nasan; mišan awedan wa igan əzzəna, wədi iga abakkad immâran tağəssa-net təmosat taslət n Əlməsix. ¹⁹ Awak masnat a wər təgem as šiğəswen-nawan ehan n Infas wa Zəddigan a əmosnat, a kawan-ihân, ikf-âwan-tu Məşşina? Wərgə kawanay a ilan iman-nawan. ²⁰ Fəlas izinz-iwan-du Məşşina s əlqimat zəwwərat. Dağ adi, səxmərat Məşşina əs təğəswen-nawan.

7

Batu ta təqqalat azalaf

Batu təqqâlat aytedan win əzləfnen

¹ Amaran dağ batu ta təqqalat isəstanan win di-du-təgam dağ şirawt ta di-du-təktabam, tənnam: «Ofa y aləs ad aqqam wər inamansa əd tantut kuddeğ ta izlaf.» ² Dər iga awen da za, fəl əderrəğ y igi n əzzəna, əkkulluk n aləs ofa ad ila tantut, əkkulluk ən təntut değ təla aləs. ³ Aget aləs i tağurəs arat was iwwəjjab a das-t-əgu, təntut değ taget y aləs-net awen da. ⁴ Tantut wərgəğ ənta a təttafat tanat dağ təğəssa-net, aləs-net a ittafan tanat-net. Aləs ənta da, wərgəğ ənta a ittafan tanat dağ təğəssa-net; tantut-net a tat-ittafan. ⁵ Dağ adi ad wər tənəməgdəlam iman-nawan ar s ad tənımardam s adi dağ temert təkâtam i təwatriwen. As təğrad, təqqəlam təməwit ta təwwəjjabat fəl aləs əd təntut-net, fəl təksəda n ad ib'as tənnodam dağ man-nawan, igrəw sər-wan Aşşaytan tarrayt s a kawan-ajjarab. ⁶ Arat wa ənnəğ əddi, turagat n igi-net a kawan-əkfeğ, wərgəğ ammar a kawan-sər-əs-əgeğ. ⁷ Nak əsidarana a dər-i olân aytedan kul, əfrəgan ad aqqamin wər əzlefan; mišan ya akkiyyan dağ-na əd təhəkkut ta das-iga Məşşina. Wiyyad dağ-na wər əfrəgan ad wər əzlefan, wiyyad əğrâwan təhəkkut təmosat fərregat y amayras.

⁸ Amaran meddan win as aba şidoden-nasan, əd tədoden şin as aba meddan-nasnat, ofa ad ağin awa əgeğ, aqqamin da wər əzlefan. ⁹ Mišan as imos as wər əfrəgan adi, wədi əzləfanet; fəlas ofa y awedan ad izləf, aqqam da wər isabbalaglag daran əwəl-net.

¹⁰ Aytedan amaran win əzləfnen, omâraq-qan s as: tantut ad wər tamməzzay d aləs-net. Əməli a innan adi, wərgə nak. ¹¹ Mišan as imos as təmməzzay dər-əs, wədi taqqamet wər təzlef, madəğ taknu d aləs-net təqqəl-tu; aləs ənta da ad wər izəmməzzəy tağurəs.

¹² Aytedan amaran win hadatnen, ənnəx-asan: Amadray dağ əddin was wər təzzəgzan tantut-net əs Ƴaysa, eges tərda s a tat-ittâf, wədi a tat-wər-izəmməzzəy. Batu tədi, nak a tat-igan, wərge Əməli. ¹³ Tantut deş ta n tamadrayt dağ əddin, tas wər izzəgzan aləs-net əs Ƴaysa, eges igla irâ a şur-əs təlla, tədi a tu-wər-təfəl. ¹⁴ Fəlas aləs wədi wər nəzzəgzan əddi, zəddiğ id tantut-net a təmosat iyyat dağ mədrayan dağ zəgzan əs Ƴaysa. Tantut deş tədi wər nəzzəgzan əs Ƴaysa əddi, təzəddiğ id aləs-net a imosan iyyan dağ mədrayan dağ zəgzan əs Ƴaysa. Adi a izzəzdagan bararan-nasan, mişan ənnar wər iga adi, bararan-nasan ehan ən taxxaramt a daq-qan ələn. ¹⁵ Dər iga awen daş, wa daş-san wər nəzzəgzan, gər za aləs wala tantut, as ira əməzzəy ən wa hadan, ammazzayət dər-əs. Amadray daş əzəgzan wədi, madəş tamadrayt tədi, wər t-idu-z-iqqəl əşşərişə n adi, fəlas Məşşina, təməddurt iha alxer as ira a tat-təgâm. ¹⁶ Ma issanan, mijas kam ta n təməzzəgzənt əs Ƴaysa a du-z-awəyan s aləs-nam ad igrəw efsan? Kay da, aləs wa n əməzzəgzən əs Ƴaysa, ma issanan mijas kay a du-z-awəyan əs təntut-nak ad təgrəw efsan? ¹⁷ Amaran aytedan win wər nəmos win-di akkiyyan aglet daş alxalat ta daq-qu iga Əməli Ƴaysa təmos təhəkkut-net, s ənta a iha as t-işra Məşşina. Ammar wədi a taggaş əlkənisen kul.

Awedan kul aqqamiwet daş alxalat ta iha

¹⁸ Kud awedan imminkad as t-id-işra Məşşina, wədi a das-wər-iqqəl adi asakor. Kud deş awedan wər immənkad as t-id-işra Məşşina, ad wər igməy d ad itəwəsəmmənkəd. ¹⁹ Əmənəkəd wala iba-net wərgəş ənta a imosan arat, amazal s ammaran ən Məşşina a t-iməşan. ²⁰ Akk awedan aglet daş alxalat ta iha as t-id-işra Məşşina.

²¹ Kud as kay-d-işra Məşşina akli a təmosaş, a kay-wər-işşəwəş adi; mişan as təgrawa tarrayt əs tədarfit, a sər-əs wər tugəya, kalar darfat. ²² Fəlas awedan wa imosan akli as t-id-işra Məşşina y a tu-təməl tassaş gar-es d Əməli, wədi ad iqqəl adaraf n Əməli. Əmmək di daş âs awedan wa wər nəmos akli, ənta da as t-id-işra Məşşina, ad iqqal akli n Elməsix. ²³ Əməli a irzəman fall-awan, isəddərfat-kawan; daş adi ad wər tayyim aytedan agin-kawan eklan. ²⁴ Imədrayan-in, akkiyyan daş-wan aglet iga attama-net daş Məşşina, aqqam ənta da daş alxalat ta iha as t-id-işra Məşşina.

Batu təqqalat aytedan win wər nəzlef

²⁵ Amaran daş batu ta təqqalat aytedan win wər ides azalaf, wər di-ikfa Məşşina ammar waliyyan y-asan; mişan

a dawan-agay ənnəsixa, ənnəsixa di da ig-âwan-tu aləs igrâwan dağ əhənətta n Əməli tişit n awedan issiflasan.

²⁶ Azzaman n alğazab a fall-anay əganen, dağ adi illa xur-i as, ofa y akk awedan kul ad aglu dağ alxalat ta iha.

²⁷ Kud kay təsımarkaşa əd tantut, ad wər təgməya d a dər-əs tammazzaya. Kud wər təzlefa, a dər-əs wər təgməya.

²⁸ Dər iga awen da ya, as təzlafa, wərge abakkad a təgey; tantut değ ta wər ides azalaf, as təzlaf, wərgey abakkad a təga; mişan ya aytedan win əzlafnen dağ azzaman win, ad ənəyan təssust labasat s ənta as arey a tan-agəza dağ-as.

²⁹ Awa fəl dawan-gannay adi, imədrayan-in, as, təsəlkamt n alwaq a nəha da. Dağ adi a ibazan xur əmərədda, wala aytedan win əzlafnen, aginet as şilat n as wər əzlefan, ³⁰ win hallinen şilat n as wər həllin, win falawasnen şilat n as wər falawasan, win du-zanzinen değ əttəfanet as arat wa d-əzənzən wər t-əlen, ³¹ amaran aytedan win sattaşmalnen aratan n əddənət ta, a dağ-san wər zəzzəwen, fəlas arat kul wa itaggan dağ əddənət ta nəha da, ta n əyrud a iha.

³² Nak amaran a ərey ad tagim təməddurt dağ kawan-wər-işşəwəş wala. Aləs wa wər nəzlef, ifrâg əddəguz dağ igi n aratan win fall-as ira Əməli, fəlas igammay d əmmək was z'igrəz y Əməli. ³³ Mişan aləs wa izlafan, şıxawşiwen n əddənət a dağ idaggaz igammay əmmək was tu-za-tiru taşurəs; ³⁴ təzzar tuzan ənneyat-net gər tara n igi n awa tara təntut-net d awa ira Məşşina. Amaran tantut ta wər nəzlef əd ta wər ides azalaf, əfrâgnat əddəguz dağ igi n aratan win fall-asnat ira Əməli, fəlas əranat ad əşkətnat təməddurt-nasnət ketnet y əlğibada n Əməli; mişan tantut ta təzlafat, şıxawşiwen şin əddənət a dağ tədaggaz, təgammay əmmək was tat-z-iru aləs-net. ³⁵ Arat wa ənney da, tənfa-nawan a dağ-wan t-ənney, wərgey əzuk iyyan a kawan-sawara. Kalar tara a əgey ad tagim awa inahaggan, təlkəmam y Əməli s əwəl iyyanda.

³⁶ As iga aləs arkawal n azalaf i təmidit-net har d-ewad alwaq wa dağ ihor a tat-izlaf, amaran iksud əsəkkərukədnət, wədi izləfet-tat, kud adi a ira, wər imos awen abakkad.

³⁷ Mişan aləs wa d-inkaran gar-es əd man-net isammarkas as wər z'izləf tantut ta dər imarakan azalaf, amaran imos awedan ifrâgan dağ man-net, wədi igâ arat ihossayan.

³⁸ Dağ adi awedan wa issəndan arkawal n azalaf i təmidit-net, iga arat ihossayan; mişan of-ay wa igan tanat n a tat-wər-izləf.

³⁹ Tantut təzlâfat ilzâm-tat amel xur aləs-net iket iddâr. Mişan as t-aba, ad tilu tarrayt n azalaf n iyyan aləs wa tara, eges kundaba wa izzəgzanan s Əməli Ƴaysa. ⁴⁰ Mişan nak

dağ iduf wa-nin, oğar əbbələl wa za tagu as təqqim wər təzlef. Infas wa Zəddigan ən Məşşina a di-isassagan iduf wədi, amaran Infas en dağ as əgeğ iduf n əs əgrâwaq-qu.

Əlyibada n əssənəman

8

Ədərrəg y əlyibada n əssənəman

Tara ən mədrayan-nana win əlməsixitan əd təkatawt-nasan

¹ Dağ batu ən şan ən təzəgzam şin təwagğanen y əssənəman ta dər-i təssəstanam, tənnam: «Masnat, ket-nana nəla dağ-as arat». Tidət a imos adi, mişan za masnat, adkul ən man a du-tətaway s awedan, as iga awen, tara ənta, əsəssuhi a tətəggu əzəgzan n awedan. ² Awedan wa çur illa as ila masnat, wədi harwada wər issen awas imməkkan ad t-issən. ³ Mişan awedan wa iran Məşşina, izday-tu Məşşina.

⁴ Amaran dağ batu ən tattay ən şan ən təzəgzam şin təwagğanen y əssənəman, nəssân əs wər t-illa əssənəm imosan əməli, Məşşina iyyanda ças a t-illan imos Əməli.

⁵ Wala ad əttâfan aytedan as əllan-tu əssənəman aggotnen dağ jənnawan d amađal tiwaybadnen, amaran tidət as əllan-tu, ⁶ da çur-na, Məşşina iyyanda ças a t-illan. Ənta a imosan Abba-nana, ixlak-du awa t-illan kul, s ənta a danaç-ilan nəsandu tara-net; wər t-illa deç ar Əməli iyyanda, Çaysa Əlməsix, s əssəbab-net as t-illa arat kul, amaran ənta a danaç-ittafan təməddurt.

⁷ Mişan wərgəç aytedan kul tewâd masnat-nasan adi. Aytedan win di əs kala əzzəgzanan s əssənəman, harwa da as ətşan isan ən təzəgzəmt y əssənəm, ad əşşəkan iman-nasan, iməl çur-san as isimadas-tan awen. ⁸ Dər iga awen da ya, wərgəç tettay n amensay a dana-z-izənnəmihezən əd Məşşina: gər za nətşâ isan win di, wala wər tan-nətşâ, wərmad dana-za-təfnəz tettay-nasan s arat, wala deç təşşit-ana sər-əs. ⁹ Eges ya ənkədat əd man-nawan, tarrayt ta təgrawam əddi, a dawan-təssixlalat tettay n amensay kul, ad wər təqqəl təsənkəft y awedan was wər issəhat əzəgzan-net.

¹⁰ Fəlas kay wa ilan masnat tədi, as kay-inay amadray-nak dağ əddin was wər issəhat əzəgzan-net təqqima dağ adag n əlyibada n əssənəman tətatta, ak wərgəç a sər-əs d-awəy adi ad ammazray iduf wa iga, təzzar ad itattu isan win təzəgzam y əssənəman ənta da? ¹¹ Dağ adi təssəxrakay əs masnat-nak ta tagget amadray-nak was wər issəhat əzəgzan-net s ənta da əddəlil-net a fəl aba Əlməsix. ¹² As

təbbəkkadam imədrayan-nawan as wər issohat əzəgzan-nasan əs təməwit tədi, wədi Əlməsix a təbbəkkadam. ¹³ Adi da fəlas, kud amensay wa tatta a z'iqqəlan y amadray-nin təsənkəft, wədi, nak, wər di-ilkem ad əlasax tettay ən şan, fəl a das-wər-əqqəla təsənkəft.

9

Təballant ən Buləs fəl əşşəxəl-net y Əlməsix

¹ Awak nak, wərgex əlləlli a əmosa? Wərgex ənəmmazul ən Ƴaysa Əlməsix a əmosa? Wərgex ənāyax Əməlinana Ƴaysa? Wərgex kawanay iman-nawan tənfa ta du-təgmadat əşşəxəl-in y Əməli a təmosam. ² Kud Ƴur aytedan wiyyad wər əmosax anammazul, da Ƴur-wan illikan as əmosaq-qu; adi da fəlas əzəgzan-nawan s Əməli a imosan ejwal ən tişit-in anammazul n Əməli.

³ Ənta da awa z'anna y a sər-əs əkkəsax iman-in daƳ aytedan win di fall-i ganninen ark aratan: ⁴ Awak nakkanay inəmmuzal alxaq a wər nəla n ad nəgrəw a nətša d a nəşwa daƳ əşşəxəl-nana? ⁵ Awak nakkanay tarrayt a wər nəla n ad nidaw əd təntut n iyyan daƳ-na təmosat tamadrəyt-nana daƳ əddin daƳ əşikəl, awa taggin nəmmuzal win hadatnen, taggin-tu deƳ mədrayan n Əməli Ƴaysa əd Butros? ⁶ Məx, nak əd Barnabas Ƴas a wər nəla alxaq n ad nəddər daƳ tişit-nana inəmmuzal? Kundaba ad nəddâr daƳ əşşəxəl ən fassan-nana? ⁷ Məni dad kala ad itawanay soji irazzaman i man-net əşşəxəl wa itaggu? Wala əmagyak wər nətəttu tənfa ən tawagost-net? Madəx amadan wər nəsəssu ax n aharay a dər inittaf? ⁸ Awak arat a d-inzâm awedan gar-es əd man-net a dawan-ganna da, məx ak Əttawret da awa da a inna? ⁹ Fəlas a inna Əttawret: «Ad wər tədbəxa y azgar təzidizdiyiza daƳ alkama itabakkat-ak-tu.» Awak zələyat daƳ zəgran a fəl inna Məşşina awen? ¹⁰ Wərgex əddəlil-nana nakkanay a fəl inna awen? Awalla illikan as əddəlil-nana a fəl iktawaktab awen fəl ad agu awedan wa igayyakan tawagost əd wa itabbakken tənfa ta tat-du-təgmadat attama n ad əgrəwan adagar-nasan daƳ tənfa ten. ¹¹ Dad zamas nakkanay a d-issədwalan daƳ wallan-nawan tənfa ta du-təfalat Infas wa Zəddigan, awak arat zəwwəran a imos a kawan-d-igməd sər-na a təla əddənet? ^{12a} Kud əllân-tu aytedan as kawan-iwar alxaq-nasan, awak wərgex ogar-tu wa-nana?

^{12b} Mişan harkid adi, wər daƳ-wan nəgmay alxaq n əşşəxəl-nana; kalar nəzmar y arat kul, fəl ad wər nagu arat a z'iqqəlan təsənkəft y awedan waliyyan igdəl-as awen tesalay y Əlinjil n Əlməsix. ¹³ Awak masnat a wər təgem as

aytedan win šaqqalnen daɣ Ahan wa Zəwwəran n Əlɣibada, ehan en da a tan-ihakkin isudar-nasan; win əşɣalnen deɣ ɣur majmar wa daɣ taqqadnat təkutawen, əlân adagar-nasan daɣ təkutawen en? ¹⁴ Awen da a inna Əməli, omar s âs, aytedan win tagginen isalan n Əlinjil, əddəranet daɣ-as.

¹⁵ Mišan nak wər daɣ-wan əgməya alxaq-in waliyyan; wala kattabaɣ-awan-in aratan win əmərədda fəl a daɣ-wan tan-əgməya. Fadda əssofaɣ a di-iba y a daɣ-i ikkəs awedan fərregat n igi n abarag wədi. ¹⁶ Wər ələɣ tarrayt waliyyat s igi n abarag n as taggaɣ isalan n Əlinjil; fəlas əşšil a di-imos igi-nasan. Iket alɣazab adi iqqəl as tan-wər-əgeɣ. ¹⁷ Ənnâr tara ən man-in a daɣ tagga isalan n Əlinjil, wədi ələɣ alxaq; mišan dad imos as, igi wa dasan-t-agga ilzâm-i, imos əşšəɣəl a di-issiwar Məşšina, ¹⁸ wədi ma imosan alxaq-in? Adi za igi ən salan n Əlinjil y aytedan bannan, wər daɣ-san əgməya alxaq waliyyan wa fall-asan ələɣ daɣ igi-nasan.

¹⁹ Nak əheɣ tara ən man-nin, wər di-ila awedan waliyyan, mišan əgeɣ iman-in akli y awedan kul fəl ad d-awəy awen əs taşšam n aytedan əzəgzan s Əlməsix. ²⁰ As əggazaɣ Kəl-Əlyəhud ad əqqələɣ šilat n iyyan daɣ-san fəl ad əzzəgzənan s Əlməsix; as əggazaɣ win əlkammen y Əttawret, ad əqqələɣ šilat n iyyan daɣ-san, kuddeɣ nak wər das-əlkema, fəl ad əzzəgzənan s Əlməsix. ²¹ As əggazaɣ aytedan win wər nəlkem y Əttawret, ad əqqələɣ iyyan daɣ-san fəl ad əzzəgzənan s Əlməsix; awen wər imos almaɣna-net as wər əlkema y əşšəriɣa ən Məşšina, kalar əlkâmaɣ-as fəlas əşšəriɣa wa n Əlməsix as əlkama. ²² As əggazaɣ aytedan win as wər issohat əzəgzan-nasan, ad əqqələɣ šilat n iyyan daɣ-san fəl ad əzzəgzənan s Əlməsix; təməwit tədi as əqqala arat kul y aytedan kul fəl a daɣ-san səɣxəlləsa wiyyad.

²³ Taggaɣ adi kul fəl əddəlil n Əlinjil, fəl ad ədrəwa albaraka-net d aytedan win sər-əs əzzəgzənen. ²⁴ Masnat a wər təgem âs, tammazaga aytedan aggotnen a tat-taggaɣnen, mišan awedan iyyanda a tat-d-itarnin? Daɣ adi azəlat, tagim azzal wa kawan-du-z-isassarnin. ²⁵ Amaran aytedan kul win əganen ənnəyat ən tammazaga, əšinən labasan a ətaggin i man-nasan. Taggin awen fəl ad əgrəwan alak iɣaşšadan, as iga awen nakkanay nətagg-ay fəl ad nəgrəw alak wa wər nəxəşšəd. ²⁶ Adi a fəl ozala nak, əzzillaɣa s adag wa n təzərəst; aheɣ šaşšelan n awedan ihakkin imankasan wər nəsəsikəy. ²⁷ Zaɣazzab taɣəssa-nin wəllen, əgeq-qat taklit-in, fəl ad wər əgməda tammazaga, aqqama wər əgrewaɣ alak, nak wa immâlan Əlinjil y aytedan.

10

Taryəmt fəl əlxibada n əssənəman

¹ Amaran imədrayan-in, wər arex a dawan-ijhâl âs, imarawan-nana as d-əgmadan akal ən Masar ketnasan tollây dännəg-san tagarak, ketnasan dəx as ərdağan dəx agaraw; ² iha awen šaššəlan n âs, ətiwasalməğan ketnasan dəx tagarak ten d agaraw wen fəl aššaddat ən tassaq ta əgan d ənnəbi Musa. ³ Ketnasan dəx ətšân amensay wa fall-asan d-izazzabbat Məššina dəx jənnawan; ⁴ əšwân dəx ketnasan dəx aman win dasan-d-ikkas Məššina. Aman win, əngâyan-du dəx təhunt a dər-san təddewat ta tan-ikfa Məššina, amaran təhunt ta, Əlməsix a tat-imosan. ⁵ Mišan harkid awen, taššam-nasan wər təgrez i Məššina. Adi a fəl wazawaznat təxəswen-nasan dəx taneray.

⁶ Amaran aratan win, əgân əmosan-anax almasal fəl ad nənkəd, naqqam wər nəsaddaran igi ən talbast ta əgan. ⁷ Ad wər təqqəlam aytedan əxbâdnen əssənəman, awa əgan wiyyad dəx-san; id iktâb as: «Təqqim tamattay, tətša, təšwa təzzar təbdad, təggaz tara ən man-net.» ⁸ Ad wər nətaggu dəx əzzəna, šilan awa əgan wiyyad dəx-san, təzzar ihlak dəx-san Məššina sanatat təmərwen n əgim əd karad dəx əzəl iyyanda; ⁹ wala nagu tənagmayt y Əlməsix awa das-əgan wiyyad dəx-san, təzzar a tan-əddadnat taššolen, itiba-tan. ¹⁰ Wala dəx təgətəntənam awa əgan wiyyad dəx-san, təzzar ihlak-kan angalos wa n ənabaz ən man. ¹¹ Amaran awen kul igraw-tan fəl ad iqqəl almasal y aytedan, amaran itawaktab fəl a das-nənkəd nakkanay win fəl du-tosa təzərəst n əddənet. ¹² Dəx adi awedan wa xur illa as ənta ikna tebadday, inkədet ad wər ifətəqqət. ¹³ Ətəwəjərrab təgam kul əgân-tu datwan aytedan; amaran Məššina wər d itəqqəl dəx allaman wa kawan-iga, wər z'ardu itəwəgg-awan ətəwəjərrab as wər təfregam. Amaran as tətawajərrabam, a kawan-akfu fərregat ən zəmmerat y-as, ar-awan tarrayt n ədərrəg y-as.

¹⁴ Dəx adi, imaran-in, darragat y əlxibada n əssənəman. ¹⁵ Awal wa itaggu awedan y aytedan əlânen tayttay a dawan-tagga, ənzərat dəx-as kawanay iman-nawan ad tənəyam tidət-net. ¹⁶ Takabart n albaraka ta nətigudəy i Məššina, as dəx-as nəšwa, awak wərgəx tadrəwt a nəga əddi azni n Əlməsix wa inxalan as t-aba? Tagəlla za ta nətuzan gar-ena! As tat-nətša, awak wərgəx tadrəwt a nəga əddi təxəssa n Əlməsix? ¹⁷ Id tagəlla iyyadda a imos Əlməsix, nakkanay dəx harkid igət-nana təxəssa iyyadda a nəmos fəlas ketnana nədrâw tagəlla iyyadda ta. ¹⁸ Ənəyat šikutawen šin taggin Kəl-İsrayil! Ak wərgəx aytedan

win tanat-tagginen tattin-tanat əddêwan day əlğibada wa taggin i Məşşina day adag wa day taqqadnat təkutawennasan? ¹⁹ Awak mas gammayağ əd tənna-net da? Adis tənna a tagga əssənəm madex imensewan tiwakfanen y əssənəm əmosan arat? ²⁰ Kala kala! A ganna, şikutawen şin di taggin aytedan win n aljahilan almağna aytedan wər nəmos Kəl-Əlyəhud, kələsuf as tanat-əkkâtan werge Məşşina. Amaran, wər arey ad tədrəwam arat waliyyan d aljaynan. ²¹ Wər təfregam ad təsassim day takabart ta kawan-du-təsaktit tanağla ta iga Ƴaysa azni-net fall-awan, təsassim dex day takabart ta day sassin aytedan win əxbadnen kələsuf. Wər təfregam ad tədarrawam tagəlla ta kawan-du-təsaktit tehakkay ta iga Ƴaysa tağəssa-net fall-awan, tədarrawam dex tagəlla ta tattin nəxbidan ən kələsuf. ²² Məy tara a nəga ad nəssənkər şismiten day Əməli? Awak norn-ay?

²³ Təgannim: «arat kul i xalalan», mişan wərgex arat kul təh-ay tənfa. Təgannim dex: «arat kul i xalalan», mişan werge arat kul işatu awedan. ²⁴ A tu-wər-iməl waliyyan day-wan igammayan tənfa ta n man-net ənta ɣas, kalar igməyet awa z'anfin imahharagan-net. ²⁵ Isan kul win nazzinen day əssuk, təlâm tarrayt n a tan-tazzanzim, tatşim-tan, da wər təssəstanam d iguz wa d-əgan, ²⁶ id ənnan Əlkəttaban: *Amađal d awa t-ihan ketnet in Əməli.* ²⁷ As day-wan igmay awedan wər nəzzəgzan s Əlməsix a t-in-tasim, təzzar tərđam as, amensay kul wa issənsa dat-wan, atşat-tu da wər təssəstanam d iguz wa d-iga. ²⁸ Mişan as dawan-inna awedan: «Amensay di itiwakat y əssənəm», wədi a tu-wər-tatşim fəl əddəlil n awedan wa dawan-innan adi, d əddəlil n iduf wa iga. ²⁹ Wər gənnə y iduf wa təgam day amensay di kawanay iman-nawan, kalar iduf wa day-as iga awedan wa hadan as ganna. Amaran mafel as di-igaddal iduf n awedan iyyan, igi n arat as ələx tarrayt n igi-net? ³⁰ Kud amensay wa tatta har təgğodayağ i Məşşina as təgğazağ şin tattay, mafel as di-ilayyan awedan fəl as t-ətşex?

³¹ Day adi, gər za tettay a tətəggim wala təsassim, a iqqal arat wa tətəggim, agiwat-tu fəl ədkul ən Məşşina. ³² Ad wər təqqəlam təsənkəft y awedan waliyyan, gər za Kəl-Əlyəhud wala aytedan win tan-wər-nəmos wala dex aytedan n Əlkənisat ən Məşşina. ³³ Agat awa tagga; nak a igammayan d ad əgrəzağ y awedan kul day arat kul; wər gəmməya tənfa i man-nin, kalar tənfa y aytedan aggotnen a gammaya fəl ad əgrəwan əlyillas ɣur Məşşina.

11

¹ Ǝqqəlat aytedan a di-əttılalnen s əmmək was əttələla nak da Ǝlməsix.

Ǝlyibada ən Məşşina daƣ Ǝlkənisat

Awa iwaran meddan əd tədoden daƣ Ǝlkənisat

² Ǝmmâlaq-qawan imədrayan-in fəl təkatawt ta di-du-tətaggim daƣ arat kul d iduf wa təgam alƣadaten s əmmək was dawan-tanat-əssəbdada. ³ Mişan areƣ ad təssənam as, aləs kul, Ǝlməsix a imosan eƣaf-net; tantut, aləs a imosan eƣaf-net; Ǝlməsix, Məşşina a imosan eƣaf-net. ⁴ Amaran id iggaz aləs şin əlyibada ən Məşşina daƣ Ǝlkənisat itattar madeƣ igraw emel y aytedan isalan a fall-as d-izizabbat Məşşina, issilsa eƣaf-net, wədi izabaz wa das-imosan eƣaf təkarakit. ⁵ Eges tantut kul ta tətattarat madeƣ təgrâw emel y aytedan isalan a fall-as d-izizabbat Məşşina, wər təssəwar aƣaf-net, daƣ Ǝlkənisat, tədi təzabaz wa das-imosan eƣaf təkarakit, şilat n as təsitabalbal. ⁶ Tantut ta wər nəşewir eƣaf-net, tədi təfnəzet anzadan-net! Mişan dad imos i təntut təkarakit afanaz n anzadan madeƣ əsəttəbəlbal, wədi təssəwəret eƣaf-net! ⁷ Aləs ənta wər t-ilzem ad assalsu eƣaf-net id Məşşina a t-id-ixlakan əş şaşşelan-net, ikf-ay tanaya şilat ən ta-net; mişan tantut ənta, saƣmar n aləs a təmos. ⁸ Fəlas wərgə aləs a d-ixlak Məşşina daƣ təntut, kalar tantut a d-ixlak Məşşina daƣ aləs. ⁹ Wərgəƣ deƣ aləs a d-itawaxlakan fəl əddəlil ən təntut, kalar tantut a du-tətawaxlakat fəl əddəlil n aləs. ¹⁰ Adi a fəl ilzam tantut ad iwâr asannal ən taƣmar eƣaf-net, fəl udəm n angalosan. ¹¹ Mişan ya dat Ǝməli, aləs harkid təntut, akkiyyan iqqân daƣ wa hadan; ¹² fəlas kud imos as tantut, aləs a du-təgmad, da aləs, tantut a d-igmad, amaran arat kul Məşşina a d-ifal. ¹³ Kawanay iman-nawan ma tənnam: Awak ihôr ad tətattar təntut əş Məşşina daƣ aljamayət n əlməsixitan wər təssəwar? ¹⁴ Awak wərgəƣ əttəbiyāt-nawan iman-net, təssosan-kawan as igi ən jəkkad imos təkarakit fəl aləs? ¹⁵ Mişan tantut ənta, ijəkkad almaqam a tat-hakkin? Id Məşşina a das-tan-ikfan y assatar n aƣaf-net. ¹⁶ Kud ill-ay awedan amaran irân ad ammazay adi, issenet as: Gər za nakkanay wala Ǝlkənisaten ən Məşşina, wər nəla iyyat alƣadat wər nəmos tədi.

Imensewan win saktan n Ǝməli

Şisəssukay şin tawagğanen alwaq wa n mensewan win saktan n Ǝməli

¹⁷ Amaran ammaran win dawan-tagga da, wər əmosan eməlan-nawan, id imənəyan-nawan win əlyibada wərgəƣ

əšitəy a kawan-taggin, kalar ələqqam a kawan-suğulan. ¹⁸ Fəlas arat wa azzaran, wa sər-wan əsleḡ âs, id təmmənay aljamaḡat n Əlkənisat-nawan y əlḡibada, ad təqqəlam šizunawen; amaran wər aba a əzzigzanax daḡ batu di. ¹⁹ Mišan ya əššil ad təqqəlam šizunawen fəl a daḡ-wan təwənəyan win əhornen d ətəwəsəḡmər, wərgəḡ? ²⁰ Daḡ adi əmənəy wa tətəggim, wər tu-tətəggim y ad tədrəwam imensewan win saktan n Əməli Ḡaysa. ²¹ Fəlas as təggazam šin tattay, akkiyyan daḡ-wan ad ihəz daḡ amensay wa d-eway atš-ay, ayyu əmidi-net; iqqəl âs, wiyyad daḡ-wan za ih-en gələk, amaran win hadatnen isimaswad-tan esmad. ²² Awak inan a wər təlem a daḡ tətšam, tašwim? Məḡ məlka a təgam Əlkənisat ən Məššina, təzabazam təkarakit win daḡ-as wər nəla arat? Ma dawan-z-anna za? A təram a dawan-aga təmmalen olaḡnen fəl as təgam adi? Wala ənəmihaz!

Imensewan win saktan n Əməli

²³ Fəlas nak iman-in alyadat ta di-d-oyya Əməli iman-net a dawan-d-oyyex, a tat-imosan as: Ahad wa daḡ z'itəwəḡḡu Əməli Ḡaysa daḡ fassan, idkal tagəlla, ²⁴ iga igodan i Məššina, təzzar irz-et, inna: «Təḡəssa-nin adi, [tətiwarzat] fəl əddəlil-nawan. Taggat awa da əs təməwit ta da, imos adi isaktan-in.» ²⁵ Zund əmmək en da âs, as ətšan, idkal təkabart, inn-asan: «Təkabart ta, arkawal wa aynayan ən tassaḡ a təmos gər Məššina əd tamattay-net. Arkawal wa, azni-nin a t-isattaddan. I daḡ-as təšwam, tagim adi isaktan-in.» ²⁶ Fəlas id tətšam tagəlla ta, təšwam deḡ daḡ təkabart ta, wədi isalan ən tamattant n Əməli Ḡaysa a tətəggim, har əzəl wa du-z-iqqəl.

Təttay ən mensewan win saktan n Əməli əs təməwit toḡadat

²⁷ Awen daḡ a fəlas, i itšan tagəlla ta təmosat isaktan ən təḡəssa n Əməli Ḡaysa, madəḡ iga daḡ təkabart ta təmosat isaktan n əzni-net tessay təgat s iba n safrar, wədi ibbikkad təḡəssa n Əməli Ḡaysa d əzni-net, amaran ad t-ibəz əššəriḡa s adi. ²⁸ Daḡ adi akk awedan aššəḡḡaret iman-net təzzar, alwaḡ wədi amaran atšu tagəlla ta, ašəw daḡ təkabart ta; ²⁹ fəlas awedan wa itšan tagəlla ta, madəḡ išwa daḡ təkabart ta, wər igra arat wa idraw adi əd təḡəssa n Əlməsix Ḡaysa, wədi awedan izzibaz iman-net əššəriḡa ən Məššina. ³⁰ Adi a fəl kawan-əhan aytedan aggotnen ən nərkam əd wiyyad aggotnen ən miranan, aba daḡ-wan fadda wiyyad. ³¹ Ənnar nazzâr əs šəḡḡara ən man-nana, wər dana-z-ibəz əššəriḡa. ³² Dər iga awen da ya, Məššina

itâbaz-ana s əşşəriya fəl a danaɣ-aɣəd, naqqam wər danaɣ-issərtay d əddənet daɣ əşşəriya wa ilkaman. ³³ Daɣ adi imədrayan-in, id təddewam y ad tədrəwam imensewan, ad tətəqqalam i mədrayan-nawan! ^{34a} Kud iyyan daɣ-wan ih-ay gələk, atšet daɣ ahan-net təzzar, fəl ad wər iqqəl əməney-nawan arat a sər-wan du-z-awəyan a kawan-abəz əşşəriya.

^{34b} Amaran daɣ batu ta təqqalat šiɣawšiwən šin hadat-nen, as din-oseɣ a tanat-akna.

12

Šihakkuten šin itaggu Infas wa Zəddigan

¹ Amaran imədrayan-in, daɣ batu ən təmətəkwəyen šin ihakku Infas wa Zəddigan, wər areɣ a daɣ-asnat təjhâlam.

² Təssânam as dat iguz-nawan tarrayt ta n Məşşina, aytedan a təmosam əxrâknən, əlkâmnen y əssənəman wər nəšiwil.

³ Awen da fəl areɣ ad təssənəm as, wər t-illa awedan a daɣ innoda Infas ən Məşşina a du-z-inkəran ad igannu:

«Məşşina təlyâna Ƴaysa!» wala deɣ ill-ay awedan ifrâgan ad annu:

«Ƴaysa imos Əməli!» ar s a daɣ-as innoda Infas wa Zəddigan.

⁴ Amaran šihakkuten əzzənəfan a əmosnat, mišan Infas iyyanda ɣas, a t-imosan Infas wa Zəddigan ən Məşşina s ənta a tanat-ihakkin ketnasnat.

⁵ Tarrayen n əşşəxəl əzzənəfan a əmosnat, mišan Əməli di n iyyan as nəşxal.

⁶ Igitan əzzənəfan a əmosan, mišan Məşşina di n iyyan a ihakkin aytedan kul masnat n igitan kul win taggin.

⁷ Akk ənalkim igrâw ɣur Infas wa Zəddigan təhəkkut a tu-təssifragat əşşəxəl imosan tənfa-nana ketnana.

⁸ Awedan za iyyan ihakk-ay Infas wa Zəddigan igi ən batuten ən təla n əgərri, iyyan amaran ihakk-ay Infas igi ən batuten ən masnat.

⁹ Iyyan ihakk-ay Infas wa Zəddigan əzəgzan, iyyan ihakk-ay fərregat n əzuzəy ən miranan,

¹⁰ iyyan ihakk-ay fərregat n igi ən təlməxjujaten, iyyan igrâw emel y aytedan isalan win fall-as d-izazabbat Məşşina, iyyan ihakk-ay fərregat ən zələy gər təhəkkut ta n Infas wa Zəddigan

əd ta tat-wər-nəmos. Iyyan ihakk-ay fərregat n işšiwəl n awalan wər nətawazday, iyyan ihakk-ay əfəssər n awalan win di;

¹¹ mišan Infas wa Zəddigan wa da a itaggin aratan di ketnasan, akk awedan ihakk-ay təhəkkut ta das-ira.

Tayəssa əd təsəllad-net aggotnen

¹² Ənəyat tišit ta təga təyəssa n awedan arat iyyanda igân daɣ təsəllad əknanen igət, eges harkid igət-nasnat, tayəssa iyyadda a əmosnat. Awen da za a əgan aytedan

win əlkamnen y Əlməsix, s əntanay a əmosnen tağəssa-net. ¹³ Fəlas gər za nəmos Kəl-Əlyəhud wala aytedan win wər tan-nəmos, gər za nəmos eklan wala illalan, Infas wa Zəddigan wədi da, a dağ nətawasalmağ ketnana, nəqqal tağəssa iyyadda. Ketnana değ Infas wa Zəddigan wədi da, a idnayan iwallan-nana. ¹⁴ Amaran tağəssa wər təga dağ təslət iyyadda, kalar şisəllad aggotnen a dağ təga. ¹⁵ As d-iggad adar inna: «Nak wər di-təla tağəssa id wər əmosağ əfus.» Awak ikkâs-tu awen dağ tişit n iyyat dağ təsəllad ən tağəssa? ¹⁶ As tənna təməzzuk: «Nak wər di-təla tağəssa, id wər əmosağ şat.» Awak ikkâs-tat awen dağ tişit n iyyat dağ təsəllad ən tağəssa? ¹⁷ As təqqal tağəssa ketnet şat, mas z'aslu awedan? As təqqal tağəssa ketnet təməzzuk, mas z'iwət awedan ađu? ¹⁸ Kalar Məşşina a igan şisəllad dağ tağəssa, akkiyyat ig-et dağ adag was ira. ¹⁹ As imos as tağəssa ketnet taslət iyyadda a təmos, wədi ma z'iqqəlan tağəssa? ²⁰ Kalar şisəllad əknanen igət a t-əllanen, mişan tağəssa ənta iyyadda. ²¹ Awen dağ a fəl wər təfreg şat ad tannu y əfus: «nak wər sər-ək əddərar», wala değ annu ağaf i daran: «nak wər sər-wan əddərar.» ²² Fadda şisəllad ən tağəswen-nana şin n as nəga iduf n as ərkamnat, əntanatay a dana-təha tənfa wəllen. ²³ Amaran şin di as ħur-nağ iga as wər farornat, əntanatay a nəssəğmar wəllen. Dağ adi, şisəllad-nana şin əmosnen izuf, əntanatay a nəkannu assatar. ²⁴ Şin wər nəmos izuf amaran, əntanatay wər əddərarnat s assatar. Məşşina iman-net a d-ixlakan tağəssa tosâğ, ig-as təməwit a fəl tawasaymarnat təsəllad-net, wəllen şin əddərarnen s adi, ²⁵ fəl ad wər təzun tağəssa gar-es, kalar əkkulluk ən təslət ad təssən dağ təmidit-net. ²⁶ Awen dağ a fəlas, as təlaggay iyyat dağ təsəllad ən tağəssa, şisəllad kul şin hadatnen əntanay da, ad laggaynat. As tətawazazwar değ iyyat dağ təsəllad, şisəllad kul şin hadatnen ad fəliwəsnat. ²⁷ Kawanay tağəssa n Əlməsix a təmosam, amaran akkiyyan dağ-wan taslət ən tağəssa-net a imos. ²⁸ Adi a fəlas Əlkənisat, dağ tizarat iga dağ-as Məşşina inəmmuzal, dəffər-san ənnəbitan; dəffər ənnəbitan, əlfəqqitan; dəffər adi aytedan win əlanen fərregat n igi ən təlməğjujaten, əlkaman-asan win ikfa fərregat n əzuzəy ən təwərnawen, əd win tilalnen y aytedan, əd win ikfa fərregat ən tizart y aytedan, əd win ikfa fərregat n əşiwəl n awalan wər nətawazday. ²⁹ Awak ketnasan as əmosan inəmmuzal? Awak ketnasan as əmosan ənnəbitan? Awak ketnasan as əmosan əlfəqqitan? Awak ketnasan as əğrawan fərregat n igi ən təlməğjujaten? ³⁰ Madəğ əğrāwan fərregat n əzuzəy

ən təwərnawen, meɣ fərregat n awalan wər nətawazday, meɣ fərregat n əfəssər-nasan? Wala ənami haz!

Tara: Tarrayt ta n tidət

³¹ Daɣ adi səddirənat s əlluɣ agaraw ən təhəkkuten šin ofanen! Amaran a kawan-assakna əmərədda tarrayt ta tofat tarrayen kul.

13

¹ Kud əššewalaɣ awalan n aytedan harkid win angalosan da, as di-wər-təha tara, wər izlay awal-in d əməsli n anayna madeɣ əməsli n əylal ən təzoli itatawatan. ² Kud əgrāwa təhəkkut n amel ən salan a d-izizabbat Məššina, wala əgrāwa əssiran kul əd masnat kul, wala ələɣ əzəgzan ikmālan a di-issifragan əsəggəli n ədɣayan, da, as di-wər-təha tara, wər əmosaɣ wala. ³ Kud əzuna təla-nin kul i tələqqawen, əskataɣ iman-in y əlyibada ən Məššina har ɣur-i iməl as ogaray aytedan, da, as di-wər-təha tara wər di-z-anfu adi əs wala.

⁴ Awedan wa taha tara, təh-ay təzaydart, olâɣ; wər izway y awedan waliyyan, wər itaggu ibaragan, wər idkel iman-net dännəg aytedan. ⁵ Awedan taha tara wər itəggu əmazal n iba ən təkarakit, wər igəmməy awa tu-z-anfin ənta ɣas, wər rəxis alham-net, wər itəttəf daɣ man ark amazal a das-iga awedan; ⁶ wər t-isədəwit arat wər noyed, kalar tidət a tu-təsadawet. ⁷ Faw izizaydar, faw izzigzan, faw igâ attama, izmâr y arat kul. ⁸ Tara, wər das-ilkem ad təɣrâd, təhəkkut n amel ən salan a d-izizabbat Məššina ilkâm a tu-wər-təlla, ta n əšiwəl n awalan wər nətawazday ad tərəz, ta n masnat ənta da ilkâm a tu-wər-təlla; ⁹ fəlas masnat-nana wər tənda, emel-nana isalan win d-izizabbat Məššina deɣ wər inda.

¹⁰ Mišan as du-tosa alkamalat, awa wər nəkməl ad iba tamayyamat-net. ¹¹ Harwa əmosa barar, awal ən barar a taggaɣ, taggaɣ imedranan win barar, ələɣ tayttay ta n barar; mišan as əqqalaɣ aləs, oyyeɣ-in aratan win barar dəffər-i. ¹² Əmərədda nəhannay as, masnat-nana, wala ad təggət, wər təmos wala dəgma n ta təlkamat; izlay-tanat awa izlayan anay n awedan daɣ šišset d anay-net udəm s udəm. Əmərədda masnat-in wər təkml, mišan ilkâm ad təkml, tagu alkamalat ta təga təməzdəyt ta di-iga Məššina.

¹³ Amaran əmərədda karad aratan win, a t-əllanen, a tan-imosan: əzəgzan d attama əd tara; mišan wa tan-ogaran tara.

14

Šihəkkuten šin Infas wa Zəddigan d akaras n Əlkənisat

1 Ǝgməyat za ad təqqəlam aytedan taha tara; təsəddirənam wəllen agaraw ən mazalan win ihakku Infas wa Zəddigan, wəllen emel ən salan win d-izizabbat Məššina. 2 Fəlas awedan wa ifragan əššiwəl n awalan wər nətawazday, Məššina as iššewal wərgex aytedan; id wər t-illa awedan igrân əssiran win as t-ikfa Infas wa Zəddigan emel-nasan. 3 Mišan awedan wa igrawan emel ən salan a fall-as d-izizabbat Məššina wədi aytedan as išawal, isisuhit əzəgzan-nasan, isasmad iwallan-nasan, italam-asan fəl man. 4 Awedan wa iššewalan awalan wər nətawazday, əzəgzan wa-net ɣas a isisuhit s adi, mišan awedan wa igrawan emel ən salan a d-izizabbat Məššina wədi Ǝlkənisat ketnet as isisuhit əzəgzan-net. 5 Nak arex ad təššiwəlam ketnawan awalan wər nətawazday, mišan awa dawan-əssofax, ad təgrəwam təhəkkut n amel ən salan win d-izizabbat Məššina. Awedan wa igrawan emel ən salan a d-izizabbat Məššina, ogar wa igrawan fərregat n əšiwəl n awalan wər nətawazday, ar s ad imos as ifrâg ad itafassar awa igannu fəl a sər-əs isəssuhət əzəgzan n Ǝlkənisat.

6 Amaran əmərədda, imədrayan-in, nənna masalan oseq-qawan-in əššewalax awalan wər nətawazday, awak mas kawan-z-anfu adi? Mišan as kawan-in-osex əmalax-awan arat isinafalal Məššina, madex əššita masnat ta təlam, madex agax-awan batu a fall-i d-izizabbat Məššina madex əsassaɣraq-qawan təssunt a du-təgmâdat Ǝlinjil, wərgex a kawan-anfu adi? 7 Wala aratan win as tawaggin səwat, nənna masalan təsənsəq madex təhərdant da, as wər əgen ewet olāxan, manəmmək as z'izləy awedan aggay wa əgan? 8 Esək dex wa itawansaɣan y ad səmmutəgan aytedan y əməgər, as das-wər-itawagga anasaɣ wa itawassanan, ma z'isəmmutəgan y əməgər? 9 Kawanay da za, awen da: as təššewalam wər tələffədam s əlxərəfan as itiwassan almaɣna-nasan, man əmmək as z'issən awedan waliyyan awa təgannim? Zun təššewalam dax aɗu! 10 Igmâd aššak âs, əzzənəfan n awalan aggotnen a əhanen əddənət; mišan wər tan-iha is wərgex ila almaɣna. 11 Amaran as wər əssenax iyyan dax-san, ad əqqələx s awedan wa t-iššewalan awedan ən tama, iqqəl-tu sər-i nak da. 12 Dax adi kawanay da, dad zamas təsidarānam wəllen agaraw ən təmətəkwayen šin ihakku Infas wa Zəddigan, adi za, əşxəlat dax agamay ən šin za səssuhətne əzəgzan n Ǝlkənisat.

13 Awen da a fəlas awedan wa iššewalan awalan wər nətawazday, igməyet dax Məššina ad t-akfu fərregat n əfəssər-nasan. 14 Fəlas as imos as tattara dax awalan wər

nətawazday, iman-in ƣas a tattarnen, tayttay-in ənta, wər təşxəl daƣ təwatriwen šin tagga. ¹⁵ Daƣ adi ma z'aga? Adi za, ad əttəraƣ daƣ man-in, əttəra deƣ əs tayttay-in daƣ awal isisagran; agaƣ tagaytalt əs man-in, agaƣ-qat deƣ əs tayttay-in daƣ awal isisagran. ¹⁶ As wər iga adi, as iqqal əs tətaggay igodan i Məššina əs man-nak ƣas, daƣ awalan wər nətawazday, awak awedan wa tu-wər-nəssen, wa dak-issəsəman daƣ Əlkənisat, manəmmək as z'annu i təwatray-nak: «Amin!», ənta wər issen awa təganna? ¹⁷ Illikan as igodan-nak i Məššina hossayan, mišan wər isassahat adi əzəƣzan n aytedan win dak-əssəsəmnen id wər əssenən awa təganna. ¹⁸ Nak tigudəyaƣ i Məššina as kawan-ogara ketnawan awal daƣ awalan wər nətawazday! ¹⁹ Mišan as aheƣ Əlkənisat, əssofaƣ igi ən wala ƣas səmmos əlxərəfan a za tawagrinen y ad əzzəbəzaƣ aytedan alfaydat, igi ən maraw gim n əlxərəf daƣ awalan wər nətawazday.

²⁰ Imədrayan-in, ušarat, tammazzayam əd tišit ən bararan! Tidət as, daƣ awa iqqalan igi ən təllabəst, əqqələt šilat ən bararan; mišan daƣ awa iqqalan əgərri n aratan win, əqqələt aytedan əkmâlnen. ²¹ Ennan Əlkəttaban: «Inna Əməli: "Tamattay ta, a das-əššiwələƣ daƣ awal wər təssen, igməd-du sər-san awal wen imawan ən naftaƣan, mišan harkid awen wər di-z-abbardagan."» ²² Adi a fəlas, əšiwəl n awalan wər nətawazday, asannal n əššəriƣa ən Məššina a imos y aytedan win wər nəzzəƣzan, wərge win əzzəƣzannen; as iga awen, awedan wa ikfa Məššina emel ən salan a d-izizabbat Məššina, wədi isalan win itaggu, asannal n arraxmat a mosan y aytedan win əzzəƣzannen, wərge win wər nəzzəƣzan. ²³ Nənnə masalan Əlkənisat ketnet a təddewat daƣ adag iyyanda, təzzar əššewalan ketnasan awal wər nətawazday, har tan-d-osan aytedan wər nəgra awa imos awen, madəƣ aytedan wər nəzzəƣzan, wərgeƣ ad annin əmməskəl a əgan? ²⁴ Mišan as imos as ketnasan əmmâlan awal imosan emel ən salan a d-izizabbat Məššina har tan-d-osa awedan wər nəzzəƣzan, madəƣ iyyan wər əhen isalan n awen, ad t-əssusənan awal kul win as isallu əddi as igâ ibakkadan, issən deƣ as ad t-ibəz əššəriƣa ən Məššina; ²⁵ ənta da affaggin aratan kul win əhanen əwəl n awedan wen, təzzar issəjəd i Məššina, iƣbəd-tu, annu: «Tidət as illa Məššina gar-ewwan!»

Ənnizam daƣ alwaq wa n əlƣibada

²⁶ Daƣ adi, imədrayan-in, mas imməkkan a tu-tagim? Adi za as təmmənayam daƣ adag iyyanda, wiyyad daƣ-wan aginet šigaytalen, wiyyad sassaxrinet aytedan, wiyyad əməlanet awa dasan-isannafalal Məššina, wiyyad

əşšiwəlanet awalan wər nətawazday, wiyyad affassaranetan. Ǝqqəlanet aratan win di kul, arat a z'isəssuhen əzəgzan-nawan. ²⁷ Kud wiyyad daɣ-wan a şawalnen awalan wər nətawazday, ad wər akəyan əşšin aytedan madeɣ karad. Ǝşšiwəlanet s iyyan iyyan, amaran iməltu awedan iffəssaran awa gannin. ²⁸ Kud wər tilla awedan a t-iffəssaran, affastinet, ad wər əşšiwəlan daɣ Ǝlkənisat, əşšiwəlanet daɣ man-nasan gar-essan əd Məşšina. ²⁹ Amaran win əmosnen ənnəbitan, əşšiwəlanet daɣ-san əşšin madeɣ karad, təzzar aşşaggaran aytedan win hadatnen n Ǝlkənisat awal wa d-izzəbben da. ³⁰ Mişan as d-isanafalal Məşšina awal y iyyan awedan iqqiman den, awedan wa išşewalan, affastet i wədi. ³¹ Daɣ adi ketnawan təfrəgam ad təmməlam s iyyan iyyan isalan win d-izazabbat Məşšina y aytedan, y ad təsassaɣrim inalkiman kul, taknim-asan iman ketnasan. ³² Təhəkkut n amel ən salan a d-izizabbat Məşšina, immikkan as innōda daɣ-as awedan wa tat-igrawan. ³³ Fəlas Məşšina wər ira tanajarwayat, kalar ənnizam olāɣan a ira, d alxer, şilat n awa igan daɣ Ǝlkənisaten ketnasnat, əmosnen tamattay zəddigat ən Məşšina. ³⁴ Ad wər şawalnət tədoden daɣ mənəyan win Ǝlkənisat, fəlas wər əlenat turagat n awen. Kalar abbardagnatet, id adi da as inna Ǝttawret ad t-aginət. ³⁵ Kud ill-ay arat as ərānat a daɣ-as əssənnat, əssəstannatet meddan-nasnat daɣ aɣaywan; fəlas təkarakit a imos fəl təntut ad təşšiwəl daɣ əmənəy n Ǝlkənisat. ³⁶ Awak təɣilt a təgam awal ən Məşšina kawanay a d-igmad? Meɣ təɣilt a təgam kawanay ɣas a t-iqbalan? ³⁷ Awedan wa daɣ-wan igan iduf n as ənta ənnəbi a imos, madeɣ innoda daɣ-as Infas wa Zəddigan, agret s əlluɣ əs aratan win dawan-kattaba da, alwajib n Ǝməli a əmosan. ³⁸ Amaran awedan wa wər nəssəfrar adi, wədi ənta da wər tu-zissəfrər Məşšina. ³⁹ Daɣ adi imədrayan-in, səddirənat wəllen agaraw ən təhəkkut n amel ən salan win d-izazabbat Məşšina; mişan ad wər təgdəlam əşiwəl n awalan win wər nətawazday. ⁴⁰ Adi kul agiwat-tu daɣ əzzəbun d ənnizam.

Tanakra ən Ǝaysa daɣ tamattant

15

Isalan ən tanakra ən Ǝaysa daɣ tamattant

¹ Imədrayan-in, əmərədda a kawan-d-assaktaɣ Ǝlinjil was dawan-əgeɣ isalan-net, təzzəgzanam sər-əs, təlkamam-as s əlluɣ; ² Ǝlinjil di da a kawan-igan daɣ tarrayt n əlɣillas, kud təttāfam-tu s əlluɣ s əmmək was dawan-t-əmala. As das-wər-təgem adi, əzəgzan ən bannan a təgam. ³ Fəlas

isalan win əgrawa nak iman-in a dawan-əgeç, amaran isalan win di, eçaf-nasan as, Elməsix, aba-tu fəl əddəlil ən bakkadan-nana, imos as adi da ənnan Elkəttaban. ⁴ Ənnan deç Elkəttaban, tətawagga taçəssa-net daç təzəkka, as əzəl-net wa n karad d iba, itawasankar-du daç tamattant. ⁵ Inafalal-du i Butros, amaran inafalal i nəttulab-net win maraw d əşšin. ⁶ Dəffər adi inafalal i tiddawat ən nalkiman togarat səmmosat təmad n awedan, arat daç-san aba-tu mişan taşşam-nasan harwada təddâr. ⁷ Dəffər adi amaran inafalal i Yaçub, dəffər adi inafalal i nəmmuzal kul. ⁸ Dəffər-san ketnasan a di-inafalal nak da Buləs, nak ihân əlmital ən barar a d-ihəwan dəffər as okay alwaç ən təhəwt-net. ⁹ Fəlas nak inəmmuzal kul ogaran-i, wər əweda fadda a di-itəwənnu anammazul, id kala ad əssəknay aytedan win Elkənisat ən Məşşina arkanay. ¹⁰ A iqqal awa əmosa, dâ, əmosaq-qu s arraxmat ən Məşşina, amaran arraxmat ta di-ikfa, wər təbbənnan; fəlas ogaraç inəmmuzal kul əşşəçəl, mişan ya wərgəç nak a iğan adi, kalar arraxmat ən Məşşina a daç-i təşçalat. ¹¹ Adi a fəlas, gər za nak, wala deç inəmmuzal win hadatnen, isalan win di a nətaggu, amaran əntanay a təzzəçzanam.

Tanakra ən nəmməttan

¹² Amaran dad gannin salan win nətaggu, Elməsix inkar-du daç tamattant, manəmmək as gannin wiyyad daç-wan, inəmməttan wər daç-san təlkem tanakra daç tamattant? ¹³ Kud tidət a imos as inəmməttan wər daç-san təlkem tanakra, wədi Elməsix da, wər d-itawasankar daç tamattant! ¹⁴ Amaran kud Elməsix wər d-itawasankar daç tamattant, adi za təlxutbaten-nana wər əlenat tənfa waliyyat, əzəçzan-nawan sər-əsnat deç wər ila tənfa waliyyat! ¹⁵ Amaran arat wədi as iga, nakkanay nəqqal şigəyyawen ən bahu id nətagayyat âs Məşşina issinkar-du Elməsix daç tamattant; ənta adi wər z'agu as wər təlkem tanakra daç tamattant, ¹⁶ fəlas ənnar imos as inəmməttan wər du-za-təwəsənkəran daç tamattant, adi za Elməsix da, wər d-itawasankar daç tamattant. ¹⁷ Amaran kud Elməsix wər d-itawasankar daç tamattant, adi za əzəçzan-nawan wər infa wala, amaran əwâran-kawan bakkadan-nawan; ¹⁸ aytedan deç win aba əzzigzanan s Elməsix, əntanay da wər dasan-t-illa attama waliyyan âr wa n əhluk. ¹⁹ Kud nakkanay attama-nana daç Elməsix wər okay əddənet ta da ças, adi za wər t-illa awedan daç əddənet wər noçer təla ən təhanint.

²⁰ Kalar tidət daç a imos as Elməsix itiwəsankar-du daç tamattant. Ənta a d-azzaran tanakra, imos awen arat isitaddan as aytedan win aba əzzigzanan sər-əs əntanay da

a d-ənkəran day tamattant. ²¹ Id tamattant awedan iyyanda a tat-d-ewayan s əddənet, a t-imosan Adəm; əmmək di da za as tanakra day-as da, tosa-du əs tarrayt n awedan iyyanda, a t-imosan Elməsix. ²² Id aytedan kul a tan-iba fəlas Adəm a d-əgmadan, əmmək di da za as aytedan kul win osaynen d Elməsix, ad əgrəwan təməddurt ta təylalat. ²³ Tanakra day tamattant amaran, təgâ s ənnizam: Elməsix a sər-əs d-azzaran, dəffər adi win sər-əs əzzəgzannen a du-za-təwəsənkənnen yur tawaɣlay-net. ²⁴ Amaran tasa-du təzərəst n əddənet, ijəbbərəjjət Elməsix təmənukəla kul d əlxəkuman kul əd taymaren šin əttənkələn, dəffər adi idkəl taymar akf-et i Məššina di n Abba. ²⁵ Fəlas ilzâm Elməsix ad ittəf taymar har agu Məššina izənga-net kul daw daran-net. ²⁶ Azangaw-net was z'izrəy s ahluk-net, tamattant. ²⁷ Fəlas ənnan Əlkəttaban: «*Iga Məššina aratan kul daw daran-net*», amaran immun as «aratan kul» win as itawanna ad əməlan daw daran-net da, wər tan-ihə Məššina, s ənta iman-net a ikfan Elməsix taymar ta ittaf. ²⁸ Amaran as iga Məššina aratan kul daw daran n Elməsix, alwaq wədi, ad z'agu Barar ənta da, almaɣna Elməsix, iman-net daw əlxəkum ən Məššina wa igan aratan kul daw daran-net fəl ad təkml tizart ən Məššina y arat kul day adag kul.

²⁹ Amaran ənzərat day aytedan win tawasalmaɣan day aman fəl əddəlil ən saymar n aytedan-nasan win aba: Awak ma imos awas əgan attama n agaraw-net day igi n awen? Kud ənta tidət day a imos as, wər tu-təlla tanakra day tamattant, wədi ma fel tawasalmaɣan day aman fəl əddəlil ən saymar n aytedan-nasan win aba? ³⁰ Nakkanay iman-nana za, ma fel akk assayət nəha tazak ən tamattant? ³¹ Akk əzəl təhoz-i-du tamattant! [Imədrayan-nin], arat wədi, ig-as aššak agamad wa iga y əsəbbərəg wa fall-awan tagga fəl əddəlil n awa day-wan iga Əməli-nana Ƴaysa Elməsix. ³² Kud təbəllant ta əgeɣ day əyrəm n Efez, wər nəzlay d aməgər əd wəxsan, wər təga ar fəl ares n əddənet, awak ma di-za-taknu? Kud inəmməttan wər du-za-təwəsənkəran day tamattant, adi za, agatanay awa ənnan aytedan wiyyad as ənnan: «*Natš-et, našwet, fəlas wər day-nay ilkem ar tamattant*» ³³ Ad wər tətəwəsəxrəkam! Fəlas ənnan kəl awal: «*Tidawt d ark aytedan təyaššad alxal olāɣan.*» ³⁴ Təqqəlet-kawan-du tayttay-nawan ta tolaɣat, tammazza-yam d igi ən bakkadan. Fəlas wiyyad day-wan wər əssenən Məššina. Ənnəy adi fəl a kawan-izzəbəz təkarakit.

Tayəssa ta du-tənkərat day tamattant

35 Mišan wər igdel awen ad annin wiyyad daɣ-wan: «Awak inəmməttan, məni təməwit tas du-za-təwəsənkəran? Ma təmos təxəssa ta dər du-za-təwəsənkəran?» 36 Aljahilan! As tənbalam tablalt n amasa, wərgəɣ kundaba təmmut as du-təgammad, təddâr? 37 Amasa deɣ ɣas a tanbalam den, iha mijas in alkama madəɣ tabzəst iyyat, wərgəɣ tasaxtot təxrâdat a tənbalam. 38 Təzzar ikf-ay Məššina təxəssa ta das-ira, əkkulluk n amasa ikf-ay təxəssa ən man-net. 39 Šixəllak wər olenat təxəssa ketnasnat; aytedan zənnit təxəssa ta-nasan, eharay zənnit ta-net, igədad zənnit ta-nasan, kifitan deɣ zənnit ta-nasan. 40 Amaran ijənnawan da, əhân-tan aratan əlânen šixəswen, zund əmmək as, amaɣal əwaran-tu aratan əlânen šixəswen; mišan šihussay n aratan win əhanen ijənnawan wər tola əd təhussay ən win əwarnen amaɣal. 41 Zənnit ənnur wa n təfuk, zənnit wa n təllit, etran deɣ zənnit wa-nasan. Etran iman-nasan, ənnur-nasan əzzənəfan a imos, ənnur n iyyan ogar ənnur wa hadan. 42 Zund əmmək di da a təga tanakra ən nəmməttan. Təxəssa təxaššadat a za tənbelat, tətəwəsənkər-du ta wər nətəməttəy. 43 Təxəssa ta dər inbal awedan, təbrâr; ta dər du-z-inkər təkna šihussay. Təxəssa ta dər inbal awedan, tərkam; ta dər du-z-itəwəsənkər təla tarna. 44 Inbal-in əd təxəssa ta n əddənət, itəwəsənkər-du əd təxəssa ta iha Infas wa Zəddigan. Da tu-təlla təxəssa ta n əddənət, wədi ta n Infas wa Zəddigan da təll-ay. 45 Adi a fəl ənnan Əlkəttaban: «*Adəm a d-azzaran y aytedan s əxluk, imaltu iddâr;*» mišan Adəm wa n əššin s ənta wa ilkaman, a t-imosan Əlməsix, infas a imos, ihakkin təməddurt. 46 Wərgəɣ wa imosan infas a d-azzaran, kalar wa imosan taxlək n əddənət təddârat a d-azzaran, dəffər-əs a d-osa wa imosan infas. 47 Awedan wa d-azzaran, əgodrar a daɣ iga, igmad-du amaɣal; awedan wa n əššin, ənta ijənnawan a d-igmad. 48 Awedan wa igan daɣ əgodrar, awa imos, ənta a əmosan aytedan win əganen daɣ əgodrar; wa d-igmadan ijənnawan, ənta da, awa imos, ənta a əmosan aytedan win jənnawan. 49 Amaran tulat ta nəga d awedan wa igan daɣ əgodrar, ənta a za nagu əd wa d-igmadan ijənnawan.

50 Imədrayan-in, a dawan-gannaɣ, awa igan daɣ şan d əzni, wər z'ilu adagar daɣ Taɣmar ta n Məššina, wala deɣ ilu awa ixaššadan adagar daɣ awa wər nəxəššəd. 51 Səsəmat, a dawan-əmələɣ əssir: Wər dana-z-iba ketnana, mišan dər iga awen da, ketnana as za nətəwəsəmməttəy, 52 fəl arat n amazay, fəl ellaf ən şat, ɣur anasaɣ wa ilkaman n asak. Fəlas ad itəwənsəɣ asak, təzzar təwəsənkəran-du nəmməttan əd təxəswen wər za nələs aɣşud, nakkanaɣ deɣ

nətəwəsəmməttəy. ⁵³ Fəlas tağəssa ta təğaššadat, əššil ad təggəz ta wər nəxəššəd edag-net; ta tətamattit dəx əššil ad təggəz ta wər nətəməttit edag-net. ⁵⁴ As təggəz ta wər nəxəššəd edag ən ta təğaššadat, təggəz dəx təğəssa ta wər nətəməttit edag ən ta tətamattit, əddi amaran ad z'andu awa ənnan Əlkəttaban as ənnan: «*Tamattant tətəlmaz, tətawarna, ab'as tu-təlla.*» ⁵⁵ «*Ya tamattant, ma təga tarnan-nam? Ma iga endal-nam, was təddâgax aytedan tənəqqaq-qan?*» ⁵⁶ Abakkad a imosan endal ən tamattant, abakkad amaran əššərixa wa n Əttawret a imosan assahat-net. ⁵⁷ Mišan agoda i Məššina a danağ-isasarnin abakkad əs tarrayt n Əməli-nana Ƴaysa Əlməsix.

⁵⁸ Dəx adi, imədrayan-in əkney tara, zəzzəwətat dəx əzəgzan-nawan, tazzakkem dəx-as s assahat, ad tətəggim faw s igət əššəxəl olağan wa tətəggim y Əməli, id təssānam as, əššəxəl issohen wa tətəggim y Əməli wər ibbənnan.

Awa d-izdaran dəx širawt ta

16

Širgiten d əššərədan wiyyad n Əlkənisat

Širgiten y Əlkənisat ta n Yerusalam

¹ Dəx batu ta təqqalat širgiten šin tawagginen i mizdagan win Yerusalam, agat kawanay da, arət was omarəx Əlkənisaten šin akal wa n Galatəya. ² Əkkulluk n əzəl wa azzaran dəx əssuk, akkiyyan dəx-wan idkāl dəx awa sər-əs d-iggazan arət was ifrag, ixbər-tu har kawan-in-asa, fəl ad wər iqqəl əšidəw-nawan širgiten y assa-nin. ³ As kawan-in-osex, ad akfa aytedan-nawan win təsannafranam šira a fəl iktâb as aytedan-in a mosan, təzzar əssuqaq-qan Yerusalam ewâyan širgiten-nawan. ⁴ Kud dəx itawanay âs ihôr ad agla nak iman-in, wədi a dər-i idawan.

İşikilan win d-əzaynen

⁵ Kundaba əmmərəx akal wa n Masedonəya as kawan-in-z-assa, fəlas ad ərzəga akal wa n Masedonəya. ⁶ İha mijas a xur-wan agağ adan, mijas dəx tagrəst ketnet as xur-wan tat-z-əkkəsəx, fəl a di-tagim allawtan kawanay iman-nawan s akal was kawan-z-əgməda. ⁷ Tidət as wər arex a kawan-in-asa əmərədda, agağ-awan-in assa dəx əzzikke; fəlas əgeç attama n ad ahaga xur-wan kud ikf-i Əməli turagat. ⁸ Əmərədda, ad aqqaməx dəx əyrəm wa n Efez har di dəx-as d-awəd amud wa n Fantəkawt. ⁹ Fəlas tənnolam-i dəx-as tarrayt zəwwərat n əššəxəl, kuddeç as əggətan zənga win wər nəra awen.

¹⁰ Amaran as kawan-in-osa Timotay tabəzam-t-in əs man-nawan, a tu-wər-iməl arat as tu-təha tasa-net, fəlas əşşəxəl y Əməli a iha ənta da, şilat-in. ¹¹ Dağ adi a tu-wər-alku awedan waliyyan; agiwat-as allawtan fəl a sər-i d-agu əşikəl olâxan fəlas əqqâlax-as ənta əd mədrayan-nana win dər iddew. ¹² Dağ batu ta təqqalat amadray-nana Abbolos: əgmâya dağ-as wəllen a kawan-in-asu iddew əd mədrayan-nana win di; igmâd ašşak âs wər ila ənnəyat n adi əmərədda. Mišan as igraw s adi, a kawan-in-asu.

Ənnəsixatan d assalaman

Ənnəsixatan win əlkamnen

¹³ Agat ənnəyat, təzəzzəwem dağ əzəgzan-nawan əs Ƴaysa Əlməsix, təqqələm aytedan wər təha tasa, təssuhem. ¹⁴ Arat kul wa tətəggim, agiwat-tu əs man taha tara.

¹⁵ Əhân-kawan salan n aytedan n ahan wa n Əstefanos; təssânam as əntanay a əzzarnen s əzəgzan əs Ƴaysa Əlməsix dağ akal wa n Akayya, əkkâsan dəx iman-nasan s əşşəxəl i mizdagan. Onsayaq-qawan za imədrayan-in, ¹⁶ a dasan-tabbardagam, əntanay d id t-illa awedan ihân əşşəxəl wa əhan, əs gəlleyat. ¹⁷ Isidawat-i assa wa di-d-iga Əstefanos əd Fortunatos d Axaykos. Assa-nasan idbəx-in təxərəbbet ta sər-i d-eway iba n əşinəy-nawan. ¹⁸ Fəlas issəsmad iman-in, issəsmad dəx win-nawan. Dağ adi, taget masnat fəl meddan zun win di, təwəsəxməran.

Assalaman win əlkamnen

¹⁹ Əhulan-kawan-in nalkiman win Əlkənisaten şin akal wa n Asəya. Ihul-kawan-in dəx Akilas əd Friska əd nalkiman win Əlkənisat ta tətəmanayat dağ ahan-nasan. Əhulan-kawan-in wəllen wəllen fəl əddəlil ən tassağ ta nəga d Əməli Ƴaysa. ²⁰ Əhulan-kawan-in mədrayan-nawan dağ əddin win əllanen da da ketnasan. Tinəməggat assalam zəddigan.

²¹ Təhult awa a din-təgmadat əfus wa-nin nak Buləs. ²² Məşşina təlxânay awedan wa wər nəra Əməli Ƴaysa! Marana ta, almayna: Ya Əməli-nana asa-du! ²³ Əgmâya dağ Məşşina a kawan-ikfan arraxmat n Əməli Ƴaysa. ²⁴ Əreq-qawan ketnawan fəl əddəlil ən tassağ ta nəga d Əlməsix Ƴaysa.

Şirawt ta n sanatat iktab Buləs i Kəl-Korent Əsənti

Təhult

¹ Awa nak Buləs, imosan əs tərəddawt ən Məşşina anammazul n Əlməsix Yaysa, nak d amadray-nana Timotay ənnânen əhulan-in Əlkənisat ən Məşşina ta təhat ayrəm ən Korent əd mizdagan kul win əxsarnen dağ akal n Akayya ketnet. ² Əgmâya dağ Məşşina di n Abba-nana d Əməli Yaysa Əlməsix a kawan-ikfan arraxmat d alxer.

Igodan d ənnəsixatan

³ Təmmal i Məşşina di n Abba n Əməli-nana Yaysa Əlməsix, imosan Abba wa n əməhhenən, imos deş Məşşina di isasmadan iwallan kul, ⁴s ənta a isasmadan iwallan-nana a təqqal təssust ta fall-ana təgat, fəl a danaş-issəfrəg əs tarrayt n əssəsməd wa itag iwallan-nana, ad nəssəsməd nakkanay da, iwallan n aytedan win fəl təga təssust a təqqal. ⁵ Id igət wa iga alyazab wa nənnay fəl əddəlil ən tassaş-nana d Əlməsix, ənta a təga təsasmit ən wallan ta danaş-ihakku Əlməsix. ⁶ Kud ətəwəsas wa nəga, təsasmit d efsan-nawan a imos, kud deş təsasmit ən wallan a danaş-ikfa Məşşina, wədi kawanay as tat-ikfa. Təsasmit tədi təkf-iwan ad təzməram y alyazab wa nətaggu nakkanay da. ⁷ Wər kala ad nəga aşşak dağ attama wa daş-wan nəga, fəlas nəssân as, da dər-na tədrawam alyazab, təsasmit ta itaggu Məşşina iwallan-nana da a dər-na tat-tədrawam.

⁸ Amaran imədrayan-in, wər nara a kawan-wər-əhen salan ən təssust ta fall-ana təgat dağ akal n Asəya. Təgrâw-ana daş-as təssust togarat awas nəfrag a dər-əs nəzəzzəydər, fadda har nəkkas attama ən man-nana. ⁹ Tidət as imâl şur-naş as, wər dana-t-illa ar tamattant. Arat wa, igrâw-ana fəl ad nəssən as wərge iman-nana, kalar Məşşina s ənta a d-isankaran inəmməttan, şas, as ihor a daş-as nagu attama-nana. ¹⁰ Ənta a dana-d-ikkasan dağ tazak labasat ən tamattant ta nəggaz den, ənta a dana-du-z-ikkəsan dağ adag şilat ən wen. Nəgâ deş attama n as, i tu-nəggaz, a dana-d-ikkəs. ¹¹ Amaran kawanay tədhâlam-ana əs mansay wa dana-tətaggim Məşşina; adi a fəlas, arraxmat ta za nəgrəw əs təwatriwen n aytedan aggotnen, a du-tawəy s aytedan aggotnen wiyad ad əggudəyan i Məşşina arat wa danaş-iga.

Buləs isasagru işikilan-net

Buləs isammattay ənnizam ən şikilan-net

¹² Amaran ənta da abarag-nana: wər nəssen fəl ark arat daɣ əddənet ta da as dana-z-əbəzan man-nana, wəllen daɣ tassaɣ ta dər-wan nəga. Wər nəga əmazal əs wərgex əwəl iyyanda zəddigan wa ihakku Məşşina as tu-nəga. Arraxmat ən Məşşina a danax-təssəfragat awen, wərgex a d-ihân əs masnat n aggadəm. ¹³⁻¹⁴ Fəlas şira şin dawan-in-nəkattab, wər daɣ-asnat nəssoka arat waliyyan wər nəmos wədi da təxarrim əddi, təgrâm-tu. Kud dana-wər-təgem əgərri olâxan əmərədda, da əgêx attama-nin daɣ ad tawədam a dana-tagim əgərri ikmâlan, tagim fəl əddəlil-nana abarag wa danax-isassaga wa-nawan, əzəl wa du-z-asu Ɛməli[-nana] Ƴaysa.

¹⁵ Ikus wa əgeɣ aşşak daɣ adi, a fəl otasaɣ a sər-wan in-izara, fəl ad təgrəwam daɣ assa-nin tənfa təmosat ənətfus; ¹⁶ akəyaq-qawan s akal wa n Masedonəya. As d-əgmada Masedonəya a kawan-d-əqqəla, tagim-i allawtan y əşikəl wa z'aga s akal wa n Yahudəyya. ¹⁷ Awak gälleyat a wər əgeɣ daɣ attas wa əgeɣ a kawan-in-asa? Məx ak aratan win as areɣ igi-nasan, wər əmosan ar deranan n aggadəm, igannin «ayew» as iga amazay ad annu «kala»? ¹⁸ Iggəyyat Məşşina as, awa dawan-nənna, wər imos «ayew» irtâyan əd «kala» ¹⁹ Fəlas Ƴaysa Ɛlməsix di n Barar ən Məşşina was dawan-nəga isalan-net, nak əd Silfanus əd Timotay, wər isərtəy «ayew» əd «kala». Kalar «ayew» ɣas a inna Məşşina əs tarrayt-net. ²⁰ Almayna n awen as arkawalan ən Məşşina ketnasan «ayew» a əmosan daɣ Ɛlməsix, adi da deɣ a fəl nəmmâl adkul ən Məşşina əs tənna ta nətaggu «Amin» əs tarrayt ən Ƴaysa Ɛlməsix. ²¹ Amaran, tartəyt ta nəga d Ɛlməsix, nakkanay dər-wan, Məşşina iman-net a tat-isassahen, isannafran-ana, ²² issəwar-anax deɣ ejwal-net alwaq wa d-iga Infas wa Zəddigan daɣ wallan-nana, imos awen təsukəst n aşşak daɣ arozan win as ilkam a danaq-qan-akfu.

²³ Məşşina a daɣ-i z'ibəzan iman, əgeq-qu təgəyya as, wər din-əqqəla aɣrəm ən Korent ar fəl as wər areɣ a dawan-əşşita aɣşud ən man; ²⁴ amaran areɣ ad təssənam as wər nəgəmməy d a kawan-nəşəhhəşşəl arat waliyyan daɣ batu ta n əzəgzan-nawan, kalar ənəməşəɣal ɣas a dər-wan nəga daɣ arat wa kawan-z-isəffəliwəsan, fəlas əzəgzan-nawan issohat.

2

¹ Adi a fəl əgey tanat təmosat as ənney: wər z'ələsəy aǵşud ən man-nawan s iyyan assa. ² Fəlas, nak as əǵşada iman-nawan, awak ma di-z-isəddəwen, ar kawanay win as əǵşadaǵ iman? ³ Adi a d-ewayan as a dawan-in-əktaba širawt fəlas wər arey a kawan-in-asa təǵşədam iman-in, kawanay win as ihor a di-təsəffəliwəsam; fəlas əkkâsəy aššak as, arat wa di-isaffalawasan, kawanay da isifalawas-kawan ketnawan. ⁴ As dawan-in-əktabaǵ širawt tədi, təga fall-i təssust labasat, isâs-i əwəl-in, əffâyan daǵ-i məttawan. Amaran wər dawan-tat-in-əktaǵ fəl ad əǵşəda i man-nawan, kalar fəl ad təssənam daǵ təzzəwwərt ən tara ta dawan-əgey.

Təsüreft i nadlaman

⁵ Amaran kud iyyan daǵ-wan a d-ewayan aǵşud ən man daǵ anamod iyyan, wərgəy nak as iǵşad iman, kalar ketnawan as dawan-tan-iǵşad, made z'anna fəl təksəda ən təsəssikəyt iǵşād-tan y arat daǵ-wan. ⁶ Awedan wədi, igd-âs əsənnərgəmə wa das-təga taššam-nawan. ⁷ Əmərədda ofa a das-təssurəfam, təssəsmadam əwəl-net, fəl a tu-wər-iǵləb əǵşud ən man, ihlək. ⁸ Daǵ adi, onsâyaq-qawan a tu-tassaknim tara ta das-təgam. ⁹ Id iyyan əddəlil wa fəl dawan-in-əktaba širawt tədi, tara a əgey a kawan-ajjarraba əssənəy kud təlkâmam y arat kul wa dawan-ənnəy, wala. ¹⁰ Amaran awedan kul was təssorəfam, nak da, əssorəfaǵ-as; arat deǵ wa əssorəfa den, kud ənta ill-ay fadda a əssorəfaǵ y awedan, a das-əssurəfaǵ arat kul was kala a di-t-iga fəl əddəlil-nawan, dat Əlməsix, ¹¹ fəl ad wər igrəw Aššaytan tarrayt waliyyat n a danaǵ-akkarras, id wər danaǵ-ədreǵnat təmərkas-net.

Buləs daǵ aǵrəm ən Trowas

¹² Alwaq wa din-osey aǵrəm n Trowas y a daǵ-as əxtəbaǵ isalan n Əlinjil n Əlməsix, or-i daǵ-as Əməli tarrayt n adi, ¹³ mišan harkid awen, wər tənəsa ənnəyat-in, fəlas wər daǵ-as əgrewaǵ amadrəy-nin Titəs. Adi a fəl namagga əd nalkiman win əhanen Trowas šiwatriwen, əgmadaq-qan s akal ən Masedonəya.

Buləs isasagru əššəyəl-net wa n arkawal ən tassaq wa aynayan

Buləs isasagru əššəyəl-net

Tarna ta igraw Əlməsix

¹⁴ Nətaggu igodan i Məššina a danaǵ-itaggin faw y əddənet əsəkni a itaggu əmənokəl ikefəlan a d-oyâ. Arat

wen ig-anaq-qu fəl əddəlil ən tassaq-nana d Əlməsix isâknin agaraw-net tarna fəl İblis. Ənta deyx a iziwəziwizan əs tarrayt-nana dağ adag kul ađu izodan wa təmos masnat n Əlməsix. ¹⁵ Id ađu izodan a nəmos əs Məşşina, a sər-əs in-igmâdan Əlməsix. Ađu wa, iwizawaz dağ aytedan win əhanen tarrayt ta n əlxıllas əd win əhanen tarrayt ta n əhluk. ¹⁶ Aytedan za win əhanen tarrayt ta n əhluk, nəmos-asan ađu ən tamattant, a d-itawayan sər-san tamattant. Aytedan amaran win hadatnen, nəmos-asan ađu ən təməddurt, tan-issodaran. Awak ma ifragan igi n əşşəxəl oğdân d awa? ¹⁷ Nakkanay, wər nola d aytedan aggotnen, əganen jola dağ awal ən Məşşina. Kalar dağ tassağ ta nəğa d Əlməsix nəmmâl dat Məşşina awal-net s əwəl iyyanda, amaran nəssân as Məşşina a dana-izammazalan.

3

Buləs, amaşşaxal a imos n arkawal ən tassağ wa aynayan

¹ Awak eməlan wiyyad a nətaggu iman-nana? Məx ak addararat a nəğa əs şira a danağ-z-akfinen xur-wan udəm, madəx nəddirar s a dana-tanat-tagim, awa taggin aytedan wiyyad? ² Kala kalar kawanay iman-nawan as təmosam şirawt-nana, təktâbat dağ wallan-nana, issân awedan kul, iyr-et deyx awedan kul. ³ Təssîknam deyx tişit-nawan şirawt n Əlməsix, təktâbat s əşşəxəl-nana, wər nəkteb əs taddawat, kalar Infas ən Məşşina di iddaran əs təktab; wər təkkeb fəl əsəllum ən təhunt, kalar iwallan a dağ təktab. ⁴ Aşşaddat n attama wa nəğa dağ Məşşina əs tarrayt n Əlməsix a fəl nənney adi. ⁵ Wərgəx aşşaddat n as ill-ay arat waliyyan as nəfrâğ igi-net gar-ena əd man-nana, kalar Məşşina a danağ-ihakkin fərregat n igi-net. ⁶ Ənta deyx a danağ-issəfragan ad nəqqəl imaşşaxalan n arkawal ən tassağ ta taynat, wər nəmos əlqanun iktâban fəl səlluman, kalar tassağ a imos iktâb Infas wa Zəddigan dağ wallan n aytedan; fəlas əlqanun wa irəwan iktâban fəl səlluman, tamattant a d-itaway s aytedan, amaran tassağ ta iktab Infas wa Zəddigan dağ əwəl, təməddurt a sər-san du-təaway.

Buləs imâl dad imməzray arkawal ən tassağ wa irəwan d arkawal ən tassağ wa aynayan

⁷ Ənnizam n əlqanun amaran wa d-itawayan tamattant s aytedan, isəlluman ən təhun a fəl iktab. İzizzabbat-t-idu Məşşina fəl Musa dağ ənnur, s awa iga dağ assahat, indar i Kəl-İsrayil ad əswədan dağ udəm-net. Ənnur en da za arat ilakkayan a imos. ⁸ Əngəm-in za ənnizam wa d-ifalan Infas wa Zəddigan, iktaban dağ wallan n aytedan, išşaqal

dağ-san! Manəmmək as wər z'agər wen tanaya? ⁹ Fəlas kud ənnizam n əlqanun wa d-itawayan s aytedan attadib, ila tanaya, wədi, ma dər za tagdu şigrat ən tanaya ta tu-z-agu ənnizam ən tarrayt ta taynayət wa d-itawayan s aytedan taqqat? ¹⁰ Iqqal as, arat wanad iknan təla ən tanaya, ab'as ila tanaya əmərədda fəl awa das-təga tarrayt ta taynayət dağ şigrat ən tənaya. ¹¹ Fəlas kud arat ilakkayan osa-du əs tanaya, adi za ma dər za tagdu şigrat ta tu-z-agu wa t-illan faw tanaya!

¹² Dad nəga attama ogdân d awen, wədi nəhal ad nammazal awa nərə ši wala tasa. ¹³ Nakkanay wər nəga awa iga ənnəbi Musa, issəlsan udəm-net afər fəl a dağ-as wər əswədan Kəl-İsrayil iket di ad t-igammad ənnur wa imalawlawan dağ udəm-net. ¹⁴ Mişan tawasaxaran wallan-nasan y awen, id har azalada, as yarrin Əlkəttaban win arkawal ən tassağ wa irəwan, şilat n as harwada illay, igdal-asan əgərri n Əlkəttaban, id afər wen, tassağ d Əlməsix ças a ifragan ikus-net. ¹⁵ Awalla, har azalada, yarrin əlkəttaban n ənnəbi Musa, mişan wər tan-əgren, fəlas afər wen a ilsan iwallan-nasan. ¹⁶ Tətubt ças s Əməli a itakkasan afər wen. ¹⁷ Amaran Əməli, Infas a imos. Awedan deç wa iggaz Infas n Əməli, wədi illəllat. ¹⁸ Nakkanay ketnana win as itawakkas əfər wen fəl udmawan-nana, nəswād dağ tanaya n Əməli şilan n as iswad awedan dağ şışet. Isamattay-ana Əməli, s ənta Infas a imos, s əşşəğəl wa itaggu dağ wallan-nana, işaşal-ana əd man-net, tətittəy dağ-na tanaya-net.

4

Tidət a dağ nəsusin aytedan

¹ Adi fəlas, dad zamas as ihanattat-ana Məşşina igana dağ əşşəğəl ən tarrayt ta taynayət, wədi wər za nəqqəl dəffər-na; ² nakkanay nəmmizzay d ark maza-lan sikərükidnen win tamazalan aytedan dağ əssir, wər nəgəmməy əd təkərras n awedan waliyyan, wala nəsafray awal ən Məşşina. Kalar emel wa nətaggu tidət əs təməwit təzdarat, nəgəmmay sər-əs əsəfləs ən man-nana y əkkulluk n awedan dat Məşşina. ³ Aytedan win əhanen tarrayt n əhluk ças as ilsa arat isalan n Əlinjil win nətaggu, wər tan-əzzəgzanan. ⁴ Wər əzzəgzanan fəlas İblis wa n əməli n əddənet ta, a tan-isaddarçalan; igdal-asan anay n ənnur wa d-igammadan Əlinjil, ənnur wa isaknin tanaya n Əlməsix imosan şaşşelan ən Məşşina.

⁵ Nakkanay isalan win nəmmâl, wər dağ-san nəmmil iman-nana, kalar emel a nətaggu as Ƴaysa Əlməsix a

imosan Ǝməli, nəmmâl deƷ as eklan-nawan a nəmos fəl əddəlil ən Ƴaysa Ǝlməsix. ⁶ Id Məşşina a innan: «*Imələwləwet ənnur daƷ šiyay*», ənta iman-net a imalawlawan daƷ wallan-nana, ikf-anax ənnur, a t-imosan masnat ən tanaya ən Məşşina ta təmələwlawat daƷ udəm ən [Ƴaysa] Ǝlməsix.

ƏşşəƷəl ən Buləs: Təməddurt ən Ƴaysa əd təmattant-net

Anammazul Buləs aggadəm a imos irkaman zun aytedan kul

⁷ Mişan ərrəzəƷ wa, imosan masnat ən tanaya ən Məşşina, ikassan ən talaq, as nakkanay a tan-imosan, a daq-qu neway, fəl ad itəwəssən as, tarna wər nəla əddukad ta, šin Məşşina, wərgeƷ šin-nana. ⁸ Wər t-illa daƷ ətəwəsas wər nətawagga, mişan wər kala nətawaxalab; əqqanan Ʒafawan-nana, mişan wər nətəkkəs attama. ⁹ Faw nətiwadgəz mişan wər danaƷ-oyya Məşşina əd man-nana; nətawagadlu mişan nənakkar-du. ¹⁰ Fawda nəha tazak n igi ən tamattant šilat ən ta iga Ƴaysa, fəl ad tətəwənəy təməddurt-net ənta da daƷ təƷəswen-nana. ¹¹ Fəlas nakkanay win əddarnen, faw nəha tazak ən tamattant fəl əddəlil ən Ƴaysa, fəl ad tətəwənəy təməddurt ən Ƴaysa s əllux daƷ təƷəswen-nana əmosnen arət itamattin. ¹² Adi a fəl nəha faw tazak ən tamattant, fəl ad təggəzəm kawanay tarrayt n aƷaraw ən təməddurt ta təƷlalat.

Awa d-ixsalan daƷ təməddurt n aytedan win Kəl-Korent

¹³ ƎzəƷzan-nana ola əd wa ittəmalan daƷ Ǝlkəttaban as ənnan: «*Ǝzzigzanax! Adi a fəl əşşəwalax.*» Nakkanay da əzəƷzan wen da a nəƷa, adi a fəl nəşşəwal nakkanay da. ¹⁴ Id nəssân as, Məşşina a d-issənkarən Ǝməli Ƴaysa daƷ tamattant, a dana-d-issənker nakkanay da nəddew əd Ƴaysa, təzzar issəbdəd-ana dat-əs nakkanay dər-wan. ¹⁵ Fəlas awa ketnet tənfa-nawan a fəl tu-nətaggu, fəl a dintawəd arraxmat n Məşşina aytedan aggotnen, igatan godan i Məşşina, fəl zazwar-net.

Ad wər nəkkəs attama Ʒər za nətəƷəzəzab wala natamat-tat

Tanaya təƷlalat ta du-təzayət

¹⁶ Adi a fəl wər za nəqqəl dəffər-na. Kud imos as šixəswen-nana ta n əmindi a əhanat, da iwallan-nana əntanay akk əzəl ətiwaşaşaynayan. ¹⁷ Fəlas təssust fəsusat wər za nihag ta nənnay əməərədda, a dana-za-takfit adkul iknan təzzəwwərt iƷlâlan. ¹⁸ Nakkanay wər nəswəd daƷ aratan win tawanaynen, kalar win əhanen ətənkul a daƷ

nəswəd; fəlas awa itawahannayan, wər itihag; as iga awen, awa ihan ətənkul, ənta ixlâl.

5

Nəsikalal iket di ad nəha əddənet

¹ Nəssân as ihəktan win nəha əmərədda, almayna şixəswen-nana, ad əhləkan, amaran isimatag-ana Məşşina dağ jənnawan şixəzmen əxlâlnen, s ənta iman-net a tanat-ikrasan wərgəx ifassan n aytedan. ² Amaran ihəktan win nəha əmərədda, osaxnat fall-anat təhənəffa, nəsidaran wəllen ad nagu i nan-nana win jənnawan iguz a itag awedan i səlsa aynaynen fəl wiyyad waşşarnen. ³ As iga adi, ad nəstər, wər za nəqqəl iman xas wər nəha tağəssa. ⁴ Tidət as ihəktan win nəha əmərədda əmosan-ana şilat n əzuk zəwwəran a danax-isihənəffen, eges wərgəx fəl aşşaddat ən tara n əməzzəy dər-san, kalar fəl aşşaddat ən tara n iguz ən təğəswen-nana şin jənnawan, fəl ad təlməz təğəssa ta təxlalat, ta wər nəylel. ⁵ Amaran Məşşina iman-net a danax-isammatagan awen, isattadd-anağ əs təhakkay ta danax-iga Infas-net as, ad agu awen.

Nəkna igi n attama id tara a nəga gərrezat y Əməli

⁶ Dağ adi faw təkna ənnəyat-nana id nəssân as, iket təmos tağəssa ta ehan-nana, nəggug Əməli. ⁷ Fəlas awa nəzzəgzan as nəlkam, wərgəx awa nəhannay əs şittawen-nana. ⁸ Awalla adi a fəl ənnəy təkna ənnəyat-nana, mişan nəsof wəllen ad nəgməd tağəssa ta nəha əmərədda s ahan-nana wa xur Əməli. ⁹ Awen da a fəlas, gər za nəha tağəssa-nana wala deş wər tat-nəha, wər nədgez ar dağ a das-nəgrəz. ¹⁰ Fəlas kundaba nəbdad ketnana dat Əlməsix, işrəx-ana. Akkiyyan dağ-na ad igrəw awa dər ahoran mazalan win iga harwa iha tağəssa-net, gər za win olaşnen wala win wər noleş.

İmaşşaxalan ən Məşşina a nəmos, nəmos dey almawakkilan-net

İşşəyəl wa n igi n alxer gar-ena

¹¹ Dağ adi, dad zamas nəssân awa təmos təksəda n Əməli, nəgammay dağ aytedan a sər-əs əzzəgzanan əs gəlleyat. Məşşina issân wəllen awa nəmos, amaran əgəx attama n as kawanay da təssânam wəllen dağ wallan-nawan awa nəmos. ¹² Wərgəx təmmal a nəllas iman-nana xur-wan, kalar əddəlil xas a kawan-nəhakku n igi ən baragan fall-ana, fəl ad tilem a tənnam y aytedan win tagginen ibaragan fəl awa iwaran azzahir, imos sokni wərgəx təla n əwəl zəddigan dat Məşşina. ¹³ Kud a itawannan tayttay-nana

a dana-təgmədat, wədi saymar ən Məššina a fəl nəga adi; kud deɣ wər dana-təgmed, wədi tənfa-nawan a imos. ¹⁴ Fəlas tara ta danaɣ-iga Əlməsix a tənnodat daɣ arat kul wa nətaggu. Id nəzzigzan as awedan iyyanda, a t-imosan Əlməsix, a immutan daɣ adag n aytedan kul; daɣ adi aytedan kul əddewan dər-əs daɣ tamattant ta iga. ¹⁵ Abatu daɣ adag n awedan kul, əgrawan aytedan təməddurt taynayət s əssəbab-net. Igâ awen fəl ad ammazayan əd təməddurt daɣ wər əlkəman ar i tara ən man-nasan. Kalar ad əlkəman y Əlməsix a immutan fəl əddəlil-nasan, itawasankar-du deɣ daɣ tamattant. ¹⁶ Adi a fəlas əmərədda ab'as nəga daɣ awedan waliyyan iduf wa daɣ-as əgan aytedan; kuddeɣ as kala ad nəttaf Əlməsix daɣ adag wa daɣ t-əttafan aytedan, mišan əmərədda wər tu-nəttef daɣ adag wen. ¹⁷ Daɣ adi awedan wa ilan tassaɣ d Əlməsix, iqqal taxlək taynayət. Ab'as imos awedan was kala a t-imos, fəlas təməddurt tas kala tat-iga iɣrad dər-əs; təggaz iyyat taynâyat edag-net. ¹⁸ Amaran awen kul Məššina a t-igan, ənta a danaɣ-iknan əd man-net əs tarrayt n Əlməsix, ikfana deɣ nakkanay əššəxəl imosan igi n alxer, ¹⁹ imosan as: Məššina eway-du alxer gar-es d əddənet ketnet əs tarrayt n Əlməsix, ab'as fall-asan ittaf ibakkadan-nasan. Əntanay da da isalan n igi n alxer win as danaɣ-inna a tan-nagu y aytedan. ²⁰ Daɣ adi nakkanay almawakkilan n Əlməsix a nəmos, id Məššina iman-net as kawan-iɣarru əs tarrayt-nana. Nonsay-kawan fəl udəm n Əlməsix ad təknaəm əd Məššina! ²¹ Əlməsix wər t-iwer abakkad waliyyan, mišan issəwar-tu Məššina fəl əddəlil-nana ibakkadan-nana, fəl a sər-na du-tawəy tassaɣ-nana dər-əs taqqat dat Məššina.

6

¹ Daɣ adi, dad imos as nəha əššəxəl wa daɣ iha Məššina, nəgmây daɣ-wan ad wər təsəbbənnanam arraxmat ən Məššina ta təgrawam da. ² Id Məššina iman-net as inna: «*As d-ewad alwaq wa daɣ kawan-z-akfa arraxmat-in, ad əqbəla šiwatiwiwen-nawan, as d-ewad alwaq wa daɣ kawan-z-əxləsaɣ, a dawan-ilalaɣ.*» Ənəyat za alwaq wədi, ewad-du, ənta da da deɣ əzəl wa n əlxillas-nawan.

Awa immozal Buləs əd tayaray ta iga Kəl-Korent

³ Wər nətəggu arat waliyyan as z'iqqəlan təsənkəft y awedan waliyyan, fəl ad wər itəwənəy lahan waliyyan daɣ əššəxəl-nana. ⁴ Kalar arat kul wa nətaggu, nəsaknu daɣ-as as imašşaxalan ən Məššina daɣ a nəmos əs zəmmerat tagget ta nəga i təssust, d ašşawaša əd təməɣutar, ⁵ əd təwit, əd kasaw. Nəzmər deɣ daɣ alɣazab wa nəga daɣ

tənəjarwayen šin fall-ana əganen, d əššəxəl labasan wa nətəggu, d-iba n agaraw s etəs əd gələk. ⁶ Nəsaknu tišit-nana imaššaḡalan ən Məššina əs man zaddognen, əd masnat ta nəgraw, əd təzaydart ta dana-təhat, əd man mallolnen. Nəsakn-et deḡ əs tədhəlt ta danaḡ-iga Infas wa Zəddigan əd tara təgāt s əwəl iyyanda ta dana-təhat. ⁷ Nəsaknu tišit-nana imaššaḡalan ən Məššina s awal imosan tidət wa nəmmâl, əd fərregat ta danaḡ-ikfa Məššina. Nəsaknu tišit-nana imaššaḡalan ən Məššina əs təzoli n əməgər ta n taqqat tas za nammagar naggəz iman-nana. ⁸ Gər za nətiwasaymar wala nətiwalka; gər za nətawarbad wala nətatamal, nakkanay tidət a nəmmâl, kuddeḡ as itiwattaf as əsəxrək a nətəg aytedan. ⁹ Nətiwazday wəllen, mišan šilat n as wər nətawazday. Nəššigga daḡ tamattant, mišan harwada nəddâr. Nətawaddab mišan wər nətəwənḡu kərəz. ¹⁰ Əḡsâdan man-nana mišan wər danaḡ-igdel awen as faw nəfilawas. Wər nəla wala mišan nəsaḡgargas aytedan aggotnen; wər nəla wala, ənta arat kul i-nana.

¹¹ Ya işəqqaḡan-nana win Kəl-Korent, awa ihan iman-nana a dawan-tu-nəmmâl s əwəl iyyanda, amaran nolâm-awan iwallan-nana. ¹² Nakkanay wər dawan-nəxfel iwallan-nana, kawanay amaran təxfalam-ana win-nawan. ¹³ A dawan-anna awa z'annay i bararan-in: Aləmat-ana iwallan-nawan, zun awa dawan-nəga.

Ammar n aytedan s ad izdagan

¹⁴ Ad wər tətasaḡam d aytedan win wər nəzzəgzan s Əlməsix. Manəmmək as z'asəḡ əlluḡ d əššur, wala asəḡ ənnur əd šiyyay? ¹⁵ Ma imos arat wa fəl z'inəmənnək Əlməsix d İblis? Ma idraw awedan izzigzanan s Əlməsix d iyyan sər-əs wər nəzzəgzan? ¹⁶ Ehan n Əlyibada ən Məššina deḡ ma təmos tərəddawt ta z'agu d əssənəman? Fəlas nakkanay a əmosnen Ehan ən Məššina di iddaran, id Məššina a innan: «*Ad əxsəra daḡ aytedan-in, idawa dər-san; əqqələḡ Əməli-nasan, əntanay deḡ əqqəlan tamattay-nin.*» ¹⁷ Awen daḡ a fəl inna Əməli: «*Əgmədat-du aytedan win wər nəzzəgzan, tammazzayam dər-san, ad wər tədəsam a immidasan, əddi a kawan-əqbəla.* ¹⁸ A dawan-əqqələḡ abba, təqqələm bararan-in əd təbararen-in, adi a inna Məššina di n əməli ən tarnə kul.»

7

¹ Daḡ adi, imaran-in, dad zamas tawagḡan-ana arkawalan win, zəzdəgat-ana iman-nana daḡ arat kul wa isamadasan

tayəssa d ənnəyat. Naget tazdak təkmâlat, iga awen əs təksəda ən Məşşina.

Tədawit ən Buləs ħur tətubt ən Kəl-Korent

² Aləmat-ana iwallan-nawan, nakkanay wər kala ad nəğa təkma y awedan waliyyan, wala nəxşâd-as arat wala dex nətša alxaq-net. ³ Wər ənnəy adi fəl a kawan-əssəwəra lahan waliyyan fəlas əmâlaḡ-awan dat adi as nəsinahal-kawan tara. Təməddurt wala tamattant wər za təkkəs tara tədi daḡ wallan-nana. ⁴ Wər daḡ-wan əgeḡ aššak waliyyan. Tagga abarag daḡ batu-nawan. Daḡ təssust kul ta nənay təkna talḡa-nawan təsasmit n əwəl-in, amaran təfalawist-in wər təla əddukad.

⁵ As du-nosa akal ən Masedonəya wər kala ad nəgraw əs təsanfawt, kalar nəbdâd daḡ təməḡutar labasnen as wər t-illa a daḡ wər əgenat. Tagganat tamazaḡen dəgma-nana, amaran təh-âna tasa. ⁶ Mišan Məşşina di n ənəssesməd ən man n i s əḡşâdan man-net, isasmad iman-nana s assa wa dana-d-iga Titəs. ⁷ Wərgəḡ assa-net ḡas a danax-olaman fəl man; kalar əkənni wa das-təgam iman, d as imâl-ana əsənnəhəl wa təgam tara n a di-tənəyam, əd təmagrizt ta təgam, d əddəguz wa təgam daḡ awer n aganna-nin; adi, a iknan əsəffəliwəs ən man-in.

⁸ Ab'as əmməgraza širawt ta dawan-in-əktaba, kuddey as idâs-i as əmmigrazax akatab wa dawan-tat-in-əgeḡ, fəlas əssânaḡ as təḡşâd iman-nawan, mišan ya aḡşud di wər ihog. ⁹ Fadda əmərədda isidawat-i as dawan-tat-in-əktabaḡ, wərgəḡ fəlas təḡşad iman-nawan, kalar fəlas aḡşud wa əgan man-nawan əddi, eway-du sər-wan tətubt daḡ bakkadan-nawan. Əzzənəf n əḡşud ən man wədi daḡ a ira Məşşina y aytedan-net, daḡ adi wər dawan-nəḡşed arat waliyyan. ¹⁰ Fəlas Məşşina ifrâḡ a sər-na d-awəy aḡşud ən man fəl ad nutab daḡ bakkadan-nana, awəy-du sər-na əlḡillas. Wər danax-ilkem ad nəmmigraz əzzənəf n əḡşud ən man wədi. Aḡşud ən man amaran wa sər-na du-teway əddənət wər d-itiway tətubt, təsəlkamt-net tamattant. ¹¹ Ənəyat iket n əsəbdəd wa kawan-iga əḡşud ən man wa ira Məşşina. Əsəbdəd wen ənta a d-ewayan gəlleyat ta təgam, d aggaz wa təgam iman-nawan, d alham wa daḡ-wan iga, əd tasa ta sər-wan d-eway, d əsəddiran wa təgam anay-nin, d əddəguz wa təgam daḡ amazal n awa olaḡan, d aggay wa sər-wan d-iga tara n ad awwaddaban aytedan win tagganen təkma. Təssîknam daḡ anamod kul as, wər təlem lahan waliyyan daḡ talḡa tədi.

¹² Daḡ adi širawt ta dawan-in-əktabaḡ əddi, wər tat-in-əkteba fəl əddəlil n awedan wa igan arak amazal wala was itawagga; kalar əktâbaḡ-awan-tat-in fəl ad tətawasaknu

gälleyat ta təgam daɣ batu-nana dat Məššina. ¹³ İknâ adi iman-nana. Amaran êkenni wa əgan man-nana den, iwar-tu as, isidawat-ana wəllen anay wa nəga Titəs ikna təfalawist fəlas ketnawan as das-təknam iman. ¹⁴ Əgeɣ-as abarag fall-awan, təqqimam wər di-təzzəbazam təkarakit. Amaran wər kala a dawan-nənna arat wər nəmos tidət, abarag deɣ wa nəga i Titəs, ənta da, iqqal tidət. ¹⁵ İkn-iwan tara, wəllen as d-ikta əbərdəg wa təgam ketnawan y igi n awa inna əd saɣmar aggen wa tu-təssəknam. ¹⁶ İket təfalawist əgeq-qat, fəlas əfrəgəɣ a fall-awan saffalla daɣ arat kul.

Şirgiten əmosnen tadhəlt n əlməsixitan win əyrəm ən Yerusalam

8

Tadhəlt d igi ən tənfa y aytedan

¹ İmədrayan-in, nərə a dawan-nagu isalan n arraxmat ta iga Məššina y Əlkənīsaten ūin əhanen akal ən Masedonəya. ² Təssust labasat ta tanat-təgrawat, d əlləqqəw labasan wa tanat-idgazan wər dasnat-igdel igi ən təfalawist s awa təga daɣ təzzəwwərt, teway-du sər-əsnat igi ən təhək n əlləllu iknan təzzəwwərt. ³ Fəlas silakanəɣ-awan as, arat wa əfragnat a əragnat, fadda awa êkfanat, ogar awa əlanat, amaran əgānat awen gar-essanat əd man-nasnat. ⁴ Fadda mansay a daɣ ədgāznat a danəɣ-əganat a tanat-nayyu əgrəwnat arraxmat n ad ədhəlnat imizdagan win əyrəm ən Yerusalam əntanay da. ⁵ Arat wa əganat, ogar was nəga attama-net, ad t-imosan as azzarnat tehakkay ən man-nasnat y Əməli, dəffər adi êkfanat-anəɣ iman-nasnat, imos awen arat ira Məššina. ⁶ Adi a fəl nədgaz Titəs, s ənta a daɣ-wan d-igan əstizarat ad tagim ūirgiten, a dawan-ilal s ad tassandim əšşəxəl wa, imosan arraxmat. ⁷ Dad zamas təbbilalam s arat kul: almaɣna təknnəm təla n əzəgzan, təknnəm masnat n awal, təknnəm təla ən masnat, təssānam gälleyat daɣ arat kul, tədgāzam daɣ tara ta dawan-nəga; wədi arraxmat ta imos igi ən tərgiten da ədgəzat daɣ-as wəllen.

⁸ Wər dawan-ganna imos fall-awan əšşil igi n adi, kuddeɣ as Əlkənīsaten ūin hadatnen êknānat tara n igi-net. Kalar tara ɣas a əgeɣ ad əssəna da du-təqqal tara ta kawan-təhat. ⁹ Təssānam daɣ arraxmat ta danəɣ-isəkna Əməli-nana ɣaysa Əlməsix. Ənta wa n əməggərgəs, isallaqqaw iman-net fəl əddəlil-nawan, fəl a kawan-isəggərgəs kawanay s ələqqəw-net. ¹⁰ Ənta da ənnəsixa wa dawan-əgeɣ daɣ batu tədi: of-awan ad təsəkkəsəwam arat əs kawanay

iman-nawan ad t-issəntan ila adi əmərədda awatay, fəlas kawanay a zzarnen s igi-net, kawanay deḡ a t-id-iktan harwa daḡ tizarat. ¹¹ Daḡ adi əmərədda agiwat daḡ əsəkkəsəw n əşşəḡəl di, əddəguz wa təgam as t-idu-təssəntam. Ərəgat daḡ arat a iqqal wa təlam awas təfragam širgit-net. ¹² Fəlas kud deran issohen illay wədi təhəkkut ad tətəwəqbəl s əlluḡ ewal awen s awa nəla wərgəḡ awa wər nəla. ¹³ Wərgəḡ agamay a tagga ad əsənəfləyax aytedan wiyyad, kawanay amaran əsəmməḡitəraq-qawan. Kalar agamay ḡas a tagga ad tənəmiwəyam. ¹⁴ Əmərədda kawanay a əbbəlalnən, immikkan ad tilalam y aytedan win təlaqqawen; as iga adi, as ənnəflayan a dawan-ilalan əntanay da əzəl wa ad təməḡataram. Əmmək wədi as za tənəmiwəyam. ¹⁵ Ənnan Əlkəttaban: «*Awedan wa išşədawan a əggen, wər išşədaw a t-ogaran; wa išşədawan a əndərran, wər ikataytay.*»

Batu ta təqqalat Titəs daḡ ənnizam wa n širgiten y Əlkənisat ta n Yerusalam

¹⁶ Əggôdayax i Məşşina a ikfan Titəs gəlleyat daḡ batu-nawan šilat ən ta daḡ-as əgəḡ. ¹⁷ Fəlas wərgəḡ tərəddawt ḡas a iga s arat wa daḡ-as nəgmay, fadda issəwar adi as d-inkar gar-es əd man-net ikk-iwan-in fəl gəlleyat a iga daḡ batu-nawan. ¹⁸ Nəşşədaw-t-in d amadray-nana iyyan əs Əlkənisaten ketnasnat əmməlnat əşşəḡəl wa itaggu daḡ batu n Əlinjil. ¹⁹ Ənta deḡ a sannafrannat Əlkənisaten y a dər-naḡ iddaw daḡ əşikəl wa za nagu newây arraxmat ta əmosnat tərgiten šin, y a dər-əs annattaf, nassaknu s adi adkul-nana Əməli d əddəguz wa nəga daḡ tilalt y aytedan. ²⁰ Təmos tidawt-nana dər-əs ədərrəg y a danax-itəwəsəwər lahan a iqqal daḡ talḡa n ənnəttaf wa nəga əd təhəkkut zəwwərat ta. ²¹ Fəlas nəgammay awa olaḡan dat Əməli d aytedan, nəgammay deḡ amazal sər-əs.

²² Meddan win sər-wan in-nəzammazal, nəşşədaw-tan-in d amadray-nanaḡ iyyan. Amadray-nana wa, nərâm-tu daḡ taklaten aggotnən əs təməwiten aggotnən, faw iglây, wəllən əmərədda fəl awa dawan-iga daḡ fəllesat. ²³ Daḡ batu ta təqqəlat Titəs, əmidi-nin a imos dər ədrâway əşşəḡəl wa dawan-taggaḡ, amaran daḡ batu ən mədrayan-nana win hadatnən win dər iddew, əntanay inəmmuzal a əmosan n Əlkənisaten, əşḡələn gammayan adkul n Əlməsix. ²⁴ Daḡ adi, sakniwat-tan tara ta kawan-təhat d əddəlil wa nəla s igi ən baragan daḡ batu-nawan fəl a daḡ-san əkkəsənat Əlkənisaten aşşak, ənəynat-tan.

9

¹ Daḡ batu ta təqqalat tadhəlt ən mizdagan wər əddərara s a dawan-in-əktəbəx širawt. ² Fəlas əssənaḡ daḡ gəlleyat ta təgam daḡ a dasan-tərəgam, d as əgeḡ y aytedan ən Masedonəya ibaragan fall-awan. Ənneḡ-asan: inalkiman n Əlməsix win akal n Akayya harwa naydan ad əran əsəgli ən tərgiten; fadda əddəguz-nawan daḡ igi ən tərgiten a issəran taššam-nasan ad ərəgan əntanay da. ³ Adi a fəl sər-wan in-zammazalaḡ imədrayan-nana win di, fəl ad wər əqqəlan baragan win fall-awan nətaggu awal ən bannan. Ənneḡ-asan as kawan-in-z-asin širgiten-nawan əmmotagnat. ⁴ As wər iga adi, har kawan-in-oseḡ əddewaḡ d arat daḡ Kəl Masedonəya, nos-iwan-in wər təsammatagam; a dana-tabəz təkarakit ən baragan win dasan-əgeḡ fall-awan, amaran kawanay wəllen a za təbəz təkarakit. ⁵ Daḡ adi ənayaḡ as təga addararat s ad əgəmməya daḡ mədrayan-nana win di a di-in-izaran y ad əššidəwan širgiten šin as təgam arkawal-nasnat; assaknu adi as təgām-tanat s əlləllu, wərgəḡ əs gərrəz.

Maruzat ta təhat igi ən tənfa y aytedan s ərrəzəḡan-nana

⁶ Ənta da awa əssoka əs batu tədi: Awedan wa inbalan amasa wər nəggət, ad d-aləy tənfa wər nəggət; awedan deḡ wa inbalan amasa aggen, ad d-aləy tənfa tagget. ⁷ Akk awedan akfet awas iga ənnəyat n ad t-akfu daḡ man-net. Ad wər təqqəl təhakkay-net arat imigraz, wala imos as əššil; fəlas Məššina ira awedan wa ihakkin əs man ərdānen. ⁸ Amaran Məššina ifrāḡ a fall-awan d-izəzzəbbət əzzənəfan n arraxmaten aggotnen, fəl a tu-wər-iməl arat a iqqal daḡ alwaq a iqqal as təddiraram, har tawadam igi ən mazalan kul win olaḡnen. ⁹ Adi a fəl ənnan Əlkəttaban: «*Ihakku s əlləllu, ihakku šiləqqawen; taqqat-net, təḡlâl.*» ¹⁰ Məššina a ihakkin amagyak amasa, ihakku deḡ isudar. Ənta deḡ a kawan-z-akfin amasa s iggət, təzzar isəggət tənfa ta duteway taqqat-nawan. ¹¹ Awalla, Məššina a kawan-isəbbələl daḡ arat kul fəl ad təfrəgam ad tallallem faw daḡ arat kul; awəy-du adi s aytedan win as za nawəy širgiten-nawan igi ən godan i Məššina. ¹² Fəlas širgiten šin təgam, wərgəḡ imizdagan win Yerusalam win maddararan ḡas as z'anfinat; kalar ad d-awəynat s aytedan aggotnen igi ən godan i Məššina. ¹³ Širgiten šin di əntanatay a d-ewaynen əs mizdagan win Yerusalam zazwar ən Məššina fəlas təssiknam əbərdəḡ wa sər-wan d-eway ləkkum wa təgam y Əlinjil n Əlməsix, təssiknam-tan deḡ əlləllu əntanay d aytedan sahadan. ¹⁴ As dawan-taggin šiwatriwen a dawan-tanat-taggin əs man tədnay tara fəl əddəlil n arraxmat

təknât təzzəwwert ta kawan-ikfa Məššina. ¹⁵ Gudəyatanay i Məššina təhəkkut wər nəla tulat ta danay-iga.

Buləs isasagru ibbillan dex fəl əššəxəl-net wa n tišit n anammazul

10

Tanaya ən Buləs

¹ Nak Buləs, nak wa fəl gannin aytedan as: šira šin dawan-in-kattabağ xas a dağ əhâla awal, mišan as kawan-əheğ ad əqqələğ awedan ləmmidan; onsâyaq-qawan fəl udəm ən talmat d əlluğ win iga Əlməsix, ² as, as kawan-in-oseğ, a di-wər-təšəhhəššəlam a kawan-assakna taholat-in awal id otâsağ ad assakna taholat-in awal aytedan win di gannin əddi nakkanay wər nəlkem ar i təla n əddənet. A dawan-ələsa tənna: Əgmâya dağ-wan a di-wər-təšəhhəššəlam igi n əmazal di! ³ Tidət a imos as əddənet a nəha, mišan wər nəmməgar fəl awa fəl əmməgaran aytedan win əlkammen y əddənet. ⁴ Fəlas təzoli tas nəmməgar wər tat-təla əddənet ta, kalar tarna a danay-ikfa Məššina as nəmməgar; nətadagdag sər-əs idagga əssohatnen win ittaf Iblis. Nəssân dağ bahutan-net, nəsağğ-en. ⁵ Nəzaraz sər-əs tamazağ kul ta təgaddalat y aytedan ad əssənan Məššina. Təzoli tēdi da as du-nətabaz imedranan kul n aytedan, fəl ad abbardagan y Əlməsix. ⁶ As təssəknam alkamalat n əbərdəğ-nawan, nəsimatag y ad nawwaddab awedan kul wa n ənəmməzrəy.

⁷ Əswədat dağ awa illan dat šittawen-nawan, tagrin-tu. Kud awedan a kawan-ihan ikkâsan aššak as Əlməsix a t-ilan; issənet za as, nakkanay da ig-âna Əlməsix tēla tēdi da a das-iga əddi. ⁸ Wala ad əgeğ ibaragan aggotnen fəl as danay-ikfa Əməli tanaya, da wər di-z-izzəbēz adi təkarakit. Tanaya ta danay-ikfa šin a kawan-nəsəssuhət, wərgəğ a kawan-nəjəbbərijjət. ⁹ Ənnəğ awen fəl ad wər tiğalam šisəksədawen xas a dawan-tagga dağ šira-nin! ¹⁰ Id itawannu sər-i: «A kawan-wər-iššəwəš Buləs. Šira-net ši labasnen, əssohatnat, mišan ənta əs man-net as dana-d-osa wər fərur, amaran wər issen awal.» ¹¹ Awedan wa sər-i innan adi, əssənet as, awa din-nəkəttab dağ šira-nana, ənta a za nəmməzal as kawan-in-nosa.

¹² Tidət âs, wər za nəhəl ad nəšišagda iman-nana wala nəšišalen d aytedan win di a dawan-əmmalnen iman-nasan; wər nədəkkəd iman-nasan ar əs man-nasan, šašagdin dex iman-nasan əd man-nasan. Wər əlen əğərri. ¹³ Nakkanay za, wər za nagu ibaragan fəl aratan win wər nəmos tadagart-nana; amaran wər z'akəyan baragan-nana

tadagart ta danax-ikfa Məşşina, a tat-imosan as kawan-in-newad. ¹⁴ Iki wa dawan-in-nəga wər imos əsəssikəy fəl awa nətawakfa zun as kawanay wər təhem tədagart ta nəgraw, fəlas kawanay as nazzar nəşxal xur-wan, nəmal-awan isalan n Əlinjil n Əlməsix. ¹⁵ Nakkanay wər nətəggu ibaragan fəl əşşəxəl ən wiyyad aytedan win əgrawnen tədagart wər nəmos ta nətawakfa nakkanay. Kalar attamanana nəg-ay dağ-əs, as ittitəy əzəgzan-nawan, a xur-wan nagu əşşəxəl as z'itizwaran wəllen, da wər nokay tədagart ta danax-ikfa Məşşina. ¹⁶ Almaxna ad nəfrəg igi ən salan n Əlinjil dağ kallan win dənnəg-wan əllanen, naqqam da wər nəga ibaragan fəl awa d-ixsalan dağ əşşəxəl imôsan tədagart n awedan iyyan. ¹⁷ Ənnan Əlkəttaban: «I itaggin ibaragan, aget-tan fəl awa iga Əməli.» ¹⁸ Fəlas wərgəx awedan wa immalan iman-net a igrawan saymar, kalar awedan wa immâl Əməli a t-igrawan.

11

Buləs issinkad-anax i nəmmuzal win bahu

¹ Arex dağ-wan a dər-i təzəzzəydəram! Ad aga arat ən təmətəkwayt n əmməskəl! Awalla, əzmarat y awa z'anna! ² Fəlas əgey-awan tara ta n təsmiten, şismiten di da şin d-əfalnen Məşşina, id təhâm-i şaşşelan ən təntut əs wər kala a tat-idas aləs, a dər isimarkas aləs iyyanda, a t-imosan Əlməsix, amaran nak a das-isamarkasan dər-əs. ³ Mişan əksudağ ad təwərkəbnat taytwen-nawan əs təsədək iyyat, tammazzayam d əlxibada wa təgam Əlməsix s əwəl iyyanda [əd man zaddoggen], itəwəgg-awan ətəwəsəxrak wa iga məlul Xawa əs təkərras-net. ⁴ Fəlas as kawan-in-osa awedan iyyan ig-awan isalan ən Yaysa iyyan wər nəmos was dawan-nəga isalan-net, madex təgrəwam infas iyyan wər nəmos Infas wa Zəddigan wa təgrawam, madex ag-awan isalan n əlinjil iyyan wər nəmos wa təqbalam, tarmâd as das-taknim tərəddawt s awen. ⁵ Dər iga awen da za, wər xur-i iga as ill-ay arat as di-ogaran nəmmuzal-nawan wər nəla tulat win di. ⁶ Amaran kud awal wər əley madas-net, masnat ənta, əleq-qat wəllen; nəssikn-awan-tat dağ əkkulluk n arat s əmmək kul.

⁷ Awak abakkad a əgey as əssərasax iman-in fəl a kawan-əzzəzwəra kawanay s amel wa dawan-əgey isalan n Əlinjil ən Məşşina wər kawan-əzzərzama wala? ⁸ Oxe-du Əlkənisanen şin hadatnen əs tədhəlt ta di-əganat s awas əddərara dağ əşşəxəl wa dawan-əgey. ⁹ Alwaq wa xur-wan əlle, wər kala əqqalağ i waliyyan dağ-wan əzuk as mağatara s arat, fəlas imədrayan-nana win d-əfalnen akal

ən Masedonəya a di-əkfanen awas əddərara. Əgdələy i man-in tişit n əzuk i waliyyan daɣ-wan daɣ əkkulluk n anamod, amaran ad agla daɣ igi n adi. ¹⁰ Agamad wa iga aššak tidət n Elməsix ta di-təhat, ənta a iga as, wər iha awedan imədlan n akal n Akayya ifrâgan a di-igdəl igi n abarag wədi! ¹¹ Ma fəl əgəy adi? Awak iba ən tara-nawan? Məššina issân as areq-qawan! ¹² Arat wa tagga da amaran, ad agla daɣ igi-net, fəl ad əgdələy igi ən baragan y aytedan win əranen ad əgrəwan tarrayt n ad annin əššəxəl-nasan wər izlay əd wa-nana.

¹³ Fəlas meddan win di, inəmmuzal ən bahu a əmosan, əmosan dəy imaššaxalan ən məkkəddal, sakinen as inəmmuzal n Elməsix a əmosan. ¹⁴ Wər iqqen adi eɣaf, fəlas wala Aššaytan itaggu iman-net angalos n ənnur itəggin tidət. ¹⁵ Daɣ adi aytedan win das-əšxalnen wər isammaklal ad agin iman-nasan zun maššaxalan sasaxrinen aytedan taqqat. İlkâm ad əgrəwan awa dər əhoran mazalan-nasan.

Alxazab wa iga Buləs daɣ tişit-net anammazul

¹⁶ A dawan-ələsa tənna, ad wər iɣal awedan waliyyan nak əmeskel. Mišan, kud əmeskel a di-təgam, təzməram-i, awa tətəggim y əmeskel, fəl ad agax arat ən baragan-in nak da. ¹⁷ Arat wa ənne da, wərgəy arat as d-inna Əməli ad t-anna, kalar abarag adi, a di-təsisaga tulat-in d əmeskel. ¹⁸ Dad zamas əggətan aytedan win tagginen ibaragan fəl awa itaggu əggadəm daɣ əddənet, nak da, ad agax ibaragan. ¹⁹ Fəlas kawanay win malan ən tayttay, təzmâram i məskelan, isidawat-kawan adi! ²⁰ Təzmâram y i kawan-igan eklan, madəy axu awa təlam, təzmâram y i daɣ-wan tat-igân əs təkərras-net, madəy assakn-iwan məlka, madəy iwət-kawan daɣ udəm. ^{21a} Isikarakad-i as, əlləqqəw-nana nakkanay, igdâl-ana a dawan-nagu aratan šilat ən win di.

^{21b} Dər iga awen da ya, arat a iqqal as ihal awedan a fall-as agu abarag, nak da, əhələy a fall-as agax abarag. Batu ta əge da šilat n as ig-et əmeskel. ²² Kud Kəl-ÿibri a əmosan, nak da, əmosaq-qu. Kud Kəl-İsrayil a əmosan, nak da, əmosaq-qu. Kud əzzurrəyya n İbrahim a əmosan, nak da, əmosaq-qu. ²³ Kud imaššaxalan n Elməsix a əmosan, ogaraq-qan tişit-net. Batu ta əge da šilat n as ig-et əmeskel. Kud alxazab a əgan, ogaraq-asan-tu; kud kasaw a əggazan, ogaraq-qan iguz-net; kud šiwwit a tawaggan, ogaraq-qan ətəwənxə; kud dəy tazak ən tamattant a əggazan, ogaraq-qan iguz-net. ²⁴ İwəddiban səmmos a di-əgan Kəl-Əlyəhud, s akk iyyan əkkozat təmərwən ən tawatay daɣ aba iyyat.

²⁵ Karadat tənəqq a di-əgan Kəl-İrrum s ələkkud, taklat iyyat əgmayan aytedan əd tanaxay-nin kərəz əs təgur ən təhûn, karad əxşudan da tənamazray a dər-i iga əxlal n aman. Idâs-i dəx as əgeş ahad iyrâdan d əzəl dəx ammas n agaraw əbukan aman a di-ətşin. ²⁶ Əgeş işikilan aggotnen. Əggâzax alxarar n adi əbətan aman ən təsəssəngay şin raddaxa madex əgrəwan-i narkaban. Əggâzax alxarar dəx aytedan win-da-nin ən Kəl-İlyəhud əd win tan-wər-nəmos. Əggâzax alxarar dəx xərman əd saffan. Əggâzax alxarar n a di-atşu agaraw. Əggâzax dəx alxarar dəx aytedan win ganninen əs bahu əmosan imədrayan-in dəx əddin. ²⁷ Əzdâyax əşşəxəl iha alxazab əd talawayt, d əmikər n etəs aggen. Əzdâyax gələk əd fad, əyyəwana dəx əzum. Əzdâyax taysəst n asamed əd zəlləm. ²⁸ Adi ketnet, iwâr-tu əddəguz wa əgeş akk əzəl dəx masnat ta əgeş dəx Əlkənisaten kul. ²⁹ As dəx-asnat irkam awedan, a di-idəs rəkkəm-net nak da; as dəx-asnat d-eway awedan s əmidinet igi n abakkad, ad tarxu temsay dəx man-nin.

³⁰ Kud əşşil a fall-i imos igi ən baragan, wədi aratan win sakinen rəkkəm-in a fəl tan-z-aga. ³¹ İssân Məşşina di n Abba n Əməli Yaysa as, wərge bahu a əgeş. Attamalet esəm-net har faw. ³² Aləs wa izzozar əmənokal Arestas y əxrəm ən Damas, kala ad omar meddan s ad əbdədan dəx mawan n əxrəm fəl a di-əbəzan. ³³ Mişan tawagga dəx azmam zəwwəran, tawasarasa əs fənetər ihân axalla wa ixlayan axrəm, əddərragax-as.

12

Targət ən Buləs əd təsasmit ta təhat taxəssa-net

¹ İlzâm-i igi n abarag. Kud wər infa igi-net wala da, ad aglay əmmâlay-awan aratan win di-issəkna Əməli əd win di-isannafalal. ² Əzdâyax aləs iyyan osâxan d Elməsix as kala ad immədkal har osa əjənna wa n əssa. Wər əssenax kud taxəssa-net a təmmədkalat den, wala dəx iman-net xas a əmmədkalnen, Məşşina xas a issanan. İla adi əmərədda maraw elan d əkköz. ³⁻⁴ Awalla əssânaş as aləs wədi, immidkal har osa aljannat, isla dəx-as awalan simaklalten as wər ifreg awedan emel-nasan dəx awal waliyyan, wala dəx xalal amel-nasan. Wər əssenax kud, taxəssa-net a təmmədkalat den, wala dəx iman-net xas a əmmədkalnen, Məşşina xas a issanan. ⁵ Ad aga abarag fəl awedan wədi, mişan wər tu-z-aga fəl man-in. Rəkkəm-in xas a fəl z'aga abarag. ⁶ Amaran kud areş igi ən baragan, da wər di-iga adi əmeskel, fəlas tidət a z'anna. Mişan ad ammazzaya d

igi-nasan id wər arey a di-ittəf awedan waliyyan day adag ogaran wa daχ-i əgan mazalan-in d awa ganna.

⁷ Isinafalal-i Məššina aratan əganen adkul wər nəla əddukad, adi a fəl di-igdal adakal ən man-nin s igi wa iga day alam-in əšənnan, imosan ənammazul n Aššaytan a di-izayazzaban fəl ad wər ədkeləy iman-nin. ⁸ Karad gamayan day tanamazray a əgey day Əməli a di-izəmməzzəy dər-əs. ⁹ Mišan inn-i: «Təgd-ək arraxmat-in; fəlas tarna-nin, rəkkəm a day tətəggu ənəfiləl wa ikmalan.» Day adi isaddawat-i igi ən baragan fəl rəkkəm-in, fəl a daχ-i təzdəy tarna n Əlməsix. ¹⁰ Adi a fəl di-isaddawat rəkkəm, əd tərəbbad, d alyazab, d ətəwədgaz, əd təməyutar fəl əddəlil n Əlməsix. Fəlas alwaq wad ərkama, ənta a daχ əssoheç.

Awa idgazan Buləs day batu ən Kəl-Korent

¹¹ Təşahhaşşalam-i əmazal imosan igi ən baragan əs əmeskel ças a t-itaggin; ənta kawanay as ihor a fall-i təsanamalam, fəlas kud wər əmosaχ arat da, wər di-ogaran nəmmuzal-nawan wər nəla tulat win di. ¹² Alçalamaten ən tişit-in anammazul wa n tidət tiwagganat gar-ewwan əddəwnat əd zəmmerat, igâ awen s alçalamaten əd təjubab əd təlməçjupaten. ¹³ Arat iyyanda ças a çur-wan wər əgeç, əs Əlkənīsaten šin hadatnen əgeç-qu çur-əsnat, a t-imosan as wər daχ-wan əgmaya tadhəlt waliyyat. Surəfat-i-id ark amazal wədi!

¹⁴ Əmərədda simâtaga y a dawan-in-agay assa wa n karad, amaran wər dawan-z-əqqələy əzuk; fəlas wər gəmməyay awa təlam, kalar kawanay a gammaya. Wərgəç bararan a iwar ad assansin arat iyyan i marwan-nasan, kalar imarwan a iwar ad assansin arat i bararan-nasan. ¹⁵ Nak za, isidawat-i a fall-awan akfa təla-nin kul, akfa harkid man-nin fəl əddəlil-nawan. Awak da dawan-əge tara togdat d awa, ad ifnəz adi ta di-təgam kawanay? ¹⁶ Təssānam as wər dawan-əmosaχ əzuk, mišan təgannim əməkkerrəs a əmosaχ, əgeç-qat daχ-wan əs təkərras-in. ¹⁷ Məni təməwit tas kawan-əkkərrasaç? Awak iyyan daç meddan win kawan-in-əssoka a daç-wan itšan arat? ¹⁸ Nak a onsayan Titəs əgmaya daç-as a kawan-in-akku, əşşədawaç-q-in d amadray-nana daç əddin wa təzdayam. Awak arat iyyan a daç-wan itša Titəs? Awak wərgəç nak dər-əs tarrayt iyyadda as nəlkam s ənəyat iyyadda? Awak wərgəç almasal iyyanda as nəlkam?

¹⁹ Awak tədma a təgam, awal ketnet wa əgeç day batu ta, agamay a sər-əs nətaggu aggaz daç-wan iman-nana? Kala! Dat Məššina ad nəşawal, əs tarrayt ən tassaç-nana d Əlməsix. Amaran, imaran-nana, əssənət as arat kul

wa nəttaggu tənfa-nawan a fəl tu-nəttaggu. ²⁰ Eksudaḡ a kawan-in-asa wər oggema taḡara-nawan, kawanay deḡ, wər toggemam ta-nin; əksudaḡ as mijas əllanat-tu tamazaḡen gar-ewwan, əd manjaḡ, d aššar, d əzgən, əd tənnawen, d ədkul ən man, əd tənajarwayat, wər təgəmməyam ar tənfa ən man-nawan. ²¹ Eksuda deḡ a kawan-in-asa iləs-i Əməli-nin Məššina əzəbəz ən təkarakit ḡur-wan; əksudaḡ ad əḡšədan man-nin, fəlas wiyyad daḡ-wan aggotnen a wər nəmməzzay d igi ən bakkadan win as kala a tan-taggin, wər ətuban deḡ daḡ igi ən mazalan samadasnen win taggin, d igi n əzzəna əd mazalan zizallatnen win taggin.

13

Igi daw aḡaf d əsəmmutəḡ y əšikəl wa n karad

¹ Iki-nin y-awan wa n karad awa. Ənnan Əlkəttaban: «*Taytəst kul, təḡəyya n əššin aytedan madeḡ karad a tat-isisuhen.*» ² ḡur assa-nin y-awan wa n əššin, əssinkadaḡ aytedan win di wər nəmməzzay d igi ən bakkadan, əntanay d aytedan kul win hadatnen. Əsənkəd za wədi da a dawana-əgeḡ əmərədda harwa da əgguga, əs: As kawan-in-oseḡ wər t-illa awedan itaggin ibakkadan, as z'aqqamin wər iwwəddab ³ dad zamas təgamməyam a dawana-attaddu as Əlməsix a sər-i iššewalan. Amaran Əlməsix wər kawan-issəkna iba ən fərregat n arat, kalar issikn-iwan təlät-net tarna. ⁴ Fəlas illikan as irkam alwaḡ wa daḡ itawataytay fəl təgəttawt, mišan iddar-du əs tarna ən Məššina. Illikan deḡ as nakkanay da nərkam fəl əddəlil ən tassaḡ ta nəḡa d Əlməsix, mišan əs tarna ən Məššina ad naku təməddurt ta iga Əlməsix, fəl əddəlil n əššəḡələn win dawana-nəttaggu.

⁵ Şaggarat iman-nawan, təssənam kud tidət daḡ əs təzzigzanam! Ərəmat iman-nawan! Wər təssenam as ḡaysa Əlməsix iha iman-nawan? Meḡ əzəḡzan-nawan a wər nəzmer i şaggara! ⁶ Amaran əgeḡ attama-nin daḡ as, ad tənəyam tarḡim deḡ s as, nakkanay da nənjâx daḡ şaggara wədi, issiknaḡ as nakkanay inəmmuzal win tidət a nəmos. ⁷ Nətattar əs Məššina a dawana-igdalan igi ən təkma waliyyat. Wər dawana-nətəttər fəlas nənjâx daḡ əššəḡəl wa ḡur-wan nəḡa, kalar fəl tara n ad tagim awa olaḡan, kuddeḡ as itiwattaf as nakkanay wər nənjex. ⁸ Fəlas wər nəfreg əməzrəy ən tidət, kundaba ḡas tebadday fall-as. ⁹ Isifilawasana rəkkəm wa nəḡa, ənta kawanay təssohem. Awalla nətattar a iknan tebadday-nawan daḡ əzəḡzan. ¹⁰ Adi a fəl dawana-in-kattaba harwa da əgugaḡ-qawan, fəl ad wər addarara s a dawana-əḡa ərruḡmatan əsəsnen as kawan-in-oseḡ, fəlas tanaya ta di-ikfa Əməli fall-awan, ikf-i-tat fəl ad

əşxəla day anamod wa kawan-z-issukin afalla, wərgex wa kawan-z-ijəbbərəjjen.

Təsəxtəmt: Ənnəsixatan d assalaman win təzərəst

¹¹ Əmərədda, imədrayan-in, fəliwəsət! Əqqəlat aytedan əkmâlnen; tinəməgginen ənnəsixatan; tənimmannakam gar-ewwan. Iməlet alxer gar-ewwan. Əddi a dağ-wan issən Məşşina di ihakkin tara d alxer. ¹² Tinəməggat assalam zəddigan. Əhulan-kawan-in mizdagan kul win əllanen da da.

¹³ Əgmâya dağ Məşşina a kawan-ikfan ketnawan arraxmat n Əməli-nana Ƴaysa Əlməsix, əd tara ta n Məşşina əd tassağ n Infas wa Zəddigan.

Şirawt ta iktab Buləs i Kəl-Galatəya

İsənti

Təhult

¹ Şirawt a din-təfâlat Buləs imosan anammazul a du-wər-zammazalan aytedan, wala deş izimazal-t-id awedan waliyyan. Kalar Məşşina di n Abba s ənta a d-issənkaran Ƴaysa daş təmattant, əd Ƴaysa Elməsix iman-net a di-du-zammazalnen. ² Nahul-in Elkənisaten şin n akal ən Galatəya nak harkid mədrayan-in win şur-i əllanen. ³ Ig-awan Məşşina di n Abba-nana d Əməli-nana Ƴaysa Elməsix arraxmat d alxer. ⁴ Ƴaysa Elməsix ənta a ikfan iman-net fəl a danax-agəz daş bakkadan-nana, ixləs-ana deş daş talbast n əddənet ta n əmərədda, inimannak awen əd tara ən Məşşina di n Abba-nana, ⁵ a ilan tanaya har faw! Amin.

Əlinjil iyyanda

⁶ İqqan-i eşaf wəllen əsətrəb wa təgam agamad ən batu ən wa kawan-d-işran əs tarrayt n arraxmat ta d-eway Elməsix, təkamam y əlinjil iyyan ən bahu. ⁷ Əssənət əs wər t-illa əlinjil waliyyan ar wa dawan-əməla. Aytedan şas a t-əllanen a kawan-şawaşnen, saşraşan Əlinjil n Elməsix. ⁸ Amaran i igan isalan n Əlinjil wər nəmos win dawan-nəga, gər nakkanay iman-nana wala angalos a d-ifəlan ijənnawan, wədi itəwəlxənet! ⁹ Arat wa ənney-awan-tu kala da, amaran a dawan-t-ələsa tənna əmərədda: As dawan-iga awedan iyyan isalan n Əlinjil wər nəmos win as təslam təqbalam-tan, wədi itəwəlxənet! ¹⁰ Ma tənnam: Awak əmərədda aytedan a daş gammaya saşmar meş Məşşina? Awak aytedan as gammayaş a dasan-əgrəza? Ənnar harwa da gammaya a di-iren aytedan, wər z'əqqələş akli işbâdan Elməsix.

Buləs ibillan fəl Əlinjil

Təməwit tas iqqal Buləs anammazul

¹¹ Arat da was areş a daş-as təssənam imədrayan-in: Əlinjil wa əmmala, wər d-ifel aggadəm. ¹² Fəlas nak iman-in da wərgəş aggadəm a di-t-ikfan wala deş isisaşr-i-tu. Kalar Ƴaysa Elməsix iman-net as di-t-isannafalal.

¹³ A igan da təslâm alxal-in dat awa harwa ad əheş əddin wa n Kəl-Əlyəhud. Azzaman di əkney wəllen əssus n Elkənisat ən Məşşina, gammaya d əhluk-net. ¹⁴ Harwa

ad əheç əddin wa n Kəl-Əlyəhud, oğarəç kəl-tawşet-in aggotnen win jəytan-in əddəguz daç əddin, fəlas gəlleyat tagget a əgeç daç ləkkum y alçadat ən marawan-in.

¹⁵⁻¹⁷ Məşşina a di-isannafranan, harwa da aheç tadist n anna-nin, iyr-i deç s arraxmat-net y ad t-əçbada. Amaran assəya wa das-igraz a di-isənnəfiləl Barar-net fəl ad əmələç isalan-net a tan-imosan Əlinjil y aytedan win wər nəmos Kəl-Əlyəhud, assəya wədi daç ad əkkeç Arabəya, dəffər adi əqqala-du Damas, da wər əşşəwwarəç awedan waliyyan, za wər əggəzzaya əs Yerusalam y ad əssuməra tanat meddan win di-azzarnen tişit ən nəmmuzal.

¹⁸ As əgeç karad elan dəffər awen, əkke Yerusalam fəl ad ammanayəç əd Qayfas nəməzdəya dər-əs, əgeç çur-əs maraw adan əd səmmos. ¹⁹ Wər ənaya waliyyan daç nəmmuzal win hadatnen. Yaçub wa n amadray ən Үaysa, di n Əməli-nana, ças a ənaya. ²⁰ Silakanəç-awan dat Məşşina as, isalan win dawan-in-kattabaç da, wər əmosan bahu. ²¹ Əgmada Yerusalam əkkeç amaçal wa n Surəya əd wa n Kilikəya. ²² Alwaç wədi aytedan n Əlkənisaten şin Yahudəyya, wər di-əzdayan. ²³ Əslân ças âs: «Aləs wanad a danaç-iknan əssus da, əmərədda itaggu isalan n Əlinjil was kala ad ira əjəbbərəçji-net.» ²⁴ Arat wen eway-du sər-san igi ən təmalen i Məşşina daç batu-nin.

2

Buləs ad nəmmuzal win hadatnen

¹ As əgan maraw elan d əkkoz dəffər awen əlasa əgəzzəy əs Yerusalam nak əd Barnabas, əddewa deç əd Titəs. ² Məşşina a di-d-isannafalalan as iwar-i iki ən Yerusalam y a daç-as əmələç Isalan n Əlinjil win tagga y aytedan win wər nəmos Kəl-Əlyəhud. Arat wen amaran əkneçqu wəllen emel i muzaran n Əlkənisat ən Yerusalam win ogarnen ətəwəsəçmar, fəl təksəda n ad abbannan əşşəçəl wa əgeç əd wa z'aga dəffər awa. ³ Əqbalan-i nak əd Titəs a dər əddewa, imosan iyyan daç Kəl-Əlyunan, s əmənəkəd da wər immənəkəd. ⁴ Awen wər t-igdel iguz wa danaç-əgan məzzəçgan ən bahu wər nəmos arat daçna, kalar iguz ças a dana-d-əgan fəl ad əssənan əmmək was nəşaçyal tədarfit ta danaç-ikfa Əlməsix Үaysa. Ərân a danaç-əssuçəlan əkkəlu wa nəga daç əşşəriçə wa n Əttawret. ⁵ Mişan aytedan win den wər dasan-nəga wala arat n amazay ən tərəddawt s awa əran. Arat wen nəçay fəl aggaz y-awan tidət ta n Əlinjil. ⁶ Aytedan amaran win ogarnen ətəwəsəçmar – wər əzləya daç awas kala ad t-əmosan: Məşşina wər itəçgu təmərıt! – Aytedan

win tawasaymarnen en, wər di-šahhaššalan wala. ⁷ Kalar əgran-in as isalan n Əlinjil tiwaggan-du daɣ əfus-in y a tan-əməla y aytedan win wər nəmos Kəl-Əlyəhud, zund əmmək as tawaggan daɣ əfus ən Butros y tan-agu y aytedan win Kəl-Əlyəhud. ⁸ – Məššina ikfa Butros fərregat n ad iqqəl anammazul-net əs Kəl-Əlyəhud, nak amaran ikf-i fərregat ən tišit n anammazul-net s aytedan win wər nəmos Kəl-Əlyəhud. – ⁹ Yaqub əd Qayfas əd Yaxya itiwassannen daɣ tišit ən təgəttawen n Əlkənisat əgran-in arraxmat ta di-təwaggat, əqbəlan-ana nak əd Barnabas əssəknan-ana tassaɣ ta gər mədrayan. Əmmək en da as əqbalan as nakkanay ad nakku aytedan win wər nəmos Kəl-Əlyəhud, əntanay amaran akkin Kəl-Əlyəhud. ¹⁰ Əgmāyan daɣ-na ɣas ad nəkittəw šiləqqawen. Arat wen amaran nak ədgāza daɣ igi-net.

¹¹ Mišan assaɣa wa d-osa Qayfas aɣrəm n Antəyoxəya, əššewala fall-as udəm s udəm id tidət a wər iga, ¹² fəlas dat assa n aytedan wər nəggət win d-əššokalnen ɣur Yaqub, idarraw imensewan d aytedan win wər nəmos Kəl-Əlyəhud; mišan as t-in-osan aytedan win, igaz šin n awer n aganna, fəl təksəda n əlməsixitan win as ələsəl-nasan Kəl-Əlyəhud zizawatnen daɣ alɣadaten n Əttawret. ¹³ Kəl-Əlyəhud win hadatnen n əlməsixitan əntanay da əgan awen da, əɣbaran arat was əzzəgzanan zun awa iga Qayfas, har as Barnabas iman-net da ilkam i təmənufəqa-nasan. ¹⁴ Mišan assaɣa wad ənayax as wər zalalaɣan daɣ ləkkum i tarrayt ən tidət ta n Əlinjil, ənnex i Qayfas dat mədrayan-nana kul: «Kay was imos ələsəl-nak ag Əlyəhud, təgeɣ təməddurt tolat əd ta n awedan wər nəmos iyyan daɣ Kəl-Əlyəhud, toyyex tarrayt ta n Əttawret. Daɣ adi manəmmək as za təšəhhəššəlay aytedan win wər nəmos Kəl-Əlyəhud ləkkum y alɣadaten n Əttawret?»

Aytedan kul əgrawan taqqat s əzəgzan əs ɣaysa Əlməsix

¹⁵ Nakkanay as imos ələsəl-nana Kəl-Əlyəhud, wər nəmos «inasbakkadan» šila n aytedan win wər nəssen Məššina. ¹⁶ Dər iga awen da aggadəm wərgex ləkkum i tarrayt ta n əššəriɣa wa n Əttawret a t-ihakkin taqqat ɣur Məššina, kalar əzəgzan əs ɣaysa Əlməsix. Awen da a fəl as nakkanay da nəzzəgzan s Əlməsix ɣaysa fəl ad nəgrəw taqqat s əzəgzan s Əlməsix wərgex əs ləkkum y əššəriɣa wa n Əttawret. Awalla wər t-illa awedan waliyyan a z'igrəwan taqqat ɣur Məššina əs ləkkum y əššəriɣa wa n Əttawret.

¹⁷ Mišan as imos as, daɣ agamay wa nətaggu taqqat əs tərtəyt n Əlməsix, itawanay-du as nakkanay da nətaggu ibakkadan win taggin aytedan win wər nəmos Kəl-Əlyəhud,

dağ adi Əlməsix a danağ-illilan s igi n abakkad? Kala Kala! Wər ilkem ad iga adi! ¹⁸ As əlasax akaras n awa jabbarajjex a t-imosan tarrayt ta n ləkkum y əşşərixa wa n Əttawret, ad sənəfiləlay as nak ənəmmezrəy a mosa. ¹⁹ Nak əssəbab n əşşərixa a fəl əmməzzayax əd təməddurt ta ihakku əşşərixa. Arat wen kul iga fəl ad iqqəl as təməddurt-in tartəyt əd Məşşina a dağ təga. Nak ab-i fəl təgəttawt əddəway d Əlməsix. ²⁰ Əddâra mişan ab'as imos as nak a iddaran, kalar Əlməsix a iddaran iha iman-nin. Əmərədda təməddurt-in ta n tişit n aggadəm, əgeq-qat s əzəgzan əs Barar ən Məşşina as awa di-iga dağ tara, iman-net a ikfa aba-tu dağ adag-in. ²¹ Dağ adi wər z'ugəya s ad əqbəlay arraxmat ən Məşşina əqqəla-du tarrayt ta n ləkkum y əşşərixa wa n Əttawret, fəlas ənnar ləkkum y əşşərixa a ihakkin taqqat xur Məşşina, wədi Əlməsix bannan as t-aba!

3

Əzəgzan a igarrawan arkawal

Tarrayt ta n əzəgzan mey ta n əşşərixa?

¹ Xa Kəl-Galatəya win aljahilan! Ma işwan tayttay-nawan? Awak wərgex dat şittawen-nawan a dawan-təbbəyyan təmattant ən Yaysa Əlməsix fəl təgəttawt ta fəl itawataytay? ² Əsəstan iyyanda xas as arex a dawan-t-aga, a t-imosan as: Awak ləkkum y Əşşərixa wa n Əttawret a kawan-ikfan Infas wa Zəddigan, mey əzəgzan wa təgam əs salan n Əlinjil win as təslam? ³ Awak igrâw-kawan iba n tayttay ogdân d adi? Awak dəffər as təssintam əs mazalan win ləkkum y Infas ən Məşşina, tara a təgam əmərədda ad tassandim əs mazalan win təgam kawanay iman-nawan? ⁴ Awak aratan win təjjərabam dağ təməddurt-nawan kul əqqəlan bannan? Wər t-illa əmmək as z'abbannanan! ⁵ Tehakkay ta kawan-iga Məşşina Infas-net di Zəddigan, iga dağ-wan dəx təlməxjujaten, awak ləkkum-nawan y Əşşərixa wa n Əttawret a fəl dawan-iga awen, mey əzəgzan-nawan əs salan n Əlinjil win as təslam? ⁶ Aktiwat-du awa ənnan Əlkəttaban s ənnəbi İbrahim as ənnan: *«İzzəgzan əs Məşşina, awen dağ a fəl t-ikfa taqqat.»*

⁷ Dağ adi əssənət as aytedan win əzzəgzannen əs Məşşina əntanay a mosnen bararan n İbrahim. ⁸ Fadda Əlkəttaban ənnân harwa dat əzəl: Aytedan win wər nəmos Kəl-Əlyəhud, əssəbab n əzəgzan-nasan a fəl z'iqbəl Məşşina taqqat-nasan. Awen dağ a fəlas Əlkəttaban əmâlan isalan n Əlinjil win y İbrahim a irəwan as ənnan:

«*Ad əgrəwnat tawşeten kul n əddənet albaraka s əssəbab-nak.*»⁹ Emmək en dağ as aytedan win əzzəgzannen əs Məşşina, əntanay a z'əgrəwnen albaraka wa igrəw əməzzəgzən İbrahim.

¹⁰ Amaran aytedan win saffallanen fəl ləkkum-nasan y əşşəriya wa n Əttawret, win di təsəlkaht-nasan tulxant, fəlas ənnan Əlkəttaban: «*Təwəret tulxant awedan kul wa wər nəbbərdag faw y əşşərədan kul win əktabnen dağ Əttawret.*»¹¹ Dağ adi wər t-illa awedan igrəwan əs ləkkum-net y əşşəriya taqqat xur Məşşina fəlas a ənnan Əlkəttaban: «*Awedan wa oğadan dağ tarrayt ta n əzəgzan a igarəwan təməddurt təynəyat.*»¹² Amaran əşşəriya wər idrew əd zagzan wala. Kalar ənnan Əlkəttaban: «*Əşşəriya ənta a z'akfin təməddurt y aytedan win d-əssəndanən əşşərədan-net.*»¹³ Əlməsix ikkas-ana-du dağ tulxant ta danağ-issəwar əşşəriya wa n Əttawret, idkal-tat dağ adag-nana, id Əlkəttaban a ənnanən: «*Təwər tulxant awedan kul wa itawaşalayan əşək.*»¹⁴ Arat wen ig-ay Əlməsix Ƴaysa fəl ad iqqəl tarrayt y aytedan win wər nəmos Kəl-Əlyəhud y ad əgrəwan dağ albaraka n İbrahim, nəgrəw ketnanağ əs tarrayt n əzəgzan İnfəs was iga Məşşina arkawal-net.

¹⁵ İmədrayan-in, a dawan-aga almasal s arat taggin aytedan: As iktab awedan imateran-net əs təməwit təlkəmat y əşşəriya, wər t-illa i ifragan a dər-san d-iqqəl dəffər adi gər za y a dağ-san ifnəz arat wala a dağ-san t-işşitu.¹⁶ Amaran İbrahim d əzzurrəyya-net as iga Məşşina arkəwalən. Wər itawanna: «y əzzurrəyyatan-net», zun as ila əzzurrəyyatan aggotnen, kalar iyyanda xəs, fəlas a das-itawannan: «*əzzurrəyya-nak*», almağna Əlməsix.¹⁷ Dağ adi ənta da awas arex tənna-net: Arkawal ən tassağ iga Məşşina kala da, wər tu-z-iməs əşşəriya wa n Əttawret a d-osən əkkozat təmad n awatay əd karadat təmərwən dəffər awen, iqqəl as arkawal wen ab'as t-illa.¹⁸ Amaran as iqqəl as əşşəriya a ihakkin təkasit ten, adi za ab'as imos as arkawal wa iga Məşşina y İbrahim a işxalan. Arkawal wen amaran, tarrayt-net as iga Məşşina arraxmat-net y İbrahim.

Tassağ d Əlməsix

¹⁹ Dağ adi mafel osa-du əşşəriya wa n Əttawret? Əşşəriya wa itiwaşata-du fəl a du-tumman təmazrəyt n aytedan iket di a d-itawad əzzurrəyya n İbrahim s ənta as iga Məşşina arkawal. Əşşəriya wen izzibbat-du əs tarrayt n angalosən, amaran aggadəm a imosən əməşşewəl dağ batu ten.²⁰ Əməşşewəl amaran wər sər-əs təga addararat ar s ad

t-illa awedan iyyan was z'iššiwəl, Məššina amaran nəssan as ɣas-net a imos.

²¹ Awak almaɣna n awen as əššəriɣa immizray arkawalan ən Məššina? Kala Kala! Wər ilkem ad iga adi! Fəlas ənnar d-itiwakfa əššəriɣa iyyan ihakkan təməddurt taynayət, wədi illikan as ləkkum y əššəriɣa as za tətəwəgrəw taqqat.

²² Kalar Əlkəttaban əməlan əs arət ketnet ilə fall-as abakkad tarna fəl ad iqqəl əs: Arat was iga Məššina arkawal-net kundaba inda fəl məzzəgzan, fəl əddəlil ən təlyudəla ən ɣaysa Əlməsix.

²³ Dat assa ən tarrayt ta n əzəgzan, ig-anax əššəriɣa iməskəsa, ittaf-ana har d-ewad alwaq wa daɣ danax-isannafalal Məššina tarrayt ta n əzəgzan as irəw təzay-du.

²⁴ Daɣ adi əššəriɣa a danax-isassaɣadan har d-osa Əlməsix, fəl ad nəgrəw taqqat əs tarrayt ta n əzəgzan. ²⁵ Amaran dad zamas tarrayt ta n əzəgzan tosa-du, wədi ab'as danax-isassaɣad əššəriɣa.

²⁶ Fəlas ketnawan as təmosam bararan ən Məššina s əssəbab n əzəgzan wa, daɣ tassaɣ d Əlməsix ɣaysa.

²⁷ Awalla, ketnawan win tawasalmaɣnen daɣ aman daɣ tərtəyt d Əlməsix, Əlməsix en da a iqqalan zun telassay-nawan ta taynayət. ²⁸ Ab'as əzlayan Kəl-Əlyəhud, wala Kəl-Əlyunan, wala eklan, wala ilallan, wala əzlâyan meddan əd tədoden, fəlas ketnawan awedan iyyanda a təmosam daɣ tassaɣ d Əlməsix ɣaysa. ²⁹ Kud Əlməsix a kawan-ilan, wədi bararan n İbrahim a təmosam, təmosam iməkkusa-net əs tarrayt n arkawal wa das-iga Məššina.

4

¹ Arat da was areɣ a dawan-t-anna: Amakkasu, iket mədrəy wər izlay d əkli, kuddeɣ as ənta a ilan arət kul.

² Aytedan win dər-əs ənnəttafnen əd win ənnəttafnen əd təɣawšiwən-net as ilkam i tanat-nasan iket wər d-ewad alwaq wa imal abba-net. ³ Nakkanay da harwa ad nəmədrəy, wər nəlkem ar y əššərədan win as təgla əddənet, nəmos zun eklan-nasan.

⁴ Mišan as d-ewad alwaq wa iskat Məššina y awen, issəgla-du Barar-net, iggaz-du əddənet əs tarrayt ən təntut, ilkam y əššəriɣa wa n Əttawret, ⁵ osa-du fəl ad isəddərfət aytedan win əmosnen zun eklan n əššəriɣa. Osa-du deɣ fəl a danax-akfu tarrayt n a danax-iqbəl Məššina daɣ tišit ən bararan-net. ⁶ Amaran tišit-nana bararan ən Məššina, ənta a fəl d-iga Məššina daɣ wallan-nana İnfəs ən Barar-net. İnfəs en da a idkalan əməsli igannu: «Abba! Abba!»

⁷ Daɣ adi ab'as təmosaɣ akli, kalar barar ən Məššina a təmosa. Amaran dad

zamas təmosa barar ən Məşşina, wədi a kay-akfu Məşşina arraxmat tas iga arkawal-net i bararan-net.

Awa išşəwaşan Buləs daɣ batu ən Kəl-Galatəya

⁸ Ənəyat Kəl-Galatəya! Kawanay əstizarat wər təssenam Məşşina, təxbâdam imalan ən bahu, təmosam eklan-nasan.

⁹ Mişan əmərədda, dad zamas təssanam Məşşina, madeɣ dad zamas iqbəl-kawan Məşşina daɣ tişit ən bararan-net, manəmmək as za tələsam ləkkum y əşşərədan wər nənfa wala win as təgla əddənet, tələsam tişit n eklan-nasan?

¹⁰ Təsisahem wəllen ijilan, əd təlil əd təmeren, d elan wiyyad! ¹¹ İşşiwaş-i ad abbannan əşşəxəl issohen wa əgeɣ fəl əddəlil-nawan.

¹² Ya imədrayan-in, are daɣ-wan ad təqqəlam şilaten-in dad zamas nak da əmosa şilat-nawan. Wər di-təgem talbast waliyyat. ¹³ Təkittəwam tarrayt tas dawan-əgeɣ isalan n Əlinjil əs tizarat a tat-imosan tarrayt ən təwərnənin. ¹⁴ Təfrâgam a di-talkim madeɣ tagləfam-i fəl əddəlil ən rəkkəm d əbrur ən təxəssa-nin. Mişan wər təgem awen! Kalar təgam-i əlqəbulat əs zun əmosaɣ angalos a d-ifalan Məşşina, madeɣ Əlməsix Ƴaysa iman-net.

¹⁵ Daɣ adi ma iga alxer ən man was kala tu-təgrawam? Fəlas əsilakanax əs ənnar immikkan adi, şittawen-nawan da a tanat-du-təkəkkərem takfim-i-tanat. ¹⁶ Awak azangaw-nawan a əqqalax əmərədda fəl as dawan-əmmala tidət?

¹⁷ Əssənət as aytedan di saknin-kawan as ədgâzan daɣ-wan mişan ənnəyaten-nasan wər oleynat. Tara ɣas a əgan a kawan-zəmməzzəyan dər-i, fəl ad təlkəmam y idufan-nasan, təzəzzəwem daɣ-san. ¹⁸ Olax wəllen gəlleyat daɣ igi n awa olaxan daɣ alwaq kul, wərgəɣ alwaq wad əlle ɣur-wan ɣas. ¹⁹ Bararan-in, nak əllâsa alɣazab fəl əddəlil-nawan, zun tantut tətəggazat amzur, iket wər ikna Əlməsix iguz ən man-nawan.

²⁰ Areɣ wəllen ad əlle ɣur-wan daɣ amazay wa, are deɣ a dawan-əşşiwəlay s əmmək iyyan wər nəmos wa, fəlas iqqân aɣaf-in daɣ batu-nawan.

Masnat ta nəgraw daɣ əlqissat n Ənnəbi İbrahim

²¹ Əməlat-i: Kawanay a əranen ad tagim təməddurt a daɣ təlkəmam y əşşəriɣa wa n Əttawret, awak masnat a wər təgem awa inna əşşəriɣa? ²² Wərgəɣ ənnan Əlkəttaban: İbrahim ila əşşin bararan, iyyan teraw-tu təklit, wa hadan teraw-tu tələllit? ²³ Wa teraw təklit ihəw-du əs tarrayt ta n attas n əggadəm, wa teraw tələllit amaran ihəw-du əs tarrayt ta n arkawal ən Məşşina. ²⁴ Batu ta əlmital a təmos fəlas sanatat tədoden şin, əşşin arkawalan ən tassaɣ

a mosnat. Arkawal iyyan za iga fəl ədyağ wa n Sinay imos təhəwt ən bararan əmosnen eklan, amaran arkawal wa Hajara a tu-təmosat. ²⁵ Hajara amaran adyağ wa n Sinay a tat-imosan, ihân amadəl n Arabəya, təmmittal Yerusalam ta n əmərədda dağ əddənet, fəlas təha əkkəlu ənta harkid bararan-net. ²⁶ Sa hadan Yerusalam ta təhat ijənnawan tələllit a təmos, amaran ənta a təmosat zun anna-nana. ²⁷ Fəlas ənnan Əlkəttaban: «*Fəliwəs tantut ta wər nətilu bararan, kam a wər ides agaraw ən barar. Ədkəl əməslinam wəllen takna tədəwit kam a wər nəzday təlawayt ta n əmzur. Fəlas bararan ən tantut ta tətawaksanat ad ağəran win tantut ta wər izammazzay aləs-net igət.*»

²⁸ Kawanay amaran imədrayan-in, bararan as itiwagga arkawal-nasan a təmosam, zun Isəhaq. ²⁹ Mişan zun awas kala iga, wa d-ihəwan əs tarrayt ta n attas n aggadəm, əddəguz a itaggu wa d-ihəwan əs tarrayt ta n Infas ən Məşşina, amaran arat wen da a igan har əmərədda. ³⁰ Awak wərgəç a ənnan Əlkəttaban: «*Əstəç taklit əd barar-net, fəlas barar wa n təklit wər z'inəməkusət əd barar*» wa n tələllit?

³¹ Dağ adi imədrayan-in, əssənət as nakkanay wər nəmos bararan ən təklit, kalar bararan ən tələllit a nəmos.

5

¹ Əlməsix a danay-isaddarfen fəl ad nallallat. Awen dağ a fəlas zəzzəwətət wəllen dağ əlləllu wa, fəl ad wər təqqəlam əkkəlu.

Tədarfit n əlməsixitan

² Ənəyat, nak Buləs əmalay-awan kawanay əlməsixitan win wər nəmos Kəl-Əlyəhud əs as təmmənkadam wər dawan-z-aknu Əlməsix wala. ³ Amaran arat wa ad t-ələsaç emel y awedan kul wa itawasamankadan: Awedan wədi iwar-tu ad ilkəm y əşşəriça ketnet. ⁴ Təmmizzayam d Əlməsix kawanay win gəmmaynen taqqat əs ləkkum y əşşəriça; aba fall-awan arraxmat ən Məşşina. ⁵ Nakkanay amaran tarrayt n Infas wa Zəddigan as nəssəgad s ikus n aşşak i taqqat tas nəga attama n a danaq-qat-akfu əzəgzan. ⁶ Fəlas awedan was təlla tassaç gar-es d Əlməsix Үaysa, wər izlay əmənkəd d iba-net. Wər çur-əs imos arat ar əzəgzan. Əzəgzan amaran tara a tu-təsaknit.

⁷ Kawanay itittəy əzəgzan-nawan wəllen! Dağ adi ma dawan-iqqalan təsəwəç izzəbaz-kawan tarrayt wər nəmos ta n tidət ta n Əlinjil? ⁸ Tarrayt tas təqbalam iguz-net əddi, wər du-təfel wa kawan-d-içran, a t-imosan Məşşina. ⁹ Itawannu: «*Arat ən xamira a isakafan tagəlla ketnet.*» ¹⁰ Dər iga awen da ya, nak əgəç attama dağ

Əməli Ƴaysa daƷ talya-nawan: ƏgeƷ iduf n as wər za tagim imedranan əmmizraynen win-in. Mišan awedan wa sər-wan d-itawayan aššawaša a iqqal, ad awwaddab. ¹¹ Nak amaran imədrayan-in, ənnar emel a taggaƷ âs təga addararat s əmənəkəd, wədi məni əddəlil wa fəl tawadgaza harwa da? Kud arat wədi a sasaxra, adi za ətəwətəytay ən Ƴaysa fəl təgəttawt ab'as imos təsənkəft y aytedan! ¹² Amaran aytedan win kawan-əhanen əddi ətawayan-du sər-wan aššawaša daƷ batu n əmənəkəd, əƷrədanet azzam ən man-nasan!

Ənnəsixatan

Tarrayt ta n tara

¹³ Kawanay amaran imədrayan-in, iƷr-iwan-du Məššina y ad taddarfem. Eges tədarfit ten ad wər təqqəl arat a sər-wan d ewayan ləkkum y arak deranan ən tara ən man. Kalar akkiyyan daƷ-wan iqqəlet akli ən win hadatnen, iga awen əs tara. ¹⁴ Amaran əššəriƷa wa n Əttawret kul as inda daƷ batu iyyadda təmosat: «*Ad taga y əšəqqaqƷ-nak tara ta təgeƷ i man-nak.*» ¹⁵ Ənkədat y ad tətınəmədidad zun imudaran, tətınəməggim talbast gar-ewwan, fəl ad wər tənəməhləkam.

Tarrayt ta n Infas wa Zəddigan əd ta n aggadəm

¹⁶ Arat da was areƷ a dawan-t-anna: Ayyiwat Infas wa Zəddigan ad annadu daƷ təməddurt-nawan. As təgam adi, wər dawan-ilkem ad təmmozalam s arak deranan ən tara ən man. ¹⁷ Fəlas deranan win aggadəm iman-net, əllid a əmosan n Infas wa Zəddigan, Infas wa Zəddigan deƷ əllid a imos ən deranan win aggadəm. Əgân əməzrəy wa n as a sər-wan d-awəy awen ad tammazzayam d igi n awa təram. ¹⁸ Amaran as imos as Infas wa Zəddigan a daƷ-wan innodan, wədi ad ib'as fall-awan ixkam əššəriƷa wa n Əttawret.

¹⁹ Imazalan win aggadəm iman-net əmmunan. Əmosan: Əzzəna d ammadas d igi n aratan win ogarnen taxxaramt, ²⁰ d igi n əmadraw əd šaxawan d əzzəngu d əməstan, əd manƷaƷ d aššar əd tara ən man d əzəmməzəy n aytedan d əzəmməzrəy-nasan ²¹ d iba ən təla n igda, d əməswəd, d əsəssikəy daƷ tattay d aratan wiyyad olanen əd win. Ad dawan-ələsaƷ emel harwa əmərədda âs: Aytedan win tagginen aratan win di wər z'əggəzan TaƷmar ta n Məššina.

²² Aratan amaran win d-əfalnen Infas wa Zəddigan, əmosnen əllid ən win di, əmosan: tara əd təfalawist d alxer əd təzaydart əd man mallolnen, d əlluƷ d əzəgzan, ²³ əd talmat, d ənudi daƷ wallan-nana. Amaran wər t-illa əššəriƷa iššakan alxalan win di. ²⁴ Awalla, aytedan win

əkfanen iman-nasan y Əlməsix Ƴaysa, win di əkkasan-in dağ alxal-nasan tara ən man d arak deranan win dağ-san ənnodanən, əttəytayan-tan fəl təgəttawt ta fəl itawataytay Əlməsix.

²⁵ Dad zamas Infas wa Zəddigan a Ƴur du-təfal təməddurt-nana, nayyiwet-tu a dağ-na ixkəm.

²⁶ Ad wər nəqqəl aytedan əzzizwarnen iman-nasan. Mazzayatana əd tədləmt gar-ena d igi n attama dağ awa əlan midawan-nana.

6

Igi n awa olağan y awedan kul

¹ Imədrayan-in, as ewad jarraba awedan iga ark əmazal a iqqal, kawanay a əlkamnen y Infas wa Zəddigan, səssiğədat-tu əs man lammodnen fəl a d-iqqəl tarrayt ta tolağat. Ənkədat wəllen əd man-nawan fəl a kawan-wər-awəd jarraba kawanay da.

² Akkiyyan dağ-wan idkəlet əzuk ən win hadatnen. Emmək en dağ as du-za-tassandim əlqanun wa n Əlməsix; ³ fəlas wa igan i man-net iduf n as imos awedan zəwwəran, as iga awen wər imos wala, wədi bahu a itaggu i man-net. ⁴ Akkiyyan dağ-wan inzəret dağ mazalan-net. As inay as imazalan-net hossayan, əddi ad igrəw əddəlil n ad ifləs iman-net s əssəbab ən mazalan-net wərgex s ad išaşalu iman-net d awedan iyyan. ⁵ Fəlas awedan kul kundaba ibdad fəl mazalan-net. ⁶ Awedan wa itawasasəğrin awal ən Məşşina, iwâr-tu ad idrəw ərrəzəğan-net kul əd wa t-isasəğrin.

⁷ Ad wər tətəfam alxata: Məşşina wər t-illa i z'ayyu isəmmədrəy-tu. Awalla, amasa wa inbal awedan ənta a du-z-aləy. ⁸ Illikan əs awedan wa igan imazalan win tara ən man, aroz-net ad t-iqqəl awa d-itaway ləkkum y arak deranan, a t-imosan ahluk. Mişan wa itaggin imazalan win d-əfalnen Infas wa Zəddigan, ad igrəw aroz a d-ifalan Infas wa Zəddigan a t-imosan təməddurt ta təğlalət.

⁹ Ad wər nəğdəz igi n awa olağan, as iga adi ad nəğrəw arozan dağ alwaq wa itawaskatan y awen, as wər nəqqəl dəffər-na. ¹⁰ Dağ adi iket di ad nəğraw tarrayt n awen, taggiwatanəğ awa infan aytedan kul, wəllen imədrayan-nana dağ əzəgzan s Əlməsix.

Ərruğmatan win əlkamnen d assalaman

¹¹ Ənəyat əlxərəfan win zawwarnen a. Əfus-in as dawan-tan-in-kattaba. ¹² Aytedan win gammaynen a kawan-şəhhəşşəlan əs iwar-kawan əmənkəd, win di agamay a taggin a tan-əssəğməran aytedan. Amaran arat wa

gammayan wəllen, a tan-wər-ədgezan aytedan fəl əddəlil n əzəgzan-nasan əs tamattant n Əlməsix fəl təgəttawt. ¹³ Aytedan win tamankadnen da, wər əlkeman y əşşərixa fadda. Tara xas a əgan a kawan-səmmənkədan fəl ad agin ibaragan s awen. ¹⁴ Nak amaran wər ilkem ad sibaragağ âr əs təgəttawt ta fəl itawataytay Əməli-nana Ƴaysa Əlməsix. Tarrayt ten dağ ən təgəttawt en ənta a du-təwayat as ark aratan n əddənet a kul əmosan sər-i a ammen, zund əmmək as nak da əmosağ iri ammen dağ batu ta təqqalat əddənet. ¹⁵ Fəlas wərgəğ əmənkəd wala iban-net a imosan əlməxsud, kalar axluk aynayan əs tarrayt n Əlməsix a imosan əlməxsud. ¹⁶ Ihənəttətət Məşşina y aytedan kul win əlkamnen y anamod wa, akf-en alxer, s əmmək was iga adi i tamattay-net!

¹⁷ A obazan xur əmərədda, a di-wər-iləs awedan waliyyan əddəguz, fəlas elam-in əwarnat-tu təmijar ən ləkkum-in i Ƴaysa.

¹⁸ Ya imədrayan-in, əttâra s Əməli-nana Ƴaysa Əlməsix a kawan-ikfan arraxmat. Amin.

Širawt ta iktab Buləs i Kəl-Efez Assalam

¹ Awa nak Buləs, imosan anammazul n Elməsix Ƴaysa əs tərəddawt ən Məššina. Širawt ta təkka aytedan win əmosnen tamattay ən Məššina əhanen aƳrəm n Efez, almaƳna aytedan win əƳdalnen daƳ tassaƳ d Elməsix Ƴaysa. ² EƳmaya daƳ Məššina di n Abba-nana, d Əməli-nana Ƴaysa Elməsix a kawan-ikfan arraxmat d alxer.

Təməddurt ta taynat, almaƳna təməddurt ta təgat daƳ tassaƳ d Elməsix

Təməddurt ta daƳ nəzzəƳzan s Elməsix

³ Təmmal i Məššina, imosan Abba n Əməli-nana Ƴaysa Elməsix! Ig-anax albaraka daƳ tassaƳ-nana d Elməsix əs tahakkay ta danaƳ-iga əkkulluk n albaraka wa d-izazzabbat Infas wa Zəddigan daƳ jənnawan. ⁴ DaƳ adi, əssənatanax as harwa dat əxluk n əddənet a danaƳ-isannafran Məššina y ad nəqqəl i-net əs tarrayt n Elməsix fəl a dat-əs nəqqəl aytedan zaddognen wər iwer a imosan lahan, fəl ad nagu təməddurt təha tara. ⁵ Məššina ənta a danaƳ-isannafran harwa daƳ tizarat y a danaƳ-agu bararan-net əs tarrayt ən Ƴaysa Elməsix. Awen daƳ a igrazan i Məššina, ⁶ amaran ig-ay fəl ad nəmməl tanaya-net d arraxmat-net tas danaƳ-isabbalal əs tarrayt ən Barar-net a ikna tara.

⁷ Tartəyt əd Barar-net en da a dana-təkfət tədarfit əs tarayt n əzni-net. Tədarfit ten təmos təsureft ən bakkadan-nana, amaran nəgrāw-tat s arraxmat ən Məššina wər nəla əddukad ⁸ a fall-ana d-izizzabbat s igət, ikf-anax əzzənəfan kul ən masnaten d əƳərri. ⁹⁻¹⁰ Awen ig-ay s əsusən wa daƳ-na iga əssir ən tara-net. Əssir wen imos əšidəw n aratan kul win əhanen ijənnawan əd win əwarnen amaƳal fəl ad ittəf Elməsix tanat-nasan. Tarrayt ten ig-et-du harwa a irəwan s əssəbab n Elməsix, amaran awen da das-igrazan. Igā awen fəl ad assandu tarrayt ten daƳ alwaƳ wa das-iskat.

¹¹ Isinafran-ana deƳ Məššina harwa daƳ tizarat, əs tarrayt n Elməsix y ad nəqqəl i-net inimannak awen əd tarrayt ta d-iktab Məššina s ənta a itaggin aratan kul s əmmək was tand-ikta əd was iga tanat-nasan. ¹² Məššina ig-ānax awen fəl ad nagu təməddurt a daƳ-as nətaggu təmmalen fəl tanaya-net, nakkanay win azzarnen igi n attama daƳ Elməsix.

¹³ Kawanay da təslâm y awal wa imosan tidət a t-imosan isalan n Əlinjil win kawan-hakkinen əlxillas əs tarrayt n Əlməsix. Amaran as təzzəgzanam, wədi issəwar-kawan Məşşina əs tarrayt n Əlməsix ejwal issiknan âs tamattay-net a təmosam. Ejwal wen, imos-tu Infas wa Zəddigan as iga arkawal-net. ¹⁴ Infas wa Zəddigan en ənta a imosan tədagart ta tazzarat dəy awa dana-z-akfu Məşşina dəy jənnawan. Məşşina issiwar-anay ejwal-net iket di a du-tətawad tədarfit ən tamattay ta iskat i man-net. Arat wen kul ad t-agu Məşşina fəl ad təwəgginat təmmalən i tanaya-net.

Təwatray ən Buləs i Kəl-Efez

¹⁵ Awen dəy a fəlas, nak da, dəffər as əsleğ əzəgzan-nawan s Əməli Ƴaysa, əd tara ta təssəknam i mizdagan ketnasan, ¹⁶ wər kala ad əməzzayay əd godan i Məşşina dəy batu-nawan alwaq kul wa kawan-d-əktey dəy təwatriwen-in. ¹⁷ Əgammaya dəy Məşşina imosan Əməli n Əməli-nana Ƴaysa Əlməsix, imosan dəy Abba wa ilan tanaya, a kawan-akfu Infas wa ihakkin masnat, isinəfilil dəy aratan win əhanen ətənkul, fəl a tu-təssənam. ¹⁸ Gammaya dəy-as dəy ad aləm iwəllan[-nawan] fəl ad təkni əgərri n awa imos attama was kawan-ıyra, təssənam dəy awa dər ogdanat təhussay ən saymar wa igarraw Məşşina xurna nakkanay a n mizdagan, ¹⁹ təssənam dəy awa dər togda təzzəwwərt wər nəla əddukad ən tarna-net sər-nay nakkanay a əzzəgzannen əs mazalan əssohatnen ən tarna-net. ²⁰ Tarna-net ten işşixal-tat dəy Əlməsix, s əsənkər wa t-id-iga dəy təmattant d əsəxximi wa t-iga dəy əxil-net dəy jənnawan. ²¹ Ig-ay dənnəg taymar kul əd təmənukəla kul, əd tarna kul, d əlxəkum kul. Iga esəm-net dənnəg esəm kul wa t-illan gər za dəy azzaman win əmərədda, wala dəy azzaman win d-əzaynen. ²² Arat kul ig-ay daw daran-net, təzzar ig-ay əmuzar n arat kul dəy Əlkənisat, ²³ təmosat tayəssa-net. Tayəssa en amaran ənta a dəy ikannu Əlməsix əlkamalat, ənta a ihan edag kul.

2

Təmattant əd tanakra əs tarrayt n Əlməsix

¹ Amaran kawanay aba-kawan fəl aganna wa iqqalan tassağ əd Məşşina s əssəbab n arak mazalan-nawan əd bakkadan-nawan. ² Dat awa təşşokalam dəy arak mazalan win, təlkāmam y alxal wa n əddənət, təlkāmam y awa ira əmuzar ən kəl ətənkul win alhawa, a t-imosan infas wa ixkaman dəy nəmməzray ən Məşşina dəy əddənət. ³ Ketnana as tizarat nəmos arat dəy-san. Dat awa nəlkām

y arak deranan ən təxəswen-nana, nətamazal awa əranaŧ təxəswen-nana əd medranan-nana. Dağ adi təsəlkaŧnana əstizarat, âs nakkanay da, a danağ-iwər attadib ən Məşşina wa iwaran aytedan kul.

⁴ Mişan təhanint ən Məşşina wər təla əddukad. Amaran əddəlil ən tara tagget ta danağ-iga, ⁵ nakkanay as zun danağ-aba s əssəbab n ark mazalan-nana, ənta a fəl danağ-ikfa təməddurt əs tarrayt n Elməsix. Arraxmat ən Məşşina as təgrawam efsan. ⁶ Issənkar-ana-du nəddew d Elməsix Ƴaysa, isayğam-ana dağ jənnawan nəddew dər-əs fəl əddəlil ən tassağ ta dər-əs nəga. ⁷ Awen ig-ay fəl ad assaknu dağ azzaman win d-əzaynen igət wər nəla əddukad a təga arraxmat-net əs tarrayt n əlluğ-net y-anay fəl əddəlil ən tassağ ta nəga d Elməsix Ƴaysa. ⁸ Fəlas illikan âs arraxmat as təgrawam efsan, əs tarrayt n əzəgzan-nawan. Amaran wərgəğ kawanay a ğur d-ifal awen, kalar təhəkkut ən Məşşina a imos. ⁹ Wərgəğ imazalan win olağnen a hakkinen efsan, ənnar adi a igan əzzəzwəran aytedan iman-nasan. ¹⁰ Şixəllak ən Məşşina a nəmos, a d-ixlāk əs tarrayt n Elməsix Ƴaysa fəl ad nagu təməddurt dağ nətamazal awa olağan âs Məşşina a t-isammatagan harwa dağ tizarat y a tu-nammazal.

Tamattay taynayat: Tamattay ta n Məşşina

Kəl-Əlyəhud əd win tan-wər-nəmos əğân alxer əs tarrayt n Elməsix

¹¹ Dağ adi aktiwat arat wa: Dat awa təlâm alyalamat dağ təxəswen-nawan təssiknat as wər təmosam Kəl-Əlyəhud. Aytedan win ənnanen əmminkadan, gannin wər təmmənkadam. Əntanay amaran əmənəkəd-nasan wər imos âr arat əğân fassan n aggadəm. ¹² Aktiwat alxalat ta təham əstizarat. Azzaman win di wər təqbelam Elməsix, itiwagdal-awan tişit ən tamattay n İsrayil. Təmosam inaftağan dağ batu ta təqqalat arkāwal ən tassağ wa iga Məşşina. Alwağ wədi wər tələm attama waliyyan, wər tələm tassağ waliyyat əd Məşşina dağ əddənət. ¹³ Mişan əmərədda əs tarrayt ən tərtəyt-nawan d Elməsix Ƴaysa, kawanay win as kala ad təggugam Məşşina, təhozam-du əs tarrayt n əzni n Elməsix.

¹⁴ Elməsix ənta a imosan alxer-nana, ənta a issərtayan Kəl-Əlyəhud əd win tan-wər-nəmos ig-en arat iyyanda, irza tağərt ta tan-təzammazzayat, ikkas ənəməzənga gar-essan, əs tarrayt ən tağəssa-net ta ikfa fəl təğəttawt. ¹⁵ Arat wen ig-ay s ikus wa din-iga Əttawret d əlwajiban-net d

əššəredan-net. Iga alxer gər Kəl-Əlyəhud əd win tan-wər-nəmos əs tarrayt ən tassaq ta dər-san iga, ig-en tamattay iyyadda taynayət. ¹⁶ Təmattant ta iga Əlməsix fəl təgəttawt, ənta as issərtay Kəl-Əlyəhud əd win tan-wər-nəmos, ig-en tağəssa iyyadda. Ig-asan alxer əd Məššina, ikkas ənəməzənga gar-essan s ətəwətəytəy wa iga fəl təgəttawt. ¹⁷ Amaran osa-du y a dawan-agu isalan n alxer, a tan-imosan Əlinjil, kawanay a namaggagnen əd Məššina, iməl dəx alxer i win t-əhoznen. ¹⁸ Id Əlməsix ənta a ifragan a danağ-izənnəmihez ketnana əd Məššina di n Abba, əs tarrayt n Infas-net di Zəddigan.

¹⁹ Emmək en dağ as ab-as təmosam inaftaxan, wala iğərab. Kalar arət iyyanda a təmosam kawanay əd tamattay zəddigət ən Məššina, təmosam kəl ahan ən Məššina. ²⁰ Təmosam ehan əs inəmmuzal d ənnəbitan a mosnen šisəttəytay-net, imos Əlməsix Yaysa təhənt ta n təsəkəbəl-net. ²¹ Šihun šin as ikras ahan wen, kul əknənət ənəməttaf əs tarrayt ən tərtəyt d Əlməsix, əqqalnat ehan zəddigan n əlğibada əs tarrayt ən tassaq d Əməli. ²² Kawanay dəx tərtayam təqqalam əkərrus iyyanda fəl ad təqqalam təməzduq ən Məššina əs tarrayt n Infas wa Zəddigan. Awen kul iga əs tarrayt ən tərtəyt-nawan d Əlməsix.

3

Buləs imâl tarrayt təmosat əssir ta d-iga Məššina - Əššəğəl ən Buləs

¹ Awen dağ a fəl əmosa nak Buləs, amaskasaw n Əlməsix [Yaysa] fəl əddəlil-nawan, kawanay a wər nəmos Kəl-Əlyəhud. ² A igan da təgrāwam isalan n əzuk wa di-issəwar Məššina dağ batu n arraxmat-net ta di-tətawakfat fəl tənfanawan. ³ Almağna Məššina a di-isannafalalan əssir ən tarrayt ta d-iga, s ənta a əktaba da imos arət ən təfir. ⁴ As təğram awa əktaba da, ad tənəyam awa dər-ogda əgərri a əgeğ y əssir n Əlməsix. ⁵ Əssir wa, wər tətawakfa masnat-net y aytedan n azzaman win okaynen, zun əmmək was itawasanafalal əmərədda əs tarrayt n Infas wa Zəddigan i nəmmuzal n Əlməsix d ənnəbitan-net a zəddognen. ⁶ Əssir wen ənta da: Aytedan win wər nəmos Kəl-Əlyəhud, əd məzzəgzan s Əlməsix win əmosnen Kəl-Əlyəhud əgrāwan təkəsīt, əqqalan tağəssa iyyadda, əqqalan dəx arət iyyanda əs tarrayt ən tassaq ta əgan d Əlməsix dağ arkawal wa ihan Əlinjil. ⁷ Əlməsix en dağ as əqqalağ amaššəğəl-net a t-iğbâdan, s əssəbab ən tarna ən təhəkkut ən Məššina təgât s arraxmat-net ta əğrawa.

⁸ Nak a ogaran təmmədrəyt dəx məzzəgzan di ən mizdagan ən Məşşina ketnasan, mišan əgrāwax arraxmat ta, a tat-imosan: Igi y aytedan win wər nəmos Kəl-Əlyəhud isalan n Əlinjil, imosan isalan n arraxmaten n Əlməsix as tuwər-illa i ifrâgan əgərri-nasnat. ⁹ Sənnəfiləla dəx y aytedan [kul], əmmək was innəzzam Məşşina tarrayt ta, har tat-ixrad əsəkməl. Tarrayt ten, harwa dəx tizarat a tat-iga Məşşina a d-ixlakan arat kul, təmos əssir. ¹⁰ Ənəfilal wa təga tarrayt ta, ənta a du-z-awəyan əmərədda as tayməren əd təmənukəla šin jənnawan, ad əzdəynat assayfaten wər nəla əddukad a təmos masnat ta n Məşşina. Arat wen tarrayt n Əlkənisat as z'agu. ¹¹ Amaran awen ad agu s əmmək was t-innəzzam Məşşina imos arat ixlalan, ikmal-du dəx dəx Əlməsix Yaysa Əməli-nana. ¹² Tassaq ta nəga d Əlməsix Yaysa əs tarrayt n əzəgzan sər-əs a danax-təkfət tədarfit n ad nəfrəg ənəmihaz əd Məşşina əs təfləst. ¹³ Dəx adi əgmaya dəx-wan ad wər təqqəlam ələqqam fəl əddəlil n alxazab wa tagga da fəl əddəlil-nawan. Alxazab wa ənta a kawan-z-akfin tanaya.

Təwatray ta iga Buləs fəl ad tətəwəssən tara ta n Məşşina

¹⁴ Awen dəx a fəl əssəjada dat Məşşina di n Abba, ¹⁵ s ənta a igan esəm y id t-illa axaywan kul dəx jənnawan d amadal. ¹⁶ Awalla! Əgmâyax dəx-as ad aknu əssəsuhi ən wallan-nawan əs tarrayt n Infas-net wa Zəddigan s əssəbab ən tanaya-net təkməlat. ¹⁷ Onsâyaq-qu ad izdəx Əlməsix dəx wallan-nawan, əs tarrayt n əzəgzan-nawan, id təqqalam aytedan zizawatnen wəllen sihaddan dəx fəl tara. ¹⁸ Onsâyaq-qu dəx adi ad taknim əzəzzəwi dəx əzəgzan-nawan, təfrəgam ad təməsəsəgrim əd məzzəgzan di zaddognen kul dəx batu ən tara n Əlməsix təknât ilwi fəl aganna kul, ¹⁹ təzdəyam dəx tara ten təllât dənnəg masnat kul. Əddi a kawan-za-tədkər tanaya ən Məşşina s əmmək ikməlan.

²⁰ Əmmək en dəx âs Məşşina ifrâg ad agu y arat kul igi ofân wa dəx-as nəgmay, ofa dəx awa nəxil. Arat wen, itagg-ay əs tarna-net ta dəx-na təşxalat. ²¹ Igrəwet Məşşina ətəwəsəymar dəx Əlkənisat igâ awen dəx tassaq d Əlməsix dəx azzaman kul har faw. Amin.

**Əşşərədan aynaynen: Əsənnəfiləl n
ətəwəşəşinay wa danax-itawaggan**

4

Əzəzzəwi dəx ad təqqəl Əlkənisat arat iyyanda, a t-imosan tayəssa n Əlməsix – Ənəmənnak ən məzzəgzan

¹ Day adi arat da wa daɣ-wan gammaya, nak imosan amaskasaw fəl as əɣbaday Əməli: Kawanay a iɣra Məşşina, agiwat alxal inihaggan d ətəwəxra wa tətəwaggam den. ² Ʒqqələt faw aytedan wər nədkel iman-nasan, tilmadam, təqqələm iməzəzzəydar. Nəməqbələt gar-ewwan əs tara. ³ Ʒdgəzat faw daɣ agamay ən tartəyt ta ihakku Infas wa Zəddigan əs tassaɣ n alxer ta təllat gar-ewwan. ⁴ Tayəssa iyyadda a tu-təllat, d Infas iyyanda. Emmək en daɣ as Məşşina iɣr-iwan-du s ad tagim attama iyyanda, a t-imosan was du-tətəwəxram. ⁵ Əməli iyyanda a t-illan, ill-ay əzəgzan iyyanda, d alamaɣ daɣ aman iyyanda, ⁶ Məşşina deɣ iyyanda a imos, imos abba n awedan kul, ixkâm fəl i t-illân kul, itaggu igitan-net əs tarrayt n id t-illa iyyan, irtây deɣ d id t-illa iyyan.

⁷ Dər iga awen da ya, akkiyyan daɣ-na igrâw arraxmat ən Məşşina, ewâl awen s adagar wa t-ikfa Əlməsix daɣ əşşəxəl-net. ⁸ Awen daɣ a fəl ənnan Ʒlkəttaban: «*Iggəzzay əs daggan win ədkalnen, ewây win əhanen təla, təzzar iga šihəkkuten y aytedan.*» ⁹ Ma imos almaɣna ən batu ta n «iggəzzay»? Wərgəx almaɣna n awen as iras har imal daw amaɗal? ¹⁰ Wa d-izzəbben, ənta a iggəzzayan imal dənnəg jənnawan kul fəl ad idnəy edag kul d arat kul.

¹¹ Amaran Əlməsix, ənta a igan aytedan wiyyad inəmmuzal, iga wiyyad ənnəbitan, iga wiyyad imaggan ən salan n Əlinjil, iga wiyyad imadanan əd məssəsəxra. ¹² Šihəkkuten šin den ig-enat Əlməsix fəl əsəssuhi d əsəkməl ən məzzəgzan, fəl ad əfərgan əşşəxəl was təwəxran, y ad taknu təxəssa n Əlməsix assahat. ¹³ Emmək en daɣ as ketnanəx as za nəwəd ənəmənnək daɣ əzəgzan, iga awen daɣ təməzdəyt ən Barar ən Məşşina. Təsəlkamt n awen as ad nəqqəl iməzzəgzan əkmâlnen, tənifalal daɣ-na tišit təkmâlat n Əlməsix. ¹⁴ Ʒddi ad z'ib'as nəmos bararan madrornen, əddagnen sa əd sa əbbatan-tan əzzənəfan ən səssəxritan taggin nəsbuha ən məkkərras saxraknen aytedan. ¹⁵ Kalar əddi ad za nəmmal tidət, nag-as emel igân əs tara, nəttəy daɣ əkkulluk n anamod daɣ tarrayt ən wa imosan eɣaf-nana, almaɣna Əlməsix. ¹⁶ Ənta en daɣ a isadwalan təxəssa ketnet, ənta deɣ a ɣur du-təgarraw təxəssa assahat-net, iga awen daɣ tara. Ənta deɣ a isannamannakan təxəssa tənəmatfət əs səmməxras əssohatnen fəl ad təfrəg təslət kul igi n əşşəxəl-net.

Aggadəm wa irəwan d aggadəm wa aynayan

¹⁷ Day adi əggəyyəx əsilakanəx-awan s esəm n Əməli as: Wər imməkkan ad tələsam igi ən mazalan win taggin aytedan win wər nəmos Kəl-Əlyəhud, a wər nəlkem ar i

tayttay-nasan təmosat šibənnan. ¹⁸ Tayttay-nasan wər tat-
iha ənnur, əmosan inaftayan i tēməddurt ta təssəxmarat
Məššina s əssəbab n əljəhəl-nasan a sər-san du-tewây
taxart ən wallan-nasan. ¹⁹ Ab-as əssanan awa olağan wala
awa wər noley. Əššokalan dağ təmazrəyt, taggin imazalan
zizallatnen aggadəm, d iba n təla n igda dağ əzzənəfan kul
ən mazalan samadasnen, əknân tara n əddənet.

²⁰ Mišan kawanay wərgəx əmmək wen as təssanam awa
imos Əlməsix. ²¹ Dad zamas təgrâwam isalan n Əlməsix,
tətawasasaxram dağ tərtəyt dər-əs, wədi tətawasâsanam
tidət ta təhât Ƴaysa. ²² Almağna n awen ad tammazzayam
d alxal-nawan wa irəwan, a t-imosan alxal n aggadəm was
kala a tu-təmosam, tâwayan arak deranan-net s əxruk.
²³ Ʒqqələt aytedan işisanay Infas wa Zəddigan isimattay
taytween-nawan. ²⁴ Zund əmmək as ilassu awedan təbdoq,
təqqəlet təbdoq-nawan alxal aynayan wa d-iga Məššina.
Alxal wen, itinəfilil dağ taqqat əd tazdak šin təhakku tidət.

²⁵ Awen dağ a fəlas mazzayat d igi ən bahu. «Akkiyyan
dağ-wan işiwəlet tidət Ƴas y əšəqqax-net», id akkiyyan dağ-
na taslət a imos ən win hadatnen. ²⁶ «As kawan-iggaz
alham, ad wər tagim abakkad.» Ad wər tudu təfuk ih-iwan
alham. ²⁷ Ad wər taləmam y Iblis tarrayt as d-iggaz. ²⁸ Wa
imosan abaydag ammazzayət əd šikra, işšəşxəlet şixurad-
net, işxəlet əs fassan-net fəl ad igrəw tənfa a za uzan i
maddararan.

²⁹ A du-wər-təgməd batu waliyyat labasat imawan-
nawan. Kalar ad wər tətəggim ar batuten hossaynen a
za təggəz tənfa, as təga addararat s awen, əqqəlnat dəx
arraxmat i wa dasnat-islan. ³⁰ Ad wər təzəzzəkənzəram
Infas wa Zəddigan ən Məššina, fəlas tarrayt n Infas wa
Zəddigan en as kawan-issəwar Məššina ejwal-net y əzəl
wa n tədarfit ta n təzərəst. ³¹ Təgmədət-kawan i tu-təlla
təssəməmt, d əxəşəşi, d alham, əd təhərəşşet, d ərrəbdan,
d a iqqal aššar. ³² Tinəməggiwat awa olağan gar-ewwan,
akkiyyan iqqəl awedan təha təhanint, ləmmid i midiwan-
net. Akkiyyan dağ-wan isurəfet i win hadatnen zund
əmmək as dawan-isoraf Məššina əs tarrayt n Əlməsix.

5

Agiwat tēməddurt təgât dağ ənnur

¹ Dad zamas bararan ən Məššina ikna tara a təmosam,
wədi əlkəmat y almasal wa-net. ² Ʒqqələt aytedan
əššokalnen dağ tara, zund əmmək was danax-ira Əlməsix
har as ikfa iman-net i Məššina, imos təhəkkut əd təkutay
təlât xur-əs aqı izodan. ³ Nəməggəgat d əzzəna, əd

mazalan samadasnen a əqqalan, əd tara n əddənət. Aratan win di a du-wər-tammadkel batu-nasan fadda yur-wan. Awen daɣ as ihor ad t-agin mizdagan ən Məşşina. ⁴ Ad wər tətəggim aratan jargonnen wala batuten wər nəla almaɣna âs zun tanat-iga əmeskel, wala batuten jargonnen. Adi wər itəwəggu. Kalar taggiwat igodan i Məşşina. ⁵ Fəlas əssənət wəllen as, awedan kul wa itaggin əzzəna, wədi immidas, iga attama-net daɣ ərrəzəyan n aytedan, almaɣna ixbâd əssənəman, wədi wər z'igrəw adagar waliyyan daɣ taɣmar ta n Elməsix əd Məşşina.

Agiwat təməddurt ta taggin aytedan əhânen ənnur ən Məşşina

⁶ A kawan-wər-akkarras awedan waliyyan wala issəxrək-kawan əs batuten ən bannan, fəlas arat wen ənta a d-itawayan alham ən Məşşina s aytedan win nəffəllag. ⁷ Daɣ adi ad wər tilem tassaɣ waliyyat d aytedan win. ⁸ Fəlas illikan âs dat awa kala ad təham şiyay, mişan əmərədda təhâm ənnur daɣ tərtəyt d Əməli. Agiwat alxal wa taggin aytedan əhanen ənnur, ⁹ fəlas tənfa ta d-itaway ənnur təmos əzzənəfan n aratan kul win olaxnen, əd win oɣadnen əd win əmosnen tidət. ¹⁰ Dad zamas təhâm ənnur, wədi gammayat wəllen d ad təssənam awa igrazan y Əməli. ¹¹ Amaran ad wər tədrəwam wala əd mazalan ən bannan n aytedan win əhanen şiyay, kalar tugəyat sər-san təsafəggim-tan. ¹² Fəlas illikan as awa taggin aytedan win di daɣ əssir, isikarakad fadda awal daɣ batu-net. ¹³ Mişan as əffəggan aratan win, əwaran azzahir, ad nəfiləlan mazalan-nasan ezal a mallan. ¹⁴ Amaran arat kul wa daɣ innəflay ənnur, wədi ənnur a imos. Awen daɣ a fəl itawanna:

«Ənkər-in kay wa insan,
 Ənkər-in daɣ nəmməttan,
 Eddi a fall-ak
 isəmmələwləw Elməsix ənnur-net.»

¹⁵ Daɣ adi ənkədat wəllen y alxal-nawan, ad wər təqqələm zun imeskelan, kalar əqqələt imalan ən tayttay. ¹⁶ Ad wər təsabannanəm şimazayyaten şin təgarrawam, fəlas ark azzaman a nəha. ¹⁷ Awen daɣ a fəlas ad wər təqqələm zun aljahilan, kalar əqqələt aytedan əgranen awa fall-awan ira Əməli. ¹⁸ Amaran ad wər təsamaswadam iman-nawan s esmad, arat wədi əjəmməjəlləd a z'agu təməddurt-nawan. Kalar əqqələt aytedan idnây Infas ən Məşşina, almaɣna n awen as: ¹⁹ tinəməggiwat əlmaɣizatan gar-ewwan əs təsarnaten n Azzabur, əd təgaytalen, əd sakkən a d-əgmadnen yur Infas wa Zəddigan. Agiwat isakkən əmosnen təmmalen ən Məşşina. Agiwat awen y

Əməli s əwəl iyyanda. ²⁰ Tigudəyat faw arat kul i Məşşina di n Abba, s esəm n Əməli-nana Ƴaysa Əlməsix.

Inəmad ən tassaq win aynaynen

Tassaq gər aləs əd taɣurəs – Aɣaywan n əlməsixitan

²¹ Akkiyyan daɣ-wan abbardaget i win hadatnen, təgâm awen daɣ təksəda n Əlməsix. ²² Şidoden, bardagmat i meddan-nakmat zun əmmək as təbbərdagmat y Əməli; ²³ id aləs ənta a imosan əmuzar ən təntut zund əmmək as Əlməsix a imosan əmuzar n Əlkənisat təmosat taɣəssa-net, amaran ənta iman-net a imosan Ənəssefsi-net. ²⁴ Zund əmmək as təbbərdag Əlkənisat y Əlməsix, tantut kul tabbardaget y aləs-net daɣ arat kul.

²⁵ Meddan, iriwat şidoden-nawan, s əmmək as ira Əlməsix Əlkənisat har as iman-net a ikfa fəl əddəlil-net, ²⁶ fəl a tat-iskət əs man-net dəffər as tat-izzizdag s aman, almaɣna Awal ən Məşşina. ²⁷ Awen igmay sər-əs ad taknu Əlkənisat şihussay, wər tat-təwer a imosan tətənəqqet, wala ənəkəmmi, wala arat zun awen, fəl ad tizdag daɣ a imosan lahan. ²⁸ Əmmək en daɣ âs meddan da iwâr-tan ad iren şidoden-nasan zun tara ta əgan i man-nasan. Awedan wa iran taɣurəs, wədi iman-net a ira. ²⁹ Illikan âs wər kala ad itawanay awedan ikyâdan taɣəssa-net. Kalar awedan əşətşi a itaggu iman-net, innittaf əd təɣəssa-net zun awa iga Əlməsix y Əlkənisat, ³⁰ id nakkanay şisəllad ən təɣəssa n Əlməsix a nəmos. ³¹ «Awen daɣ a fəl z'ifəl aləs abba-net d anna-net aglu irtəy əd taɣurəs əqqəlan taɣəssa iyyadda.» ³² Arat wa ənne da daɣ batu n Əlməsix d Əlkənisat, imos əssir zəwwəran ən Məşşina. ³³ Xasil əkkulluk n iyyan daɣ-wan agiwet i taɣurəs tara ta iga i man-net, tantut deɣ təssəxməret aləs-net.

6

Tassaq gər bararan əd marwan-nasan

¹ Bararan, bardagat i marwan-nawan [zun as təbbirdagam y Əməli], fəlas awen daɣ a oɣadan. ² Alwajib wa azzaran as iga Məşşina arkawal n as ad ilu arozan, a inna: «Səxmər abba-nak d anna-nak, ³ fəl ad təgrəway təfalawist, tileɣ tayrəst tagget daɣ əddənet.»

⁴ Kawanay amaran abbatan, ad wər təşiɣəşəşem bararan-nawan, kalar sassaxriwat-tan, tagim-tan daɣ tarrayt təməlam-asan awa fəl irɣam Əməli.

Tassaq gər eklan əd məssawsan

⁵ Eklan, bardagat i məssawwan win əddənet əs saymar əd təksəda. Agiwat awen s əwəl iyyanda, zun âs Əlməsix as

təbbərdagam. ⁶ A dasan-wər-tətaggim əşşəxəl olâyan fəl as kawan-ewalan, zun as wər tagəmməyam ar awa igrazan y aggadəm. Kalar agiwat y əşşəxəl wa igi n âs eklan n Elməsix a təmosam. As tu-tətaggim təgamməyam s əwəl iyyanda a du-təssəxsəlam tara ən Məşşina. ⁷ Agiwat-asan əşşəxəl igân əs man ərdânen, zun as Eməli as təşyalam, wərgəx aggadəm. ⁸ Təssanam as: Arat kul olağan wa iga awedan, ad igrəw maruzat-net çur Eməli, gər imos awedan wen akli wala əlləlli.

⁹ Kawanay dəx məssawəs n eklan, agiwat aqqad en da y eklan-nawan. Ayyiwat-tan şihərəşša, id təssânam as Eməli a ihan ijənnawan ənta a imosan məşşikkawan kawanay dər-san. Eməli amaran wər fall-as t-illa igi ən təmərıt.

Təbəllant əd talbast: əttəfat aɣər wa n Məşşina

¹⁰ Xasil, a obazan çur əmərədda, əgməyat dəx Eməli ad isəssuhət tartəyt-nawan d Elməsix əs tarna-net wər nəla əddukad. ¹¹ Əttəfat təzoli n əməgər ta n Məşşina fəl ad təzməram i təmərkas n Iblis, ¹² id təbəllant ta nəga, wərgəx aytedan a dər tat-nəga əmosnen taçəssa d əzni, kalar taçmaren, d əlxəkuman, əd muzaran əlanen tarna əd fərregat a tan-imosan taçmaren şin əxkamnen dəx şiyay əd kəl ətənkul win əhanen ijənnawan tawayan-du təkma a dər nəmməgar. ¹³ Awen dəx a fəlas əttəfat təzoli n əməgər ta n Məşşina fəl ad təfrəgam zəmmerat y ark əzəl, taqqamim da wər təqqəlam dəffər-wan dəx təbəllant ta təgam dəffər as du-təssifalam dənnəg aratan win den.

¹⁴ Xasil zəzzəwətat dəx əzəgzan-nawan, almaçna n awen âs: Təqqəlet tidət əsatəb was totabam; təqqəl taqqat asalsaw n əməgər wa təzlagam. ¹⁵ Səmmutəgat i təbəllant ta dər d-osa Əlinjil n alxer wa nəzzəgzan, iqqəl Əlinjil en zun ixtəman-nawan. ¹⁶ Dənnəg adi kul, iqqəlet əzəgzan aɣər-nawan. Ənta a kawan-z-akfin fərregat n ad tançim abalagleg kul wa z'intəs Iblis. ¹⁷ Səwərat təkəbbut ta n əlyillas, təzləgam takoba ta n Infas wa Zəddigan a tat-imosan Awal ən Məşşina.

¹⁸ Tattarat faw da əs tilalt n Infas wa Zəddigan, ad tətaggim əzzənəfan kul ən təwatriwen, əd mansayan ən Məşşina. Əgləyat dəx awen, a tu-tətaggim əs zəmmerat, ad tətaggim dəx şiwatriwen i məzzəgzan di ən mizdagan ketnasan; ¹⁹ a di-tanat-tətaggim nak da fəl ad əgrəwax masnat n awal, əşşiwəlaç s ikus n aşşak, aɣax isalan n əssir n Əlinjil əs tanaya. ²⁰ Əlinjil en dəx as əmosax almawakkil-net dəx əddənət, amaran əddəlil-net a fəl aheç içunan. Tattarat-in fəl ad t-əmmala y aytedan s ikus n aşşak, s əmmək was ihor a sər-əs əşşiwəla.

Assalaman win əlkamnen

²¹ Amadray-nana Tişik wa n əməri-nin imosan amaşşayal iydâlan n Əməli, a dawan-agu kawanay da isalan-in kul, fəl ad təssənam alxalat ta ahey d awa tagga. ²² Əgmâyax-in əsuki wa dawan-t-in-z-aga, fəl a dawan-agu isalan-nana, aləm-awan fəl mən.

²³ Onsaya Məşşina di n Abba d Əməli Yaysa Əlməsix ad akfu imədrayan-nana kul alxer əd tara dağ əttâfan əzəgzan-nasan. ²⁴ Ya Məşşina təgey arraxmat-nak y aytedan kul win əranen Əməli-nana Yaysa Əlməsix, əgân-as tara wər nətəməttəy.

Širawt ta iktab Buləs i Kəl-Filib

Šihulawen

¹ Awa nak Buləs əd Timotay əmosnen eklan n Əlməsix Үaysa. Nəhul-in aytedan kul n əxrəm ən Filib win əmosnen arat dağ tamattay ən Məššina əs tərtəyt-nasan d Əlməsix Үaysa, əd muzaran n Əlkənisat əd madhalan-nasan. ² Egmâya dağ Məššina di n Abba-nana d Əməli Үaysa Əlməsix a fall-awan d-izazzabben arraxmat d alxer.

Igodan əd təwatriwen

³ I kawan-d-əkteğ ad əggudəyağ y Əməli-nin Məššina. ⁴ Šiwatriwen kul šin dawan-tagga, fawda təfalawist a dağ-wan tanat-tagga, ⁵ fəl əddəlil ən tədһəlt ta di-tətaggim dağ əzəwwəziwəz n Əlinjil, a d-obazan çur əzəl wa azzaran har əmərədda. ⁶ Fadda əkkasağ aššak as, əššəğəl olayan wa dağ-wan issənta Məššina əddi, wər tu-z-izzərəz iket wər t-issənda əzəl wa dağ du-z-azzabbat Əlməsix Үaysa. ⁷ Wərgəç bannan ifarray əwəl-in y adi dağ talça-nawan ketnawan fəlas əkneq-qawan tara kawanay win dər-i ədrawnen arraxmat ta di-iga Məššina gər za əmərədda ad əheç kasaw wala deç dağ təbəllant ta əgeç fəl Əlinjil d əsəttəddi-net. ⁸ Məššina issan as tara ta dawan-əgeç ketnawan Үaysa Əlməsix iman-net a du-təfal. ⁹ Amaran awa gammaya dağ təwatriwen-in, a dağ-wan tətittəy tara ta kawan-təhat dağ masnat ta n tidət d əgərri n id t-illa arat. ¹⁰ As iga adi ad təfrəgam əsənnəfrən n awa iknan əlluç, təqqəlam aytedan zaddognen wər iwer lahan waliyyan əzəl wa du-z-iqqəl Əlməsix, ¹¹ təssəgətam imazalan win oğadnen as Үaysa Əlməsix a çur d-əfalan fəl ad itəwəsəçmər Məššina attamal.

Isalan ən təməddurt ən Buləs d əššəğəl-net

¹² Arey ad təssənam imədrayan-in as, arat wa di-igrawan da eway-du fadda as əslan aytedan aggotnen y Əlinjil. ¹³ Təzzar eway-du awen as əssanan sojitən kul win tagaz-nen əmənokal d aytedan kul sa hadan as əddəlil n Əlməsix a fəl aheç kasaw. ¹⁴ Amaran wərgəç adi ças, kalar iguz-in kasaw eway-du əs taššam ən mədrayan-nana dağ əzəçzan tətəyt ən təfləst ta əgan y Əməli, a dağ-san tətittəy təholat n amel n awal ən Məššina wər tan-taha tasa.

¹⁵ Tidət a imos as wiyyad dağ-san manjağ əd tara n əməzrəy a fəl taggin isalan n Əlməsix. Mišan win hadatnen taggin-tan s ənnəyat tolayat, ¹⁶ amaran tara a fəl taggin

adi id əssânan as əddəlil ən təbəllant fəl Əlinjil a fəl ahey kasaw. ¹⁷ Mişan, aytedan win hadatnen wərgex əwəl iyyanda as taggin isalan n Əlməsix, kalar tənfa-nasan xas a gammayan, əgân iduf n as a fall-i əşşitin s adi arkanay wa ənnaya dəx kasaw. ^{18a} Wər imos adi wala! Əlməxsud as, gər za taggin adi s əwəl iyyanda wala dəx s ark ənnəyat, isalan n Əlməsix a taggin amaran isifalawas-i adi.

^{18b} A di-aknu dəx əsəffəliwəs. ¹⁹ Fəlas əssanaş as, adi ketnet a d-awəy ad əgrəwəş efsan s əssəbab ən təwatriwen-nawan əd tilalt n Infas ən Ƴaysa Əlməsix. ²⁰ Amaran əkney əsəddirən wəllən əge dəx attama n as wər di-za-tabəz təkarakit dəx arat waliyyan. Kalar gər za dat awa wala əmərədda, fawda əmosaş amaqqajay fəl ad itəwəsəxmər Əlməsix gər za əs təməddurt-in wala əs təmattant-in.

²¹ Fəlas nak Əlməsix a imosan təməddurt-in, amaran təmattant tənfa-nin a təmos. ²² Mişan ya as imos as əşşəxəl n Əlməsix təh-as tənfa ad aglay əddara, wədi wər əssena awa za sənnəfrəna. ²³ Əttirkaba fəl əşşin gannatan. Sinahala tara n agamad n əddənət əməla xur Əlməsix, arat s ənta a di-ofan wəllən. ²⁴ Mişan ya fəl əddəlil-nawan ogar tənfa ta tahat ad ahey əddənət. ²⁵ Arat wədi əkkasa dəx-as aşşak. Əssanaş as ad aglay əlle xur-wan fəl a dawan-ilala ketnawan s ad ittəy əzəgzan-nawan, akn-iwan adi əsəffəliwəs. ²⁶ Adi a z'ışşitin saşmar wa təgam Ƴaysa Əlməsix əs tarrayt-in, s əssabab ən tawaylay ta kawan-in-z-aga.

Əlməsix a imosan təməddurt-in – Almasal wa n Buləs

Təməddurt ta təmməttalat Əlinjil

²⁷ Taşara təgat da, agiwat alxal was imməkkan ad t-agin aytedan əzzigzannen s Əlinjil n Əlməsix. As iga adi, gər za oseq-qawan-in wala dəx imos as isalan-nawan xas a əgrawa, ad əssənaş as təglayam dəx igi n aşaf iyyanda, tənimmannakam s əwəl iyyanda dəx təbəllant ta təgam fəl əzəgzan isihaddan fəl Əlinjil. ²⁸ A dəx-wan wər agin aytedan win kawan-əzzəngatnen tasa s arat waliyyan. A sər-san d-awəy adi ikus n aşşak dəx əhluk-nasan, kawanay awəy-du sər-wan ikus n aşşak dəx iguz wa təgam tarrayt ta n efsan. Amaran Məşşina a z'agin adi. ²⁹ Məşşina wərgex arraxmat n əzəgzan s Əlməsix xas a kawan-ikfa, kalar ikfiwan harkid ta n alşazab fəl əddəlil-net. ³⁰ Əmərədda təgām fall-as təbəllant şilat ən tas kala di-tənayam əgeq-qat fall-as, ənta dəx as təsallim as harwa da taggaq-qat.

2

Tartəyt d əsəmmədrəy ən man

¹ Dad zamas tənayam təsasmit əs tərtəyt-nawan d Əlməsix, tənayam allam fəl man wa du-tətaway tara-net, tənayam tassaq ta ihakku Infas wa Zəddigan, tənayam dəy təhanint d əlluɣ n Əlməsix, ² dəy adi səkməlat təfalawistin s ad tagim təməddurt dəy tənimannakam, tənimaram, tərtəyam s əwəl iyyanda, tagim ənnəyat iyyadda. ³ Ad wər tagim arat waliyyan a dəy wər təgəmməyam ar tənfa ən man-nawan ɣas, wala təzzəzwəram iman-nawan id wər infa awen wala. Kalar akkiyyan dəy-wan isəmmədrəyet iman-net i win hadatnen, tagim fawda i midawan-nawan iduf n as ogaran-kawan. ⁴ Akkiyyan dəy-wan igməyet tənfa ən midawan-net, wərgəɣ ta-net ɣas.

⁵ Agiwat tiddawt təgât s alxal wa n Əlməsix Ƴaysa.

⁶ Ənta di da a dəy du-təxsal tişit ən Məşşina ketnet.

Mišan tugdat əd Məşşina ta igraw den

Wər igmay d a tat-ittəf fəl man-net.

⁷ Kalar oyya awen ketnet

s igi wa iga iman-net akli,

iga-du təhəwt ta du-taggin aytedan.

Awa imos kul issikna tulat-net d aytedan.

⁸ Isammadrəy iman-net

s əbərdəg wa iga har təmattant.

Tamattant en dəy ta təgat fəl təgəttawt.

⁹ Adi a fəl t-ikfa Məşşina edag wa ogaran adkul,

ikf-ay dəy s arraxmat-net esəm

əs tu-wər-illa esəm wər oger,

¹⁰ fəl ad issəjəd i t-illan kul gər za dəy jənnawan

wala fəl amaɖal wala dəy daw amaɖal,

fəl saymar n esəm ən Ƴaysa;

¹¹ aggayyat dəy i t-illan kul

as Ƴaysa Əlməsix a imosan Əməli.

Imos awen arat izzizwaran Məşşina di n Abba.

Əmələwləw dəy əddənət

¹² Dəy adi imaran-in zund əmmək as faw da təbbirdagam y Əməli agliwat təsinəfililam əs mazalan-nawan efsan win kawan-ikfa təgâm awen dəy təksəda-net. Awen dəy a təgam harwa a ɣur-wan əlle. Dəy adi ad wər tammazzayam d igi n adi, wəllen əmərədda ad wər əlle ɣur-wan. ¹³ Təfrâgam igi n adi fəlas Məşşina iman-net a işğalan dəy wallan-nawan, ihakk-iwan ənnəyat əd fərregat n igi n arat kul, ilkāam awen i tara-net.

14 Arat kul wa tətəggim, agat-tu da wala agatanten wala tamazaq 15 fəl ad təqqələm aytedan wər iwer lahan waliyyan, zaddoggen, əmosan bararan əkmələnən ən Məşşina, əhanen ammas n ark aytedan, əxraknen ən nəllubas. Təgām dağ-san əmələwləw wa iga ənnur dağ şiyay, 16 təzizawem dağ salan win hakkinen təməddurt ta təxlalat. As təgam adi, ad əfləsəy iman-nin əzəl wa du-z-asu Əlməsix, fəlas ad assaknu adi əs əşşəxəl-in d arkanay wa ənaya wər əbbənnanan.

17 Mişan mijas a dağ-i təwəkkəsən man, əqqəla şilat ən təkutay tətivanxalat a du-təssindat əşşəxəl wa kawan-isassagan əzəgzan-nawan. Kud iga adi da ad fəliwəsa nak, fəliwəsa deş nak dər-wan. 18 Kawanay da fəliwəsat, təfəliwəsəm deş nak dər-wan.

Timotay d Ebafroditəs

19 Əgeş attama dağ Əməli Ƴaysa n a kawan-in-əssuka Timotay. As kawan-d-ifal ad əgrəwəş isalan-nawan tansu tayttay-nin. 20 Fəlas Timotay şas a ifarrayan y awas farraya, tewây-as talxa-nawan əd man. 21 Amaran aytedan kul win hadatnen tənfa ta n man-nasan şas a gammayan, wərgəş talxa ta n Ƴaysa Əlməsix. 22 Amaran təssānam dağ təməwit tas isitadda Timotay tişit-net awedan ilan almaşna, fəlas ənəməşşal wa itaggu barar d abba-net a dər-i inamagga, iddew dər-i dağ əşşəxəl wa n amel n Əlinjil. 23 Dağ adi ənta as əgeş attama n a dawan-t-in-əssuka. Wər əqqələş ar y ad əssənəş awa dağ-i z'agin. 24 Amaran əkkasəş aşşak şur Əməli, as a kawan-in-asa nak iman-in dağ alwaq ihozan.

25 Ənāyəş as olāş as kawan-in-əssoxala Ebafroditəs, imosan amadray-nin imos deş əmidi-nin dağ əşşəxəl əd təbəllant ta əgeş təmosat amel n Əlinjil s ənta a sər-i du-təzammazalam ewây tadhəlt tas əddərara. 26 Isidaran wəllən anay-nawan ketnawan, fəlas tədgāz-tu tasalay ta təgam tafrəyt-net. 27 Awalla tədās-tu təfrəyt zəwwərat har zama ad t-aba. Mişan ihanattat-as Məşşina. Amaran wərgə ənta şas as ihannattat, kalar nak da ihinattat-i, igdal-i aşşud ən man ogaran wa di-igrawan. 28 Adi fəl ədgaza dağ a t-in-zəmmizəla sər-wan fəl a tu-tələsəm anay təfəliwəsəm, isəssikəy-i adi aşşud ən man nak da. 29 Agiwat-as əlqəbulat təgāt əs təfalawist tagget id amadray-nawan a imos dağ əzəgzan s Əməli Ƴaysa, təssəxməram aytedan win şilat-net. 30 Fəlas har iga iman-net dağ alşarar ən təmattant fəl əşşəxəl y Əlməsix. Awən kul ig-ay fəl a di-agu tilalt tas wər təfregam a di-tat-tagim kawanay fəlas igəş a di-təgam.

3

Təlyudəla daɣ tarrayt n Ɛlməsix

¹ Amaran, imədrayan-in, təsəffəliwəset-kawan tassaɣ ta təgam d Ɛməli Ƴaysa. Wər fall-i imos əzuk a dawan-in-ələsəɣ akatab n aratan win as kala dawan-tan-in-əktaba, fəlas təha tənfa awen daɣ aggaz-nawan. ² Ɛnkədat y aytedan win wər nəzlay əd ɗan, taggin əššur, sisahen əmənəkəd əttafan as ənta a itaggin daɣ tamattay ən Məššina. Ɛnkədat-asan wəllen. ³ Nakkanay a igan əmənəkəd wa n tidət, fəlas əlyibada a nəga Məššina s Infas wa Zəddigan. Ƴaysa Ɛlməsix a imosan abarag-nana. Wər nəga attama waliyyan daɣ arat iga aggadəm.

⁴ Amaran nak iman-nin ələɣ əddəlilan s igi n attama-nin daɣ aratan əgân aytedan. Kud ill-ay awedan ilân əddəlil s igi n attama-net daɣ arat iga aggadəm, awedan wədi ogaraq-qu təla n əddəlil s awen, ⁵ fəlas nak a itiwasmankadan əzəl wa n əttam dəffər təhəwt-in. Ɛgmâda-du Kəl-Israyil, təl-i tawšət ta n Benyamin, əmosəɣ aw Ƴibri wa n ələsəl, əssinda-du əššərədan ketnasan win əššəriɣa wa n Ɛttawret id Fərisay as kala ad t-əmosa. ⁶ Awa əgeɣ daɣ gəlleɣat daɣ tarrayt ten, iyyəwanəɣ əzəɣɣəzzəb n əlməsixitan. Daɣ batu ta təqqalat aqqad daɣ əššəriɣa, wədi wər ələɣ lahan waliyyan. ⁷ Aratan kul win di, kala daɣ-san əgeɣ iduf n as əmosan-i tətəyt, mišan əmərədda əge daɣ-san iduf n as afanaz a di-əmosan, fəl əddəlil n awa iga Ɛlməsix. ⁸ Fadda wərge aratan win di ɣas, kalar arat kul əge daɣ-as asawad n as afanaz a di-imos fəl əddəlil n ədkul a dənənəg wər illa iyyan a təga masnat n Ɛlməsix Ƴaysa, Ɛməli-nin. Ɛddəlil-net fəl əqbaləɣ a di-igməd arat kul, amaran arat kul əgeɣ-as iduf n as tajjargant a imos, fəl ad əttəya daɣ tarrayt n Ɛlməsix, ⁹ almayna tassaɣ dər-əs. Wərgeɣ ləkkum y əššəriɣa wa n Ɛttawret a di-ikfan taqqat dat Məššina, kalar əzəgzan-in s Ɛlməsix. Məššina a ihakkin taqqat, amaran ihakk-et s əzəgzan s Ɛlməsix. ¹⁰ Arat wa areɣ masnat n Ɛlməsix, almayna ad əssəna tarna ən tanakra-net daɣ təmattant, əd tərtəyt dər-əs daɣ alyazab wa iga, ala dər-əs deɣ daɣ təmattant ta iga. ¹¹ Adi a di-zissəfrəgan igi n attama n a di-d-issənkər Məššina daɣ təmattant.

Aggad n əlməxsud

¹² Wər ənnəɣ əgrāwəɣ masnat tədi, ənta wala tišit n awedan ikmālan, kalar azzal a əgeɣ daɣ agamay n a tanat-əgrəwa, fəlas əddəlil n awen da a fəl di-d-obaz Ɛlməsix Ƴaysa əs man-net. ¹³ Imədrayan-in, wər ənnəɣ əgrāwa

aratan win di; mišan ya arat iyyanda a tagga a t-imosan as: wər din-səggəda day awa okayan, kalar arat wa əfragay a tagga fəl ad awəday awa illan dat-i. ¹⁴ Azzal a əgey s əsərkən, fəl ad əgrəwa tefert təmosat teyaray ta danay-iga Məššina əs jənnawan əs tərtəyt d Əlməsix Yaysa. ¹⁵ Day adi nakkanay ketnana win as ikna əzəgzan-nana assahat immikkan ad nagu alxal wen, amaran wala ad təgām alxal iyyan, Məššina a dawan-z-isənnəfiləlan awas ihor a tu-təssənam day batu tədi. ¹⁶ Arat iyyanda a dawan-z-annay as: dad zamas newad-du edag wa nəha da əmərədda, aglatana nəddew day anamod wa da.

¹⁷ Ya imədrayan-in, əqqəlat ketnawan imattalalan-in, tattalalam aytedan win əlkammen y almasal wa kawan-nəkfa. ¹⁸ Emmalay-awan as əllan-tu aytedan aggotnen safraynen s alxalan-nasan almayna ən təmattant n Əlməsix fəl təgəttawt. Iyyəwanay-awan igi ən batu ta, amaran əmərədda həllay as dawan-tat-ələsay igi. ¹⁹ Tilkamat-nasan ahluk, fəlas šidusen-nasan a mosnen əməli-nasan, sinafasan arat was ihor a tan-isikarakad, wər təkka ənnəyat-nasan ar əddənet. ²⁰ Nakkanay amaran akal-nanay ijənnawan. Amaran ijənnawan en da as nəqqal y a sər-na tan-d-igməd Ənəsəfsi a t-imosan Əməli Yaysa Əlməsix. ²¹ Ənta a z'isəmməttəyan əs tarna ta ila fəl arat kul šixəswen-nana ərkammen, tamattatnat, iššəsil-enat əd ta-net təkənət təla ən tanaya.

4

¹ Imədrayan-in əknəy tara, sinahala tara n anay-nawan! Təmosam-i təfalawist, təmosam dəy əssəbab n ətəwəsəymar-in. İmaran-in, zəzzəwətat day əzəgzan s Əməli.

Ənnəsixatan

² Efodəya əd Santik, onsayaq-qamat ad tənəmənnəkmat fəl əddəlil ən tassaq ta təgamat d Əməli. ³ Amaran kay da, imosan əmidi-nin wa n tidət day əššəxəl, əgmāya day-ak ad tilalay i tədoden di əs maknan gar-essanat fəlas əllilnat-i əs təbəllant fəl Əlinjil, nak əd Kəleman əd midawan-in win hadatnen day əššəxəl s əsmawan-nasan əktāban day əlkəttab wa əhan əsmawan n aytedan win əgrawnen təməddurt ta təxlalat. ⁴ Fəliwəsət faw day tassaq ta təgam d Əməli. Əlasa tənna n adi, fəliwəsət. ⁵ İssənet awedan kul day əllux-nawan. Əməli ihöz. ⁶ A kawan-wər-iššəwəš arat waliyyan. Kalar a təqqal alxalat ta təggazam, əgməyat day Məššina arat was təddəraram, ad tətattaram s əwəl iha agoda. ⁷ As iga adi, alxer wa ihakku Məššina, imosan alxer

illân dännög arat kul was ifrag awedan əgərri-net, ad agöz iwallan-nawan əd medranan-nawan dağ arat kul id tartəyt a tögam d Əlməsix Үaysa. ⁸ Xasil imədrayan-in, aratan da win as ihor a tan-tagim faw da dağ taytwen-nawan əd medranan-nawan: imazalan kul win əknanen əllux, əhoran d i tan-imalan, əd mazalan win əmosnen tidət, əmosan əzzəbun, oğâdan, zaddogan, əssiran, tatamalan. ⁹ Əlməxsud as tamazalat faw s arat wa fall-i təğram, təqbalam-tu, təslam-as, tənayam-i tamazalaq-qu. Əddi a dağ-wan issən Məşşina di n əməggi n alxer.

Igodan ən Buləs i Kəl-Filib tadhəlt-nasan

¹⁰ Amaran əşəşşinəy wa tögam masnat ta dağ-i tögam, eway-du sər-i təfalawist tagget dağ tassağ-in d Əməli, kuddeğ as dat awa da, təssânam dağ-i mişan wər təğrewam tarrayt n əsəkni n adi. ¹¹ Wər ənnəğ adi fəl as əddərara s arat iyyan, kalar nak əlmâdağ əgəddi s alxalat kul ta əheğ. ¹² Əssana təməddurt dağ təməğatirt, əssana değ təməddurt dağ tənəfləyt. Amaran dağ alxalaten kul şin əggaza əlmâda tewant, əlmâda değ gələk, əlmâda tənəfləyt harkid təməğatirt. ¹³ Alxalaten kul əfragağ-asnat əs tilalt ən wa di-ihakkin tarna. ¹⁴ Dər iga awen da ya, təğâm a olağan as di-tədhəlam dağ təməğutar-in.

¹⁵ Amaran kawanay Kəl-Filib təssânam wəllen as, as əgmada akal wa n Masedonəya, azzaman win dağ əssəntəğ emel n Əlinjil, wər tu-təlla Əlkənisat a di-tədhəlat ar tanawan. ¹⁶ Fəlas wala alwağ wad əheğ ağrəm ən Tesalonik təsisawayam-in awas əddərara har wərgəğ taklat iyyadda. ¹⁷ Wərgəğ agamay a taggağ a əğrawa, kalar arozan-nawan as gammayağ ad əttəyan.

¹⁸ Əleğ arat kul was əddərara, ənniflaya. Wər din-odena wala id əğrəwayə təhəkkut-nawan ta di-d-eway Ebafroditəs, təmosat takutay iqbâl Məşşina, təla çur-əs ađu izodan, oğgam-tat. ¹⁹ Amaran əgmâya dağ Əməli-nin, ilân tanaya wər nəla əddukad, a kawan-ikfan awas təddəraram kul fəl udəm n Əlməsix Үaysa. ²⁰ Adkul i Məşşina Abba-nana har faw. Amin!

Assalaman win təzərəst

²¹ Təhulam-in aytedan kul win əzzəgzannen s Əlməsix Үaysa. Əhulan-kawan-in mədrayan-nana n əlməsixitan win çur-i əllanen. ²² Iməzzəgzan əs Үaysa Əlməsix kul win əllanen da, əhulan-kawan-in. Wəllen win məşşayalan n ağaywan n əmənokal Qaysara.

²³ Əttâra s Əməli Үaysa Əlməsix a kawan-ikfan arraxmat ketnawan.

Širawt ta iktab Buləs i Kəl-Kolosəya

Šihulawen

¹ Awa nak Buləs, imosan anammazul ən Ƴaysa Ǝlməsix əs taradawt ən Məššina, nak d əmidi-nin daƳ əzəƳzan Timotay, ənnānen əhulan-in ² Kəl-Kolosəya win əhanen tarrayt ən Məššina, ənnimanakan daƳ esəm ən Ƴaysa Ǝlməsix, əmosnen imidawan-nana n alƳadılan sər-əs. Izazzabbat-du fall-awan Məššina Abba-nana alxer d arraxmat.

Igodan əd təwatriwen

³ Faw da daƳ təwatriwen-nana nətigudəy-awan i Məššina di n Abba n Ǝməli-nana Ƴaysa Ǝlməsix, ⁴ fəlas nəslā əzəƳzan wa təgam əs Ƴaysa Ǝlməsix, d əsəkni-nawan tara y i t-illān izzigzan sər-əs. ⁵ ƎzəƳzan wa əd tara ta, eraw-tan-du attama wa təgam daƳ Məššina, n awa dawan-issənsa daƳ aljannat. Attama wa təgam-tu əzəl wa kawan-d-ewad Ǝlinjil, a imosan isalan win tidət ən Ƴaysa Ǝlməsix. ⁶ Ǝlinjil wa ig-awan d assa ad d-iga fəl əddənet ketnet. Ǝnta a isammattayan alxalan n aytedan s əlluƳ, ətittəyan məzzəƳzan sər-əs. Ǝmmək wa da a daƳ-wan igan kawanay da, a d-obazan Ƴur əzəl wad təslam i salan n arraxmat ən Məššina əs tidət, təgrawam əgərri-net. ⁷ Ebafras, əməllil-nana, n əməri-nana, ənta a kawan-issosanan isalan win. Imos əməggi ən salan n alƳadil n Ǝlməsix y-awan, ⁸ ənta a danax-imalan tara ta iga Infas Zəddigan ən Məššina daƳ wallan-nawan.

⁹ Adi da fəlas a kawan-nəsla nətattar-awan əs Məššina. Nəgammay daƳ-as a kawan-aknu əsusən ən tara-net, s a kawan-akfu s Infas Wa Zəddigan, tayttay kul d əgərri. ¹⁰ Šiwatriwen šin nətagg-enat fəl ad tilem alxal ən məzzəƳzan, isənnəhəl-tu Ǝməli təgğəma, ad tətəggim imazalan olāƳnen, tətittəy daƳ-wan masnat ən Məššina, ¹¹⁻¹² akn-iwan Məššina əsəssuhi daƳ anamod kul əs tarnənet di maqqarat fəl ad tilem zəmmerat, təgğəz-kawan tazaydart, təgğudəyam əs man filawasnen y Abba wa kawan-issəfragan agaraw daƳ təkəsīt ta issənsa daƳ taymar-net di təmosat ənnur təhat ijənnawan iskat y aytedan-net win əhanen tarrayt ta n Ǝlməsix.

Assayfaten n Ǝlməsix

¹³ Ǝnta a dana-d-ikkasan daƳ əlxəkum n Iblis di imosən šiyay ig-anax daƳ wa n Barar-net Ƴaysa Ǝlməsix a ikna

tara. ¹⁴ Əddəlil ən Barar-net a fəl nəgraw tədarfit, təmosat təsureft ən bakkadan-nana.

¹⁵ Barar wa, şaşelan ən Məşşina a imos

di wər nətəwəhənnəy,

imos dey əmuzar ən təxlək kul,

¹⁶ fəlas axluk a sər-əs d-iga Məşşina aratan kul

fəl amaḍal əd jənnawan,

win ətawahənnaynen

əd win wər nətəwəhənnəy,

şiğurad şin əttənkəlnen

gər əqqalnat tətəbəla wala tağmar,

wala əlxəkum, wala təmənukəla,

aratan win kul ətiwaxlakan-du sər-əs,

fəl əddəlil-net.

¹⁷ Yaysa Əlməsix ənta iman-net ill-ay dat təxlək kul,

amaran təxlək kul tənimmattaf əs tarrayt-net,

issan dağ-as.

¹⁸ Ənta iman-net imos eyaf n Əlkənisat,

ig-as tizart ta iga ayaf i təğəssa.

Ənta ələsəl n Əlkənisat,

fəlas ənta ad azzaran tanakra dağ win aba

fəl ad iqqəl ill-ay, azzâr y arat kul.

¹⁹ Aratan kul win ətawənnanen s Əlməsix da,

kul tidət id fəlas Məşşina iman-net

a isaggatakken əs tara-net

əsəxsəl ən tişit-net di təndat dağ Barar-net,

²⁰ amaran ikna tolas iman-net əd təxəllək kul

şin amaḍal əd jənnawan s əddəlil ən Barar-net,

izazzabbat-du fall-asnat alxer

əs tanayla n əzni ən Barar-net

ğur təməttant-net fəl təğəttawt.

²¹ Kawanay da əstizarat tənimmaggagam əd Məşşina təmosam imagzaran-net s ark ənnəyaten-nawan d arak mazalan-nawan. ²² Mişan əmərədda, əs təməttant ən Barar-net ikfan iman-net, Məşşina ikn-iwan əd man-net

fəl a dat-əs təbdədam təmosam aytedan zaddognen, wər nəla lahan, ²³ kud imos as təğlam tətəfəm əzəgzan-nawan,

təzizawem dağ-as iman-nawan, təzikkem dağ-as s assahat, wər təkkəsem attama wa təgam as təslam y Əlinjil. Əlinjil wa, ittimalan y aytedan kul n əddənet, ənta as əqqala nak Buləs əməğgi ən salan-net.

Əşşəğəl wa n Buləs y Əlkənisat

²⁴ Əmərədda isidawat i arkanay wa ənnaya fall-awan. Fəlas əmmək wa ənta as əsakkasawa əs təğəssa-nin, dağ aganna wa-nin, arat wa din-aba dağ alğazab wa inay

Əlməsix fəl təxəssa-net di, təmosat Əlkənisat ən nalkiman-net. ²⁵ Əlkənisat ta ənta as əqqala amaşşaxal-net s awa dər togda tanat-nawan ta di-issodaf Məşşina. Izammazal-i-du fəl a kawan-əxrədağ əsusən n awal-net, ²⁶ s a dawan-əsaflaggağ əssir wa ixbər elan s elan. Mişan əmərədda əssir wa itawasanafalal i win das-əlkamnen, ²⁷ əntanay as ira Məşşina a tan-issusən dağ igət wa dər ogda ədkul n əssir wa iqqalan şimattiwen n əddənet kul. Əssir wa imos-tu as: Əlməsix ixsâr dağ wallan-nawan adi da fəlas illikan as ad tilem tadagart dağ əlxurma ən Məşşina.

²⁸ Əlməsix wa ənta a nəmmal nakkanay. Nərakkab şiməzzugen n awedan kul, nəsassaxr-ay əs tayttay təndât fəl ad ikməl akkiyyan dağ tənəmmənaka d Əlməsix. ²⁹ Dağ tara n aggad n arat wa a fəl əsannahalağ əşşəxəl, əs tarna ta du-təfalat Əlməsix, a dağ-i tətımətəkwəyat s assahat tagget.

2

¹ Arêx ad təssənam awa dər togda təbəllant ta fall-awan ətagga, kawanay d aytedan n əxrəm wa n Lawodikəya, əd wiyyad şilat-nawan as wər kala ənayan udəm-in. ² Arat wa əgeq-qu fəl tara n ad tilem kawanay dər-san əlhimmat, tənəmərım gar-ewwan s əwəl iyyanda, fəl ad təsənnəhəlam gəlleyat təndât ta ihakku əgərri ikkisawan, təssənam əssir ən Məşşina wa imos Əlməsix. ³ Əlməsix ənta xas a imosan təsassarut ən təgərgist a təmos tayttay əd masnat.

⁴ Arat wa ənney-awan-tu fəl a tu-wər-iməl awedan a kawan-issəxrakan a əganat batuten-net dağ şizada. ⁵ Dağ adi kud imos as wər xur-wan əlle s azzat-in da iman-in əllân xur-wan amaran isidawat i as əsley as tənnizzamam, təzzikkem s assahat dağ əzəgzan wa təgam s Əlməsix.

Tənəddawt ən tarrayt ta n Əlməsix

⁶ Dağ adi azzama təqbâlam as Əlməsix Yaysa imos Əməli, wədi awəyat əd tarrayt-net. ⁷ Səssəhətət dağ-as iman-nawan. İqqələt aytedan əkrâsnen dağ-as, əssohatnen dağ əzəgzan-nasan, s əmmək was tətawasasaqram, təqqələm dəx aytedan əknanen dəkkur n agoda y Əməli.

⁸ Ənkədat i y ad t-imal awedan a kawan-issəxrakan s əljəmaten wər təha tənfa əd batuten ən təkərras ad əzzirratnen dağ tanaden n aytedan, əzziratnat-du dəx dağ təxurad şin əttənkəlnen, a du-wər-nəha s Əlməsix. ⁹ Fəlas Əlməsix ənta dağ təxəssa-net a dağ təxsar tişit kul ən Məşşina, ¹⁰ amaran kawanay win dağ-as ənamannaknen təgrâwam arat kul əs tənəddawt. Ənta a imosan eyaf n əlxəkuman kul əd təmənukəla kul.

¹¹ Daɣ tənəmännəka daɣ as tətawasamankadam s əmənəkəd wər igâ əfus n awedan mišan wa dawan-iga Əlməsix imosan as daɣ-wan ikkas tišit kul ta n nasbakkadan, ¹² s alamaɣ-nawan daɣ aman tənbalam təddewan dər-əs, amaran deɣ tətawasankaram-du sər-əs təddewam dər-əs fəlas əzəgzan a təgam əs tarna ən Məššina di maqqarat a t-id-təssənkarat daɣ tamattant. ¹³ Kala təmosam aytedan abâ daɣ wallan-nawan fəl əddəlil ən bakkadan-nawan d əddəlil n as wər təmosam arat daɣ Kəl-Əlyəhud, wər təmmənkadam, mišan əmərədda Məššina ilas-kawan d əsudər təddəwam d Əlməsix, sas dawan-issoraf ibakkadan-nawan kul s arraxmat-net.

¹⁴ Imas arak mazalan-nana əd win-nawan əwârnen iyafawan-nana, irzam-tan fall-ana s ətəwətəytəy-nasan fəl təgəttawt. ¹⁵ Ikkas Məššina assahat ta təhat taɣmaren ən kələsuf, osaq-qanat ilway-tanat dat aytedan əmosnat aɣjab, iɣlab-tanat s Əlməsix.

¹⁶ Daɣ adi a tu-wər-iməl awedan a kawan-z-išrəɣan fəlas wər tətəggim awa ira gər iga daɣ tattay wala tessay wala ijilan-nawan win maddan əd win əlɣibada, ¹⁷ fəlas aratan win wər əmosan ar telay ən win d-əzaynen: tidət-nasan təha Əlməsix. ¹⁸ Ad wər tayyim iman-nawan y awedan a iqqal issəwər-kawan əlhigga fəl as sər-əs əzzodan mazalan n azzahir, issilaqqaw iman-net sər-san, izod sər-əs deɣ əlɣibada n angalosan, isisahat iduf-net wa iga as tan-inay. Izzizwar iman-net əs medranan wər təha tənfa a d-əgmâdnen tayttay wər nəha tarrayt ta n Əlməsix, ¹⁹ amaran ab'as isassahat iman-net daɣ tərtəyt d Əlməsix a imosan eɣaf ən təxəssa. Təxəssa ta kul ənta a tətittəyat s Əlməsix s əmmək wa ira Məššina, s ənəmännək ən təsəllad wa dutawayan səmməxras əd zərwan.

²⁰ Azzama aba kawan-tənimannakam d Əlməsix, tətawaxtasam-du daɣ taɣmaren ən kələsuf daɣ əddənət, daɣ adi mafel təlakkamam i batuten n əddənət, təqqabbalam əlqanunan əmosnen: ²¹ «ad wər tədkələy awa», «ad wər tərəməɣ awa», «ad wər tədəsaɣ awa»? ²² Aratan win wərge wər əgen ar y a tan-təgməd tənfa dəffər as sər-san iga əmazal? Wər əmosan ar əlqanunan d awalan n aytedan! ²³ Tidət as daɣ anay-nasan aratan win oɣâdan fəlas əkfân əs tayttay daɣ mazalan-nasan əmosnen: əlɣibada əs gəlleyat, əsələqqu ən man, əsəkni ən təxəssa arkanay. Mišan ya məssawsan wər əlen a imosan fərregat n iduf daɣ tara ən man.

3

Təməddurt ta təzrayat daɣ Əlməsix

¹ Dad zamas tətawasankaram-du kawayay d Əlməsix day təmattant, wədi əgammayat aratan win jənnawan dad illa Əlməsix iha ağıl ən Məşşina. ² Sədəgat ənnəyaten-nawan sa sər-san wərge sa sər win n əddənet. ³ Fəlas şilat n aytedan aba a təmosam ab'as tətamazalam aratan win tətamazalam əstizarat, amaran təməddurt-nawan tətâr s Əlməsix xur Məşşina. ⁴ As d-itawasanafalal Əlməsix a imosan təməddurt-nawan, kawayay da a du-tətəwəsənəfiləlam dər-əs, təgrəwam əlxurma-net.

⁵ Day adi anxat day man-nawan ənnəyaten kul şin əddənet a tanat-imosan: əzzəna, ammadas, tara ən man, arak deranan, tara n əddənet təmosat əmədraw. ⁶ Aratan win əddəlil-nasan a fəl itaggaz alham Məşşina n aytedan win ugaynen s as sər-əs əzzəgzanan. ⁷ Kawayay iman-nawan kala a tan-tətamazalam harwa ad wər təfregam iduf day man-nawan.

⁸ Əmərədda aratan win kul mazzayat dər-san a tan-imosan: alham, aşşar, əzzəngu, şizmit, ark batuten. ⁹ Ad wər tətınəməggim bahu gar-ewwan, fəlas təjwaram təkkasam day man-nawan tişit-nawan ta tərəwat əd mazalan-net, ¹⁰ təzzar təgam day-san əmərədda iyyat təzrəyat. İman-nawan win əntanay a ətawaşəşaynaynen faw əs şaşəlan n Əməxlak-nasan fəl ad tilem masnat təndât ən Məşşina. ¹¹ Day təməwit ta təzrayat a, wər tu-təlla zələyat gər aytedan kul gər əqqalan Kəl-Əlyəhud wala win tan-wər-nəmos, gər win əmmənkadnen wala win wər nəmmənkad, gər əmosan iğərab wala aljahilan, gər əmosan eklan wala ilallan, əlməxsud as ketnasan əhân Əlməsix di imosan arat kul.

¹² Kawayay təhâm win d-isannafran Məşşina, issəwar-tan aganna ir-en. Day adi təggəzet-kawan təhanint, tilem iman mallolnen, təsəlləqqəwam iman-nawan, taləyam, təggəz-kawan tazaydart. ¹³ Nəmiwəyat gar-ewwan, ad tətınəməsufam gar-ewwan as inamaşşak iyyan day-wan d əmidi-net. Ad tətınəməsufam gar-ewwan kawayay da əs təməwit tas dawan-issoraf Əməli. ¹⁴ Aratan win kul agiwat tara dənnəg-san, as təgam adi ad taknim ənəmənnak.

¹⁵ Alxer wa iga Əlməsix day wallan-nawan ixkəmet şinaden-nawan, fəlas alxer wen da as kawan-d-iğra Məşşina fəl ad təqqələm arat iyyanda, a das-tətigudəyam. ¹⁶ İxsəret awal n Əlməsix day wallan-nawan s igət. Ad tətınəməsəşəgrim, tətınəməsənkidam gar-ewwan əs taytəy təndât, amaran ad tətaggim şigaytalen i Məşşina əs man əglaynen, əd təmmalen, əd sakkən win d əgmadnen day İnfəs Wa Zəddigan. Ətaggat-tan fəl ad tassaknim

igodan-nawan i Məşşina. ¹⁷ Arat kul wa təgannam əd wa tətəggam, mazalat-tu s esəm n Əməli Ƴaysa, a sər-əs tətigudəyam i Məşşina di n Abba-nana.

Aharog n aytedan daɣ təməddurt ta təzrayat

¹⁸ Şidoden əlkəmmat i tənna ən meddan-nakmat əmmək as ihor a t-ətagginat tədoden şin əhanen tarrayt n Əlməsix.

¹⁹ Meddan iriwat şidoden-nawan amaran a kawan-wər-ətaggazan arak man sər-əsnat.

²⁰ Bararan bardagat i marwan-nawan daɣ arat kul, fəlas adi da oggam Əməli. ²¹ Amaran kawanay imərwan ad wər tətihərəşem bararan-nawan faw fəl ad wər ɣaşşadan man-nasan.

²² Eklan bardagat i məssawwan daɣ arat kul. Ad wər tətəggim arat fəl as tətawawalam ɣas, tərâm igi n awa oggaman aytedan, kalar agat-tu gar-ewwan əd man-nawan əs təksəda n Əməli. ²³ Əşşəxəl wa tətəggim kul mazalat-tu s əwəl iyyanda. Agiwat as igi n as imos əşşəxəl təgâm y Əməli wərgəɣ y aytedan. ²⁴ Fəlas təssanam as Əməli a kawan-akfu alak imosan təkəsīt ta issənsa y aytedan-net. Əlməsix ənta Əməli-nawan. ²⁵ I igan ark əmazal ad t-irzəm fəlas əşşəriɣa ən Məşşina ola, wər tu-təha təmərīt.

4

¹ Məssawəs n eklan ətamazalat s alxaq d əşşəriɣa daɣ tənəttuft ta təgam y eklan-nawan, taktim as kawanay iman-nawan təlâm Məşikkawan daɣ jənnawan.

Aholan

² Sənnəhəlat təkəkkīt daɣ igi ən təwatriwen a daɣ-asnat tənakkadam, tətigudəyam i Məşşina. ³ A dana-tətəggim şiwatriwen nakkanay da fəl a danaɣ-aləm Məşşina tarrayt n əzəwwəziwəz ən salan n əssir-net a imos Əlməsix. Əssir wa ənta a imosan əddəlil n ətəwəttaf-in daɣ kasaw əmərədda. ⁴ A danaq-qanat tətəggim deɣ fəl ad akna fərregat n igi ən salan n Əlməsix s əmmək wa ihoran.

⁵ İliwat alxal olaɣan daɣ tassaɣ-nawan d aytedan win wər nəha tarrayt ta n Əlməsix, amaran ad wər təsabannanam şimazayyaten şin təgarrawam wər daɣ-asnat təgem isalan-net. ⁶ Awal-nawan ihor ad olâɣ imos in əlməxsud, fəl ad təfrəgam masnat n aljawab igân daɣ adag-net y əkkulluk n awedan.

Şihulawen şin əlkamnen

⁷ Amaran isalan kul win-nu əmidi-nana daɣ əzəgzan igân esəm Tişik n əməri-nana imosan amaşşaxal n alɣadil n əməllil-nana daɣ əşşəxəl n Əməli, ənta a dawan-tan-z-ixrədan igi. ⁸ Adi da a fəl as əgmâyax-in əzəmmizəl wa

t-in-əge sər-wan fəl a dawan-agu isalan-nana, aləm-awan fəl man. ⁹ Iddêw dər-əs əmidi-nana daɣ əzəgzan n alɣadil n əməri-nana igân esəm Onesim, imosan iyyan daɣ-wan. A dawan-agin isalan n arat kul wa itawamazalan da.

¹⁰ Aristarxus, a dər ənimaha kasaw, issislam-in fall-awan ənta əd Markus wa n əşšin ən Barnabas. Markus tərəwam as təgrawam isalan-net, amaran as kawan-in-osa təqbəlam-tu. ¹¹ Ƴaysa was itawannu Yustus, issislam-in fall-awan ənta da. Meddan win ən karad a əntanay ɣas iməzzəgzan daɣ Kəl-Ƴlyəhud win dər ənamaşɣala i taɣmar ən Məşşina, amaran olâman i fəl man.

¹² Ebafras wa n iyyan daɣ-wan imosan akli n Ɛlməsix Ƴaysa, issislam-in fall-awan ənta da. Faw itagg-awan šiwatriwen, igammay daɣ Məşşina əs gəlleyat a kawan-isəssuhət daɣ tarrayt-nawan, təqqəlam aytedan əndânen daɣ əzəgzan, əkmâlne daɣ ənnəyatən-nasan əndânen ətamazalne tara ən Məşşina kul əs təməwit təkmâlat. ¹³ Nak iman-in əggəyey əşşəxəl issohen wa dawan-iga kawanay əd Kəl Lawodikəya əd Kəl Yerafolis.

¹⁴ Luqa əməri-nana n anasmagal əd Demas əhulan-kawan-in. ¹⁵ Səslamat-anax-in fəl midawan-nana daɣ əzəgzan win əhanen aɣrəm ən Lawodikəya əd Nimfa d Ɛlkənisat ta tətamanayat daɣ ahan-net.

¹⁶ Dəffər as təxrâdam təxaray ən širawt ta, agat təməwit a fəl za tətəwəxru y Ɛlkənisat daɣ Lawodikəya, taɣrim kawanay da širawt ta-nasan ta dawan-du-z-assaglin.

¹⁷ Tannim y Arxifus: əkkəs aşşak daɣ əxrud n əşşəxəl wa təggaza y Ɛməli.

¹⁸ Arat wa əfus wa-nu as t-əktaba: Assalaman a din-əgmâdne daɣ Buləs. Daɣ təwatriwen-nawan a din-wərtattawim ətəwəttaf wa əge da, daɣ kasaw. Izazzabbat-du fall-awan Məşşina arraxmat-net.

Şirawt ta tazzarat iktab Buləs i Kəl-Tesalonik

Assalaman

¹ Awa şirawt a din-təfâlat Buləs əd Silfanus əd Timotay. Nəhul-in Əlkənisat ta n əyrəm ən Tesalonik, təmosat tamattay tərtayət əd Məşşina di n Abba d Əməli Ƴaysa Əlməsix. İkf-iwan Məşşina arraxmat d alxer.

Buləs d əlməsixitan win Tesalonik

Əzəgzan ən Kəl-Tesalonik d almasal wa əmosan

² Faw da nətigudəy i Məşşina dəy talxa-nawan ket-nawan assaxa kul wa kawan-du-nəkta dəy təwatriwen-nana. ³ Faw da nəkittəw dat Məşşina di n Abba-nana awa dər ogda əzəmmizəl wa təgam əzəgzan-nawan, d əmmək was təşyalam əs tara ta kawan-təhat, əd zəmmerat-nawan dəy igi n attama dəy Əməli-nana Ƴaysa Əlməsix.

⁴ Nəssân, imədrayan-nana as, isinafran-kawan Məşşina, kawanay a ira, y ad təqqələm tamattay-net. ⁵ Adi da fəlas isalan n Əlinjil win dawan-nəga, wər kawan-in-osen əmosan awal Ƴas, kalar əmosan imazalan ən tarna, d əsəggətəkki zəwwəran win ihakku Infas wa Zəddigan. Təssânam wəllen imazalan win nəga gar-ewwan fəl agamay ən tənfa-nawan. ⁶ Təttəlalam-nana, təttəlalam dəy Əməli. Təmiyataram wəllen eges wər dawan-igdel awen əlqəbulat n awal ən Məşşina əs tədəwit ta ihakku Infas wa Zəddigan. ⁷ Əmmək wen dəy as təqqəlam almasal olâxan y əlməsixitan kul win əhanen akal ən Masedonəya, əd wa n Akayya. ⁸ Wərgəx Masedonəya d Akayya Ƴas a dəy tawaslan igitan n awal ən Məşşina win Ƴur-wan əganen, kalar edag kul wizawazan dəy-as salan n əzəgzan-nawan əs Məşşina har as wər nəddərar s əsuxəl n awen. ⁹ Ənta awedan kul immal əmmək was dana-təqbalam assaxa wa kawan-in-nosa, d əmmək was təgmadam batu n əssənəman təmalallayam sa sər Məşşina y a tu-təxbədam, ənta a imosan Əməli iddaran, ittidda. ¹⁰ Təqqələm dəy y a d-İfəl Barar-net Ƴaysa ijənnawan s ənta a d-İssənkar dəy təmattant, a danax-agəz dəy alham ən Məşşina əzəl a ilkaman.

2

Emel n Əlinjil dəy Tesalonik

¹ Kawanay iman-nawan imədrayan-nana, təssanam as assa wa dawan-in-nəga wər ibbənnan ² Təssanam harwa daɣ as dat assa-nana y-awan, nətiwadgaz, tiwaggan-anay ərrəbdan daɣ əxrəm ən Filib, mišan nəgraw tadhəlt ən Məşşina s as danax-ikfa taholat n a dawan-nəməl Əlinjil, kuddeɣ as iyyəwanan aytedan agamay n a danax-əgdəlan awen.

³ Aratan win dər kawan-nəsammatar wər əmosan a igmayan əsəxrək n awedan wala iga s ark ənnəyat wala əs təkərras. ⁴ Kalar dad zamas Məşşina išşəggar iwallan-nana fəl a danax-isənnəttəf d amel n Əlinjil-net, daɣ adi wər nətəggu awal a daɣ nəgammay ad nəgrəz y aytedan, kalar Məşşina as nəra a das-nəgrəz s ənta a itaşaggaran iwallan-nana. ⁵ Təssanam wəllen as wər kala ad nəga batuten əmosnen şixiyyan, wala deɣ nəga ənnəyat iyyat təxbərat təmosat agamay ən tənfa i man-nana, Məşşina danax-imosan təgəyya fəl adi. ⁶ Wər nəgmay deɣ saɣmar daɣ aytedan, gər za daɣ-wan wala daɣ aytedan wiyyad. ⁷ Nəfrəg a kawan-nəssəwər igi n awa nəra fəlas nakkanay a mosnen inəmmuzal n Əlməsix, mišan talmat a kawan-nəssəkna. Zund əmmək as tətənatfə anna əd bararan-net, ⁸ əmmək en daɣ as nakkanay da, fəl tara ta dawan-nəga, nara a dawan-nagu isalan n Əlinjil a d-ifəlan Məşşina. Amaran wərgəɣ isalan n Əlinjil ɣas, kalar iman-nana da nəga edag y a tan-nakfu fəl əddəlil-nawan, fəl awa dawan-nəga daɣ tara! ⁹ Təkittəwam ya imədrayan-nana əşşəxəl issohen izzəwat wa nətaggu ehad ezal fəl ad wər nəqqəl əzuk i waliyyan daɣ-wan, assaxa wa dawan-nəmmal Əlinjil a d-ifəlan Məşşina. ¹⁰ Təggiyyem iman-nawan, amaran Məşşina da iggiyyat as kawanay a mosnen iməzzəgzan, nəg-awan tidawt təgat əs tazdak, d əzəluləɣ, d iban əlɣib waliyyan. ¹¹ Təssanam as əkkulluk n iyyan daɣ-wan nəg-as arat wa z'agu abba i bararan-net. ¹² Nəsimatar-kawan, nolam-awan fəl man, nəzzidgaz-kawan deɣ y ad tagim alxal wa ira Məşşina s ənta a kawan-ixran fəl ad təggəzam taɣmar-net əd tanaya-net.

Əlqəbulat ən Kəl-Tesalonik awal ən Məşşina

¹³ Faw da nətigudəy i Məşşina fəl əddəlil n as təslam y awal-net wa dawan-nəmal, təqbalam-tu, wər das-təgəm iduf n as awal n aytedan, kalar təgam-as iduf n awa imos, a t-imosan awal ən Məşşina a išxalan daɣ wallan-nawan kawanay a sər-əs əzzəgzannen. ¹⁴ Ənta imədrayan-nana, kawanay təqqalam aytedan əttilalnen əlməsixitan win Əlkənisanən ən Məşşina şin əhanen akal ən Yahudəyya. Awen da a fəlas kawanay da ziɣazzaban-kawan kəl akal-nawan zund əmmək as Əlkənisanən şin əntanatay da

ziyazzaban-tanat Kəl-Əlyəhud. ¹⁵ Əntanay a ənğanen Əməli Ƴaysa, d ənnəbitan, əmərədda ədgazan-ana wəllen nakkanay da. Wər əgrezan i Məşşina, amaran əmosan izənga n aytedan kul. ¹⁶ Gaddalan-anağ ad nətamagrad i təmattiwen šin wər nəmos Kəl-Əlyəhud nətəgg-asnat isalan n efsan win ihakku Məşşina. Emmək en dağ as faw sandin ibakkadan-nasan. Mišan illikan âs, ilkâm a fall-asan d-izəzzəbbət Məşşina alham-net.

Deran ən Buləs ad iləs iki ən Kəl-Tesalonik

¹⁷ Nakkanay amaran imədrayan-nana, illikan as isigalam-anağ əzəmməzzəy wa danağ-əgan dər-wan azzaman, nənamaggag dər-wan dağ akal mišan wərge dağ wallan, nədgâz wəllen dağ agamay n anay-nawan fəlas nəsidaran-tu wəllen. ¹⁸ Awen da fəlas nara a kawan-in-nakku, wəllen nak Buləs. Wərgəğ taklat iyyadda Ƴas a dağ əgmayağ a kawan-in-akka, mišan awen igdal-anaq-qu Aşşaytan. ¹⁹ Awak wərgəğ kawanay Ƴas a mosnen attamanana, təmosam əssəbab ən təfalawist-nana, təmosam fella-nana əzəl wad za nəbdəd dat Əməli-nana Ƴaysa assağa wa du-z-asu? ²⁰ Awalla kawanay a imosan abarag-nana, təmosam değ əssəbab ən təfalawist-nana.

3

¹ Awen da fəlas imədrayan-nana, təgmad-ana təzaydart n əsəgəd wen, nəsof ad naqqam Ƴas-nana nak əd Silfanus dağ əğrəm n Atena. ² Təzzar nəzammazal-in amadray-nana Timotay, imosan əmadhal dağ əşşəğələn win Məşşina, tan imosan əzəwwəziwəz ən salan n Əlinjil n Əlməsix, y ad isəssuhət əzəgzan-nawan aləm-awan fəl man, ³ fəl a kawan-wər-iggəz i oyyan iman-net issəfəldu dənnəg-əs ətəwədgaz wa təgam. Təssânam iman-nawan as ətəwədgaz wədi iha aratan win as otas Məşşina harwa dağ tizarat as a danağ-əgrəwan. ⁴ Harwa Ƴurwan nəlla nəyyəwan-awan igi daw ağaf âs itiwatas ad nətəwədgəz, amaran arat wa, təssânam as ənta iman-net a igan əmərədda. ⁵ Awen da fəl di-təgmad təzaydart n əsəgəd, təzzar zammazalağ-in Timotay y a di-d-abəz isalan n əzəgzan-nawan, fəl təksəda n ad təfətəqqem dağ taftawen n Ənəjjerrəb abbannan əşşəğəl issohen wa nəga.

⁶ Mišan əmərədda Timotay səket sər-anaq qawan-d-ifal, nəgraw Ƴur-əs əmərrəgəz-nawan olâğan. Imal-anağ iduf wa təgam əzəgzan-nawan, əd tara ta kawan-təhat, d as təkittəwam-ana s əllux. Təsidadanam wəllen a dana-tələsam anay, arat wa, ənta a nəga nakkanay da. ⁷ Emmək en dağ as imədrayan-nana, širəmmağ, əd tarsəmmawen kul šin nəga, təkfâm-ana təsasmit s

əzəgzan-nawan. ⁸ Awalla əmərədda əqqalan-ana-du man-nana, fəlas kawanay təglâyam dəy tørtəyt-nawan d Əməli. ⁹ Mas nəfrag igi-net y ad nəggudəy i Məşşina dəy talxanawan əd tədəwit tagget ta sər-nax du-tewayam dat-əs? ¹⁰ Ehad ezal nətansay Məşşina əs gəlleyat a danax-akfu turagat n a kawan-nələs anay, d a kawan-naknu əsəssəgri fəl ad issuhət əzəgzan-nawan.

¹¹ Axədet Məşşina di n Abba-nana d Əməli-nana Yaysa, tarrayt ta dana-za-təsəmmənəyat dər-wan! ¹² Kawanay amaran aget Əməli əşitəy aggen y ənəmərə wa təgam gar-ewwan, əd tara ta təgam y əkkulluk n aggadəm, zund əmmək as nakkanay da nəg-awan tara wər nələ əddukad. ¹³ Isəssuhətət Əməli iduf-nawan, fəl ad təqqələm imizdagan, wər nələ əlyib waliyyan dat Məşşina di n Abba-nana, əzəl wa du-z-iqqəl Əməli Yaysa iddew d aytədan kul win-net. Amin.

4

Ammaran

Təməddurt toxâdat

¹ Imədrayan-nana, nəssosan-kawan əmmək was za tagim təməddurt ta dəy za təgrəzam i Məşşina, amaran harwa əmərədda da awen dəy as təlkamam. Əmərədda nəgmay dəy-wan əs gəlleyat s esəm n Əməli Yaysa ad təşşitim dəy anamod wen. ² Nəzzidgaz-kawan dəy awen fəlas təssânam awas kawan-nomar s ənta a danax-issəwar Əməli Yaysa.

³ Arat wa ira Məşşina, ad təqqələm imizdagan ogaznen iman-nasan dəy igi n əzzəna.

⁴ Əkkulluk n iyyan dəy-wan ittəfet tanat dəy təxəssa-net əs tazdak n əwəl d əzzəbun. ⁵ Taqqamim da wər təlkemam y arak deranan ən tara ən man, zun awa taggin nəmməzray wər nəssen Məşşina. ⁶ A kawan-wər-iggəz i igân iba n tidət y əmidi-net dəy batu tədi wala idləm-tu. Fəlas Əməli ad awwaddab awədan kul wa igan arak mazalan zun win di. Arat wa dat əzəl da nəg-awan-tu daw axaf. ⁷ Ənta Məşşina wər danax-ira ammadəs, kalar tazdak a danax-ira. ⁸ Awen da fəlas awədan wa din-igaran ammaran win, wədi wərgəy awədan a inkur, kalar awədan wədi Məşşina a inkur s ənta a kawan-ikfan İnfəs-net Zəddigan.

⁹ Dəy talxa ən tara ta gər mədrayan, wər təddəraram i dawan-in-iktaban şirawt, fəlas Məşşina a kawan-issosanan kawanay iman-nawan ənəmərə gar-ewwan. ¹⁰ Fadda

ənəmərə wa ənta iman-net a təsannafalalam i mədrayan-nana kul win akal ən Masedonəya. Mišan nəgmay daɣ-wan əs gälleyat ya imədrayan-nana, ad təşatim daɣ əsəkni ən tara ta. ¹¹ Eqqəlat aytedan wər nədgez ar daɣ igi ən təməddurt təgât daɣ alxer, tannattafam d əşşəxəlannawan, ad təgammayam təməddurt daɣ təxurad-nawan. Adi da as kawan-nomar. ¹² Emmək di daɣ as sər-wan du-z-awəy alxal-nawan ətəwəsəxmar daɣ aytedan win wər nəmos əlməsixitan, təqqəlam aytedan wər nəmos əzuk y awedan waliyyan.

Isalan ən tanakra ən nəmməttan

¹³ Imədrayan-nana, nəsidaran ad təssənam awa imosan tidət daɣ talɣa n aytedan win aba, fəl ad wər təqqəlam aytedan as əxşadan man-nasan, zun awa igrawan aytedan win hadatnen wər nəga attama-nasan daɣ wala. ¹⁴ Dad zamas nəzzigzan as Ƴaysa aba-tu inkar-du daɣ təmattant, wədi ad nəzzəgzən as Məşşina a d-issuxəl əs tarrayt ən Ƴaysa aytedan win aba, əqqəlan-du əddewan əd Ƴaysa. ¹⁵ Arat da wa dawan-za-nəməl daɣ awa danax-isannafalal Əməli: Nakkanay win du-za-tagəz tewaɣlay n Əməli nəddar, wər za nagu wala arat ən tizart i win aba. ¹⁶ Fəlas Əməli iman-net as du-z-azzabbat daɣ jənnawan xur əkuray, imosan əməsli n angalos wa zəwwəran, d anasaɣ n asäk ən Məşşina. As iga adi aytedan kul win aba əzzigzanan s Əlməsix, əntanay a du-z-izarnen tanakra. ¹⁷ Dəffər adi nakkanay win d-ogaz alwaq wen nəddar, a dər-san nidaw nəmmidkal daɣ təgnawen, nəssəlkəd y Əməli daɣ alhawa, nəməl xur-əs har faw. ¹⁸ Daɣ adi əqqəlanet salan win arat a du-tətənəməsəktim gar-ewwan, imos-awan ares ən təfalawist.

5

¹ Wər təddəraram imədrayan-in i dawan-in-iktaban daɣ talɣa n azzaman wala assaɣat ta daɣ z'agin aratan win. ² Fəlas təssənam iman-nawan as əzəl wa ilkaman a d-agu assa wər nəla şisənnəfray, zund abaydag a d-idālan ehad. ³ As ənnan aytedan: «Iket alxer, iket iba ən tazak waliyyat»! Amazay wen da daɣ fall-asan du-z-azzabbat alwaba ihân samal ən təlawayt ta du-tətasat tantut tətəggazat amzur, amaran wər z'əfrəgan əderrəg y-as. ⁴ Mišan kawanay, imədrayan-in, wərge şiyay a təham əngəm a dawan-itaggu əzəl wədi təydərt ta n abaydag. ⁵ Ənta ketnawan as təmosam bararan n ənnur, təmosam bararan n azal: Wərmad a danax-ila ahad za wər danax-ələnat şiyay. ⁶ Daɣ adi ad wər nətaggu etəs wa taggin aytedan win

²⁵ Tattarat-anax-in imədrayan-nana: ²⁶ Səsləmat-in imədrayan-nana kul tassaknim-tan-in tara ta n tidət.
²⁷ Əgmaya dağ-wan fəl udəm n Əməli, ad taxrim şirawt ta i mədrayan-nana kul.

²⁸ Izazzabbat-du fall-awan Əməli-nana Үaysa Əlməsix arraxmat-net!

Širawt ta n sanatat iktab Buləs i Kəl-Tesalonik

Assalaman

¹ Širawt a din-təfâlat nak Buləs əd Silfanus əd Timotay. Nəhul-in Ğlkənisat ta n əyrəm ən Tesalonik təmosat tamat-tay tərtaşat əd Məşşina di n Abba-nana, d Ğməli Ƴaysa Ğlməsix. ² İkf-iwan Məşşina di n Abba-nana d Ğməli Ƴaysa Ğlməsix arraxmat d alxer.

Ğşşərixa wa z'agin xur tawaxlay n Ğlməsix

³ İmədrayan-nana, iwâr-ana ad nətigudəy i Məşşina faw dağ talxa-nawan. İmos adi arat as inihagga a tunagu fəlas əzəgzan-nawan a itittəyan wəllen, itittəy əntada ənəmərə-nawan. ⁴ Adi da a fəlas nakkanay iman-nana nəsanamal fall-awan dağ Ğlkənisanen šin hadatnen ən Məşşina. Nəmmâl zəmmerat-nawan d əzəgzan-nawan dağ ətəwədgaz kul wa tatawaggam d arkanay wa tənnayam.

⁵ İsitadda adi aqqad n əşşərixa ən Məşşina, amaran adi da a kawan-z-issəhəran əd tağmar-net ta fəl tənnayam arkanay. ⁶ Arat oğadan xur Məşşina a imos ad izzəzəl dağ win kawan-zaxazzabnen. ⁷ Amaran kawanay win taxazzabnen əmərədda, a kawan-akfu təsasmit akf-anaq-qat nakkanay da. Arat wa, ad agu assaxa wa du-z-inəfiləl Ƴaysa Ğlməsix ifâl-du jənnawan ənta d angalosan-net əlanen tarna, ⁸ dağ ammas ən təmsay təbilaglagat fəl ad awwaddab aytedan win wər nəssen Məşşina, ugayan əs ləkkum y Ğlinjil n Ğməli-nana Ƴaysa Ğlməsix. ⁹ Attadib-nasan, ad iqqəl ahluk ixlâlan, nəməggəgan d Ğməli-nana. Wər dasan-ilkem anay ən tanaya ən tarna-net. ¹⁰ Adi kul ad agu əzəl wa du-z-azzabbat Ƴaysa iha ammas n aytedan win mizdagan əd win sər-əs əzzəgzannen kul fəl ad t-əssəxməran ad t-əmmalan. Kawanay da a tan-təggəzam əzəl wədi fəlas təzzigzanam isalan win dawan-nəga. ¹¹ Adi a fəl dawan-nətansay Ğməli-nana faw a kawan-issəhəran əd tarrayt ta daq-qawan iga. Nəgammay dağ-as ad assandu əs tarna-net deranan-nawan kul win olaxnen, agu değ əzəgzan-nawan arat təha tənfa. ¹² Eddi ad za təssəxməram esəm n Ğməli-nana Ƴaysa, issəxmər-kawan ənta da s arraxmat ən Məşşina d Ğməli-nana Ƴaysa Ğlməsix.

2

¹ Imədrayan-nana, daɣ batu ta təqqalat əzəbbi wa du-z-
 agu Əməli-nana Ƴaysa Əlməsix əd tidawt ta za nagu ɣur-
 əs, nəgmây daɣ-wan: ² Ad wər ašəw awedan waliyyan
 əd tayttay-nawan, wala təššəwəšam fəl əddəlil ən batu
 as itiwanna isinafalal-aña-tat-du Məššina s Infas-net wa
 Zəddigan, wala təššəwəšam fəl əddəlil ən batu nəgâ daɣ
 anamod wen, wala deɣ širawt iyyat as dawan-itiwanna
 nakkanay a din-təfal nəmmal daɣ-as as əzəl wa ilkaman
 ewad-du. ³ A tu-wər-iməl əmmək as kawan-issəxrak
 awedan, fəlas əzəl wədi wər du-z-asu iket wər tənayam
 əfəlləg, təzzar inifiləl Ənəmmezrəy as itawannu In-Tajat
 as təsəlkaht-net ahluk. ⁴ Imos azangaw ən Məššina a
 z'ammazrayan arat kul was itawanna ifâl-du Məššina əd
 wa itawaybadan, agu iman-net dənnəg-san. Fadda ad
 aqqam daɣ Ahan wa Zəwwəran n Əlɣibada, agu iman-net
 əməli. ⁵ Awak takatawt a wər tətəggim as dawan-əmalay
 aratan win ketnasan harwa ɣur-wan əlle?

⁶ Amaran əmərədda təssānam awa t-in-iwayan fəl a du-
 wər-inafalal iket wər d-osa alwaq-net. ⁷ Wala əmərədda
 da təmazrəyt tətawamazal daw amaɗal, əngəm in za as
 ab'as t-illa wa tat-in-iwayan. ⁸ Amaran inəfiləl-du In-Tajat
 mišan as d-osa Əməli Ƴaysa a daɣ-as ikkəs iman s Infas-net,
 assabu tamayyamayt-net s əmələwləw n assa-net. ⁹ Assa n
 In-Tajat a d-agu əs tarrayt n Aššaytan iddew d əzzənəfan ag-
 gotnen ən təlməxjujaten d alɣalamaten əd təjujab əmosnen
 bahutan. ¹⁰ In-Tajat iddew d əkulluk n abakkad issixrakan
 aytedan win z'əhləknen, fəlas wər əqbelan za wər əren
 tidət ta təfragat əsəfsi-nasan. ¹¹ Eddəlil-net a fəl dasan-d-
 issəgla Məššina tarrayt təsaxrakat, fəl ad əzzəgzənan əs
 bahu, ¹² fəl ad awwaddaban win wər nəzzəgzan əs tidət,
 əssofan ləkkum y awa wər noyed.

Akniwat əzəzzəwi daɣ əzəgzan-nawan

¹³ Nakkanay amaran imədrayan-nana ən maran n Əməli,
 iwâr-anay ad nətigudəy faw i Məššina daɣ talɣa-nawan
 fəlas kawanay təzzar a isannafran Məššina y ad təgrəwam
 efsan s əzəzdəg wa itaggu Infas ən Məššina d əzəgzan
 əs tidət. ¹⁴ Awen da as kawan-d-iɣra s Əlinjil wa
 dawan-nəmal fəl ad təgrəwam tanaya n Əməli-nana Ƴaysa
 Əlməsix. ¹⁵ Daɣ adi imədrayan-nana, zəzzəwətət daɣ iduf
 n əsəssəxri wa dawan-nəga gər za s əmi wala da əs šira šin
 dawan-in-nəktaɓ.

¹⁶ Amaran nəgmây daɣ Məššina di n Abba-nana d
 Əməli-nana Ƴaysa Əlməsix iman-net danaɣ-ərānen, əkfān-
 ana s arraxmat təsasmit təɣlâlat d-igi n attama issohen,

17 a kawan-akfin təsasmit n əwəl, səssuhen-kawan fəl ad təfrəgam əmazal əd tənna n awa olağan.

3

Taggiwat šiwatriwen

1 Əmərədda imədrayan-nana, tansayat-anax-in Məşşina, fəl ad iwəziwəz awal n Əməli itəwəgg-as saşmar wa das-itawaggan şur-wan. 2 Əgməyat ənta da daş Məşşina a danaş-ogazan daş zənga əd nəzzulam fəlas wərgəş aytedan kul a əttafnen əzəgzan. 3 Mişan, Əməli alşadil a imos, ənta a kawan-z-isəssuhen agəz-kawan daş İblis. 4 Nəga attama s esəm n Əməli as tətamazalam awas kawan-nomar taglim deş tətamazalam-tu. 5 İssədəget Əməli iwəllan-nawan sa sər tara ən Məşşina əd zəmmerat ta ihakku Əlməsix.

Batu təqqâlat aytedan win məssəndad

6 Imədrayan-nana, nomâr-kawan fəl udəm n Əməli-nana Şaysa Əlməsix s ad tənəməggəgam əd məzzəgzan kul win məssəndad, wər əlkeman y awa tan-nəsassaşra. 7 Kawanay iman-nawan, təssânam wəllen as immikkan ad tataggim awa nətəg. Harwa a şur-wan nəlla, wər nəmos iməssəndad. 8 Wər nəgməy daş waliyyan daş-wan a danaş-işatşu bannan, kalar nərda s anay n arkanay d iduz labasan, nəşşâl ehad ezal fəl ad wər nəqqəl əzuk i waliyyan daş-wan. 9 Wər dana-isassaga adi iba ən təla n alxaq n a dana-tilalam, kala ar nəg-ay fəl a dawan-nəqqəl almasal. 10 Harwa kawan-nəha, nomâr-kawan s as: Wa ugayan s əşşəşəl, ad wər atşu.

11 Amaran əmərədda nəsla as ahân-kawan aytedan əglânen əs tamajalladat, wər tan-iha ar iguz ən taşawşiwen a tan-wər-nəqqəl. 12 Aytedan win di nomâr-tan, nəgmây daş-san deş s esəm n Əməli Şaysa Əlməsix, ad agin əşşəşəl-nasan əs tənəgrit fəl ad atşin daş əşşəşəl ən fassan-nasan. 13 Amaran kawanay imədrayan-nana, ad wər təddəzam igi n awa olağan. 14 Kud ih-iwan awedan wər nəlkem y awa nənna daş şirawt ta, əssənət-tu, a tu-wər-təməl tassaş waliyyat gar-ewwan dər-əs, fəl ad ikərəkəd. 15 Dər iga adi da, a das-wər-tagim iduf n azangaw, taggat-as ənnəsixa wa za tagim y amadray-nawan.

Şiwatriwen d assalaman

16 Akfet-kawan Əməli n alxer ənta iman-net alxer faw daş arət kul, ilal-awan ketnawan. 17 Əfus wa-nin iman-in a iktaban awa: Şihulawen a din-əşmadnen Buləs. Awa da

a imosan ejwal ən šira-nin kul. Emmək wa da as tanat-kattaba. ¹⁸ Məššina ya təkfeq-qawan arraxmat n Əməlinana Ƴaysa Əlməsix.

Širawt ta tazzarat iktab Buləs i Timotay

Šihulawen

¹ Awa nak Buləs, anammazul n Elməsix Үaysa s ammar ən Məššina di n Enəssefsi-nana d Elməsix Үaysa wa dağ nəga attama-nana. ² Əhulağ-in Timotay imosan barar-in wa n tidət dağ əzəgzan əs Үaysa Elməsix. Əgmâya dağ Məššina di n Abba, d Əməli-nana Elməsix Үaysa, a fall-ak d-izazzabben arraxmat, əd təhanint, d alxer.

Arraxmat ən Məššina əd təballant ta tolağat

Ərruxmatan fəl səssəxritan win saxraknen

³ Үur iki-nin akal ən Masedonəya, əgmâya dağ-ak ad taqqama dağ əxrəm n Efez, fəl ad təzzərəzağ isəssəxritan saxraknen, a dağ-as taggin aytedan wiyyad. ⁴ Ann-asan ad ammazzayan əd ləkkum i mayyan ən Kəl-Əlyəhud, əd masnat n əsmawan n aljadan, wər nəla təzərəst! Aratan win wər du-tiwəyan ar tamazaq wər təha alfaydat waliyyat, edağ a n ad ədgəzan dağ iduf n aratan win issəbdad Məššina dağ tarrayt ta n əzəgzan. ⁵ Elməxsud n awas kay-omarax əddi, a tu-təməl tara dağ aytedan s əwəl iyyanda, d ənnəyaten olaxnen, d əzəgzan wər təha təmənufəqa. ⁶ Aytedan wiyyad namaggagan d əššərədan win, fataqqen dağ igi ən batuten šiyyad wər nəla almağna waliyyan. ⁷ Sidaranan ad əqqəlan imusanan n əššərixa wa n Əttawret, ənta wərmad əgrân awa gannin wala değ aratan win as əššewalan əkkasan dağ-san aššak.

⁸ Nəssân as əššərixa wa n Əttawret olâğ as das-ilkam awedan s əllux. ⁹ Nəssân değ as əššərixa wər d-osa fəl əddəlil n aytedan win oğadnen, kalar osâ-du fəl əddəlil n arak aytedan, əd nəmməzray, d aytedan win wər nəksud Məššina, əd win nasbakkadan əd win wər nəha əddin əd maggan n alfawaxişan əd win əganen iman n abbatan-nasan d annaten-nasan əd win maggan ən man ¹⁰ əd maggan n əzzəna, əd win tinəməgginen əzzəna gər za meddan gar-essan, wala šidoden gar-essanat, d aytedan win din-zanzinen wiyyad, əd nəsbuha əd win tagginen tahuday ən bahu, d aytedan kul win əmməzraynen əsəssəxri wa isxan. ¹¹ Əsəssəxri wədi, igmâd-du Əlinjil ən Məššina ilân albaraka ila tanaya. Əlinjil en da a dər-i isannattaf.

Igodan ən Buləs i Məššina arraxmat-net

¹² Ɛggodayaḡ y Ɛlməsix Ƴaysa əməli-nana a di-issəfragan igi n əššəḡəl-in, fəlas əsənnəhi a di-iga əd təfləst, isannafran-i fəl a das-əšḡəla, ¹³ nak was harwa das-wər-əlkema tibuduraq-qu, sakna inalkiman-net arkanay, rabbadaq-qan, mišan ihanattat-i fəlas əljəhəl d iba n əzəgzan sər-əs a daḡ əgeḡ awen. ¹⁴ Təzzar isannahal-i Ɛməli-nana tehakkay n arraxmat-net, ikf-i deḡ əzəgzan əd tara win sər-na du-tətaway tassaḡ əd Ƴaysa Ɛlməsix.

¹⁵ Batu ta, igmâd-tat aššak, təhor deḡ d i tat-izzəgzanan ketnet təmosat as: Ɛlməsix Ƴaysa osâ-du əddənet fəl ad as-safsu inasbakkadan as nak eḡaf-nasan. ¹⁶ Mišan ihanattat-i Məššina, fəl a sər-i assaknu Ɛlməsix Ƴaysa nak a ogaran inasbakkadan, tazaydart-net ketnet, əqqəlaḡ almasal y aytedan win sər-əs z'əzəgzənnen əgrəwan təməddurt ta təḡlalay.

¹⁷ Ya Ɛmənokal n Amaylol
Wər nətəməttəy har faw
wər itəwənəy
Wər ila əmidi.
Saxmar d ədkul kul
kay a dər-san ihoran har faw.
Amin!

Awa iwaran Timotay

¹⁸ Ya barar-in Timotay, ənta da arat was kay omara, amaran inimannak əd batuten šin fall-ak əgan ələwlitan dat awa əs tilalt n Infas ən Məššina, imosan as, batuten šin di ag-enat təzoli-nak daḡ əməgər olâḡan wa təge d aytedan win safraynen awal ən Məššina. ¹⁹ As tətəggaḡ adi təttafaḡ əzəgzan-nak, təzinamazlaya wəllen gər awa olayən d awa wər noleḡ. Aytedan wiyyad teway-du sər-san tugəyt s adi as ibarajjat əzəgzan-nasan. ²⁰ Aytedan win di ih-en Himani d Alaskandər. Oyyeḡ Aššaytan orn-en fəl ad aknin, ammazzayan d ikus ən tarna i Məššina.

2

Ɛnnizam n Ɛlkənisat

Ɛlyibada daḡ Ɛlkənisat

¹ Ɛgmâya daḡ-wan daḡ adi ad təgammayam daḡ Məššina a iknan tumaḡlaten n aytedan, tətattaram, tətansayam-tu y aytedan kul, tətigudəyam-as awa iga y akk awedan. ² Ad tətəggim adi da i mənokalan d aytedan kul win əhanen taḡmar fəl ad nagu təməddurt tədrârat, iha alxer daḡ nəksud Məššina d əzzəbun daḡ əkkulluk n anamod. ³ Adi a olayən, igraz y Ɛnəssefsi-nana Məššina, ⁴ irân əsəfsi n aytedan kul, awədan masnat ən tidət.

⁵ Fəlas Məşşina iyyanda ƣas a t-illan, awedan deƣ iyyanda, a t-imosan Ƴaysa Əlməsix a imosan almawakkil gər Məşşina d aytedan;

⁶ ikfa iman-net, fəl ad addarfen aytedan kul.

Ənta den da təgəyya ta iga Məşşina daƣ alwaq was imal.

⁷ Təgəyya ten da as di-isannafran Məşşina y a tat-aga. Igi əməggi ən salan n Əlinjil, d anammazul. Issok-i aytedan win wər nəmos Kəl Əlyəhud y a tan-sassaxra awa iqqalan əzəgzan əd tidət. Awa ənne da, tidət a imos, wərge bahu.

⁸ Daƣ adi, daƣ adag kul, as təddewam y əlƣibada, əgməya daƣ meddan ad tattaran ədkâlan ifassan-nasan s əwəl zəddigan wər iha alham wala əsəmməsəndəd. ⁹ Əmmək en da as areƣ ad tagginat tədoden telassay təzzibanat, tətârat, təhât edag. Ad wər ədləgnat iman-nasnat əs lətfan əmmittaynen, wala s urəƣ əd təssəxeren madəƣ tabdoq təkñât əzzəwi. ¹⁰ Kalar ədləgnatet iman-nasnat əs mazalan olaƣnen win tagginat tədoden šin əksudnen Məşşina. ¹¹ Daƣ alwaqan win əsəssəƣri n əljəməƣat, tantut iwâr-tat ad tədrər taknu əsəsəm a daƣ təbbirdag y əməsəseƣri. ¹² Wər əkfe tantut turagat n əsəssəƣri wala da tizart y aləs. Kalar iwâr-tat əsəsəm. ¹³ Fəlas Adəm a d-ixlak Məşşina daƣ tizarat, dəffər adi ixlak-du Xawa. ¹⁴ Harwa, wərge Adəm a issəxrak Iblis; kalar tantut a issəxrak, təqqal tənəmməzrəyt. ¹⁵ Mišan ya ad təgrəw əlƣillas s əssəbab n as tətalu bararan. Amaran šidoden ad əƣləsnat as zazzawatnat daƣ əzəgzan-nasnat, təh-enat tara, əgânat alxal zəddigan, əgânat awen daƣ əzzəbun.

3

Imuzaran n Əlkənisat

¹ İllikan as awedan was imos amadammad-net tišit n əmuzar ən nalkiman ən Ƴaysa, əşşəƣəl ihossayan a ira əddi. ² Əmuzar n Əlkənisat iwâr-tu a tu-wər-illa i ifragan a daƣ-as d-inəy ark arat, izlâf tantut iyyadda, iƣdal i təntut-net, imos awedan səmmidan, innoda daƣ əwəl-net, ila əzzəbun, ih-ay amagaru, ifrag wəllen əsəssəƣri. ³ Wər t-itəqqəl əməšwi n esmad wala awedan n əməkkənəs. Kalar əmuzar n Əlkənisat iwâr-tu ad imos awedan ilân aladab, wər imos ənadlam, wər iwwəlat azrəf. ⁴ İwâr-tu ad ittâf s əlluƣ tanat n aƣaywan-net, əbbirdagan bararan-net, iga awen s əzzəbun. ⁵ Awak awedan wa wər nəfreg ənəttaf ən wala aƣaywan-net, manəmmək as z'issən daƣ nalkiman ən Ƴaysa? ⁶ Ad wər iqqəl awedan as səket ilkam i Ƴaysa fəl ad wər idkəl iman-net dənnəg aytedan təzzar udu daƣ

tædlæmt ta day iggædla Iblis iman-net. ⁷ Iwâr-tu ad imos awedan æflâsan aytedan win wær nêmos ælmæsixitan, fæl a tu-wær-imæl i ifrågan a daḡ-as d-inøy ark arat, ifætæqqat daḡ taftaw n Iblis.

Imadhalan n Ælkænisat

⁸ Imadhalan n Ælkænisat, æntanay da iwâr-tan ad ættafan æzzæbun-nasan, tæssiflas dey batu-nasan. Ad wær iqḡal alxal-nasan tessay n esmad wala tattan alxaram. ⁹ Iwâr-tan ad zizawen daḡ tidæt ta tænafalalat tæhât æzægzan s Ælmæsix, ilen ænnøyaten zaddoggen. ¹⁰ Tæwæjærræbanet tæzzar, dæffer adi kud wær t-illa i ifragan a daḡ-as d-inøy ark arat, assantin æššæḡæl wa n tišit æn madhalan. ¹¹ Emmæk en daḡ as šimadhale n Ælkænisat da iwâr-tanat ad ælânat æzzæbun, wær tizæmnat, sammodnat, æḡdâlnat daḡ ækkulluk n arat. ¹² Imadhale n Ælkænisat iwâr-tu ad iḡdâl i tæntut-net, iga ænættaf olayan i bararan-net d aḡaywan-net. ¹³ Imadhalan n Ælkænisat win tagganen æššæḡæl-nasan s ælluḡ garrawan almaḡam d ikus n aššak ikmalan daḡ æzægzan s Ælmæsix ḡaysa.

Æssiran æn tarrayt ta n Æmæli

¹⁴ Attama wa ægeḡ n a kay-ænøya tarmad wær di-igdel a dak-in-æktæba isalan win di ¹⁵ fæl ad iqḡal as kud fallak in-ællolæḡ, da ad tæssænay alxal was immækkan ad tagin aytedan daḡ ahan æn Mæššina di n Amaylola t-imosan Ælkænisat. Ælkænisat ta ænta a tæmosat tægættawt ta n tæsækbælt æn tidæt. ¹⁶ Igmâd aššak as æssir wa danay-isannafalal Mæššina a t-imosan Ælmæsix, i zæwwæran:

Inafalal imos awedan.

Iggæyyat Infas æn Mæššina as oḡâd.

Ænâyan-tu angalosan.

Tiwaggan salan-net

y aytedan win wær nêmos Kæl-Ælyæhud.

Æzzigzanan sær-æs aytedan daḡ æddænet ketnet.

Immædkal æs jænnawan æs tanaya.

4

Æsæssæḡri wa olayan d amaššæḡal n Ælmæsix

Ærruymatan fæl sæssæḡritan æn bahu

¹ Dær iga awen da ya Infas imâl s ælluḡ as daḡ azaman win ælkammen, aytedan wiyyad ad ammazzayan d æzægzan s Ælmæsix, ælkaman i kælæsuf saxraknen, æd tæssunen n Aššaytan. ² Tæssunen šin æfâlnat-du inæsbuha n ælmunafiqan, æs æmmutan wallan-nasan, ³ æḡdâlan azalaf, æḡâman fæl tattay æn wiyyad imensewan as Mæššina a

tan-d-ixlakan fəl a tan-atšin aytedan win əzzəgzannen əggodayan i Məššina, əntanay a əssanen tidət. ⁴ Fəlas awa d-ixlak Məššina kul olâx. Wər t-ihā a xaraman, iggudəyet ɣas awedan i Məššina təzzar atšet awa ira. ⁵ Id izzizdak-ku awal ən Məššina əd təwatray.

Amašşaxal wa olaxan ən ɣaysa Elməsix

⁶ As təmmələx isalan win dak-əge da i məzzəgzan, ad təqqəla amašşaxal olâxan n Elməsix ɣaysa, iddaran s Elinjil imosan ənəfilal ən Məššina dəx ɣaysa, əd təssunt tolâxat tas təslə. ⁷ Ad wər təsasamaɣ i mayyan ən bannan əmmizraynen awal ən Məššina. Kalar səlməd iman-nak təməddurt ta dəx tosaɣa əd Məššina. ⁸ Əšinən ən taɣəssa wər tu-taha tənfa tagget, mišan əšinən n əwəl ləkkum y awal ən Məššina, tah-ay tənfa dəx tarrayt kul, fəlas nəgarraw sər-əs əmərədda təməddurt tas iga Məššina arkawal-net, nəgrəw-tat dəx dəffər iba. ⁹ Batu adi igmâd ašşak, tənlihat da sər-əs arđin aytedan kul. ¹⁰ Nənnây arkanay, nəbillan fəlas nəgâ attama-nana dəx Məššina di n Amaylol imosan Ənəssefsi n aytedan kul, wəllen win sər-əs əzzəgzannen. ¹¹ Aratan əddi da win as za tətamaray aytedan təsasaxray-asan-tan.

¹² Ad wər tayyaɣ awedan waliyyan alkik fəl as wər tawašşera. Kalar əqqəl almasal i məzzəgzan s awa təganna d alxal-nak əd tara ta kay-təhat d əzəgzan-nak əd tazdak n əwəl-nak. ¹³ Əgməd əs taɣaray n Awal ən Məššina i məzzəgzan, d əsəhəl-nasan d əsəssəɣri-nasan har din-asa. ¹⁴ Ad wər taqqama wər təšşəşyala təhəkkut ta təgrawa, ta kay-ikfa Məššina s awal wa sər-ək iga ələwli iyyan əs tarrayt n Infas ən Məššina, assaɣa wa kay-əssəwaran muzaran n Elkənisat ifassan. ¹⁵ Aratan win dak-əməla da, ədgəz dəx-san, fəl ad ənəyan aytedan kul əməttəy wa tətəgga.

¹⁶ Əssən dəx man-nak, təssəna ənta da dəx aratan win təsassaɣra, ad wər tammazzaya d igi n adi. As tətəggaɣ adi, ad tassafsaɣ iman-nak, tassafsa dəx aytedan win dak-sasannen.

5

Awa iwaran Timotay gar-es əd məzzəgzan

¹ Ad wər tətihərəšşey iɣmaran. Tagg-asan ənnəsixa šilat ən wa za taga y abba-nak; tagaɣ i meddan win madrornen ənnəsixa wa za tagaɣ i mədrayan-nak. ² Şiɣmaren ag-asnat ənnəsixa wa za taga y anna-nak. Taga dəx i tədoden šin madrornen ənnəsixa wa za tagaɣ i təmədrayen-nak, iga awen s əwəl zəddigan.

³ Səxmər šidoden šin as aba meddan-nasnat wər əlenat əşəqqax a dər-əsnat inəttafan, təssəna daɣ-asnat. ⁴ Mišan kud əlānat bararan madex ihayawan, wədi zəmmizəlanet təksəda-nasan Məššina s ad əssənan daɣ marwan-nasan, ərzəman-asan əsədwəl wa tan-əgan fəlas adi da igrazan i Məššina.

⁵ Amaran ta wər nəla i dər-əs, təxsâr əd man-net ənta əddi təgat attama-net daɣ Məššina, təgammay daɣ Məššina a iknan tuməɣlaten-net, tətattar ehad ezal. ⁶ Mišan as imos as tantut as wər idder aləs-net, təga təməddurt a daɣ təlkâm i tara ən man-net, kud imos as təxəssa-net təddar, da fəl aganna wa n tassaɣ-net əd Məššina šilat n as wər tədder. ⁷ Ənta əddi da awa as kay-iwar a tanat-tətamara sər-əs, fəl a tu-wər-iməl i ifragan a daɣ-asnat d-inəy ark arat. ⁸ Amaran awedan wa wər nəssen daɣ aytedan-net, wəllen win nəmmuray-net, wədi zun as oyya əzəgzan-net, iššam-as fadda awedan wa wər nəzzəgzan.

⁹ Ad wər təktəba tantut as wər idder aləs-net daɣ šin as tətılal Əlkənisat ar s ad təga sədisat təmərwen n awatay madex tokay-tanat, ənta da, wər tat-ides ar azalaf iyyanda. ¹⁰ Əggəyyen deɣ aytedan as tətəg imazalan olaxnen, əmosnen əsədwəl olāxan ən bararan-net, d amagaru, wər təsəssagar iman-net igi n əššəxəl a iqqal i məzzəgzan, əd tilalt y aytedan win məxatarnen, d əmazal n arat kul wa olaxan s əwəl iyyanda.

¹¹ Amaran šidoden šin aynaynen, šin as wər ədderan meddan-nasnat ad wər təqbəla tilalt y-asnat fəlas as daɣ-asnat d-inkar Iblis, ad usafnat azalaf əššəxəl y Əlməsix. ¹² Təzzar ibəz-tanat əššərixa ən Məššina s agamad wa tanat-iga əzəgzan-nasnat s ənta arkawal-nasnat wa az-zaran, ¹³ aqqaminat wər əlenat əššəxəl waliyyan ar ilum gər nan. Adi ogar-tu âs, a tanat-təggəz šizmit; əššiwəlnat daɣ təxawšiwən n aytedan, d aratan as wər imməkkan a daɣ-san şawalnat. ¹⁴ Daɣ adi šidoden šin aynaynen, šin as wər ədderan meddan-nasnat, əssəfəx ad əzləfnat, ilenat bararan, əssənnat daɣ xawnatan-nasnat fəl ad wər əgrəwnat i maksanan-nanax tarrayt n a daɣ-na d-ənəyan ark arat a sər-nax ənnan, ¹⁵ fəlas šiyyad daɣ-asnat har âs əxraknat, əlkamnat y Aššaytan.

¹⁶ Kud təll-ay təlməsixit təlât šişəqqaxən as wər ədderan meddan-nasnat, təssənet daɣ-asnat, aqqaminat wər əmosnat əzuk y Əlkənisat, fəl ad tilal i šin wər nəla i dər-əsnat.

¹⁷ Imuzaran n Ælkənisat win tagginen tizart tolayat əhoran d ətəwəsəymar imosan ənətfus, wəllen win tagganen təlxutbat sasaxrin Awal ən Məşşina. ¹⁸ Fəlas a ənnan Ælkəttaban: «*Ad wər tədbəya y azgar wa təşşəşyal*». Ənnân dəx: «*Amaşşayal ihor d alxaq-net*».

¹⁹ Ad wər tətattafa təxtəst tətawəggat y əmuzar n Ælkənisat ar s a *tat-əggəyyen əşşin aytedan madəy karad*.

²⁰ Imuzaran n Ælkənisat win tagginen ibakkadan, raqqam-asan dat Ælkənisat ketnet, fəl ad təggəz tasa əlməsixitan win hadatnen. ²¹ Onsayaq-qay fəl Məşşina d Ælməsix Yaysa d angalosan win isannafran ad təlkəma y aratan win as kay-omara da, dəx wər təgəx arak torda waliyyat, wala təmərıt.

²² Ad wər tərrurəda əsəwər ən fassan-nak awedan, wala dəx tilex adagar dəx bakkadan n awedan waliyyan. Ağəz iman-nak, tətəfa tazdak-nak. ²³ Mazzay əd tassay n aman xas, kalar sassu arat n esmad n alxanab ad anfu adi tadist-nak, anf-ik dəx təfrəyt ta sər-ək du-təsaşlayat.

²⁴ Əllan-tu aytedan as ibakkadan-nasan wər tan-iqqərat arat, tiwassanan harwa dat əşşərixa, mişan wiyyad dəffər tərut ad tawanayan win-nasan. ²⁵ Əmmək en dəx as, imazalan win olaxnen wər tan-iqqərat arat, amaran wala win iqqərat arat da wər təhigin əxbâran.

6

Eklan əd məssawsan

¹ Ælməsixitan kul win əmosnen eklan, iwâr-tan saymar ən məssawsan wəllen fəl ad wər əkkesan aytedan tarna i Məşşina, wala dəx alkin təssunt ta nəsassaxru.

² Amaran win dəx-san əlan əlməsixitan, ad wər assaknin məssawsan iba ən saymar fəlas dər-san əmosan arat iyyanda dəx əddin. Kalar aginet-asan əşşəxəl ofân was kala a dasan-tu-taggin, fəlas aytedan win garrawnen tənfa n əşşəxəl-nasan əddi, əntanay da əlməsixitan a əmosan sinahalten ətəwəra.

Ammaran əkkanen Timotay imosan əmaray əs Məşşina

İsəssəyritan ən bahu d əzəgzan wa n tidət

Adi a za tasassaxray aytedan təzzədgəzaq-qan dəx-as. ³ Awedan wa isasaxran aratan wər nəmos win dak-əmala da, harwa wər ilkem y awal wa isxan n Əməli-nana Yaysa Ælməsix d əsəssəxri wa d-itawayan təlxudəla, ⁴ wədi awedan anasbarag a imos n aljahil təssiran tara ən tamazaq əd takat wər nəga ar fəl almaşna n əlxərəfan. İtaraw-du adi manjəx əd tamazaq d arak batuten d arak tordaten, ⁵ əd məzrəyan wər nərriz gər aytedan as wər oşednat

ənnəyatən-nasan, təgmad-tan tidət. Əgân iduf n âs a tan-isəggərgəs iguz n əddin. ⁶ Mišan illikan as, təksəda ən Məşşina təmos təgərgist zəwwərat fəlas təhakk-anax təməddurt a dağ nəgda s awa nəla. ⁷ Fəlas wər neway wala as du-nəggaz əddənet zund əmmək en dağ as a tat-nəgməd wər neway wala. ⁸ Dağ adi, agdet-anax as nəla isudar əd talassay. ⁹ Amaran aytedan win əranen təgərgist, tifətəqqən dağ jarrabatan, əd taftawen d arak deranan aggotnen a tan-əkmanen, a du-wər-nətiwəy s awedan ar əbərəjji d əhluk. ¹⁰ Tara n əzrəf a təmosat ələsəl n əşşur kul. Əllan-tu aytedan s awa das-əgan dağ tara, əxrakan, igmad-tan əzəgzan-nasan, ewayan-du əs man-nasan şiməgraz aggotnen.

Ammaran əkkanen Timotay

¹¹ Amaran kay Timotay, imosan əmaray əs Məşşina, dar-rag y adi ketnet. Əgməy taqqat, əd təksəda ən Məşşina, d əzəgzan, əd tara, əd zəmmerat, əd talmat. ¹² Agu təbəllant ta tolayat, təmosat aggaz n əzəgzan. Əqbəl təməddurt ta təxlalat, fəlas Məşşina iyr-ik y a tat-təgrəwax, amaran batunet a dağ təmalax əzəgzan-nak dat təgəyyawen aggotnen. ¹³ Omâraq-qay fəl Məşşina a itaggin iman dağ arat kul, d Elməsix Yaysa a imalan s əllux əzəgzan-net dat Fons Bilatəs, ¹⁴ ad təlkəma y awas kay-omara, a daq-qay wər iwer lahan waliyyan, wər t-illa i ifragan a dağ-ak d-inəy ark arat, har d-inəfiləl Əməli-nana Yaysa Elməsix. ¹⁵ Ənəfilal-net ad agu dağ alwaq wa issənsa Məşşina y awen,

Ənta a ilan albaraka

Ənta xas ənaxkim wa n tidət

Əmənokal ən mənokalan,

Əməli ən malan

¹⁶ Wər itəməttəy har faw

Izdâx dağ ənnur

Wər din-itəwəhiz

Wər t-illa awedan as kala ad t-inay

Wala ifrag anay-net

Ənta a ilan saymar əd tarna har faw.

Amin!

Awa iwaran iməggərgas

¹⁷ Amər win əggərgasnen dağ əddənet s ad wər ədkelan iman-nasan dənəg aytedan wala agin attama-nasan dağ təgərgist wər za nahag. Amər-tan s ad t-agin dağ Məşşina a danax-ihakkin arat kul s igət fəl ad nagu təməddurt a dağ nəddəwat. ¹⁸ Amər-tan s əmazal n awa olaxan, əggərgasanet dağ mazalan olaxnen, təggəzet-tan tahakkay, ardinet əs tədrəwt d aytedan. ¹⁹ Əmmək di as z'əşşidəwan i

man-nasan tægərgist a za təqqəlat təsəbdət tolayat y awa d-izayan əzəl a ilkaman fəl ad əgrəwan təməddurt ta n tidət.

İnnəsixa wa ilkaman əd təhult

²⁰ Ya Timotay, agəz awa kay-issəylaf Məşşina. Nəməggəg əd batuten ən bannan əmmizraynen əddin, əd tamazayen əgânen daɣ təssunt ən bahu. ²¹ Wiyyad əlməsixitan əlkânnen i təssunt tədi, əxrakan əmməzzayan d əzəgzan.

Məşşina ya təgeɣ-awan arraxmat-net.

Širawt ta n sanatat ta iktab Buləs i Timotay

Təhult

¹ Awa nak Buləs, anammazul ən Ƴaysa əs tərəddawt ən Məššina. Iwâr-i amel ən təməddurt tas danaƳ-itawagga arkawal-net əs tarrayt ən tærtəyt d Elməsix Ƴaysa. ² ƏhulaƳ-in Timotay imosan zun barar-in əkneƳ tara: Onsaya Məššina di n Abba, d Elməsix Ƴaysa Əməli-nana, a kay-ikfan arraxmat əd təhanint d alxer.

Ammar ən Timotay s ad aglu daƳ əššəƳəl-net

Agoda ən Buləs i Məššina daƳ batu ən Timotay d ammar-net

³ Nak əggodayaƳ i Məššina, s ənta a əƳbada s əwəl iyyanda zund əmmək as t-əƳbadan marawan-in, amaran kittəwaq-qay faw daƳ təwatriwen-in ehad ezal. ⁴ KittəwaƳ iməttawan-nak əkneƳ tara n a kay-ələsaƳ anay fəl ad aknin man-in təfalawist. ⁵ Kittəwa dəƳ əzəƳzan wa təgeƳ əs Ƴaysa s a wər nəmos sokni, amaran əzəƳzan wa, ənta təga Lawisa ta kay-təsahhayawat, d anna-nak Anika. ƏkkasaƳ aššak as kay da təgrâwaq-qu s əmmək en da. ⁶ Awen da fəl kay-du-saktaƳ as: sudər təhəkkut ta dak-iga Məššina, s əssəbab n əsəwər wa kay-əgeƳ ifassan. ⁷ Infas wa danaƳ-ikfa Məššina, wər imos Infas ən tasa, kalar Infas a imos ən tarna əd tara d iduf n əzzəbun. ⁸ DaƳ adi a kay-wər-təggəz təkarakit n ad tətagayye fəl Əməli-nana, wala dəƳ isəkkərukəd-kay iguz-in kasaw fəl əddəlil-net. Kalar nərtəyet daƳ alƳazab wa tagga daƳ tarrayt n Əlinjil, iga awen əs tarna ən Məššina

⁹ s ənta danaƳ-issəfsan,
ig-ana təƳaray zəddigat,
wərgəƳ fəl əddəlil ən mazalan-nana,
kalar fəl əddəlil n awa issəbdad Məššina əs tara-net,
d arraxmat ta dana-tətawakfat əs tarrayt n Elməsix Ƴaysa
harwa dat axluk-net əddənet.

¹⁰ Arraxmat ta isannafalal-tat-du əmərədda
assa n Ənəssefsi-nana Elməsix Ƴaysa
s ənta a ikkasan tarna daƳ təmattant,
isammalawlaw təməddurt ta təƳlalət
tas itaggu Əlinjil isalan-net.

¹¹ Əddəlil n Əlinjil en da a fəl di-isannafran Məššina ig-i əməggi ən salan, n anammazul n əməsəsəƳri. ¹² Amaran əddəlil n aratan win da, a fəl tawazaƳazzabaƳ əmərədda,

mišan wər fall-i imos awen təkarakit, fəlas əssana was əzzəgzana, əkney dey ikus n aššak as ifrâg ad agəz taɣlift ta ɣur-əs əle har əzəl a ilkaman. ¹³ Əlkəm y almasal wa ihan isalan ən tidət win dak-əgeɣ, təzəzzəwe daɣ-as s əzəgzan əd tara win du-tətaway tassaɣ n Əlməsix Ƴaysa. ¹⁴ Taɣlift təhossayat ta təgrawa ɣur Məššina, agəz-tat əs tarna n Infas wa Zəddigan a danaɣ-ihan. ¹⁵ Təssənaɣ əs aytedan kul win akal n Asəya əfalan dəffər-i, harkid Figelus, əd Hermogenus. ¹⁶ Əməli ya təzizabbe du təhanint-nak fəl aɣaywan n Onesiforus, fəlas faw italam-i fəl man, amaran wər ikarakad y iguz-in kasaw. ¹⁷ Kalar assaɣa wa din-osa Ərrum, iswad-i əs tidət har di-igraw. ¹⁸ Əməli ya təhinatteɣ-as əzəl a ilkaman. Kay iman-nak a issanan wəllen daɣ tilalt ta di-igi daɣ əɣrəm wa n Efez.

2

Anammagar wa n tidət n Əlməsix

¹ Daɣ adi kay barar-in səssuhət iman-nak s arraxmat ta təhat tartəyt n Əlməsix Ƴaysa. ² Amaran arət was di-təsle ənneq-qu dat təgəyyawen aggotnen, sənnəttəf dər-əs aytedan əxdâlnen, əfrâgnen a tu-sassaɣrin əntanay da i wiyyad. ³ Əzmər kay da i tadagart-nak daɣ aɣazab fəlas adi da a itaggu anammagar wa n tidət n Əlməsix Ƴaysa. ⁴ Awedan imosan anammagar, wər izlay daɣ təɣawsiwen n əddənet sa hadan, fəlas wər igəmməy ar gərrezat y əmənokəl-net. ⁵ Zund əmmək di daɣ as ənəbbellen wər inəjjəx ar s ad ilkâm y əššərədan kul win təbəllant. ⁶ Amaran əmagyak wa igan əššəxəl olâɣan, ənta a itizaran agaraw ən ɣarat. ⁷ Ənzər wəllen daɣ awa dak-ganna da, fəlas Məššina a kay-z-akfin əgərri daɣ əkkulluk n arət. ⁸ Kattəw Ƴaysa Əlməsix, s ənta a d-itawasankaran daɣ nəmməttan, imos arət daɣ əzzurrəyya ən Dawəd. Arət wa iššewal sər-əs Əlinjil wa əmmala. ⁹ Əddəlil n Əlinjil en da, a fəl taɣazzaba, har as əgan-i ɣunan iguz a taggin y əjajəb n anasgafa. Mišan awal ən Məššina ənta wər t-əhen ɣunan. ¹⁰ Awen da fəlas əddəlil ən win isannafran Məššina a fəl əzmara y arət ketnet, fəl ad əgrəwan əntanay da efsan əs tarrayt n Əlməsix Ƴaysa, əgrəwan tanaya təɣlalət. ¹¹ Illikan as awal wa tidət a imos:

As dər-əs nərtay daɣ təməttant ta iga,
a dər-əs nərtəy dey daɣ təməddurt.

¹² As nəzmar, wədi a dər-əs nərtəy daɣ taɣmar,
as tu-nənkur, wədi a danaɣ-unkar ənta da.

¹³ Kud nakkanay wər nəɣdel, ənta faw ixdâl,
fəlas wər z'unkar iman-net.

Amaššayal itiwaqbalan

¹⁴ Aratan win as tæsley da, sakt-en-du i mæzzægzan tæzzar tægmøya daḡ-san fəl udəm ən Məššina ad ammazzayan əd tamazaq ən təfir. Wər tat-təha tənfa waliyyat. Wər du-tətiwəy ar ahluk n aytedan win das-sasammen. ¹⁵ Gammay wəllen d ad tagay iman-nak aləs isitaddan əzəluləḡ-net dat Məššina, təqqələy awedan wər nətəkərukud daḡ əššəḡəl-net, tətəggəy igi oḡâdan i salan win tidət. ¹⁶ Nəməggəg d awalan wər nəla almaḡna waliyyan, əmosan əllid n əzəgzan, fəlas win as əmosan awalan win əššəḡəl-nasan, iket tahagin kannin ənəməggəg əd təksəda ən Məššina. ¹⁷ Awal-nasan iha əlmital an šiqqest labasat, a du-təjibərəjjet elam. Aytedan win arat daḡ-san a imos Himani əd Filetos. ¹⁸ Əntanay a sannaməggəgnen iman-nasan əd tidət, ənnan tanakra ən nəmməttan wər təmos arat ilkâman, kalar arat okâyan a təmos, takkasan s awen əzəgzan daḡ aytedan. ¹⁹ As iga awen šiḡəttawen šin issəbdad Məššina, arat a mosnat izizawen, iwâr-tanat ejwal ən Məššina imosan batuten šin: «*Əməli issan win-net.*» Iwâr-tanat deḡ as: «Awedan kul wa innan ənta in Əməli, wədi iwâr-tu ad uḡag arat kul wa wər noḡed.» ²⁰ Aḡaywan zəwwəran ihossayan wərgəḡ ikassan n urəḡ d əzrəf ḡas a t-əhanen, kalar əhan-tu win eškan, əd win talaq. Wiyyad za tiwasansan y əzəl a sər-san iskatan, win hadatnen amaran tiwasatəḡmalan əzəl kul. ²¹ Daḡ adi as izzəzdaḡ awedan iman-net daḡ ark aratan win əmala da, ad immutəḡ y əššəḡəlan a sər-əs əškâtnen, iqqəl awedan zəddigan təha tənfa i məššis, amaran igâr iri y igi ən mazalan kul win oləynen. ²² Darrag y arak deranan ən təmmədrəyt, ad təgammayəḡ əd taqqat d əzəgzan əd tara d alxer, tərtəya d aytedan win tansaynen Məššina s əwəl zəddigan. ²³ Nəməggəg əd təmazəḡen wər nəla almaḡna, əmosnat əljəhəl, id təssânaḡ as ikənnasan a du-tawaynat. ²⁴ Akli n Əməli wər ihor ad ikannas, kalar iwâr-tu ad səmmid y aytedan kul, imos awedan ifrâḡan əsəssəḡri, tahay tazaydart, ²⁵ iwâr-tu ad itaḡḡu əsəssəḡri ləmmidan y aytedan win das-tamazəḡnen, daḡ igi n attama n a tan-akfu Məššina tətubt y ad ənəyan tidət. ²⁶ Əddi a tan-du-za-təqqəl tayttay-nasan ta tolayat, əkkəsan iman-nasan daḡ taftawen n Iblis a tan-ibâzan, ig-en daḡ agna-net.

3

Tilkamat n əddənet

¹ Əssən Timotay as azzaman win əlkamnen, a daḡ-san aḡin jilan labasnen. ² Əddi aytedan ad ib'as

kittəwan ar iman-nasan, iren azrəf, əqqəlan inasbaragan, əzzəzwəran iman-nasan, taggin alfawaxışan, ib'as əbbərdagan i marwan-nasan, ib'as tan-iha agoda, amaran wər z'əssəxmaran aratan win əqqalnen əddin. ³ İkwalan wallan-nasan, wər tan-təha təhanint, jiwanken dağ şizmit, wər əlen əzzəbun, əknân aşşar, əgzaran arat kul olağan, ⁴ əqqəlan iməkkəddal, əlkəman y awa dasan-dəwayan medranan-nasan, ih-en əttəkəbbur wəllen, usafan deranan-nasan i talğa ta n Məşşina. ⁵ Ad əttəfan əddin dağ azzahir, mişan ad unkaran tarna-net. Aytedan win, nəməggəg dər-san! ⁶ Əhan-tan wiyyad as imos alxal-nasan ilum gər xawnatan, tabazan əs taftawen-nasan şidoden şin ərkammen, ən tənəsbakkaden. Şidoden şin den wər əlkemnat ar y arak deranan-nasnat əmosnen əzzənəfan. ⁷ Faw da əgəmmaynat təxaray mişan wər əfregnat masnat ən tidət. ⁸ Emmək was əmməzrayan maşşaxawan ən Masar əmosnen Yanus əd Yanbres ənnəbi Musa, əmmək wədi dağ as əmməzrayan aytedan win di tidət. Meddan win taytweenasnat wər tanat-iha ar ağşud, amaran əzəgzan-nasan wər izmer i jarrabatan. ⁹ Mişan wər z'əgrəwan təttəyt waliyyat, fəlas əmməskəl-nasan ad inəfiləl y əkkulluk n awedan, zun awa igrawan Yanus əd Yanbres.

Əgəlli dağ əzəgzan ən tidət

¹⁰ Kay amaran, təkney ləkkum y əsəssəxri-nin d alxal-in, təssənəx wəllen aratan win as ənnəyyəx igi-nasan, tənəyax wəllen əzəgzan-in əd təzaydart-in əd tara-nin əd zəmmerat-in ¹¹ d ətəwədgaz-in d alğazab-in. Təssəna dağ arat kul wa di-igrawan dağ əxrəm n Antəyoxəya əd wa n İkonəyum əd wa n Lustra. Məni-tu ətəwədgaz wa wər əgeç? Mişan ikkas-i-du Məşşina dağ awen kul. ¹² Amaran aytedan kul win miksadan ən Məşşina əs tərtəyt n Əlməsix Үaysa, win di ad təwədgəzan. ¹³ Mişan aytedan win maksanan, n əlmunafiqan, ad şatin dağ arak mazalan, saxrakan aytedan-nasan, saxrakan iman-nasan. ¹⁴ Kay amaran, aknu əsəggətəkki dağ aratan win təssana, təkkaşa dağ-san aşşak. Təssənəx wa dak-tan-issosanan. ¹⁵ Harwa da təmosa barar as təssənəx Əlkəttaban win Zaddognen, amaran əfrəgan a kay-akfin masnat ta tətəwayat s agaraw n əlxillas s əzəgzan s Əlməsix Үaysa. ¹⁶ Əlkəttaban win Zaddognen kul İnfəs wa Zəddigan a d-əfalan amaran təhen tənfa dağ əsəssəxri n aytedan d aqqad-nasan d ikus-nasan dağ alxata d əsəssəxri-nasan dağ tarrayt ta toxadat. ¹⁷ Emmək di as awedan wa imosan əmaray əs Məşşina ad ifrəg, aknu deç əmutəg y igi n əşşəxəl kul wa olağan.

4

Emel ən salan win tidət

¹ Onsayaq-qay fəl udəm ən Məššina, d Əlməsix Ƴaysa, s ənta a z'ışrəxan win əddarnen əd win aba d udəm n ənəfilal n Əlməsix əd taymar-net as: ² Ədgəz daƳ amel n awal ən Məššina əs təməwit daƳ du-wər-tətəqqəla dəffərək, gər za təgrawaƳ edag n igi n awen wala. Əqqəl awedan a d-isarđin aytedan əs wər əlen tidət, ad təraqqama y aytedan tətamaraq-qan, iga awen əs təzaydart təkmâlat d əsəssəƳri iknân. ³ Fəlas əlkâman azzaman a daƳ wər z'əqbəlan aytedan əsəssəƳri wa n tidət təzzar əlkəman y arak deranan, ad šadawan fəl man-nasan iməssəsəƳra a dasan-ganninen aratan kul win as saddaranan tesalay y-asan. ⁴ Ad ədbəxan šiməzzugen-nasan i tidət, usafan əsəsəm i mayyan. ⁵ Kay amaran əqqəl awedan ilan əzzəbun daƳ əkkulluk n arət, təzməra y alyazab, iqqəl əššəƳəl-nak emel n Əlinjil y aytedan. ⁶ Nak amaran alwaq ən teklay-nin ihoz-du, alwaq ewad-du wa daƳ z'akfa təməddurt-in təmos takutay. ⁷ Əggâza s əlluƳ təbəllant, əggâza tammazaga har təƳrad, əgley oğâzaƳ əzəgzan-in. ⁸ DaƳ adi, awa obazan Ƴur əmərədda, tətivasans-i təkəbbut ta n aqqad təmosat aroz ən wa d-ornan, s ənta di-z-akfu Əməli imosan əmašraƳ wa oƳadan, əzəl a ilkaman. WərgəƳ nak Ƴas as tat-z-akfu, kalar a tat-akfu y aytedan kul win əqqalnen əs tara y ənəfilal-net.

Ammaran əkkanen Timotay

⁹ Ədgəz wəllen daƳ a di-du-takka daƳ ətrub, ¹⁰ fəlas Demas igmad batu-nin id issôf ləkkum y əddənət, ikka aƳrəm ən Tesalonik. Kreses amaran ikka akal ən Galatəya, Titəs deƳ ikka akal ən Dalmatəya. ¹¹ Wər Ƴur-i d-iqqim ar Luqa. Idaw-du əd Markus fəlas tah-i-tu tənfa daƳ əššəƳəl-in. ¹² Zimazala Tişik s əƳrəm n Efez. ¹³ As du-təgle təmmərəƳ-i-du əbərnuz wa din-oyye Ƴur Karfus daƳ əƳrəm ən Trowas, təmmərəƳ-i-du deƳ əlkəttaban-in, wəllen win əganen daƳ aƳəšek.

¹⁴ Alaskandər wa n anad issikn-i arak mazalan aggotnen labasnen. Əməli a das-z-ixkəman əs mazalan-net. ¹⁵ Kay da ənkəd-as, fəlas ikna tišit n əllid n awa nəsassəƳru.

¹⁶ Ƴur əššəriƳa-nin wa azzaran wər t-illa awedan iwâran aganna-nin, kalar awedan kul igmad batu-nin. Məššina ya wər tan-tobeza s əmazal di. ¹⁷ Əməli a iwaran aganna-nin, isassahat-i, fəl ad aslin aytedan kul win wər nəmos Kəl-Əlyəhud y əmazal-net, šišawadaƳ əs təməwit təkmâlat, ikkas-i-du daƳ əmi n ahar. ¹⁸ A di-agəz Əməli daƳ i t-illa əššur ən maksanan, assafs-i y a di-agu daƳ taymar-net ta

n jənnawan. Ənta a ilan tanaya ta tu-təllat daɣ əɣlul ən təmeren! Amin.

Şihulawen

¹⁹ Təhulax-in Friska d Akilas, əntanay harkid aɣaywan n Onesiforus. ²⁰ Erastus ənta iqqim-in daɣ əɣrəm ən Korent. Trofiməs, as t-id-əfalax irin daɣ əɣrəm ən Miletəs. ²¹ Ədgəz wəllən daɣ a du-tasa dat təgrəst. Əhulan-kay-in id Ebulay əd Fudenəs əd Linəs əd Klawdəya əd mədrayan-nana kul daɣ əzəgzan. ²² Illil-ak Əməli, ikf-iwan arraxmat ketnawan! Amin!

Širawt ta iktab Buləs i Titəs

Isənti

¹ Awa nak Buləs, imosan akli ən Məššina, əmosa dey anammazul ən Ƴaysa Əlməsix. Issiwar-i Məššina əzuk n a d-awəyay əs tarrayt ta n əzəgzan aytedan win isannafran; əssusənaq-qan tidət ta tan-za-tassaknit anamod was z'agin təməddurt tənimmannakat əd tara ən Məššina. ² Emmək en dağ as z'agin attama ən təməddurt ta təxlalat. Təməddurt ten, Məššina di wər nətəggu bahu a igan arkawal-net dat əxluk n əddənet. ³ Amaran Məššina isinafalal awal-net dağ alwaq was otas. Awal wen ənta a iha əlməyiza was du-tawaflassa s igi-net, dağ əlkâma y awas omar Məššina di n Ənəssefsi-nana. ⁴ Əhulaq-qay-in Titəs. Təmosa zun barar-in wa n tidət a dər ədrâwəy əzəgzan. Əgmâya dağ Məššina di n Abba, d Ənəssefsi-nana Ƴaysa Əlməsix, a fall-ak d-izazzabben arraxmat d alxer.

Əššəxəl ən Titəs dağ Kəret

Ətəwəsənəfran ən muzaran d əššəxəl wa tan-iwaran

⁵ Oyyeq-qay-in dağ akal ən Kəret fəl ad təsəkkəsəwəy awa din-iqqiman dağ əššəxəl-nana, təzzar taga dağ əkkulluk n əyrəm imuzaran y Əlkənisat ta tu-təhat. Aktəw aratan win as kay-omara, a tan-imosan as: ⁶ Akkiyyan dağ muzaran win, ihor a tu-wər-illa i ifragan a dağ-as d-inəy ark arat, izlâf tantut iyyadda, ila bararan əzzigzannen, as tu-wər-illa i z'annin əlan arak aladab, madəx wər əbbərdagan. ⁷ Ənta amxar n Əlkənisat Məššina a t-iflasan izzozar-tu i tamattay-net, dağ adi ilzâm-tu ad imos awedan as tu-wər-illa i ifragan a dağ-as d-inəy ark arat: Wər idkel iman-net dənnəg aytedan, wər ila tuksay n əwəl, wər imos əməšwi n esmad, wər imos əməkkənnəs, wala dəx itattu alxaram. ⁸ Kalar arat wa t-ilzaman ad imos aləs iha amagaru, ira imazalan win olaynen, imos ag əlməxsud, n əməzzələləx, n əmizdag innodan dağ əwəl-net. ⁹ Isigatakkat wəllen dağ ləkkum y awal wa ilan ələsəl s əmmək was itawasasayra. As iga adi, ad igrəw fərregat n ad itamar aytedan s əsəssəxri wa n tidət itaggu, ifrəg dəx ad isattaddu y aytedan win das-əggewalnen as əntanay a əhanen alxata.

Ənnəkud i səssəyritan win bahu

¹⁰ Ənta əllan-tu aytedan aggotnen, wəllen win d-əgmadnen Kəl-Əlyəhud, əmosnen inəffəllag, əššewalnen

ixärsan, saxrakan aytedan. ¹¹ Aytedan win di ilzâm ad tawêdbəxan mawan-nasan, fêlas saxrakan iḡawnatan əḡrâdnen s əsəssəḡri n aratan wər nəmməkkan. Tattin s awen alxaram. ¹² Iyyan daḡ kəl akal-nasan, imosan ənnəbi a innan:

«Kəl-Kəret, har faw təmosam inəsbuha, təmosam šilan wəxsan aššarnen, ən nəffərəšša wər nəmədrin ar daḡ a ətšan.»

¹³ Amaran arat wa inna da, tidət a imos. Awen da fêlas agasan ərruḡmatan əsäsnen, fêl ad izəluləḡ əzəgzan-nasan, ¹⁴ aqqamin da wər əlkeman i mayyan ən Kəl-İlyəhud d idufan n aytedan win əmməzraynen tidət. ¹⁵ Arat kul zəddig y aytedan win as zaddogan man-nasan. Mišan aytedan win as wər zaddogan man-nasan, ugâyan deḡ s əzəgzan, ḡur-san wər t-illa a zəddigan, fêlas taytween-nasan, d ənnəyatən-nasan kul ih-enat iba ən tazdak. ¹⁶ Gannin əksudan Məššina, mišan imazalan win taggin sataddin as ənkurantū. Əmosan aytedan tagginen igitan əssiglafnen, əmosan inəmməzray a fêl tu-wər-illa igi n əmazal olaḡan.

2

İsəssəḡri ikkan İlkənisat

Ammaran əkkanen əzzənəfan n aytedan

¹ Amaran kay, tamar s aratan win namannaknen əd tarrayt ta imal əsəssəḡri wa n tidət.

² Tannaḡ i meddan win waššarnen ad əqqəlan aytedan sammədnen, əttâfnen əzzəbun, ənnədnən daḡ wallan-nasan, issohat əzəgzan-nasan, təh-en tara, əknan zəmmerat.

³ Əmmək wen daḡ as ilzam ad t-əginat tədoden šin waššarnen. Amər-tanat s ad əttâfnat əzzəbun-nasnat dat Məššina. Ad wər tazamnat wala iqqəl alxal-nasnat tessay n esmad aggen. İqqəlnatet šidoden tamarnen s əmazal n awa olaḡan. ⁴ İdgəznatet daḡ ammar ən tədoden šin madrornen s ad irenat meddan-nasnat, əd bararan-nasnat. ⁵ İqqəlnat šidoden ənnədnən daḡ wallan-nasnat, əginat alxal zəddigan. Annattafnat d əššəḡəlan ən ḡawnatan-nasnat, aləḡnat, abbardagnat i meddan-nasnat. As iga adi, wər z'itəwəlku Awal ən Məššina.

⁶ Tamar harwa s əmmək wen da meddan win madrornen s ad annadin daḡ wallan-nasan. ⁷ Kay iman-nak da ilzâm-kay ad tətəḡḡaḡ imazalan olaḡnen daḡ əkkulluk n anamod fêl ad təqqələḡ almasal y aytedan. Taggu əsəssəḡri igân s

əwəl iyyanda, ilân almağna. ⁸ Taggu batuten oğadnen as tu-wər-illa i dər-əsnat du-z-iqqəlan. As iga adi inəmmənkaranax a dasan-iba a sər-nağ ənnan təha təkma, tabəz-tan təkarakit.

⁹ Amər eklan s ad abbardagan i məssawsan dağ əkkulluk n arat, a dasan-taggin arat wa fəl tan-z-irin, ayyin-tan təmazrəyt, ¹⁰ amaran a dağ-san wər takaran. Kalar əqqəlanet aytedan əssiflasnen wəllen. As iga adi a d-awəyan ətəwəsəğmar igân dağ əkkulluk n anamod y əsəssəğri kul wa iqqalan Məşşina di n Ənəsəfsi-nana.

Arraxmat ən Məşşina

¹¹ Ənta arraxmat ən Məşşina tənifalal, tewây-du efsan y aytedan kul. ¹² Təsakn-anax əmmək was za nammazzay əd mazalan win iba ən təksəda ən Məşşina əd tara n əddənet, fəl ad nagu dağ əddənet təməddurt a dağ nənnoda dağ wallan-nana, toğâdat, tənimmannak əd tara ən Məşşina. ¹³ Arat wa a tu-nagu nəssigad, nəga attama n əzəl isifalawasan, imosan ənəfilal n ədkul ən Məşşina di maqqaran, a t-imosan Ənəsəfsi-nana Ƴaysa Əlməsix. ¹⁴ Ənta a ikfan iman-net, fəl a danağ-isəddərfa dağ id t-illa əşşur, izzəzdəg-ana, nəqqəl tamattay-net a sər-əs təkâtat, təsigatakkat dağ igi ən mazalan win olağnen.

¹⁵ Arat da da was kay-ilzam a tu-təsasaxra, d anamod was ilzam a sər-əs tətamarax aytedan, təsuxulağ-asan-t-idu. Agu y əşşəğəl wa igi n aləs ilân batu. A tu-wər-iməl i kay-olkân.

3

Alxal was ilzam ad t-ağin əlməsixitan

¹ Sakt-en-du as ilzâm-tan ad əbbirdagan y əlxəkumat d almawakkilan-net, əkkiwanan-asan, əğəran iri y id t-illa əmazal olağan. ² Ad wər taggin arak batuten s awedan waliyyan, wala əqqəlan inadlaman, ilen aladab, əqqəlan aytedan zamazalnen talmat y əkkulluk n awedan.

³ Fəlas nakkanay iman-nana da əstizarat wər nəla almağna, nəmos inəmməzray əxrâknen. Nəha əkkəlu fəlas nəlkâm y ark ənnəyaten d arak deranan, əmosnen əzzənəfan. Nəmos aytedan as kawalan wallan-nasan, əranen əddənet, nəla alxal isinaglafan, nənimmaksan garəna. ⁴ Mişan assaxa wad tənafalal ənniğmat ən Məşşina di n Ənəsəfsi əd tara-net y aytedan, ⁵ issəfs-ana əs təhanint-net. Wərgəğ imazalan olağnen win nətəggu a fəl nəgraw efsan win. Kalar nəgraw-tan s əşirəd wa danağ-iga Infas wa Zəddigan. Əşirəd wa, ənta a danağ-ewayan əs təhəwt ta taynayət, isammattay-ana nəssənta təməddurt iyyat

taynat. ⁶ Infas wa izazzabbat-t-idu fall-ana Məššina s igət s əssəbab n awa iga Ƴaysa Ǝlməsix imosan Ǝnəssefsi-nana. ⁷ Arat wa ig-ay fəl ad nəqqəl iməkkusa ən təməddurt ta təxlalat s ənta daɣ nəga attama-nana, fəlas ikkas-ana-du daɣ tišit ən nəmməzray-net, s arraxmat-net.

⁸ Arat wa imos awal illikanan, amaran areɣ a daɣ-as tədgəza fəl ad awəy adi s aytedan win əzzəgzannen əs Məššina ad səggətəkken daɣ igi ən mazalan win olaɣnen. Arat da da wa olaɣan, təh-ay tənfa y aytedan.

Tarɣəmt fəl əzənnəməzrəy n aytedan

⁹ Nəməggəg əd takkayen wər nəla almaɣna d agamay ən masnat n əsmawan n aljadan. Tənəməggəga deɣ d amel gər aytedan əmmizraynen, d əməstan igân daɣ talɣa n əššəriɣa ən Kəl-Ǝlyəhud, fəlas wər əlen alfaydat waliyyat, za wər tan-təha tənfa. ¹⁰ I igmayan d əzənnəməzrəy n aytedan, tərɣəmaɣ-as har sanatat təklaten. As ilas dəffər adi təstəɣaq-qu daɣ Ǝlkənisat. ¹¹ Fəlas təfragay ad təkkəsəɣ əššak as aləs šilat ən wədi immizray tarrayt ta toɣadat, amaran itaggu ibakkadan, izabaz iman-net y əššəriɣa.

Ammaran win əlkamnen

¹² As sər-ək in-zammazalaɣ Artemas madeɣ Tišik, tənəmənɣa d a di-du-takka daɣ əɣrəm ən Nikobolis, fəlas ənta as otasa a daɣ-as əkkəsa tamert ta daɣ gaddalan konakan d asamed əšikəl. ¹³ Akn-in masnat daɣ əšikəl ən Zaynas wa n əmusan n əššəriɣa, d Abbolos. A tu-wər-iməl as miɣataran. ¹⁴ Amaran aytedan win-nana də iwar-tan ad əlmədan əsəggətəkki daɣ igi ən mazalan win olaɣnen, fəl a d-əssəxsəlan aratan win as təkna addararat igi, wərgəɣ ad əgân təməddurt a daɣ wər ənfen wala.

Šihulawen šin əlkamnen

¹⁵ Aytedan kul win dər namahaɣ edag, əhulan-kay-in. Təhulaɣ-in imaran-nana win dər nədraw əzəgzan. Məššina ya təgeɣ-awan arraxmat ketnawan.

Širawt ta iktab Buləs i Filemona

Šihulawen

¹⁻² Awa nak Buləs, imosan amaskasaw fəl əddəlil n Elməsix Ƴaysa, nak d əmidi-nana daƣ əzəƣzan Timotay, ənnanen əhulan-in əməri-nana Filemona n əmadhal-nana, d Əlkənisat ta tətamanayat daƣ ahan-nak. Nəhul-in deƣ təmidit-nana daƣ əzəƣzan Affəya d Arxifus əmadhal-nana daƣ təbəllant. ³ Izazzabbat-du fall-awan Məššina di n Abba-nana əd Ƴaysa Elməsix, Əməli-nana, arraxmat d alxer.

Tara d əzəƣzan ən Filemona

⁴ Əmidi-nin Filemona faw id əƣƣaza šin igi ən təwatriwen a kay daƣ-asnat d-əkatta ətigudəya y Əməli-nin. ⁵ Fəlas əsləƣ tara ta təgeƣ y aytedan kul win əlkamnen y Əməli Ƴaysa, d əzəƣzan wa sər-əs təge. ⁶ Šiwatriwen-in ətagƣaƣ-qanət fəl ad təgrəwa s əlləllu-nak, wa d-igmadan əzəƣzan-nak, əgərri iknan tənəddawt, n albaraka kul wa nəla daƣ ənəmənək-nana əs ləkkum y Elməsix. ⁷ Tara ta kay-təhat amidi-nin teway-du sər-i tədəwit aƣƣet d allam fəl man, təssismada deƣ iwallan n aytedan kul win əlkamnen i Ƴaysa Elməsix.

Efsan ən Buləs Onesim

⁸ Awen daƣ a fəlas kud imos as tartəyt-in d Elməsix təkfi fərregat n a kay-aməra s arət wa ihoran, ⁹ da əssofaƣ ad imos as aƣamay ƣas a daƣ-ak z'aga a di-taƣa tənəfust fəl əddəlil n ənəmərə wa nəga. Nak Buləs imosan almawakkil n Elməsix Ƴaysa əhe kasaw əmərədda fəl əddəlil-net, ¹⁰ əgmâya daƣ-ak a di-taƣa tənəfust daƣ talƣa n Onesim, wa ƣur-ək d-iddərragan, imosan barar-in daƣ əzəƣzan fəlas tarrayt ta n Ƴaysa Elməsix a daƣ t-əge harwa a ƣur-i illa da da daƣ kasaw. ¹¹ Kala a dak-ku-wər-təha tənfa mišan əmərədda təh-anaq-qu, ƣər za i kay wala i nak.

¹² Əmərədda əssoƣalaƣ-ak-k-in imos aƣanna-nin. ¹³ Əsidarana a ƣur-i illa da da iket əhe kasaw fəl əddəlil n Əlinjil, a di-ilal daƣ adag-nak. ¹⁴ Mišan wər areƣ igi n adi ar əs turagat-nak fəlas wər areƣ a kay-əšəhhəššəla əmazal a, olaƣan a, əssofa a tu-taƣa ƣar-ək əd man-nak. ¹⁵ Mijas Onesim wər dak-iga arət n afel, ar fəlas as kay-in-iƣƣal, a ƣur-ək aƣƣam har faw, ¹⁶ əmərədda wər imos akli ƣas, oƣar akli, əmidi-nin daƣ əzəƣzan n əməri-nin a imos. Wala nak əknəq-qu tara wəllen ənƣəm za kay a

das-issərtayan tara ta n as imos akli-nak imos deḡ əmidi-nak daḡ əzəgzan s Əməli. ¹⁷ Daḡ adi kud amidi-nak daḡ əzəgzan a əmosa wədi əqbəl-tu təttəfaq-qu daḡ adag wa daḡ-i təttafa. ¹⁸ As imos as iḡşād-ak arat made tər wâsaḡ-as-tu wədi nak a daq-qu təssana. ¹⁹ Arat wa əfus wa-nu nak Buləs as t-əktaba: nak a dak-z-irzəman. Kud ira wər kayd-əssəktay as kay təməddurt-nak iman-net a daḡ-ak əle. ²⁰ Əgmâya daḡ-ak əmidi-nin a di-taga tənəfust ta fəl udəm n Əməli. As di-təgey adi fəl əddəlil ən tartəyt ta nəga daḡ Əlməsix a di-taləma fəl man. ²¹ As dak-in-əkattaba şirawt ta əkkasaḡ aşşak as arat wa daḡ-ak in-əgammaya da a di-tu-taga ənta madeḡ a t-ogaran. ²² Əgmâya daḡ-ak deḡ a din-təsəmmutəga edag ən təḡimit fəlas ordêḡ as a kawan-in-ətəwəsuyəla as iqbal Məşşina şiwatriwen-nawan.

Şihulawen şin əlkammen

²³ Ebafras wa n əmidi-nin daḡ kasaw fəl əddəlil n Əlməsix Үaysa, issislam-in fall-ak, ²⁴ ənta əd Markus d Aristarxus əd Demas əd Luqa əmosnen imadhalan-in daḡ əşşəḡəl. ²⁵ Izazzabbat-du fall-awan Əməli Үaysa Əlməsix arraxmat-net.

Širawt ta tətawaktab i Kəl-Ÿibri İsənti: Məşşina išşewal-ana əs tarrayt ən barar-net

¹ Dəffər as išşewal Məşşina a irəwan i marawan-nana əs tarrayt n ənnəbitan, dağ taklaten aggotnen əd təməwiten aggotnen, ² išşewal-ana nakkanay da dağ azzaman win əlkamnen a, əs tarrayt ən Barar. Barar wen iga Məşşina arat kul dağ əfus-net, ixlak-du deş əddənət əs tarrayt-net. ³ Tanaya ən Məşşina kul təmilawlaw fall-as, amaran tənda-du dağ-as tişit ən Məşşina, awal-net deş ilân tarna, ənta as ittaf arat kul. Dəffər as issinda əşşəxəl wa n əzəzdəg-nana dağ bakkadan, ikka ijənnawan, iqqim dağ əxil ən Məşşina di idkalan. ⁴ Almaqam-net ikna şigrat ən wa n angalosan, fəlas esəm wa t-ikfa Məşşina oğar wəllen win-nasan.

Awa dər togda şigrat ən Barar ən Məşşina y angalosan almaqam

Barar ən Məşşina oğar angalosan

⁵ Amaran məni dağ angalosan was kala a das-inna Məşşina: «*Barar-in a təmosa, azalada, ad əqqaləş abba-nak.*» Məni deş dağ angalosan was inna Məşşina: «*Nak a das-əqqaləş abba, ənta deş iqqəl barar-in.*» ⁶ Amaran barar wa n aɣafadday en, as t-id-iga Məşşina dağ əddənət, omar angalosan kul s a das-əssəjədan. ⁷ Dağ batu ta təqqalat angalosan, inna Məşşina: «*Angalosan-net, ig-en zun aɟu, inaybidan-net ig-en zun abalagleg ən təmsay.*» ⁸ Dağ batu amaran ta təqqalat Barar, a inna Məşşina: «*Təymar-nak, ya Barar-in di n Amadkol, təll-ay har faw, əttəbil-nak, əttəbil n əşşəriya a imos.*» ⁹ «*Tareş taqqat, təkyâda təmazrəyt. Awen da fəlas ya Barar-in di n Amadkol, İməli-nak Məşşina a kay-igan əmənokal, isannafran-kay ikf-ik təfalawist tagget, togarat ta n midawan-nak.*» ¹⁰ Innâ deş Məşşina: «*Kay Barar-in di n Amadkol, əstizarat, kay a d-ixlakan amaɟal, ijənnawan deş kay a tan-d-ixlakan.*» ¹¹ «*Ad əməsan kul, mişan kay təlleq-qu har faw. Ketnasan ad agin əməndi wa tətəggu təbdəq.*» ¹² «*A dasan-tagəş aɟda wa itawaggin i təkadkat, itəwagg-asan deş əsəmməttəy wa itawaggan*» i səlsa. «*Mişan kay, har faw wər təmməttəya, təxrəst-nak deş wər təla təzərəst.*» ¹³ Amaran, məni dağ angalosan was kala a das-inna Məşşina: «*Qamu dağ əxil-in, har daw-ək əssərəsəş izəngə-nak, əməlan daw daran-nak.*» ¹⁴ Awak

angalosan, wərgex iməttənkəl a mosan s akkiyyan ila əşşəxəl-net, tiwazamazalan-du y ad ilalan y aytedan win z'əgrəwnen əlxillas?

2

Ad wər nəsettəlkək awal wa d-eway Barar ən Məşşina

¹ Awen dəx a fəlas iwâr-anaç ənnəkud wəllen, nəsessuhət aratan win as nəsla, fəl təksəda n ad nəgməd tarrayt ta tolayət. ² Arat kul wa əmalan angalosan i marawan-nanaç ittidda, amaran abakkad kul əd təmazrəyt kul n awal wədi itiwagg-asan attadib wa dər əhoran. ³ Manəmmək as za naqqam wər nəwwəddab as imos əs wər nəssəfrar əlxillas oğdân d awa təzzəwwərt? Fəlas əlxillas wa, Əməli iman-net a t-id-imalan dəx tizarat, win das-əslanen dəx sitaddan-anaç as tidət a imos. ⁴ Məşşina a isattaddan təgəyya-nasan s alxalamaten, d aratan simaklalnən, əd təlməxjujaten əmosnən əzzənəfan, əd təhəkkuten a d-əfalnən Infas wa Zəddigan. Aratan win kul ig-en əs təməwit tənimmannakat əd tara-net.

Əsəmmədrəy ən man əd tanaya ən Barar ən Məşşina

⁵ Wərgex angalosan a izzozar Məşşina y əddənət ta du-təzayat, tas nəşşewal dəx batu-net da. ⁶ Amaran təll-ay təgəyya dəx adag iyyan tənnât: *Ma imos aggadəm as t-idu-təkatta? Ma imos ag aggadəm as dəx-as tətassana?* ⁷ *Təssərasaq-qu dəx arat n azzaman, imal daw angalosan, dəffər awen təkfeq-qu tanaya d ədkul.* ⁸ *Təssərasax arat kul daw-əs.* Əzuzər wa t-iga Məşşina y arat kul, ənta a d-ewayan as wər t-illa i ifragan təmazrəyt-net. Amaran harwa da, wər nəhənnəy əs arat kul illa daw tanat-net. ⁹ Mişan nənây Ƴaysa as iga arat n azzaman illa daw angalosan, dəffər awen igraw tanaya d ədkul fəl əddəlil n alxazab wa iga əd təməttant ta iga. Əmmək en dəx as iğazankazət təməttant, imos awen arat iga fəl əddəlil n aytedan kul, s arraxmat ən Məşşina.

¹⁰ Məşşina a d-ixlakan aratan kul, amaran əddəlil-net a fəl t-əllan. Məşşina amaran igrâz-as ad əgrəwan aytedan aggotnən dəx tanaya-net. Dad zamas Ƴaysa a imosan əssəbab n əlxillas-nasan, wədi ilzâm ad t-akfu Məşşina alkamalat kul əs tarrayt n alxazab wa iga. ¹¹ Wa izazdagan, əd win tawazazdagnən, ketnasan iyyanda a d-əfalan, a t-imosan Məşşina. Awen dəx a fəlas Ƴaysa wər fall-as imos təkarakit tənna ta dasan-itaggu: «Imədrayan-in», ¹² assaxa wad inna: *Ad əmmələy esəm-nak i mədrayan-in. A dak-agay təmmalen dəx əljəməxət.* ¹³ Inna dəx: *A tu-sənnəhəlay*

fallesat. Inna harwada: *Nak da, nak əd bararan win di-ikfa Məššina*. ¹⁴ Daḡ adi, dad zamas bararan win olân, əgân daḡ azni əd təxəssa, wədi, Ȳaysa da iggâz alxalat ta əhan. Arat wen ig-ay, fəl ad attaftaf əs təmattant-net wa ittafan tarna ən təmattant, a t-imosan Iblis, ¹⁵ isəddərfət deḡ aytedan win əhanen əkkəlu daḡ təḡrəst-nasan fəl təksəda ta əgan i tamattant. ¹⁶ Igmâd aššak as Ȳaysa wər d-osa fəl ad issən daḡ angalosan. Kalar əzzurrəyya n ənnəbi Ibrahim a d-ikka y a daḡ-as issən. ¹⁷ Awen daḡ a fəlas ilzâm ad alu əd mədrayan-net daḡ arat kul, fəl ad iqqəl əlimam wa zəwwəran, imosan əməhhenən n alḡadil daḡ əlḡibada ən Məššina. Əmmək en da as z'igrəw təsurreft ən bakkadan ən tamattay. ¹⁸ Fəlas, alḡazab wa iga assaḡa wad itawajarrab, ikf-ay fərregat n ad agəz win tawajarrabnen.

3

Ȳaysa ənta ogaran tišit n alḡadil, ogar deḡ Musa almaḡam

¹ Adi daḡ a fəlas ya imədrayan-in kawanay a zaddoggen iḡr-iwan Məššina y a təḡrəwam tadagart daḡ əššəḡəl-net, aḡiwat ənəzər-nawan daḡ anammazul s ənta a imosan əlimam wa zəwwəran ən tarrayt ta nəha, a t-imosan Ȳaysa. ² Iḡdâl i Məššina di a t-isannafranan, zun awa iga ənnəbi Musa i tamattay ketnet ən Məššina. ³ Amaran, itiwaxkamas âs ihor əd tanaya təknât šigrat ən ta n Musa, zund əmmək âs əmakras n ahan, ogar ehan iman-net almaḡam. ⁴ Ehan kul ill-ay wa t-ikrasan, Məššina amaran, ənta a ikrasan əkkulluk n arat. ⁵ Musa iḡdâl i tamattay ketnet ən Məššina, amaran amaššəḡal a imos işewalan daḡ batu n aratan win z'iməl Məššina. ⁶ Əlməsix amaran barar n ahan ən Məššina a imos, iḡdâl i tamattay ən Məššina, imos əmuzar-net. Ehan wen amaran nakkanay a t-əmosnen as imos as nəzazzawat daḡ təfləst təḡlayat d attama was nəsabaraḡ.

Edaḡ ən təsanfawt wa ihakku Məššina i win əzzəḡzannen əd tarna n awal ən Məššina

⁷ Awen daḡ a fəl inna Infas wa Zəddigan: «Azalada, as təslam y awal-net, ⁸ ad wər təsəḡḡərməməm iwallan-nawan zun alwaḡ wanad n əfəlləḡ ən marawan-nawan win ərəwnen. Əzəl wa di-əjjarraban daḡ taneray, ⁹ əgan-i tənəḡmayt təmosat jarraba-nin, ənâyan igitan-in ¹⁰ har əgan əkkozat təmərwen n awatay. Awen daḡ a fəl di-iggaz alham wəllen ən tamattay n əzzaman win den. Təzzar ənnəḡ: Aytedan win, iwallan-nasan faw əxrâkan, wər kala ad əssanan tarrayen-in. ¹¹ Alham en daḡ a sər-i d-ewayan

tahuday n âs wər ilkem ad əggâzan akal wa sammatagay i tasanfawt-nasan.» ¹² Ğnkədat ya imədrayan-in! A kawan-wər-iggəz i ilân əwəl aššaran wər nəzzəgzan har awəd awen ad ammazray šiyyat Məššina di iddaran. ¹³ Kalar tinəməggiwat təlxtutbat gar-ewwan akk əzəl, iket əfragan aytedan ad annin: «*azalada*», fəl a kawan-wər-iggəz i udân dağ jarraba n abakkad aggarmam əwəl-net. ¹⁴ Nakkanay imidawan n Ğlməsix dağ əššəğəl a nəmos as imos as nəzazzawat har təzərəst dağ gəlleyat ta nəga harwa dağ tizarat. ¹⁵ Ğnnan Ğlkəttaban: «*Azalada, as təslam y awal-net, ad wər təsəggərməmam iwallan-nawan zun alwaq wanad n əfəlləg.*» ¹⁶ Amaran ma mosan aytedan win əffəllagnen fəl Məššina dəffər as əslân y awal-net? Awak wərgəğ aytedan win d-əğmadnen Masar azâr-asan Musa? ¹⁷ Ma mosan za aytedan win as iga Məššina əkkozat təmərwen n awatay ih-ay alham-nasan? Awak wərgəğ win əganen abakkad amaran əğradan maxsay dağ taneray? ¹⁸ Təzərəst n awen âs ma mosan aytedan win as ihad Məššina âs wər ilkem ad əggâzan akal wa isammatag i tasanfawt-nasan? Awak wərgəğ win ugaynen s a das-abbardagan? ¹⁹ Dağ adi nəhannay as wər əğrewan iguz n akal wa n tasanfawt fəlas tugəyt a əgan sa sər-əs əzzəgzənan.

4

¹ Dağ adi, iket di ad t-illa arkawal ən Məššina wa n ad nəggəz akal ən tasanfawt wa imal, ənkədat wəllen a kawan-wər-iggəz awedan waliyyan igân iduf n as ab'as ogaz wala. ² Fəlas igmâd aššak as isalan n Ğlinjil nəg-asan agaraw zun wa dasan-əgan dağ taneray. Mišan awal was əssəsaman wər dasan-ikna wala fəlas wər əgen əzəgzan wa əgan aytedan win t-əqbalnen.

³ Nakkanay win sər-əs əzzəgzənnen, ad nəggəz akal ən tasanfawt was inna Məššina dağ batu-net: «*Igaz-i alham-nasan. Alham en dağ a sər-i d-ewayan tahuday n âs wər ilkem ad əggâzan akal wa sammatagay i tasanfawt-nasan.*» As itaggu awen da Məššina iğrâd arat kul harwa çur ənətti n əddənet. ⁴ Fəlas ill-ay adag a dağ innâ, dağ batu n əzəl wa n əssa: *Təzzar izzərəz Məššina əššəğəl-net kul wa n əxluk ən jənnawan d amaçal, əzəl wa n əssa.* ⁵ Ğnnân değ Ğlkəttaban: *Igmâd aššak as wər z'əggəzan akal ən tasanfawt ta hakka.* ⁶ Dağ adi, dad zamas əğrâwan wiyyad iguz ən tasanfawt ten, amaran win əslanen isalan n alxer əstizarat wər əğrewan iguz n akal ən tasanfawt wen fəl tišit-nasan inəmməzray, ⁷ ikkas Məššina əzəl iyyan aynâyan dağ batu ten, a t-imosan *azalada*, əs tənna ta iga

dæffer awen wællen æs tarrayt n ænnæbi Dawəd, s æmmæk was t-inna dat awen: *Azalada, as tæslam y awal-net, ad wær tæsəggərməmam iwallan-nawan.* ⁸ Awalla, ænnar iddew Joswe əd tamattay ten har tat-išaššawad edag ən təsanfawt wen, wədi wær z'ammagrad Məššina daɣ batu n əzəl iyyan ən təsanfawt dæffer awen. ⁹ Almaɣna n awen as harwada təll-ay təsanfawt i tamattay ən Məššina, tolât d əzəl wa n əssa s ənta daɣ izzəraz Məššina əššəɣəl-net kul wa n əxluk ən jənnawan d amaɗal. ¹⁰ Amaran awedan wa iggazan edag ən təsanfawt ta ihakku Məššina, wədi ad assanfu daɣ əššəɣəl-an-net, zun awa iga Məššina daɣ win-net iman-net. ¹¹ Daɣ adi ədgəzatana wællen daɣ iguz n adag ən təsanfawt ta, fəl ad wær ixrək waliyyan daɣ-na awa əgan marawan-nana a əməzraynen Məššina.

¹² Fəlas awal ən Məššina iddâr, ila tarna, amaran təwala-net togar ta n takoba. Itaggaz iman n aytedan əd wallan-nasan, igallu har isəmməɣras, d əkəlkəl ən ɣasan. Amaran awal ən Məššina ənta a ixakkaman y awas ifarray awedan daɣ man-net d awa isamadran daɣ əwəl-net. ¹³ Wær tu-təlla təxlək as wərgəɣ ihannay-tat Məššina. Arat kul immun-as, inniflay daɣ-as. Amaran ənta a dat za nəbdəd fəl mazalan-nana.

Awa dər ogda almaɣam ən Barar ən Məššina, imosan Əlimam-nana wa Zəwwəran, daɣ batu ən təkutawen

Nəla əlimam wa zəwwəran ikmâlan ihân ijənnawan

¹⁴ Dad zamas nəla əlimam wa ogaran ilimaman kul, ihân ijənnawan, a t-imosan ɣaysa, Barar ən Məššina, wədi zəzzəwətātana daɣ əzəgzan-nana. ¹⁵ Fəlas əlimam-nana wa zəwwəran en, ifrâg a danaɣ-ikbəl daɣ rəkkəm-nana, id əgrâwan-tu jarrabatan zun win danaɣ-garrawnen daɣ anamod kul, eges kala wær iga abakkad. ¹⁶ Daɣ adi ihazatanay-in əmənokal-nana a t-imosan Məššina di n əmæggi n arraxmat, nəgâ awen əs təfləst, fəl ad nəgrəw əhənətta, nəgrəw deɣ arraxmat s ənta dana-za-takfit tilalt daɣ alwaɣ wa daɣ nəddərar s awen.

5

ɣaysa Əlməsix itiwasafrən imos əlimam daɣ taggayt ta n Malək-Assaddeq

¹ Əkkulluk n Əlimam wa Zəwwəran, itiwasafrən daɣ aytedan, amaran tənfa n aytedan en da a fəl itawazazar y ad agu əššəɣəl ən Məššina, agu šihəkkuten əd təkutawen fəl agamay ən təsureft ən bakkadan-nasan. ² Əlimam wen,

ifrâg əgərri n aljahilan d aytedan win əxraknen, id ənta iman-net da irkäm. ³ Rəkkəm-net en dağ a fəlas iwâr-tu ad agu şikutawen fəl agamay ən təsureft ən bakkadan win-net, harkid win tamattay. ⁴ Amaran wər t-illa awedan ifrâgan ad akfu iman-net almaqam ən tişit n Əlimam wa Zəwwəran. Kalar Məşşina a sər-əs d-iğarrin aytedan, zund əmmək as sər-əs d-iğra Harun.

⁵ Emmək en dağ âs Əlməsix wərgex ənta a ikfan iman-net tanaya ən tişit n Əlimam wa Zəwwəran. Kalar Məşşina a çur igraw tanaya ten s ənta a das-innan: *Barar-in a təmosax. Azalada əqqalay abba-nak.* ⁶ Zund əmmək was inna Məşşina dağ Əlkəttaban: *Əlimam a təmosa har faw, dağ taggayt ta n Malək-Assaddeq.* ⁷ Əlməsix harwa ad iha əddənet, ittâr əs təkalelt əd məttawan, onsay Məşşina s ənta a ifragan ad t-iğləs dağ tamattant. Iqbal Məşşina təwatray-net, fəlas əmiksad ən Məşşina a imos. ⁸ Əlməsix Barar ən Məşşina a imos, mişan ilmâd əbərdəg id alçazab a iga. ⁹ Emmək en da as igraw alkamalat kul, iqqal wa ihakkin əlçillas iğlâlan i win das-əbbərdagnen, ¹⁰ id Məşşina a t-ikfan tişit n əlimam wa zəwwəran dağ taggayt ta n Malək-Assaddeq.

Ammar s əzəgzan ikmâlan d ammar s ad wər nəqqəl dəffər-na

¹¹ Aratan aggotnen as nəfrag a tan-nannu dağ batu ta, as izzəwat əsəssəgri-nasan id aytedan a təqqalam a fəl izzəwat əgərri. ¹² Edag an âs tərəwam as təqqalam iməssəsəçra, kalar har harwada təddiraram s ad tətawasasayrim aratan win təsəntit n awal ən Məşşina. Təhâm edag was wərgex imensewan win əqqurnen as təddəraram, kalar harwada təddiraram s əx. ¹³ Amaran awedan was harwada iddirar s əx, wədi harwada wər ifreg zələy gər awa olağan d awa wər noləç. Awedan wa, imos zun ajançay. ¹⁴ Imensewan win əqqurnen i n aytedan win ədwalnen. Aytedan win, əntanay a əgrawnen masnat ta tan-təkfat zələy n awa olağan d awa wər noləç fəlas əjirraban aratan win di.

6

¹ Dağ adi, akəyatanaç edag wa n əsənti ən taçaray dağ batu n Əlməsix. Akkiwatana dat y ad nawəd alkamalat da wər nəles tewaxlay n əsənti iyyan aynayan, almaçna n awen: tətubt d əməzzəy d arak mazalan tawaynen aggadəm s əhluk d əzəgzan əs Məşşina ² d əsəssəçri iğân dağ batu n əzəzdəg d əsəwər n aytedan ifassan d əsənkər ən

nəmməttan d əşşərixa wa n əzəl wa n tabadday. ³ Amaran awen daɣ a za nagu, kud irda Məşşina.

⁴⁻⁶ Aytedan win əjwarnen əgrawan ənnur ən Məşşina, əsammətammen təhəkkut ən Məşşina, əgrawan Infas wa Zəddigan, ənayan as awal ən Məşşina ihəssay, ənayan deɣ tarna ta təsaknit əddənet ta du-təzayat, amaran əmməzrayan tarrayt ta tolaɣat, win di, wər t-illa əmmək as əlasan tətubt; fəlas agamay ən tənfa ən man-nasan a fəl əlasan ətəytəy ən Barar ən Məşşina fəl təgəttawt, sammadrayan-tu dat awedan kul. ⁷ Amaɣal igarrawan akonak olaɣan, amaran itaraw-du annabatan təha tənfa i win tu-gayaknen, amaɣal wədi igrāw albaraka ən Məşşina. ⁸ Mişan amaɣal wa d-erawan y aytedan annabatan aşşarnen, wədi wər infa wala. Tuɣant a tu-za-təwərat, amaran təsəlkamt-net ahluk igān əs təmsay.

⁹ Ya imaran-in, kud imos əs nəşşewal-awan s əmmək wa, da nəkkəs aşşak əs izay-kawan-du arət iknān əlluɣ a t-imosan əɣillas. ¹⁰ Awalla, Məşşina Əməli oɣadan a imos, daɣ adi wər din-z-attaw imazalan-nawan, wala tara ta tu-təssəknam daɣ əşşəɣəl wa təgam fəl saɣmar n esəm-net i məzzəgzan əs harwada tətəggim-tu. ¹¹ Mişan nəsidaran əs akkiyyan daɣ-wan ad assaknu gəlleɣat tədi da har təzərəst, fəl ad təgrəwam igi n attama indān. ¹² As təgam adi wər za təqəlam iməssəndad, kalar ad tattalalam win əgrawnen arraxmat tas itawagga arkawal-net əs tarrayt n əzəgzan-nasan əd təzaydart-nasan.

¹³ Amaran, assaɣa wad iga Məşşina arkawal y ənnəbi Ibrahim, wər t-illa esəm iyyan ogaran wa n Məşşina əngəm ihəd sər-əs. Awen daɣ a fəl ihad Məşşina s azzat-net, ¹⁴ inna: *Illikan əs a kay sənnəhəlay təhakkay n albaraka, akna deɣ əsəgət n əzzurrəyya-nak.* ¹⁵ Əmmək en daɣ əs dəffər as issikna Ibrahim təzaydart-net, igraw arət was das-itawagga arkawal-net. ¹⁶ Aytedan, tahuday a taggin s esəm wa ogaran win-nasan, amaran tahuday ten, ənta a təsataddit batu-nasan, təgdəl a dər-əs d-iqqəl awedan waliyyan. ¹⁷ Əmmək en daɣ as Məşşina, isigatakkat y ad issusən aytedan win as iga arkawal əs aratan win issəbdad wər təməttəyan. Awen daɣ a fəl ihad Məşşina daɣ batu ten. ¹⁸ Daɣ adi əşşin aratan a t-əllanen wər nətəməttəy, amaran wər t-illa əmmək as daɣ-san iga Məşşina bahu. Aratan win əntanay a dana-za-səssuhətne wəllen, nakkanay a oyyanen arət kul nəgmay taggast s əzəzzəwi-nana daɣ attama wa danax-itawakfan. ¹⁹ Attama wen, ənta a danax-imosan şisəttəytəy əssiflasnen, əssohatnat, amaran ənta a danax-ewayan har dənneɣ anaxer wa illan gər adag wa

zəddigan əd wa ogaran tazdak. ²⁰ Edag wen ənta a iggaz Ÿaysa fəl əddəlil-nana, azzar-anax-in sər-əs, iqqal əlimam wa zəwwəran har faw, dağ taggayt ta n Malək-Assaddeq.

7

Taggayt ta n Malək-Assaddeq

¹ *Malək-Assaddeq* wen, ənta as kala ad imos *əmənokal n əyrəm ən Salem*, imos *əlimam ən Məşşina di n Amadkol*. *Ənta a issəlkadan y ənnəbi Ibrahim, assaxa wad irza imənokalan, ittar y Ibrahim a das-igan albaraka.* ² *Ənta en da a ikfa Ibrahim təməssədək n awa ila kul. Almayna n esəm wa n Malək-Assaddeq: Əmənokal ən taqqat, imosan dey əmənokal ən Salam*, almayna "əmənokal n alxer". ³ *Wərmad ila abba, wala anna, wala aljadan. Təməddurt-net wər təla ənətti za wala təzərəst. Itawaşəşala əd Barar ən Məşşina, iqqal əlimam har faw.* ⁴ *Ənzərat dağ ədkul n əlimam wen, har əs Ibrahim iman-net wa n aljad-nanax a t-ikfan təzunt ta n marawat n awa d-oya.* ⁵ *Ilimaman win Kəl-Lebi, ikf-en alwajib ihân Əttawret alxaq n ad garrawan şiməssədək ən tamattay n Israyil, əmosnen imədrayan-nasan, kuddeğ əs əntanay da ihayawan n Ibrahim a mosan.* ⁶ *Malək-Assaddeq amaran, wər imos iyyan dağ Kəl-Lebi, mişan igrav təməssədək n awa ila Ibrahim. Təzzar ittar Malək-Assaddeq a igan albaraka y Ibrahim s ənta as iga Məşşina arkəwalan!* ⁷ *Igmâd aşşak əs wa ogaran adkul ənta a itattaran a igan albaraka i wa das-əndərran.* ⁸ *Ilimaman win garrawnen şiməssədək ən tamattay, aytedan a mosan a z'iba əzəl iyyan, Malək-Assaddeq amaran, sitaddan Əlkəttaban əs iddâr.* ⁹ *Xasil Kəl-Lebi iman-nasan, s əntanay a garrawnen şiməssədək, irzâm fall-asan Ibrahim təməssədək əs tahakkay ta tat-iga i Malək-Assaddeq.* ¹⁰ *Fəlas as issəlkad Malək-Assaddeq y Ibrahim, Lebi wər ihəw.*

¹¹ *Ənnar ikmâl ənnizam wa n limaman win Kəl-Lebi, s ənta a isəbdadan əlqanun wa issəwar Məşşina tamattay, wədi wər tu-z-iməl əlimam ən taggayt ta n Malək-Assaddeq dağ adag ən limaman ən taggayt ta n Harun.* ¹² *Amaran dad zamas imməttay ənnizam wa n limaman, wədi əlqanun da ilzâm ad ammattay.* ¹³ *Əlimam wa fəl əmməgradan salan win, in tawşet iyyat. Tawşet ten amaran wər tat-ihə awedan as kala ad iqqal əlimam.* ¹⁴ *Illikan əs Əməli-nana, tawşet ta n Yahuda a d-igmad, tawşet ta amaran wər d-idkel Musa batu-net fadda dağ batu n əşşəğəl wa n tişit n əlimam.* ¹⁵ *Arat wen, isitadd-ay wəllen as d-inafalal əlimam iyyan olân əd Malək-Assaddeq.* ¹⁶ *Əlimam wa, wər d-iga*

iguz n ənnizam wa n ənəməkusa. Kalar iguz ən tarna ən tәмəddurt tәxlâlat a d-iga, ¹⁷ fêlas ənnan Əlkəttaban daɣ batu-net: *Əlimam a təmosa har faw, daɣ taggayt ta n Malək-Assaddeq.* ¹⁸ Əlqanun wa t-illan kala da, itawakkas-in, fêlas wər ila tarna waliyyat za wər infa wala. ¹⁹ Əlqanun wa, wər d-issəxsal arat waliyyan ikmâlan. Attama amaran wa danax-itawakfan ofâ wa n əlqanun wen. Attama wa, ənta a danax-issəfragan ənəmihaz əd Məşşina.

²⁰ Arat wa kul Məşşina a ihadan daɣ batu-net. İlimaman win hadatnen wər ihed Məşşina daɣ batu-nasan, ²¹ Үaysa amaran, Məşşina a ihadan daɣ batu-net, id Əlkəttaban a ənnanen: *Əməli a ihadan, amaran wər ilkem a d-iqqal daɣ batu-net. Əlimam a təmosa har faw.* ²² Əmmək en daɣ as tarrayt ta n Үaysa a fêl nəkkas aşşak âs nəgrâw arkawal ən tassaq əd Məşşina ofân wa irəwan. ²³ İlimaman əknânen igət a t-əmalnen s ənəməkusa, fêlâs wər tantoyya təmattant s ad t-əməlan har faw. ²⁴ Үaysa amaran ill-ay har faw. Awen daɣ a fêlas tişit-net əlimam wər tətəməttəy. ²⁵ Daɣ adi ifrâg tehakkay n əlxillas ikmâlan y aytedan win din-əzzəhaznen iman-nasan Məşşina əs tarrayt-net, id iddâr har faw, y ad išşâwal i Məşşina s esəmnasan. ²⁶ Үaysa ənta a imosan əlimam wa zəwwəran was nəddərar, id zəddig, wər t-iwer lahan waliyyan, wər kala ad iga abakkad, wər ola əd nasbakkadan alxal, immədkal imal dənnəg jənnawan. ²⁷ İlimaman win hadatnen zawwarnen ilzâm-tan igi ən təkutawen akk əzəl fêl əddəlil ən bakkadan win-nasan iman-nasan təzzar, dəffər adi win tamattay. Үaysa amaran ənta wər iddərar s awen, fêlas takutay iyyadda a iga, ig-et şiyyat əs tahakkay ta iga iman-net. ²⁸ İlimaman win zawwarnen isannafran Əttawret, aytedan a mosan ərkammen. Mişan wa isannafran Məşşina ig-ay əlimam wa zəwwəran əs təhuday ta iga daɣ batu ten, wədi Barar-net a imos, igrâwan alkamalat har faw. Tahudday ten ig-et Məşşina dəffər as iziraz ənnizam wa n Əttawret.

8

Əlməsix, ənta a imosan Əlimam wa zəwwəran daɣ arkawal wa idkalan

¹ Amaran, əntada əlməxsud n awas nara tənna-net: Nəla əlimam igân ta daɣ təzzəwwərt, iqqıman daɣ əxil ən Məşşina daɣ taɣmar-net di maqqarat daɣ jənnawan, ² iha əşşəxəl wa n adag wa zəddigan, s ənta a imosan ahaket wa n tidət, ahaket was Əməli Məşşina iman-net a t-ikrasan, wərgəx aggadəm.

³ Ɛkkulluk n əlimam wa zəwwəran, əššəxəl-net igi ən təhəkkuten əd təkutawen. Daɣ adi əlimam wa-nana da iwâr-tu ad agu takutay ta-net. ⁴ Ɛnnar iha Ȳaysa əddənet dada, wədi wər z'iqqəl əlimam, fəlas əššəxəl wen əhân-tu limaman win tagginen šikutawen s əmmək wa imal Ɛttawret. ⁵ Ɔlimaman win, ɣabbadan Məššina s əmmək imosan əsəkbar əd šaššelan n aratan win əhanen ijənnawan. Fəlas assaɣa wad isimutug Musa y akaras n ahaket, omar-tu Məššina inn-as: *Ɛnəy, arat kul ag-ay s əmmək iman-net wa kay-itawasaknan fəl ədɣaɣ.* ⁶ Amaran əmərədda, əššəxəl ogaran wəllen wa n limaman a itawakfan Ȳaysa s ənta a imosan əlimam-nana wa zəwwəran, fəlas ənta a imosan almawakkil-nana daɣ arkawal ən tassaɣ ta tofat, təbdâdat fəl arkəwalan win ofänen.

⁷ Amaran, ənnar ikmâl arkawal wa azzaran, wər za tagu addararat s ad iggəz wa aynayan edag-net. ⁸ Tidət as Məššina issiwar tamattay-net lahan, assaɣa wad inna: *«Inna Ɛməli: Ɛnəy! Ɛzayan-du adan a daɣ za nəməggay əd tamattay n Israyil əd ta n Yahuda arkəwal ən tassaɣ aynayan.* ⁹ Arkawal ən tassaɣ wa, wər z'alu əd wa namaggay əd marawan-nasan, assaɣa wa tan-d-ədkalay əkkasaq-qan-du daɣ Masar: *Dad zamas wər əɣdelan daɣ arkawal ən tassaɣ wa dər-san namagga, wədi əgmada batu-nasan, inna Ɛməli.* ¹⁰ Amaran ənta da arkawal wa aynayan ən tassaɣ wa za nəməggay əd maddanəs n Israyil dəffər adan win den, inna Ɛməli: *Ad agay əššərədan n əššəriɣa-nin daɣ əgərri n akkiyyan daɣ-san, əktəbaq-qan daɣ wallan-nasan, əqqəlay Ɛməli-nasan, əqqəlan tamattay-nin.* ¹¹ Wər tan-ihā i z'iləsan əsəssəɣri n əmidi-net, wala amadrəy-net ann-as: *"Iwâr-kay ad təssəna Məššina" fəlas ketnasan a di-əssənan a d-ibazan ɣur wa əddarran-nasan, har wa waššaran-nasan.* ¹² Fəlas a dasan-əhənətteɣ daɣ talbast ta əgan, əssurəfaɣasan ibakkadan-nasan šiyyat.» ¹³ Dad zamas Məššina inna: *wa aynayan, daɣ adi arkəwal wa azzaran iqqal arat waššaran.* Amaran arat as waššar, wədi iha tarrayt n ad iba tamayyamayt-net.

9

Adkul ən təkutay ta n arkawal wa aynayan

Arkawal wa irəwan əd wa aynayan

¹ Arkawal wa azzaran ila əššərədan win əlɣibada, ila dey edag n əlɣibada ihân əddənet dada. ² Ahaket a itawakrasan, imosan əššin daggan. Edag wa azzaran ih-ay əsəkbəl ən fətəlaten əd tabəl əd təgəlwen šin tat-əggarnen a d-əmməwaynen əmosnat šikutawen y Ɛməli. Edag wen

esəm-net Edag wa Zəddigan. ³ Amaran dəffər anaxer wa n əššin illân den, ill-ay adag was itawannu Edag wa Ogaran Tazdak. ⁴ Edag wen ih-ay majmar n urəx a fəl tawasaqqadan ađutan win əzodnen. Ill-ay deŷ əssənduq wa n tassaŷ ilsân urəx. Əssənduq wen ih-ay əxəzu n urəx ihâ amensay wa n Manna, tah-ay deŷ tallaq ta n Harun tənzârat, əd selluman əššin win fəl iktab arkawal ən tassaŷ. ⁵ Afalla n əssənduq wen, əbdâdan fall-as šaššelan n angalosan win Kəruban əssiknanen tanaya ən Məššina əgân telay s əfrutan-nasan y əsəhər-net s ənta a fəl inaqqal əzni ən takutay ta təmmasat ibakkadan. Mišan əmərədda wər za nagu isalan kul daŷ batu ta. ⁶ Amaran Ahaket wa n əmənəy imos əššin daggan, a tan-imosan Edag wa Zəddigan d Adag wa Ogaran Tazdak. Edag wa Zəddigan taggazantu limaman alwaq kul, agin daŷ-as əššəxəl-nasan wa n əlxibada. ⁷ Edag wa n əššin daŷ Ahaket amaran, Əlimam wa Zəwwəran xas a das-itaggan iguz iyyanda daŷ awatay. Den daŷ ad itaway azni n əmudar ag-ay takutay dat Məššina fəl ad igrəw təsüreft ən bakkadan win wər nəga s əttənəgmur gər za win-net wala win tamattay. ⁸ Infas wa Zəddigan issikn-anax s awen âs, tarrayt ta n Adag wa Ogaran Tazdak wər za tənəfiləl iket əšxalan aytedan s ahaket wa azzaran n arkawal. ⁹ Arat wen, imos əlmital n azzaman win nəha əmərədda. Almaŷna n awen as šihəkkuten əd təkutawen wər əfregnat ad əzzəzdəgnat iwallan n aytedan win xabbadnen Məššina s əmmək wa. ¹⁰ Aratan win əmosan əššəradan əqqâlne imensewan, d aratan win tamašwinen, d əzzənəfan aggotnen n alwallatan. Əššəradan win den, əntanay as əšxalan aytedan har d-ewad alwaq wa daŷ issəbdad Məššina ənnizam wa aynayan.

¹¹ Mišan Əlməsix osâ-du imos əlimam wa zəwwəran n aratan olâxnen win t-əlanen. Iggaz ahaket wa ogaran təzzəwwərt, ikmâlan, âs wərgəx ifassan n aytedan a t-əganen, almaŷna wər iha əddənet dada. ¹² Əlməsix iguz iyyanda a iga šiyyat y Adag wa Zəddigan. Amaran azni-net iman-net a ikfa imos takutay, wərgəx azni ən zulaŷ wala izəgran. Əmmək en daŷ as dana-d-igrəw əlxillas ixlâlan. ¹³ Fəlas, dad zamas azni ən zulaŷ d əzni ən zəgran d ežəd ən təharaten šin rakammatnen win tawanbasnen əfrâgan əzəzdəg ən təxəssa-nana, ¹⁴ ma dər z'agdu əzəzdəg wa dana-z-əgu əzni n Əlməsix, izzəzdəg iwallan-nana daŷ arak mazalan win tawaynen aggadəm s əhluk, fəl ad nəxbəd Məššina di iddarân, id Əlməsix a ikfan iman-net i Məššina əs tarrayt n Infas wa Zəddigan di ixlâlan, imos takutay wər nəla a imosan əlxib.

¹⁵ Awen day a fəlas Əlməsix a imosan almawakkil-nana day arkawal ən tassaq wa aynayan. Dad zamas Əlməsix aba-tu fəl ad əgrəwan aytedan tədarfit day bakkadan win əgan day azzaman ən tassaq ta tərəwat, aytedan win du-tawaḡranen, ad əgrəwan təkəsīt təḡlâlat tas itawagga arkawal-net. ¹⁶ Amaṭer ilzâm as kundaba igmad aššak təmattant ən wa t-igan, ¹⁷ fəlas amaṭer, wər sər-əs itəwəggu əššəḡəl iket wər aba wa t-igan, id wər z'itəwəqbəl iket iddâr məššis. ¹⁸ Awen day a fəlas arkawal wa azzaran, ənta da tanaḡla n əzni as inta. ¹⁹ Dəffər as imâl ənnəbi Musa alwajiban kul win Əttawret i tamattay, idkal-du azni ən zəgran əd zulaḡ d aman, idkal-du təduft zaggaḡat d agabal ən xisof, infas sər-əs əlkəttab iman-net əd tamattay ketnet, ²⁰ igannu: Ənta da *azni n arkawal ən tassaq wa dawan-issəbdad Məššina*. ²¹ Dəffər awen, infas Musa s əmmək wen da s əzni wen Ahaket əd mutag-net kul win əlḡibada. ²² Day awa inna Əttawret, taššam n aratan azni as tawazazdagan, amaran wər tu-təlla təsurreft ən bakkadan âr s ad inḡâl əzni.

²³ Day adi, ilzâm as šaššelan n aratan win əhanen ijənnawan əmmək wen day den as z'izdagan, aratan amaran iman-nasan win əhanen ijənnawan, ilzâm ad izdagan əs təkutawen ədkâlnen wəllen. ²⁴ Amaran Əlməsix, wərgəḡ Edag wa Ogaran Tazdak əkrâsan aytedan imos əlmital ən wa n tidət a iggaz, kalar ijənnawan iman-nasan a iggaz, fəl ad iməl dat Məššina har əmərədda, imos almawakkil-nana. ²⁵ Wər iggez deḡ edag wen y a day-as akfu iman-net imos takutay day taklaten aggotnen, zun awa itaggu Əlimam wa Zəwwəran əkkulluk n awatay itaway-in azni wər ila. ²⁶ Ənnar adi a igan, wədi Əlməsix a du-tənta əddənet itayazzab. Kalar ənəfilal iyyanda šiyyat a iga Əlməsix, day ələqqam n azzaman, fəl ad iməs ibakkadan n aytedan əs tahakkay ta iga iman-net imos takutay. ²⁷ Zund əmmək âs aggadəm təsəlkaṁt-net təmattant iyyadda, dəffər adi ibdəd fəl mazalan-net, ²⁸ əmmək wen day den âs Əlməsix da ətəwəkfa iyyanda a itawagga imos takutay, fəl ad iməs ibakkadan n aytedan aggotnen. Amaran assa-net wa n əššin, wər d-igla fəl ames ən bakkadan, kalar fəl ad iḡləs win das-əssəgadnen əknân tara n a d-asu.

10

Əššəḡəl ikmâlan wa təmos təkutay ta iqqal Əlməsix

¹ Əššəriḡa wa n Əttawret šaššelan ḡas a imos ən tənfaŷen šin d-əzaynen. Əlmital-nasnat da wər t-ewed. Awen day a fəlas šikutawen šin izzəlzam ənnizam wa n

Ëttawret, tawagginen har faw day əkkulluk n awatay, wər ilkem ad əfragnat tehakkay n alkamalat i win əğbadnen Məššina. ² Ënnar ihakku əššəriḡa wen alkamalat, wədi aytedan win əganen šikutawen šin den ad ammazzayan d igi-nasnāt fəlas irəw as əgrawan təsureft ən bakkadan-nasan šiyyat, zaddogan wallan-nasan day id t-illa abakkad. ³ Kalar šikutawen šin den, əkkulluk n awatay əssiktanat-du aytedan ibakkadan-nasan. ⁴ Fəlas wər t-illa əmmək as ifrāḡ əzni ən zəgran wala wa n zulaḡ emes ən bakkadan.

⁵ Awen day a fəlas assaḡa wa d-iggaz Ëlməsix əddənet, inna i Məššina: *Wərmad təddiraray əs təkutay za wala təhəkkut, mišan təkfey-i tayəssa.* ⁶ *Wərmad dak-əgraznat təkutawen šin tirəkəmmittnen za wala šin takkasnen ibakkadan.* ⁷ *Awen day a fəl ənne: Nak da a d-osan da, fəlas batu-nin a day əššəwəlan əlkəttaban. Ose-du ya Ëməli-nin y ad aḡay tara-nak.*

⁸ Inna: *Wərmad tareḡ šikutawen, wala šihəkkuten, wala šikutawen šin tirəkəmmittnen, wala šikutawen šin takkasnen ibakkadan, wər dak-əgreznat wala andərran.* Dər iga awen da ya šikutawen šin den, tiwagganat s əmmək iman-net wa imal əššəriḡa wa n Ëttawret. ⁹ Dəffər awen inna: «*Nak da a d-osan da y ad aḡay tara-nak.*» Əmmək en day as izzəraz ənnizam wa azzaran, issəbdad wa n əššin. ¹⁰ Tehakkay ta iga Ȳaysa Ëlməsix tayəssa-net əs tara ən Məššina, ənta a danay-takfat tazdak əs tarrayt ən təkutay iyyadda ta n təzərəst ta təqqal tayəssa-net.

¹¹ Ëkkulluk n əlimam iha edag n əššəḡəl-net akk əzəl y ad agu šikutawen aggotnen olänen, mišan wər ilkem ad əfragnat emes ən bakkadan n aytedan. ¹² Ëlməsix amaran, dəffər as iga takutay iyyadda ta n təzərəst fəl bakkadan n aytedan, iqqim day əḡil ən Məššina. ¹³ İlla den da iqqâl y əzəl wad za təwəggin zənga-net daw daran-net. ¹⁴ Takutay iyyadda wər nəla təmidit as ikfa alkamalat har faw y aytedan win izzəzday day bakkadan-nasan.

¹⁵ İnfas wa Zəddigan isitadd-anay batu ta, id a inna: ¹⁶ *Ənta da arkawal wa dər-san za nəməgga dəffər adan win den, inna Ëməli: Ad aḡay əššərədan n əššəriḡa-nin day wallan-nasan, əktəbaq-qan day əḡərri n akkiyyan day-san.* ¹⁷ Dəffər awen inna: *Wər ilkem a d-ələsa təkatawt ən bakkadan-nasan, wala talbast-nasan.* ¹⁸ Amaran, dad zamas ibakkadan tawasarafan, wədi ab'as təga addararat əs təkutawen šin əmmasnen ibakkadan.

İzəgzan əd zəmmerat

Ënəmihaz n Ëməli d iba n tawaylay n ələqqam

¹⁹ Dağ adi imədrayan-in, nakkanay nəkkâs aššak dağ iguz n Adag wa Ogaran Tazdak, id Ƴaysa a inçalan azni-net fəl əddəlil-nana. ²⁰ Ƴaysa a danağ-olaman tarrayt ta taynayət, təddârat, issəğras-anax anaxer s Adag wa Ogaran Tazdak, almağna issəğras-anax əs təğəssa-net iman-net. ²¹ Emmək en dağ âs nəla əlimam wa zəwwəran s ənta a itawazazaran y ahan ən Məššina. ²² Dağ adi, zənnəmihezatanax iman-nanax əd Məššina əs wallan əğdâlne, d əzəgzan ikmâlan, fəlas ətəwəzəzdağ a əgan wallan-nana dağ igi n id t-illa arak əmedran, tətawaşarad təğəssa-nana s aman win zaddogne.

²³ Zəzəwətətana wəllen dağ əzəgzan d attama win nəga, nəkkâs dağ-san aššak, fəlas wa danağ-igan arkāwalan issiflas wəllen.

²⁴ Akkiyyan dağ-na issənet dağ win hadatne, fəl ad nətinəməggu aholan ən tara əd mazalan win olaxne, nəga awen əs gəlleyat. ²⁵ Ad wər nəgməd əljəməxət ən məzəgzan ta nəha, zun awa imosan alxal n aytedan wiyyad. Kalar tinəməggiwatanax ənnəsixatan id təhannayam as əzəl wa ilkaman ihoz.

Erruymatan d ənnəsixatan: Ad wər nəmmazzay d igi n attama

²⁶ Amaran as nətaggu abakkad igân s əttənəgmur, dəffər as nəssân tidət, wədi wər tu-təlla təkutay iyyat a fall-anaq-qu za təməsət. ²⁷ As iga adi, ad ib'as tu-təlla tarrayt waliyyat âr ta n əsəgəd y əššərixa labâsan ən Məššina əd təmsay ta za təsərrəkəmmet aytedan kul win əmosne izənga ən Məššina. ²⁸ As ugay awedan əs ləkkum y əššərixa wa n Əttawret, imos âs əllânat-tu sanatat madəx karadat təgəyyawen a t-ənayne, wədi wər das-tu-təlla təsurreft waliyyat, kalar əššərixa-net təmattant. ²⁹ Dağ adi, ma dər z'agdu attadib wa dər ihor awedan wa issəknan iba ən safrar i Barar ən Məššina, issəkna məlka y əzni ən tassağ wa t-izzəzdagan, isammadray Infas wa Zəddigan ihakkın arraxmat? ³⁰ Nakkanay nəssân wa innan: *Nak a itabazan s əššərixa, nak a z'ixkəman y awedan kul awa dər ihor. Innâ deç: Əməli ad abəz tamattay-net s əššərixa.* ³¹ Arat səksədan wəllen a imos ad iggəz awedan ifassan ən Məššina di iddaran.

³² Aktiwat-du azzaman win azzarne, dəffər as kawan-ikfa Məššina ənnur-net, təmmiqqasam d alğazab labasan, əd təbəllant təsohet, ³³ fəlas alwağ iyyan tətawakaggaram dat awedan kul, tətawasaknim arkanay, alwağ iyyan amaran tətawayam tadhəlt-nawan y aytedan win tawasaknine alğazab zun wen. ³⁴ Təhinattem y

aytedan win əhanen kasaw, təssânam daɣ-san, təqbalam əs man filawasnen a daɣ-wan attarmasan ərrezəɣan-nawan, id təssânam âs təlâm ərrezəɣan ədkâlnen, a t-əllânen har faw. ³⁵ Daɣ adi, ad wər tammazzayam d ikus n aššak wədi, fəlas ənta a kawan-z-akfin arozan zawwarnen. ³⁶ Təddiraram əs zəmmerat fəl a du-tassandim tara ən Məššina təgrəwam arat was iga arkawal-net. ³⁷ Fəlas inna Məššina: *Wər din-iqqim âr arat n azzaman, azzaman wər nəggət ɣas, y a d-asu was ihor a d-asu. Wər din-z-ahag.* ³⁸ *Fəlas wa dat-i oɣadan, ad igrəw təməddurt ta təɣlalət s əzəɣzan-net. Mišan as iqqal dəffər-əs, wədi ad ib'as t-əran man-in.* ³⁹ Nakkanay amaran, wər nəha aytedan win taqqalnen dəffər-san abəzan tarrayt ta n əhluk. Kalar nəha win əttafnen əzəɣzan-nasan y ad əgrəwan əlɣillas.

11

Əzəɣzan ən təgəyyawen n arkawal wa irəwan

¹ Əzəɣzan almaɣna-net âs arat was nəga attama-net, wədi nəkkâs aššak as nəgrâw-tu. Almaɣna-net ikus n aššak daɣ aratan kudde wər tan-nəhənnəy. ² Əzəɣzan en daɣ a fəl əgrəwan marəwan-nana ətəwəqbal ɣur Məššina. ³ Amaran ənta a danəɣ-isassagran âs əddənet awal ən Məššina as du-təxlak. Emmək en daɣ as awa nəhənnəy, igmâd-du a wər nətəwəhənnəy.

⁴ Əzəɣzan, ənta a fəl ikfa Habila takutay tofât ta ikfa Qayin. Əzəɣzan en daɣ a fəl tətəwəqbal tišit ən Habila aɣadil id Məššina iman-net a iggəyyen as šikutawen-net tiwaqbalnat. Əzəɣzan a d-ewayan âs Habila aba-tu mišan har harwa išşewal. ⁵ Əzəɣzan, ənta a fəl immədkal Xenok əs jənnəwan, wər tu-tədes tamattant. *Wər kala ad ilas ətəwənanay dəffər awen, fəlas Məššina a t-idkalan.* Amaran dat əmədkəl-net, igrâw ətəwəqbal ɣur Məššina id ənnan Əlkəttaban: *Xenok igrâz i Məššina.* ⁶ Əzəɣzan ənta ɣas a ihakkin aytedan ad əgrəwan gərrezat i Məššina, fəlas awedan wa iqbala Məššina daɣ əwəl-net, wədi kundaba izzəɣzan âs Məššina ill-ay, izzəɣzan deɣ âs itaggu arozan i win gammaynen masnat-net. ⁷ Əzəɣzan, ənta a fəl ikras ənnəbi Nux aɣlal n aman fəl ad iɣləs aɣaywan-net, id əmiksad ən Məššina a imos ikkâs aššak daɣ arat wa das-isannafalal Məššina, kudde wər t-ihənnəy. Emmək en daɣ as obaz Nux əddənet s əšşəriɣa, iqbala Məššina tišit-net aləs oɣâdan əs tarrayt n əzəɣzan-net.

⁸ Əzəɣzan a fəl ibbərdag ənnəbi Ibrahim i Məššina s iki wa iga akal was das-itawanna ilkâm ad iggəz təla-net, assəɣa wa t-iyra Məššina. Ifal akal-net, igla da wər issen

id ikka. ⁹ Əzəgzan a fəl igla Ibrahim, ikka akal was das-iga Məşşina arkawal-net, iqqal dağ-as ənaftax, ixsâr day həktan ənta d Isəhaq əd Yaqub âs ənta dər-san as iga Məşşina arkawal wen. ¹⁰ Arat wen ig-ay Ibrahim fəlas issigad y əxrəm wa wər nətəbərəjjit, əxrəm was Məşşina iman-net a t-id-inzaman ikras-tu. ¹¹ Əzəgzan a ikfan Sarata barar day tuşaray-net. Sarata wər tətulu bararan, mişan təgraw əzzurrəyya, id əzəgzan a təga s arkawal ən Məşşina di n alxadil. ¹² Awen day a fəlas aləs iyyanda, ihân ələqqam ən təxrəst-net, a igrawan əzzurrəyya igân igət wa əgan etran day jənnawan, madəx şiblalen n amađal əs tu-wər-illa i ifrâgan əşidən-nasnat.

¹³ Əzəgzan en day a əgan aljadan win den, har tan-aba da wər əgrewan aratan win as dasan-itawagga arkawal-nasan, mişan awa sər-san əgan day əzəgzan zun as ənayan-tan day igəg, əgâran fall-asan assalam, əggiyyen dat awedan kul âs inaftaxan əd xərab xas a mosan day əddənet. ¹⁴ Amaran win əganen awal wa, sitaddan sər-əs âs gammayan akal ən man-nasan. ¹⁵ Ənnar tan-iggâz əsuf n akal wa d-əfalan, wədi ad t-əqqəlan, fəlas əgrâwan edag n awen. ¹⁶ Mişan, akal idkâlan dənnəg wen as əgan ənnəyat-net, almaxna ijənnawan. Awen day a fəlas, Məşşina wər fall-as imos təkarakit tişit ta iga Əməli-nasan, fəlas isimatag-asan əxrəm day jənnawan.

¹⁷ Əzəgzan ənta a fəl ikfa Ibrahim barar-net Isəhaq y ad iqqəl təfaskay assaxa wad ijərrab Məşşina əzəgzan-net. Barar-net a n iyyanda a ikfa, ənta wa igrawan arkawal. ¹⁸ Amaran ənta en day as inna Məşşina: *Tarəyt n Isəhaq as za təgrəway əzzurrəyya*. ¹⁹ Day iduf n Ibrahim, Məşşina ila tarna n əsənkər day təmattant. Awen day a fəl das-oyya Məşşina barar-net, zun as issinkar-as-t-idu day tamattant. ²⁰ Əzəgzan a fəl ittar Isəhaq i bararan-net Yaqub d Ezaw a dasan-igan albaraka day azzaman win d-əzaynen. ²¹ Əzəgzan a fəl ittar Yaqub day ələqqam ən təxrəst-net y akkiyyan day bararan ən Yusəf, *issajad issîdad s əmi ən tallaq-net*. ²² Əzəgzan a fəl işşewal Yusəf i Kəl-İsrayil dat təmattant-net, day batu n agamad-nasan Masar, omar-tan s awa z'agin i xasan-net.

²³ Əzəgzan ənta a fəl itawaybar Musa xur təhəwt-net har iga karadat təlil. Əxbaran-tu marwan-net id ənâyan as barar ihossayan a imos, amaran əzəgzan-nasan a dasan-igdalan a tan-təggəz tasa n awas omar Firxawna, imosan əmənokəl ən Masar. ²⁴ Əzəgzan a fəl ugay Musa dəffər tadwala-net s ad iqbəl tişit ən barar n elles ən Firxawna. ²⁵ Əzəgzan en day a fəl issəf Musa ad irtəy əd tamattay

ən Məššina daɣ aɣazab, iksan tənafləyt n əddənet əd bakkadan-net wər nəmos âr arat n adan. ²⁶ Musa issof ad itəwəsəknu məlka wa itawasakna Ǝlməsix, fəlas arozan win z'igrəw əs tarrayt ten, ogaran wəllen ərɣəzəɣan ən Masar; Musa iswād daɣ aratan win d-əzaynen, a tanimosan arozan win ihakku Məššina. ²⁷ Ǝzəgzan a fəl igmad Musa Masar, wər tu-taha tasa n əmənokal iha alham labasan, fəlas əsəggətəkki a iga id ihannay a wər nətəwənəy. ²⁸ Ǝzəgzan a fəl iga Musa təfaskay ta n əmud wa n Akkay, infās azni ən təfaskay ten i tamawen ən təsəhar ən nan ən Kəl-Israyil, fəl ad wər idəs əmahlak iɣfədda-nasan.

²⁹ Ǝzəgzan a tan-issəɣrasan Agaraw was itawannu wa Zaggəɣan, jiwanken fəl amaɖal iqquran, ilmaz agarew en Kəl-Masar win əgmaynen d a tan-awədan. ³⁰ Ǝzəgzan a iggədlan afarag wa iɣlayan aɣrəm ən Yerikaw, dəffər as əgân Kəl-Israyil əssa adan ɣallayan-t-id. ³¹ Ǝzəgzan wa təga Rahab ta n təkərwat ənta a das-igdalān a tat-iba assəɣa wad əhlakan aytədan win ugaynen s əbərdəg i Məššina, id Rahab a təqbalat a ɣur-əs əssəgənan nassasaman n Israyil, təg-asan isəxlak.

³² Ma dawan-z-anna dəffər aratan win? Wər z'əgrəwəɣ alwaq ewādan a dawan-əššiwəla daɣ batu ən Jedeyon d Ǝmbarək əd Samson əd Yeftay əd Dawəd əd Saməwel, d ənnəbitan win hadatnen. ³³ Ǝzəgzan as obazan meddan win ikallan, əxkaman fall-asan s əššəriɣa oɣadan, əgrawan arkāwalan win dasan-tawagganən, ədbəɣan imawan ən harran. ³⁴ Ǝzəgzan as ənɣan šiməs zawwarən, əɣlasan daɣ təkabiwen əknānen tawala, əgrawan tarna daɣ adag ən rəkkəm was kala t-əgan. Ǝssəknan tišit-nasan inammagaran, ərzan igənan. ³⁵ Ǝzzəgzannat tədoden tawasankaran-asnat-du nəmməttan-nasnāt daɣ təmattant. Wiyyad amaran tawasaknan aɣazab səksədan, mišan ugayan s ad əgrəwan tədarfit ɣur aytədan win tan-zəɣazzabnen. Arat wen əgân-tu fəl ad əgrəwan təməddurt ta təɣlalāt dəffər tanakra-nasan daɣ tamattant. ³⁶ Wiyyad əgrawan-tan jarrabatan labasnen əgānen daɣ təmakkakkayt, əd təwit, əd təzabagawen, əd kasaw. ³⁷ Wiyyad tawənɣan əs təgur ən təhun, wiyyad əmmolayan əs təkəjatən, wiyyad tawənɣan əs təkabiwen. Wiyyad itāway-tan aɣaf wər əssenən is ədagan, əlsân igəškan n ayfəd əd win wəlli, wər əlen a d-ixlākan, irtāy-asan awen d as tiwadgazan, tawasaknin arkanay. ³⁸ Aytədan win, wər təhor əddənet d a tat-əhân, itāway-tan aɣaf daɣ tənariwen, d ədɣəɣan, əd kəzman əd ɣəɣan.

³⁹ Aytedan win kul iqbāl-tan Məššina əs tarrayt n əzəgzan-nasan, mišan wər tan-iha i inâyan arkawal wa dasan-itawaggan. ⁴⁰ Məššina kala dâ issins-anax arat idkâlan wâllen fəl ad wər əgrewan aytedan win den alkamalat iket wər dər-san nəjjəyat agaraw-net.

12

Ləkkum i tarrayt ta n zəmmerat d igi ən təməddurt zəddigat

¹ Awen day a fəlas nakkanay da, dad zamas ɣilayɣalayan-ana məzzəgzan əgânen igət ogdân d awa, wədi əgəratanax-in əzuk kul wa danax-iwaran, əd bakkadan əssirɣasnen alamaz-nana, naglu har təzərəst ən təbəllant ta danax-issəwar Məššina. ² Əswədatana faw day ɣaysa s ənta a danax-olaman tarrayt ta n əzəgzan, təhakkit alkamalat. ɣaysa iqbāl alɣazab fəl təgəttawt imosan təkarakit zəwwərat, id təkarakit ten wər ɣur-əs təmos wala, fəlas ihannay təfalawist ta das-təqqalat. Dəffər awen ikka ijənnawan, iqqim day əɣil ən Məššina day taɣmar-net.

³ Awalla, aktiwat was əgan nasbakkadan akyud ogdân d awa, fəl ad wər tayyim iman-nawan təgmədam tar-rayt. ⁴ Təbəllant ta təgam d abakkad, wər tat-təgem har tamattant. ⁵ Təttəwam-in ammar wa dawan-iga Məššina, olân d ənnəsixa wa itaggu awedan i bararan-net, inna: *Barar-in, ad wər təsəttəlkəkəɣ attadib n Əməli, ad wər təqqəla dəffər-ək as kay-issəwar Əməli lahan.* ⁶ *Fəlas Əməli itawaddab win ikna tara, iggât win iqbāl day tišit ən bararan-net.* ⁷ Əqbəlat alɣazab wa tətəggim. Məššina itawaddab-kawan fəlas bararan-net a təmosam. Awak ill-ay barar wər itəwəddib abba-net? ⁸ As imos âs wər kawan-itəwəddib Məššina, zun awa itaggu i bararan-net kul, wədi wər təmosam bararan-net win tidət, kalar bararan ən bannan a təmosam. ⁹ Dad zamas ketnana nəla abbatan day əddənet a dana-tawaddabnen, nəssiɣmar-tan, manəmmək as wər za nabbardag i Məššina s ənta a imosan Abba-nana wa ihan ijənnawan, fəl ad nəgrəw təməddurt ta təɣlalət? ¹⁰ Abbatan-nana win əddənet tawaddaban-ana day arat n azzaman wər nəggət day batu n idufan-nasan, Məššina amaran, tənfa-nanax a fəl danax-itawaddab, fəl a danax-iqbəl day tazdak-net. ¹¹ Attadib wər imos arat izodan s awedan day amazay wa das itawaggu, kalar arat a imos iɣaşşadan iman. Mišan win tawawaddabnen, təsəlkaht-nasan ad əgrəwan alxer, əd təməddurt təɣâdat.

¹² Awen daḡ a fəlas: ifassan-nawan ərəkaman, ifaddan-nawan deḡ ərəkaman, daḡ adi səssuhətat-tan. ¹³ Ǝlkəmat i tarrayen šin oḡadnen. As təgam adi, aytedan win ərəkammen, wər dasan-z-ittəy rəkkəm, kalar ad əzzəyan.

¹⁴ Agliwat daḡ igi n alxer d awedan kul, tagim təməddurt zəddigat. Awedan wa wər nəga təməddurt zun tədi, wədi wər z'ammanay d Ǝməli. ¹⁵ Ǝgləyat wəllen, fəl a tu-wər-iməl awedan issiban fəl man-net arraxmat ən Məššina. A daḡ-wan tu-wər-iməl awedan waliyyan a z'iqqəlan zun annabat səməman a du-z-idwəlan awəy-du iḡšudan a z'əgdəlneŋ y aytedan aggotneŋ tazdak. ¹⁶ Ad wər ikkəs waliyyan daḡ-wan tarna i Məššina, madəḡ isəmmədrəy aratan win zaddogneŋ zun awa iga Ezaw a din-izzənzən alxaq-net wa n tišit n aḡafadday, isammaskal-tu amensay. ¹⁷ Təssānam əs dəffər awen, igmay albaraka wa n tišit n aḡafadday, mišan igdal-as-tu abba-net. Iyyəwan tala, mišan indar-as a d-issuxəl abba-net daḡ batu ten.

Təkawent i Məššina d əlyibada-net

¹⁸ Amaran, wərgəḡ arat as ifrāḡ awedan edes-net a din-təhozam, zun təmsay təmihandarət, madəḡ šiyyay, madəḡ əhu, madəḡ tazəkkay, zun awa əgan Kəl-Israyil daḡ tanəḡay. ¹⁹ Wərmad təslām y anasaḡ n asak, wala tərmuq zun tas əslan Kəl-Israyil, əgmayan a das-wər-ələsan tesalay, ²⁰ fəlas wər əqbelan tarḡəmt ta dasan-tənnat: *Wa idasan adḡaḡ, ḡər iqqal awedan wala əmudar, wədi ad ammat əs təḡur ən təhun.* ²¹ Arat wa itawanayan den, i səksədan wəllen, har əs idkal Musa əməsli-net inna: *«Tah-i tasa wəllen, təga daḡ-i taysəst.»* ²² Kala kalar kawanay, təhozam-in adḡaḡ wa n Səyon, d əḡrəm ən Məššina di iddaran, a t-imosan Yerusalam ta təhat ijənnawan, təhozam-in deḡ šimərwen ən gimən n angalosan əmminayneŋ əknān təfalawist. ²³ Təhozam-in deḡ tiddawat ən ḡəfədda win as iktab Məššina esmawan-nasan daḡ jənnawan, təhozam-in Məššina s ənta əmašray n aytedan kul, təhozam-in aytedan kul win oḡadneŋ, əḡrāwan alkamalat ḡur Məššina. ²⁴ Təhozam-in deḡ Ȳaysa, s ənta a imosan almawakkil-nana daḡ arkawal ən tassaḡ wa aynayan, d əzni-net wa inḡalan, ogaran wa n Habila təla n əməsli daḡ jənnawan.

²⁵ Daḡ adi ənkədat y ad təzəmməzəgam i wa iššewalan. Dad zamas Kəl-Israyil win ugayneŋ s ad əqbəlan awa dasan-itawagḡan daw aḡaf daḡ əddənet da da, ketnasan əwwəddaban, wədi ma dər z'agdu attadib wa dana-z-itəwəḡḡin as nəzammazag i wa dana-d-iššewalan daḡ jənnawan? ²⁶ Ǝməsli-net isannagaynagay amaḡal

dağ azzaman win okaynen, amaran əmərədda arkawal da wa iga: «*Taklat ta du-təzayat, wərgəx amađal ɣas a za sənnəgəynəgəya, kalar ijənnawan da a tan-sənnəgəynəgəya.*» ²⁷ Batu ta n «taklat ta du-təzayat» almaɣna-net əs arat kul ad iba tamayyaməyt-net, fəl a d-aqqamin aratan win as wər ilkem ad nigaynagayan. ²⁸ Dağ adi, dad zamas nəgrâw taɣmar as wər ilkem ad tənigaynagay, sənnəfilələtanəx agoda i Məşşina, nag-as əlɣibada wa das-igrazan igân s əbərdəg, əd saɣmar, ²⁹ fəlas, Əməli-nana, temsay da imos-tat təsirəkəmmet.

Təsəxtəmt

13

Ənnəsixatan aggotnen

¹ Ad wər tammazzayam d ənəmərə wa taggin mədrayan. ² Əqqələt aytedan iha amagaru. Ad wər talkim adi fəlas aytedan win iha amagaru, wiyyad dağ-san simagaren angalosən da wər əssenən. ³ Aktiwat aytedan win əhanən kasaw, zun as tənimaham-tu dər-san. A din-wər-tətatawim aytedan win tawasakninen arkanay, fəlas kawanay da təlâm taɣəssa zun tada-nasan. ⁴ Səɣmərat azalaf ketnawan. Aləs əd təntut win ənnəzlafnən, əydələnet gar-essən fəlas Məşşina ad awwaddab imaggan n əzzəna. ⁵ Ad wər təqqələm aytedan əwwələtnən azrəf. Agdiwat s awa təlam əmərədda, fəlas Məşşina iman-net as inna: *Wər ilkem a kay-oyye za wər ilkem ad əgmada batu-nak.* ⁶ Awən dağ a fəlas nəfrâg ad nannu, s ikus n aşşak: *Əməli a imosan fellanin, wər əksuda wala. Ma di-z-iɣşəd aggadəm?*

⁷ Aktiwat imuzaran-nawan win ɣur təslam y awal ən Məşşina. Əttəfat awa dawan-d-oyyan, tattalalam əzəgzan-nasan. ⁸ Ƴaysa Əlməsix iman-net awa imos əndazəl ənta a imos azalada, imos-tu deɣ har faw.

⁹ Ad wər tarđim əssəxrəkan-kawan səssəxritan wər nəmos win as nəzzəgzan. Fəlas aggadəm, ofa ad igrəw assahat ta təhakku arraxmat ən Məşşina, wərgəx ta hakkin mensewan. Əşşəriɣa wa iqqalan batu ən mensewan, wər ikna wala i win das-əlkanmen. ¹⁰ Nəla edag wa n əsəqqəd ən təkutawən, mişan ilimaman win əşxalnen dağ Ahaket wa n əlɣibada, wər ələn turagat ən tattay ən təkutawən şin dağ-as tawakfinen. ¹¹ Azni ən mudaran wa itawakfan wa d-immewayan y ames ən bakkadan, əlimam wa zəwwəran a t-itawayan s Adag wa Ogaran Tazdak, amaran şifəkkawən ən mudaran win den, təwəsəqqədnat sədi y aɣaywan. ¹² Awən dağ a fəlas Ƴaysa da, aba-tu dəffər as itiwakkas

dağ əxrəm fəl ad izzəzdəg tamattay s əzni wa-net iman-net. ¹³ Dağ adi əgmədatanağ aqaywan, nəlcam-as, nəgər iri y ad nətəwəsəknu məlka wa itawasakna. ¹⁴ Fəlas dağ əddənət dada, wər nəla edag ən təməxsurt ixlâlan. Kalar aqrəm wa d-izayan a dağ nəgammay edag ən təməxsurt. ¹⁵ [Dağ adi] iwâr-anax ad nətəggu faw i Məşşina şikutawen əs tarrayt ən Ƴaysa. Şikutawen şin əmosnat təmmalen, almağna şigaytalen a dağ nəqbâl dat awedan kul as ənta a imosan Əməli. ¹⁶ Ad wər tammazzayam d əmazal n awa olağan, d əsəssuhi ən tassağ gar-ewwan, id awen dağ a imosan şikutawen şin əgraznen y Əməli.

¹⁷ Bardagat i muzaran-nawan, takkawanam-asan. Əntanay a kawan-ogaznen, id əssânan âs ilkam ad əbdədan fəl mazalan-nasan dat Məşşina, dağ batu n əşşəğəl wa tan-issəwar. As dasan-təbbərdagam, ad agin əşşəğəl-nasan əs man filawasnen, fəlas as t-əgan əs man əğşâdnen əd təhənəffa, wər dawan-tu-za-təggəz tənfa waliyyat.

¹⁸ Agliwat dağ igi y-anax şiwatriwen, fəlas nəkkâs aşşak âs iman-nanax i zaddognen id əlqəbulat a nəga əzəluləğ dağ əkkulluk n anamod. ¹⁹ Onsâyaq-qawan wəllen ad taglim dağ təwatriwen, fəl a kawan-in-təwəsuxəla tarmad.

Assalamən əd təwatriwen

²⁰ Məşşina di n Əməggi n alxer a d-issənkarən dağ təmattant Əməli-nana Ƴaysa imosan amadan wa ofan imadanan, əs tarrayt n əzni n arkawal ən tassağ ixlâlan, ²¹ əgmâya dağ-as a kawan-issəfrəğ igi n arat kul wa olağan y ad tammazalam tara-net. Agiwet sər-na Məşşina arat kul wa das-igrazan əs tarrayt ən Ƴaysa Əlməsix s ənta a ilan tanaya har faw! Amin!

²² Şirawt ta əzzigzala dağ-as wəllen, amaran əgmâya dağ-wan imədrayan-in, ad təqbəlam təlxutbat ta, təzəzzəwem dağ-as. ²³ Əssənət âs amadray-nana Timotay, igmad-du kasaw. As di-d-osa tarmad, a dər-əs in-idawa sər-wan.

²⁴ Təhulam-in imuzaran-nawan kul, əd tamattay zəddigat ən Məşşina. Əhulan-kawan-in şəqqaqan-nana win akal n Italəya. ²⁵ Ig-awan Məşşina arraxmat-net ketnawan.

Širawt ta iktab Yaqub Assalaman

¹ Awa nak Yaqub, akli ən Məššina d Əməli Ƴaysa Əlməsix, a din-ihulan marawat tawšeten əd sanatat wizawaznen daƷ əddənet.

Əlməsixi əd jarrabatan

Əzəgzan əd zəmmerat

² Ya imədrayan-in, as fall-awan d-osan jarrabatan əmosnen əzzənəfan, əqqlənet arat a kawan-isifalawasan wəllen. ³ Fəlas təssānam as, ətəwəjərrab n əzəgzan-nawan a sər-wan d-itarawan zəmmerat. ⁴ DaƷ adi ayyat zəmmerat tədi, a daƷ-wan tassəndu əššəxəl-net, fəl ad təqqləlam aytedan əndānen, əkmālan. ⁵ Kud ih-iwan awedan iddiraran əs masnat, ansəyet Məššina, a das-tat-akfu; fəlas Məššina illillat, ihakku awedan kul, da wala təgna. ⁶ Mišan ansəyet Məššina, iziƷzan, wər iga aššak. Fəlas awedan wa igan aššak wər izlay əd tanazzamaren n agaraw wa zəwwəran isaggād aƷu, ibbāt-tanat sa əd sa. ⁷ Awedan šilat ən wədi, ad wər agu attama n as ad igrəw arat waliyyan Ʒur Əməli, ⁸ id əwəl-net a izunan, wər t-illa arat itaggu a daƷ ittāf edag iyyanda.

⁹ Amadray-nana wa n tələqqay addawatet, isəbbərəg fəl adkul wa igrəw Ʒur Məššina əddi. ¹⁰ Amadray-nana deƷ wa n əməgğergəs addawatet, isəbbərəg fəl əsəmmədrəy wa t-iga Məššina əddi; id taƷart a tətəggu takawkawt ən yel, iba tamayyamayt-net a z'agu ənta əd təgərgist-net. ¹¹ Yel, as du-təgmad təfuk, təga tuksay, a tu-təssəxər, tørtək takawkawt-net, iba šihussay-net. Adi da za a igarrawan awedan n əməgğergəs ozālan daƷ taƷawšiwən-net.

¹² Ibbilal awedan wa izmaran i jarrabatan, fəlas as fall-as okayan ad igrəw alak imosan təməddurt təxlələt, tas igā Məššina arkawal-net y aytedan win t-əranen.

Jarrabatan d arak deranan

¹³ As itawajarrab iyyan daƷ-wan, ad wər annu: «Məššina a di-ijərraban», fəlas Məššina iman-net wər t-igərrəw jarraba n igi n ark əmazal, wala deƷ itajarrab awedan s iginet. ¹⁴ Kalar akk awedan ləkkum y arak deranan-net a tu-tawaynen, har tu-səffətəqqen daƷ jarraba. ¹⁵ Arak deranan win, əntanay a tu-tawaynen igi n abakkad. Abakkad amaran, as innoda daƷ əwəl n aggadəm, a d-awəy təməttant ta təxlələt.

16 Ya imədrayan-in əkneç tara, ad wər tətəwəsudəfam alxata! 17 Əssənət as təhəkkut kul ta tolaçat əd ta n təfərənt, Məşşina di n Abba s ənta a imosan əmaxlak ən təfuk əd təllit d etran a tat-d-izazabben fəl aytedan. Wərmad itamattay, wala deç itaggu y edag-net agamad a das-tətaggu telay. 18 Arat irâ a təmos tahakkay ta danaç-iga təməddurt ta taynayət s awal-net imosan tidət, a t-imosan Əlinjil, fəl ad nəqqəl şilat ən çəfədda daç təxəllak-net şin ikfa təməddurt ta taynayət.

Imazalan n əzəgzan

Awal ən Məşşina d əbərdəç

19 Ya imədrayan-in əkneç tara, səsəmat: əgmâya daç əkkulluk n awedan ad issərxəs əsəsəm, ayyu tararada n awal, wala irças alham-net. 20 Fəlas awedan iha alham wər ifreg amazal n awa oçadan çur Məşşina. 21 Daç adi, mazzayat əd mazalan kul win kawan-samadasnen, əd təllabəst kul ta tətamazalam, təqbəlam əs man lammödnən awal wa itawaggan daç wallan-nawan, ifrâgan a kawan-içləs daç Jahannama.

22 Ad wər iqqəl âs əsəsəm ças a tətəggim y awal ən Məşşina, amaran wər tətəmizilam s awa inna, təssəxrəkam iman-nawan s adi. 23 Fəlas awedan wa isasaman ças y awal wa, amaran wər itəmizil s awa inna, wədi ola d awedan işşəggan daç şişset, 24 izaggazda udəm-net, igla, ittəw-in daç tamazayt ten da awa dər ola. 25 Mişan awedan wa işşəggan daç əşşəriça ikmâlan ən Məşşina, s ənta a imosan əşşəriça wa isadarfen, ittaf-tu, ad itamazal s awa inna, wər din-ittəw awas isla, awedan wədi ad abbalal daç awa itamazal.

26 Kud ih-iwan awedan a çur iga as ittâf əddin, ənta wər innoda daç iləs-net, wədi iman-net a isaxrak. Amaran iduf-net əddin wər infa wala. 27 Əddin wa zəddigan wər ila əlyib dat Məşşina di n Abba, imos-tu ad issən awedan daç gugelan win mayatarnen əd tədoden şin as aba meddan-nasnat əddirarnat, igdəl deç i man-net a tu-təssəwər əddənət əlyib waliyyan.

2

Ad wər tətəggim təmərıt

1 Ya imədrayan-in, kawanay win əzzəgzannen s Əməlinana, Çaysa Əlməsix ilân tanaya, ad wər tətəggim təmərıt. 2 Nənna masalan, osan-kawan-du meddan əşşin daç Əlkənisat-nawan. İyyan za əməgğergəs as ədnaynat təsəndar n urəç idədwan-net, ilsa isəlsa əknanen şihussay, wa hadan amaran talaqqay ilsân irakkan. 3 As din-təgram

aləs wa ilsan isəlsa win hossaynen, tənnam-as: «Mandam, edag da wa ofan, qam daɣ-as»; amaran aləs wa n tələqqay ənta tənnam-as: «Xa! Əbdəd den» madex «qam daɣ amadal.» ⁴ Wərgex əzənəməzləy a təgam aytedan-nawan əddi, təzzar isəkna adi as imazalan-nawan əlkâman y arak medranan-nawan?

⁵ Ya imədrayan-in əknex tara, səsəmat: Awak wərgex aytedan win əlləqqawnen daɣ əddənet a isannafran Məşşina fəl ad əqqəlan iməggərgas fəl aganna wa iqqalan əzəgzan-nasan, əqqəlan dex iməkkusa ən taɣmar tas iga arkawal-net y aytedan win t-əranen? ⁶ Eges kawanay tolkâm-tan. Awak wərgex iməggərgas a kawan-ədgaznen, tawayyan-kawan s adag n əşşərixa? ⁷ Awak wərgex əntanay a tibudurnen esəm idkâlan n Əlməsix was tətawaxrim?

⁸ Illikan as kud əsəndi a du-təgam əşşərixa ən taɣmar ta n Məşşina əs təməwit tas iktâb daɣ Əlkəttaban as: «*Agu y əşəqqay-nak tara ta təgeɣ i man-nak*» wədi təgâm a olâxan. ⁹ Mişan kud təmərıt a tətəggim, wədi təgâm abakkad, ibâz-kawan əşşərixa s əməzrəy wa tu-təgam. ¹⁰ Ənta awedan wa ilkaman y əşşərixa ketnet amaran inagartattaf daɣ alwajib-net iyyanda, wədi əşşərixa ketnet as t-imməzray. ¹¹ Fəlas wa innan «*Ad wər tagax əzzəna*» inna «*Ad wər tagax iman*» da. Daɣ adi, as təgeɣ iman n awedan, ad tammazrayax əşşərixa ketnet, kudex wər təgeɣ əzzəna. ¹² Adi a fəlas, aratan win təgannim madex win tətamazalam taggiwat-asan igi daɣ təssânam as ilkâm daɣ-wan əşşərixa wa isadarfen. ¹³ Fəlas əşşərixa wər təha təhanint a z'itəwəggin y awedan wa wər təha təhanint. Əsəkni wa itaggu Məşşina y aytedan təhanint ogâr abbaz wa tan-itaggu s əşşərixa.

Əzəgzan əd mazalan

¹⁴ Ya imədrayan-in, ma z'aknu y awedan ad igannu izzigzan, ənta wər itəggu imazalan olaxnen sitaddanen əzəgzan-net? Awak ifrâg əzəgzan wədi əlxillas-net? ¹⁵ Nənnan masalan inay iyyan daɣ-wan amadrax-net daɣ əddin madex tamadrax-net əzlâmnen madex wər əlen a ətşan. ¹⁶ Awak ma dasan-z-aknu a dasan-annu: «*Agliwat daɣ alxer, yawanat, talsim*», ənta wər tan-ikfa aratan win as əddərarnat təxəswen-nasan? ¹⁷ Əmmək di da za as, əzəgzan xas wər igda. Əzəgzan wa wər nətəwənəy əs mazalan olaxnen, wədi immut, wər infa wala.

¹⁸ Amaran as inna awedan: «*Nak əzəgzan-in a fəl saffalla.*» Inn-as iyyan: «*Kay əzəgzan-nak a fəl təsaffalla,*

nak amaran imazalan olaynen win tagga fəl saffalla. Sakni əzəgzan-nak da wala imazalan olaynen, nak a kay-assaknağ wa-nin əs mazalan-in olaynen.»¹⁹ Wərgex təzzigzanax as Məşşina iyyanda? Təgex a olâğan, əssən z'âs Iblis da əzzigzan adi, amaran issindaw-tu taysəst.²⁰ Xa əljahil wa, awak əgərri a din-wər-təgex as əzəgzan wər nəddew əd mazalan olaynen, wər infa wala?

²¹ Məni əmmək was igraw amaraw-nana Ibrahim tişit n alyadil dat Məşşina? Wərgex əddəlil ən mazalan-net, alwaq wad ikfa barar-net Isəhaq y ad iqqəl tənagzamt i Məşşina fəl edag ən təkutawen.²² Təhannayax? Əzəgzan-net iddew əd mazalan-net dağ arat kul wa itaggu. Imazalan-net a əssəkmalnen əzəgzan-net.²³ Təxsal-du batu ta tənnat dağ Əlkəttaban: «*Izzəgzan Ibrahim əs Məşşina, ikf-ay Məşşina taqqat fəl əddəlil n awen*», təzzar itawagg-as esəm: Əmidi ən Məşşina.²⁴ Xasil, təhannayam as awedan əddəlil ən mazalan-net d əzəgzan-net a fəl t-ihakku Məşşina tişit n alyadil, wərgex əddəlil n əzəgzan-net xas.

²⁵ Rahab za ta n təkərwat ənta məni əmmək was təgraw taqqat dat Məşşina? Awak wərgex əddəlil ən mazalan-net alwaq wad təsammagarat inassasaman ən Kəl-İsrayil təsəlxas-tan dağ ahan-net, təzzəbaz-tan tarrayt iyyat əgmadan akal.²⁶ Zund əmmək as təxəssa wər əhen man təmmût, əmmək di dağ as əzəgzan wər nəddew əd mazalan olaynen ənta da immût.

3

Iduf ən tanat dağ iləs

¹ Ya imədrayan-in, a dağ-wan wər igatan əlfəqqitan fəlas təssânam as nakkanay win əlfəqqitan a danax-itəwəggu əşşərixa labasan ogaran wa z'itəwəggin y aytedan win hadatnen.² Fəlas ketnana nətinəgərtəttif dağ tarrayen aggotnen; amaran kud ill-ay awedan as wər kala inagartattaf s a du-təgmad ark batu imi-net, awedan wədi, ikmâl, ifrâg iduf ən tanat dağ təxəssa-net ketnet.

³ Nətaggu ayaba dağ ays fəl a dağ-as nəttəf tanat, nəssuk-ay edag was nərə.⁴ Ənəyat dəx aylal n aman wala ad ikna təzzəwwərt, ibât-tu ađu iknan assahat, da aşək iknân təmmədrəyt as t-itikurit awedan wa t-ewayan fəl aman, isadak-ku s as ira.⁵ Adi da a iga iləs n aggadəm. Taslət əndərrat a imos dağ təxəssa, mişan aratan zawwarnen as ifrag igi n abarag-nasan. Zund as, arat ən tamantast təfrâg əsəbbələgləg n əgoras iknân təzzəwwərt!⁶ İləs, ənta da temsay a imos. Wər t-illa əzzənəf ən talbast a tu-wər-nəha, isamadas şisəllad-nana kul, issirxa fall-ana temsay

dağ əddənet wa n təhəwt-nana har iba-nana, amaran ənta iman-net temsay ta n Jahannama a tu-təsabbalaglagat.

⁷ Wər t-illa əzzənəf ən tawaqqast wala əgədid, wala əmudar imiraradan fəl amadəl wala iyyan n aman as wər ifreg aggadəm əşinən-net, amaran išşonan-tan deş. ⁸ Eges iləs, ənta wər t-illa awedan ifrâgan əşinən-net. Talbast a imos din-wər-ikka awedan d arat, amaran idkâr assam inaqqin.

⁹ Ənta as nətagg təmmalen y Əməli di n Abba-nana, ənta deş as nəbayyak aytedan, as Məşşina a tan-d-ixlakan əs şaşşelan-net. ¹⁰ Imi iyyanda a du-gammadnat təmmalen igammad-t-id deş abayak. Ya imədrayan-in, arat wədi wər imməkkan ad itaggu. ¹¹ Awak şat n aman iyyadda, taffayan-du daş-as aman əzodnen əd win samomnen? ¹² Ya imədrayan-in, awak aşək ən fig itaraw zaytun, wala deş itaraw asab n alyanab fig? Şat n aman za əganen tembay n əsalay, ənta da wər tat-du-gəmmadan aman əzodnen.

Masnat ta n tidət

¹³ Məni-tu daş-wan wa imosan əmusan ila deş əgərri? Awedan wədi, assaknet adi s alxal olaşan əd mazalan əgānen əs talmat ən man əd masnat. ¹⁴ Mişan kud kawanay iwallan-nawan manjay labasan a tan-ihan, wər təgəmməyam ar tənfa ən man-nawan, wədi wər təhoram d igi ən baragan fəl masnat-nawan. Arat wədi isəbbəhəw a imos ən tidət ən Məşşina. ¹⁵ Masnat tədi, wər du-təfəl Məşşina, kalar şin əddənet ta da. Şin awedan ilkāman i tara ən man-net d Iblis. ¹⁶ Fəlas id t-imal manjay d agamay n awa infan iman şas, a t-iməl iba n ənəmənnək labasan d əzzənəfan kul n arak mazalan.

¹⁷ Mişan masnat ta du-təfalat Məşşina, arat wa azzaran təga əs ši zəddigat. Awedan wa tat-igrawan, ira alxer, ləmmid, igarru, tək-n-ay təhanint iguz, itaggu deş imazalan olaşnen. Wər itəggu təmərit za wər tu-təha təlmənufəqa. ¹⁸ Amaran aytedan win maggan n alxer amasa imosan alxer a ənabalan təzzar ələyan-du tənfa təmosat aqqad dat Məşşina.

4

Ərruymatan aggotnen

Ərruymatan fəl əkənnas

¹ Ma d-itawayan gar-ewwan şimazaşen əd kənnasan? Wərgəş arak deranan-nawan əmmigarnen daş təşəswen-nawan? ² Tətaggim attama n arat taqqamim wər tu-təgrewam. Təmosam imaggan ən man, təmosam deş inəmmənzaş, amaran wər təfregam agaraw n awa taram.

Aratan win tægammayam-tan əs təmazaɣen əd kənnasan. Wər təlem awa taram, fəlas agamay a tu-wər-təgem daɣ Məššina. ³ Amaran kud daɣ-as tu-təgmayam da, wər tu-təgərrəwam fəlas əddəlil wa fəl daɣ-as tu-təgammayam a wər noleɣ, id wər təgəmməyam âr ark aratan win ərən man-nawan.

Erruymatan fəl tara n əddənet

⁴ Xa inəmməzray ən Məššina! Masnat a wər təgem as, tara n əddənet gezzar ən Məššina a təmos? Daɣ adi awedan wa igan iman-net əmidi n əddənet, wədi azangaw ən Məššina a imos. ⁵ Meɣ ak təɣilt a təgam as Elkəttaban tənna ən bannan a əgan as: Məššina ikna tara n Infas wa daɣ-naɣ iga. ⁶ Mišan tara n Infas wa, togar-tat arraxmat ta danay-ihakku. Adi a fəl ənnan Elkəttaban: «*Məššina iɣnâz y aytedan win əzzəzwarnen iman-nasan, amaran win əssərasnen iman-nasan arraxmat-net a tan-ihakku.*»

⁷ Daɣ adi bardagat i Məššina, təgdəlam iman-nawan y Iblis, a kawan-ugag. ⁸ Zənnəmihezət iman-nawan əd Məššina, a dər-wan inəmihez. Xa inasbakkadan, širədat ifassan-nawan daɣ igi ən bakkadan, təzzəzdəgam iwallan-nawan, təkəkəsəm daɣ-san igi n aššak! ⁹ Əɣšədanet man-nawan, talim d aytedan a fəl təga təfəyyawt, təhallim. Təggəzet tala edag ən tadaza-nawan, təggəz təkənzert edag ən təfalawist-nawan. ¹⁰ Sərəsat iman-nawan dat Əməli, a kawan-idkəl.

Erruymatan fəl šizmit

¹¹ Ya imədrayan-in, ad wər təməl šizmit gar-ewwan. Awedan wa oɣaman amadray-net madəɣ issəwar-tu lahan, wədi əššəriɣa a oɣam, issəwar-tu lahan. Amaran awedan wa issəwaran əššəriɣa lahan, wədi ab'as ilkam y əššəriɣa, iqqal əmašraɣ ənta iman-net. ¹² Məššina ɣas a imosan Amašraɣ iɣattasan əššəriɣa, isafsu, ihallak dəɣ. Kay ma təmosaɣ as təšaraɣa y iyyan awedan?

Erruymatan fəl zazwar ən man

¹³ Səsəmmat za, kawanay win ganninen: «Azalada madəɣ tufat ad nakku aɣrəm mandâm, nag-in daɣ-as awatay nəgâ jola, nəgrəw riba.» ¹⁴ Ənta kawanay wər təssenam wala ɣas awa dər kawan-du-z-ifaw! Wər təzlayam d əhu, s ad t-illa, mišan as z'agu arat n amazay, wər t-illa. ¹⁵ Edag n ad tannim: «Kud Əməli irɗa, ad nəddər, nagu awa madəɣ awa.» ¹⁶ Mišan əmərədda ibaragan a tətəggim tədkâlam iman-nawan. Ibaragan za kul win šilat ən win di talbast a əmosan. ¹⁷ Daɣ adi awedan kul issanan

əmazal wa olayan amaran iqqim wər t-iga, wədi abakkad zəwwəran a iga di.

5

Ərruyxmatan fəl iba n əššərixa wa tamazalan məggərgas

¹ Amaran kawanay iməggərgas, səsəmat-i: Eggəzat šin tala, təsəkkələlam fəl əddəlil n əlməssibaten šin kawan-d-əzaynen. ² Təgərgist-nawan tərka, isəlsa-nawan tətš-en təkəy. ³ Urəx-nawan d əzrəf-nawan tətš-en tənək. Amaran tənək di da a fall-awan za taggayet, tatsu šiğəswen-nawan zun tanat-tətša təmsay. Təššədawam təgərgist day adan win, s əntanay a əmosnen təsəlkamt n əddənet. ⁴ Ənəyat, alxaq ən mašşaxalan win təsəssalayam šiwəgas-nawan, isixarat fall-awan; amaran təkurayt-nasan, tewad Məššina di n Əməli ən tarna. ⁵ Tənniflayam day əddənet, təhəm tara ən man-nawan. Təsədarem iman-nawan y əzəl wa n agazam. ⁶ Təbazam s əššərixa alxadilan ən Məššina a kawan-in-wər-nəkka d arət, təgam iman-nasan.

Ənnəsixatan aggotnen

Təzaydart day alxazab

⁷ Ya imədrayan-in, day adi zəzzəydərat har d-asu Əməli. Ənəyat tewaylay a itaggu əmagyak i tənfa ta du-təgammadat tawagost-net. Əzəzzəydər a itaggu har təgrəw tawagost-net akonak wa azzaran əd wa ilkaman. ⁸ Kawanay da za, zəzzəydərat, tilem əwəl, fəlas assa n Əməli ihôz.

⁹ Ya imədrayan-in, ad wər tətinəməšşikam gar-ewwan ibəz-kawan əššərixa. Ənəyat! Əmašraç wər iggug, illa çur imi n ahan. ¹⁰ Day batu ta təqqalat alxazab əd təzaydart, ya imədrayan-in əqqəlat aytedan olänen d ənnəbitan win əššəwalnen s esəm n Əməli. ¹¹ Ənəyat, a nəgannu aytedan win əlanen zəmmerat əbbilalan. Təslâm əlqissat ən zəmmerat n ənnəbi Ayuba, tənâyam dəç təsəlkamt ta das-iga Əməli, id Əməli tək-nay tara əd təhanint iguz.

Ənnəsixa day batu ən təhuday

¹² Ya imədrayan-in, are day-wan dat arət kul ad wər təhhadam gər za əs jənnawan wala s amaçal wala s arət a iqqal. Ganniwat ças «Ayew» y awa imosan tidət, təgannim «kala» ças y awa tat-wər-nəmos fəl a kawan-wər-iwər abakkad, ibəz-kawan əššərixa.

Şiwatriwen i miranan

¹³ Awak ih-iwan i itaxazzaban? Wədi aget şiwatriwen. Awak ih-iwan awedan ifilawasan? Wədi aget təmmalen i Məššina. ¹⁴ Awak ih-iwan awedan irinan? Issəgməyet

imuzaran n Elkənisat a das-əttəran, əzwəyan-as widi s esəm n Əməli Ƴaysa. ¹⁵ Təwatray ta təgat s əzəgzan ad tas-safsu əmiran wa fəl təga, izzuzəy-tu Məššina daƷ təwərna. Wala ad imos as ibakkadan a sər-əs tat-d-ewaynen, a das-ətəwəsürəfan. ¹⁶ DaƷ adi, tinəməmilat gar-ewwan ibakkadan-nawan, tutabam daƷ-san, ad tətınəməggim šiwatriwen fəl ad təzzəyam. Təwatray təglâyat n awedan oƷadan təh-et tarna tagget əd tənfa.

¹⁷ Ilyas, awedan a imos ən šilat-nana. Iga təwatray a daƷ iglây a igdalan y akonak ewet. Təzzar iga akonak karad elan əd sədisat təlil wər itteb fəl amađal. ¹⁸ Dəffər awen ittar, ifay-du akonak daƷ jənnawan, ikkas-du amađal tənfa-net.

Batu ən məzzəgzan win əxraknen

¹⁹ Ya imədrayan-in, as ixrak iyyan daƷ-wan igmad tidət, issuƷəl-as-tat-du əmidi-net, ²⁰ təssənam as, awedan wa d-issoƷalan anasbakkad, ikkas-t-idu daƷ axarak wa iga, wədi iman a d-issəfsa daƷ təmattant, eway-du deƷ təsureft ən bakkadan aggotnen.

Širawt ta tazzarat iktab Butros

Šihulawen

¹ Awa nak Butros imosan anammazul ən Үaysa Ёlməsix, a din-ihulan iməzzəgzan win wazawaznen, əmosan iҗərab daҗ kallan ən Fontəs, əd Galatəya, əd Kabadokəya, d Asəya, əd Bitinəya. Isinafran-tan Məššina ² di n Abba harwa dat alwaq əs masnat-net d ənnizam-net. Ig-en aytedan a sər-əs əskâtnen s əssəbab n Infas wa Zəddigan, fəl ad abbardagan i Үaysa Ёlməsix, təwəzəzdəgan deҗ s əzni-net. Məššina ya təzizabbe-du fall-awan arraxmat, d alxer wər nəla əddukad.

Tišit n əlməsixi

Agoda i Məššina attama wa danay-ikfa

³ Təmmal i Məššina di n Abba n Ёməli-nana Үaysa Ёlməsix. Təhanint-net wər nəla əddukad as danay-iga aytedan əgânen təhəwt taynayət, fəl ad nagu təməddurt təgât s attama ittiddan, s əssəbab ən tanakra ən Үaysa Ёlməsix daҗ təməttant, ⁴ nəgrəw deҗ təkasit n arət wər nətəməndu, wər itəmədis, za wər itəbəkəssit, a dawani-wagazan daҗ jənnawan. ⁵ Kawanay a ogaz Məššina əs tarnə-net, fəlas əzəgzan a təgam, fəl ad təgrəwam efsan. Efsan win isimatak-kan Məššina fəl ad təwəgrəwan daҗ azzaman win əҗrud n əddənet.

⁶ Isəffəliwəset-kawan awen, kuddeҗ as əmərədda ihhišsal a kawan-zəzzəkənzəran jarrabatan əmosnen əzzənəfan, mišan ya awen wər z'ihag. ⁷ Jarrabatan win, əntanay a sataddinen assahat n əzəgzan-nawan ogaran urəҗ almaqam. Urəҗ iman-net wər iҗlel, amaran temsay a daҗ itawaggu fəl ad itəwəssən kud imos wa n ələsəl wala. Ёzəgzan-nawan da za kundaba itawajarrab. Ёddi amaran, assaҗa wa du-z-azzabbat Үaysa Ёlməsix, itəwəsənəfiləl y əddənet ketnet, ad təgrəwam təmmalen d ədkul əd saҗmar, s əssəbab n assahat n əzəgzan-nawan. ⁸ Үaysa Ёlməsix tərâm-tu təzzigzanam sər-əs da wər tu-tənayam harwa da. Awen daҗ a fəl təgam təfalawist as tu-wər-illa i ifragan emel-net za wər tu-təlla tulat-net. ⁹ Təfalawist tədi təgâmtat fəlas aggad a təgam əlməxsud n əzəgzan-nawan, a t-imosan agaraw n efsan.

¹⁰ Efsan win di, əyyəwanan ənnəbitan win əmalnen arraxmat ta dawani-z-əgu Məššina agamay d əgərri-nasan. ¹¹ Ёdgâzan wəllen daҗ ad əssənan awa mosan azzaman

d alxalaten, win z'assakninen awa imal Infas n Ælmæsix. Infas wa, illa ġur-san kala da; amaran imâl-asan alyazab wa z'agu Ælmæsix æd tanaya ta du-za-tælkəmat y awen. ¹² Isannafalal Məššina y ənnəbitan as isalan win d-əgrawan den, wərgəx əntanay a d-əkkan, kalar kawanay a d-əkkan, iwâr-tan a dawan-tan-agin. Isalan win əntanay a dawan-əmalan məssəsəğra win sasəğrinen Ælinjil əs tilalt n Infas wa Zəddigan. Infas wa, ijənnawan a dağ d-itawasagla. Ælinjil, angalosan da sidaranan wəllen masnat-net.

Alxal wa issəğmaran Məššina

¹³ Dad zamas tayttay-nawan təsimatag y əššəxəl, təttafam deɣ alwasat dağ arat kul, wədi agiwat attamanawan ketnet dağ arraxmat ta za təgrəwam ġur əzəbbi ən Ƴaysa Ælmæsix d ənəfilal-net y əddənet. ¹⁴ Bardagat y Æməli-nawan, awa taggin bararan y abba-nasan, tammaz-zayam d arak deranan win as kala a tan-tətaggim harwa ad təmosam aljahilan. ¹⁵ Æmmək was zəddig wa kawan-d-iğran əs man-net, əmmək en dağ as kawan-iwar ad izdag alxal-nawan kawanay da, ¹⁶ Fəlas iktâb as: «*izdagat, fəlas nak əmizdag a mosa.*»

¹⁷ Amaran dad zamas təgannim dağ təwatriwen-nawan «Abba» i wa wər nəzlay aytedan, kalar ixakkam akkiyyan dağ-san əs mazalan-net, dağ adi agiwat təməddurt a dağ təksudam Məššina dağ azzaman win əmərədda, a dağ təmosam inaftayan dağ əddənet. ¹⁸ Alxal wa dawan-d-oyyan marawan-nawan wər infa wala. Təssānam as Məššina irzâm əlqim zəwwəran y a kawan-d-ikkəs dağ anamod ən təməddurt wen. Amaran inazzan win den, wər əgen s əzrəf, wala urəx a mosnen aratan tamandinen, ¹⁹ kalar azni ilân almaqam wəllen n Ælmæsix as əgan. Azni wa, iha əlmital n əzni n ajaɣol wər nəga əlxib. ²⁰ Ælmæsix təga fall-as masnat dat əxluk n əddənet, amaran itawasanafalal dağ azzaman win əlkamnen a fəl əddəlil-nawan. ²¹ Əddəlil-net a fəl təzzəgzanam əs Məššina s ənta t-id-issənkaran dağ təməttant ikf-ay tanaya. Adi a d-ewayan as təzzəgzanam əs Məššina təgam dağ-as attamanawan. ²² Təzzizdagam iman-nawan s əbərdəg wa təgam i tidət fəl ad tagim ənəmərə igân s əwəl iyyanda, awa taggin mədrayan. Dağ adi akniwat ənəmərə əs wallan zaddognen. ²³ Əssənət as təhəwt taynayət a təgam təlât ələsəl ixlâlan, wərgəx təhəwt ta n aggadəm təmosat arat wər nəğlel. Kalar awal ən Məššina ixlâlan ihakku təməddurt a imosan ələsəl ən təhəwt ta təgam da. ²⁴ Id iktâb as: «*Aggadəm wər izlay əd yel, tanaya-net deɣ ketnet wər təzlay əd təjigay*

ən yel. Yel amaran tayart a itag tærtək tøjigay-net, ²⁵ *mišan awal wa n Əməli ənta, ill-ay, ixlâl.»*

Amaran awal wen Əlinjil wa dawan-ittəmalan a t-imosan.

2

Awa təmos tamattay ta n Məşşina

¹ Dağ adi sənnəməggəgat iman-nawan d a imosan əzzəngu, əd təkərras, əd təlmənufəqa əd manjağ, d əzgən.

² Awal ən Məşşina zun ax wər nəqqer a dawan-imos. Agiwat-as tara ta taggin bararan əs səket əhəwan y əx, fəl a kawan-issədwəl dağ tişit-nawan əlməsixitan. ³ Tara ten da a das-za-tagim as imos as «tənayam kawanay iman-nawan awa dər ogda əllux n Əməli.»

⁴ Zənnəmihezət iman-nawan d Əməli s ənta a imosan təhunt təddarat, tas aytedan za əgaran-tat-in, xur Məşşina amaran ənta a təmosat təhunt ta tənəfranat təla almaqam. ⁵ Dad zamas kawanay da təmosam zun təhun əddarnen, itawakras sər-wan ahan n əlxibada ən Məşşina əs tilalt n Infas wa Zəddigan, wədi təqqalam ilimaman zaddoggen hakkinen şikutawen şin imal Infas wa Zəddigan s əntanatay a əgraznen i Məşşina əs tarrayt ən Үaysa Əlməsix. ⁶ Ənta Məşşina inna dağ Əlkəttaban: «*Ənəyat, əssinsa dağ Səyon təhunt ta təkəbbalat ehan, tənəfranat, təlat almaqam. Wa sər-əs izzəgzanan, wər z'ikərukəd.*»

⁷ Dağ adi kawanay a əzzəgzannen, təkfiwan təhunt ta ətəwəsəymar. Aytedan amaran win wər nəzzəgzan əssənənet as: «*Təhunt ta din-əgaran makrasan, ənta a təqqalat təhunt ta təkəbbalat ehan.* ⁸ *Amaran təhunt ta təmos təsənkəft y aytedan, tətagadl-en.*»

Təhunt ten nakkafan-as aytedan, tətagadl-en, fəl tugəyt ta əgan s ad əzzəgzənan s Awal ən Məşşina, amaran tugəyt ten da a dasan-tətawatasat.

⁹ Kawanay amaran:

«Tawşet tənəfranat a təmosam, tiddawat ən limaman ən Məşşina di n Əmənokəl, təmosam harwa da ayrəf iskatan əs Məşşina, təmosam değ tamattay-net.

Ikkas-kawan-du

fəl ad təmmalam igitan simaklalnən,»

win iga id ənta a kawan-d-iğran dağ şiyyay, ig-iwan dağ ənnur-net isinahalan əmələwləw. ¹⁰ Kawanay dat awa, wər təmosam fadda tamattay, amaran əmərədda təqqalam tamattay ən Məşşina. Dat awa wər təgrewam əhənəttə fadda, əmərədda amaran təgrewam-tu.

Alxal wa iwaran əlməsixitan

Alxal wa iwaran əlməsixitan gar-essan d aytedan

¹¹ İmaran-in dad zamas əddənet a inaftayan əd yərab a dağ-as təmosam, wədi onsâyaq-qawan ad tənəməggəgam d arak deranan win aggadəm, fəlas əntanay a əmosnen izənga n əzəgzan-nawan. ¹² Ad wər tammazzayam d alxal wa olağan dat aytedan win wər nəksud Məşşina. Əddi as imos as sawaran-kawan bahutan ən tişit ən nəsgufa, iman-nasan as z'ənəyan igitan olağan win tətəggim dağ anamod wen, awəy-du sər-san awen saşmar n Əməli əzəl wa du-z-asu. ¹³ Bardagat i muzaran-nawan kul fəl udəm n Əməli, gər əmənokəl s ənta a ixkaman fəl arat kul, ¹⁴ wala dəy inaxkiman-net win d-izammazal imos əşşəxəl-nasan əwəddəb n aytedan win tagginen təkma, əd tahakkay n almaqam i win tamazalnen awa olağan. ¹⁵ Məşşina a ira ad tətəggim awa olağan fəl ad tədbəxam imawan n ark aytedan n aljahilan. ¹⁶ Agiwat alxal ən lallan, mişan əlləllu-nawan a tu-wər-tagim arat a daw təssolamam aşşar, kalar taggiwat imazalan n as təmosam eklan ən Məşşina. ¹⁷ Səxmərat aytedan kul. Iriwat imədrayan-nawan kul dağ əzəgzan. İksadat Məşşina, təssəxməram imənokalan-nawan. ¹⁸ Eklan, bardagat i məssawwan, tagim-asan saşmar kul wa kawan-iwaran, gər za əmosan aytedan olağan, lammodan, wala dəy əmosan ark aytedan labasnen, ¹⁹ fəlas arraxmat a imos ad izmər awedan, izəzzəydər d alyazab imosan tədləmt, as imos əs təkatawt ən Məşşina a fəl iga awen. ²⁰ As imos as təgəx abakkad, ma imos aroz wa za təgrəwa dağ əzəzzəydər d attadib n awen? Mişan ya as imos as təmosax awedan itamazalan awa olağan, amaran təzmâra y ətəwəzəxəzzab imosan tədləmt, wədi əssən as arraxmat a təgrəwa yur Məşşina.

²¹ Awalla, ənta da da awas tətəwaxram, fəlas Əlməsix iman-net da ixxizzab fall-awan, oyy-awan-du almasal, fəl ad təlkəmam y awa iga. ²² Əlməsix amaran, ənta *as wər kala ad iga abakkad, za wala iga bahu y awedan waliyyan.* ²³ Ənta a iyyəwanan ətəwərbəb, mişan wər izzəzal. As itawəzaxəzzab, wər iga arak batu y awedan waliyyan, kalar talxa-net kul as tat-iga dağ əfus n Əmaşraş wa Oğadan a t-imosan Məşşina. ²⁴ Ənta dəy a itawataytayan fəl təgəttawt, idkal ibakkadan-nana, nəga əd bakkadan ənəməggəg wa təga təməddurt əd təməttant, fəl ad nagu təməddurt a dağ noxâd. Dağ adi Əlməsix ənta a kawan-izzozayan əs busan win dağ-as tawəgganen. ²⁵ Əstizarat təmosam zun ayfəd əssigəlnen, mişan əmərədda təqqalam-du amadan-nawan, s ənta a imosan əməgəz ən man-nawan.

3

Alxal wa iwaran əlməsixitan day azalaf

¹⁻² Kamatay deḡ šidoden, bardagmat i meddan-nakmat. As tēgamat adi, kud imos as wiyyad daḡ-san wər əzzəgzanan s awal ən Məššina da, as hannayan alxal-nakmat olâḡ zəddig, hannayan deḡ saḡmar wa dasan-tēgamat, a sər-san d-awəy awen əzəgzan da wər dasan-təššewalmat. ³ Ad wər əqqəlnat təhussay-nakmat arat iwāran azzahir ḡas, a du-wər-eway ar əzzənəfan ən latafan wiyyad əmmittaynen, madeḡ uḡənan n urəḡ, wala šibədday əknanen əzzəwi. ⁴ Kalar əgməymat šihussay šin əḡbarnen daḡ əwəl, s əntanatay a wər nəgəmməd, əmosnen talmat d əsənsi ən tayttay. Šihussay den da šin əknanen təla n almaqam ḡur Məššina. ⁵ Ənta den daḡ əmmək was dallagnat tədoden šin dat awa a əskatnen əs Məššina əḡānat daḡ-as attama-nasnat, əbbirdagnat i meddan-nasnat, ⁶ zun Sarata, s awa tēga y Ibrahim daḡ əbərdəḡ, a das-təgannu: Məšši. Əmərədda kamatay a mosnen šibararen-net, as imos as tətamazalmat awa olaḡan a daḡ wər toyyemat iman-nakmat təggəz-kamat tasa n arat waliyyan. ⁷ Kawanay deḡ meddan agiwat i tədoden-nawan tidawt tēgāt s ənəməsəsəgra, a daḡ təssānam fəl tišit a əḡānat tədoden šinərkam. Səḡmərət-tanat, fəlas tədrowam dər-əsnat təkasiṯ n arraxmat təmosat təməddurt. As dasnat-təgam adi, wər t-illa a z'inkəfan i təwatriwen-nawan.

Alxal wa iwaran əlməsixitan gar-essan

⁸ Xasil iliwat tayttay iyyadda, tilem tafərəyt i təkmawen n aytedan kul. Əqqəlāt aytedan a daḡ tēggət tara ta təllat ḡər mədrayan d əlluḡ d iban zazwar ən man. ⁹ Ad wər təzazalam daḡ aytedan win dawan-tagganen təkma wala takaggaran-kawan. Kalar tattarat-asan a dasan-igan arraxmat, fəlas awen da as tətawaxram s a tu-tətaggim, fəl ad tēqqəlam iməkkusa ən maruzat ta dawan-tənsat. ¹⁰ Ənnan Əlkəttaban:

*«As ira awedan ad igrəw təməddurt a daḡ iddəwat,
ifaw-du fall-as ijilan a daḡ inniflay,
wədi aḡəzet iləs-net daḡ təkma,
igdəl-as əlləfəd n awa imosan šikərras.*

¹¹ *Isənnəməggəget iman-net əd təkma,
ad itamazal awa olaḡan.*

Igməyet alxer; iššikəl daḡ-as.

¹² *Amaxlol iswād daḡ aytedan win oḡadnen,
amaran iqabbal šiwatriwen-nasan.*

Amaran win əššokalnen daḡ təkma, akyud a tan-iga.»

Alxal wa olaxan attalal n Elmäsix a t-imosan

¹³ Awak ma imos wa dawan-z-agin tækma as imos as tæsıgatakkem daɣ əmazal n awa olaxan? ¹⁴ Amaran as imos as affaw-du fall-awan əzəl iyyan a daɣ təɣxızzabam fəl as təmnozalam awa oɣadan, wədi təbbilalam!

Ad wər tiksadam awa əksudan aytedan, amaran ad wər əɣşədan man-nawan.

¹⁵ Zəzwərat daɣ wallan-nawan Elmäsix imosan Əməli, tarđim as ənta a imosan Əmızdag. Səmmutəgat faw y əsəssəgri n awedan kul wa kawan-issəstanan daɣ batu n attama wa təgam. ¹⁶ Awen amaran agıwat-tu əs talmat əd saymar n aytedan. A tu-wər-iməl arat waliyyan a daq-qawan təha tərək. As ıga adi edag iman-net wa daɣ sər-wan tawagginat batuten əbrarnen, a daɣ-as kərükədan aytedan win jajargannen alxal olaxan wa təgam daɣ tassa-q-nawan d Elmäsix, ¹⁷ fəlas ofa ad aɣɣazzab awedan itamazalan əllux, as imos as awen daɣ a ira Məşşina, y ad aɣɣazzab awedan itamazalan tækma. ¹⁸ Elmäsix iman-net ıga alɣazab iyyanda, aba-tu fəl bakkadan n aytedan. Ənta wa n alɣadıl, aba-tu fall-awan kawanay a wər nəɣdel, fəl a kawan-izənnəmihez əd Məşşina. Təmattant ta n təɣəssa-net a ıga, mişan iddar-du əs tarna n Infas Wa Zəddigan. ¹⁹ Amaran tarna n Infas wa Zəddigan as ıgla Elmäsix ıga təlɣutbat i win əhanen alaxirat əɣfəlan. ²⁰ Aytedan win əntanay as kala ad əffəllagan əs Məşşina daɣ azzaman ən Nux. Azzaman di izıydar Məşşina ıqqəl y ad ıxırəd Nux akaras n əɣlal-net. Əttam aytedan ɣas a əggaznen aɣlal wen əragan-du daɣ akonak wa n Nux. ²¹ Arat wen əlmıtal a imos n alamaɣ daɣ aman was ənta a kawan-issəfsan əmərədda əs tarna tas d-ıncar ɣaysa Elmäsix daɣ təmattant. Alamaɣ wa wərgəɣ əşirəd ən şıday fəl təɣəssa a imos, kalar ıgi n arkawal dat Məşşina əs man wər təha tərək waliyyat a t-imosan. ²² Illıkan as ɣaysa Elmäsix a d-obazan ɣur əgəzzəy-net əs jənnawan, ıqqım daɣ əɣıl ən Məşşina, angalosan, əd təmənukəla kul əd taɣmaren kul əbbirdagan-as.

4

¹ Daɣ adi, dad zamas Elmäsix da təɣəssa-net tənây alɣazab, kawanay da səmmutəgat y arat zun wen da. Fəlas awedan wa ıxəzzaban əs təɣəssa-net daɣ anamod wen, wədi immızzay əd bakkadan. ² Awen daɣ a fəlas a obazan ɣur azala, ad wər tələsam şıyyıt ən man-nawan təlcamam i deranan win aggadəm, kalar əlkəmat i tara ən Məşşina daɣ awa din-ıqqıman daɣ təɣərras-nawan. ³ ıgd-awan awas kala tu-təgam, imosan awa əran aytedan wər nəssen

Məşşina. Wər təzlayam a təmmozalam, tətəggim arak deranan, təmosam imaşwan n esmad. Tətəggim tettay tagget, əd tassay tagget, təxbâdam əssənəman əmosnen arat issiksadan. ⁴ Amaran ark aytedan win isimaklal sər-san as dasan-wər-təlkemam dəx arak mazalan win taggin əmosnen əsəssikəy aggen dəx təmazrəyt, əqqiman amaran ɣaşşadan-awan esəm. ⁵ Kundaba əbdadan fəl mazalan-nasan dat wa isammatagan y ad işrəx win əddarnen əd win aba. ⁶ Awen dəx a fəlas win əmosnen inəmməttan əmərədda, da itiwamal-asan Əlinjil. Arat wen itiwagg-asan fəl ad awwaddaban əs təməwit tas tawaddaban aytedan dəx əddənet, agin deyx dəffər awen təməddurt a dəx innoda Infas wa Zəddigan əs təməwit ta ira Məşşina. ⁷ Təzərəst n əddənet təhöz. Əqqələt aytedan əlanen əzzəbun tannadim dəx man-nawan, fəl ad təfrəgam igi ən təwatriwen. ⁸ Zuzərat y arat kul ənəmərə aggen gar-ewwan, *fəlas tara, ənta a təhakkıt təsureft ən bakkadan aggotnen.*

⁹ Əqqələt aytedan iha amagaru gar-ewwan əs man ərdānen. ¹⁰ Akkiyyan dəx-wan agiwet i win hadatnen tənfa əs təhəkkıt ta təgrawam s arraxmat ən Məşşina. Əmmək di da as za təqqələm inaylifan olaynen n arraxmaten aggotnen şin dawan-iga Məşşina. ¹¹ I dəx-wan işşewalan, aget awal n as Məşşina a t-id-izammazalan. I dəx-wan idahhalan imidawan-net, idhəlet-tan əs fərregat ta danax-ihakku Məşşina fəl ad itəwəsəxmər Məşşina dəx arat kul, əs tarrayt ən Ƴaysa Əlməsix. Ənta a ilan tarna, əd tanaya har faw! Amin!

Allam fəl man d ənnəsixa y aytedan dəx azzaman win alɣazab

Alɣazab fəl Əlməsix

¹² İmaran-in, ad wər əqqənan ɣafawan-nawan i təmsay n alɣazab ta kawan-təhat əddi təmos jarraba-nawan, a das-wər-tagim iduf n as igraw-kawan arat immittayan. ¹³ Kalar isəffəliwəset-kawan as tədrâwam d Əlməsix alɣazab, fəl ad taknim təfalawist əd tədəwit assaxa wa du-za-tənəfiləl tanaya-net.

¹⁴ Təbbilalam kawanay win tawarbadnen fəl as kawan-ila Əlməsix id Infas wa ilan tanaya, a t-imosan Infas ən Məşşina, a dər-wan iddewan. ¹⁵ A kawan-wər-iggöz i iɣizzaban fəl igi ən man, wala şikra, wala tişit n anasgafa, madey awedan itaggazan şıɣawşiwen a tu-wər-nəqqel. ¹⁶ Mişan as tətəɣazzabam fəl tişit n əlməsixitan, a kawan-wər-isəkkərəkəd awen, kalar sənnəmələt fəl Məşşina, fəl awer wa kawan-iga esəm n Əlməsix.

¹⁷ Fəlas alwaq ewad-du wa day z'antu əşşəriya, amaran tamattay ta n Məşşina as inta. Day adi dad zamas nakkanay as issənta əşşəriya-net, ma dər za talu təsəlkamt ən win wər nəzzəgzan s Əlinjil-net? ¹⁸ Ənnan Əlkəttaban: «*Dad zamas aytedan win oyadnen da gərrid as z'afsin, ma dər z'alın win wər nəksud Məşşina əşşökalan day igi ən bakkadan?*»

¹⁹ Day adi win təyazzabnen day əddənət fəl as əmmožalan tara ən Məşşina, aginet iman-nasan day təylift n Əmaxlak n əkkulluk n arət, s ənta a imosan alxadil, aglin day əmazal n awa olağan.

5

Tizart day Əlkənisat

¹ Əmərədda ad agay ənnəsixatan əkkənen win day-wan əmosnen imuzaran n Əlkənisat. Əşşewalax-asan s esəm ən tişit-in əmuzar nak da, şilat-nasan, əmosa deyx təgəyya n alxazab n Əlməsix, əddewa dər-əs deyx day tanaya ta du-za-tənəfiləlat. ² Ədənət eharay wa kawan-issəylaf Məşşina. Əssənət day-as s a wər nəmos əşşil, kalar əs man ərdənən s əmmək was ira Məşşina. Ad wər tətəggim adi fəl tara n əddənət, kalar taggiwat-tu s əwəl iglayan. ³ Ad wər tətəggim adi s əddəguz ən məzzəgzan win kawan-tawasaylafnen, kalar agiwat-as igi a day təmosan almasal olağan i tamattay ən Məşşina. ⁴ Əddi assaxa wa du-z-inəfiləl əmuzar ən madanan n əlməsixitan, ad təgrəwam maruzat təmosat təkəbbut ən tanaya wər nətəməndu. ⁵ Əmmək en day as əyrex aytedan win əmosnen təmmədrəyt s ad abbardagan i muzaran n Əlkənisat. Day tassağ ta təgam, əqqələt aytedan əssirasnen iman-nasan, gar-ewwan, fəlas a ənnan Əlkəttaban: «*Məşşina iṛnâz y aytedan win əzzəzwarnen iman-nasan, amaran win əssərasnen iman-nasan arraxmat-net a tan-ihakku.*»

⁶ Sərəsat iman-nawan dat Məşşina di ən Məşşis ən tarna, fəl a kawan-izzəzwər alwaq was otas. ⁷ Agiwat talxiwen şin kawan-əşşəwaşnen kul day təylift ən Məşşina, fəlas ənta a day-wan issanan. ⁸ Əqqələt aytedan ənnodanən day man-nasan, tənəkədam. Azangaw-nawan İblis, itixələyxləy-kawan zun ahar ihhirnanan, igamma y i ijalaqqat. ⁹ Əgdələt-as iman-nawan, s ad təsəggətəkkem day əzəgzan. Təssānam as imədrayan-nawan day əzəgzan, taggin alxazab olən əd wa da tətəggim əddi day adag kul wa əhan day əddənət.

Igi n attama day Məşşina day alxazab

¹⁰ Məşşina di n Əməggi n arraxmat, s ənta a kawan-d-iğran əs tanaya-net təğlalət dəy tassağ d Əlməsix, ənta iman-net as dawan-italam fəl man, isisuhit-kawan, ihakk-iwan fərregat n ad təzəzzəwem dəy əzəgzan, dəffər as təgâm arat ən tamert n alyazab. ¹¹ Ənta a ilan tarna har faw! Amin!

Şihulawen šin əlkamnen

¹² Əgeğ-awan-in arat ən batuten šin əssiktaba Silfanus imosan amadray-nana n alyadil, əmosnat ənnəsixa y-awan, əd təgəyya y-awan as arraxmat ən Məşşina ta n tidət, ənta əddi da təgrawam əddi təzizawem dəy-as. ¹³ Təhul-kawan-in Əlkənisat ta n əğrəm ən Babəylon, as Məşşina a tat-isannafranan zun awa dawan-iga. Barar-in Markus da ihul-kawan-in. ¹⁴ Nəsəsləmat ketnawən əs təzələmma šin tinəməggin mədrayan. İğ-awan Məşşina alxer ketnawan kawanay a ertaynen d Əlməsix!

Širawt ta n sanatat iktab Butros

Šihulawen

¹ Awa nak Simxon Butros, wa n əkli d anammazul ən Ƴaysa Ǝlməsix, a din-ihulan aytedan kul win əgrawnen əzəgzan ilân almaqam zun wa nəgraw. Ǝzəgzan wa, nəgraw-tu əs taqqat n Ǝməli-nana, n Ǝnəssefsi-nana Ƴaysa Ǝlməsix. ² Ig-awan Məššina arraxmat d alxer wər nəla əddukad, əs masnat ta təgam Məššina, d Ǝməli-nana Ƴaysa!

ƎtəwəƳra n əlməsixitan d ətəwəsənəfran-nasan

³ ƎgeƳ-awan təwatray tədi fəlas tarna ən Məššina as danax-ihakku arat kul was nəddərar y ad nagu təməddurt a daq-qu nəksud. Ǝnta a danax-iknan əsusən ən wa danax-ixran əs tanaya-net d əlluƳ-net. ⁴ Ǝssəbab ən tanaya-net d əlluƳ-net əntanay as nəgraw arkawalan win ogarnen təla n almaqam, ogaran dəƳ təzzəwwərt. Arkawalan win, təgrawam-tan fəl ad tagim alxal wa d-ifalan Məššina, tənəməggəgam d arat kul wa ihallakan a du-tawayan arak deranan n əddənet. ⁵ Fəl əddəlil n awen dəƳ as, agiwat awa təfragam kul fəl ad təssərtəyam əzəgzan-nawan d əlluƳ, təssərtəyam əlluƳ əd masnat, ⁶ təssərtəyam masnat d ənudi dəƳ wallan-nawan, təssərtəyam ənudi dəƳ wallan-nawan əd zəmmerat, təssərtəyam zəmmerat əd təksəda ən Məššina, ⁷ təssərtəyam təksəda ən Məššina əd təmmədrəyya gar-ewwan təssərtəyam təmmədrəyya əd tara. ⁸ As dəƳ-wan d-əndan aratan win di, əqlan tittəyan dəƳ-wan, ad təqqəlam aytedan təha tənfa tətittəy dəƳ-san masnat n Ǝməli-nana Ƴaysa Ǝlməsix. ⁹ Mišan awedan wa dəƳ du-wər-ənden aratan win di, wədi ola d əmədderyəl. Ǝgərri-net wər fəru, ittəw-in fadda as itiwazazdag dəƳ bakkadan-net win ərəwnen.

¹⁰ Awen dəƳ a fəlas əgmāya dəƳ-wan imədrayan-in, ad taknim əddəguz wəllen, təsəssuhem təƳaray ta kawan-iga Məššina, d əsənnəfrən wa kawan-iga. Fəlas arat wədi as tu-təgam, wər dawan-ilkem ad tudâm dəƳ a imosan təkma. ¹¹ Ǝmmək en dəƳ as za tagim agaraw ikmalan y iguz ən taƳmar təƳlalət n Ǝməli-nana, s ənta Ǝnəssefsi-nana, a t-imosan Ƴaysa Ǝlməsix. ¹² Ǝnta da da əddəlil wa fəl kawan-du-saktaƳ har faw aratan win, kuddeƳ as təssânamtan kala da təzizawem dəƳ tidət ta təttafam. ¹³ Mišan iket əheƳ əddənet iwâr-i a kawan-du-sakta batu ta fəl ad tənəkədam. ¹⁴ Fəlas dəƳ awa di-isannafalal Ǝməli Ƴaysa

Ʒlmæsix agamad-in æddænet ihôz wællen. ¹⁵ Mišan ad agay awa æfraga kul y ad iqqəl as dæffær tæmattant-in da, ad taglim tækattim-du aratan win har faw.

Tanaya n Ʒlmæsix d awa ænnan Ʒnnæbitan

¹⁶ Amaran æssænæt as wærgex imayyan a du-tiwanzammen æs tæla æn tayttay tagget as nêlkam, nesusunkawan sær-san fæl tarna n Ʒmæli Ʒaysa Ʒlmæsix d assa-net. Kalar adkul-net a nænay æs šittawen-nana. ¹⁷ Fêlas igraw ætæwæsæxmar æd tanaya xur Mæššina di n Abba. Aratan win igraw-tan assaxa wad isla y æmæslisinnahalan tæla æn tanaya, as das-inna: «Wa, ænta a imosan barar-in wa ækney tara, ikna æsæffæliwæs æn man-in.» ¹⁸ Ʒmæslis wa nakkanay iman-nanax as das-næsla as d-igmad ijænnawan, assaxa wad næddew d Ʒmæli Ʒaysa fæl ædax wa zæddigan.

¹⁹ Awa dawan-ænney æddi, ittøy-du fall-as awal n ænnæbitan s ænta a ihoran wællen d ætæwæzægzan. Ʒmazal wen, tægâm tanat tolâxat as sær-æs tæzzægzanam, tæssæxmaram-tu, fêlas iha ælmital a æn fætæla tæbilazlatat dax adag æhânat šiyyay, har d-assarrat azal, isæmmælæwlæw Ʒlmæsix imosan atri wa n tifawt iwallan-nawan. ²⁰ Arex a kawan-æssusænax tæzzar as wær t-illa awal n ænnæbitan ihân Ʒlkættaban as ifrag ænnæbi a t-id-inzæm gar-es æd man-net. ²¹ Fêlas wær t-illa awal n ænnæbitan imosan arat a d-ifalan aggadæm wala ewâl s awa ira aggadæm. Kalar Infas wa Zæddigan a d-igan dax wallan n aytedan as æmmægradan s awal a d-ifalan Mæššina.

2

Aytedan win sasaxrinen bahutan

¹ Kala ad æhan ænnæbitan æn bahu tamattay n Israyil. Ʒmmæk en dax as kawanay da a dax-wan t-æmælan musanan sasaxrinen bahu, a dax-wan du-z-æssædnen æs tækærras masnaten saxraknen, a du-tawaynen ahluk, har as ad unkaran Ʒmæli wa tan-isaddarfan; awøy-du sær-san awen ahluk æn man-nasan a fall-asan du-z-agin æzæbbi a tan-iydâran. ² A dasan-ælkæman aytedan aggotnen dax igi æn mazalan win ogarnen taxxaramt, amaran imæssæsæxra æn bahu en da a du-z-awøynen iba n ætæwæsæfrar æn tarrayt ta n tidæt. ³ Tara-nasan æddænet, a sær-san du-tawøy âs a dax-wan ayyawanan agaraw æn tænfa æs batuten a d-ænzaman. Aytedan win iræw wællen as tan-ibaz æššærixa, amaran ahluk-nasan wær iggug! ⁴ Mæššina wær iyles angalosan win æganen abakkad, kalar igar-tan dax anu wær næl-eder, tawattafan dax-as æs sassaran den da dax šiyyay har æzæl

wa n tabadday. ⁵ Aytedan win ərəwnen da, iwwiddab-tan Məššina fəl bakkadan-nasan. Mišan assaxa wa tan-ixrad ahluk s alwabil wa zəwwəran, issəfsa Nux a itamaran aytedan əs tarrayt ta n taqqat. Issəfsa deyx əssa aytedan wiyad. ⁶ Məššina ihlāk ayrəm an Sədom, əd wa n Gamora əs təmsay, har əqqalan əzəd. Iwwiddab-tan Məššina s əhluk wen fəl ad əqqalan almasal y aytedan win tu-wər-nəksud. ⁷ Mišan iğlas Lot a imosan awedan oğâdan, iğšâd ark alxal labasan ən nəmməzray win den iman-net. ⁸ Fəlas Lot aləs iğdâlan a imos, izdâğan ammas n ark aytedan win, ihannay, isallu deyx y ark aratan wər nəmməkkan win taggin əkkulluk n əzəl. Arat wen da a izzozaran iman ən Lot wəllen fəlas əwəl-net a iğdalan. ⁹ Dağ adi arat wa, issikna as Əməli issân əmmək was z'ixləs dağ jarrabatan aytedan win t-əksudnen, issân deyx əmmək was z'ittəf aytedan win tu-wər-nəksud, har d-awəd əzəl a ilkaman s ənta a daq-qan z'awwaddab. ¹⁰ Aytedan win əlkamnen y arak deranan samadasnen šixəswen-nasan, olkân taymar ən Məššina, əntanay wəllen a z'awwaddab.

Iməssəsəğra ən bahu win, olkân aytedan, əzzizwaran iman-nasan, wər əgen wala arat ən safrar i Kəl Tanaya win jənnawan, kalar takkasan-asan tarna. ¹¹ Wala angalosan, a tan-ogarnen wəllen təla ən fərregat, ogarantan təla ən tarna, da wər təkkəsan tarna dat Məššina i Kəl Tanaya win. ¹² Mišan aytedan win, wər əssenən a taggin den, wər əzlayan əd wəxsan a du-wər-nəhəw ar y ad tatarmasan, tawənyin. Aytedan win takkâsan tarna y a wər əzdayan, amaran ad agin ətəwənyaxa wa tawaggin wəxsan. ¹³ Ənta den dağ attadib wa dasan-z-itəwəggin fəl arak mazalan-nasan. Ezal a mallan ad tamazalan arak deranan-nasan. As dər-wan nəyaman dağ məgura, ad arin a kawan-takarrasan, amaran ənəxima-nasan iğšad-awan esəm wəllen. ¹⁴ Šittawen-nasan, wər tanat-iha ar tara n igi n əzzəna, faw da ərân igi n abakkad, takarrasan-du əs man-nasan aytedan win as irkam əzəgzan-nasan y a tan-səssugin ibakkadan. Aytedan win, faw da wər gəmməyan ar a əğrawan əs təməwit wər noyed, amaran təwâr-tan tulğant. ¹⁵ Əgmadan tarrayt ta tolayat, əlkaman i Balyam wa n ag Bosor, əxrakan. Balyam tara n əzrəf n alxaram a tu-tewayat s as irda s igi ən təkma. ¹⁶ Mišan ya isla y ərruxmatan fəl təmazrəyt ta iga den. Tajat fadda, a təššewalat s əməsli n aggadəm, təgdal y ənnəbi wen igi n əmazal n əmməskəl was otas igi-net den.

¹⁷ Iməssəsəğra ən bahu win, olân d enwan wər əhen aman, əd garakan təbbât təzəkkay sa əd sa. Edag-nasan

issins-asan-tu Məşşina dağ šiyyay şin ogarnen tallabəst. ¹⁸ Awalan-nasan wər nəla almaçna waliyyan, za wər ənfən wala, d arak deranan-nasan as du-takarrasan aytedan win as səket a d-əggazan tarrayt ta tolaçat, əmməzzayan-du d aytedan win əxraknen, a tan-sisuginen əzzəna. ¹⁹ Gannin-asan a tan-əkkəsan dağ təla, ənta iman-nasan as əmosan eklan n arak deranan-nasan tawaynen s əhluq. Ənta awedan kul akli a imos n arat wa t-ornan. ²⁰ Kud aytedan win əssannen Əməli-nana Үaysa Əlməsix, imosan Ənəssefsi-nana, namaggagan əd tajjarganen n əddənet, dəffər adi amaran oyyan iman-nasan əqqalan tajjarganen şin den, adi za tawarnan. Alxalat ta əggazan den təşşam-as fadda ta d-əğmadan əs tizarat. ²¹ Fəlas of-asan fadda, ad imos as wər kala ad əzdayan tarrayt ta n taçqat y ad imos as əzdəyan-tat, dəffər awen amaran ammazrayan alwajib zəddigan was dasan-itawanna a das-əlkəman. ²² Awa igrawan iməssəsəçra ən bahu win, isitadda batu ta əgan kəl awal as ənnan: «Idi as iga afşi, a t-id-iqqəl atş-ay.» Ənnan deç: «Əzubara kud das-təşşorada da, amazay wədi da a dağ z'iqqəl talaq izəggəluləz dağ-as.»

3

Arkawal ən tawaçlay n Əməli

¹ Ya imaran-in, şirawt-in ta, ənta ta n sanatat a dawan-in-əkta. Şira şin kul, gammaya dağ-asnat a dawan-agay ənnəsixa n ad tətagim ənnəzər olaçan igân s əwəl iyyanda dağ əsəssəçri wa təgrawam. Awen dağ as areç a dawan-t-id-assakta. ² Əddi ad za taktim awalan win as kala tan-əgan ənnəbitan a zaddognen. Taktim deç alwajib wa dawan-əmalan nəmmuzal-nawan. Alwajib wa, ifâl-du wa imosan Əməli, imos deç Ənəssefsi. ³ Dağ tizarat, areç ad təssənam əs dağ adan win əlkamnen, ad t-əməlan nujaban labasnen, wər nəlkem ar y arak deranan-nasan, ad tajaban dağ əzəgzan-nawan. ⁴ Ad gannin: «Inna a d-asu! Ənda ya, mas iqqal asa-du? İmarawan-nana da aba-tan, amaran wa du-tənta əddənet, wər imməttay wala dağ talça ta har əmərədda!» ⁵ Mişan aytedan win ganninen awa, ill-ay arat iyyan a din-tatawin, amaran əğmayan-in awen, a t-imosan as ijənnawan d amaçal, a irəwan wəllen a d-əxlakan. Məşşina a izammazzayan aman d amaçal s awal-net, amaran aman en da, as d-ixlak amaçal. ⁶ Aman win dağ den, as təhlik əddənet ta tərəwat, əçradan-tat alamaz. ⁷ Amaran awal wen dağ den as tawagazan jənnawan d

amaḍal har harwa da, fəl ad təwəkfin i təmsay, har d-awəd əzəl wa daɣ z'abəz əššəriɣa aytedan win wər nəksud Məššina əhləkan.

⁸ Dər iga awen da ya, ill-ay arat iyyan as a t-in-wər-tattawim, imaran-in, a t-imosan as: Ƴur Əməli, əzəl iyyanda wər izlay d əgim n awatay, amaran agim n awatay wər əzlayan d əzəl. ⁹ Əməli wər isəlulit əsəndi n arkawal, awa əɣilan aytedan wiyyad. Təh-ay təzaydart wəllen y-awan. Wər ira ad ihlək awedan waliyyan. Kalar a ira ad utaban aytedan kul. ¹⁰ Əzəl wa ilkaman, a d-agu assa wa d-itaggu abaydag. Əzəl wen, ad təɣrəd təmsay ahluk n awa ihan ijənnawan kul, iba tamayyamayt ən jənnawan, iddew awen d əməsli iknân tallabəst, ikšəf amaḍal d awa fall-as itawamazalan kul fəl ad təwəxxəman. ¹¹ Dad zamas aratan win kul ad əɣrədan ahluk, wədi əssənat ənnuɣ n anamod was kawan-iwâr a das-təlkəmam daɣ təməddurt-nawan. Iwâr-kawan ad tagim alxal zəddigan wa ira Məššina, tiksadam-tu, ¹² awen agiwat-tu təssigadam, tədgâzam daɣ a d-awəd əzəl a ilkaman, imosan əzəl a daɣ za bələgləgan jənnawan, ibələgləg deɣ awa tan-ihan kul, əlyəman. ¹³ Nəqqâl y ad t-əməlan jənnawan d amaḍal aynaynen, a daq-qu z'iməl əššəriɣa oɣadan, imos as awen daɣ as danaɣ-iga Məššina arkawal-net.

Aholan win əlkamnen

¹⁴ Daɣ adi imaran-in, daɣ əsəgəd wa təgam da, ədgəzat wəllen, daɣ agamay n a kawan-d-asu Əməli təzəddigam, wər təlem a imosan əlyib, təssibdadam awa imosan alxer gar-ewwan əd Məššina. ¹⁵ Agiwat iduf n as təzaydart n Əməli-nana, ənta a təmosat efsan-nawan. Arat wədi amadray-nana n əməri-nana Buləs da imâl-awan-tu daɣ širawt-net, əs masnat ta t-ikfa Məššina. ¹⁶ Awen daɣ a itaggu daɣ šira-net kul šin daɣ iga batu ta. Šira šin, əhân-tanat daggan as izzəwat əgərri-nasan. Idaggan win, safraxan-tan aytedan win aljahilan, as irkam əzəgzan-nasan, awa taggin y Əlkəttaban win hadatnen, amaran awen hallakan sər-əs iman-nasan.

¹⁷ Ya imaran-in, dad zamas təgrâwam isalan, ənkədat wəllen, fəl ad wər təlkəmam y əxruk wa əgan aytedan win wər nəksud Məššina, fəl ad wər tammazzayam d əsəggətəkki wa təgam daɣ əzəgzan-nawan. ¹⁸ Kalar are daɣ-wan ad təššitim əzəzzəwi daɣ arraxmat ta təgrawam, əd masnat ən Ƴaysa Əlməsix, s ənta Əməli-nana n Ənəsəfsi-nana. Ənta a ilan tanaya əmərədda, il-et deɣ har faw. Amin!

Şirawt ta tazzarat iktab Yaxya

Təzugəst ən salan

¹ Nəkattab-awan-in isalan ən wa imosan awal ihakku tēməddurt. Awal wa ill-ay dat ənətti n əddənət: nəsl-as nənay-tu əs şittawen-nana, nəzigəzd-ay, amaran ədâsan-tu fassan-nana. ² Wa imosan tēməddurt, itawasanafalal-du nənay-tu nəggəyat-as, amaran nəmmâl-awan tēməddurt ta təxlalat tas kala təlla xur Abba. Tēməddurt ta əmərədda tətawasanafalal-ana-du. ³ Tidət a imos as arət wa nənay əd was nəsla nəmâl-awan-tan, fəl ad təqqələm kawanay da aytedan a dər-na ərtaynen. Tartəyt ta tidət a imos as nəg-et əd Məşşina Abba-nana əd Barar-net Yaysa Elməsix. ⁴ Aratan win wər dawan-tan-in-nəkəttəb ar fəl ad tandu tədəwit-nana.

Məşşina ənnur a imos

⁵ Əntanay da isalan ən Yaysa Elməsix win as nəsla, nətagg-awan-tan: Məşşina ənnur a imos, wər t-ihə a imosan şiyay.

⁶ Kud a nənna nərtay dər-əs amaran nəgla nəjiwankat dağ şiyay, wədi nakkanay inəsbuha, wər nəlkem y arət wa dana-iwaran imosan əmazal əs tidət. ⁷ Mişan as nəjiwankat dağ ənnur s ənta a ihə Məşşina iman-net, wədi nərtây, amaran azni ən barar-net Yaysa izzizdag-ana dağ id t-illa abakkad.

⁸ As nənna wər dana-iwer abakkad waliyyan wədi bahu a nətaggu i man-nana, amaran wər təha tidət iwallan-nana. ⁹ Mişan as wər nənku ibakkadan-nana, dad zamas imos alğadil, oğâd, wədi a danaq-qan-issurəf, izzəzdəg-ana dağ arət wər noğed kul wa nəmmoza. ¹⁰ As nənna wər nəgə abakkad waliyyan wədi əsəbbəhəw a nəgə Məşşina, amaran awal-net wər ihə iwallan-nana.

2

¹ Bararan-in arət wa əkattabağ-awan-t-in fəl ad wər tətəggim ibakkadan. As iqqal as iga iyyan dağ-wan abakkad wədi nəla almawakkil xur Abba a t-imosan Yaysa Elməsix s ənta a oğadan, ² fəlas iman-net a ikfa iqqal takutay ta təmmasat ibakkadan-nana. Amaran wərgəx ibakkadan win-nana xas kalar harkid win aytedan kul.

Ammar irəwan aynay

³ Ənta da arət wa dana-z-issusənan as nəssân-tu: Ad nətamazal arət kul was danağ-omar. ⁴ As inna awedan

issân-tu ãnta amaran wër itëmizil arat was omar, awedan wëdi anasbahu a imos isitaddan as wër tãha tidët iman-net. ⁵ Mišan wa itamazalan s awal-net wëdi tãnifalal daɣ-as tara ãn Mëššina tëkmâlat. Ænta da æmmæk was nëssan as nærtay d Ælmësix:

⁶ Wa innan iha Ælmësix iman-net iwâr-tu igi ãn tëmëddurt ta iga Ælmësix. ⁷ Imaran-in ammar wa wër imos arat aynayan a dawan-in-kattaba, ammar awa wanad da irëwan a, tëgrâwam harwa daɣ tizarat imosan isalan win as tëslam. ⁸ Dër iga awen da ya ammar wa dawan-in-kattaba da aynay. Šinaya-net tëtawahannay daɣ Ælmësix, tëtawahannay deɣ daɣ-wan, fëlas šiyay a tamattatnen itimëlëwlëw d ænnur wa n tidët.

⁹ Wa innan iha ænnur ãnta ikyad amadray-net wëdi harwa da iha šiyay. ¹⁰ Wa iran amadray-net wëdi ænnur a iha, amaran dad zamas iha ænnur wëdi wër tu-tëlla tësënkëft a tu-za-taggdalit. ¹¹ Mišan wa ikyadan amadray-net wëdi šiyay a iha, ijiwankat daɣ-asnat, wër issen sas idag fëlas sidaryalnat-tu.

Æddënet æd zënga n Ælmësix

¹² Bararan ækattabaɣ-awan-in as: ibakkadan-nawan ætiwasarafan-awan s æssëbab n arat wa iga ɤaysa Ælmësix. ¹³⁻¹⁴ Bararan, kattabaɣ-awan-in fëlas tëssânam Abba.

Abbatan ækattabaɣ-awan-in fëlas tëssânam wa t-imalan harwa daɣ tizarat.

Tëmëdrëyt, ækattabaɣ-awan-in arat wa fëlas assahat a tëgam daɣ tarrayt ta n Mëššina tornâm ælxëkum n Iblis.

¹⁵ Ad wër tirem æddënet wala tirem arat a tat-ihan tëllay. As ira awedan æddënet tara ta n Abba wër tu-za-tëggëz. ¹⁶ Fëlas aratan kul win æddënet, a tan-imosan: tara ãn man, tara n æddënet, zazwar ãn man wa du-tëtaway tëgërgist, aratan win kul wër d-æfelan Abba, kalar in æddënet. ¹⁷ Æddënet d ætëwëra-net ad æyrëdan, mišan win ælkammen i tara ãn Mëššina ad æɣlësan har faw.

¹⁸ Bararan-in tilkamat n assayät tënta. Tëslam as a d-asu awedan imosan azangaw n Ælmësix. Æmërëdda aytedan aggotnen a d-osanen æmosnen izënga-net. Arat wa da a danaɣ-issosanan as tëmastant tënta. ¹⁹ Aytedan win æmosnen izënga n Ælmësix nakkanay a da din-ægmadan, mišan wër æmosan arat daɣ-na. Fëlas ænnar t-æmosan wër dana-z-ægmadan. Mišan æfalan-ana fël ad igmëd aššak as wër æmosan arat daɣ-na. ²⁰ Amaran kawanay ikf-iwan Infas wa Zëddigan tarna s ãnta a kawan-tëkfät ketnawan masnat n arat kul wa imosan tidët. ²¹ Wërgëɣ fëlas wër tëssenam tidët a fël dawan-in-kattaba, kalar fëlas tat-tëssanam, tidët amaran wër t-illa bahu a tat-du-z-igmëdan.

²² Dağ adi ma imosan anasbahu ar wa inkuran as Ƴaysa a imosan Ɣlməsix? Wədi ənta a imosan azangaw n Ɣlməsix, inkuran Abba əd Barar. ²³ I inkuran as Ƴaysa a imosan Barar wədi Abba da wər t-iqbel, amaran wa iqbala Barar, wədi Abba da iqbâl-tu.

²⁴ Adi da fəlas sənnəhəlat iduf ən salan win təgrawam dağ tizarat. As təqlam təttafam arat was təslam dağ tizarat wədi har faw tərtayam əd Barar d Abba. ²⁵ Amaran ənta da arkawal wa dawan-iga Ɣlməsix: A kawan-akfu təməddurt ta təqlalat.

²⁶ Aratan win kattabağ-awan-tan-in fəl əddəlil n aytedan win gammaynen d əsəxrək-nawan. ²⁷ Amaran kawanay tarna n Infas wa Zəddigan ta təgrawam çur Ɣlməsix, tahiwan. Dağ adi wər təddəraram s ətəwəsəsəğra fəlas tarna tədi da a kawan-təsasaxrit arat kul. Arat wa təsasaxru tidət a imos, fəlas wər tətəggu bahu. Nəmənəkət dağ esəm ən Ƴaysa s əmmək was kawan-isassaxra Infas wa Zəddigan.

Bararan ən Məşşina

²⁸ Bararan-in akniwat tassağ d Ɣlməsix, əddi as du-z-inəfiləl da nəkkəs aşşak fəl man-nana, wər dər-əs nənammaggag, wər nəkarakad çur assa-net. ²⁹ Təssânam as Ɣlməsix ənta a oğadan, dağ adi awedan kul wa itamazalan awa oğadan, wədi irtây d Ɣlməsix imos deç barar ən Məşşina.

3

¹ Təhannayam as awa dana-iga Abba da tara a danaç-itawannan bararan ən Məşşina. Amaran nəmos-tan. Əddənət wər dana-təssen, fəlas wər təssen Ɣlməsix.

² Imaran-in nakkanay əmərədda bararan ən Məşşina a nəmos, amaran arat wa za nəqqəl dəffər awa harwa da wər dana-d-inafalal. Nəssân ças as Ɣlməsix as du-z-inəfiləl nola dər-əs, fəlas anay a tu-za-nagu ənta iman-net. ³ Aytedan win əganen attama wa, win di əzzizdagan iman-nasan s əmmək as zəddig Ɣlməsix.

⁴ Wa igan abakkad wədi immizray əşşəriça ən Məşşina fəlas abakkad almaçna-net əməzrəy n əşşəriça. ⁵ Amaran təssânam as Ɣlməsix osa-du fəl a fall-anax ikkəs ibakkadan. Ənta iman-net wər kala a tan-iga. ⁶ Dağ adi wa dər-əs irtayan iməzzay d igi ən bakkadan, mişan wa tan-itaggin wədi wər issen Ƴaysa za wər igra awa imos.

⁷ Bararan-in a tu-wər-iməl awedan a kawan-issəxrakan. Awedan wa oğadan ənta a izalalaxan dağ tarrayt, s əmmək as oğad Ɣlməsix. ⁸ Wa itaggin ibakkadan Iblis as ilkam fəlas Iblis çur ənətti ad iggaz şin igi ən bakkadan. Amaran Barar ən Məşşina osâ-du fəl ad izzərəz əşşəğəl n Iblis. ⁹ Awedan

kul wa imosan barar ən Məşşina wər itəggu ibakkadan fəlas tēməddurt ta du-təfalat Məşşina təha iman-net. Wər ifreg igi ən bakkadan fəlas barar ən Məşşina a imos. ¹⁰ Ənta da arat wa izlayan bararan win Məşşina əd win Iblis: Aytedan kul win wər nətəmizil awa oğadan, wər əren dey imədrayan-nasan win əzzəgzannen s Əlməsix. Aytedan win di əntanay a əmosnen bararan win Iblis.

Tara gər mədrayan dağ əzəgzan

¹¹ Təkittəwam isalan win as təslam harwa dağ tizarat əmosnen əs: «Nəmərətana gar-ena!» ¹² Dağ adi a dana-wər-iggəz i igân awa iga Kayin, ilkaman y Iblis iga iman n amadray-net. Mafel za itagg-en? Iga iman n amadray-net fəlas alxal-net a wər noyed amaran wa n amadray-net oğād.

¹³ Dağ adi imədrayan-in, a dawan-wər-iqqən eğaf as tətıwakyadam dağ əddənet. ¹⁴ Nakkanay nəssân as nəgmâd-du tēmattant əs tēməddurt təzrâyat fəlas imədrayan-nana dağ əzəgzan a nərə. Awedan wa wər nərə amadray-net dağ əzəgzan, wədi harwa da ənəmmettən a imos. ¹⁵ Awedan wa ikyadan amadray-net dağ əzəgzan, wədi əməggi ən man a imos, amaran təssânam as əməggi ən man wər das-tu-təlla tēməddurt ta təğlalət. ¹⁶ Tehakkay ta iga Ƴaysa iman-net fəl əddəlil-nana, ənta a dana-təssosanat awa təmos tara. Nakkanay da iwâr-anay ad nakfu iman-nana fəl əddəlil ən mədrayan-nana dağ əzəgzan. ¹⁷ Awedan n əməggergəs inayan amadray-net dağ əzəgzan iddiraran izazzandar-tu, manəmmək as z'itəwənnu təha tara ən Məşşina əwəl-net? ¹⁸ Bararan-in ad wər təqqəl tara-nana arat ihân imi Ƴas, kalar tamazalat-tat əs tidət əs mazalan a tat-sinafalalnen.

Ikus n aşşak fəl man-nana Ƴur Məşşina

¹⁹ Təməwit ta da as nəssan as aytedan əlkâmmen i tidət a nəmos, dağ adi wər danağ-işşəwaş wala dat Məşşina, ²⁰ kudde tihammen-ana wallan-nanay arak əmazal. Fəlas Məşşina oğar iwallan-nana, amaran issân dağ arat kul. ²¹ İmaran-in, as dana-wər-tahammen wallan-nana arak əmazal, wədi nəkkəset aşşak fəl man-nana Ƴur Məşşina. ²² Arat kul wa dağ-as nəgmay a danağ-q-akfu fəlas alwajiban-net as nəlcam, amaran nətamazal awa das-igrazan.

²³ Ənta da arat was danağ-omar: Ad nəzzəgzən s esəm ən Barar-net Ƴaysa Əlməsix nənəmərü gar-ena s əmmək was danağ-omar. ²⁴ Awedan wa ilkaman i tənna ən Məşşina wədi Məşşina iha iman-net. Ma danağ-issosanan za as iha iman-nana? Adi za İnfas wa Zəddigan wa danağ-ikfa.

4

Mas za næssan wa d-ifalan Məşşina

¹ Ænkədat imaran-in, ad wər təzagzanam y i d-iggadan kul inna Məşşina a t-id-izammazalan, kalar jarrabat-tan təzzar har tæssanam daɣ-san win d-izammazal Məşşina, fəlas ənnəbitan ən bahu aggotnen a əhanen əddənet. ² Ænta da əmmək was za tæssanam awedan wa d-issəgla Infas wa Zəddigan: Awedan kul wa iqbalaŋ as Ƴaysa Ælməsix osâ-du əddənet iha taɣəssa n aggadəm wədi Infas wa Zəddigan t-id-izammazalan. ³ Mišan awedan kul wa inkuran Ƴaysa wədi wər t-id-izammazal Məşşina. Awedan wədi əmagzar n Ælməsix was təslam âs a d-asu a t-id-izammazalan. Æmagzar n Ælməsix wədi iha əddənet əmərədda.

⁴ Kawanay bararan-in, Məşşina a kawan-ilan amaran tornâm ənnəbitan ən bahu win, fəlas wa dər tørtayam ogar wa işɣalan y əddənet. ⁵ Æntanay kəl əddənet a əmosan. Adi da a fəlas batuten šin n əddənet a taggin, amaran sasaman-asan aytedan. ⁶ Nakkanay Məşşina a dər nərtay; awedan wa issanan Məşşina isasam-ana, wa tu-wər-nəssen amaran wər danaɣ-isəsim. Æmmək wa da as za nəfrəg zələyat gər awedan wa d-izammazal Infas wa Zəddigan əd wa d-izammazal əməssexrək.

Məşşina tara a imos

⁷ Imidawan-in ən maran-in nəməratana gar-ena fəlas tara Məşşina a du-təffal. Awedan wa təha tara, barar ən Məşşina a imos amaran işşân-tu. ⁸ Wa wər təha tara wər işsen Məşşina fəlas Məşşina ənta tara. ⁹ Ænta da əmmək was dana-isannafalal Məşşina as ir-ana: Barar-net an iyyanda a d-issoka əddənet fəl a sər-əs nəgrəw təməddurt taynay. ¹⁰ Ænta da awa təmos tara: Wərgəɣ nakkanay a issəknan Məşşina tara, kalar ənta a danaq-qat-issəknan issoka-du Barar-net əddənet fəl ad iqqəl takutay təmmasat ibakkadan-nana.

¹¹ Imaran-in, dad zamas Məşşina ig-ana tara togdât d awa wədi nəməratana gar-ena nakkanay da. ¹² Məşşina wər kala ad t-inay awedan. Mišan kud nənimara gar-ena wədi iha iman-nana, tənifalal-du daɣ-na tara-net əs təməwit təkmâlat. ¹³ Infas-net wa Zəddigan a danaɣ-ikfa, a di da a danaɣ-issosanan as nərtay dər-əs iha iman-nana. ¹⁴ Abba issigla-du Barar-net fəl ad iqqəl Ænəssefsi n əddənet. Nənây-tu əs šittawen-nana, nətagayyat deɣ awen.

¹⁵ I innan s əwəl iyyanda Ƴaysa Barar ən Məşşina a imos, wədi Məşşina iha iman-net, amaran irtây əd Məşşina. ¹⁶ Nakkanay nəssân daɣ tara ta danaɣ-iga

Məşşina nəzzigzan-tat deyx. Məşşina tara a imos. Was təha tara iman-net irtây əd Məşşina iha Məşşina iman-net.

¹⁷ As du-təga tara ta ənəfilal ikmâlan dağ wallan-nana, ad nəkkəs aşşak fəl man-nana əzəl wa n tabadday, fəlas təməddurt-nana dağ əddənet a tolat əd ta n Əlməsix.

¹⁸ Tara wər tərəttəy əd təksəda, fəlas tara təkmâlat asatay a tətəg təksəda. Dağ adi wa taha tasa wər dağ-as təkmeł tara fəlas tasa mərda ən tazak n əttađib a təmos.

¹⁹ Nakkanay təha tara iwallan-nana, fəlas Məşşina a danağ-iran əstizarat. ²⁰ As inna awedan ənta ira Məşşina amaran ikyad əmidi-net, awedan wədi anasbahu. Fəlas wa wər nara əmidi-net ihannay manəmmək as z'iru Məşşina a wər ihənnəy? ²¹ Alwajib da wa dana-d-oyya Əlməsix: I irân Məşşina, iret əmidi-net.

5

Əzəgzan təgəyya ən Məşşina

¹ I izzəgzanan as Ƴaysa ənta Əlməsix wədi barar ən Məşşina a imos. I iran əmaraw, ad iru bararan-net.

² Əntada awa danağ-issosanan as nərə bararan ən Məşşina: Tara a nəga Məşşina nəlkâm y alwajiban-net. ³ Tara ən Məşşina ləkkum y alwajiban-net, amaran alwajiban ən Məşşina wər əmosan əzuk, ⁴ fəlas bararan ən Məşşina kul ornan əddənet, amaran tarna ta təğlabat əddənet tədi əzəgzan-nana.

⁵ Ma imos za wa ornan əddənet? Adi za awedan wa izzəgzanan as Ƴaysa Barar ən Məşşina a imos. ⁶ Ƴaysa osâ-du əddənet, itawasalmağ dağ aman, azni-net deyx inğal fəl təgəttawt, dağ adi wərgəğ aman Ƴas as d-inafalal, kalar aman d əzni as d-inafalal. Infas wa Zəddigan a isattaddan arat wa, Infas wa Zəddigan amaran tidət a imos. ⁷ Dağ adi karadat təgəyyawen a t-əllanen əmosnen:

⁸ Infas wa Zəddigan d aman d əzni, amaran ketnasnat fəl karadatesnat nimannaknat əs təgəyya ta. ⁹ As əggəyen aytedan fəl arat ad nəqbəl təgəyya-nasan. Mişan təgəyya ta n Məşşina ənta a zəwwərat, amaran ənta a iga i Barar-net. ¹⁰ Wa izzəgzanan əs Barar ən Məşşina, ənta da təha təgəyya ta iman-net. Wa wər nəzzəgzan əs Məşşina wədi əsəbbəhəw a t-iga, fəlas əzəgzan a wər iga təgəyya ta iga Məşşina fəl Barar-net.

¹¹ Ma təsətadda təgəyya ta? Təsitadda as Məşşina ikfana təməddurt ta təğlalət, amaran təməddurt ta ənta a du-təğmadat Barar-net. ¹² Wa izzəgzanan əs Barar ən Məşşina iğrâw təməddurt ta, wa sər-əs wər nəzzəgzan wər tat-igrew.

Əzəgzan igmâd aşşak

¹³ Aratan win əkattabağ-awan-tan-in fəl ad təssənəm as təgrâwam tәмәddurt tәxlâlat, kawanay a əzzəgzannen s ešəm ən Barar ən Məššina. ¹⁴ Ənta da əmmək was nəkkas aššak fəl man-nana ɣur Məššina: As dağ-as nəğmay arat inimannakan əd tara-net wədi issisam-ana. ¹⁵ Amaran dad zamas nəssân as issisam-ana wədi arat wa dağ-as nəğmay nəssân as nəgrâw-tu.

¹⁶ As inay iyyan dağ-wan amadray-net dağ əzəgzan itaggu abakkad a tu-wər-nəššətša i təmsay, igməyet-as dağ Məššina a das-issurəf. Aytedan as ganna win tagginen ibakkadan win wər nəšətšu əs təmsay. Mišan ill-ay abakkad wa itawayan əs təmsay, amaran wərgəx ənta as dawan-ənneɣ ad tətteram i wa t-igan. ¹⁷ Tidət as iba n aqqad abakkad a imos, mišan wərgəx ibakkadan kul šatšin əs təmsay.

¹⁸ Nəssân as bararan ən Məššina wər gəllin taggin ibakkadan, fəlas Barar ən Məššina a tan-ogazan. Adi da fəlas wər dağ-san ifreg Iblis wala. ¹⁹ Nəssân as nakkanay Məššina a danağ-ilan, amaran əddənət ketnet innoda dağ-as Iblis. ²⁰ Nəssân as Barar ən Məššina osâ-du, amaran ənta a danağ-ikfan əgərri fəl ad nəssən Əməli wa n tidət, amaran nərtây d Əməli wa n tidət əs tarrayt ən Barar-net Ƴaysa Əlməsix. Ənta a imosan Əməli wa n tidət ihakkan tәмәddurt ta tәxlalat.

²¹ Bararan-in agəzat iman-nawan dağ əssənəman.

Širawt ta n sanatat iktab Yaxya

Šihulawen

¹ Awa nak amȳar a din-ihulan Ǝlkənisat ta tənnəfranat əd bararan-net. Areq-qawan əs tidət, amaran wərgəy nak yas a kawan-iran, aytedan kul win əssannen tidət aran-kawan. ² Nar-iwan fəlas tidət a təhat iman-nana, wər tan-təgəmməd har faw. ³ Ǝgmaya daɣ Məššina di n Abba əd Barar-net Ǝaysa Ǝlməsix a danax-ikfan arraxmat əd təhanint, d alxer, attaddin daɣ-na əs tidət əd tara.

Təməddurt ta təlkatat i tidət

⁴ Ǝkneɣ təfalawist wəllen as əsleɣ as wiyyad daɣ bararan-nam əzilalaxan daɣ tarrayt ta n tidət s əmmək was dana-omar Abba-nana. ⁵ Ǝmərədda, Ǝlkənisat, ənta da arat wa daɣ-am gammaya: ad nənəmərü gar-ena. Wərgəy alwajib izrayan a dam-in-əktaɣ da kalar alwajib awa nəgraw harwa ɣur ənətti. ⁶ Tara almaxna-net ad nəzəluləɣ daɣ alwajiban ən Məššina. Ǝnta da da alwajib was za təlkatam s ənta as təslam harwa ɣur ənətti.

⁷ Iməssəxrak aggotnen əwizawazan daɣ əddənət. Ma imosan za əməssəxrək n aytedan imos deɣ azangaw n Ǝlməsix? Adi za wa inkuran as Ǝaysa Ǝlməsix osâ-du əddənət imos aggadəm. ⁸ Daɣ adi ənəkədat əd man-nawan fəl ad wər təsəbbənənam əššəɣəl-nawan. As təgam ənəkud wa ad təgrəwam aroz-nawan indân.

⁹ Awedan kul wa inamaggagan d əsəssəɣri n Ǝlməsix wədi wər irtay əd Məššina. Amaran wa iglan ittâf əsəssəɣri wa, wədi irtây d Abba əd Barar-net. ¹⁰ As kawan-d-osa awedan d əsəssəɣri iyyan wər nəmos wa, a tu-wər-təqbəlam, amaran a das-wər-taxim assalam fadda. ¹¹ Fəlas i das-oɣan assalam wədi inimannak dər-əs daɣ arak mazalan-net.

Šihulawen šin əlkamnen

¹² Ǝllan-tu aratan aggotnen as areɣ a dawan-tan-in-annaɣ mišan s a wər nəmos akatab ən širawt əs taddawat. Ǝssofaɣ a kawan-in-asax iman-in annax-awan-tan s əmi d əmi fəl ad təkmləl təfalawist-nana. ¹³ Ǝhulan-kawan-in bararan ən təmidit-nawan ta tənnəfranat.

Širawt ta n karadat iktab Yaxya

Šihulawen

¹ Awa nak amyar a din-ihulan əməri-nin Gayəs arex əs tidət. ² Əməri-nin əsidaranax-ak təttəyt dəx anamod kul, d assahat ən təxəssa-nak zun ta təge dəx əzəgzan-nak. ³ Əknəy təfalawist wəllen y assa wa di-d-əgan mədrayan-nana dəx əzəgzan, əmalan-i ənəfilal wa du-təga tidət dəx təməddurt-nak d əzəluləx wa dəx-as təge. ⁴ Wər t-illa a di-igân əsəffəliwəs ewadan wa di-iga ad aslay as bararan-in əlkâman i tidət.

Ənəmännak d əməzrəy

⁵ Əməri-nin tətamazala s alyadala dəx arat kul wa tətəgga i mədrayan-nana dəx əzəgzan, wəllen win dak-əmosnen inaftaxan. ⁶ Əntanay dak-əggəyatnen dat Əlkənisat fəl tara ta kay-təhat. Ad tagəy arat olağan as dasan-təsamatəga əşikəl-nasan s əmmək wa igrazan i Məššina.

⁷ Fəlas wər imos əşikəl-nasan ar igi ən salan n Əlməsix, amaran wər əgmayan wala dəx aytedan win wər nəssen Məššina. ⁸ Dəx adi nakkanay a iwar ad nədhəl aytedan ən šilat ən win di fəl a dər-san nənəməşxəl dəx tarrayt ta n tidət.

⁹ Kala a din-əktabəx arat ən širawt gəzzulat y Əlkənisat mišan Dəyodrefəs irân a dasan-azzâr dəx arat kul, wər iqbel a danax-in-igmâdan. ¹⁰ Adi da a fəlas as din-osex a dawan-agəy isalan n aratan win immozal, əmosnen arak awalan win sər-nəy itaggu. Amaran wər das-igda awen yas, fəlas tugəyt a iga s ad issəgən i mədrayan-nana dəx əzəgzan əmosnen iməššukal, igdal dəx y aytedan a tan-səmməguren, istaq-qan dəx Əlkənisat. ¹¹ Əməri-nin tələl awa olağan, wərgəx awa labasan. Awedan wa itaggan a olağan ənta a irtəyən əd Məššina, wa itaggan awa labasan wər issen Məššina.

¹² Dəx batu ta n Demetrəyəs aytedan kul əgân fall-as təgəyya tolağat, amaran tidət tas ilkam, iman-net as fall-as təgəyyat. Nakkanay dəx nəga fall-as təgəyya tolağat, amaran təssânaş as təgəyya ta-nana ənta tidət.

Šihulawen šin əlkamnen

¹³ Əllan-tu aratan aggotnen as arex a dak-kan-in-annay mišan s a wər nəmos akatab ən širawt əs taddawat,

¹⁴ fəlas əknêx mərda n a kay-ənəya tarmad fəl a dak-kan-anna s əmi d əmi. ¹⁵ Əgmâya dağ Məşşina, a fall-ak d-izazzabben alxer. Əhulan-kay-in midawan-nana. Təhulağ-in imidawan-nana, əkkulluk n iyyan təmalax-as.

Širawt ta iktab Yuday

Šihulawen

¹ Širawt a din-təfalat Yuday, imosan akli ən Ҳaysa Elməsix, imos deḡ amadray ən Yaḡub. Əhulax-in aytedan win iḡra Məššina di n Abba, ir-en, ogâz-tan y əzəl wa du-z-iqqəl Ҳaysa Elməsix. ² Məššina ya təgeḡ-awan tehakkay təkmâlat i təhanint-net d alxer-net əd tara-net!

Batu ta daḡ təmməgrad širawt ta

³ Ya imaran-in, ədgâza wəllen daḡ a dawān-in-əktəba daḡ batu n efsan win nəgraw ketnana. Əmərədda amaran ənayax as ilzâm-i a dawān-in-əktəba fəl a daḡ-wan əgməyax ad tabballanam fəl əzəḡzan wa ikfa Məššina i win iskat i man-net. Ig-asan y as tehakkay iyyadda, ⁴ əkattabaḡ-awan-in fəlas aytedan wər nəksud Məššina a kawan-əggaznen daw amaḡal. Safraxan əmazal iqqalan arraxmat wa dana-d-issoka Əməli-nana Məššina, fəl ad əgrəwan tarrayt n ad ammazalan aratan win ogarnen taxxaramt. Ənkuran deḡ Əmakraz-nana n Əməli-nanax an iyyanda a t-imosan Ҳaysa Elməsix. Ark aytedan win, a irəwan wəllen ad əmalan Əlkəttaban attadıb wa dasan-z-itəwəḡgin.

Iməssəsəyra win bahu

⁵ A kawan-d-assaktaḡ aratan as ketnawan təkittəwamtan. Aktiwat ikus n Əməli tamattay-net daḡ Masar a daḡ təha əkkəlu, dəffər adi ihlak win uḡaynen s a sər-əs əzzəḡzənan. ⁶ Aktiwat əlqissat n angalosan win as wər təḡda tarna ta əgrawan, əgmadan edaḡ was kala ad t-əhan. Awen a fəl tan-iwaḡ Məššina daḡ adag a daḡ tiwagazan har faw, əqqânan, əhân šiyyay har əzəl maqqaran wa ilkaman. ⁷ Aktiwat-du əlqissat ən Sədom əd Gamora əd xərman win tan-əhoznen. Əntanay da zund əmmək en daḡ as əgan ibakkadan əmosnen əzzəna, gammayan deḡ igi n əzzəna əd təxəllak šiyyad. Əmərədda taḡazzaban daḡ təmsay təylâlat, fəl ad əqqəlan almasal.

⁸ Əssənat as əhan-kawan aytedan əddi da tagginen targəten, taggin imazalan zun win nəmal əddi. Targəten šin den nazḡaman-tanat-du fəl ad əlkəman y arak deranan ən təḡəssa-nasan, olkan taḡmar n Əməli taggin alfawaxišan daḡ batu n angalosan əlanen tanaya. ⁹ Wala Mikayil s ənta a imosan əmənokəl n angalosan da assaḡa wad imməstan

d Iblis day batu ən təxəssa ən Musa, wər ihel šikəggarnet. Kalar tənna xas a das-iga: Awwaddabet-kay Əməli!
¹⁰ Ark aytedan win amaran, takaggaran i wər əzdayan fadda. Amaran arat wa əssanan, əgân-as masnat zun ta n mudaran a wər nəla əgərri, ahluk xas a tan-z-agu.

¹¹ Iket alyazab ad t-agin! Fəlas ləkkum a əgan i tarrayt ta n Kayin. Tara n a əgrawan a sər-san dutewayat as oyyan iman-nasan əggazan alxata olân əd wa n Balyam. Ad əxrədan ahluk fəlas əgan əfəlləg zun wa iga Quray. ¹² Awalla olân əd təkmauwen əllanen daw amaɖal. Taggazan-kawan day tədrəwt ta tətəggim imensewan gərwəwan kawanay a n əlməsixitan. Tattin s igət, wər əlen təkarakit, wər kəttəwan ar iman-nasan. Olân deyd əgnəwan wər iha akonak ibbat-tan aɖu. Olân harwa da d eškan as d-ewad alwaq n ara-nasan wər tan-iha ara waliyyan, tiwalbayan-du əd kewan-nasan, əknân taɣart. ¹³ Əgân arak mazalan-nasan əmosnen təkarakit olân əd fənɣalan win iggar agarew əs təšəšwit-net. Olân d etran itaway aɣaf wər əssenən is ədagan, əqqiman day šiyyay šin oğarnen har faw.

¹⁴ Əntanay da təqqal-tan batu ta iga ənnəbi Xenok, imosan ahaya wa n əssa n Adəm. Inna sər-san: «*Ənəy, Əməli a d-asu iddew əd təmərwen ən gimən n angalosan,*
¹⁵ *fəl ad işrəx y əddənet ketnet. Ad issəbdəd aytedan kul fəl mazalan wər noyed win əgan əmosnen iba n təksəda ən Məššina. Ad issəbdəd deyd inasbakkadan fəl ikus wa əgan tarna y esəm-net.*»

¹⁶ Aytedan win, wər əlen igda, faw əššakan awa tanigrawan, əlkâman y arak deranan-nasan. Taggin batuten əmosnen ibaragan, əmmalan aytedan imos awen agamay n a əgrawan.

Awal ən nəmmuzal d ənnəsixa

¹⁷ Mišan kawanay ya imaran-in, aktiwat awa əmalan nəmmuzal n Əməli-nana Ƴaysa Əlməsix. Arat wa harwa da wər iga as t-əmalan, a t-imosan ¹⁸ as dawan-ənnan: «Day azzaman win əlkəmnen, ad t-əməlan ark aytedan ən nujaban a z'əlkəmnen y arak deranan-nasan.» Awa taggin aytedan win issikna as wər əksudan Məššina. ¹⁹ Əntanay əddi da aytedan win zamazzaynen əlməsixitan. Wər əlkəman ar i tara ən man-nasan, wər tan-iha Infas wa Zəddigan.

²⁰ Mišan kawanay ya imaran-in, səssuhətat əzəgzanəwan a day təsihəddam fəl əsəssəxri ittiddan zəddig, ad tətattaram əs tilalt n Infas wa Zəddigan. ²¹ Zəzzəwətat day tara ən Məššina. Agiwat attama-nawan day Əməli-nana

Ŷaysa Ɛlməsix, a dawan-ihənəttət, akf-iwan tēməddurt ta təxlalat. ²² Hənəttətət y aytedan win as iha aššak əzəgzan-nasan. ²³ Safsiwat win dəx togazam arat təkəkəsam-tan-du dəx təmsay. Win hadatnen amaran hənəttətət-asan a daq-qan təkəsudam, takədam əd wala šibəddax-nasan fəlas simadəsan-tanat bakkadan-nasan.

²⁴⁻²⁵ Agiwatana təmmalen i Məššina di n iyyan s ənta a danax-issəfsan əs tarrayt n Ɛməli-nana Ŷaysa Ɛlməsix! Ənta a ifragan agadal y-awan ad təfətəqqəm dəx igi ən talbast. Ifrāg a kawan-agu aytedan as tu-wər-illa i ifragan a dəx-san d-inəy ark arat, taknim təfalawist fəlas tərtāyam dər-əs dəx tanaya-net. Ənta a ihoran əd tanaya d ədkul əd tarna əd taɣmar, har faw, gər dəx azzaman win okaynen, wala əmərədda, wala awa d-izayan! Amin!

Elkəttab wa n Ənəfilal İsənti d assalaman

İsənti

¹ Elkəttab wa tidət təybârat a mosan salan win t-əhanen, amaran Ƴaysa Əlməsix a tan-isannafalalan. Məşşina a t-issosanan dəx tidət ta, fəl ad assaknu inaybidan-net aratan a z'aginen dəx azzaman wər nəggug. Ƴaysa Əlməsix a issosanan aratan win y ənəybid-net Yaxya s əsuki wa t-id-iga angalos-net. ² Arat kul wa inay Yaxya da, illikan as awal ən Məşşina a imos, illikan dəx as təgəyya ən Ƴaysa Əlməsix a imos. ³ İbbilal wa iyarrin s əməli idkâlan isalan win nafalalnen dəx əlkəttab wa əşşewalnen dəx batu n aratan win əmərəddə əd win d-əzaynen! Əbbilalan win das-sasammen, əbbirdagan-as, fəlas alwaq wər iggug.

Assalaman

⁴ Awa nak Yaxya, a din-iktâban y Əlkənisaten a n əssayat əhanen akal n Asəya. Əməli s ənta a t-illan kala da, illay dəx əmərəddə, amaran ənta a d-izayan, a dəx əgməyax a dawan-əgu arraxmat d alxer. Təgrəwamet arraxmat d alxer xur əssa ərruxanitan win əllanən dat təxawit ta n təxmar n Əməli! ⁵ Təgrəwamet-tan dəx xur Ƴaysa Əlməsix, imosan təgəyya təssiflasat, imos dəx Barar wa n axafadday a d-inkaran dəx təməttant, imos əmuzar ən mənokalan n əddənət. Ƴaysa Əlməsix ir-anax amaran isaddarfət-ana dəx bakkadan-nanax, əs təkutay ta iqqal əzni-net. ⁶ İg-anax imənokalan əd limaman i Məşşina di n Abba-net. Ənta a ilan tanaya, azzar y arat kul har faw! Amin!

⁷ Ənta əddi a d-izayan əddi iha-du şignawen.

Aytedan kul ad t-ənəyan

harkid win t-ədagnen saxxarabben-tu əs təzoli.

Tawşeten n əddənət kul a fall-asnat tagu təfəyyawt

dəx talxa n awa t-igrawan.

Awalla awen dəx a igan. Amin!

⁸ Əməli Məşşina ənta a innan: «Nak a imosan Alfa, əmosa dəx Omega, almayna wa azzaran, ilkâm. Əmosa wa t-illan kala da, əmosa wa t-illan əmərəddə, əmosa dəx wa d-izzayan; əmosa Məşşina di n əməli ən tarna kul.»

Aratan win nafalalnen i Yaxya

*Ənəfilal ən Wa d-Inkaran dəx təməttant əd şira əkkanen
Əlkənisaten şin əssayat*

Ənəfilal ən Wa d-Inkaran

⁹ Nak Yaxya, amadray-nawan a mosa, əheç təssust zun ta daç təham, ədrâwa dər-wan Taçmar ta n Məşşina əd zəmmerat. Awen kul ədrâwaç-qu dər-wan daç tərteyt əd Ƴaysa. Əheç akal imosan gərwətlan as itawannu Fatmos fəlas emel a əgeç awal ən Məşşina, əmosa deç təgəyya n awa iga Ƴaysa. ¹⁰ Əzəl n alxad imosan əzəl iskâtan y Əməli, tobaz-i tarna n Infas wa Zəddigan ən Məşşina, əsleç dəffər-i y əməsli issohen olân d əməsli n anasaç n asak. ¹¹ Inn-i əməsli wen: «Əktəb daç əlkəttab awa təhannaya da, təsəssiwəyaç-qu y Əlkənisaten a n əssayat a tanat-imosan: ta n Efez əd ta n Əsmurna əd ta n Fergamos əd ta n Təyatir əd ta n Sardes əd ta n Filadelfəya əd ta n Lawodikəya.»

¹² Malallayaç-in y ad əssənaç awa imos əməsli wen. As din-malallayaç, ənayaç əssa səkbəl ən fətəlaten əgânen daç urəç. ¹³ Ogge daç garegaray-nasan azzat tolât əd ta n aggadəm. Azzat ten, təzlâg təkadkat zagret, totâb idmaran-net s əsatəb n urəç. ¹⁴ Əçaf-net əd jəkkad-net əgân təməllay ta n təduft, madəç təməllay ta n əx. Şittawen-net olânat d abalagleg ən təmsay. ¹⁵ Idaran-net imilawlawan zun daroç illiçlaçan, ikna səllul, əməsli-net amaran ola d əjit zəwwəran n aman aggotnen. ¹⁶ Əfus-net wa n əçil əhan-tu əssa etran, imi-net təgammad-t-idu takoba təkknât tawala fəl əşşin fayyan-net. Udəm-net iga əmələwləw wa n təfuk a du-təkknât əzərəyyi.

¹⁷ As t-ənaya, fataççe çur daran-net, zun âs əgmâdan-i man. Təzzar issəwar-i əfus-net wa n əçil, inn-i: «A kay wər təggəz tasa! Nak a imosan wa azzaran, əmosa deç wa ilkaman. ¹⁸ Əmosa wa iddaran! Kala a di-aba, mişan əmərədda, nak da iddaran da, har faw! Əttâfa tanat ən təmattant d alaxirat. ¹⁹ Daç adi əktəb awa təhannaya, gər za wa itaggin əmərədda, wala deç wa d-izayan. ²⁰ Ənta da almaçna n əssir wa n əssa etran win əhanen əfus-in wa n əçil d əssa səkbəl ən fətəlaten win əganen daç urəç: Əssa etran win, əmosan angalosan win əssa n Əlkənisaten a n əssayat, amaran isəkbəl ən tətəlaten win əssa əmosan Əlkənisaten a n əssayat iman-nasnat.»

2

Şirawt təkknât Əlkənisat ta n Efez

¹ Əktəb y angalos n Əlkənisat ta n Efez as: «Arat da wa inna wa ittafan etran win əssa daç əfus-net wa n əçil, ijiwankat gər səkbəl ən fətəlaten win əssa n urəç: ² "Kawanay kəl-Əlkənisat ta n Efez, əssâna daç mazalan-nawan, d əşşəçələn win təgam, əd zəmmerat-nawan. Əssânaç âs wər təqbelam inəllubas, tətajarrabam deç win

ənnanən əs bahu əmosan inəmmuzal. Təsattaddam as bahu a taggin. ³ Təmosam Elkənisat təzmarat y aratan kul. Təyyəwanam alyazab fəl əddəlil n esəm-in, mişan wər sərwan d eway awen tewaɣlay dəffər-wan. ⁴ Mişan ya ill-ay arat a daɣ-wan əşşâka, a t-imosan šiyyit ta təgam tara ta kawan-təhat əstizarat. ⁵ Daɣ adi, a din-wər-tattawim igəg wa din-təgam daɣ igi ən bakkadan! Utabat, tərəzam daɣ igi-nasan, ad tətəggim imazalan olaynən win tətəggim harwa daɣ tizarat. As wər tətubam, wədi a kawan-in-asa, əkkəsəɣ əsəkbəl ən fətəlaten-nawan daɣ adag-net. ⁶ Dər iga awen da ya, təlâm əlxislat tolayat a tat-imosan as təkyađdam imazalan âs nak da əkyâdaq-qan win taggin aytedan win Nikolayitatan. ⁷ Wa isallin aslet y awa inna Infas wa Zəddigan y Elkənisaten: "Wa d-ornan, ad t-aşşatşəɣ ara n aşək wa n təməddurt, ihân aljannat ən Məşşina."»

Şirawt təkkât Elkənisat ta n Əsmurna

⁸ Ektəb y angalos n Elkənisat ta n Əsmurna as: «Ənta da awa inna wa imosan wa azzaran, imos deɣ wa ilkaman, aba-tu inkar-du daɣ təmattant: ⁹ "Kawanay Kəl-Elkənisat ta n Əsmurna əssâna daɣ təssust ta kawan-təgrawat, d əlləqqəw-nawan labasan. Mişan arat wa imosan tidət, as iməggərgas a təmosam! Əssâna daɣ ərrəbdan win kawan-taggin aytedan win ganninen əmosan Kəl-Əlyəhud əs bahu, əntanay amaran wər əmosan ar tiddawat ən nalkiman n Aşşaytan! ¹⁰ Ad wər tiksadam alyazab wa daɣ-wan ilkaman. Səsəmat, kəl-Elkənisat ta n Əsmurna! İblis a kawan-ajjarrab s ad agu arat daɣ-wan daɣ kasaw. Ad tagim maraw adan tətəwadgazam. Əydəlat daɣ əzəgzan-nawan iket təddaram, əddi a kawan-akfəɣ aroz imosan təkəbbut ta n annajax. ¹¹ Wa isallin aslet y awa inna Infas wa Zəddigan y Elkənisaten! Wa d-ornan, wər z'iggəz Jahannama."»

Şirawt təkkât Elkənisat ta n Fergamos

¹² Ektəb y angalos n Elkənisat ta n Fergamos as: «Arat da wa inna wa ilan takoba ta təkənât tawala fəl əşşin fayyannet: ¹³ "Kawanay kəl-Elkənisat ta n Fergamos, əssâna dad təllam, amaran əddi daɣ ad təlla taɣmar n Aşşaytan. Təsigatakkem daɣ tarrayt ta-nin. Wər təmməzzəyam d əzəgzan sər-i. Təttafam əzəgzan-nawan harkid daɣ azzaman win daɣ tawaggan man n Antifas, imosan ənalkimin ixdâlan, imos deɣ təgəyya-nin. Itawanɣa daɣ aɣrəmnawan, imosan dad illa Aşşaytan. ¹⁴ Mişan ya, əllan-tu aratən a daɣ-wan əşşâka, a tan-imosan âs: Əhân-kawan aytedan əlkâmnen i tarrayt ta n Balyâm s ənta a isassayran əmənokal Balaq əmmək was z'agu taftaw i Kəl-İsrayil y a tan-isəssugu abakkad. İg-asan təmərkest a fəl z'atşin isan

æmmidasnen ən təkutawen tiwagganen y æssənəman, agin deḡ æzzəna. ¹⁵ Æmmək en daḡ as kawanay kəl-Ælkənisat ta n Fergamos əhân-kawan aytedan zizawatnen daḡ tarrayt ta n Nikolayitatan. ¹⁶ Utabat daḡ adi. As wər iga adi, a kawan-in-asa tarmad, ammagara d aytedan win di, əs takoba, a tat-imosan awal-in. ¹⁷ Wa isallin aslet y awa inna Infas wa Zəddigan y Ælkənisaten! Wa d-ornan, ad t-akfaḡ manna təḡbârat, akfaḡ-qu deḡ təhunt mallat a fəl iktâb esəm aynayan as tu-wər-illa i t-issânan ar wa t-igrawan."»

Širawt tækkât Ælkənisat ta n Təyatir

¹⁸ Ektəb y angalos n Ælkənisat ta n Təyatir as: «Ënta da awa inna Barar ən Məššina, as šittawen-net olânat d abalagleg ən təmsay, amaran milawlawan daran-net zun daroḡ illiḡlayan, ikna səllul: ¹⁹ "Kawanay kəl-Ælkənisat ta n Təyatir, əssânaḡ awa tətamazalam, əssâna daḡ tara ta kawan-təhat, d əzəgzan-nawan d əššəḡəl-nawan əd zəmmerat-nawan. Æssânaḡ deḡ as əššəḡəl-nawan win əzraynen, ogaran win azzarnen. ²⁰ Mišan ya ill-ay arat a daḡ-wan əššâkaḡ a t-imosan as toyyam tantut ta təgat Yezabel, təgannu tənnəbit a təmos. Təsasaḡru inayḡbidan-in təsaxrak-kan, təsisug-en arak mazalan əmosnen əzzəna, əd tattay ən şan ən təkutawen tiwagganen y æssənəman. ²¹ Ækfeq-qat alwaḡ ewâdan ad tutab, mišan wər tara əməzzəy d alxal-net wa n igi n əzzəna. ²² Awen daḡ a fəlas a tat-in-əssukaḡ təwərna d alḡazab əmosnen attadib-net. Win dər tənammagga əzzəna, a sər-san d-awəya təssust labasat as wər ətuban daḡ arak mazalan win tan-təsisugu. ²³ Ad əhləkaḡ inalkiman ən təntut ten. Ælkənisaten kul ad əssənnat as nak əmosa wa itamayyazan iwallan, amaran akkiyyan daḡ-wan ad t-akfaḡ awa tu-šəššawadan mazalan-net. ²⁴ Kawanay amaran kəl-Ælkənisat ta n Təyatir win wər nəlkem i tarrayt ten, za wər təzdayam aratan win as gannin aytedan win den 'əssiran win din-əggugnen n Aššaytan', arat da wa ənne daḡ batu-nawan: wər kawan-əssəwəra lahan iyyan. ²⁵ Zəzzəwətət ḡas daḡ əzəgzan-nawan har din-asa. ²⁶ Wa d-ornan ilkâm y alwajiban-in har təzərəst, wədi ad t-akfaḡ tizart i tawšeten n əddənet. ²⁷ A dasnat-izar əs taḡmar təkənât assahat, addagdak-kanat zun təkən ən talaḡ, ²⁸ s əmmək as di-ikfa Abba-nin tizart. Ad t-akfa deḡ atri wa n aḡora, almaḡna a dər-əs ədrəwa taḡmar-in. ²⁹ Wa isallin aslet y awa inna Infas wa Zəddigan y Ælkənisaten!"»

3

Širawt tækkât Ælkənisat ta n Sardes

¹ Ektəb y angalos n Elkənisat ta n Sardes as: «Arat da wa inna wa ilan əssa ərruxanitan d əssa etran: "Kawanay kəl-Elkənisat ta n Sardes, əssânaḡ imazalan win tətəggam. Itawannu 'Elkənisat ta n Sardes təddar', kawanay amaran zun as aba-kawan. ² Ənkədat, təsəssuhem awa dawan-d-iqqiman daḡ aytedan. Ad wər iḡrəd adi ketnet təmattant, fəlas əgreq-in as waliyyan daḡ mazalan-nawan, wər imos arat ikmâlan dat Əməli-nin Məşşina. ³ Daḡ adi, aktiwat Əlinjil was təslam d əsəssəḡri wa təgrawam. Aḡədat daḡ-as, tutabam. As wər tənkeram daḡ etəs, a din-asəḡ əheḡ əlmital n abaydag, wər za təssənam alwaq wa daq-qawan in-z-əḡdəra. ⁴ Dər iga awen da ya, əhan-kawan aytedan əs harwa da wər əmməzrayan Məşşina. Win di a dər-i idawan, əmosan isamlalan, id əhoran d awen. ⁵ Əmmək en daḡ as wa d-ornan ad alsu tabdoq təgat təməllay təsiraqqet, amaran wər z'əməsəḡ esəm-net daḡ əlkəttab wa əhan əsmawan n aytedan win əgrawnen təməddurt ta təḡlalət. Ad əqbəla dat Abba-nin, d angalos-an-net əs awedan wədi i-nin. ⁶ Wa isallin aslet y awa inna Infas wa Zəddigan y Elkənisaten!"»

Şirawt təkkât Elkənisat ta n Filadelfəya

⁷ Ektəb y Angalos n Elkənisat ta n Filadelfəya, as: «Ənta da awa inna wa imosan əmizdag, imos tidət, amaran ənta a ittəfan *təsassarut ta n əmənokəl Dawəd, s ənta əs, as olam arat wər t-illa i ifragan təməhirt-net, as ihar dey wər t-illa i ifragan allam:* ⁸ "Kawanay kəl-Elkənisat ta n Filadelfəya, əssânaḡ imazalan win təgam, əssânaḡ as wər təlem şixurad aggotnen, dər iga awen da ya təḡdâlam daḡ awal-in, wər di-tənkuram. Əssənət za as olâmaḡ-awan təsəhərt, as wər t-illa i ifragan təməhirt-net. ⁹ Ənəyat, ənta da awa z'əgin: tiddawat ən nalkiman n Aşşaytan, a tat-aga daḡ fassan-nawan. Gannin əmosan Kəl-Əlyəhud ənta wər tan-əmosan, taggin bahu. Ənəyat, ənta da awa dasan-z-aga: A tan-d-assaḡlaḡ, əssəjədan ḡur daran-nawan, amaran ad əssənan, əqbəlan dey as areq-qawan. ¹⁰ Dad zamas təlkâmam y awal-in omaran əs zəmmerat, wədi nak da a kawan-agəza daḡ tamert ta n jarrabatan win d-əzaynen əddənet ketnet, fəl ad iqqəl awen jarraba əgeḡ y aytedan n əddənet kul. ¹¹ A din-asa tarmad. Akniwat əzəzzəwi daḡ awa təlam, fəl a daḡ-wan wər abəz awedan waliyyan aroznawan imosan şikəbba-nawan şin tarna. ¹² Wa d-ornan, ad t-aga təgəttawt daḡ ahan n əlyibada ən Məşşina di n Əməli-nin, amaran wər t-idu-z-igməd har faw. A fall-as əktəbaḡ esəm ən Məşşina di n Əməli-nin, d esəm n əḡrəm n Əməli-nin Məşşina, a t-imosan Yerusalam ta taynayət,

a du-təzzibbet dəy jənnawan, isisaway-tat-du Əməli-nin, əktəbəx dəy fall-as esəm-in wa aynayan. ¹³ Wa isallin aslet y awa inna Infas wa Zəddigan y Əlkənisaten!"»

Şirawt təkkât Əlkənisat ta n Lawodikəya

¹⁴ Ektəb y angalos n Əlkənisat ta n Lawodikəya, as: «Arat da wa d-inna was itawannu "Amin", s ənta a imosan təgəyya ta təxdalat, təmos tidət, amaran ənta ələsəl n əkkulluk n arat: ¹⁵ "Kawanay kəl-Əlkənisat ta n Lawodikəya, əssənağ awa tətamazalam: Wərmad təsəmmidam, za wər təkkusam. Ənnar təsəmmidam madəx təkkusam! ¹⁶ Mişan dad zamas təlimzayyanam, wərmad təsəmmidam za wər təkkusam, wədi a kawan-d-afsa, ¹⁷ id a təgannam: 'Nəggirgas, amaran iman-nana a nəsgargas. Wər nəddərar əs wala.' Awen təgannim-tu fəlas wər təssenam as kawanay təllam-tu d əxşud ən man, təhoram d i dawan-ihanatten, təmosam şiləqqawen, təddiryalam, wər tələm wala. ¹⁸ Əgəx-awan ənnəsixa n a xur-i tazzanzim urəx wa itawajarraban əs təmsay, fəl a sər-əs taggargasam, tazzanzim xur-i dəy tabdoq mallat, fəl ad talsim, ib-as kawan-tətabaz təkarakit n as təzzafam, tazzanzim xur-i dəy amagal a za təzwəyam i şittawen-nawan, iqqəl-kawan-du asawad-nawan. ¹⁹ Nak, aytedan win arex, əntanay a fəl şawala, suxulaq-qan-du tarrayt. Dəy adi akniwat gəlleyat, tutabam. ²⁰ Ənəyat! Nak əlley xur təsəhərt n ahan takawkawaq-qat. As di-İsla awedan, olam-i ehan, ad əggəzəx aqaywan-net, ədrəwa dər-əs təməklawt. ²¹ Wa d-ornan, a t-akfəx təttəyt n a dər-i inəximu fəl təxawit ta n təxmar-in, zund əmmək as nak da assaxa wa d-ornex, əgley nəxama d Abba-nin fəl təxawit ta n təxmar-net. ²² Wa isallin aslet y awa inna Infas wa Zəddigan y Əlkənisaten!"»

4

Awa du-z-inəfiləlan dəy jənnawan

Ənəfilal ən təxawit ta n təxmar ən Məşşina

¹ Dəffər awen ənaya təsəhərt tənnołamat dəy jənnawan. Əsley y əməsli was əsley dat awen, olân d anasax n asak. İgann-i əməsli wen: «Gazzay-du sa da, a kay-assaknax arat was kundaba iga dəffər awa.» ² Wala ihoggan tobaz-i tarna n Infas wa Zəddigan, oggəx təxawit ən təxmar ta təhat ijənnawan. Təxawit ten iqqim fall-as awedan. ³ Wa iqqiman fəl təxawit ten, iga əmələwləw a n təhunt iyyat təlât almaqam, as itawannu jasfa d iyyat as itawannu sardwan. Təxlay-tat təzzəl-adar a du-təsaktit təhunt iyyat

tæmilawlawat tælât almaqam as itawannu emrod. ⁴ Tæxawit ta n taɣmar en, æɣlaynat-tat sanatat tæmærwæn æn tæxawit æn taɣmar d ækkozat, a fæl æqqiman sanatat tæmærwæn n æmɣar d ækkoz æn samlalan, æssiwarnen šikæbba æn taɣmar ægânen daɣ uræɣ. ⁵ Gammadan-tat-du esman æd maslan d eggagan. Ærɣân dat-æs æssa belan æn tæmsay, æmosnen æssa ærruxanitan æn Mæššina. ^{6a} Tæxawit ta n taɣmar en, oray-tat-du arat olân d agaraw imilawlawan wællen, igân æɣætæs a n tælfønɣart.

^{6b} Ammas-net æd ɣæløyɣələyan-net æhân-tan ækkoz mudaran as ilamawan-nasan ælsân šittawen sa sær dat, ælsân-tanat deɣ sa sær ælæqqam. ⁷ Æmudar wa azzaran ola d ahar, wa n æššin ola d æhæri, wa n karad amaran isakta-du udæm-net wa n aggadæm, wa n ækkoz ola æd tænaɣmart tæggâdat. ⁸ Amaran imudaran win ækkoz en, ækkulluk n iyyan daɣ-san ila sædis æfrutan ælsânat šittawen sas ammas æd sas afalla. Wær tæfæstin ehad ezal gannin:

«Æmizdag, Æmizdag, Æmizdag,
 Æmæli Mæššina s ænta a imosan
 mæššis æn tarna kul,
 imos wa t-illan kala da,
 imos deɣ wa t-illan æmæredda,
 amaran izay-du!»

⁹ Æssiggadan daɣ tæmmalen æn tanaya æd saɣmar æd godan i Mæššina, s ænta a iqqiman fæl tæxawit ta n taɣmar, ill-ay har faw. ¹⁰ Amaran id æssæggadan mudaran win den, ad æssæjædan æmɣaran ɣur daran æn wa iqqiman fæl tæxawit ta n taɣmar, assansin šikæbba-nasan šin taɣmar, annin:

¹¹ Ya Æmæli-nana Mæššina,
 kay a ihoran æd tanaya
 d ætæwæsæɣmar, æd tarna,
 id kay a d-ixlakan ækkulluk n arat.
 Aratan kul ællan-tu æs tarrayt æn tara-nak,
 amaran kay a tan-d-ixlakan.

5

Ænæfilal n Æjemar d ælkættab wa tæwar talxatimt

¹ Tæzzar oggeɣ daɣ æfus wa n æɣil æn wa iqqiman fæl tæxawit ta n taɣmar ælkættab iwar akatab sa sær ammas æd sa sær afalla. Ælkættab wen æwarnat-tu æssayat tælɣatimen, a das-æmosnen šisæɣfal. ² Oggeɣ angalos iknân tæla æn tarna igannu s æmæsli issohen: «Ma imos wa ewadan ad alæm ælkættab wa, aru tælɣatimen šin t-æwarnen?» ³ Mišan wær t-illa daɣ jænnawan za wala amaɖal, wala daw amaɖal, i ifragan allam n ælkættab wen, wala inøy awa t-ihan. ⁴ Tæzzar ad halla wællen id wær t-illa i ifragan allam n

ælkættab wen, wala dey ifrâg anay n awa t-ihan. ⁵ Tæzzar inn-i iyyan daḡ æmḡaran: «Ayyu tala! Ænøy, ahar wa n tawšet ən Yahuda, a d-igmâdan æzzurrøyya ən Dawəd, ənta a d-ornan, amaran ənta fadda a z'aləman ælkættab wa d əssayat təlɣatimen-net.» ⁶ Tæzzar oggeḡ Æjemar ibdâdan daḡ ammas ən təxawit ta n taḡmar əd mudaran win ækkoz, daḡ garegaray n æmḡaran. Æjemar wen ola d əmudar igzaman, amaran ila əssa əskawan d əssayat šittawen əmmittalnen [əssa] ərruxanitan ən Məššina a d-issoka əddənet ketnet. ⁷ Ihoz-in y ad igrəw ælkættab daḡ əfus wa n əḡil ən wa iqqiman fəl təxawit ta n taḡmar. ⁸ Assaḡa wad igraw Æjemar ælkættab, ənkaran mudaran win ækkoz, d æmḡaran win sanatat təmərwen d ækkoz əssəjadan dat-əs. Akkiyyan daḡ-san ittâf təhərdänt, əd təkərwesen n urəḡ ədnâynen ađutan əzodnen taqqadnen əmmittalnen šiwatiwiwen ən mizdagan. ⁹ Æssiggadan daḡ təmmal taynayət, gannin:

Kay a ihoran d agaraw n ælkættab, tarzaḡ talɣatimt-net, id ətəwəgzam a təgeḡ.

Amaran azni-nak as tərzama tədarfit n aytedan ən tawšeten kul d awalan kul əd təmattiwiwen kul əd kallan kul, tewayaq-qan-du əs tarrayt ta n Məššina.

¹⁰ Təgeq-qan imənokalan əd limaman, əḡbâdnen Æməli-nana, amaran ad əxkəman fəl əddənet.

¹¹ Ælasaḡ-in asawad, tæzzar əsleḡ i maslan n angalosan əknânen igət. Æmosan igiman ən gimana, ḡilayḡalayan təxawit ta n taḡmar, ḡilayḡalayan imudaran d æmḡaran.

¹² Æssiggadan gannin s əməsli issohen:

«Æjemar wa igzaman iqqal takutay, ihor d agaraw ən tarna əd təgərgist əd masnat əd təḡurad d ətəwəsəḡmar əd tanaya əd təmmalen!»

¹³ Tæzzar əsleḡ daḡ amazay wen da i təxəllak kul daḡ jənnawan d amađal, əd daw amađal, əd gərwan, ganninat: «Təmmalen əd saḡmar əd tanaya əd tarna har faw in wa iqqiman fəl təxawit ta n taḡmar d Æjemar!»

¹⁴ Tæzzar ənnan mudaran win ækkoz: «Amin!» Æssəjadan æmḡaran əḡbadan Məššina d Æjemar.

6

Əniləm ən talxatimt ta tazzarat

¹ Dəffər awen oggey Əjemar as olam talxatimt ta tazzarat dağ şin əssayat, əsley y iyyan dağ əkkoz mudaran as inna s əməsli olân d eggag: «Iyyaw!» ² Təzzar əswadağ ənayağ ays mallan as d-osa. Ays wen amawan-net ila təganzey. Itawakfa təkəbbut ta n tarna. Iгла, imos wa d-ornan, igâ değ ənnəyat n ad işitu annajax.

Əniləm ən talxatimt ta n sanatat

³ As olam talxatimt ta n sanatat, əsley y əmudar wa n əşşin as inna: «Iyyaw!» ⁴ Təzzar ənayağ ays iyyan igân təzuyay ta n təmsay. Itawakfa amawan n ays wen fərregat n ikus n alxer dağ əddənet, fəl ad tinəmənxiñ aytedan, itawakfa değ takoba zəwwərat.

Əniləm ən talxatimt ta n karadat

⁵ As olam Əjemar talxatimt ta n karadat, əsley y əmudar wa n karad as inna: «Iyyaw!» Təzzar əswadağ ənayağ ays kawalan. Wa iwanan ays wen, ittâf əlmizan dağ əfus-net. ⁶ Əsley y a olân d əməsli a d-ifalan imudaran win əkkoz, igannu: «Ağanna ən təyya n alkama ças as itawarzam əzəl iyrâdan n əşşəğəl. Amaran arat wen əlqimat-net wər tokay təyya d ağanna n əşşəğir. Widi n azzayt d esmad n alğanab amaran a tan-wər-tədəsa.»

Əniləm ən talxatimt ta n əkkozat

⁷ As olam talxatimt ta n əkkozat, əsley y əməsli n əmudar wa n əkkoz as inna: «Iyyaw!» ⁸ Təzzar əswadağ oggey ays igân taddalət ta n yel təlhây təməllay. Wa iwanan ays wen, esəm-net təmattant, iddew d alaxirat. Təzzar tətawakfa təmattant d alaxirat tarna fəl təzunt ta n əkkozat n amağal, fəl ad anxiñat kərəz aytedan əs takoba əd laz əd təwərnawen əmosnen alwaba əd mudaran n əsuf win tattinen aytedan.

Əniləm ən talxatimt ta n səmmosat

⁹ As olam talxatimt ta n səmmosat, oggey daw majmar wa zəwwəran n əsəqqəd ən təkutawen iman n aytedan win as tawaggan man-nasan fəl əddəlil n awal ən Məşşina əd təgəyya tolayat ta əgan dağ batu n Elməsix. ¹⁰ Ad sayaren wəllen gannin: «Əməli, imosan əmizdag, imos tidət, har əmmay tətüluley wər təwwəddabay aytedan n əddənet, fəl a dağ-san izəl əzni-nana wa ənçalan?» ¹¹ İman n aytedan win ənaya daw majmar, akkiyyan dağ-san itiwakfa təkadkat zagret mallat, təzzar itawann-asan ad əşşitin dağ təzaydart har d-andin mədrayan-nasan win dər olan əşşəğəl dağ tarrayt ta n Əməli, s əntanay da əhan tarrayt n a dasan-tətəwəggu tanayağ zun ta dasan-tətawagğat.

Əniləm ən talxatimt ta n sədisat

¹² Dəffər awen oggeş Əjemar as olam talxatimt ta n sədisat. Təzzar iga amađal ənəgəynəgəy labasan. Təqqal təfuk şikawalat, təga təllit ketnet təzuxay ta n əzni. ¹³ Fataqqen-du etran daş jənnawan fəl amađal, zund əmmək as tifətəktikan aratan n aşək a fəl d-igâr ađu issohen. ¹⁴ Ad tatankalan jənnawan, gallin zun təsalat a din-tətadit, əmmədkalan ədxaşan kul, əd gər wətlan win əhanen igərwan, tawakkasan daş daggan-nasan. ¹⁵ Imənokalan n əddənət kul d aytedan win daş-as əlanen almaqam əd muzaran ən sojitan əd məggərgas əd kəl tarna d eklan əd lallan, kul əşradan alaşas daş kəzman d ammas n ədxaşan. ¹⁶ Gannin y ədxaşan, əd təhun: «Fətəqqətat fall-ana. Səlxəsət-anaş ad nugag wa iqqiman fəl təxawit ta n taşmar. Səlxəsət-anaş ad nənəməggəg d alham n Əjemar, ¹⁷ id əzəl wa zəwwəran n alham-nasan a d-osan, amaran məni wa ifragan zəmmerat y-as?»

7*Temeday n əgim d əkkozat təmərwen d əkkoz win təwar talxatimt ən Məşşina*

¹ Dəffər awen, oggeş əkkoz angalosan əbdâdnen daş əkkozat təşəmmar n amađal. İttâfan-in əkkoz ađutan fəl amađal, fəl ad wər iger ađu fəl amađal, wala fəl agarew, wala deş iger fəl aşək waliyyan. ² Təzzar əswadaş sa sər dännəg oggeş angalos iyyan itagazzayan əs jənnawan, ittâf talxatimt ən Məşşina di İddaran. İsaşşarat s əməsli issohen y əkkoz angalosan win əgrawnen tarna n igi ən təkma y amađal əd gərwan. ³ Inn-asan: «Ad wər tagim təkma y amađal, wala agaraw, wala eşkan, iket wər nəjjəjwal əs talxatimt ən Məşşina şikannaren ən naşbidan n Əməlinana.» ⁴ Təzzar əsleş y əket n aytedan win tətawasawar talxatimt ən Məşşina. Əmosan temeday n əgim d əkkozat təmərwen d əkkoz ən tawşeten kul n İsrayil:

⁵ Maraw gim n awedan d əşşin daş tawşet ta n Yahuda a təwar talxatimt ən Məşşina,

təwar maraw gim d əşşin daş tawşet ta n Ruben,

əd maraw gim d əşşin daş tawşet ta n Gad,

⁶ əd maraw gim d əşşin daş tawşet ta n Aşşer,

əd maraw gim d əşşin daş tawşet ta n Naftali,

əd maraw gim d əşşin daş tawşet ta n Manasay,

⁷ əd maraw gim d əşşin daş tawşet ta n Şiməxon,

əd maraw gim d əşşin daş tawşet ta n Lebi,

əd maraw gim d əşşin daş tawşet ta n İssakar,

⁸ əd maraw gim d əşşin daş tawşet ta n Zəbulun,

əd maraw gim d əşşin dağ tawşet ta n Yusəf,
 əd maraw gim d əşşin dağ tawşet ta n Benyamin,
 kul təwâr-tan talxatimt ten.

Təmmal n əljəməyat

⁹ Dəffər awen əlasax asawad, oggeğ tiddawat zəwwərat wəllen, as wər t-illa i ifragan əşidən-net. Tiddawat ten təga dağ xərfa n əddənət kul, əd tawşeten kul, əd təmattiwen kul, d awalan kul win tawaşawalnen. Əbdâdan dat təxawit ta n tağmar, dat Əjemar, əzlâgan şikadkaden zagrotnen mallolnen, əttâfan ilədlad ən tagayt. ¹⁰ Sağaren s əməsli issohen, gannin:

«Efsan Əməli-nana Məşşina a tan-ihakkin
 s ənta a iwaran təxawit ta n tağmar,
 ənta d Əjemar.»

¹¹ Təzzar əğradan angalosan kul tebadday den da, xilayçalayan təxawit ta n tağmar, d əmğaran, əd mudaran win əkkoz. Əssəjadan dat təxawit ta n tağmar en, əğbadän Məşşina, ¹² gannin:

«Amin!
 Təmmalen əd tanaya əd masnat
 əd godan d ətəwəsəğmar
 əd tarna əd fərregat,
 kul in Əməli-nana Məşşina, har faw!
 Amin!»

¹³ Təzzar işşewal iyyan dağ əmğaran, inn-i: «Awak ma mosan win əzlagnen şikadkaden zagrotnen mallolnen en, mənīs d-əhan?» ¹⁴ Ənneğ-as: «Təssanəğ awa mosan, Əməli-nin.» Təzzar inn-i: «Awen aytedan win d-əğmadnen təssust ta labasat. Ərbazan şikadkaden-nasan, əssəmlalan-tanat s əzni n Əjemar. ¹⁵ Awen dağ a fəl əbdadan dat təxawit ta n tağmar ən Məşşina, əğbâdan-tu ehad d azal dağ adag-net wa n əlğibada. Amaran wa iqqiman fəl təxawit ta n tağmar, *a dər-san z'inəməxsəran ağəz-tan.* ¹⁶ Wər ilkem a tan-iggâz gələk, za wala fad. *Wər ilkem a tan-təlâs təfuk əzəğğəzzəb,* za wala tuksay waliyyat, ¹⁷ id Əjemar wa ihan ammas ən təxawit ta n tağmar a dər-san z'annattafan, s əmmək as itanattaf amadan d aharay-net, awəy-tan əs şittawen n aman win sidurnen, təzzar *iməs Məşşina iməttawan-nasan kul.*»

8

Əniləm ən talxatimt ta n əssayat

¹ As olam Əjemar talxatimt ta n əssayat, təga təfastit dağ jənnawan tewadat amağal n gağanna n alwağ.

Anasəğ n əskawan win əssa

Angalosan win æssa

² Oggeḡ æssa angalosan win æbdadnen dat Mæššina, as tawakfan iskawan æssa. ³ Tæzzar osâ-du angalos iyyan ibdad ḡur majmar wa n æsæqqæd n aḡutan win æzodnen igân daḡ uræḡ, ittâf majmar ændærran n æsæqqæd æn taḡælbast igân ænta da daḡ uræḡ. Itawakfa taḡælbast tægget y a tat-isæqqad, tæmos takutay, fæl majmar wa n æsæqqæd n aḡutan, dat tæxawit ta n taḡmar, iddew awen æd tæwatriwen æn mizdagan kul. ⁴ Igmad-du æhu æn taḡælbast ten æfus n angalos, iggæzzay dat Mæššina, iddew awen æd tæwatriwen æn mizdagan. ⁵ Dæffær awen inkar angalos æs majmar wa n ændærran n æsæqqæd æn taḡælbast as kala da ittaf-tu, idkar-t-idu šimakaten ærḡanen daḡ majmar wa n æsæqqæd n aḡutan, igar-tu fæl amaḡal. Æmalan-tu eggagan, æd maslan, d esman, d ænægæynægøy n amaḡal. ⁶ Tæzzar ænkaran æssa angalosan win ættafnen iskawan win æssa ad simutugan y anasaḡ-nasan.

Ækkoz æskawan win tawansaḡnen daḡ tizarat

⁷ Insaḡ angalos wa azzaran esæk wa ittaf, tæzzar æmalan-tu dagrazan æd tæmsay ærtaynen d æzni, iffay-du awen kul fæl amaḡal. Tærakammat tæzunt ta n karadat n æddænet, tærakammat tæzunt ta n karadat n eškan kul, irakammat yel kul.

⁸ Insaḡ angalos wa n æššin esæk wa ittaf. Itawagar-du arat olân d ædḡaḡ zæwwæran ibilaglagan, irtak daḡ agaraw. Tæqqal tæzunt ta n karadat n agaraw ketnet azni. ⁹ Tæzzar tæmmut tæzunt ta n karadat æn mudaran win æhanen agaraw, tæhlak deḡ tæzunt ta n karadat n æḡlalan n aman kul win æwarnen agaraw.

¹⁰ Insaḡ angalos wa n karad esæk wa ittaf. Irtak-du ætri zæwwæran daḡ jønnawan, igân æbælæzlæz an abela æn tæmsay, irtak fæl tæzunt ta n karadat æn gærwan win ængaynen, æd šittawen n aman. ¹¹ Atri wen esæm-net «Abæsintæs». Tæmmættay tæzunt ta n karadat n aman n æddænet, tæqqal aman samomnen, ægânen tæssæmæmt ta da iga abæsintæs. Tæzzar aba aytedan aggotnen win æšwânen aman win den.

¹² Insaḡ angalos wa n ækkoz esæk wa ittaf. Tæzzar ihlak awen tæzunt ta n karadat æn tæfuk, æd tæzunt ta n karadat æn tællit, æd tæzunt ta n karadat n etran. Awa daḡ-san immar awen kul iqqaḡ šiyay. Ezal da tægmad-tu tæzunt ta n karadat n ænnur-net, ehad deḡ awen da.

Ætæwæmal n alwabatan win karâd

¹³ Tæzzar æswadaḡ ænayaḡ tænaḡmart tæggâdat daḡ tæsæggærigeræyt æn jønnawan, æsley as tæganu s æmæslī

issohen: «Xašša! Xašša! Xašša wəllen i win əhanen əddənet, ƣur anasaƣ n əskawan win z'ənsəƣan angalosan win karad dəffər win!»

9

Anasaƣ n asak wa n səmmos

¹ Inkar angalos wa n səmmos insaƣ esək wa ittaf. Oggeƣ atri as d-irtak daƣ jənnawan fəl amaɗal. Atri wen itiwakfa təsassarut n əƣəƣi wa wər nəla eder. ² Olam əƣəƣi wa, iggəzzay-du daƣ-as əhu olân əd wa d-igammadan əƣəƣi a daƣ təmihandar təmsay. Arat wen issəkwal təfuk, d alhawa ketnet. ³ Təzzar əgmadan-du əjwalan əhu wen, əllilan əddənet ketnet. Tawakfan əjwalan win talbast togdât əd ta n təzurdam. ⁴ Itawarƣam-asan fəl igi n a imosan təkma i taddalət a təqqal, gər za yel a ilsan amaɗal, wala eškan. Kalar tawamaran s ad zəƣƣəzzəban aytedan ƣas win as wər iwer ejwal ən Məššina šikannaren-nasan. ⁵ Wər tawakfan turagat ən tanaxay n aytedan win den kərəz. Kalar tawamaran ƣas s a tan-zəƣƣəzzəban wəllen har səmmosat təlil. Amaran əsəsnan ən tədud n əjwalan win den, ogda əd wa n taddod ən təzardəmt. ⁶ Azzaman win den a daƣ-san səddirənan aytedan təmattant, mišan wər tat-z-əgrəwan. Ad gammayan təmattant, tətinəməggig dər-san.

⁷ Ijwalan win den olân d əggəsan simatagnen y iki n əməgər. Iƣafawan-nasan iwar-tan arat olân əd təkəbba ən taƣmar əgânen daƣ urəƣ, amaran udmawan-nasan olan əd wa n aggadəm. ⁸ Ijəkkad-nasan olân əd jəkkad ən tədoden, išenan-nasan olân əd šenan n ahar. ⁹ Idmâran-nasan ils-en arat olân əd təzoli, amaran imaslan n əfrutan-nasan olân d əməsli n amalankaytan n əməgər əlwâyan əggəsan aggotnen, ozâlan s adag n əməgər. ¹⁰ Əlân šisbaten olânen əd šin təzurdam, əlânen iškaran zun win daƣ ən təzardəmt, amaran imawan ən təsbaten-nasan en da a daƣ iddew aššar n igi ən təkma labasat y aytedan har səmmosat təlil. ¹¹ Ark angalos n Aššaytan wa ihan əƣəƣi wər nəla eder, a imosan əmənokal n əjwalan win den. Esəm-net daƣ təlƣibrit Abaddon, daƣ awal ən Kəl-Əlyunan esəm-net Aboləyon, almaƣna n awen «Əmahlak.»

¹² Okay albala wa azzaran, amaran əllan-tu əššin wiyyad as kundaba əlkaman-as-du.

Anasaƣ n asak wa n sədis

¹³ Insaƣ angalos wa n sədis esək wa ittaf. Təzzar əsleƣ y əməsli a d-igmâdan [əkkozat] təƣəmmar ən majmar n urəƣ wa illan dat Məššina, imosan majmar wa n əsəqqəd

n adutan. ¹⁴ Əməsli wen igannu y angalos wa n sədis ittafan esək: «Ara-du əkkoz angalosan win əqqannen dağ təgadamayt n agarew wa zəwwəran, a t-imosan Efrat.»

¹⁵ Təzzar tawâran-du angalosan win əkkoz en ti-wasamatagnen y alwaq wen da, dağ əzəl wen da, dağ təllit ten da, dağ awatay wen da, fəl ad əhləkan təzunt ta n karadat n aytedan kul n əddənet. ¹⁶ Əmosan sanatat təmad ən miləyaw n amawan n ays. Ənta den da međan-nasan, amaran əsleğ-as. ¹⁷ Əmmək da was di-du-nafalalan əggəsan win den əd mawanan-nasan dağ targət-in. Əggəsan win, idmaran-nasan ils-en əxər igân karad əlmawan əmosnen: təzuğay ta n təmsay, əd taddalət ta n jənnawan tədâgat sa sər takkawalt ta n təhunt iyyat təlât almaqam as itawannu safır, əd təruxay ta n adağas-ən-tahart. İxfawan n əggəsan win, olân əd xafawan ən harran, imawan-nasan təgammad-tan-du təmsay d əhu d adağas-ən-tahart irxân. ¹⁸ Albalatan win karad en əmosnen təmsay d əhu d adağas-ən-tahart irxân, əhləkan təzunt ta n karadat n aytedan kul n əddənet. ¹⁹ Fəlas tarna n əggəsan win den, təha imawan-nasan, əd təsbaten-nasan, id şisbaten-nasan olânat əd taşşolen, əlânat ixfawan as tagginat y aytedan təkma labasat.

²⁰ Mişan aytedan win wər aba dağ albalatan win den, wər ətuban dağ ark aratan win tamazalan. Wər əmməzzayan d əlxibada ən kələsuf, wala əssənəman n urəx əd win əzrəf əd win darox əd win təhun əd win eşkan. Əssənəman win den, wərmad za as hannayan, wala sallin, wala əfrâgan əmətəkway. ²¹ Aytedan win, wər ətuban dağ igi ən man, wala igi ən şaxawan, wala əzzəna, wala şikra.

10

Elkəttab wa əndərran

¹ Dəffər awen oggeğ angalos iyyan iknân təla ən tarna, itazabbat-du dağ jənnawan, ils-ay əgnaw zun awedan ilsan təkadkat zagret. Əxaf-net təxlay-tu təgələllet təgât dağ təzzəl-adar təbilazlazat. Udəm-net ibilazlaz s ənnur zun təfuk. Elxan-net olân əd lallagan ən təmsay. ² İttaf dağ əfus-net arat n əlkəttab innolaman. İssənsa adar-net wa n əxil fəl agaraw, issənsa wa n zalgat fəl amađal.

³ İga y əməsli-net adakal issohen, olân əd tənagawt n ahar. As iga y əməsli-net adakal wen, əgan eggagan win əssa əmosnen zun awal. ⁴ Təzzar əgmaya d ad əggəza şin akatab n awa ənnan eggagan win den. Amazay wen dağ ad əsleğ y əməsli a d-igmadan ijənnawan as di-inna: «Əxbər dağ əwəl-nak awa ənnan eggagan win əssa di. A dağ-as wər təkətəba wala!»

⁵ Tæzzar inkar angalos wa ænayax ibdâd fæl amaḍal d agaraw izzal æfus-net wa n æxil sa sær jønnawan, ⁶ ihad s esëm ən wa iddaran har faw, s ænta a d-ixlakan ijønnawan d awa tan-ihan, d amaḍal d awa t-iwaran, æd gærwan d awa tan-ihan, as wær tu-za-tælæs tæmastant emel. ⁷ Mišan amazay wa daḡ iggaz angalos wa n æssa šin anasax n asak wa ittaf, ænta a daḡ z'assandu Mæššina æsønnæfilæl n æssir-net, s æmmæk was isabbayyan isalan win den i naḡbidan-net, a tan-imosan ænnæbitan.

⁸ Tæzzar ilas-i æmæsli was æsley den awal daḡ jønnawan inn-i: «Ædkæl arat n ælkættab ændærran wa ihan æfus n angalos wa ibdadan fæl agaraw d amaḍal.» ⁹ Ækkeḡ angalos ænnæḡ-as a di-d-akfu ælkættab wa ændærran en. Inn-i: «Ædkæl-tu tatšaḡ-qu. Ad tædnæy tæsæmmay-net tadist-nak, mišan daḡ æmi-nak iga šizada an turawat.» ¹⁰ Ædkaladu arat n ælkættab wen daḡ æfus n angalos en, ætšæḡ-qu. Iga šizada an turawat daḡ æmi-nin, mišan as t-ætšæḡ, tædkar tadist-in tæsæmmay-net. ¹¹ Dæffer awen itawann-i: «Harwada iwar-kay amel ən salan win d-izazzabbat Mæššina daḡ batu ən tæmattiwen aggotnen, æd ḡærfan aggotnen, d awalan æd mænokalan aggotnen.»

11

Šigæyyawen šin sanâtat

¹ Tæzzar tawakfaḡ agabal ən telant, olân æd tæburæk tas tætaggu takkot. Itawann-i: «Ænkær, tækætax edag n ælyibada ən Mæššina, æd majmar wa n tækutawen, tæxsæba win daḡ-as æḡbadnen. ² Mišan aḡarḡar wa iḡlayan edag wa n ælyibada, ayy-ay s aganna, a tu-wær-tækæta, fælas itiwakfa y aytedan win wær næksud Mæššina. Aytedan win di ad agin ækkozat tæmærwæn ən tællit æd sanatat tidæyæzdæyizan aḡræm wa zæddigan di. ³ Amaran a din-assagla sanatat tæḡæyyawen, æmosnen ænnæbitan-in, ælsânen šibæddax ən tæfæyyawt. Ænnæbitan win ad æmmalan isalan a d-izizabbat Æmæli har agin agim n æzæl æd sanatat tæmad æd sædisat tæmærwæn. ⁴ Šigæyyawen šin sanatat en æmosnat æššin eškan ən zaytun æd sanatat fætælaten šin æzzækkatnen dat Æmæli n æddænet. ⁵ As ira awedan igi y-asnat tækma, a du-tægmæd tæmsay æs mawan-nasnat tæsærrækæmmæt-tu. Awalla, wa iran igi y-asnat tækma, æmmæk en daḡ as tu-z-iba. ⁶ Ænnæbitan win æššin en æmosnen šigæyyawen-in ælân færrægat n agadal y akonak ewet daḡ azzaman win daḡ æmmalan isalan win d-izazzabbat Æmæli. Ælân færrægat n æsæmmættæy n aman æqqælan azni. Æfragan deḡ a d-awæyan s æddænet æzzænæfan aggotnen n albalatan, iket ærân awen.»

⁷ Mişan as əxrədan təgəyya ta taggin den, a dər-san am-magar əmudar səksədan wa du-z-igmədan əxəxi wər nəla eder, arn-en, anç-en kərəz. ⁸ Şiməxxa-nasan ad ansinat fəl tarrayt dəx əxrəm zəwwəran wa dəx itawataytay Əməli-nasan. Axrəm wen itawann-as «Sədom» əd «Masar», imos awen tədugent as isinafal Məşşina awa t-id-izayan. ⁹ Edes n aytedan ən təmattiwen kul əd tawşeten kul d awalan kul əd kallan kul ad agin karad adan d aganna hannayan şiməxxa n ənnəbitan win əşşin en, əgdəlan-asan dəx a din-təwənbəlan. ¹⁰ İba-nasan isidawat aytedan n əddənət kul, har as əknən saday, tinəməgggin şinəfas gar-essan, id əzəxğəzzəb aggen a dasan-əganat təgəyyawen şin sanatat en.

¹¹ Mişan dəffər karad adan d aganna win, iga Məşşina infas ən təməddurt dəx ənnəbitan win aba den, əddaran-du, əbdadan. Təggaz tasa səksədat aytedan win tan-ənaynen. ¹² Əslan dəx jənnawan y əməsli issohen igannu y ənnəbitan win əşşin: «Gazzayat-du sa da!» Əggəzzayan əs jənnawan əhən ignawan, hānnayan-tan zəngə-nasan. ¹³ Amazay wen da a dəx iga amađal ənəgəynəgəy labasan, təbarajjat təzunt ta n marawat n əxrəm en, təzzar aba əssa gim n awedan dəx əhluk wa igan den. Win d-əragnen dəx awen, təggaz-tan tasa səksədat, əssəxmaran Məşşina di n Əməli ən jənnawan.

¹⁴ Okay alwaba wa n əşşin, amaran wa n karad izay-du tarmad.

Anasay n asak wa n əssa

¹⁵ İnsay angalos wa n əssa esək wa ittaf. İtawasla i maslan zəwwarnen dəx jənnawan. İmaslan win den gannin:

«Əmərədda tarna ta n tizart y əddənət

şin Əməli-nana Məşşina

d Əlməsix-net.

Ad iqqəl əmənokal har faw.»

¹⁶ Ənkaran əmğaran win sanatat təmərwen d əkköz əqqimnen fəl təxiwa-nasan dat Məşşina, fataqqen dəx amađal, əssəjadan, əxbadan Məşşina. ¹⁷ Ad gannin:

«Nəggoday-ak Əməli,

kay a imosan Məşşina di n əməli ən tarna kul,

kay a t-illan əmərədda,

təllec-qu dəx kala da.

Nəggoday-ak id əşəşxəl a təgeç tarna-nak zəwwərat y ad təssəbdəda taymar-nak,

¹⁸ şimattiwen n əddənət iggâz-tanat alham labasan, mişan əmərədda alham wa nak a d-ewadan.

Alwaç wa n əşşərixa ən nəmməttan a d-osan.

Alwaç ewad-du wa dəx za tərzəmaç y eklan-nak

a tan-imosan ənnəbitan,
takfaq-qan arozan-nasan,
əntanay əd mizdagan kul,
d aytedan kul win miksadan-nak,
gər win muzaran wala win tan-wər-nəmos.

Alwaq ewad-du wa n əhluk ən win hallaknen əddənet!»

¹⁹ Təzzar innolam ahan n əlyibada ən Məşşina wa ihan ijənnawan, inafalal-du dağ-as əssənduq wa n arkawal ən tassağ. Dəffər awen əgan esman, əmalan-tu maslan d eggagan d ənəgəynəgəy n amağal əd dagrazan labasnen.

12

Ənəfilal ən təntut ta təgat tadist

¹ Tənafalal-du alyalamat zəwwərat dağ jənnawan: Alyalamat ten təmos tantut təlsət təfuk, təlla təllit daw daran-net, təssiwar təkəbbut ta n tarna təgat dağ maraw etran d əşşin. ² Təsikaray əd təlawayt n iguz n əmzur. ³ Tənafalal-du alyalamat iyyat dağ jənnawan. Imos awen əməxluk olân d əzzənəf n ağata igân təzzəwwərt səksədat. Iga təzuxay a n təmsay, ila əssa xafawan əd maraw əskawan, amaran əkkulluk n iyyan dağ xafawan win den təwar-tu təkəbbut ta n taymar. ⁴ Ifrağ əs təsbat-net təzunt ta n karadat n etran, igar-tan-du fəl amağal. Təzzar imal əməxluk wen dat təntut ta tətaggazat amzur fəl ad atşu barar-net dağ amazay wa da dağ du-z-ihəw. ⁵ Təntut ten təgraw barar ən yay, s ənta a z'izaran i təmattiwen n əddənet kul əs taymar təknət assahat. Təzzar immeway barar wen əs təxawit ən taymar ta fəl iqqim Məşşina. ⁶ Təddəggag təntut ten s əsuf təkka edag iskât Məşşina y awen. Den da a dər-əs z'agu ənəttaf har əgim n əzəl əd sanatat təmad, əd sədisat təmərwen.

⁷ Təzzar iga əməgər dağ jənnawan. Imməgar Mikayil d angalosan-net d əməxluk wen. Imməgar dər-san dəx əməxluk ənta d ark angalosan-net. ⁸ Mişan itawarna əməxluk d angalosan-net, ab-as dasan-t-illa adag dağ jənnawan. ⁹ Əməxluk wa zəwwəran en, imosan aşşol wa irəwan, as itawannu Iblis, itawann-as dəx Aşşaytan, s ənta a isaxrakan aytedan dağ adag kul wa əhan dağ əddənet, itawagar-du fəl amağal, iddew d angalosan-net. ¹⁰ Dəffər awen əsleğ y əməsli issohen igannu dağ jənnawan: «Əmərəddə alwaq wa n efsan osa-du! Əmərəddə Əməlinana isinafalal tarna-net, əd taymar-net! Əmərəddə taymar təlla gər fassan n Əlməsix-net, id Aşşaytan s ənta a isawaran imədrayan-nana lahanan dat Məşşina ehad ezal, a d-itawakkasan dağ jənnawan, itawagar-du s amağal.

11 Mišan ya ornan-tu mədrayan-nana win əs tarrayt n əzni n Əjemar əd tarrayt ən salan n Əlinjil win əmalan. Əqbalan tehakkay ən man-nasan, iba-tan dağ tarrayt ten. 12 Dawatat dağ adi ijənnawan əd win tan-əzdağnen! Mišan iket alğazab ill-ay y amaḍal əd gərwan, id Iblis izzəbbat-in sər-wan, ih-ay alham wəllen, fəlas alwaq əndərran a das d-iqqiman, amaran issân dağ awen.»

13 As inay əməxluk as itiwagar-du fəl amaḍal, istay tantut ta təggazat amzur ən barar ən yay. 14 Mišan tətawakfa təntut ten əşšin əfrutan ən tənagmart ta zəwwərat. Əmmək en dağ as təfrag şigget s əsuf, s adag wa dağ za tənəməggag d əşsol. Den dağ a dər-əs z'agu ənəttaf har karad elan d aganna. 15 Təzzar ifsa-du əşsol aman əmosan zun agarew dəffər təntut, fəl a tat-əbətən. 16 Mišan illil amaḍal i təntut. Ora amaḍal imi-net, ilmaz agarew wa d- ifsa əməxluk. 17 Əməxluk ih-ay alham labasan ən təntut, təzzar igla y ad ammagar əd maddanəs ən təntut win hadatnen, a tan-əmosnen win əbbərdəğnen y alwajiban ən Məşşina, tagayyen dağ batu ən Үaysa Əlməsix. 18 Dəffər awen ikka əməxluk təğadamayt n agarew, isammatag y əməgər.

13

Ənəfilal n əmudar səksədan wa d-igmadan agaraw

1 Dəffər awen oggeğ əmudar səksədan as d-igmad agaraw. Əmudar wen ila maraw əskawan, d əssa җafawan. Əkkulluk n iyyan dağ əskawan-net təwar-tu təkəbbut ta n tarna, amaran əkkulluk n iyyan dağ җafawan win əssa en, iwâr-tu esəm imosan ikus ən tarna i Məşşina. 2 Əmudar wa oggeğ den, ola d əzzənəf n adal. İdaran-net olân əd daran n əmudar iyyan igân urəs, imi-net ola d əmi n ahar. İkf-ay əməxluk tarna-net, əd təxawit-net ta n tağmar, əd tağmar zəwwərat. 3 İyyan dağ җafawan-net olâ d as ih-ay əbus inaqqin, mišan izzây. Əqqanan җafawan n aytedan n əddənət kul, əlkaman y əmudar wa səksədan en. 4 Əssəjadan aytedan dat əməxluk id tağmar-net a ikfa y əmudar. Əğbadan əmudar, gannin: «Məni-tu wa olân d əmudar wa səksədan, məni wa ifragan əməgər-net?» 5 İgraw əmudar wa səksədan en fərregat n igi ən batuten əmosnen zazwar ən man-net, d ikus ən tarna i Məşşina. İgraw turagat n igi ən mazalan win den, har əkkozat təmərwen ən təllit əd sanatat. 6 Ad itakkəs əmudar en tarna i Məşşina, d adag wa iha, əd win əzdağnen ijənnawan kul. 7 İtawakfa fərregat n əməgər əd mizdagan ən Məşşina əd tarna-nasan. İtawakfa tizart i tawşeten kul əd təmattiwen kul d aytedan a əşşewalnen awalan kul əd kallan kul.

⁸ Aytedan n əddənet kul ad t-əxbədan ar win as əktaban esmawan-nasan dəy əlkəttab wa n təməddurt harwa xur əxluk n əddənet. Elkəttab en in Əjemar wa igzaman iqqal takutay.

⁹ Wa isallin aslet! ¹⁰ Kud kasaw a itaggaz awedan ad t-iggəz. Kud ətəwənxa a z'agu əs təzoli, a sər-əs itəwənxu. Win əmosnen imizdagan ən Məşşina, alwaq-nasan da da wa n əşitəy ən zəmmerat d əzəgzan.

Ənəfilal n əmudar wa d-igmadan amaḍal

¹¹ Təzzar oggeç əmudar iyyan səksədan as d-iggəzzay igmâd-du amaḍal. Əmudar wen ila əşşin əskawan olânen əd win akar, amaran itaggu awal olan əd wa n əməxluk. ¹² İşşəşxal tarna kul n əmudar wa azzaran a d-osan dat-əs, təzzar eway-du s amaḍal əd win t-əwarnen, as əssəjadan y əmudar səksədan wa azzaran as izzay əbus-net imosan abus inaqqin. ¹³ Ad itaggu təlməxjujaten zawwarnen, har as temsay a d-izazabbat dəy jənnawan fəl amaḍal, əswâdan aytedan. ¹⁴ İssəxrak aytedan n əddənet əs təlməxjujaten şin as igraw igi-nasnat dat əmudar wa das-d-azzaran. Igannu y aytedan ad agin şaşşelan n əmudar wen, təsabasa takoba, iddar-du. ¹⁵ Igraw fərregat n igi ən man dəy şaşşelan n əmudar wa das-d-azzaran, təzzar eway-du awen əs şaşşelan wen as işawal, isasanxu dəy kərəz aytedan win ugaynen s ad t-əxbədan. ¹⁶ Eway-du as aytedan kul, gər win wər nəla almaqam, wala win t-əlanen, gər win məggərgas wala win məggənza, gər ilallan wala eklan, kul işahhaşşal-tan as iwar ejwal-net ifassan-nasan win əxil, madeç şikannaren-nasan. ¹⁷ Təzzar ab-as t-illa awedan ilân turagat n ad azzanzu, wala dəy azzanz-in ar s ad t-iwar ejwal n əmudar wen d esəm-net, madeç meḍan wa iddewan d esəm-net. ¹⁸ Den dəy ad za tagu addararat əs tayttay əd masnat. Wa ilan tayttay, ixşəbet meḍan n əmudar wen. Meḍan wen immittal esəm n awedan, amaran imos sədisat təmad əd sədisat təmərwen əd sədis.

14

Ənəfilal n Əjemar əd meḍan wa n 144000

¹ Əlasax asawad, oggeç Əjemar ibdâd fəl ədyaç wa n Səyon. Əllân xur-əs aytedan əmosnen temeday n əgim d əkkozat təmərwen d əkkoz. Aytedan win den iwâr esəm n Əjemar d esəm n Abba-net şikannaren-nasan. ² Əsley y əməsli a d-igmadan ijənnawan. Əməsli wen ola d əjit zəwwəran n aman aggotnen d əməsli n eggag zəwwəran, ola dəy d əməsli ən təhərdanen aggotnen. ³ Aytedan win den əssiggadan dəy təmmal iyyat taynayət dat təxawit ta

n taymar, dat mudaran win əkkoz d əmyaran. Wər t-illa awedan ifrâgan ad issən təmmal ten, ar temeday n əgim d əkkozat təmərwen d əkkoz, win d-isaddarfət Məşşina dağ aytedan n əddənet. ⁴ Əntanay wər sammadasan iman-nasan s əzzəna fəlas wər kala ad əlan tassağ waliyyat əd tədoden. Elkâman y Əjemar s adag kul wa ikka. Tawasadarfen-du dağ aytedan əmosan zun tənfa ta tazzarat ən təwəgas təkâtat i Məşşina d Əjemar. ⁵ Amaran imawan-nasan wər tan-d-igmed a imosan bahu, wər t-illa a imosan lahan a tan-iwâran.

Ənəfilal n angalosan win karâd əd mazalan win d-əssəglan

⁶ Təzzar oggeğ angalos iyyan as iggad dağ təsəggərigərəyt ən jənnawan. Angalos wen eway Əlinjil di iğlalan a z'iməl y aytedan n əddənet, dağ kallan kul əd tawşeten kul d awalan kul əd təmattiwen kul. ⁷ Idkâl əməsli-net wəllen igannu: «Səxmərat Məşşina, tagim-as adkul wa dər ihor, id alwaq osa-du wa dağ z'agu əşşəriğa-net. Əxbədat wa d-ixlakan ijənnawan d amağal d agaraw əd şittawen n aman.»

⁸ Inkar angalos iyyan wa n əşšin, ilkam-du i wen, igannu: «Babəylon ta n təmizwart, tuda! Awalla tuda Babəylon tas tallabast n igi-net əzzəna, ihan əlmital n əşəşwi n aytedan esmad, təsəxrək şimattiwen kul n əddənet, teway-du sər-əsnat as tanat-ibaz əşşəriğa ən Məşşina.»

⁹⁻¹¹ İlkam-as-du angalos iyyan wa n karad, igannu s əməsli ihhoken: «Aytedan win əxbadnen əmudar wa səksədan əd şaşşelan-net, iwâr-tan asannal-net dağ təkannaren, madəğ ifassan, win di ad aşwin esmad wa n alham ən Məşşina. Esmad wen izdâr amaran a dasan-itəwəggu dağ təkabart ta n alham ən Məşşina, agin alyazab səksədan igan əs təmsay d adayas-ən-tahart iryân, dat angalosan a zaddoggen d Əjemar. Əhu n alyazab-nasan, ill-ay har faw, amaran wərmad a dasan-tu-təlla təsasmit ehad, za wala ezal. ¹² Alwaq wen ənta wa n zəmmerat ən mizdagan ən Məşşina, əbbirdagnen y alwajiban-net, əknân değ təlğudəla i Үaysa.»

¹³ Dəffər awen əsleğ y əməsli a d-ifalan ijənnawan as inna: «Əktəb as: "Əbbilalan aytedan win as harwa əmərədda da ertâyan d Əməli, iba-tan değ ertâyan dər-əs." Awalla, inna Infas wa Zəddigan, assanfinet dağ əşşəğəl wa əgan, fəlas ad əgrəwan maruzat ən mazalan-nasan.»

Ənəfilal ən tənfa ta du-təğmadat amağal

¹⁴ Ælasaḡ asawad oggeḡ agnaw mallan. Agnaw wen tæqqim fall-as azzat tolât æd ta n aggadæm. Eḡaf-net tæwar-tu tækæbbut æn taḡmar tægât daḡ uræḡ, ittâf ælmoši iwalan wa n allay æn tæwægás.

¹⁵ Dæffær awen igmad-du angalos iyyan ehan n ælḡibada isaḡḡarat wællen inna i wa iqqiman fæl ægnaw: «Šæšḡæl ælmoši-nak wa n allay, talæya ḡarat. Alwaq ewad-du wa n æmilæy æn ḡarat, annabatan win æwarnen amaḡal æḡḡân.»
¹⁶ Tæzzar inkar wa iqqiman fæl ægnaw olay s ælmoši-net awa iwaran amaḡal ketnet daḡ tænfa.

¹⁷ Dæffær awen igmad-du angalos iyyan ehan n ælḡibada wa ihan ijønnawan. Ænta da ila ælmoši iwalan wa n allay æn tæwægás.

¹⁸ Tæzzar igmad-du angalos iyyan majmar wa n tækutawen. Angalos wen ixkâm fæl tæmsay, idkal æmæsli-net wællen, inna s æmæsli issohen i wa ittafan ælmoši iwalan wa n allay æn ḡarat: «Šæšḡæl ælmoši-nak wa n allay æn ḡarat, talæyaḡ-du ara n aḡyanab kul wa iwaran amaḡal, fælas šibašakšaken-net kul æḡḡânat, isimatag y æššæriḡa æn Mæššina.»
¹⁹ Tæzzar olay angalos s ælmoši-net, aḡyanab kul wa iwaran amaḡal, igar-tu ketnet daḡ tægdayt ta daḡ itawazmu aḡyanab, a tat-imosan tagdayt zæwwærat ta n alham æn Mæššina.
²⁰ Tæzzar itawadayazdayaz aḡyanab wen itawazma sædi y æḡræm. Ingay-du daḡ-as æzni har ilsa karadat tæmad æn kilaw, iggæzzay har ewad edag æn karad yalan.

15

Ænæfilal n angalosan win æssâ d agarâw

¹ Tæzzar ænaya daḡ jønnawan aḡalamat iyyat zæwwærat, tæknât æsæmmæklæl, tæmosat: Æssa angalosan ættafnen æssa alwabatan win ælkammen s æntanay a daḡ d-inda alham æn Mæššina.
² Ænayḡ arat olân d agaraw igân daḡ arat a d-isaktin tælfæn-jart tærtâyat æd tæmsay, amaran æbdâdan fall-as win ærzanen æmudar sæksædan æd šaššelan-net æd meḡan wa iddewan d esæm-net, ætâfan šihærdânen a tan-ikfa Mæššina.
³ Æssiggadan daḡ tæmmal n ækli æn Mæššina, a t-imosan Musa æd tæmmal ta n Æjemar, gannin:

«Igitan-nak zawwarnen, simaklalan, ya Æmæli Mæššina!

Kay a imosan mæššis æn tarnæ kul!

Tarrayen-nak æntanatay a oḡadnen, æmosnat tidæt, ya Æmænokal æn tæmattiwen.

⁴ Ma imos wa ewadan a kay wær iksud ya Æmæli?

Ma imos wa wær za næssæḡmær esæm-nak?

Fælas kay ḡas a imosan æmizdag.

Amaran tawşeten kul a d-asinat, əxbadnat-kay, fəlas igitan-nak oğâdnen a nafalalnen.»

Şikərwasen şin əssâyat n alham ən Məşşina

⁵ Dəffər aratan win den, əswadağ oggeğ edag wa zəddigan n ahaket wa n əmənəy as innolam dağ jənnawan.

⁶ Təzzar əgmadan-du angalosan win əssa edag wa zəddigan əttâfan alwabatan win əssa, əlân tabdoq ən lin iqqitasan isiraqqen, otâban idmaran-nasan əs sutab n urəğ.

⁷ Inkar iyyan dağ mudaran win əkkoz, ikfa angalosan win əssa əssayat təkərwasen n urəğ ədkârnen alham ən Məşşina di iddaran har faw! ⁸ Idkar adag wa zəddigan əhu a d-ifalan tanaya ən Məşşina əd tarna-net. Wər t-illa i ifragan iguz n adag wa zəddigan en, iket wər ənden əssa alwabatan win d-ewayan angalosan win əssâ.

16

¹ Dəffər awen əsleğ y əməsli zəwwəran as d-igmad ehan n əlyibada, inna y angalosan win əssâ: «Ağliwat tənğəlam fəl amađal ketnet əssayat təkərwasen şin alham ən Məşşina.»

² Təzzar igla wa azzaran dağ-san, inğal təkərwast-net fəl amađal. Əwatnat şiqqas labasnen aytedan kul win iwar ejwal n əmudar, əxbâdan şaşşelan-net.

³ Inğal angalos wa n əşşin təkərwast-net fəl gərwan, əqqalan aman-nasan azni olân d əzni n ənəmmettən. Immut id t-illa əmudar kul ihan igərwan.

⁴ Təzzar inğal wa n karad dağ-san təkərwast-net dağ təsəssəngay əd şittawen n aman, əqqalnat azni. ⁵ Əsleğ y angalos wa inəttafan d aman igannu:

«Toğâda, kay wa t-illan əmərədda, təllec-qu kala da, təmosağ əmizdag, id əmmək wa da

as təkəməğ aratan win y aytedan n əddənət.

⁶ Fəlas tanağla a əgan azni ən mizdagan d ənnəbitan, amaran təkfeq-qan azni y ad t-aşwin, id əhoran dər-əs.»

⁷ Əsleğ i majmar wa n təkutawen igannu:

«Awalla, Əməli Məşşina

s ənta a imosan məşşis ən tarna kul, əlxəkuman-net tidət a mosan, oğâdan.»

⁸ Inğal angalos wa n əkkoz təkərwast-net fəl təfuk, tətawakfa təfuk fərregat n akaway n aytedan. ⁹ Tosa-du tüksay labasat ad təkəggay aytedan. Təzzar ad takasan tarna y esəm ən Məşşina s ənta a ixkaman dağ alwabatan win, edag an a das-ətuban əssəxməran-tu.

¹⁰ Təzzar inçal angalos wa n səmmos təkərwast-net fəl təxawit ta n taymar n əmudar wa səksədan. Əlsanat šiyyay taymar n əmudar, əgan aytedan təkəraçit tas har əqqıman əddâdan idədwan-nasan. ¹¹ Ad takkasan tarna i Məşşina di n Əməli ən jənnawan fəl əddəlil ən təsənnay səksədət ta taggin əd şiqqas şin tan-əhanen, wər ətuban daç mazalan-nasan.

¹² Inçal angalos wa n sədis təkərwast-net fəl agarew wa zəwwəran n Efrat. Əstakan aman-net, fəl ad təmmutəg tarrayt ən mənokalan a d-əfalnen dənnəg. ¹³ Təzzar oggeç imi n əməxluk, əd wa n əmudar, əd wa n ənnəbi ən bahu as tan-d-əgmədan karad aşşayatinan əhânen assawwarat ən garan. ¹⁴ Aşşayatinan win den əntanay a tagginen təlməçujaten, əntanay deç a z'akkinen imənokalan n əddənet kul y a tan-d-əşşidəwan y əməgər wa z'agin daç əzəl wa zəwwəran n Əməli Məşşina di s ənta məşşis ən tarna kul. ¹⁵ Ənta da awa z'agin: a din-agay assa zun wa d-itaggu abaydag. İbbilal wa okayän, iqqân isəlsa-net fəl ad wər ijəwənkət izzâf tətəwənəy alçawrat-net. ¹⁶ Təzzar əşşədawan-du aşşayatinan imənokalan n əddənet kul daç adag iyyanda. Edag wa itawann-as daç təlyibrit: «Armagedun».

¹⁷ Inçal angalos wa n əssa təkərwast-net daç alhawa. Təzzar igmad-du əməsli issohen ehan wa zəddigan əd təxawit ta n taymar ən Məşşina igannin: «Arat kul içrad!» ¹⁸ Əgan esman əd maslan d eggagan, iga amaçal ənəgəynəgəy as wa d-əwəran aytedan tesayt n amaçal wər iga ənnuç-net. ¹⁹ Təzzar iga əçrəm wa zəwwəran ən Babəylon karadat təzunen. Barajjen çərman ən kallan kul. Açrəm wa zəwwəran ən Babəylon ikittəw Məşşina ibakkadan-net. Adi a fəl t-işşəşwa təkabart n esmad n alçanab immittalan alham-net d əşşəriça-net labasnen wəllen. ²⁰ Təzzar əmasan kallan kul win gərwətlan, aba təmayyamayt n ədçayan. ²¹ A du-tifətəqqen dagrazan as akkiyyan daç-san imos əzuk-net edag n əkkozat təmərwən ən kilaw, rattakan fəl aytedan. Ad takkasan aytedan tarna i Məşşina fəl əddəlil n alwaba wa n dagrazan en, fəlas alwaba iknân təzzəwwərt wəllen a imos.

17

Awa inafalalan daç taneray

Əşşəriça wa z'itəwəxkəman i təkərwat ta labasat

¹ Dəffər adi osa-du iyyan daç əssa angalosan win əttafnen əssayət təkərwəsen, işşewal-i, inn-i: «İyyaw a kay-assaknaç əşşəriça ən təkərwat labasat ta təqqimat fəl

aman aggotnen. ² Ənta a dər namaggan mənokalan n əddənet əzzəna, təzzar ad taggin aytedan n əddənet əzzəna s igət, əknân tara n awen, zun awedan isassin esmad s igət amaran ikna tara n awen.» ³ Eway angalos iman-in s əsuf, tobaz-i tarna n Infas wa Zəddigan. Təzzar oggeş tantut təqqimat fəl əmudar zaggaxan əwâran əsmawan aggotnen əmosnen ikus ən tarna i Məşşina. Əmudar wen ila əssa şafawan əd maraw əskawan. ⁴ Tantut ten təlsa tabdoq zaggaxat d iyyat təgât təzuxay tənğât, təqqân urəş əd təhun şin əlanen almaqam, d əljuhər. Təttâf təkabart n urəş tədkârat imazalan zizallatnen aggadəm, d ammas, win tişit-net təməggit n əzzəna. ⁵ Təkannart-net iktâb fall-as esəm âs almaşna-net imos əssir. Ənta da awa inna akatab wa iwaran təkannart-net: «Aşrəm wa zəwwəran ən Babəylon, ənta imosan anna ən təkərwaten əd mazalan win zazallatnen aggadəm.» ⁶ Təzzar oggeş tantut ta təgat iman ən mizdagan aggotnen əd nalkiman aggotnen ən Şaysa win fall-as tagganen təgəyya tolayat. İqqal igi ən man wen arat a tat-isimaswadan zun tassay n esmad. As tat-oggeş, iqqan aşaf-in wəllen.

⁷ Təzzar inn-i angalos: «Mafel iqqân aşaf-nak? A dak-əmələş əssir wa təssəkna təntut-ən d əmudar wa təwan, əd şafawan win əssa, d əskawan win maraw. ⁸ Əmudar səksədan wa toggeş əddi, kala ad t-illa, mişan əmərədda ab-as t-illa. Daş alwaq wər nəggug, a d-igməd əşəşi wa wər nəla eder, akku edag n əhluk. Amaran aytedan n əddənet kul win as wər əkteban esmawan-nasan daş əlkəttab wa n təməddurt harwa şur ənətti n əddənet, ad əqqənan şafawan-nasan as ənayan əmudar id kala ad t-illa, dəffər adi ab-as t-illa, amaran ijwâr a d-osa.

⁹ Den daş ad təga addararat əs tayttay əd masnat. İşafawan win əssa a, almaşna-nasan əssa ədşaxan win fəl təqqim təntut. Əmosan deş əssa mənokalan ¹⁰ as səmmos daş-san ab'as t-əllan, iyyan ill-ay, ixkâm, iyyan amaran harwa da wər d-osa, amaran as d-osa, ad agu arat n azzaman. ¹¹ Əmudar səksədan was kala ad t-illa, ab'as t-illa əmərədda, ənta da əmənokal a imos. Ənta a imosan wa n əttam, idrâw deş əlməxsud iyyanda d əssa win hadatnen, amaran ad akku edag n əhluk. ¹² Maraw əskawan win tənayaş, almaşna-nasan maraw mənokalan as harwa da wər əğrewan təşmar-nasan, mişan ad əğrewan arat n azzaman ən təşmar əntanay d əmudar. ¹³ İduf iyyanda a əgan, amaran əkfân tarna-nasan əd təşmar-nasan y əmudar. ¹⁴ Ad ammagaran d Əjəmar, mişan a tan-arnu arzen, id ənta a imosan Əməli ən malan, imos əmənokal ən mənokalan. Aytedan win du-tawaşranen, tawasanafran

æmosan alyxadilan, ad idawan d Æjemar day tarna ta du-z-
agu den.»

¹⁵ Iгла angalos iššewal, inn-i: «Aman win toggeḡ təqqim
fall-asan təkawat, adi šimattiwen əd tiddawaten əd
tawšeten d awalan. ¹⁶ Maraw əskawan win toggeḡ d
əmudar, ad azzangen təkawat, əkkəsan daḡ-as tələmmest,
əzzəfan-tat, atšin isan-net, sərrəkəmnen-tat əs təmsay.
¹⁷ Awalla Məššina a d-igan daḡ wallan-nasan as ad am-
mazalan s awa ira, ammazalan əlməxsud iyyanda, akfin
taḡmar-nasan y əmudar. Arat wen daḡ a z'agin iket wər
d-ewed alwaḡ wa daḡ z'andin aratan win ixkam Məššina.
¹⁸ Amaran tantut ta toggeḡ den, təmmittal aḡrəm wa
zəwwəran azzaran i mənokalan n əddənet.»

18

¹ Dəffər awen oggeḡ angalos iyyan ilân taḡmar wəllen
itazabbat-du daḡ jənnawan, imalawlaw amaḡal ketnet s
ənnur ən tanaya-net. ² Inna s əməsli issohen wəllen:

«Babəylon ta n təmizwart, tuda!

Awalla tuda Babəylon!

Təqqal edag ən təməḡsurt n aššayatınan

d adag ən təməḡsurt ən kələsuf

d asammanay ən gəḡad kul win xaramnen

[d asammanay n əzzənəfan kul

ən mudaran win xaramnen]

əd win wər əren man əd win ətawaglafnen.

³ Šimattiwen n əddənet kul əddəwnat dər-əs

daḡ arak deranan-net labasnen n igi n əzzəna,

imos awen zun esmad sassinat.

Imənokalan n əddənet nimaggan dər-əs əzzəna,

kəl jola n əddənet dey

isaggargas-tan əḡrəm wa n Babəylon,

s ərrəzəḡan-net əknānen igət.»

⁴ Təzzar əsleḡ y əməsli iyyan as d-igmad ijənnawan inna:

«Egmədat-du aḡrəm

wədi kawanay win əmosnen tamattay-nin,

fəl ad wər təgem ibakkadan win itaggu,

awəd-kawan-in albala wa fall-as z'uden.

⁵ Fəlas ibakkadan-net əḡlan har ewadan ijənnawan,

amaran Məššina ikittəw

arak mazalan labasnen n əḡrəm wədi.

⁶ Ɔrzəmat-as s əmmək was irazzam,

takfim-tu ənətfus ən mazalan-net!

Təkabart tas ikkat, əkətət-as ənətfus-net.

⁷ Ɔmmək was idkal iman-net,

immozal arat kul wa əran man-net,

əmmək di daḡ as agiwat-as əzəḡḡəzzəb səksədan,

təsəssugim-tu təkənzert labasat ogdānen d awen da,
id tənna a itaggu əxrəm wa n Babəylon:

"Təxawit ta n təmənukəla a fəl əqqima,
wər əmosa tantut as aba aləs-net,
wər ilkem ad əggāzaḡ afartay."

⁸ Awen daḡ a fəlas albalatan zawwarnen

əddi win das-ənsanen:

Təmattant əd təkənzert labasat əd laz.

ʕzəl iyyanda a fall-as z'uden albalatan win di,

təsərrəkəmmət-tu deḡ temsay.

Awalla, ʕməli Məššina

imosan Məššis ən tarna

a itawaddaban əxrəm wen.»

Isəmmədənnigan əgānen fəl əxrəm ən Babəylon

⁹ Imənokalan n əddənət kul win dər-əs əddewnen,
nimaggan dər-əs əzzəna d aratan win ərən man-nasan daḡ
əddənət, ad ənəyan əhu ən təmsay ta tu-za-təsərrəkəmmət,
ad hallin səkkələlan fəl awa z'agu əxrəm wen daḡ alḡazab.

¹⁰ A dər-əs nəməggəgan, fəl təksəda n a tan-in-awəd
alḡazab wa z'agu den. Ad gannin:

«Xašša! Xašša wəllen

y əxrəm wa zəwwəran ən Babəylon ilan tarna.

Alwaḡ iyyanda ḡas a fəl t-iwwəddab Məššina!»

¹¹ Kəl jola n əddənət kul ad hallin fəl tərəmməḡ y əxrəm
wen. Wər t-illa awedan a ḡur-san izanzin awa əssətagan,

¹² ḡər urəḡ, wala azrəf, wala šihun šin əlanen almaḡam,

wala əljuhər, wala lin, wala tabdoḡ təḡāt təzuḡay təḡḡāt,

wala əlxərir, wala tabdoḡ ta təḡat təzuḡay təhossayət, wala

eškan kul win as izod aḡu-nasan, wala aratan win əganen

daḡ təhunt təkənāt təməllay s ənta daḡ itaggu uḡən wa n

xummayša, wala win eškan win əlanen almaḡam, wala

win daroḡ, wala win təzoli, wala win təhun šin hossaynen,

¹³ wala eḡel n ašək was itawannu kanel, wala əzzənəfan n

annabatan win əlanen aḡu, wala alwarditan, wala aḡutan

win əzodnen əmosnen mir d əlməsək, wala esmad n

alḡanab, wala widi wa n azzayt, wala eḡel, wala alkama,

wala šitan, wala ayfad, wala əggəsan wala amalankaytan

wala eklan, wala ikefəlan. ¹⁴ Ad gannin kəl jola y əxrəm

wen:

«Aratan win ərən man-nak kul

əddəggagan fall-ak.

Tənəfləyt, d aratan win hossaynen,

əzodnen aba-tan fall-ak.

Wər ilkem ad əlasan ətəwənay!»

¹⁵ Kəl jola win əggəḡasnen daḡ əsətəḡ wa taggin daḡ
əxrəm wen, a dər-əs nəməggəgan fəl təksəda n a tan-in-

awəd alḡazab-net. Ad hallin, sikalalan; ¹⁶ gannin:

«Xašša! Xašša wəllen
y əxrəm wa zəwwəran a!
Dat awa ilsa tabdoq ən lin ihossayan,
əd tabdoq təgât təzuyay təñğât
əd tabdoq ta təgat təzuyay təhossayat,
iqqân uxənan hossaynen n urəx
əd təhun šin əlanen almaqam d əljuhər.

¹⁷ Amaran alwaq iyyanda xas
a fəl aba təgərgist ten!»

Aytedan kul win azzarnen y əylalan win aman əzzozalan-
tan d aytedan kul win šakalnen fəl gərwan win zawwarnen
əd win mašşayalan n əyləlan n aman əd win əganen jola
gər kallan əs tarrayt ən gərwan, əbdadan-in dağ igəğ
¹⁸ assaxa wad ənayan əhu ən təmsay ta təsirəkəmmet
axrəm wen, sakkarayan gannin:

«Wər kala ad itawanay
arat šilat ən wa igraw əxrəm oğdân əd wa.»

¹⁹ Sawaran ixfawan-nasan aboqqa, hallin, əxşâdan man-
nasan wəllen, sikarayan gannin:

«Xašša! Xašša wəllen
y əxrəm wa zəwwəran a,
s ənta a dağ əggərgasan aytedan kul
win əlanen iylalan n aman win zawwarnen,
mišan alwaq iyyanda xas a fəl iğrad ahlu!»

²⁰ «Dawatat ijənnawan!

Axrəm iğrad ahlu!»

Dawatat kawanay da win əmosnen imizdagan ən Məšşina
əd nəmmuzal d ənnəbitan.

Awalla, Məšşina iwwəddab
axrəm wa fəl təkma ta dawan-iga.»

²¹ Təzzar idkal angalos iknân təla ən tarna təhunt
zəwwərat tolât əd ta fəl itawažad alkama, igar-tat dağ
agarew igannu:

«Ənta da da əmmək was din-z-itəwəgər
əxrəm wa zəwwəran ən Babəylon
əs təməwit labasat,
amaran wər z'iləs ətəwənay dəffər adi.

²² Wər ilkem ad əlasan aytedan
tesalay dağ əxrəm wen
i səwat win əganen əs təhərdânt wala asak,
wala win əganen əs təsənsəq, wala esək.

Wər ilkem a dağ-as itiwənan əşşəxəl
wa n əfus, wala win tu-tagginen.
Wər ilkem a dağ-as itiwəsla y əməsli
n əzed n attaxam.

²³ Wər ilkem a dağ-as imilawlaw

ənnur ən fətəla
 za wər ilkem a dağ-as ilas ətəwəsła
 y əməsli n əmərmuš əd təmazlayt-net.
 Amaran ənta da əddəlil wa fəl iga adi:
 "Kəl jola-nak, əntanay a ogarnen
 təla ən batu dağ əddənet kul,
 işağawan-nak değ əssixrakan šimattiwen kul.
²⁴ Kay ağrəm wa n Babəylon,
 a dağ itawanyal əzni n ənnəbitan
 d əzni ən mizdagan ən Məššina
 d aytedan kul win tawanyanen dağ əddənet."»

19

Təmmalen əgânen dağ batu n əhluk ən Babəylon

¹ Dəffər awen əsleğ dağ jənnawan y arat olân d əməsli
 issohen n əljəməğat tagget təgannit:

«Alleluya!

Efsan, əd tanaya,

əd tarna in Əməli-nana Məššina,

² fəlas əlxəkuman-net tidət a əmosan, oğad değ.

Obaz s əššəriğa-net təkərwat ta labasat

təssəxrakat əddənet əs tišit-net təməggit n əzzəna,

izzəzal değ əzni ən nağbidan-net

wa inğal əfus ən təkərwat ten.»

³ Təlas aljaməğat ten tənna:

«Alleluya!

Əhu ən təmsay ta təsaqqadat ağrəm wen,

ill-ay har faw.»

⁴ Təzzar garaffen əmyaran win sanatat təmərwən d
 əkkoz, əntanay əd mudaran win əkkoz, əğbadan Məššina,
 iqqiman fəl təxawit ta n tağmar-net, gannin:

«Amin! Alleluya!

Təmmal i Məššina!»

⁵ İğmad-du əməsli təxawit ta n tağmar en, inna:

«Agiwat təmmalen y Əməli-nana,

ketnawan inəğbidan-net, win t-əksudnen

gər win wər nəla almaqam wala win t-əlanen!»

Takrəst n Əjəmar

⁶ Təzzar əsleğ y arat olân d əməsli ən tiddawat tagget,
 olân d əjit n aman aggotnen, ola değ d eggagan labasnen as
 inna:

«Alleluya!

Fəlas Əməli Məššina di ən məššis ən tarna,

issəbdad tağmar-net.

⁷ Fəliwəsətana, naknu tədəwit, nəssəğmər Məššina,

fəlas izəzlay n Əjəmar ewadan-du,
 amaran təmazlayt-net təsimatag.
 8 Tətawakfa tabdoq ən lin wa n ələsəl,
 itibələzzen, iqqitasan, y a tat-talsu.»

Tabdoq ən lin wa ihossayan en, almayna-net imazalan
 oğâdnen win əgan mizdagan ən Məşşina.

9 Inn-i angalos ad əktəbəx as: «Əbbilalan win
 tawaxranen s ad əggəzan izəzlay n Əjəmar!» Dəffər adi
 inn-i: «Batuten ən tidət awa âs Məşşina iman-net as tanat-
 iga.» 10 Təzzar garaffe xur daran n angalos wen y ad t-
 əxbəda, inn-i: «Alak! Ad wər tagax adi! Nak ənağbid ən
 Məşşina a mosa wa da təmosa kay əd mədrayan-nak əd
 təmədrayen-nak a tagayyatnen fəl Yaysa. Məşşina as kay-
 iwar a tu-təxbəda. Amaran, təgəyya fəl Yaysa, almayna-
 net emel ən salan ən Yaysa win d-izazzabbat Infas wa
 Zəddigan.»

Ənəfilal n awedan iwânan ays mallan

11 Dəffər awen oggeç ijənnawan as ənnolaman, ih-en ays
 mallan, amaran wa t-iwanan esəm-net «wa imosan Alxədil,
 imos Tidət». Elxəkuman-net oğâdan, itamagar dəx fəl
 tidət. 12 Şittawen-net əmosnat zun abalagleg ən təmsay,
 eyaf-net əwarnat-tu təkəbba ən tağmar aggotnen. İktâb
 fall-as esəm as wər t-illa i t-issânan ar ənta. 13 Amawan n
 ays wen esəm-net «Awal ən Məşşina», amaran ilsa tabdoq
 təlmâxat dəx əzni. 14 Elkâman-as gənan ən jənnawan
 əwannen əggəsan mallolnen. Ketnasan əqqânan tabdoq
 ən lin wa n ələsəl, iqqitasan, igân təməllay təsiraqqet.
 15 Təgmad-du takoba təkñât tawala imi ən wa iwanan ays
 en, fəl ad tanxu şimattiwen n əddənet. Amaran wa iwanan
 ays en ad ixkəm fəl təməttiwen n əddənet əs tağmar təkñât
 assahat. Ad azmu alxanab dəx təgdayt zəwwərat y a sər-əs
 agu esmad immittalan alham labasan wəllen ən Məşşina
 di ən Məşşis ən tarna. 16 Təkadkat-net əd tağma-net iktâb
 fall-asnat «Əmənokal ən mənokalan d Əməli ən malan.»

Ənəfilal ən saksas zəwwəran ən matsân ən təməxsə

17 Dəffər awen oggeç angalos ibdâdan dəx təfuk.
 İsağxarat s əməsli issohen wəllen i gəğad kul win
 əggadnen dəx təsəggərigərəyt ən jənnawan, inn-asan:
 «Ayewat, idawat-du ketnawan i mensewan əknânen igət
 win Məşşina, 18 fəl ad tatşim şiməxsə ən mənokalan
 əd muzaran ən sojitan, əd nammagaran, əd təməxsə n
 əggəsan əd win tan-əwannen, əd təməxsə n aytedan kul,
 gər wa imosan əlləlli wala akli, gər wa wər nəla almaqam
 wala wa t-ilan!»

Ənəfilal n əmudar d ənnəbi ən bahu

¹⁹ Oggeḡ əmudar səksədan, əd mənokalan n əddənət, əd gənan-nasan əddewan y ad ammagaran əd wa iwanan ays, d agan-net. ²⁰ Təzzar ittərmas əmudar ittərmas deḡ ənnəbi ən bahu wa dər iddew. Ənnəbi ən bahu wa, iga aḡalamaten zawwarnen dat əmudar wen. Əmmək en daḡ as issəxrak win iwar ejwal n əmudar, əḡbādan deḡ šaššəlan-net. Əmudar wa, ənta harkid ənnəbi ən bahu wa, tawagaran da əddāran daḡ aḡazar ən təmsay d adaxas-əntahart irḡân. ²¹ Awa d-iqqiman daḡ agan wen ketnet tənḡ-ay takoba ta du-təḡmadat imi ən wa iwanan ays. Təzzar əyyəwanan gəḡad wəllen daḡ təməxsə-nasan.

20*Ənəfilal n əməxluk iqqānan har əgim n awatay*

¹ Dəffər awen oggeḡ angalos itazabbat-du igmād-du ijənnawan, ittāf daḡ əfus-net təsassarut n əḡəḡi wa wər nəla eder, ittāf deḡ asassar zəwwəran. ² Obaz əməxluk, a t-imosan aššol wa irəwan, a imos Iblis, itawann-as deḡ Aššaytan, ig-as tewaynəy a za tagit əgim n awatay. ³ Igar-tu angalos daḡ əḡəḡi wen, ihar-tu fall-as, iḡfal-tu s əlluḡ fəl ad wər iles əsəxrək ən təməttiwen har agu əgim n awatay. Dəffər awen ilzām ad annalam ammaru har arət n azzaman.

Ənəfilal n ətəwərna n Aššaytan

⁴ Oggeḡ šixiwa ən taḡmar. Win fall-asnat əqqimnen əgrāwan tarna n ad əqqəlan imašraḡan. Oggeḡ iman n aytedan win as tawasaben rawan-nasan fəl əddəlil ən təḡəyya tolāḡat ta taggin daḡ batu ən Ḳaysa d awal ən Məššina. Oggeḡ deḡ aytedan win wər nəḡbed əmudar wa səksədan za wər əssəjadan i šaššəlan-net, wər tawajajwalnat təkannaren-nasan wala ifassan-nasan. Aytedan win den əqqalan-tan-du man-nasan, namaggazan taḡmar d Əlməsix, amaran awen ad agu əgim n awatay. ⁵ Ənta den da tanakra ta tazzarat ən nəmməttan. İnəmməttan win hadatnen, wər d ənkeran har inda əgim n awatay wen. ⁶ Əbbilalan aytedan zaddoggen win d-ənkarnen daḡ tanakra ən nəmməttan ta tazzarat! Aytedan win di wər tan-in-təkka Jahannama əd wala! Əntanay a z'əqqələn ilimaman ən Məššina d Əlməsix, amaran a dər-əs nəməḡḡəzan taḡmar-net har əgim n awatay.

⁷ As inda əgim n awatay wen, a d-itəwəyyu Aššaytan daḡ kasaw wa iha, ⁸ aglu ad isaxrak šimattiwen a əwarnen tesayt n amaḡal, əmosnen Yajuj əd Majuj. A tan-d-iššidəw y əməḡər, amaran əḡân igət wa n təblalen n amaḡal a

dabayyaknen daȝ afay n aȝaraw. ⁹ Æssəwalan əddənet ketnet, əbazan aȝrəm wa iknan ətəwəra, ȝalayȝalayan imizdagan ən Məššina. Mišan təzzəbbat-du təmsay daȝ jənnawan, təsarrakammat-tan. ¹⁰ Iblis s ənta dasan-azzaran, isaxrak-kan, itawagar daȝ aȝazar ən təmsay təȝât s adaȝas-ən-tahart wa iha əmudar d ənnəbi ən bahu. Den daȝ a dasan-z-itəwəȝȝu ətəwəzəȝəzzab səksədan ehad ezal har faw.

Ænæfilal n əššəriȝa ən Məššina

¹¹ Ogge təxawit ən taȝmar təknaţ təzzəwwərt, təkna deȝ təməllay, əd wa fall-as iqqiman. Əddəȝȝagan-as jənnawan əd mədlan, əȝȝugan-tu, wər d-oyyen wala ədəriz. ¹² Dəffər awen oggeȝ inəmməttan win wər nəla almaȝam, harkid win t-əlanen əbdâdan dat təxawit ta n taȝmar en. Ænnolaman əlkættaban. Innolam əlkættab iyyan s ənta a imosan əlkættab wa n təməddurt. Tawaxkaman nəmməttan s awa ihan əlkættaban win den, ewâl awen əs mazalan-nasan. ¹³ Ikfa-du aȝaraw inəmməttan win t-əhanen, təkfa-du təməttant d alaxirat inəmməttan win-nasnat, itawaxkam akkiyyan daȝ-san əs mazalan-net. ¹⁴ Tətawagar təməttant d alaxirat daȝ aȝazar ən təmsay. Aȝazar ən təmsay wen ənta a imosan Jahannama. ¹⁵ Awedan ketnet was wər ikteb esəm-net daȝ əlkættab wa n təməddurt, itawagar daȝ aȝazar ən təmsay wen.

21

Ænæfilal ən jənnawan d amaȝal win aynaynen

¹ Dəffər awen oggeȝ ijənnawan aynaynen, d amaȝal aynayan. Ijənnawan win ərəwnen, d amaȝal wa irəwan, ab'as t-əllan, igərwan deȝ ab'as t-əllan.

² Təzzar oggeȝ aȝrəm wa zəddigan, a t-imosan Yerusalem ta taynayət, tətazabbat-du daȝ jənnawan, issiȝl-et du Məššina. Təsimatag zun təmazlayt təȝât əddəluga-net win hossaynen y ad tammanay d aləs-net. ³ Æsleȝ y əməsli issohen a d-igmâdan təxawit ta n taȝmar igannu:

«Ëmərədda ehan ən Məššina illa ȝər aytedan.

A dər-san inəməȝsər, əqȝələn šimattiwen-net.

Məššina iman-net as ȝur-san z'iməl, iqqəl Ëməli-nasan.

⁴ A dasan-iməs id t-əllân məttawan,

ib'as tu-təlla təməttant,

wala təweškent, wala təkurayt, wala tisanant,

fəlas aratan win d-azzarnen, ab'as t-əllan.»

⁵ Inn-i wa iqqiman fəl təxawit ta n taȝmar: «Ënəy! Aratan kul sammattayaȝ-ȝan əȝe win aynaynen.» Təzzar inna: «Ëktəb, fəlas batuten šin əssiflasnat, əmosnat deȝ tidət.»

⁶ Inn-i: «Arat wa, iga! Nak a imosan Alfa, əmosay dəy Omega, almayna wa azzaran ilkâm. Wa iha fad, nak a das-z-agin təhəkkut təmosat tessay dəy şat ta dəy du-naggayan aman win sidurnen. ⁷ Awedan kul wa d-ornan, a çur-i igrəw aratan win, əmosan-as təhəkkut, əqqələy dəy Əməli-net, iqqəl barar-in. ⁸ Mişan awedan wa imosan əddəyyus, d aytedan win wər nəxdel əd win tamazalnen awa labasan əd maggan ən man əd win tagginen əzzəna əd məşşayawan əd nəxbidan n əssənəman əd nəsbuha kul, əntanay tədagart-nasan iguz ən Jahannama təmosat açazar ən təmsay tərçāt s adayəs-ən-tahart.»

Awa inafalalan i Yaxya alwaq wad iwar adçay wa zəwwəran: Yerusalam ta taynayət

⁹ Təzzar ikk-i-du iyyan dəy angalosan win əssâ əttâfnen əssayat təkərwasen şin ədnaynen əssa alwabatan win əlkamnen inn-i: «Iyyaw, a kay-assaknaç tantut ta n təmazlayt n Əjəmar.» ¹⁰ Eway-i angalos s afalla n ədçay iyyan zəwwəran, zagren, tobaz-i tarna n In-fas wa Zəddigan, issəkn-i açrəm wa zəddigan, a t-imosan Yerusalam, a d-izzibben dəy jənnawan, ifal-du çur Məşşina. ¹¹ Açrəm wen igrâw tanaya ən Məşşina. Iga əmələwləw a n təhunt təlât almaçam as itawannu jasfa, təçât əçətəs wa n təlfənçart. ¹² İçlay-tu açalla zəwwəran zagren, ilân marawat təsəhar əd sanatat a çur əllân maraw angalosan d əşşin. Şisəhar şin den əktâban fall-asnat esmawan ən marawat tawşeten əd sanatat şin maddanəs n İsrayil. ¹³ Taçərt n açalla en ta n dənnəç təla karadat təsəhar, ta n tamasna dəy təla karadat, ta n agala təla karadat, ta n ataram dəy təla karadat. ¹⁴ Açalla wen ila marawat təsəttəytay əd sanatat a das-əmosnen şičurad, amaran əwaran-tanat maraw esmaçwan d əşşin əmosnen esmawan ən maraw nəmmuzal d əşşin n Əjəmar.

¹⁵ Angalos wa di-işşewalan ittâf əsəkət imosan agabal ən telant igân dəy urəç y a sər-əs ikət açrəm əd təsəhar-net, d açalla wa t-içlayan. ¹⁶ Açrəm wen ogda fəl gannatan-net kul win əkköz. Tamawen-net kul togda təzzəçrət-nasnat, harkid sa sər afalla. İkat-tanat angalos s agabal wa n urəç en, əqqalnat əşşin gim ən kilaw əd sanatat təmad. ¹⁷ İkat angalos təzzəçrət ta n afalla n açalla wa içlayan açrəm en, iqqal temeday n əçil d əkközət təmərwen d əkköz. Takkot ten ig-et angalos s əmmək was tat-taggin aytedan fawda. ¹⁸ Açalla n açrəm wen igâ əs təhun əhossaynen əlânen almaçam as itawannu jasfa, açrəm amaran iman-net iga dəy urəç wa izdaran igân əçətəs wa n təlfənçart. ¹⁹ Şisəttəytay şin əmosnen şičurad n açalla ədlâçnat s

æzzænəfan ən təhun kul šin hossaynen əlanen almaqam. Təsəttəytəyt ta tazzarat təga daɣ jasfa, ta n sanatat təga daɣ təhunt as itawannu safir, ta n karadat təga daɣ təhunt as itawannu kalsaydun, ta n əkkozat təga daɣ təhunt as itawannu emrod. ²⁰ Ta n səmmosat təga daɣ təhunt as itawannu onəyks, ta n sədisat təga daɣ təhunt as itawannu sardwan, ta n əssayat təga daɣ təhunt as itawannu kərzolit, ta n əttamat təga daɣ təhunt as itawannu beril, ta n tazayat təga daɣ təhunt as itawannu tofaz, ta n marawat təga daɣ təhunt as itawannu kərizofəraz, ta n marawat d iyyat təga daɣ təhunt as itawannu həyasint, ta n marawat əd sanatat təga daɣ təhunt as itawannu ametist. ²¹ Šisəhar šin marawat əd sanatat en, marawat təhun n əljuhər əd sanatat a daɣ əganat. Əkkulluk ən təsəhərt təga daɣ təhunt iyyadda n əljuhər. Amaran tarrayt ta zəwwərat n əɣrəm en, təga daɣ urəɣ wa izdaran igân əɣətəs a n təlfənjart.

²² Aɣrəm wen wər daɣ-as hənnəya ehan n əlɣibada. Awalla Əməli Məššina di ən məššis ən tarna a imosan ehan-net wa n əlɣibada, ənta d Əjemar. ²³ Aɣrəm wen wərmad iddirar s ənnur ən təfuk za wala wa n təllit, fəlas tanaya ən Məššina a tu-təsammalawlawat, amaran Əjemar a imosan ənnur-net. ²⁴ Ənnur-net a daɣ-as jəwənkətnat təmattiwen, asin-t-idu mənokalan n əddənet əssəɣməran-tu. ²⁵ Šisəhar n əɣrəm wen wər əhhirnat daɣ təzzəgrət ən jilan, amaran wər ilkem ad əhârnat fəlas ehad s ab'as t-illa. ²⁶ Šimattiwen n əddənet kul a d-awəynat s əɣrəm wen aratan a tu-z-akfinen tanaya d ətəwəsəɣmar. ²⁷ Wər tu-z-iggəz a immidasan, wala deɣ i itamazalan talbast, wala bahu. Kalar wər tu-z-iggəz ar win as əktaban əsmawan-nasan daɣ əlkættab wa n təməddurt n Əjemar.

22

¹ Təzərəst n awen as di-issəkna angalos agarew was əhakkin aman-net təməddurt, əgân aman-net əɣətəs a n təlfənjart. Aman win əngâyan-du daɣ təxawit ən taɣmar ən Məššina d Əjemar, ² əkkan-du ammas ən tarrayt ta zəwwərat n əɣrəm. Šigadamayen n agarew wen əwâran-tanat eškan win əhakkinen təməddurt tarawnen maraw əzzænəfan n aratan d əššin, əkkulluk ən təllit. Ifərkak n eškan win, zuzəyan šimattiwen n əddənet. ³ Aɣrəm wen wər tu-z-iggəz arət təwâr tulɣant. Təxawit ta n taɣmar ən Məššina d Əjemar ad təggəz aɣrəm en da, təɣbəd tamattay-net Məššina. ⁴ Aytedan win əhanen aɣrəm wen ad ənəyan udəm n Əməli, iktəb deɣ esəm-net fəl təkannaren-nasan. ⁵ Wər z'iləs ahad igi, za wər z'ələsan addararat s ənnur ən

fətəla, wala ənnur ən təfuk, fəlas Ēməli Məššina a tan-z-issəmməlwəwan, amaran əxkəman har faw.

Təsəxtəmt: Assa ən Ƴaysa

⁶ Inn-i angalos: «Batuten šin əssiflasnat, əmosnat deƳ tidət; Ēməli Məššina, s ənta a imosan Ēməli n ənnəbitan a d-issəgłan angalos-net fəl ad assaknu inaxbıdan-net arat as kundaba iga daƳ azzaman wər nəggug.»

⁷ Inna Ƴaysa: «Ēnəy! Ƴzayax-in tarmad! Ibbilal wa izzəgzanan ibbirdag deƳ i batuten a nafalalnen daƳ əlkəttab wa əmosnen isalan n aratan win əmərədda əd win d-əzaynen!»

⁸ Nak Yaxya a islan y aratan win, amaran ənāyaq-qan. As əsleƳ y aratan win, ənayaq-qan, fataqqeƳ Ƴur daran n angalos wa di-tan-issəknan y ad t-əxbəda. ⁹ Mišan inn-i: «Alak! Ad wər tagax adi! Nak ənaxbid ən Məššina a mosa šilat-nak kay əd mədrayan-nak win ənnəbitan, əd win əbbərdagnen y awal wa ihan əlkəttab wa. Ƴxbəd Məššina!» ¹⁰ Dəffər awen inn-i: «Ad wər təxbəra isalan win nafalalnen daƳ əlkəttab wa əššewalnen daƳ batu n aratan win əmərədda əd win d-əzaynen, fəlas alwaq ihoz! ¹¹ Wa wər noƳed, agliwet daƳ iba n taqqat-net, wa immədasan, agliwet daƳ ammadas-net. Wa oƳadan amaran agliwet daƳ taqqat-net, wa zəddigan deƳ iššitiwet tazdak.»

¹² Inna Ƴaysa: «Awalla! Ƴzayax-in tarmad, amaran ewayax-in ərruzmatan-in y ad akfaƳ awedan kul arozan win tu-šaššawadan mazalan-net. ¹³ Nak a imosan Alfa, əmosa deƳ Omega, almaƳna wa azzaran ilkām, təsəntit əd təzərəst.

¹⁴ Ēbbilalan win rabbaznen šikadkaden-nasan zazdagan-tanat fəl ad əgrəwan alxaq daƳ ašək wa n təməddurt, əggəzan deƳ aƳrəm wa zəddigan en əs təsəhar šin as itawaggaz! ¹⁵ İdan əd maššaxawan ədəganet sədi, əntanay əd maggan n əzzəna əd maggan ən man əd naxbıdan n əssənəman d awedan kul wa iran bahu itagg-ay!

¹⁶ Nak Ƴaysa, əssigłax-in angalos-in y a dawan-itagayyat daƳ Ēlkənısatən fəl aratan win di. Nak əzzurrəyya ən Dawəd a d-əgmada, əmosax atri imilawlawan wa d-igammadan s aƳora.» ¹⁷ Inna İnfas wa Zəddigan əd tətut ta n təmazlayt: «Asa-du!» I isallin kul anniwet: «İyyaw!» Wa iffudan kul asiwet-du. I iran adi kul ašwet aman win sidurnen tawagrawnen wala inazzan!

¹⁸ Nak iman-in Yaxya, əggəyyeƳ y awedan kul wa islan isalan win nafalalnen daƳ əlkəttab wa əššewalnen daƳ batu n aratan win əmərədda əd win d-əzaynen as: I iššotan arat fəl salan win, a das-iššitu Məššina daƳ albalatan win əttəmalnen daƳ əlkəttab wa. ¹⁹ I daƳ-san ikkasan arat deƳ,

ad ikkəs Məşşina adagar-net day ašək wa isiduran d əxrəm
wa zəddigan win əttəmalnen day əlkəttab wa.

²⁰ Wa igəyyen fəl aratan win, isattadd-en, inna: «Awalla,
əzayağ-in tarmad.» Amin! Iyyaw, Əməli Үaysa! ²¹ Ya Əməli
Үaysa təkfeq-qawan arraxmat ketnawan.